

**1:1** Uti-utieelo daputali nenemoya li Isa, wali mai lei Dauda, wali mai lei Abraham. Monto olei Abraham demola olei Dauda, tataa-nggulaalo nenemoya li Isa odie mola: **2** Abraham, Isihaka, Yako, Yehuda wau mongo wutatio, Peres wolei Jera (tiilo limongolio tanggulio ti Tamar), Hejron, Ram, Aminadab, Nahason, Salmon, Boas (tiilolio ti Rahab), Obed (tiilolio ti Rut), Isai, wau Olongia Dauda. **6 (6b)** Monto olei Dauda demola maasa bangusa lo Isirailu piloyahu ode Babel tulatuladu tataa-nggulaalo odie mola: tei Salomo (tiilolio yito bakasi dile lei Uria), Rehabeam, Abia, Asa, Yosapat, Yoram, Ujia, Yotam, Ahasa, Hijikia, Manase, Amon, Yosia, Yekonya wau mongo wutatio. **12** Monto bangusa lo Isirailu pilolayahu ode Babel demola pilotutua li Isa tulatuladu tataa-nggulaalo odie mola: Yekonya, Sealtiel, Jerubabel, Abihud, Eliyakim, Ajur, Jadok, Akhim, Eliud, Eleajar, Matan, Yako, Yusu dile li Maria. Wau monto oli Maria boi-boitolo pilotutulio mai ti Isa tailuntelio Almasi. **17** Oditolio monto olei Abraham demola olei Dauda, ngoámila woluo mopulaa pato wali. Monto olei Dauda demola maasa bangusa lo Isirailu pilolayahu ode Babel woluo mopulaa pato wali olo. Monto maasa bangusa lo Isirailu pilolayahu ode Babel demola pilotutua li Isa woluo poli mopulaa pato wali. **18** Odie mola hikaayati pasali u pilotutua mai li Isa Almasi. Tiilo-Lio yito ti Maria titiilantahe wolei Yusu. Bo tou timongolio diipo lonika lopatatai ti Maria mailombodaá. Diila otaawa lei Yusu deu ti Maria mailombodaá sababu kawasa lo Rohullah. **19** Tei Yusu, tilantahio boito, deuyito-yito ngotaalio talaito modungohe butoo lo agama. Oditolio patujulio mabuntoolio tilantahio boito wolo poó-poóoyo, alihu ti Maria diila moolito totalu lotaa dadaata. **20** Tou tei Yusu donggo hemo timbangi mola suáli boito, tio maloó tohiilopo. Todelomo tohiilopio boito, tio loóonto malaikati ngota lo Eeya lotahuda mai olio, "Yusu, wali lei Dauda diila oohe monika woli Maria; sababu taúkikiiiá tabanta-bantala olio boito lowali tokawasa lo Rohullah. **21** Ti Maria mamotutu mai talolai kikiiiá ngota. Talolai boito musi unteemu maó Isa, sababu Tio mamopoáahu umati-Lio monto duduu-sawaalo limongolio." **22** Ngoáamilalo boito motoduo mai odito alihu pohupohutu wolo u matilahuda mai lo Eeya lotimbulude tonabi-Lio, odie,

**23** "Tadulahu ngota maombodaá wau mopotutu mai talolai kikiiá ngota. Taukikiiá boito maunteelio 'Immanuel'." (Immanuel bahasa lo Ibrani u bolilio maó, "Allahu Taáala mai wolanto"). **24** Lapataó tei Yusu malobongu mola, pilohutulio maó wolo utilahuda Malaikati lo Eeya boito to olio. Tio malonika woli Maria. **25** Bo ngotilonggadu ti Maria diipo lopotutu mai lo walaio boito, tei Yusu diila loulauwa woli Maria. Wau tou walaó boito mapilo tutulio mai, tei Yusu longunte maó o-Lio Isa.

**2:1** Ti Isa pilotutulio tokota Betlehemu tolipu lo Yudea tomaasa li Olongia Herodes hemomalanta. Tou boito dengolo lota ahali lopoliyama lonto tiimulu lonaó mai ode Yerusalemu. **2** Timongolio helohintu ode utoonulalo maó, "Toutoonu Walaó boito, tamaa potutuolio mai mowali onlongia tau lo Yahudi? Ami maloóonto poliyama-Lio lobutu mai towimbihu tiimulu, wau ami lonaó mai molubo o-Lio." **3** Tou ti Olongia Herodes loódungohe suáli boito, tio iloohea daá, odito olo ngoáamila tau to Yerusalemu. **4** Yi tio maleinaó mai ngoáamila iimamu tauwa wau guguu-ruwaalo agama bangusa lo Yahudi lotiambu. Tulusi tio lohintu maó olimongolio, "Toutoonu u mapotutualio mai li Olongia tadilanti lo Allahu Taáala?" **5** Timongolio lolametaó, "Tokota Betlehemu tolipu lo Yudea. Sababu odie mola u tiluladio mai ngotaalio lonabi, **6** 'Yio Betlehemu, tolipu lo Yehuda, yio sama-samaata diila pulito ukikiió towolota lo kokoo-tawaalo upolohuna daá to Yehuda. Sababu monto olemu mamei dungga mai tauwa ngota tamamo titauwa to umati-U Isirailu.'" **7** Lapataó loótapu maó katalangani boito, tei Herodes malei tiangai tahi ahalia lopoliama lonto tiimulu boito loui poó-poóoyo. Lapataó yilintulio maó olimongolio omolua patatio poliyama boito bohulo iloontonga. **8** Lapataó uito ilahulalio mola timongolio ode Betelehemu wau lolahuli maó utie, "ponaólo, mola lolohe mai Walaó boito wolo ulintapo. Wau wonu timongoli moódungga o-Lio, pohabaria mai olau, alihu wau olo mamonaó mola molubo o-Lio." **9** Tulusi timongolio malonaó. Timongolio luli loóonto poliyama u iloontonga limongolio omoóomolu to ambahu tiimulu. Donggo boli wengahi mongolio loóonto poliyama boito! Poliyama boito mulomulo limongolio wau malo huheli pasipasi toitaato tambati lo Walaó boito. **11** Timongolio

tilumuwoto ode bele boito wau loóonto Walaó boito woli Maria, tiilo-Lio. Timongolio malo sujudu wau lolubo Walaó boito, tulusi lomuó tambati lohalata limongolio wau lopodewo maó o-Lio hulawa, alama wau damahu moonu. **12** Allahu Taála malo poéelai olimongolio todelomo tohiilopo alihu diila maó mohualinga mola odelei Herodes. Oditolio timongolio malo hualingo lolibaya dalalo wewo. **13** Tou tahi ahalia lopoliana boito malo monggato, malaikati lo Eeya luli lopo bilohei batanga odelei Yusu todelomo tohiilopo. Malaikati boito malo tahuda, "Tei Herodes omakasudu mololohe Walaó boito wau pateelio mate-mateelo maó. Sababu uito pobongulo, delowalo Walaó boito woliilo-Lio momonggata mola ode Masiri. Potibiluópo mola teto tunggula Wau mamuli motahuda mai olemu." **14** Tei Yusu malobongu, wau tou huilo boito tio lodelo Walaó boito woliilo-Lio lomonggata mola ode Masiri. **15** Timongolio malo tibiluloá mola teto tunggula tei Herodes yilate. Odi-odieelo mola malo toduo wolo u tilahuda lo Eeya lotimbulude tomongo nabii-Lio, odie, "Tio motianga Walaúu-U monto Masiri." **16** Tou ilotaawa lei Herodes tahi ahalia lopoliana lonto tiimulu boito longaakali olio, maloingo daá tio. Tulusi tio malei pate yila-yilateelo maó ngoáamila mongo lolai kekeei taa umululio totibawa dulo taunu to Betelehemu wau topalitio. Uito lotuuúde wolo katalangani u lotapulio lonto tahi ahalia lo poliyama boito tomimbihu saaátilio poliyama boito iloontonga. **17** Odi-odieelo mola lotoduo mai loui wolo u mapeéenta yiloiya li Nabi Yeremia, odie, **18** "To Rama dungo-dungohei suala hilimuta yinggile wau hiyongo, Hiliyonga li Rahel mongo walaio; tio diila mohuto liyangolo sababu timongolio madiduu." **19** Lapataó tei Herodes yilate maó, wau tou tei Yusu donggo to Masiri malaikati ngota lo Eeya luli lotibilohei to tohiilopio. **20** Malaikati boito malo tahuda, "Tau-tauwalo taóhilaa momate mateelo maó to Walaó boito mailate. Sababu uito pobongulo, delowalo Walaó boito woliilo-Lio wau pohualingolo mola ode Isirailu." **21** Tei Yusu malobongu, wau lodelo Walaó boito woli Maria luli lohualinga mola ode Isirailu. **22** Bo lapataó tei Yusu loódungohe deu tei Arkelau, walaée Herodes talolai malo buulota woliyamolio lowali onlongia tolipu lo Yudea. Oditolio tei Yusu mailoohe lonaó mola. Lapataó tio loótoduo mai potuhata lo Eeya u wumbutio mola

todelomo tohiilopo, tio lonaó ode madala lo Galilea. Mota teto tio lotibiluloá tokota u ilunte Najaret. **23** Loui odito malo toduo mai wolo uiloiya lomongo nabi pasali lo Walaó boito: "Tio maunteelio Taulo Najaret."

**3:1** Tou boito malonaó mai tei Yahya Tamopolihua ode huta hungayo u luasi daá to Yudea wau malo lumulo lohutuba. **2** "Polilihulo monto duduu-sawaalo limongoli," ualio maó "sababu Allahu Taaala mahuáa momalenta odelo Olongia!" **3** Tei Yahya botieelo tamila-kusudu li Nabi Yesaya todelomo uiloiyaalio botie, "Woluo tawuwa-wuwaatiá to huta hungayo u luasi daá, 'Podapato maó dalalo ode Eeya; poópayade maó dalalo o-Lio.'" **4** Tei Yahya pakepake boó lolambuto unta. Bintolo lo wohutalio walito, wau uaalolio bulita wau hula lotiia lo oáayua. **5** Dadaata tau lonto Yerusalemu, lonto ngoilanggubu lipu lo Yudea wau lonto mamaa-dalawaalo topalito Dutulaa Yordan lonaó mai odelei Yahya. **6** Timongolio mai longaku duduu-sawaalo limongolio wau tei Yahya helo polihu olimongolio to Dutulaa Yordan. **7** Dadaata olo taulo Parisi wau Saduki lonaó mai odelei Yahya mai leilihu. Bo tou tio loóonto olimongolio lonaó mai malo loiya tio olimongolio, "Timongoli tau moleeto! Tatoonu talo loiya deú timongoli moólahi monto hukuumaní lo Allahu Taaala u mamei dungga mai? **8** Pobilohé maó wolo huhutuumu deú timongoli malo lilihu lonto duduu-sawaalo limongoli. **9** Diila maó polantobu u timongoli moólahi monto hukuumaní wolo molojiya deú tei Abraham yito tinenemoya limongoli. Poótoloma maó, monto boboo-tuwaalo botie olo Allahu Taaala mambo mohutu mai wali odelei Abraham! **10** Bulingo malei dapato u poluwodela ayu demola wuwa-wuwaaátio lomaó. Timiidu ayu udiila momungo u mopiohe maluwodulo wau pomahulio ode delomo tulu. **11** Watia mopolihi olimongoli wolo taluhu u mopo bilohé deú timongoli malo lilihu lonto duduu-sawaalo limongoli; bo tamamei dungga mai lapataó Watia, mamó polihu olimongoli wolo Rohullah wau tulu. Tio lebe udaá maó wolaatia. Penu bo modelo sapatu-Lio watia diila paatuti. **12** To uluú-Lio otiitihe polaapalo ngoáamila pale-Lio tunggula belesi. Pale maimoo-Lio ode delomo yibungo, bo ngoáamila taapo lopale

mapobuo-Lio todelomo tulu udiila mowali mate." **13** Tou boito ti Isa lonaó lonto Galilea ode Dutulaa Yordan. Mola teto Tio lonaó mai odelei Yahya wau leilihu. **14** Bo tei Yahya lohimontala diila lololimo hihile-Lio boito, wau loloiya maó, "wawaatiyalo tapatutilio lihua li Paaá. Botia tumbaó ti Paaá tamalonaó mai ode laatia." **15** Boti Isa lolametaó, "Huliaalo maó bo tosaaáti botie. Sababu loui odito ito mamohutu maó ngoáamila u kahandakio lo Allahu Taáala." Oditolio mailihua lei Yahya ti Isa. **16** Lapataó yilihualio, ti Isa huáa yilumualai lonto taluhu todutulaa boito. Debolo hulungo lohuóolo mola wau ti Isa loóonto Rohullah lotuhutai debo odelo bulungi poombo ode yitaa-Tio. **17** Lapataó dungo-dungohei suala lo Allahu Taáala lotahuda mai, "Tabotieelo walauu-U tapilonu-U. Tio moósanangi hilaa-U."

**4:1** Lapataó ti Isa dilelo lo Rohullah ode huta datahu u luasi daá wau delita alihu mola yimontala lo Ibilisi. **2** Wopato pulu hui ti Isa diila lolamela. Lapataó Tio mapilolango. **3** Ibilisi lonaó mai ode o-Lio wau loloiya maó, "Yio botie Walaó Allahu Taáala, diila odito? Nte ahuli maó boboo-tuwaalo botie mowali roti." **4** Ti Isa lolametaó, "Todelomo Kitabi tulatulade: Manusia diila moótumulo bo wolo roti wambaó, bo olo monto motiidu pilimani u pilotahuda mai lo Allahu Taáala." **5** Lapataó uito ti Isa dilelo lo Ibilisi ode Yerusalemu, tokota mantali, wau pilopo tihulio Tio tobilinga Bele lo Eeya. **6** Lapataó Ibilisi loloiya maó o-Lio, "Yio botie Walaó Allahu Taáala, diila odito? Wonu odito potidehulo mola ode walungo; sababu todelomo kitabi woluo tulatulade odie, 'Allahu Taáala mamopoáhu mai mamaa-laikati-Lio moduóla ole-Mu, timongolio mamolanggomo ole-Mu wolo uluu limongolio, alihu oáatu-Mu diila meiteduó tobotu.'" **7** Ti Isa lolametaó, "Bo todelomo Kitabi tulatulade olo, 'Diila mowali yio mohimontala Allahu Taáala Eeyaamu.'" **8** Lapataó Ibilisi luli lodelo mola li Isa ode huidee molanggato daá wau lopobilohé o-Lio ngoáamila bele biluloá saaha li olongia todunia wolo okokayalio. **9** Lapataó loloiya maó Ibilisi odeli Isa, "Ngoáamila botie mawohiu mai ole-Mu, wonu Yio mosujudu molubo olaú." **10** Ti Isa lolametaó, "Pohinggi maó yio, wuu Tamoo-heingawa ode dusa! Todelomo Kitabi tulatulade:

Tubowa mola Allahu Taála Eeyaamu, wau pomayaalo to Eeya wambaó!"

**11** Mapulitio Ibilisi lololaa maó li Isa, wau maaaa-laikatiyalo lonaó mai lohinta li Isa. **12** Tou loódungohe deu tei Yahya mapilo tuwotio ode delomo tutupa, ti Isa malolahi ode Galilea. **13** Tilolaa-Lio maó Najaret, tulusi mola lotibiluloá to Kapernaum tobiihu lo Bulalo Galilea tomadala Jebulon wau Naputali. **14** Sababu ti Isa lohutu maó suali boito, malo toduo wolo uiloiya li Nabi Yesaya: **15** "Huta lei Jebulon wau huta lei Naputali, todalalo ode bulalo, to ngotuwali lo Dutulaa Yordan, Galilea huta lotaa diila Yahudi! **16** Bangusa tatumu-tumula todelomo u modiólomo maloóonto tinelo ulaba-labaalo motinelo! Duólo tapooó-poóoyo todelomo lipu lomautu malobutu mai tinelo u mobaango!" **17** Tumulalo mai tou boito ti Isa lolumula lopo habari, "Polilihulo monto duduu-sawaalo limongoli, sababu Allahu Taála mahuáa momalenta odelo Olongia!" **18** Tou ti Isa donggo naónaó topentadu lo Bulalo Galilea, Tio loóonto duulota tamoohalawa, deuító-yito tei Simon (tailunte olo Petrus) wolo wutatio, tei Andreas. Timongolio donggo hipoheupa tola tobulalo boito wolo pajala. **19** Ti Isa lotahuda maó olimongolio, "Dulo dudui mai Wau. Wau mamongaajali mai olimongoli momajala tau." **20** Tulusi timongolio malo lolaa maó pajala limongolio wau loduduó li Isa. **21** Ti Isa lonaó tulusi, lapataó loóonto poli taduulota mohutato wewo, deuító-yito tei Yakobus wolei Yahya, mongo walaée Jebedeus. Timongolio peé-peenta woliyamo limongolio donggo hemo poópiohe pajala todelomo bulotu. Ti Isa olo lotianga olimongolio, **22** wau timongolio huáa lololaa maó bulotu woliyamo limongolio, lapataó loduduó li Isa. **23** To Galilea, ti Isa lomalito ngoilanggubu lipu wau helo ngaajali to bebee-leyaalo u potabiaalo. Tio helo pohabari Habari Mopiohe deu Allahu Taála mamomalenta. Wau Tio olo helo poóluli tahi ngongota wau tahi o aibua. **24** Habari pasali li Isa boito malo loladu to ngoilanggubu lipu lo Siria, tilinggula dadaata taa lonaó mai ode o-Lio. Timongolio lodelo mai tau-tauwalo tahi duutola totoonulalo ngongoto u hidala-dalaala wau tahi susawa. Tau-tauwalo tailo tuanga lorohu u moleeto, tahe dudeetolo, didu mowali monaó, ngoáamilalo piloóluli li Isa. **25** Ngohuntua daá tau talo dududuó li Isa tou boito. Woluo talonto Galilea, woluo talonto Mopuulo Kota, lonto Yudea,



wau woluo olo talonto lipu to ngotuwali lo Yordan.

**5:1** Tou ti Isa loóonto taa dadaata boito, Tio lotaódee mola ode huludu. Lapataó Tio malo tihuloáa, tahiduduá o-Lio lonaó mai ode o-Lio, **2** tulusi Tio lolumulaó longajali olimongolio: **3** "Potisanangilo tutu tamolaasa diilalo okawasa wau bolo wambaó hemo tiwunela mola to Allahu Taáala; timongolio yito pongawaa umati lo Allahu Taáala! **4** Potisanangilo tutu taa hisuukalia lohilao; Allahu Taáala mamoliyango olimongolio! **5** Potisanangilo tutu taa hidupapawa lohilao; Allahu Taáala mamopoópolu mai danti-Lio ode limongolio! **6** Potisanangilo tutu taa mooloolo mohutu kahandaki lo Allahu Taáala; Allahu Taáala mamohutu molaasa sanangi hilaa limongolio! **7** Potisanangilo tutu taa u motoliángo taawewo; Allahu Taáala mamomonu mai olimongolio olo! **8** Potisanangilo tutu taa mantali hilaalio; Timongolio mamooónuhe Allahu Taáala. **9** Potisanangilo tutu tamopo toduo dame towolota lomanusia; Allahu Taáala mamomasisi mai olimongolio odelo mongo wala-Io! **10** Potisanangilo tutu taa modutolo poloálinaya sababu hemohutu kahandaki lo Allahu Taáala; timongolio yito pongawaa umati lo Allahu Taáala! **11** Potisanangilo tutu timongoli wonu henteólio, alinayalio wau pitanaalio domi Wau. **12** Mongo nabi tahitumula tou dipo-dipolulio mai limongoli maa ilalinayalio olo debo odelo uito. Potiwengahulo wau potisanangilo, sababu udaá pahala tosologa upilopo dapato lo Allahu Taáala olimongoli." **13** "Timongoli watingo lodunia. Wonu watingo diilalo olamita, wolo donggo mowali poó panggelolo? Diduluo maó hunalio, bo mapomahulio wau podudutaá lotau. **14** Timongoli yito baango dunia. Kota toitaato huludu diila mowali tuuólo. **15** Diaaluo tamopo leiita tohe, lapataó molaube tohe boito wolo tombe. Tio tumbaá mamopodutu maó tohe boito totambati lotohe, alihu moóbaango motiidu tau todelomo bele. **16** Odito olo baangumu wajibu tinetinela totalu lotau, alihu timongolio moóonto totoonulalo huhutuumu u mopiohe, tulusi mamomuji mola Allahu Taáala limongoli tosologa." **17** "Diila maó ponganggapu deú Wau dungga-dungga mai moluluta butoée Musa wau pongaajali lomongo nabi. Wau dungga-dungga mai diila molulutaó uito, bo mai mopoilaalo maó bolilio u otutuulio maó. **18** Poótoloma maó!

Ngotilonggadu hulungo wau dunia donggo woluo, boli hulupu ngotahe meaalo bontoó u pulito kikiió todelomo butoó boito, diila talulutolo, wonu ngoáamilalo diipo motoduo mai! **19** Masababu uito, titaalo tita tamo lambanga tala tuwau lo papaa-lentaalo boito, penu boli pulito ukikiió wau mongaajali maó taawewo mohutu olo u odito, mamowali tapulito ukikiió towolota umati lo Allahu Taáala. Boliio maó, titaalo tita tamoponaó papaa-lentaalo boito wau mongaajali taawewo mohutu u odito olo, mamowali udaá towolota umati lo Allahu Taáala. **20** Oditolio eelai maó: Timongoli diila pongalo aakali mowali umati lo Allahu Taáala, wonu diila mongilabotaó guguu-ruwaalo agama wau tau-tauwalo Parisi todelomo suáli moponaó kahandaki lo Allahu Taáala!" **21** "Otaawa limongoli deú toli nenemoyanto, woluo pongaajali debo odelo utie: Diila maó pomate mate-mateelo maó; titaalo tita tamomate mate-mateelo maó, musi adiliyolo. **22** Bo botia potahuda-U mai olimongoli, titaalo tita tamoingo taawewo, maa adiliyolo; wau titaalo tita tamomuayo taawewo, maa adiliyolo totalu lo Mahakama Agama. Wau titaalo tita molojiya taawewo, 'Mohulodu', paatuti tapilola ode delomo tulu lonalaka. **23** Masababu uito, wonu tala ngota towolota limongoli donggo hemo podewo wowohilio ode Allahu Taáala, tulusi loóéela mola deú woluo taa mongongoto hilaa to olio, **24** mamusi tolaaliopo dewolio boito totalu lotambati podewowalo, tulusi monaóopo mota modameya wolo tau boito. De lapatio maó uito, bolo tio mowali mohualingai mopodewo wowohilio ode Allahu Taáala. **25** Humayaalio woluo taa mopodulohe olimongoli ode mahakama, podameyapo wolio ngotilonggadu timongoli donggo owakutu tou diipo meidungga mota ode mahakama. Wonu diila, tau boito mamohudu olimongoli ode hakim, tamamohudu maó olimongoli ode pulisi. Lapataó pulisi mamopo tuwoto olimongoli ode delomo tutupa. **26** Wau poótoloma maó: Tantu timongoli diila tamoó lualai monto tutupa boito, tou diipo moóbayali sama-samaata ngoáamila dintamu boito." **27** "Otaawa limongoli deú woluo pongaajali debo odelo utie: Diila maó pojina. **28** Bo botia Wau motahuda mai olemu: titaalo tita molontongo taabua ngota wau lohuó hilaalio, yi tau boito malojina wolo taabua boito todelomo hilaalio. **29** Wonu matomu olowala moósababu olemu mohutu dusa, luóheelo wau



tapilalo botu lomato boito! Lebe mopioheó oolia tala tuwau lo pongawaámu louí ngangaawaálo maó matapilo-Lio ode delomo nalaka. **30** Wonu uluúmu olowala moósababu olemu mohutu dusa, putua maó tapilalo uluú boito! Lebe mopioheó oolia lo uluúmu ngotuwali louí ngangaawaálo maó tumuwoto ode nalaka." **31** "Woluo olo pongaajali debo odelo utie: motiidu taa u motalaki dilelio tabua, patuti mongohi maó tuladu talaki olio. **32** Bo botia potahuda-U mai olemu: titaalo tita tamo talaki dilelio lebe-lebe pomaó taabua boito diila lohama pipia, moósababu dilelio boito mojina, wonu dilelio boito muli monika. Wau titaalo tita tamonika wolo taabua tatilalaki boito, yi tio olo malojina." **33** "Otaawa limongoli deú toli nenemoyanto woluo pongaajali debo odelo utie: diila maó pomalonga danti. Wolo u mapilo dantimu wolo tadia totalu lo Allahu Taáala, musi pohutuwomu maó. **34** Bo botia potahuda-U mai olemu: diila maó potadia sama-samaata, mopio domi hulungo, sababu hulungo yito tambati huhuloá lo Allahu Taáala, **35** meaalo domi dunia, sababu dunia yito wapidu oáa-Tio; meaalo domi Yerusalemu, sababu ui-uitolo kota li Olongia daá. **36** Diila maó potadia olo domi lunggongumu, sababu yio lohihilao diila mowali mohutu huwoúmu mowali hula meaalo mowali moitomo, penu boli ngopata maó. **37** Loiyaalo maó wambaó, 'Ooo' meaalo 'Diila' -- lebe maó leeto dudunggalio mai monto ibilisi." **38** "Otaawa limongoli deú woluo olo pongaajali debo odelo utie: mato tuloáala lomato, dungito tuloáala lodungito. **39** Bo botia potahuda-U mai olimongoli: diila maó poniyati totaau hipohutua u moleeto to olemu. Boliio maó wonu woluo tau molambali putongimu olowala polulia maó tio molambali olo putongimu oloihi. **40** Wau wonu woluo tau mopodulohe olimongoli ode butoo wau mohile wolo moóohui boómu, wohia maó jumbamu olo to olio. **41** Wonu ngotaalio takawa-kawasa momakusa olimongoli momota balangilio ngokilo lamingio, potaala maó tunggula dulo kilo lamingio. **42** Wonu tau mohile u hitua-tuawua to olemu, wohia maó tio. Wau diila maó potoulia olo taa motohilaa mobulota u hitua-tuawua monto olemu." **43** "Otaawa limongoli deú woluo olo pongaajali debo odelo utie; toliánga maó mongo sahabatimu wau oingoi maó mongo satulumu. **44** Bo botia potahuda-U mai olimongoli: toliánga maó mongo satulumu, wau duái mola tau-tauwalo

tahipo ngalinayawa olimongoli, **45** Alihu timongoli mowali mongo walaó Allahu Taáala limongoli tato sologa. Sababu Allahu Taáala mopobutu mai mato lodula-Hio ode taa u mopiohe wau ode taa u moleeto olo. Allahu Taáala mopo tuhutai didi ode taa hipohutua u otutu wau ode taa hipohutua umoleeta olo. **46** Sababu wonu timongoli motoliángo bo taa motoliángi mongoli wambaó, pongola Allahu Taáala musi molontuli mai huhutuumu boito? Diila odito olo u hepilohutu lo tahipo tagia beya? **47** Wau wonu timongoli mongohi maó salamu bo tomongo sahabatimu wambaio, wolo hebatilio? Tau-tauwalo tadiila hitotaawa to Allahu Taáala olo hipohutua odito! **48** Allahu Taáala limongoli tosologa momonu mai ngoáamila tau wolo wimu-wimumuto ngoáamilalo. Timongoli olo musi odito."

**6:1** "Eelai maó, diila pohutua limongoli u pilopo wajibu lo agama totalu lotaa dadaata alihu oontonga lotau. Wonu timongoli mohutu u odito, yi timongoli diila tawohia lo Allahu Taáala limongoli wuupa monto sologa. **2** Oditolio, wonu timongoli mongohi sadaka ode taa mosikini diila maó pololade suáli boito debo odelo u hepohutuo lotau-tauwalo tahi munapikia. Timongolio yinao mohutu u odito todelomo bele potabiaalo wau to dalala daá alihu pujio lotau. Eelai maó, timongolio malo lolimo wuupalio. **3** Bo timongoli, wonu timongoli mongohi sadaka, wohia maó wolo poó-poóoyo, tilinggula diaaluo tamotota. **4** Hulialo maó huhutuumu boito diila otaawa boli lotatoonu, ngopohia Allahu Taáala limongoli tosologa. Allahu Taáala moóonto mai huhutuumu u tuutuó boito wau mamongohi mai wuupa olemu." **5** "Wonu timongoli moduá, diila maó potihutu debo odelo tahi munapikia. Timongolio motohilaa moduá hitihula tobele potabiaalo wau topotanga lodalalo alihu oontonga lotau. Eelai maó, ui-uitolo wuupa u matilolimo limongolio. **6** Bo wonu timongoli moduá, tuwotaó ode huwali wau heüti mai huhebu, wau poduáalo mola ode Allahu Taáala limongoli tadiila oontonga boito. Yi Allahu Taáala limongoli tamoóonto huhutuumu u tuutuó boito mamongohi mai wuupa olemu. **7** Wonu timongoli moduá, diila maó wulita wuwuulia tilinggula diaaluo bungolio wau huudio debo odelo tau-tauwalo tadiila hitooawa to Eeya. Timongolio hipo lantobua deü hihiie limongolio madungohe-Lio sababu

dua limongolio u hayahayaá boito. **8** Diila maó potihutu debo odelo timongolio. Mailotaawa lo Allahu Taáala limongoli wolo upalaluo limongoli, tou diipo pohile mola limongoli. **9** Oditolio poduaáalo mola odie, 'Allahu Taáala lo mongowatotia to Sologa: Eeyaalo Allahu Taáala tabo Tuwa-tuwaulo. Pohileaala dua Eeya tuboolo wau hulumatiolo. **10** Eeyaalo Olongia lo mongowatotia. Pohileaala dua Eeya momalenta todunia wau kahandaki lo Eeya dungohelio debo odelo tosologa. **11** Wuduwalo mai todulahee botie uáalo u palaluo lo mongowatotia. **12** Ambungua mai mongowatotia monto totala lo mongowatotia, debo odelo mongowatotia malo ngambungu taa u ototala to mongowatotia. **13** Diila maó polulia mai mongowatotia oolia lo palacaya tou mongowatotia yimontalalio bo lopatalo mai mongowatotia monto kawasa lo Ibilisi. Eeyaalo Olongia taókawasa wau molamahu u ohiheo-hiheolo maó. Amien.' **14** Wonu timongoli mongambungu taótotala tolimongoli, Allahu Taáala limongoli tosologa olo mamo ngambungu mai totalamu. **15** Bo wonu timongoli diila mongambungu totala lotaa wewo, Allahu Taáala limongoli tosologa olo diila mongambungu mai totalamu." **16** "Wonu timongoli mopuasa, diila maó potihutoó debo odelo tahi munapikia. Timongolio molomelo baya limongolio alihu ngoáamila tau motota deu timongolio hipuasawa. Eelai maó, ui-uitolo wuupa u matilolimo limongolio. **17** Bo wonu timongoli mopuasa, polimamutaó wau heidi mola huwoúmu, **18** alihu diaaluo tamotota deu timongoli hipuasawa, ngopohia Allahu Taáala limongoli tadiila oontonga boito wambaó. Allahu Taáala moóonto huhutuumu u tuutuó boito wau mamongohi mai wuupa olemu." **19** "Diila maó pohimoáa halata ode batangamu todunia, toutoonu wale wau taato mowali mopolusa wau tamootaówa monaó mai motaó maó. **20** Boliio maó, pohimoólo halata tosologa, toutoonu diaaluo wale wau taato u mopolusa wau tamootaówa diila monaó mai u motaó maó. **21** Sababu toutoonu halatamu teto olo hilaamu!" **22** "Mato yito tohe lobatanga. Wonu matomu mobaango, ngoáamila batangamu mobaango daá. **23** Bo wonu matomu pulauwolo ngoáamila batangamu modióloma daá. Oditolio wonu tohe todelomo batangamu boito modiólomo, donggo boli tontoyoómo odióloma boito!" **24** "Diaaluo penu boli ngota maó tamowali mokalaja ode tuani

duulota. Sababu tio maalebe motoliango ngotaalio wolo tawewo. Meaalo tio maalebe tatapu wau molotolo hilao toli tuani ngota wolo tawewo. Odito olo wolimongoli. Timongoli diila mowali mokalaja duolo Allahu Taála wau duolo halata upango olo. **25** Sababu uito poótoloma maó: diila maó polawalo pasali lou potumulumu, deúito-yito wolo umaa polameli mongoli wau uilumolo, meaalo wolo u mapomake limongoli. Diila matutumulo boito mongilabotaó wolo uáalo wau batanga boito wolo boó? **26** Pomilohe mola bulungi to dulente. Bubuu-lungiyalo boito diila hipomuloa, diila hipolipua, wau diila olo hipohimoá tilapula lou pilomulolio todelomo yibungo. Penu boli odito Allahu Taála limongoli tosologa helo laalaó bubuu-lungiyalo boito! Wolo timongoli diila lebe ohalaga wolo bulungi? **27** Tatoonu monto olimongoli tawolo lolawalio mowali mopohayaá tutumulio penu boli ngoidi maó? **28** Yilongola timongoli molawalo pasali lou pomakemu? Poótuoti mota bubuu-ngawaalo baakungi u hibusua tohuta datahu wau luasi. Bubuu-ngawaalo boito diila hipo kalajawa wau diila hipo hewola; **29** Boti Olongia Salomo penu boli odito kayalio, diila helomake boó debo odelo piohio lo bubuu-ngawaalo boito! **30** Huóyoto tohuta datahu wau luasi mobutu mai todulahee botie wau loombulio mola pobuolio tunggula maahu. Bo Allahu Taála helo podadai huóyoto boito odito piohio. Tidiyolo maó timongoli! Bo timongoli diila boti palacaya. **31** Diila maó polawalo wau molojiya, 'Wolo umaa lamelonto', meaalo 'wolo u mailumonto', meaalo 'wolo umaa pomakento'? **32** Susuu-aliyaalo boito laito heilapita lotaa diila hitooawa lo Allahu Taála. Lebe-lebe pomaó Allahu Taála limongoli tato sologa motota deu timongoli momalalu ngoáamilalo boito. **33** Oditolio, potolo anipo meimulo alihu Allahu Taála momalenta mai tutumulumu wau pohutua maó kahandaki-Lio. Yi, ngoáamila u wewolio mawohi mai lo Allahu Taála olo olemu. **34** Masababu uito, diila maó polawalo pasali lou loombu. Sababu uloombu olo woluo lolawalio lohihilao. Dulahee otie malo tuuúde osuusalio, diilalo maó duhengi."

**7:1** "Diila maó pomutoó taa wewo, alihu timongoli lohihilao olo diila butoó lo Allahu Taála. **2** Sababu wolooolio mola timongoli momutoó

taawewo, odito olo Allahu Taaala momutoai olimongoli. Wau tuuudu u pomake limongoli ode taawewo, mapomake lo Allahu Taaala olo ode limongoli. **3** Yilongola timongoli moonto pulingo ayu todelomo mato lo wutatumu, hiambola balaki todelomo matomu lohihilao diila pootuoti mongoli? **4** Woloolo mola timongoli mowali molojiya ma' to wutatumu, 'Dulo maingilou' mai pulingo ayu todelomo matomu', hiambola todelomo matomu lohihilao obaalaki? **5** Wuu munapiki! Yinggilapo baalaki monto matomu lohihilao, deuto yio mamooonto wolo mopatato, wau mo' poinggi ma' pulingo ayu monto mato lo wutatumu. **6** Diila ma' wohia balangi u mantali ode apula, alihu apula boito diila tamobale mai wau moluhu olemu. Wau diila ma' wohia mutiala ode boi, alihu boi boito diila ma' molumbe-lumbeta' mutiala boito." **7** "Pohile, yi timongoli mamoo olimo. Pololohu, yi timongoli mamootapu. Pongoko', yi huhebu mahuowalio olemu. **8** Sababu taa u mohile mamololimo; taa u mololohu mamootapu; wau taa u mongoko', mahuowalio to huhebu. **9** Towolota limongoli botie tingga woluo tiyamo ngota mongohi botu to walaio, wonu tio mohile roti? **10** Meaalo mongohi tulidu, wonu tio mohile uponula? **11** Penu boli timongoli moleeto, timongoli debo motota olo mongohi ma' u mopiohe ode mongo walai mongoli. Tidiyolo ma' Allahu Taaala limongoli tosologa! Eeya lebe ma' leeto mamongohi mai u opiohe totaa u mohile mola to Eeya. **12** Pohutua ma' taawewo debo odelo u otohila limongoli u pohutuo mai limongolio. Ui-uitolo bungo lo butoe' Musa wau pongaajali lomongo nabi." **13** "Tuwotolo moli huhebu u meepito, sababu huhebu wau dalalo udulu-ulunga ode nalaka uda' wau motanggalo, wau dadaata tau molibaya ma'. **14** Bo meepito wau mototolo huhebu wau dalalo u modelo tau ode tutumulo. Wau bo ngoidi taa u mo'otapu ma'." **15** "Po'daha-dahaalo ma' tomongo nabi paluti. Timongolio mona' mai ode limongoli motihutu debo odelo himba, bo tutuulio tutu timongolio debo odelo saligala mongantau. **16** Timongoli mamooonuhe olimongolio monto huhutu limongolio. Diuto u oduhi diila mongohi mai hungo lo angguru wau diuto u oduhi diila mongohi mai hungo lo ar. **17** Monto bungo lo ayu u molomiodu po'otapulalo hungo u mopiohe, wau monto bungo lo ayu udiila molomiodu hungo u moleeto. **18** Bungo lo ayu u molomiodu diila

moówohi hungo u moleeto, wau bungo lo ayu udiila molomiodu diila moówohi hungo u mopiohe. **19** Timiidu bungo lo ayu udiila moówohi hungo u mopiohe, luwodulo wau pobuwolo. **20** Odito olo mongo nabi paluti. Timongoli mamooónuhe olimongolio monto huhutu limongolio." **21** "Diila ngoáamila taa u mongibode ola-U, 'Eeya, Eeya,' mamowali pongawaá umati lo Allahu Taáala, bo wambaó taa u hipohutua kahandaki li Paapa-U tosologa. **22** Todulahu Kiama ngohuntua tau mamó loiya to ola-U, 'Eeya, Eeya, diila maawolo tanggulo Eeya mongowatotia helo potunggulaó tahuli lo Allahu Taáala? Wau diila maawolo tanggulo Eeya olo mongowatotia helo hinggi roroo-huwaalo moleeto wau helohutu dadaata moólinggolabu?" **23** Bo Wau mamolametai, 'Wau diila moótaawa woli mongoli! Pohinggi maó monteea, timongoli tahi pohutua u moleeto!' "**24** "Naa, taa u modungohe tahuda-U botie, wau moduduáaó, tutuuwauwa debo odelo taa molinepo momongu belelio toitaato botu. **25** Tou modehu didi, wau taluhu modaa mai wau dupoto moóhuu molemba bele boito, bele boito diila molohubu sababu mabilongu toitaato botu. **26** Wau taa u modungohe tahuda-U botie, bo diila moduduáaó, tio tutuuwauwa debo odelo taa mohulodu momongu belelio to hungayo. **27** Tou modehu didi, wau taluhu modaa mai dupoto moóhuu molemba bele boito, bele boito molohubu. Wau antululio polu-polutuó!" **28** Pulitio ti Isa yilapato longaaajali, wau tau-tauwalo tawoluo teto lolinggolabe daá loódungohe pongaaajali-Lio. **29** Sababu Tio helo ngaajali wolo tilihula, diila debo odelo guguu-ruwaalo agama limongolio.

**8:1** Ti Isa lotuhutai lonto huludu, wau dadaata tahelo duduá o-Lio. **2** Tou boito lonaó mai ngotaalio taóngongoto lo alipo u moótihela hapato. Tio malo tibonggohuu totalu li Isa, tulusi loloiya "Paaá, wonu ti Paaá mohuto, ti Paaá mowali mopoóluli mai olaatia." **3** Ti Isa lodedeta tau boito wau lotahuda maó, "Wau mohuto. Poluliilo!" Tou boitolo ngongotio maloluli. **4** Lapataó ti Isa lotahuda olio, "Eelai maó! Diila maó wunggulia penu boli olo tatoonu. Bo ponaólo mota odeli iimamu, wau pohilea maó olio u molantu mai deu yio maloluli. Lapataó uito podewowalo bake upilo malentai lei Musa, odelo bukuti ode tau-tauwalo deu yio otu-otutuulo maó



maloluli!" **5** Tou ti Isa tilumuwoto ode Kapernaum, ngotaalio polowila lo Roma lonaó mai lodungaya wo-Lio, wau lei tulungi o-Lio. **6** "Paaá," ualo polowila boito, "wato lowatia mongongoto tobele. Tio balabalata didu mowali mobongu monto potulehelio wau sikisaa daá." **7** Tahuda maó li Isa, "Wau mamonaó mota mopoóluli olio." **8** "Sambelolo Paaá," tametaó lo polowila boito, "watia diila paatuti mololimo li Paaá tobele lowatia. Palentailo li Paaá. De wato lowatia boito mamoluli. **9** Sababu watia olo mamusi taaaluku topalenta lo tatoitaato lowatia. Wau totibawa lowatia woluo olo mongo pajule tamusi taaaluku topalenta lowatia. Wonu watia mopoáhu pajule ngota, 'Ponaó!' tio olo monaó. Watia molojiya maó ode tawewo, 'Odia mai!' tio olo monaó mai; wau wonu watia momalenta wato lowatia, 'Pohutua maó utie!' tio poli mamohutu uito." **10** Tou ti Isa loódungohe wolo uiloiya lo polowila boito, Tio lolinggolabe daá. Lapataó Tio malo tahuda ode tau-tauwalo tadonggo hiduduá o-Lio, "Hebati daá tau botie. Boli towolota tauilo Isirailu diipo peéenta maó Wau loódungga iimani debo odelo utie udaálio! **11** Otutu! Dadaata tau mamonaó mai monto tiimulu wau otolopa u motiwengahe peé-peéenta wolei Abraham, Isihaka, wau wolei Yako todelomo Dunia Bohu lo Allahu Taáala. **12** Lebe-lebe pomaó tau-tauwalo tawajibulio mowali umati lo Allahu Taáala mapomahulo ode u modiólomo to bulemengio. Mota teto timongolio mahumoyongo wau modutolo." **13** Lapataó ti Isa lotahuda maó ode polowila boito, "Pohualingolo, wolo u pilalacayamu boito mamotoduo." Wau tou boitolo watolio maloluli. **14** Ti Isa lonaó mota ode bele lei Petrus. Mota teto Tio loóonto tiilo moluhengo lei Petrus donggo he polipitolo to potuluhelio. **15** Ti Isa lolontalaó uluúlio, tulusi polipitio yiloole. Tio malo bongu wau lohinta maó li Isa. **16** Tou malo laangai, hedilelo mai lotau odeli Isa dadaata tamaa ilotuanga lorohu u moleeto. Wau bo wambaó lou ngotahe pilopo hinggi maó li Isa roroo-huwaalo u moleeta boito wau helo poóluli olo ngoáamila tahi ngongota. **17** Ti Isa lohutu maó ngoáamilalo boito, wau woleeto lotoduwolo mola wolo uiloiya li Nabi Yesaya, deúito-yito "Tio momanta dudutolonto wau mopoóluli ngongotonto." **18** Dadaata daá tau hipalita toli Isa. Tou ti Isa loóonto olimongolio ngoáamila, Tio malo poáhu tahiduduá o-Lio lobalango bulalo. **19** Lapataó ngotaalio

guru lo agama lonaó mai ode o-Lio wau loloiya, "Paaá Guru, watia ohilaa moduduá li Paaá boli ode utoonu!" **20** Ti Isa lolametaó, "Saligala oliyango, wau bulungi obeealelio, bo Walaó Manusia diila otambati u poti balatalo." **21** Lapataó ngotaalio lomuri-Lio uwewo loloiya, "Paaá, polulia mai watia mohualingopo mota molobunga oliyamo lowatia." **22** Boti Isa lolametaó, "Dudui mai Wau, wau hulua maó taamate molobungaó taa matelio lohihilao." **23** Ti Isa malo titaé tobulotu wau tahiduduá o-Lio loduduá peé-peéenta wo-Lio. **24** Debolo dutala daá tutu lolemba mai bulalo tilinggula bulotu hepilo-pilomailio lobuóolo. Tou boito ti Isa donggo tuutuluhu. **25** Yi tahiduduá o-Lio malo himbideó o-Lio wau lopobungu maó o-Lio. "Paaá! Tulungi mai! Ito mamoaáhumo!" wuwaatii mongolio. **26** "Yilongola timongoli moohe?" tahuda maó li Isa. "Timongoli diila boti palacaya ola-U!" Lapataó ti Isa matilimihula mola wau longantinga dupoto wau bulalo boito. Tulusi bulalo mailoole daá. **27** Tahiduduá li Isa hilinggolabe. Uali mongolio, "Tatoonu Tio botie, tunggula dupoto wau buóolo moduduó palentaa-Lio!" **28** Ti Isa malei dungga mola ode ngotuwali lobulalo tomadala lo Gadara. Mola teto taduulota tamaa ilotuanga lorohu u moleeto lonaó mai ode o-Lio. Taduulota boito hileeta daá, tilinggula diaaluo penu boli ngotaa maó tabuheli lumaodeó teto. **29** Timongolio yilumualai lonto gowa lokuubulu wau hiwuwaatia, "Walaó Allahu Taáala, mapongola-Mu ami? Wolo Yio ohilaa mai mopo sikisa olami penu boli diipo wakutuulio?" **30** Diila molamingo monteeto, woluo boi dadaata daá donggo hipopeehuma uaalolio. **31** Roroo-huwaalo umoleeta boito lomolohone maó li Isa, "Wonu Yio mamopoáhu olami lumualaó, ahulilo mai ami tumuwoto mota ode delomo bobooiyaalo boito". **32** "Pohinggilo maó!" tahuda li Isa. Roroo-huwaalo umoleeta boito mailumualo lonto taduulota boito, tulusi tilumuwota mota ode delomo bobooiyaalo boito. Wau bobooiyaalo boito olo tilumeteó wau lotidehulo mola lonto biihu pangato ode delomo bulalo, tulusi yilumoduó. **33** Tahipo dahawa boi boito tilumeteó ode kota, wau mota lohungguli ngoáamila u lotoduo boito, wau olo tomimbihu wolo u lotoduo to taduulota tailo tuanga lorohu u moleeto boito. **34** Yi ngoáamila taa tokota boito olo malonaó mola lodunggaya woli Isa. Tou timongolio loóonto li Isa, timongolio

lomolohone tióotutua alihu Tio mololaa maó lipu limongolio.

**9:1** Ti Isa malo titaé tobulotu, tulusi lobalango bulalo, wau lohualingo ode tambati pilohuluta loduhu-Lio. **2** Mota teto tau lodelo maó ode o-Lio ngotaalio tadidu mowali monaó balabalata to amongo. Tou ti Isa loóonto malo odito udaá iimani lotau-tauwalo boito, Tio malo tahuda ode tadidu mowali monaó boito, "Posabalilo, walauu-U! Duduu-saamu mailambungu." **3** Dengolo lota guru lo agama tawoluo teto mahipo loiyawa todelomo hilaa limongolio, "Tau botie hemohina Allahu Taáala!" **4** Otaawa li Isa pikiilangi limongolio, oditolio Tio malo tahuda, "Yilongola pikiilangi limongoli malo odito leetio? **5** Toonu ulebe gambangi: motahuda maó, 'Dusamu mailambungu', meaalo motahuda maó, 'Pobongulo wau ponaólo'? **6** Bo botia Wau mamopo bukuti mai olemu deu todunia botie Walaó Manusia okawasa mongambungu dusa." Lapataó ti Isa lotahuda maó ode taa didu mowali monaó boito, "Pobongulo, bintaálo amongumu wau pohualingolo!" **7** Taa didu wowali monaó boito malobongu wau lohualinga ode belelio. **8** Tou tau-tauwalo loóonto maó ulotoduo boito, timongolio mailoohe wau helomuji Allahu Taáala, sababu Allahu Taáala malongohi mai kawasa u odito udaálio ode manusia. **9** Lapataó ti Isa lololaa maó tambati boito. Tou donggo naónaó, Tio loóonto ngotaalio tamootagia beya, tailunte Matiusi, donggo hulohuloáa tokantoli lobeyalio. Ti Isa lotahuda maó olio, "Dulo dudu mai Wau!" Yi tei Matiusi matilimihulo wau loduduó li Isa. **10** Tou ti Isa donggo hemo lamela tobele lei Matiusi, malonaó mai ngohuntua tamootagia beya wau tau-tauwalo tahe anggapuo diila mopiohu lo ulipu, loduduá lolamela peé-peéenta woli Isa wau tahiduduá o-Lio. **11** Woluo tau-tauwalo Parisi taloóonto maó suáli boito. Wau timongolio malohintu to tahiduduá li Isa, "Wolo sababuulio gurumu hemo lamela peé-peéenta wolo tamootagia beya wau tau-tauwalo tadiila hipiohe?" **12** Ti Isa loódungohe yiyintu limongolio boito tulusi lolametaó, "Taa seehati diila momalalu dokuteli, bo taa u mongongoto wambaó. **13** Tuletea maó wolo boliilo ayati lokitabi botie: 'Wau mokahandaki odehu hilao, wau diila bake lo binatang'. Sababu Wau dungga-dungga mai diila mai motianga taa u monganggapu batangalio

malopiohe, bo totaaa anggapuolio hina." **14** Lapatao uito tahiduduá olei Yahya Tamopolihua lonaó mai odeli Isa. Tulusi timongolio malohintu, "Yilongola amiaatia wau tau-tauwalo Parisi hemo puasa hiambola tahiduduá li Paaá diila?" **15** Ti Isa lolametao, "Woloolo mola huhama limongoli? Tingga mowali tahe tiloduo to potihunggu lonika boito motisuukali lohilao wonu tibulentiti lai donggo woluo peé-peéenta woli mongolio? Tantu diila! Bo mamei dungga wakutuulio tibulentiti lai boito mahamaalio monto olimongolio. Tou boito deúito timongolio mamu puasa.

**16** Diaaluo tau u momambola boó u madeedelo wolo kaingi ngopita udonggo bohu. Sababu kaingi pomambola boito mamowali umonggolongo wau mongedenga boó boito tilinggula mamoo sababu kaidingio lebe maó motanggalo. **17** Odito olo diaaluo taa u moluango angguru bohu todelomo bututu lowalito u deedelo. Sababu bututu boito mamobutaó wau molusa, tulusi anggurulio mamohuáyadu. Angguru bohu musi tuangola tobututu bohu olo, alihu duduluolo debo mopiohu." **18** Tou ti Isa donggo hemo tahuda ode tahiduduá olei Yahya Tamopolihua, malonaó mai tauwa ngota lobele potabiaalo. Tio malo tibonggohuu totalu li Isa wau loloiya maó, "Walaó watia taabua boheli yilate mola. Bo, ambunguolo potala ti Paaá monaó mota modedeta olio alihu tio muli tumumulai." **19** Ti Isa lato tilimihulaó wau peé-peéenta wolo tahiduduá o-Lio malonaó mota wolo tau boito. **20** Tohuungo dalaalo taabua ngota tamaa mopulaa dulo taunu hiheolio mongongoto hepobaata loduhu u aáaita wolo dulahio, lohimbideo loli wulea li Isa. To pikiilangilio, "Asali wau bo moó dedeta jumba-Lio, wau mamoluli." Tulusi tio malo dedeta biihu jumba li Isa. **22** Tou boito ti Isa loili maó wau loóonto taabua boito tulusi lotahuda olio, "Posabalilo, walauu-U! Kalana yio walauu-U palacaya ola-U, yio mamoluli!" Tou boitolo mola taabua boito loluli. **23** Lapatao ti Isa leidungga mota ode tauwa lobele potabiaalo boito. Tou ti Isa loóonto tahi poitoheya muusiki polo tilimi wau dadaata tau hibuluhuta, **24** yi ti Isa lotahuda maó olimongolio, "Lualaó timongoli ngoáamila! Walaó botie diila yilate; tio bo tuutuluhu." Ti Isa bo heiliya limongolio ngoáamila. **25** Tou tau-tauwalo boito mailumualo, ti Isa tilumuwoto ode delomo huwali lo walaó boito wau lodihu maó uluulio. Tulusi walaó taabua boito malobongu. **26** Habari

boito lololadu lomola ode ngoilanggubu madala boito. **27** Ti Isa malonaó lonteeto wau tohuungo dalalo tapitoó duulota loduduá o-Lio. Timongolio hiwaatia, "Walaée Dauda, ponua mai amiaatia!" **28** Tou ti Isa tilumuwoto ode delomo bele, tapitoó duulota boito lonaó mai ode o-Lio. Ti Isa lohintu maó olimongolio, "Wolo timongoli palacaya deú Wau mowali mopoóluli maó olimongoli?" "Palacaya, Paaá!" tametaó limongolio. **29** Lapataó ti Isa malo dedeta mato limongolio wau lotahuda maó, "Kalana timongoli palacaya, motoduwolo mai wolo u hehalapuo limongoli." **30** Yi timongolio malowali loóonto. Ti Isa malo poéelaó olimongolio wolo pintalo, alihu timongolio diila mopoótaa suáli boito penu boli olo tatoonu. **31** Bo timongolio malonaó wau helo pololadu lomola habari pasali li Isa ode ngoilanggubu madala. **32** Tou taduulota boito malonaó, taabubu ngota takiluwasa lorohu u moleeto dilelolio mai odeli Isa. **33** Ti Isa lopolahi maó rohu u moleeto boito wau tosaaátilo boito tau boito malowali lobisala. Taa dadaata boito malo linggolabe wau hipo loiyawa, "Diipo peénta maó ami heloóonto ulotoduo mai debo odelo utie to Isirailu!" **34** Bo tau-tauwalo Parisi hipo loiyawa, "Tauíwa lo roroo-huwaalo u moleeto boitolo tahe longohi kawasa o-Lio u mopolahi roroo-huwaalo u moleeto boito." **35** Odi-odieelo mola ti Isa helo lontale lonto madala tuwau ode madala uwewo wau lonto kambungu tuwau ode kambungu uwewo. Tio helo ngaajali to bebee-leyaalo potabiaalo, wau helo pololadu Habari Mopiohe pasali louí woloolo mola Allahu Taála momalenta odelo Olongia. Tio helo pooluli tau-tauwalo tahi duutola longongoto u hidala-dalaala wau taó aibu batanga. **36** Tou ti Isa loóonto taa dadaata boito, malodehu hilaa-Lio olimongolio, sababu didu tantu hilaa limongolio wau didu olootolo, debo odelo himba u diilalo odiiti. **37** Lapataó ti Isa lotahuda maó to tahiduduá o-Lio. "Tilapulio dadaata, bo taa u mongotolo maó bo ngoidi. **38** Sababu uito pohilea maó totaa ohuúwo lo ilengi boito alihu molao mai tamongotolo duólo tilapulio."

**10:1** Todulahee tuwau ti Isa malo tiangai mopulaa duulota tahiduduá o-Lio lotiambu. Lapataó Tio longohi máo kawasa olimongolio mopolahi roroo-huwaalo u moleeto wau mopoóluli ngongoto u hidala-dalaala wau aibu

lobatanga u hidala-dalaala. **2** Tanggulo lo tamopulaa duulota rasulu boito yito: Bohulio, Simon (tailunte olo Petrus) wolo wutatio tei Andreas, tulusi tei Yakobus wolo wutatio tei Yahya, uitolo mongo walaée Jebedeus. **3** Lapataó tei Pilipus wau Bartolomeus, wolei Tomas, wau Matiusi, tamootagia beya wolei Yakobus walaée Alpeus, wau Tadeus; **4** tulusi pulitio tei Simon Tamoo-duluwa huta pilohuluta loduhu wau tei Yudas Iskariot talo hiyanati li Isa. **5** Tamopulaa duulota rasulu boito lapataó yilao li Isa wolo loótapu popoo-tuhatawalo utie, "Diila maó ponaó ode madala lotau-tauwalo tadiila Yahudi. Diila maó olo ode kokoo-tawaalo taulo Samaria. **6** Bo ponaólo ode tau-tauwalo Isirailu, tolomodu toli mongolio tamailapalo. **7** Pohabaria maó olimongolio deü Allahu Taáala mahuáa momalenta odelo Olongia. **8** Poólulia maó tau-tauwalo tahi ngongota; potumula maó tau-tauwalo tahelo poowate; poólulia maó tau-tauwalo taóngongoto lo alipo u moótihela hapato, wau yinggila maó roroo-huwaalo u moleto. Timongoli malo lolimo ngoáamilalo boito louí beebasi. Oditolio, pongohi maó olo wolo beebasi. **9** Diila podelo doi hulawa, doi talaá, meaanto doi tambaha. **10** Diila podelo olo bututu losadaka, meaanto dulo pata boó todelomo nonaómu, meaanto sapatu, meaanto tunggudu. Sababu taa u mokalaja mawajibulio powoluwolo u palaluolio. **11** Wonu timongoli meidungga tokota meaanto kambungu, lolohe maó ngotaalio tamohuto mololimo olimongoli. Poti biluloópo wolio tunggula timongoli muli momonggato. **12** Tou timongoli tumuwoto ode bele, loiyawa maó, "Pohileaala duá Eeya mobalakati mai olimongoli." **13** Wonu tau-tauwalo tobele boito mololimo olimongoli, hulialo maó salamu boito debo toli mongolio. Bo wonu timongolio diila mololimo olimongoli, muli pongulia mai salamu boito. **14** Wonu woluo bele meaanto kota udiila mohuto mololimo olimongoli, meaanto diila mohuto modungohe olimongoli, tolailo tambati boito wau pongeéya maó peahuó monto paladu oátumu. **15** Eelai maó! To Dulahu Kiama, tau-tauwala lokota Sodom wau Gomora malebe gambangi ambunguo lo Allahu Taáala, wonu pobandingiolo wolo tau-tauwala tokota boito!" **16** "Poótuoti maó utie: Wau molao olimongoli debo odelo himba udiila olootolo ode huungo saligala u mongantau. Timongoli musi mopoódaha maó debo odelo tulidu wau tulusi lohilao



debo odelo bulungi poombo. **17** Poódaha-dahaalo maó, sababu timongoli mawaupolio wau mapo taaluolio wolo mahakama. Timongoli masakisaalio to bebee-leyaalo potabiaalo. **18** Timongoli madeloolio mota motaalua wolo tahi kawasawa wau ode mongo olongia sababu timongoli muri-U. Wau ui-uitolo hiyangio olimongoli u mongohi sakusi pasali ola-U olimongolio wau totau-tauwalo tadiila hitootawa lo Allahu Taáala. **19** Bo wonu timongoli deloolio u adiliyolio, diila maó polawalo pasali wolo u musi loiya limongoli, meaalo woloolo mola timongoli musi mobisala. Sababu wolo umusi loiya limongoli boito mapoótaa mai olemu to wakutuulio. **20** Sababu tamamo bisala towakutu boito diila timongoli, bo Rohullah tato sologa, motimbuludei olimongoli. **21** Mamotoduo mai deü tau mamohudu wutatio lohihilao pateelio mate-mateelo maó. Wau uitolo u mamotoduo towolota lotiyamo wolo walaio. Taukekeei mamoluwali tiilo tiyamolio wau mohudu maó olimongolio u pateelio mate-mateelo maó. **22** Timongoli malonuó lotaa ngoáamila sababu timongoli muri-U. Bo taa u moótaahangi tunggula pulitio mapo aahuwolo. **23** Wonu timongoli alinayaalio tokota tuwau, teteólo ode kota uwewo. Poótaa-U mai olemu: Tou diipo ilonaówa limongoli ngoáamila kota to Isirailu, Walaó Manusia malei dungga mai. **24** Muri diila lebe udaá wolo gurulio, wau wato diila lebe udaá woli tuanilio. **25** Malo tuuúde wonu muri ngota mowali debo odelo tigurulio, wau wato ngota debo odelo tituanilio. Wonu tauíwa louí ngaalaá mailohialio tanggulo Beeljebul, tidiyolo maó ngotuango belelio. Timongolio mawohialio tanggulo ulebe moleetaó!" **26** "Diila maó oohe tomanusia. Diaaluo utuutuó, udiila oontonga, wau diaaluo u hitua-tuawua u milakusudu hetuuólo diila tamo bonggali. **27** Wolo upilo tahuda-U mai olemu todelomo modiólomo musi wulia maó limongoli tou mobaango lodulahu. Wau wolo u pilolohuma tobulonga, pomala-lumualo mota uito boli toutoonu. **28** Diila maó oohe to limongolio tamomate batanga mate-mateelo maó, bo diila okawasa momate nyawa. Ooheelo Allahu Taáala taókawasa mopobinasa mai batanga wau nyawa todelomo nalaka. **29** Dinggota mohelu duluo wowali taliyolo wolo mato lodoi ngopita upulito kikiío. Penu boli odito diaaluo maó penu tuwau modehu ode huta wonu diila kahandakio lo Allahu Taáala limongoli. **30** Daata lohuwoó to

lunggongumu olo mailiáapa ngoáamilalo. **31** Sababu uito, diila maó oohe! Timongoli lebe ohalaga wolo bulungi dinggota!" **32** "Titaalo tita tamo masisi totalu lo taa dadaata deú tio muri-U, Wau olo mamomahe masisi olio totalu li Paapa-U tosologa. **33** Bo titaalo tita tamomahe totalu lotaa dadaata deú tio muri-U, Wau olo mamomahe olio totalu li Paapa-U tosologa!" **34** "Diila maó polantobu deú Wau modelo mai polodame ode dunia botie. Wau diila modelo mai polodame, bo pololawani. **35** Wau dungga-dungga mai mamoo sababu walaó talolai moluwali oliyamolio, walaó taabua moluwali oliilolio, wau walaó moluhengo bua moluwali oliilo moluhengio. **36** Ooo, tamamo luwali musu upulito udaá, deúito-yito pongawaá ngalaálio lohihilao. **37** Taa u motoliángo oliyamolio meaanto oliilolio lebe maó wola-U diila patuti mowali muri-U. Odito olo taa u motoliángo walaio talolai meaalo taabua lebe maó wola-U. **38** Wau taa u diila mohuto momota salipulio wau moduduá ola-U diila patuti mowali muri-U. **39** Taa u momintengi tutumulio, maóolia lo tutumulio, bo taóolia lo tutumulio sababu tatapu wau molotolo hilao to ola-U, mamootapu tutumulio." **40** "Taa u mololimo olimongoli, mamoma lolimo ola-U. Wau taa u mololimo ola-U, mamoma lolimo o-Lio talolao mai ola-U. **41** Taa u mololimo nabi sababu tio nabi, mamoma lolimo wuupa odelo ngotaalio lonabi. Wau tatoonu tamo lolimo ngotaalio tamopiohu sababu tio mopiohu, mamoma lolimo wuupa odelo ngotaalio lo tamopiohu. **42** Titaalo tita tamongohi uilumolo, penu bo taluhu mohuhulo ode tala ngota lotaa hehiinawa daá botie, sababu tio muri-U, pomalacayalo, deú tio maatantu mololimo wuupalio!"

**11:1** Lapataó ti Isa longohi maó totoonulalo potuhata ode tamopulaa duulota muri-Lio, Tio lololaa maó tambati boito. Tio mota longajali wau lopo loladu tahuli lo Allahu Taaála to kokoo-tawaalo u totili maó leeto. **2** Tei Yahya Tamopolihua tadonggo to tutupa maloó dungohe pasali lokalaja li Almasi. Tulusi tio lopoáhu dengolo lota tahiduduá olio odeli Isa mola lohintu, **3** "Ti Paaáalo tamamei dungga mai moduduá danti lo Allahu Taaála, meaanto amiaatia musi mohima mai taawewo?" **4** Ti Isa lolametaó, "Pohualingolo mola odelei Yahya wau polelea maó wolo u

mailo dungohe wau iloontonga limongoli: **5** Taa pitoó maloóonto, taa didu mowali monaó malowali lonaó, taóngongoto lo alipo u moótihela hapato maloluli; taa bungolo maloó dungohu, taa yilate maa tilumumulai, wau Habari Mopiohe monto Allahu Taáala pilo habariilio ode tau-tauwalo tahi mosikinia. **6** Potisanangilo tutu taa diila o alaasani diila mololimo ola-U!" **7** Lapataó mongo utolia lei Yahya boito malonaó, ti Isa lolumulo lotahuda totaa dadaata pasali lei Yahya, tahuda-Lio, "Timongoli ode huta datahu u luasi daá wau delita mola loóonto wolo? Huóyoto ngopata upilo tomboto dupoto? **8** Timongoli lonaó mola loóonto wolo? Ngotaalio tapake pake lou mopiohu? Tau-tauwalo tahipakea odito hibiluloáwa tobele biluloá saaha li olongia! **9** Oditolio yilongola timongoli monaó mola ode huta datahu u luasi daá wau delita? Mola momilohe nabi ngota? Otutu, tumbaó lebe udaá maó lonabi ngota. **10** Sababu tei Yahya boitolo tamila kusudu todelomo ayati lo Kitabi botie, 'Tabotieelo utoliya-U, tahuda lo Allahu Taáala, Wau lolao mai olio leimulo wole-Mu alihu tio momuó dalalo ole-Mu.' **11** Poótoloma maó! Todunia botie diipo peéenta woluo taa lebe udaá maó wolei Yahya Tamopolihua. Penu boli odito, tapulito u kikiió towolota umati lo Allahu Taáala lebe udaá maó wolei Yahya. **12** Tumulalo mai tei Yahya helo pohabari habariilio tunggula tosaaáti botie, umati lo Allahu Taáala hetilehengi lotau-tauwalo tahipo tolopania motolo kawasa olio wolo palangi. **13** Tunggula pilodungga mai lei Yahya, ngoáamila butoée Musa wau pongaajali lomongo nabi hipo nubuwatia susuu-aliyaalo umusi motoduo mai. **14** Wau wonu timongoli mohuto palacaya, matei Yahya boitolo tei Elia, u podunggaalio mai manilu-buwati. **15** Wonu obulonga, podungohulo! **16** Wolo tatoonu Wau musi mopo ngilaboto tau-tauwala tojamani botie? Timongolio debo odelo taukekeei tahi huloáa topaatali. Tangopo ambua hipo ngiibode ode taa wewo, **17** 'Ami hemo polahu mola lahu wengahe ode limongoli, bo timongoli diila mohuto mongelungo! Ami hemo polahu mola lahu ilopatea wau timongoli diila mohuto humoyongo!' **18** Tei Yahya leidungga mai -- tio helo puasa wau diila longilu angguru; wau tau-tauwalo hipo loiyawa, 'Tio mailo tuanga lolati!' **19** Botia Walaó Manusia, dungga-dungga mai -- Tio helo lamela wau longilu; tulusi tau-tauwala hipo loiyawa, 'Bilohe tau boito! Olaloa, tahe huwoáalo, waito

lo tamootagia beya wau waito lotaa odusa.' Penu boli odito, tinepo lo Allahu Taaala obukuti monto hahaa-siliilio." **20** Lapatao ti Isa malo hentea kokoo-tawaalo, tambati toutoonu hepilo hutua-Lio dadaata daa u moolinggolabu. Sababu tau-tauwala to kokoo-tawaalo boito diila lohuto lolilihu lonto duduu-sawaalo limongolio. **21** "Matopotala timongoli, Korajim! Wau matopotala olo timongoli, Betsaida! Humayaalio totoonulalo moolinggolabu u pilohutu tohuungi mongoli mapilohutu to Tirus wau Sidon, yi tantu tau-tauwalo mola teto malohiheo lolilihu lonto duduu-sawaalo limongolio wau helomake boo lomilate wau helo podutu peaahuo to lunggongi mongolio. **22** Pootoloma maoo, to Dulahu Kiama, tau-tauwalo Tirus wau Sidon malebe gambangi ambunguo lo Allahu Taaala wolimongoli. **23** Wau timongoli, Kapernaum! Wolo timongoli mapolaiio-Lio demola sologa? Diila! Tumbaoo timongoli matapiloolo ode nalaka! Sababu humayaalio totoonulalo moolinggolabe u pilohutu tohuungi mongoli boito mapilohutu to Sodom, Sodom boito donggo woluo tunggula botia! **24** Pootoloma maoo, to Dulahu Kiama, taulo Sodom lebe gambangi ambunguo lo Allahu Taaala wolimongoli!" **25** Tou boito ti Isa lodua, "Paapa, Eeya tamotolo kawasa hulungo wau dunia! Watia mosukuru mola odeli Paapa sababu u ngoaamilalo boito hehuliyo li Paapa lonto tahi tootawa wau tao ilimi bo pilopo bilohei li Paapa to tau-tauwalo ode tadiila hioo sikolawa. **26** Ui-uitolo umooo sanangi hilaa li Paapa." **27** Lapatao ti Isa lobisala, "Totoonulalo u hitua-tuawua mailudu mai li Paapa ode laatia. Diaaluo penu boli ngotaa maoo tamotota to Walaoo ngopohia li Paapa. Diaaluo olo tamotota li Paapa ngopohia Walaoo, wau tau-tauwala ode tatoonu Walaoo boito mopoootaa maoo pasali li Paapa. **28** Ponaolo mai timongoli ngoaamila ode ola-U tahi woongola, wau tamolaasa mobuheto bantolio; wau mamopo nyamani mai hilaa limongoli. **29** Dudui maoo palentaa-U wau pobalaajali mai to ola-U. Sababu Wau botie ohilaa mopiohu wau dupadupapa lohilao, yi timongoli mamolaasa nyamani wau moheelo wawaoo. **30** Sababu totoonulalo palentaa-U moosanangi, wau banta u pilopo banta-U mai olimongoli moheelo."

**12:1** Todulahu Saabati tuwau, tou ti Isa yilumaodeo to halabolu lopale

ngopita, tahiduduá o-Lio malolipu pale, tulusi pilolamelio sababu hipolaanga. **2** Tou tau-tauwalo Parisi loóonto maó uito, malo loiya timongolio odeli Isa, "Bilohi! tahiduduá ole-Mu malo lambanga butoó lo agamanto lou hipohutua u dinidini todulahu Saabati." **3** Ti Isa lolametaó, "Diipo peéenta pilobaca limongoli tomimbihu wolo u pilohutu lei Dauda tou tio wau taulio hipolaanga? **4** Tio tilumuwoto ode delomo Bele lo Allahu Taaála; tulusi lolamela roti u mapilo dewolio ode Allahu Taaála. Lebe-lebe pomaó moduduá butoó lo agamanto, tio boli taulio diila mowali molamela roti boito -- bo mongo iimamu wambaó tamowali. **5** Meaalo diipo peéenta timongoli lopobaca maó todelomo butoée Musa u timiidu dulahu Saabati mongo iimamu tahe otuugasia to Bele lo Eeya, hipo lambangawa wuudu lodulahu Saabati, bo diila pilopo talalio? **6** Poótuota maó wolo u tilahuda-U botie: tea woluo talebe udaá maó wolo Bele lo Eeya. **7** Todelomo Kitabi tulatulade: Odehu hilaolo u kahandakiyo-U, diila bake lo binatangi. Wonu humayaalio timongoli otu-otutuulo maó mongalati tahuda-U boito, tantu timongoli diila tamo potala totau-tauwalo tadiila ototala. **8** Sababu Walaó Manusia okawasa todulahu Saabati." **9** Ti Isa lololaa maó tambati boito tulusi lonaó ode bele ngowale potabiaala. **10** Mota teto woluo tamailate uluúlio ngotuwali. Dengolo lota taóhilaa mololohe totala li Isa, lohintu maó o-Lio, "Wolo mowali mopoóluli tau todulahu Saabati?" **11** Ti Isa lolametaó, "Humayaalio woluo ngotaalio towolota limongoli ohimba tuwau, wau todulahu Saabati himba boito lodehu ode huango u modelomo; wolo taa ohuuwo lohimba boito diila motolopani momatulai himba boito monto huango boito? **12** Naa, manusia lebe ohalaga wolo himba! Oditolio, wonu odito, mowali motulungi tau todulahu Saabati." **13** Lapataó ti Isa lotahuda maó ode tailate uluúlio ngotuwali boito, "Popotulude mai uluumu." Tau boito malo potulide uluúlio, wau uluúlio boito maloluli debo odelo uluúlio ngotuwali. **14** Bo tau-tauwalo Parisi lololaa maó bele potabiaala boito, lapataó loheeluma u momate li Isa mate-mateelo maó. **15** Otaawa li Isa deu tau-tauwalo Parisi boito opatuju u moleeto to batanga-Lio. Oditolio Tio malo lolaa maó tambati boito wau dadaata tau loduduá o-Lio. Lapataó Tio malo poóluli ngoáamila tahi ngongota. **16** Bo Tio lodini olimongolio mopoótaa

pasalii-Lio ode taawewo. **17** Loui odito malo toduo wolo upilo tahuda mai lo Allahu Taaala lotimbulude toli Nabi Yesaya, **18** "Tabotieelo utoliya-U Tatilulaotu-U, tapilonu-U wau tamotuuude tohilaa-U. Rohu-U mawohi-U maó o-Lio, oaadili-U mapo habario-Lio ode babaa-ngusawalo. **19** Tio diila tamo buutola meaanto monguatió, meaanto mopidato todala-dalaalo daá. **20** Talilo u putuputuó diila tabolio-Lio, tohe u iyo-iyooopo diila tapatee-Lio. Tio mamohipate tunggula oaadili odungga; **21** ngoáamila bangusa mamó tiwunela to o-Lio." **22** Lapataó dilelolio mai odeli Isa ngotaalio tapitoó wau bubu sababu makiluwasa lorohu u moleeto. Ti Isa lopoóluli maó tau boito tilinggula tio malowali loóonto wau lobisala. **23** Ngoáamila tau lolinggolabe wau hipo loiyawa, "Wolo maa Tio botie walaée Dauda tadilanti boito?" **24** Tou tau-tauwalo Parisi loódungohe uito, timongolio lolametaó, "Tau botie bo mowali mohinggi rohu moleeto, sababu Beeljebul, tauwa lo roroo-huwaalo moleeto boito malongohi kawasa boito o-Lio." **25** Ilotaawa li Isa pikiilangi lotau-tauwalo Parisi boito. Oditolio Tio malo tahuda ode limongolio, "Wonu lipu tuwau mopoo mowali hipole-polemboá wau mumuusua, lipu boito diila tamoó taahangi. Wau kota tuwau meaanto ngaalaa u mopoo-pooó wau mumuusua ngota timongota mamóantulu. **26** Odito olo todelomo bele biluloá saaha li olongia lolati; wonu ungopo lemboá mopohinggi ungopo lemboá wewo, yi bele biluloá saaha li olongia lolati boito malo poo-pooó wau mamóantulu. **27** Timongoli hemoloiya deú Wau helo pohinggi rohu u moleeto sababu kawasa lo Beeljebul. Wonu odito wolo kawasa lotatoonu tahiduduá olemu mopohinggi rohu u moleeto. Tahiduduá olemu lohihilao boitolo talopo bukuti deú timongoli tilala! **28** Bo Wau mopohinggi rohu u moleeto wolo kawasa lo Rohullah. Wau uito boliilio deú Allahu Taaala malo lumulo lomalanta tohuungi mongoli. **29** Woloolo mola tau moó tuwotaó ode delomo bele ngotaalio tamolotolo molambata halataalio, wonu tio diila momungupo tamolotolo boito? Lapataó uito, deúito tio moó lambataó halataalio. **30** Taa diila motiwambaó ode ola-U tutuulio tutu motehengi ola-U. Wau taadiila momantu ola-U tutuulio tutu mongantulu kalajaa-U! **31** Masababu uito, ototai maó, wonu tau mohutu dusa wau molojiya u mohina, tio mowali ambunguolo! Bo wonu tio mohina Rohullah, tio diila mowali



ambunguolo! **32** Wonu tau molojiya u hitua-tuawua motehengi Walaó Manusia, tio mowali ambunguolo, bo wonu tio mohina Rohullah, tio diila mowali ambunguolo, mopio botia boli mola to ahiilari!" **33** "U moótapu maó hungo u mopiohu, bungolio musi molomiodu. Wonu bungolio diila molomiodu hungolio olo diila mopiohu. Molomiodu meaalo diila bungo lo ayu ngobungo maótaawa monto hungolio. **34** Timongoli tau moleeto, diila pongalo aakali timongoli moó loiya susuu-aliyaalo u mopiohe, wonu timongoli moleeto? Wolo uiloiya lotunggilo ui-uitolo u molepatai monto hilao! **35** Taa mopiohu mobisala susuu-aliyaalo u mopiohu, sababu tio polupolu lou mopiohu. Bo boliio maó taa moleeto mobisala susuu-aliyaalo lou moleeto sababu tio polupolu lou moleeto. **36** Oditolio, poótoloma maó: to Dulahu Kiama, ngota-ngota musi momanta timiidu uiloiyaalio udiila ohuna. **37** Sababu loiyamu lohihilao boitolo u pomake u molantu wolo yió ototala meaanto diila." **38** Lapataó dengolo lota guru lo agama wau tau-tauwalo Parisi loloiya maó, "Paaá Guru amiaatia ohilaa momilohe li Paaá mohutu u moólinggolabu." **39** "Donggo boli leetio wau juluhakalio tau-tauwala tojamani botie!" tametaó li Isa, "Timongoli meihutu ola-U u moólinggolabu? Timongoli diila tawohiya-U penu boli tuwau maó u moólinggolabu, ngopohia u moólinggolabu li Nabi Yunu. **40** Tei Yunu lotibiluloá dulahio totolu wau huilio totolu todelomo ombongo tola leidaá. Odito olo Walaó Manusia mamó tibiluloá huilio totolu wau dulahio totolu todelomo ombongo huta. **41** To Dulahu Kiama, tuango lipu lo Niniwe mamobongu mai peé-peéenta wolo tau-tauwalo tojamani botie wau mamopo tuludu olimongolio. Sababu tau-tauwalo Niniwe boito malo lilihu lonto dusa limongolio, tou tei Yunu lohutuba to limongolio. Bo tea botia woluo talebe udaá maó wolei Yunu! **42** To Dulahu Kiama, ti olongia taabua monto lipu lo Hulialio mamobongu mai peé-peéenta wolo tau-tauwalo tojamani botie wau mamopo tuludu olimongolio. Sababu u modungoheó pongaajali lei Salomo tamolinepo, ti olongia taabua boito malo huwato ode u molaminga daá lonto huudu dunia. Bo tea botia woluo talebe udaá maó wolei Salomo!" **43** "Wonu bolo rohu u moleeto mololaa maó tahingota-ngotaawa, rohu boito momalita tataa-mbatiyalo u mohengu mololohe tambati pohuhelialio, bo diila odunggaalio. **44**

Masababu uito tio molojiya, 'Wau mamuli mohualinga mola ode bele u matilolaau mai.' Tou tio leitungga mola odito, bele boito madidu otua, belesi wau aatulu. **45** Lapatao tio lona o wau malodelo pitu rohu wewo ulebe moleetao wolio. Lapatao timongolio tilumuwoto ode delomo tau boito, tulusi lotibiluloa teto. Wau pulitio ma o owowoluwoa lotau boito lowali lebe loleetao wolo u bohulio mai. Ui-uitolo olo u mamotoduo mai totau-tauwalo hileeta tojamani botie." **46** Tou ti Isa donggo hemo bisala wolo taa dadaata boito, malona o mai tiilo wau mongo wuta-Tio. Timongolio tilimihula o to bulemengio sambela hipo tolopania alihu moobisala wo-Lio. **47** Ngotaalio lotaa dadaata boito malo loiya ma o odeli Isa. "Paa a, tiilo wau mongo wutati Paa a woluo to bulemengio. Timongolio ohilaa mobisala woli Paa a." **48** Lapatao ti Isa lolameta o, "Tatoonu tiilaU? Tatoonu mongo wutatu-U?" **49** Lapatao Tio malolunu to tahidudua o-Lio wau lotahuda ma o, "Tabotieelo tiila-U wau mongo wutatu-U. **50** Taa mopona o kahandaki li Paapa-U tosologa, tio-tiolo wutatu-U talolai, wau wutatu-U taabua, wau tiila-U."

**13:1** To dulahulo boito ti Isa lololaa ma o bele boito tulusi lona o mota ode biihu lobulalo wau lotihuloa a mota teto. **2** Ngohuntua da a tau lotiambu topalito li Isa, sababu uito Tio mota lotihuloa a tobulotu, hiambola taa dadaata boito hitihula topentadu. **3** Lapatao ti Isa helo ngaajali ma o dadaata sua li to limongolio wolo lomake pohumaya. "Tamoo-mengia ngota lona o mota lomuayade bili," odi-odieelo mola ti Isa lolumula o wungguli-Lio. **4** "Tou donggo hemo muayade, woluo bili u lobiihuto todalalo. Tulusi bulungi tilumombotai wau bili boito pilo o pulitio. **5** Woluo olo u lobiihuto totambati u hibotu-botua, u hutalio ngoidi. Bili boito lato lobutu mola sababu bo ngoidi hutalio. **6** Bo tou mato lodulahu malo panggatai tutuu-mbuiyo boito lato lololante, lapatao lohengu wau yilate sababu waaatio diila tilumolodupo lodelomo. **7** Woluo olo bili u lobiihuto todelomo diuto oduhi. Diuto oduhi boito lobutu mola wau lohupetaa tutuu-mbuiyo tunggula yilate. **8** Bo woluo olo bili lobiihuto tohuta u molomiodu, tulusi lomungo; woluo u ngohetuto, woluo u wolomo pulu wau woluo olo u tolopulu piuwa." **9** Lapatao lohungguli ma o lo pohumaya boito ti Isa

malo tahuda, "Wonu obulonga, podungohu!" **10** Lapatao tahiduduá li Isa lonaó mai wau lohintu o-Lio, "Yilongola ti Paaá momake pohumaya wonu mobisala wolo taa dadaata boito?" **11** Ti Isa lolametao, "Sababu timongoli mailohia ponu u motota maó hitua-tuawua u sangaja tiluuó alihu diila otaawa pasali lou wolo mola Allahu Taála momalenta, hiambola timongolio diila. **12** Sababu taa u mailoluo, mawohiyalo poli, lebe dadaata maó, wau tio maólebealio. Bo taa diila owolo-wolo, yi ngoidi uwoluo to olio, tumbaó mahamaalo. **13** Uitolo sababuulio Wau momake pohumaya wonu mobisala wolo taa dadaata, sababu timongolio momilohu, bo debo odelo taa udiila moóonto; timongolio modungohu bo debo odelo taa udiila moódungohu wau diila mongalati. **14** Woleeto lowalilo mola u nilubuwati mai li Nabi Yesaya, 'Allahu Taála lotahuda: Timongolio mamó dungohe tulusi bo diila mongalati; timongolio mamó poótuoto tulusi bo diila otaawa limongolio wolo u yilowali. **15** Sababu pikiilangi lotau-tauwalo botie malowali lopuntuhu, bulonga limongolio malowali bungolo wau mato limongolio maloheuto. Utie motoduo mai alihu mato limongolio diila maó moóonto, bulonga limongolio diila maó modungohe, pikiilangi limongolio diila maó mongalati wau diila maó mohualingai ode ola-U, lapatao Wau mopoóluli maó olimongolio.'" **16** "Bo donggo boli untungilio timongoli," tahuda maó li Isa ode tahiduduá o-Lio, "Sababu timongoli otutu moóonto wau modungohu. **17** Poótoloma maó, dadaata nabi wau taa u modungohe to Allahu Taála ohilaa momilohe u ilontonga limongoli masaatia botie, bo diila oontongalio. Timongolio ohilaa modungohe wolo u ilodungohe limongoli masaatia botie, bo timongolio diila moó dungoheo." **18** "Dungohi maó wolo boliilo pohumaya pasali lo tamoo-muáyadea boito. **19** Bili u lobiihuto todalalo debo odelo tau-tauwalo tahipo dungohe habari pasali wolo mola Allahu Taála momalenta, bo diila mongalati. Ibilisi boito lonaó mai wau lolambata wolo uma pilomuáyadu todelomo hilaa limongolio. **20** Bili u lobiihuto totambati u hibotu-botua, debo odelo tau-tauwalo tahi podungohe habari boito wau huáa lololimo wolo hilaa sanangi. **21** Bo habari boito diila longuwaáto todelomo hilaa limongolio. Odito timongolio ilodungga lou suusa meaanto ilalinayalio sababu habari boito, yi timongolio huáa lomahe iimanilio. **22** Bili u lobiihuto tohuungo

diuto oduhi debo odelo tau-tauwalao tahipo dungohe habari boito, bo lolawalo pasali lo tutumuli mongolio sababu ohilaa tumumulo dadaata ngoáamilalo. Sababu uito habari lonto Allahu Taáala leihupeto todelomo hilaa limongolio tilinggula diila lomungo. **23** Wau bili u lobiihuto tohuta molomiodu debo odelo tau-tauwalo tahipo dungohe habari boito wau longalati daá. Timongolio lomungo ngohuntua, woluo uwolomo pulu, wau woluo olo utolo pulu piúwa tilapulio." **24** Ti Isa luli lohungguli maó pohumaya tuwau totaa dadaata, tahuda-Lio, "Wonu bolo Allahu Taáala momalenta owowoluwoalio debo odelo pohumaya botie: Ngotaalio lo tamoo-mengia lomuáyade bili mopiohu to halabolulio. **25** Tou huilio tuwau, tou ngoáamila tau donggo hituluhe, musu lo tamoo-mengia boito lonaó mai lomuáyadeó bili lopadengo tohiyango pale boito, lapataó tio malonaó. **26** Tou pipii-lomulowalo boito lobutu mola wau duduualio lotumbingai, maóontonga olo padengo boito. **27** Lapataó tau-tauwalo tahe wuupa lo tamoo-mengia boito lonaó mai ode tamoo-mengia boito wau loloiya maó, 'Tuani, diila mati Tuani talo pomulo maó bili u mopiohe to halabolu li Tuani? Woloolo mola waliilio tunggula mapilo tumula lo papaa-dengowalo mola teto?' **28** Tamoo-mengia boito lolametaó, 'Uito huhutu lomusu.' Lapataó tau-tauwalo tahe wuupa lo tamoo-mengia boito luli lohintu maó, 'Mohuto ti Tuani mola bunggato lamiaatia papaa-dengowalo boito?' **29** 'Diila,' tametio maó, 'sababu wonu papaa-dengowalo boito bunggatolo, pale boito olo maóbunggata. **30** Hulialo maó papaa-dengowalo boito tumumulo peé-peéenta tunggula meidungga pongotolalo. De mapoleleu maó ode tau-tauwalo tamongotolo; Yimoápo papaa-dengio boito, tihuta maó, tulusi pobuwolo. Lapataó yimoáalo palelio, tulusi tahua maó todelomo yibungo.' " **31** Ti Isa luli lohungguli maó pohumaya tuwau totaa dadaata, tahuda-Lio, "Wonu bolo Allahu Taáala momalenta owowoluwoalio debo odelo pohumaya botie: Sawi ngobotu hilama lo tahingota-ngotaawa, tulusi pilomulolio to halabolulio. **32** Bili losawi yito bili upulito kikiió. Bo wonu malobutu mai, bili boito mowali upulito udaá tohiyango lo pipii-lomuwaalo. Bili boito mowali bungo lo ayu, tilinggula bubuu-lungiyalo matumombotai motibeelea to tataa-ngolio." **33** Woluo pohumaya tuwau uwewo yilungguli maó li Isa totaa dadaata. "Wonu bolo

Allahu Taáala momalenta owowoluwoalio debo odelo rahi u hilama lotaabua ngota, tulusi ilulaulio wolo labu lotiligu wopato pulu loliiteli tunggula lolesi ngoáamilalo!" **34** Ngoáamilalo hepilo ngaajali maó li Isa ode taa dadaata wolo lomake pohumaya. **35** Loui odito lotoduwolo mola uiloia lonabi, "Wau momake pohumaya wonu mobisala woli mongolio; Wau mamopo habari susu-aliaalo u tuutuó tumulalo mai dunia botie lowali!" **36** Lapataó uito ti Isa lololaa maó taa dadaata boito, tulusi tilumuwoto ode bele. Tahiduduá o-Lio malonaó mai wau loloiya, "Nte tombanga mai li Paaá to olamiaatia boli lo pohumaya pasali lo papaa-dengowalo tohiyango pale boito." **37** Ti Isa lolametaó, "Taa u momuáyade bili umopiohe boito yito Walaó Manusia. **38** Halabolu boito yito dunia botie. Bili u mopiohu boito yito tau-tauwalo tamalowali umati lo Allahu Taáala. Papaa-dengowalo boito yito tau-tauwalo tahelo tiwambaó to Ibilisi. **39** Musu talomulo papaa dengowalo boito yito Ibilisi. Sembo lo pongotolo yito Dulahu Kiama, wau tau-tauwalo tahi pongotola boito yito maaaa-laikatiyalo. **40** Debo odelo papaa-dengowalo yimoólo wau tumbilalo todelomo tulu, de maóditu olo to Dulahu Kiama. **41** Walaó Manusia mamopoáhu mai maaaa-laikati-Lio mongambu maó monto wolota umati-Lio ngoáamila tamoó sababu tau mohutu dusa, wau ngoáamila taa wewolio tahelohutu u moleeto. **42** Timongolio ngoáamila mapo mahulo-Lio ode delomo tihengo tulu uyinta-yintalabu; mota teto timongolio mahumoyongo wau modutolo. **43** Wau tahi pohutua kahandaki lo Allahu Taáala mamotinelu debo odelo mato lodulahu todelomo Dunia Bohu lo Allahu Taáala, ti Paapa limongolio. Oditolio wonu obulonga, podungohu!" **44** "Wonu bolo Allahu Taáala momalenta, owowoluwoalio debo odelo pohumaya botie; woluo halata u tuutuó todelomo huta tulusi lotapulio lo tahingota-ngotaawa, wau luli pilopo tahulio maó todelomo huta. Lapataó kalana wengahio, tau boito mota lopotali ngoáamila milikiilio, tulusi luli lohualingai wau lotali huta boito." **45** "Wonu bolo Allahu Taáala momalenta, owowoluwoalio debo odelo pohumaya botie: Daahangi ngota hemo lolohu mumuu-tialaalo u ohalaga. **46** Tou tio loódungga mutiala ngobutu upolu-polutuó gaagario, tio huáa lonaó wau mota lopotali ngoáamilalo milikiilio, tulusi lotali mutiala u ngobutu boito."

**47** "Wonu bolo Allahu Taáala momalenta, owowoluwoalio pilohumaya wolo pajala upilo loladu tobulalo, lapataó loótapu mai tola u hidala-dalaala. **48** Tou pajala boito malopolu, pajala boito bilintaái ode tudulio lo tahi pahalawa. Lapataó timongolio malo tihuloáa wau lopowiwi maó totoo-lawaaló boito: U mopiohe tilahu limongolio to bolinggo wau udiila mopiohe pilomahuli mongolio. **49** Odito olo suáliilio to Dulahu Kiama, maaaa-laikatiyalo mamonaó mai mopowiwi maó tau-tauwalo tahileeta, monto tau-tauwalo tahi pohutua kahandaki lo Allahu Taáala. **50** Lapataó tau-tauwalo tahileeta boito mapo mahulolo ode delomo tihengo otulu. Mota teteetolo timongolio mahumoyongo wau modutolo." **51** "Wolo timongoli mongalati lou ngoáamilalo boito?" tahuda maó li Isa. "Mongalati Paaa!" uali mongolio. **52** Lapataó ti Isa lotahuda maó, "Uitolo sababuulio timiidu guru lo agama tamalowali pongawaá umati lo Allahu Taáala, deuító-yito debo odelo ngotaalio lituani lobe le talo polualo monto tambati lo halataalio babaa-langiyalo bohu wau deedelo." **53** Lapataó ti isa yilapato lohungguli maó popoo-humaayalo boito, Tio lololaa maó tambati boito, **54** tulusi luli lohualinga mola ode kambungu pilohuluta loduhu-Lio, mola teto Tio lonaó helo ngaajali tobele potabiaalo, wau tahelo dungohe o-Lio teto, hilinggolabe daá. Timongolio hipoloiyawa, "Lonto utoonu tau botie loóto duo mai hikimati debo odelo uito? Wau lonto utoonu Tio loótapu kawasa u mohutu moólinggolabe? **55** Diila maa Tio botie walaó pani lo ayu? Diila mati Maria boito tiilo-Lio; wau mongo wuta-Tio yito tei Yakobus, tei Yusu, tei Simon, walei Yudas? **56** Wau diila mamongo wuta-Tio tahi biluloáwa tewe olo? Lonto utoonu lotapu-Lio mai ngoáamilalo boito?" **57** Yi timongolio diila lololimo li Isa. Lapataó ti Isa malo tahuda olimongolio, "Nabi ngota hulumatilolio boli touótoonu, ngopohia to kambungu pilohuluta loduhulio wau tobelelio lohihilao." **58** Masababu uito ti Isa diila helohutu dadaata u moólinggolabe mota teto sababu timongolio diila palacaya.

**14:1** Tou boito tei Herodes, taókawasa tolipu lo Galilea, loódungohe pasali li Isa. **2** Tei Herodes malo loiya ode tahidihima pantungo lipulio, "Tantu utieelo tei Yahya Tamopolihua tamaa luli tilumumulai! Uito



sababuulio Tio okawasa helohutu u moolingolabe." **3** Sababu tou dipo-dipolulio mai uito tei Herodes malei waupa olei Yahya wau lomungu olio wau lopotuwoto ode delomo tutupa. Tei Herodes lohutu maó odito kalana suáli li Herodias, dile lowutatio lohihilao, deúito-yito tei Pilipus. **4** Sababu peénta tei Yahya loloiya odie odelei Herodes, "Diila mowali yio monika woli Herodias!" **5** Otutuulio maó tei Herodes ohilaa momate olei yahya mate-mateelo maó, bo tio moohe totaa dadaata, sababu heanggapuo limongolio tei Yahya boito nabi. **6** Tou tei Herodes lopolame dulahe ilowaliilio mai, walaó taabua li Herodiasi longelungo totalu lotaa hetilo duwolio. Elungio boito loósanangi daá hilaa lei Herodes, **7** tilinggula tei Herodes lodanti maó olio wolo tadia deu penu boli wolo u pohileelio, mawohilio olio. **8** Sababu pilopopatu maó lilolio, tadulahu boito malo bisala, "Pohile lowatia lunggongee Yahya Tamopolihua to saaátalo botia tanitani mai tobaki!" **9** Loódungohe hihile boito, tei Herodes masiluukali daá. Bo sababu tio malo tadia totalu lotaa hetilo duwolio, yi tio malo malentaó lei poópolu maó hihile lo tadulahu boito. **10** Tio lopoáhu tau ode tutupa mota lolimadei lunggongee Yahya. **11** Lapataó lunggongee Yahya boito dilelolio mai tobaki wau yilohilio maó ode tadulahu boito. Tulusi tadulahu boito poli lodelo ode lilolio. **12** Lapataó uito tahiduduá olei Yahya lonaó mai lohama milate lei Yahya wau yilobungio. Tulusi timongolio malonaó lopoótaa ulotoduo boito toli Isa. **13** Tou ti Isa loódungohe habari boito, Tio malo titaé tobulotu tutuuwau wau lololaa maó tambati boito, u lonaó mota ode tambati diila otau. Bo tou tau-tauwala loódungohe suáli boito, timongolio malo lolaa maó kota limongolio wau helo hunuhe li Isa loli tudulio. **14** Tou ti Isa lolaheo lonto bulotu wau loóonto taa dadaata boito, lodehu hilaa-Lio olimongolio. Tulusi Tio malo pooluli tau-tauwalo tahi ngongota towolota limongolio. **15** Tou lolaangio malo, tahiduduá li Isa lonaó mai wau loloiya o-Lio, "Dulahu malo laango wau tambati botie tihitahi mai. Lebe mopiohu ti Paaá mopoáhu mota tau-tauwalo botie monaó, alihu mota motali mai uáalo to kakaa-mbunguwalo." **16** "Diila palalu timongolio monaó," tahuda li Isa, "Timongolilo tamongohi maó uáalo olimongolio." **17** "Amiaatia bo wambaó oroti limo lobutu wau uponula dulo botu!" tametaó lo tahiduduá li

Isa boito. **18** "Deloa mai uito," tahuda maó li Isa. **19** Lapataó Tio malo poáhu taa dadaata boito lotihuloó toitaato huóyoto. Tulusi Tio lohama roti limo lobotu wau uponula dulo botu boito, lapataó yilumanggela mola ode hulungo wau lolapali sukuru ode Allahu Taáala. Lapataó uito Tio lomita-mitangaó roti boito lo uluú-Lio wau lohudu maó ode tahiduduá o-Lio u lolaya-layade mota ode taa dadaata boito. **20** Timongolio ngoáamila lolamelo lobubuu-tuhulo maó. Lapataó uito tahiduduá li Isa malo himoáa lebe lou aalo boito; woluo mopulaa dulo kalanji hipolua. **21** Talo lamelo tou boito tanu limo lolihu lota, diipo yileekeni mongobua wau taukekeei. **22** Lapataó uito ti Isa lopoáhu tahiduduá o-Lio lotitaé tobulotu wau pilei muloa-Lio mola lobalango ode ngotuwali lobulalo, sambela Tio donggo hemei walingopo totaa dadaata boito. **23** Lapataó taa dadaata boito lonaó, ti Isa lotaóde mola huludu tuwau mola loduá tutuuwau. Tou mahui mai, debo donggo mota teto ti Isa tutuuwau. **24** Tou boito bulotu u tilaéya lo tahiduduá li Isa, malo laminga mota tohuungo bulalo. Bulotu boito hepilo-pilomai lobuóolo, sababu dupoto tutuuwalia dulungio wolo bulotu. **25** Towolota lou jamu **3** wau jamu **6** didimodupo, ti Isa malonaó mai ode limongolio lonaó totudu lotaluhu. **26** Tou tahiduduá o-Lio loóonto o-Lio lonaó totudu lotaluhu, iloohea daá timongolio. "Ponggo!" wuwaatii mongolio mailoohe. **27** Boti Isa lato lolametaó, "Poóoyo mola! Wau ti Isa. Diila oohe!" **28** Lapataó tei Petrus malo loiya, "Wonu Ito memangi ti Isa, palentai mai watia monaó totudu lotaluhu." **29** "Odia mai," tahuda li Isa. Oditolio tei Petrus malolahe mola lonto bulotu, lonaó totudu lotaluhu odeli Isa. **30** Bo tou tei Petrus loóonto deú malo odito udaálio dupoto tobulalo boito, mailoohe tio wau mahe lumoduáa mola, "Eeya bantui mai!" wuwaatii. **31** Ti Isa huáa lohudu uluú-Lio wau loheúpa olio, wau lotahuda maó, "Petrus, Petrus, yio botie diila boti palacaya. Yilongola yio diila boti palacaya to ola-U?" **32** Tulusi duduulotalo malotitaé mola tobulotu boito, wau dupoto olo mailoole. **33** Yi tahiduduá li Isa malo sujudu lolubo o-Lio. Timongolio malo loiya, "Otutu Eeya yito Walaó Allahu Taáala!" **34** Tou timongolio leidungga mola ode ngotuwali lobulalo, timongolio lolaheó lonto bulotu to Genesaret. **35** Wau tou tau-tauwalo mota teto loóonto deú talei dungga mai botie ti Isa, timongolio malo

pololade mola habari boito ode ngoáamila madala totili lokota boito. Tulusi ngoáamila tahi ngongota dilelolio mai odeli Isa. **36** Wau timongolio lomolohone o-Lio alihu moó dedeto jumba-Lio, penu bo biihio. Lapataó ngoáamila taloo dedeto maloluli.

**15:1** Taulo Parisi ngopolemboá wau dengolo lota guru lo agama lonto Yerusalemu lonaó mai odeli Isa. Timongolio helo hintu o-Lio, **2** "Yilongola tahidudua ole-Mu diila moduduó uúdu linenemoyanto? Tou mamó lamelo, timongolio diila mohuwalo meimulo moduduó wuúdu!" **3** Ti Isa lolametaó, "Wau yilongola olo timongoli molambanga palenta lo Allahu Taáala, bo kalana ohilaa moduduó uúdu linenemoyamu? **4** Sababu Allahu Taáala malo tahuda, 'Hulumatia maó tiyamamu woliilamu,' wau 'Titaalo tita tamoloi-loiya oliilolio wau oliyamolio, musi hukuu-maniyola mate-mateelo maó.' **5** Bo timongoli helo ngaajali; wonu tamoloiya maó ode mongo dulaálio, 'Wolo uwajibulio wohi laatia odeli paapa woli maama, mapilopo dewo laatia ode Allahu Taáala,' **6** yi tau boito diilalo powajibuwolo u mohulumati tomongo dulaálio. Oditolio, kalana uúdu linenemoyamu, timongoli diila momandungi tahuda lo Allahu Taáala. **7** Timongoli tau munaapiki! Tiluhata daá wolo u nilubuwati mai lei Yesaya pasali limongoli, deúito-yito, **8** 'Odie mola tahuda lo Allahu Taáala: Tau-tauwala boito bo hipo lubowa ola-U wolo loiya, bo hilaa limongolio molaminga monto ola-U. **9** Diila ohunalio timongolio molubo ola-U, sababu wuúdu lomanusia u pilo ngaajali limongolio debo odelo uito wuúdu-U.' " **10** Lapataó ti Isa lotiangai tau-tauwalo wau lotahuda maó olimongolio, "Dungohi maó alihu mongalati! **11** U tumuwoto ode ngangolio diila moó najisi tau boito; bo u lumualai monto ngango ui-uitolo umoó najisi olio." **12** Lapataó tahidudua li Isa lonaó mai wau loloiya o-Lio, "Wolo otaawa li Paaá deú tau-tauwalo Parisi boito longongoto hilao tou loódungohe li Paaá lotahuda odito?" **13** Ti isa lolametaó, "Motiidu pilomulo udiila pilomulo li Paapa-U tosologa mabunggatolo. **14** Diila maó pandungia tau-tauwalo Parisi boito. Timongolio boito mongo tauwa hipiitoá; wau wonu taa pitoó modedeá taa pitoó, duduulotalo mamodehu ode delomo huango." **15** Ualei Petrus, "Tulungia mai mopoo patato pohumaya boito olamiaatia Paaá!" **16**

Ti Isa lolametao olimongolio, "Wolo timongoli debo diipo mongalati? **17** Diila otaawa limongoli deu u tumuwoto ode delomo ngango molaaha mola ode delomo ombongo, wau lapatao muli lumualai? **18** Bo u lumualai monto ngango, asaliilio mai monto hilao; wau mauiitolo umoó najisi totau. **19** Sababu monto hilao tumoodei totoonulalo pikiilangi moleeto, umoó sababu tau momate mateelo maó, mojina, mohutu u huloto, motao, mosakusi paaluti wau mopitana. **20** Ui-uitolo umoó sababu tau mowali najisi, wau diila molamela wolo uluu udiila huwa-huwalo." **21** Lapatao ti Isa lololaa maó tambati boito wau lonaó mola ode madala totili lokota Tirus wau Sidon. **22** Ngotaalio lotaabua Kanaan tomadala boito, lonaó mai odeli Isa sambela wuwa-wuwaatia, "Walaée Dauda, ponua mai watia! Walaó watia taabua ilotuanga lorohu u moleeto. Matiluhua daá tio!" **23** Ti Isa diila lolameto sama-samaata ode taabua boito. Tulusi tahiduduá li Isa lonaó mai ode o-Lio wau lomolohone maó, "Paaá, pei walingalo mota taabua boito. Tio bo wambaó bulu-buluhuto to wuleyanto!" **24** Ti Isa lotahuda maó, "Wau botie yilao-Lio mai bo wambaó ode bangusa lo Isirailu, tolo modulio ode limongolio tamaa yilapalo." **25** Taabua boito lonaó mai lapatao losujudu mola totalu li Isa wau loloiya, "Tulungia mai watia, Tuani." **26** Ti Isa lotahuda maó, "Diila mopiohu mohama uáalo lo taukekeei wau mopo mahula ode apula." **27** "Otutu, Tuani," ualo taabua boito, "bo penu boli apula olo mongaa labito u mobiihuta mola monto meja lituanilio." **28** Lapatao ti Isa lotahuda maó olio, "Ibu, otutu udaá iimanimu! Hulialo maó motoduo mai wolo u otohilaamu!" To saaátalo boito walaó taabua boito maloluli. **29** Ti Isa lololaa maó tambati boito, tulusi lotiduluhe mota loli pentadu lo Bulalo Galilea. Lapatao Tio lotaóde mola huludu tulusi lotihuloáa mota teto. **30** Dadaata tau lonaó mai ode o-Lio hideloa tau-tauwalo tahi penggoa, tapitoó, tadidu mowali monao, taabubu, wau donggo dadaata tahi ngongota wewolio. Timongolio lodepito tau-tauwala boito totalu li Isa, wau Tio helo pooluli totau-tauwala boito. **31** Dadaata tau tawoluo mota teto lolinggolabe daá, tou timongolio loóonto maó taa bubu malowali lobisala, taa penggo maloluli, tadidu mowali monao malowali lonaó, wau taa pitoó maloóonto, tulusi timongolio malomuji-muji Allahu Taála bangusa lo Isirailu. **32** Lapatao ti Isa lotiangai tahiduduá

o-Lio tulusi lotahuda maó, "Wau momonu totaa dadaata botie. Matolo hui hiheolio timongolio mai wola-U, wau botia timongolio didu o uáalo. Wau diila mongohi olimongolio mohuwalingo lou hipolaanga, tolongaó timongolio bolo meibanti todalalo." **33** Lapataó tahiduduá li Isa malohintu o-Lio, "Toutoonu mowali poó tapulanto uáalo tomadala u tihitihi mai botie ode taa dadaata odie?" **34** "Ngoolo botu maó roti tolimongoli?" yilintu li Isa olimongolio. "Pitu," tametaó limongolio, "wau uponula kekeei dengolo botu." **35** Yi ti Isa malo poáhu taa dadaata boito lotihuloáa tohuta. **36** Lapataó Tio lohama roti pitu lobotu boito wau uponulalio, tulusi lolapali mola sukuru ode Allahu Taáala. Lapataó uito Tio lomita-mitangaó roti wau uponula boito wolo uluú-Lio tulusi yilohi-Lio ode tahiduduá o-Lio. Wau timongolio malo laya-layade mota totaa dadaata boito. **37** Ngoáamila tau boito lolamelu tunggula lobutuhu. Lapataó uito tahiduduá li Isa malo himoáa lebelio lou aalo boito. Ngoáamilalo pitu lokalanji hipolua. **38** Tingga bo mongo lolai wambaó tamalo lamelo tou boito wopato lihu lota diipo yiliáapo mongobua wau taukekeei. **39** Lapataó ti Isa malei walinga mota taa dadaata boito. Tio lohihilao malo titaé tobulotu tuwau wau lobite ode madala lo Magadan.

**16:1** Woluo dengolo lota taulo Parisi wau taulo Saduki lonaó mai odeli Isa ohilaa mopotala o-Lio. Timongolio meihutu o-Lio moólinggolabe umopo bukuti maó deu Tio dungga-dungga mai monto Allahu Taáala. **2** Ti Isa lolametaó, "Wonu mato lodulahu donggo titiipa mota, timongoli mamoloiya, 'Dulahu mopiohu, sababu hulungio meela.' **3** Wau wonu dumodupo timongoli mamoloiya, 'Dulahu botie madidiyalo, sababu hulungio meela wau duóduómo.' Naa, timongoli mowali molaamali dulahu lou momilohe mola hulungio, lebe-lebe pomaó totoonulalo tuoto lojamani diila olaamalia limongoli!" **4** "Mailaba leetio wau juluhakalio tau-tauwala tojamani botie. Timongoli meihutu ola-U u moólinggolabe. Timongoli diila tawohiyalo u moólinggolabe penu boli tuwau maó ngopohia u moólinggolabe li Nabi Yunu." Tou yilapato lotahuda odito, ti Isa lololaa maó olimongolio, tulusi malonaó. **5** Tou tahiduduá li Isa leidungga mota ode ngotuwali lobulalo, bolo ilotaawa limongolio deu timongolio loólipata

lodelo roti. **6** Ti Isa lotahuda olimongolio, "Poódaha-dahaalo maó ragi tau-tauwalo Parisi wau Saduki." **7** Loódungohe tahuda li Isa odito, tahiduduá o-Lio malo loiya ngota timongota, "Tio lotahuda odito sababu ito diila lodelo mai roti." **8** Otaawa li Isa wolo u hebisalaa limongolio. Oditolio Tio malo tahuda maó, "Yilongola timongoli hemo susuuália lou diila oroti? Timongoli diila boti palacaya! **9** Debo diipo mongalati timongoli? Diila oéela mola limongoli u roti limo lobotu mapili-pilitanga-U ode taalimo lolihu lota? Ngoolo kalanji lebelio loroti u mailimoi mongoli? **10** Wau woloolo mola olo wolo roti pitu lobotu ode tawopato lihu lota boito? Ngoolo kalanji lebelio lou aalo u mailimoi mongoli? **11** Yilongola dilumutu timongoli diila mongalati deú Wau diila hemobisala woli mongoli pasali loroti? Poódaha-dahaalo maó ragi tau-tauwalo Parisi wau Saduki!" **12** Pulitio maó tahiduduá li Isa boito longalati deú ti Isa mei podaha-dahaalo maó olimongolio boito diila toragi u hepomake pohutu roti, bo to popoo-ngajaliyalo tau-tauwalo Parisi wau Saduki. **13** Ti Isa lonaó ode madala totili lokota Kaisarea Pilipi. Mota teto Tio lohintu to tahiduduá o-Lio, "Moduduá loiya lotau, Walaó Manusia boito tatoonu?" **14** Tahiduduá o-Lio malo lametaó, "Woluo talo loiya tei Yahya Tamopolihua. Woluo olo talo loiya tei Elia. Taawewo poli loloiya tei Yeremia meaanto tala ngota lonabi." **15** "Bo moduduá olimongoli lohihilao, tatoonu Wau botie?" **16** Tei Simon Petrus lolametaó, "Ti Paaá yito Olongia Tamoo-poáahua Walaó Allahu Taáala Tatumu-tumulo." **17** "Mailuntungi daá yio, Simon walaée Yona!" tahuda li Isa. "Sababu diila manusia tamalo poótaa mai suáli boito to olemu, boti Paapa-U tosologa. **18** Sababu uito ototai maó, yio botie tei Petrus, botu u motoheeto. Wau toitaato wumbato botu botieelo Wau mamomongu maó galeja-U, udiila mowali olaahe; penu boli lomautu! **19** Wau mamongohi mai olemu uúnti Dunia Bohu lo Allahu Taáala. Wolo u diniyomu toitaato dunia, uito olo dididini tosologa. Wau wolo u banaliyamu toitaato dunia, uito olo banaliyalo tosologa." **20** Lapataó ti Isa malo poéelaó to tahiduduá o-Lio alihu timongolio diila mopoótaa boli olo tatoonu deú Tio-tiolo Olongia Tamoo-poáahua. **21** Tumulalo mai tosaaáti boito, ti Isa lotahuda wolo juujulu ode tahiduduá o-Lio, deú Tio musi monaó ode Yerusalemu wau mola modutolo dadaata



monto mongo tauwa, mongo iimamu tauwa wau guguu-ruwaalo agama. Tio mapateelio mate-mateelo maó, bo todulahu otolulio Tio mamuli mobongu mai. **22** Lapataó tei Petrus lomantangaó li Isa ode yintili wau lodini o-Lio, ualio maó, "Pohileaala duá Allahu Taaala mopo lamingaó suáli boito, oo Eeyau! Diila bolo suáli boito motoduo mai to Eeya!" **23** Ti Isa maloili maó tulusi lotahuda odelei Petrus, "Pohinggi maó monteea Tamoo-heingawa ode dusa! Yio mongabu-ngabuuto ola-U. Pikiilangimu boito pikiilangi lomanusia; diila pikiilangi lo Allahu Taaala!" **24** Lapataó ti Isa lotahuda ode tahiduduá o-Lio, "Taa u mohuto moduduá ola-U, musi momalonga polohuna daá batangalio lohihilao wau momota salipulio, wau tulusi moduduá ola-U. **25** Sababu taa u motohilaa momintengi tutumulio, maóolia lo tutumulio. Bo taa u mopobake tutumulio ode ola-U, mamootapu tutumulio. **26** Wolo untungilio ode tahingota-ngotaawa, wonu ngoilanggubu dunia botie mowali milikiilio, bo tio oolia lo tutumulio? Wolo mowali tutumulo boito tuloálo lou hitua-tuawua? **27** Diilalo mohiheo Walaó Manusia, peé-peéenta wolo mamaa-laiikati-Lio, mamei dungga wolo kawasa li Paapa-Lio. Tou boito Tio mamolontuli mai timiidu tau motuuide wolo huhutuulio. **28** Ototai maó! Towolota limongoli teewe woluo tadiila mate, tou diipo moóonto Walaó Manusia meidungga mai odelo Olongia."

**17:1** Wolonggui mola lapatio maó ti Isa malodelo olei Petrus wolei Yakobus wau wutatio tei Yahya, lotitihilo mola tohuidee tuwau u molanggato. **2** Totalu limongolio, lolomelo lomola baya li Isa: Baya-Lio malo tilango debo odelo mato lodulahu wau boó-Lio moputió hiinta-intawa. **3** Lapataó tahiduduá o-Lio toulota boito maloóonto olei Musa wolei Elia hemobisala woli Isa. **4** Lapataó tei Petrus loloiya maó odeli Isa, "Eeya sanangi daá ito teea. Wonu otohilaa lo Eeya, Watotia mamopo tihulo kema tolo wale teea: tuwau ode Eeya, tuwau olei Musa, wau u tuwau poli olei Elia." **5** Tou tei Petrus donggo hemobisala, heengo u motilango daá malo henggubei olimongolio wau lonto heengo boito dungo-dungohei suala lotahuda mai, "Tabotieelo Walaúu-U tapilonu-U. Tio moósanangi hilaa-U. Podungoheó o-Lio!" **6** Tou tahiduduá li Isa

loódungohe suala boito, timongolio mailoohe daá tilinggula leidambaólo mola tohuta. **7** Boti Isa malonaó mai wau lodedeta olimongolio. "Tihulolo mola," tahuda-Lio maó. "Diila oohe!" **8** Tou timongolio lomiloheó, diduluo maó tailoontonga limongolio, ngopohia boti Isa wambaó. **9** Tou timongolio lotuhuta mola lonto huidee boito ti Isa lopoéelaó olimongolio, "Diila maó polelea boli olo tatoonu wolo u iloontonga limongoli engonti, tou Walaó Manusia diipo bongulo-Lio mai monto opopate." **10** Tahiduduá li Isa lohintu maó o-Lio, "Yilongola guguu-ruwaalo agama hipo loiyawa deu tei Elia musi meimulopo mai?" **11** Ti Isa lotahuda maó, "Memangi tei Elia monaó mai wau tio mamó poóbelesi maó totoonulalo u hituwa-tuawua. **12** Bo Wau motahuda mai olemu tei Elia malonaó mai, bo tau-tauwala diila loóonuhe olio; hepilohutu limongolio tio bolo totoonulalo u otohila limongolio. Wau odito olo u mapohutuo limongolio to Walaó Manusia." **13** Lapataó tahiduduá o-Lio malo ngalati deu ti Isa lotahuda pasali lei Yahya Tamopolihua. **14** Tou ti Isa wau toulota tahiduduá o-Lio luli lohualingo ode taa dadaata boito, talolai ngota malonaó mai, wau losujudu mola totalu li Isa, **15** wau loloiya, "Paaá ponua mai walaó watotia. Ngongotio hedudeetolo. Ngongoto lodudeetio boito wonu meidungga malo laba-labaalo tilinggula tingga maito tio modehu ode delomo tulu wau tingga maito olo tio modehu ode delomo taluhu. **16** Watotia malodelo ode tahiduduá li Paaá, bo timongolio diila lowali lopoóluli maó olio." **17** Ti Isa lotahuda maó, "Mailaba timongoli botie! Timongoli tutuulio tutu tau-tauwalo tahelo halahu lonto dalalo u otutu wau diila palacaya. Tunggula omolua Wau musi motibiluloá woli mongoli wau mosabali woli mongoli? Deloa mai walaó boito! **18** Tulusi ti Isa lomalentaó rohu u moleeto todelomo walaó boito yilumualo. Wau rohu u moleeto boito mailumualo, tulusi walaó boito loluli to saaátilo boito. **19** Lapataó tahiduduá li Isa lonaó mai ode o-Lio lotiwiwi maó wau lohintu o-Lio, "Paaá, wolo sababuulio amiaatia diila mowali mopohinggi rohu umoleeta boito?" **20** Ti Isa lolametaó, "Sababu timongoli diila boti palacaya. Eelai maó! Wonu timongoli o iimani penu bo odelo udaá bili losawi, timongoli mowali moloiya ode huludu botie, 'Limbato mola odito!' tantuulo maó huludu botie mamó limbato. Diaaluo penu boli tuwau

maó udiila opohutuo limongoli! **21** Bo rohu u moleeto debo odelo utie, bo mowali yinggilola loduá wau puasa." **22** Tou tahiduduá li Isa hiambua to Galilea, ti Isa lotahuda maó ode limongolio, "Diilalo mohiheo, Walaó Manusia mawuduolio ode kawasa lomanusia. **23** Tio mapateelio mate-mateelo maó, bo todulahu otolulio Tio mamuli bongulo-Lio mai." Yi tahiduduá o-Lio mahi suukalia daá. **24** Tou ti Isa wau tahiduduá o-Lio leidunga mola ode Kapernaum, tahipo tagia beya Bele lo Eeya lonaó mai odelei Petrus wau lohintu maó, "Ti Gurumu hemomayali beya Bele lo Eeya meaanto diila?" **25** Tei Petrus lolametaó, "Hemomayali!" Tou tei Petrus lohualingo, ti Isa lohimelu maó olio leimula, "Simon woloolo mola huhamamu? Tatoonu tamusi momayali maó beya meaalo haasili ode mongo onlongia todunia botie? Ulipu meaalo taadeli?" **26** "Taadeli," tametaó lei Petrus. "Wonu odito," tahuda maó li Isa ulipu diila palalu momayali. **27** Bo diila mowali ito mopo ngongoto hilaa lotau-tauwalo boito. Oditolio, ponaólo ode bulalo mota pongailolo. Hamaawa mai bohulo tola u ohamaamu. Todelomo ngangolio boito yio mamoo dungga mato lodoi u motuuheta wolo beyaanto duulota. Hamaawa doi boito wau bayalia maó olimongolio beyaanto ode Bele lo Eeya."

**18:1** Tou boito tahiduduá li Isa lonaó mai ode o-Lio wau lohintu, "Tatoonu tahe anggapuolio pulito udaá towolota umati lo Allahu Taála?" **2** Ti Isa malo tiangai walaó talolai kikiiá ngota, wau lopotihulo olio totalu limongolio. **3** Lapataó ti Isa lotahuda maó, "Pomalacayalo! Bo wonu timongoli molomelo wau mowali debo odelo taukekeei, timongoli mamowali pongawaá umati lo Allahu Taála. **4** Taa u motidupapa lo batangalio wau mowali debo odelo taükikiiá botie, tio-tiolo tapulito udaá towolota umati lo Allahu Taála. **5** Wau taa u mololimo taükikiiá tadebo odelo utie sababu Wau, boliilio maó mololimo ola-U." **6** "Tatoonu tamoó sababu tala ngota lotau-tauwalo biaasa botie diilalo palacaya ola-U, lebe mopiohe wonu botu pohilingalo potihutolo to buloolio wau tio loduólo ode delomo dehetu u modelomo. **7** Donggo boli topotalalio dunia botie sababu susu-aliaalo u moosababu tau mohutu dusa. Memangi susu-aliaalo debo odelo uito malaito woluo, bo matopotala tamoó sababu maó!

**8** Wonu uluūmu meaanto oāatumu moósababu olemu mohutu dusa, olota wau pomahula maó. Lebe mopiohe yió tumumulo wolo Allahu Taaala lou didu o uluū meaanto o oāato ngotuwali, bo yió mapomahu-Lio ode delomo tulu lonalaka wolo uluū wau oāatumu dulo tuwali. **9** Wau wonu matomu moósababu olemu mohutu dusa, luóheelo wau pomahula maó. Lebe mopiohe yió tumumula wolo Allahu Taaala didu omato ngotuwali lou mapomahu-Lio ode delomo tulu lonalaka wolo mato dulo tuwali." **10** "Poódahai! Diila maó pohina tala ngota monto tau-tauwalo ukikiio botie. Sababu poótoloma maó, maaa-laikatiyalo limongolio laito woluo totalu li Paapa-U tosologa. **11** Sababu Walaó Manusia dungga-dungga mai mopoaaahu tailapalo! **12** Woloolo mola huhamaamu? Humayaalio woluo ngotaalio taóhimba ngohetuto, tulusi tuwau towolota lo hihii-mbawaalo boito mooli, wolo u mapohutuo lotau boito? Tantu tio mamololaa maó himba u tio lopulaa tio boito tohuludu wau mota mololohei uilooli boito. **13** Wau wonu tio muli moódungga himba boito -- pomalacayalo ola-U -- tio malebe meengaheó tohimba u tuwau boito wolo u tio lopulaa tio wewolio boito udiila yilooli. **14** Odito olo Allahu Taaala limongoli tosologa diila mohuto tala ngota lotau-tauwalo taboheeli palacaya to ola-U botie lapalolo." **15** "Wonu wutatumu odusa olemu, ponaólo ode olio wau poótaa maó totalaalio. Pohutua maó uito wolo poó-poóoyo towolota limongoli duulota wambaio. Wonu tio modungohe loiyamu, yi maloáahu yió luli loótapu mai wutatumu boito. **16** Bo wonu diila, podelo mota ngota meaanto duulota poli. Sababu todelomo Kitabi tulatuladu, 'Pulito ngoidilio duulota meaalo toulota sakusi tapalaluwolo u mopoilaalo ngotaalio tapilo tulude boito ototala.' **17** Wonu tio diila mololimo nasehati lotau-tauwala boito, poótaa maó suáli boito ode jamaá. Wau pulitio maó, wonu tio diila mohuto mololimo nasehati lojamaá, anggapuwalo tio odelo tamootagia beya meaanto ngotaalio tadiila motota lo Allahu Taaala." **18** "Ototai maó: Wolo udinio limongoli todunia, dinidini olo tosologa. Wau wolo u banalia limongoli todunia, banabanali olo tosologa. **19** Wau ototai maó olo: Wonu towolota limongoli todunia botie taduulota aaakolowa pasali lolo wambaio wau moduá mola uito, yi duá boito matolimo li Paapa-U tosologa. **20** Sababu toutoonu duulota meaanto toulota motiambu sababu Wau, Wau

woluo tohuungi mongolio." **21** Lapatao tei Petrus malonaõ mai odeli Isa wau lohintu, "Oo Eeya, wonu wutato lowatotia odusa towatotia, tunggula poõngolo watotia musi mongambungu olio? Tunggula poõopitu maõ?" **22** Ti Isa lolametaõ, "Diila, diila tunggula poõopitu, bo poõopitu lopulaa pitu piuwa!" **23** Sababu wonu bolo Allahu Taála momalenta, owowoluwoalio debo odelo pohumaya botie: Ngotaalio li Olongia motohilaa mopoo lapato bibii-loliyaalo lomongo watolio. **24** Tou tio lolumulo lomalakisaõ, mapilopo taluwolio mai ode olio wato ngota taõbiloli heyuta-yutaawa, **25** wau diila loõbayali biloliilio. Oditolio ti olongia boito malei potali maõ wato boito peẽ-peẽenta wolo walaio wau dilelio taabua, wau ngoãmila milikiilio u pomayali biloliilio. **26** Wato boito malo sujudu totalu li olongia boito, wau lomolohone maõ, 'Tuani, posabalipo ode watotia. Watotia mamopoõpolu mai ngoãmila biloli boito.' **27** Ti Olongia boito malo tolianga olio, tilinggula tio malo luluto ngoãmila biloliilio. **28** Tou wato boito yilumualaõ, ilodunggaalio tio wolo sahabatilio, wato ngota olo, taõbiloli to olio dengolo lihu. Tio malo heupa sahabatilio boito, tilinggoloio, wau loloiya maõ, 'Bayalia mai ngoãmila bilolimulu!' **29** Tulusi sahabatilio boito malo sujudu totalulio wau lohile, 'Posabalipo sahabati, ngoãmila mabayaliyaõ mai!' **30** Bo wato boito diila lohuto. Boliio maõ, tio bo malo potuwoto olio ode delomo tutupa tunggula tio loõ bayali biloliilio. **31** Tou mongo wato wewo loõonto maõ wolo ulotoduo boito, timongolio masiluukali wau lopodulohe suãli boito odeli olongia. **32** Yi ti olongia boito malei tianga wato tamoleeto boito wau loloiya olio, 'Wato tamoleeto! Ngoãmila bilolimulu mailulutuu bo sababu yio malo molohone mai olaõ. **33** Wolo yio diila patutilio olo motolianga sahabatimu debo odelo wau malo tolianga olemu?' **34** Ti Olongia boito maloingo daã. Wato tamoleeto boito mapilopo tuwotio ode tutupa tunggula ngoãmila biloliilio bilayalialio." **35** Ti Isa lopoõ pulitaõ silitaa-Lio wolo tataa-heyaaalo botie, "Odito olo ti Paapa-U tosologa mopohutu mai olimongoli ngota-ngota, wonu timongoli diila mongambungu wutatumu wolo ihilasi."

**19:1** Lapataõ ti Isa yilapato lotahuda maõ ngoãmilalo boito, Tio lololaa maõ Galilea tulusi lonaõ ode madala lo Yudea to ngotuwali lo Dutulaa

Yordan. **2** Dadaata talo duduá o-Lio, wau Tio malo pooluli olimongolio mota teto. **3** Lapataó tau-tauwalo Parisi lonaó mai lopotala o-Lio. Timongolio helohintu, "Moduduá butoó lo agamanto, tingga mowali ngotaalio motalaki dilelio taabua penu boli alasan wolo wambaio?" **4** Ti Isa lolametaó, "Wolo diipo pilobaca limongoli todelomo Kitabi deu Allahu Taáala talo powali manusia, tou bohulio mai helo powali olimongolio talolai wau taabua?" **5** Wau lapataó uito Tio lotahuda, 'Uito sababuulio talolai mololaa maó oliilolio wau oliyamolio wau motituwau wolo dilelio, yi duduulotalo mowali tuwau.' **6** Oditolio timongolio diilalo duulota, bo ngota. Uito sababuulio wolo u mapilopo tuwau lo Allahu Taáala diila mowali talakia lomanusia." **7** Lapataó tau-tauwalo Parisi lohintu o-Lio, "Wonu odito yilongola tei Musa leiwohi totau tuladu talaki ode dile taabua taa tilalakilio boito?" **8** Ti Isa lolametaó, "Tei Musa mopoluasi olimongoli motalaki dilemu taabua sababu timongoli mototolo daá ajaliyolo. Bo tutuulio tutu diila odito tou bohulio mai. **9** Oditolio, dungohi maó utie: Titaalo tita tamotalaki dilelio -- lebe-lebe pomaó taabua boito diila lohama pipia -- lapataó monika poli wolo taabua wewo, yi tau boito malojina." **10** Yi tahiduduá li Isa malo loiya o-Lio, "Wonu suáli lou wumbuta lo motolo dilea yito debo odelo uito, lebe mopiohu diila ponika." **11** Ti Isa lolametaó, "Diila ngoáamila tau moó tolimo tataa-heyalo boito, bo wambaó tau-tauwalo tamaa tilantu mai lo Allahu Taáala. **12** Sababu woluo taa diila mowali monika, sababu timongolio memangi mapilo tutulio mai odito. Woluo olo taa diila mowali monika sababu tio pilohutu odito lotaa wewo. Wau woluo olo taa molulaoto lohihilao udiila monika, alihu mowali momaya to Allahu Taáala. Taa mambo mololimo pongaajali botie, huliilo maó tio mololimo uito." **13** Woluo tahe lodelo mai taukekeei odeli Isa alihu Tio mopodutu lo ulu-lo toitaato lunggongi mongolio wau moduá mola olimongolio. Bo tahiduduá li Isa maloingo totau-tauwala boito. **14** Yi ti Isa lotahuda maó ode tahiduduá o-Lio, "Hulii maó taukekeei boito monaó mai ode ola-U! Diila maó dinia timongolio, sababu tau-tauwalo debo odelo utieelo tamowali pongawaá umati lo Allahu Taáala." **15** Tulusi ti Isa helo podutu ulu-lo toitaato lunggongo lo taukekeei boito wau lobalakati maó olimongolio. Lapataó Tio lonaó lonteeto. **16** Todulahu



tuwau talolai ngota lonaó mai odeli Isa, "Paaá Guru," ualio maó, "huhutu mopiohe wolo umusi pohutuo lowatia alihu mowali mololimo tutumula ututuulio tutu wau ohiheo-hiheolo maó?" **17** Ti Isa lolametaó, "Yilongola yió mohintu ola-U tomimbihu wolo u mopiohe? Bo woluo Tuwau u mopiohe. Wonu yió mohuto tumumulo, yió musi modungohe totoonulalo palenta lo Allahu Taáala." **18** "Palenta utoonu uito?" yilintu maó lotau boito. Ti Isa lolametaó, "Diila maó pomate-mateelo maó, diila maó pojina, diila maó potaó, diila maó pongohi sakusi udiila otutu, **19** hulumatia maó tiilamu wau tiyamamu; wau tolianga maó ngota timongotamu debo odelo yió motoliango batangamu lohihilao." **20** "Ngoáamila palenta boito madiluduá lowatia," tametaó lo taa bohulotau boito. "Donggo wolo poli upalalu?" **21** Ti Isa luli lotahuda olio, "Wonu yió motohilaa mowali wimu-wimumuto ngoáamilalo, ponaólo mota wau potalia maó ngoáamila milikimu. Wohia maó doilio ode taa mosikini, wau yió mamootapu halata tosologa. Lapataó uito, ponaólo mai moduduá ola-U!" **22** Loódungohe tahuda boito, taa bohulotau boito malonaó wau hilaalio siluukali daá sababu tio kaya daá. **23** Lapataó ti Isa lotahuda maó ode tahiduduá o-Lio, "Wau motahuda mai olemu, suukali daá taakaya mowali pongawaá umati lo Allahu Taáala. **24** Wau utie olo utohilaa potahuda-U mai olemu; lebe gambangi unta tuwau tomuwoto ode huango dudetu wolo taakaya ngota tumuwoto ode Dunia Bohu lo Allahu Taáala." **25** Tou tahiduduá li Isa loódungohe tahuda li Isa boito, timongolio lolinggolabe. "Wonu odito," uali mongolio, "tatoonu tamowali moáahu?" **26** Ti Isa lomiloheó olimongolio tulusi lotahuda maó, "Duólo manusia, uito diila pongalo aakali! Bo duólo Allahu Taáala, ngoáamila pongalo aakali." **27** Tulusi tei Petrus loloiya maó, "Bilohilo, amiaatia malo lolaa mai totoonulalo u hituatuawua wau loduduá li Paaá. Wau wolo u matolimo lamiaatia?" **28** Ti Isa lotahuda maó olimongolio, "Pomalacayalo: To Dunia u Bohu, Walaó Manusia mamu tihuloáa toitaato tambati huhuloá-Lio u lailaió. Tou boito timongoli tahiduduá ola-U mamu tihuloáa toitaato lo mopulaa duluo tambati huhuloá li olongia wau mamomutoó tamopulaa duluo kaumu bangusa lo Isirailu. **29** Wau motiidu taa u malo lolaa maó bele, meaanto wutatio talolai meaanto taabua, meaanto oliilolio oliyamolio, meaanto

mongo walaio, meaanto halabolu kalana Wau, tau boito mamuli mololimo poohetuto piüwa. Wau tio mamu lolimo olo tutumulo ututuulio tutu wau ohiheo-hiheolo maó. **30** Bo dadaata taa u masaatia botie tabohulio mamowali tapulitio wau tamasaatia botie tapulitio mamowali tabohulio."

**20:1** "Wonu bolo Allahu Taála momalenta, owowoluwoalio debo odelo pohumaya botie: Ngotaalio taa ohuüwo ilengi lo angguru yilumualo tou dimodupo mololohe taa u mokalaja to ilengi lo anggurulio. **2** Lapataó tio akolo momayali olimongolio ngopita doi talaá dulahio tuwau, tio malo poáhu mota olimongolio helo kalaja to ilengi lo anggurulio. **3** Jamu sambila dimodupo, taa ohuüwo lo ilengi boito luli lonaó, wau loóonto dengolo lota tadiila okalaja topaatali. **4** Yi tio loloiya maó ode limongolio, 'Ponaólo mola timongoli mokalaja to ilengi lo angguruü. Wau mamu mayali olimongoli wolo wuupa u patuti.' **5** Timongolio olo malonaó. Tou dulahe matotau wau dulahe majamu tiga lolaango, taa ohuüwo lo ilengi boito luli yilumualo wau lohutu maó suáli u tutuuwauwa. **6** Wau tanu jamu lima lolaango, tio luli yilumualo wau loóonto debo donggo woluo tadiila okalaja. Tulusi tio malohintu olimongolio, 'Yilongola timongoli hitihula tulusi tewe lou diila hipohutua wolo-wolo?' **7** Tau-tauwala boito malo lametaó, 'Diaaluo tamongohi mai kalaja to olamiaatia.' 'Wonu odito,' ualo taa ohuüwo lo ilengi boito, 'ponaólo timongoli mola mokalaja to ilengi lo angguruü.' **8** Malo laangaó, taa ohuüwo lo ilengi boito loloiya ode mandululio, 'Tianga mai tahi pokalajawa boito wau bayalia maó wuupa limongolio ngota-ngota, tumulalo maó taa u tilumuwoto pulitio tunggula ode taa u tilumuwotai bohulio.' **9** Tulusi malonaó mai tahi pokalajawa tumulalo maó tahelo kalaja lonto jamu lima lolaango. Timongolio ngota-ngota helo lolimo doi talaá ngopita. **10** Lapataó poli malonaó mai tahi pokalajawa tahe sileuwa tumulalo mai dimodupo. To pikiilangi limongolio timongolio mamu lolimo lebe-lebe. Lebe-lebe pomaó timongolio bo yilohialio doi talaá ngopita olo. **11** Tou lololimo doi boito, timongolio maloingo totaa ohuüwo lo ilengi boito: **12** 'Tahi pokalajawa talonaó mai pulitio boito bo helo kalaja ngojamu. Hiambola amiaatia helo kalaja dulahio tuwau topatu daá lodulahu, boti Tuani malo mayali

olimongolio tutuwauwa wolamiaatia!" **13** Taa ohuúwo lo ilengi boito malo lametaó ode tala ngota limongolio, 'Sahabati, wau diila ototala olemu. Diila mailo akolowamu deú yió musi mololimo wuupa doi talaá ngopita duólo kalajamu dulahio tuwau? **14** Boito, hamaalo wuupamu, wau ponaólo. Wau memangi motohilaa mongohi ode taa u tilumuwotai pulitio boito wuupa u tutuwauwa lou yilohiú mai olemu. **15** Wolo wau diila mowali mohutu maó totoonulalo u otohilaau wolo milikiú? Meaalo yió mohiihia, sababu wau omuura lohilao?" **16** Lapataó ti Isa luli lotahuda maó, "Odito olo tau-tauwalo tapulitio mamowali tabohulio, wau tau-tauwalo tabohulio mamowali tapulitio." **17** Tou ti Isa dulu-dulunga ode Yerusalemu, tohuungo dalalo Tio lotiango tamopulaa duulota muri-Lio lotiambu lotiwiwi. Tulusi Tio lotahuda maó olimongolio, **18** "Dungohi! Ito botia dulu-dulunga ode Yerusalemu. Mola teto Walaó Manusia mawuduolio ode mongo iimamu tauwa wau guguu-ruwaalo agama. Lapataó Tio mahukuu-maniyolio mate, **19** tulusi wuduolio ode tau-tauwala tadiila Yahudi. Timongolio mamó hente-henteá o-Lio, moposikisa o-Lio, wau moposalipu o-Lio. Bo todulahu otolulio, Tio mamuli bongulo-Lio mai." **20** Lapataó dile lei Jebedeus lonaó mai wolo mongo walaio odeli Isa. Totalu li Isa tio malo sujudu u lohile hitua-tuawua. **21** "Wolo otohilaa li ibu?" Tahuda li Isa. Ti ibu boito lolametaó, "Otohilaa lowatia walaó watia duulota botie motihuloá to oloihi wau to olowala li Paaá wonu ti Paaá de mamowali Olongia." **22** "Timongoli diila motota wolo upohile limongoli," tahuda li Isa ode limongolio. "Wolo timongoli mambo mongilu monto hakati polodutolo umusi yilumo-U?" "Mambo" tametaó limongolio. **23** Ti Isa lotahuda maó, "Memangi timongoli mamongilu olo monto hakati-U. Bo pasali lo tatoonu tamaa motihuloá to oloihi meaanto to olowala-U diila Wau taóhaku molantu. Tambati boito yito duólo tamaa tilantu maó li Paapa-U." **24** Tou opulu lota tahiduduá wewolio loódungohe suáli boito, maloingo timongolio to tamohutato duulota boito. **25** Sababu uito ti Isa malo tiangai olimongolio ngoáamila lapataó lotahuda maó, "Otaawa limongoli deú mongo tauwa lo bangusa tadiila motota lo Allahu Taáala helodeeche ulipulio. Wau taduduulaa lo ulipu limongolio boito hemo dutonga olimongolio. **26** Bo timongoli diila mowali odito. Boliio maó, taa

u motohilaa mowali udaá towolota limongoli, musi mowali tamomayawa olemu. **27** Wau taa u motohilaa mowali tabohulio towolota limongoli, musi mowali watomu. **28** Tutuuwauwa debo odelo Walaó Manusia boito olo; Tio dungga-dungga mai diila meibaaya, bo mai momaya, wau mohudu nyawa-Lio u mopo lopato totaa dadaata." **29** Tou timongolio lololaa maó Yerikho, ngohuntua tahelo duduá li Isa. **30** Tapitoó duulota donggo hihuloá tobiihu dalalo. Tou timongolio loódungohe deu ti Isa yilumaodeó, timongolio malo nguatió, "Walaée Dauda, ponua mai mongowatotia!" **31** Taa dadaata tawaluo teto maloingo olimongolio wau lei poóoyo olimongolio. Bo timongolio lebe loóohui mola longuatió. "Tuani, Walaée Dauda, ponua mai mongowatotia!" **32** Tulusi ti Isa malo huheli wau lotiangai olimongolio, "Wolo u otohilaa limongoli u mowali pohutuwo-U mai olimongoli?" Tahuda maó li Isa. **33** Timongolio lolametaó, "Tuani, mongowatotia motohilaa moóonto!" **34** Ti Isa lodehu hilaa-Lio olimongolio, tulusi malo leapu maó mato limongolio. To saaátilo boito timongolio malowali loóonto. Lapataó timongolio loduduó li Isa.

**21:1** Tou malembide lo Yerusalemu, leitungga mota timongolio to Betpage to Huludu Zaitun. Mota teto ti Isa lei titimulo duulota tahiduduá o-Lio. **2** "Ponaólo ode kambungu totalu mota limongoli boito," tahuli li Isa olimongolio. "Lolamemeto timongolio maloóonto kolodai tuwau tihutihuto peé-peéenta wolo walaio. Wuádi maó duduuluolo wau deloa mai odia. **3** Wonu woluo tau mohintu u hitua-tuawua, polelea maó ode taulio, 'Eeya palalu leeto,' yi tau boito mahuáa mopoluli mai kolodai boito deloolo." **4** Suáli boito oditolo alihu mamotoduo mai wolo uiloiya lonabi odelo odie mola, **5** "Polelea maó ode Sion, Olongiyamu donggo dungga-dungga mai ode olemu. Tio dupadupapa lohilao wau taétaé mai to kolodai tuwau, walaó kolodai tuwau udonggo buboto." **6** Lapataó taduulota hiduduá o-Lio boito malonaó wau lopohutu maó debo odelo u pilo lahuli maó li Isa olimongolio. **7** Timongolio lodelo mai kolodai boito wolo walaio. Tulusi timongolio malo hepide wulea lo kokoo-lodaiyaala boito wolo jumba limongolio. Lapataó ti Isa malo titaé maó. **8** Ngohuntua tau mola teto helomuáde jumba limongolio todalalo, hiambola tau-tauwalo wewo

helomutu tango lo ayu kekeei wau pilomulepe limongolio tohuungo dalalo. **9** Taa dadaata u hinaowa totalu wau towulea li Isa hiwatiá, "Pomali-tutuóolo mola Walaée Dauda! Mabala-balakatilo Tio tadungga-dungga mai to tanggulo Eeya! Pomujilo mola Allahu Taála Taa Laba-labaalo molanggato!" **10** Lapataó, tou ti Isa tilumuwoto ode Yerusalemu, ngoilanggubu kota boito lowali lame daá. "Tatoonu tau botie?" yilintu lotau-tauwalo tokota boito. **11** "Tio Nabi Isa, lonto Najaret to Galilea," tametaó lotaa dadaata tahiduduá li Isa. **12** Lapataó ti Isa tilimuwoto ode Bele lo Eeya, wau helo pohinggi ngoáamila tahipo tataalia mota teto. He bilantulele-Ngio memee-jawaalo lo tahipo tutuuloá lodoi, wau babaa-nggawalo lotahi podahangia poombo. **13** Lapataó Tio lotahuda maó ode tau-tauwalo boito, "Todelomo Kitabi tulatulade deu Allahu Taála lopilimani mai, 'Bele-U maunteelo bele tambati poduáalo.' Bo he pilohutu limongoli lowali beelea lopohehu!" **14** Tahipiitoá wau tadidu mowali monaó lonaó mai odeli Isa to Bele lo Eeya, wau Tio helo pooluli maó olimongolio. **15** Bo mongo iimamu tauwa wau guguu-ruwaalo agama loingo loóonto maó totoonulalo moólinggolabe u pilohutu li Isa. Wau timongolio loingo olo loódungohe taukekeei hiwuwa-wuwaatiá meengahu to Bele lo Eeya, "Pomali-tutuóolo mola Walaée Dauda!" **16** Timongolio loloiya maó odeli Isa, "Tingga mailo dungohe-Mu wolo u heloiya limongolio?" "Ooó, ilodungohe-U," tametaó li Isa. "Diipo peéenta maó timongoli lopobaca ayati lo Kitabi botie: 'Taukekeei wau taunge mailaajali-U u molapali poilaalo momuji uwimu-wimumuto ngoáamilalo?" **17** Lapataó ti Isa lololaa maó olimongolio, tulusi yilumualo lonto kota boito ode Betania wau lotitihui mola teto. **18** Didimodupo loloombulio mola, tou mahe walinga ode kota, ti Isa pilolaango. **19** Lapataó Tio maloóonto mota ayu ara ngobungo tobiihu dalalo. Tio lonaó mota ode bungo lo ara boito, bo diila loódungga penu boli ngobotu hungolio bo duungio wambaó. Lapataó ti Isa lotahuda maó ode bungo lo ayu boito, "Yió madiilalo momungo mai!" Tulusi bungo lo ayu ara boito huáa lololantelo mola. **20** Tou tahiduduá li Isa loóonto u lotoduo mai boito, lolinggolabe daá timongolio. "Woloolo mola bungo lo ara boito maalato yilate ngoáamilalo?" yilintu limongolio. **21** "Otutu," tametaó li Isa, "Wonu

timongoli palacaya wau diila molingu timongoli mowali mohutu maó wolo uma pilohutu-U tobungo lo ara botie. Wau diila bo wambaó uito, tumbaó timongoli mamowali molojiya ode huludu botie, 'Pohuwatolo wau polemailo mola ode delomo dehetó'; yi suáli boito mamotoduo. **22** Boli wolo u pohile limongoli todelomo duámu, timongoli mamó lolimo maó, asali timongoli palacaya." **23** Lapataó ti Isa luli lohualinga mota ode Bele lo Eeya, tulusi tilumuwotaó wau helo ngaajali mota teto. Tou Tio donggo hemo ngaajali, mongo iimamu tauíwa wau mongo tauíwa lo Yahudi malonaó mai ode o-Lio wau helohintu, "Pato-patoáa tolo Yio helohutu ngoáamilalo boito? Tatoonu tahe longohi haku boito ole-Mu?" **24** Ti Isa lolametaó, "Wau olo motohilaa mohintu olimongoli. Wau wonu timongoli moó tametai, mapolele-U mai olimongoli wolo haku lotatoonu Wau helohutu suáli boito. **25** Tei Yahya helo polihu wolo haku lotatoonu? Lo Allahu Taáala meaanto lomanusia?" Tulusi mongo iimamu tauíwa wau mongo tauíwa lo Yahudi boito malo dulohupa towolota limongolio, "Wonu polelento maó, 'Wolo haku lo Allahu Taáala,' Tio mamolojiya, 'Wonu odito yilongola timongoli diila palacaya o-Lio?' **26** Bo wonu polelento maó, 'Wolo haku lomanusia,' ito moohe lotaa dadaata, sababu timongolio ngoáamila hemo nganggapu tei Yahya boito ngotaalio lonabi." **27** Oditolio timongolio malo lametaó, "Diila otaawa lami." Lapataó ti Isa lotahuda maó ode limongolio, "Wonu odito Wau olo diila molele mai olimongoli wolo haku lotatoonu Wau helohutu ngoáamilalo botie." **28** "Botia woloolo mola huhamaamu pasali losuáli botie?" tahuda maó li Isa wumbutio mola. "Woluo tiyamo ngota taówalaó duulota mongo lolai. Tau boito lonaó mota ode walaio tamohuhula wau loloiya maó, 'Uuti, ponaólo yio mota pokalaja to ilengi lo angguru todulahee botie.' **29** 'Watia diila mohuto,' tametaó lowalaio boito. Bo lapatio maó malo boliólo mola pikiilangilio wau malonaó ode ilengi lo angguru boito. **30** Lapataó tau boito lonaó mota ode walaio taóluolio, wau loloiya maó suáli u tutuuwauwa, 'Joo, Paapa,' tametaó lowalaó taóluolio boito. Bo tio diila lonaó. **31** Naa, towolota lowalaó duulota boito, tatoonu tamaa lohutu kahandaki liyamolio?" "Tamohuhula," tametaó lomongo iimamu tauíwa wau mongo tauíwa lo Yahudi boito. Yi ti Isa lotahuda maó olimongolio, "Pomalacayalo; Tahí



potagia beya wau mongobua suuntali mameimulo mowali pongawaá umati lo Allahu Taaála wolimongoli. **32** Sababu tei Yahya Tamopolihua lonaó mai, wau mai lopotunu maó olimongoli dudelo lo tutumulo u kilahandaki lo Eeya, bo timongoli diila lohuto lomalacaya to pongaa-jaliilio; bo tahi potagia beya wau mongobua suuntali tamalo malacaya olio. Bo eleponu timongoli maloóonto ngoáamilalo boito, timongoli debo diila lolomela pikiilangimu wau diila lomalacaya to Eeya." **33** "Dungohi maó pohumaya u tuwau botie poli," tahuda li Isa. "Ngotaalio taa ohuuwo lohuta lomulo ilengi lo angguru ngopita. Tio lohutu bala topalitio, wau longaúde huango ode pakaakasi pomitodelo angguru, lapataó malomongu monala podahaalo. Lapataó uito pilopo seuwalio ilengi boito to tahi pokalajawa ilengi, tulusi tio lonaó odelipu wewo. **34** Toui malei dungga sembo polipuwalo hungo lo angguru, taa ohuuwo lohuta boito malolao tahi pomayalio to tahi pokalajawa ilengi boito mota mololimo tayadio. **35** Bo tahi pokalajawa ilengi boito malo heúpai tahi pomayalio lotaa ohuuwo lohuta boito; Tangotalio pilatelio, tawewo pilatelio yila-yilateelo maó, wau tawewo poli hepilailio wolo botu. **36** Taa ohuuwo lohuta boito luli lolao mota tahi pomayalio wewo lebe ngohuntua wolo tabohulio. Bo timongolio debo hepilo hutulio tutuuwauwa debo odelo tabohulio. **37** Mapulitio taa ohuuwo lohuta boito lolao mota walaio lohihilao ode limongolio. 'Matantu walauuu boito mahulumatio mai limongolio,' to pikiilangilio. **38** Bo toui tahi pokalajawa boito loóonto walaó lotaa ohuuwo lohuta boito, timongolio malo loiya ngota timongota, 'Naa, botie tio, ahali lowalisilio. Dulo mapateento tio mate-mateelo maó, alihu mamu tapunto walisanilio!' **39** Yi walaó boito mailaupio, wau pilomahulio ode bulemengio, tulusi pilatelio yila-yilateelo maó." **40** Ti Isa malohintu maó, "Naa, wonu taa ohuuwo ilengi lo angguru boito muli mohualingai wolo umaa pohutuolio to tahi pokalajawa ilengi boito?" **41** Timongolio lolametaó, "Tantu tio mamomate-mateelo maó tau-tauwalo hileeta boito, tulusi moposeuwa maó ilengi lo angguru boito ode taawewo tamohuto mongohi tayadu tilapulo huta boito ode olio to wakutuulio." **42** Yi ti Isa lotahuda maó olimongolio, "Diipo peénta maó timongoli lopobaca u tulatulade todelomo Kitabi? 'Botu udiila ilopomakea lotaa u opongotota mokalaja hudungu malowali botu

ulaba-labaalo mopiohu. Uti-utieelo huhutu lo Eeya; donggo boli piohio!" "**43** "Oditolio poótoloma maó," tahuda li Isa, "ngoámila haku odelo umati lo Allahu Taáala mapahuto-Lio monto olemu wau wohi-Lio ode bangusa tuwau tamaa moponaó ngoámila palenta lo Allahu Taáala. **44** Taa u modehu tobotu boito, mamoaंतulu; wau taa odeehe lobotu boito, maólihita mowali peaahuó." **45** Tou mongo iimamu tauíwa wau tau-tauwalo Parisi loódungohe pohumaya li Isa boito, otaawa limongolio deu ti Isa helo tahuda pasali olimongolio. **46** Oditolio timongolio lotolopani moheúpa o-Lio. Bo timongolio moohe totaa dadaata, sababu taa dadaata boito hemo nganggapu li Isa ngotaalio lonabi.

**22:1** Ti Isa luli lotahuda ode taa dadaata wolo lomake pohumaya, tahudaa-Lio, **2** "Wonu Allahu Taáala momalenta, owowoluwoalio debo odelo pohumaya botie: Olongia ngota helohutu potihunggu lonika ode walaio talolai. **3** Olongia boito lopoáhu tahi pomayalio mota lolutulai tau-tauwalo tahe tiloduo ode potihunggu boito. Bo tahe tiloduo boito diila lohuto lonaó mai. **4** Lapataó ti olongia boito luli lopoáhu mota tahi pomayalio wewo. Loiyalio maó olimongolio: 'Potunggula maó ode tau-tauwalo tatiloduo boito: Upohinta to potihunggu malei dapato. Sapi, wau walaó sapiu u pulito mopiohe mailoloto. Ngoámila malei dapato. Matoduwolo ode potihunggu lonika!' **5** Bo tataa-muwaalo tahe tiloduo boito diila lomaduli mai. Timongolio bo lonaó ode kalaja limongolio ngota-ngota -- tangotaalio lonaó ode halabolulio, tawewolio ode kalaja umopeehu untungi daá; **6** wau tawewolio poli helo heúpa tahi pomaya li olongia boito, tulusi lomate olimongolio yila-yilateelo maó. **7** Tou ti olongia boito loódungohe suáli boito, tio maloingo daá. Tio malolao suludadulio mota lomate yila-yilateelo maó to tamoomatea mate-mateelo maó boito, wau malomobu kota limongolio. **8** Lapataó uito tio malo tiangai tahi pomayalio, tulusi loloiya maó, 'Potihunggu lonika malei dapato, bo tahe tiloduo diila paatuti. **9** Ponaólo mota ode dadaa-lalaala daá, wau toduwalo mai tau odaata-daatalo maó ode potihunggu lonika botie.' **10** Yi tahi pomayawa boito olo malonaó. Timongolio lonaó mota ode dadaa-lalaala daá tulusi longambu mai ngoámila tahe lodunggaya

woli mongolio mola teto, tamopiohe boli tamoleeto. Yi malopolu lomola bantayo lo potihunggu boito lo tahe tiloduo. **11** Lapatao ti olongia boito tilumotao lodunggaya wolo tahe tiloduwolio. Tio maloonto ngotaalio tadiila pakepake pakeyangi lo potihunggu. **12** Lapatao tio lohintu maotatau boito, 'Sahabati, woloolo mola yio loo tuwotai lou diila pakepake boo lo potihunggu?' Tau boito diilalo lowali loloiya wolo-wolo. **13** Lapatao ti olongia boito loloiya ode tahi pomayalio, 'Pungua maotaaatio wau uluulio wau pomahula mota ode bulemengio totambati u modiolomo. Mola teto mawoluo hiyongo wau dutolo.' " **14** Lapatao ti Isa lopoo pulitao pohumaya boito odie mola, "Ngohuntua tatiliyango, bo wambaot ngoidi tailo tulaota." **15** Lapatao tau-tauwalo Parisi lonaot lodulohupa peepeenta tomimbihu woloolo mola timongolio mowali mopotala li Isa wolo totoonulalo yiyintu. **16** Yi timongolio malolao to tahiduduolimongolio odeli Isa peepeenta wolo dengolo lota pongawaa lopalatei lei Herodes. Tau-tauwalo boito loloiya maot odeli Isa, "Paa Guru, otaawa lami ti Paa ohilaa motulidu. Ti Paa malo ngaajali lou juujuru tomimbihu kahandaki lo Allahu Taala ode manusia, lou diila momandungi boli huhaama lo tatoonu. Sababu ti Paa diila momilohe tau. **17** Sababu uito, nte polelea mai li Paa olami: Modudu wudu lo agamanto, tingga mowali momayali beya odeli Kaisali meaanto diila?" **18** Otaawa li Isa makusudu limongolio u moleeto boito, tou odito Tio malo tahuda maot, "Wuu tahi munapikia! Yilongola timongoli ohilaa mopotala ola-U? **19** Nte pobilohe mai ola-U mato lodoi u pomayali limongoli beya!" Lapatao timongolio longohi maot o-Lio doi talaot ngopita. **20** Ti Isa malohintu olimongolio, "Gambali wau tanggulo tatoonu utie?" **21** "Li Kaisali," uali mongolio. Yi ti Isa lotahuda maot olimongolio, "Wonu odito, wohiyalo odeli Kaisali wolo u miliki li Kaisali, wau ode Allahu Taala wolo u miliki lo Allahu Taala." **22** Tou timongolio loodungohe tomba-Ngio boito, timongolio lolinggolabe. Yi timongolio malonaot lololaa maot li Isa. **23** To dulahulo boito, dengolo lota taulo Saduki lonaot mai odeli Isa. Timongolio yito kaumu taohuhama deu taa mate diilalo mobongu mai. **24** "Paa Guru," uali mongolio, "Tei Musa helo ngaajali odie: Wonu talolai ngota mate, wau tio diila lootapu walaot, wutatio boito mamusi monika wolo jandalio alihu mongohi mai wali ode

taa mailate boito. **25** Peéenta woluo tamohutato pitu lota tahi biluloáwa teewe. Tamohuhula lonika, tulusi yilate diila ilowalaó. Yi jandalio tilolaalio maó duólo wutatio. **26** Wutatio boito lapataó yilate olo diila loótapu mai walaó. Suáli u tutuuwauwa boito lowali olo tomongo wutatio taótolulio wau demola taópitulio. **27** Pulitio maó taabua boito olo yilate. **28** Naa, to wakutu taa mate muli bongulo-Lio mai, dile lo tatoonu taabua boito? Sababu pitu-pitu lotaalo malonika wolio." **29** Ti Isa lolametaó, "Timongoli matilala daá, sababu timongoli diila mongalati lo Kitabi, meaanto kawasa lo Allahu Taáala. **30** Sababu wonu bolo taa mate de muli bongulo-Lio mai, diilalo monika timongolio, bo matumumulo odelo malaikati tosologa. **31** Diipo peéenta maó timongoli lopobaca upilo tahuda lo Allahu Taáala pasali lotaa mate muli bongulo-Lio mai? Allahu Taáala lotahuda, **32** 'Waulo Allahu Taáala lei Abraham, Allahu Taáala lei Isihaka wau Allahu Taáala lei Yako.' Allahu Taáala boito diila Allahu Taáala lotaa mate. Tio Allahu Taáala lotaa tumutumulo!" **33** Tou taa dadaata boito loódungohe tombango li Isa, timongolio lolinggolabe daá to pongaajali-Lio. **34** Tou tau-tauwalo Parisi loódungohe deu ti Isa malohutu tau-tauwalo Saduki diilalo loó bisala lolo-loolo, yi malo ambua timongolio. **35** Ngotaalio limongolio, deuito-yito ngotaalio guru lo agama, lohimontala mopotala li Isa lo yiyintu tuwau. **36** "Paaá Guru," loiyaalio, "palenta toonu ulaba-labaalo mopiohu todelomo butoo lo agama?" **37** Ti Isa lolametaó, "Toliánga mola Eeya Allahu Taáalamu wolo lealeaatu lohilaamu, wolo lealeaatu lojiwamu, wau wolo ngoilanggubu lo aakalimu. **38** Ui-uitolo palenta ulaba-labaalo mopiohu wau polohuna daá! **39** Palenta oluolio tutuuwauwa wolo u bohulio boito: Toliánga maó timongotamu debo odelo yio motoliánga batangamu lohihilao. **40** Ngoámila wuúdu lo agama uilohi mai lei Musa wau pongaajali lomongo nabi dadaasali to oluo lopalenta boito." **41** Tou tau-tauwalo Parisi donggo hiambua mota teto, ti Isa malohintu olimongolio. **42** "Woololo mola huhama limongoli pasali li Olongia Tamoo-poáahua? Wali mai lo tatoonu Tio?" "Wali mai lei Dauda," tametaó limongolio. **43** "Wonu odito," yilintu maó li Isa, "wolo sababuulio Rohullah longohi potuhata todelomo hilaa lei Dauda molanggula Olongia Tamoo-poáahua boito 'Eeya'? Sababu tei Dauda loloiya, **44** 'Eeya lotahuda

ode Eeyau: potihuloólo to ambahu olowala-U, tunggula Wau mohutu maó ngoáamila lawani-Mu taáaluku to ole-Mu.' **45** Oditolio wonu tei Dauda mongunte Olongia Tamoo-poáahua boito 'Eeya', yi diila pongalo aakali Tio wali mai lei Dauda." **46** Diaaluo penu boli ngotaa maó taloo tameto li Isa. Wau tumulalo mai todulahu boito, diduu maó tabuheli mohintu wolo-wolo to o-Lio.

**23:1** Lapataó ti Isa lotahuda maó ode taa dadaata wau tahidudua o-Lio, **2** "Guguu-ruwaalo agama, wau tau-tauwalo Parisi loótapu kawasa u motombango makusudu butoée Musa. **3** Sababu uito dungohi wau dudui maó ngoáamila u pilomalentai limongolio. Bo diila maó pohutua wolo u hepohutuo limongolio, sababu timongolio diila hemo ponaó wolo u hepo ngaajali limongolio. **4** Timongolio hemohile wolo moóohuu susuu-aliyaalo u mototolo wau hemongohi wuwuu-uduwaalo u hibuuheta, bo penu boli ngoidi maó timongolio diila hipo tulungia tahemo ponaó uito. **5** Ngoáamila u hepohutuo limongolio bo wambaó mopobibi totau. Timongolio sangaja momake tali lo potabiaalo u hitaanggala wau mopohayaó lumbai-lumbai lojumba limongolio. **6** Timongolio motohilaa tambati umopiohe daá to popoo-tihungguwalo, wau kadela ulaba-labaalo mopiohe to bebee-leyaalo potabiaalo. **7** Timongolio sanangi hulumatío lotau to papaa-taliyaalo, wau unteelo 'Paaá Guru'. **8** Bo timongoli, diila maó pohuto unteelo 'Paaá Guru' sababu Gurumu bo wambaó ngota wau timongoli ngoáamila mohutato. **9** Wau timongoli diila maó pongiibode boli ngota maó todunia botie 'Paapa', sababu ti Paapamu bo ngota, deúito-yito Allahu Taáala limongoli tato sologa. **10** Wau diila maó pohuto timongoli unteelo 'Tauwa', sababu tauwamu bo ngota, deúito-yito Olongia Tamoo-poáahua u pilodanti mai lo Allahu Taáala. **11** Taa u pulito udaá towolota limongoli wajibu mowali watomu. **12** Taa u mopolaió batangalío mapo dupapalo, wau taa u motidupapa batangalío mapolaiólo." **13** "Matopotala timongoli guguu-ruwaalo agama wau tau-tauwalo Parisi! Timongoli wambaó motihutu diila otu-otutuulo maó. Timongoli hemo ngabuto taa u mowali pongawaá umati lo Allahu Taáala. Timongoli lohihilao diila mohuto mowali pongawaá umati lo Allahu Taáala, wau taawewo tamohuto, hetanggua limongoli. **14**

Matopotala timongoli guguu-ruwaalo agama wau tau-tauwalo Parisi; Timongoli wambaó tamoohutua udiila otu-otutuulo maó. Timongoli hemo ngaakali tomongo janda wau hemohehu bele limongolio wau u modepuheó u moleeto boito timongoli hemodua hayahaya. Uito sababuulio hukuumanu limongoli de mamo buheetai! **15** Matopotala timongoli guguu-ruwaalo agama wau tau-tauwalo Parisi. Timongoli wambaó tamoohutua udiila otu-otutuulo maó! Timongoli helonaó lolami-lamingolo maó llobalango deheto, wau lolontale datahu bo mopowali tau ngota tumuwoto agamamu. Wau lapataó tau boito tumuwoto agamamu, hepilohutu limongoli tio lowali pongowaá lonalaka u poóoluo lebe moleeto woli mongoli lohihilao! **16** Matopotala timongoli mongo tauwa pitoó! Timongoli hipo ngaajalia odie, 'Wonu tau motadia domi Bele lo Eeya, tau boito diila meitihuto to tadiaalio boito; bo wonu tio motadia domi hulawa todelomo Bele lo Eeya, yi tio meitihuto to tadiaalio boito.' **17** Timongoli tau-tauwalo mohulodu wau pitoó! Toonu ulebe polohuna daá; hulawalio, meaanto Bele lo Eeya u mopowali maó hulawa boito mantali? **18** Timongoli helo ngaajali maó utie olo, 'Wonu ngotaalio motadia domi mesba, tau boito diila meitihuto to tadiaalio; bo wonu tio motadia domi dewo toitaato mesba boito, tio meitihuto wolo tadiaalio boito.' **19** Mailaba pitoio limongoli! Toonu ulebe polohuna daá? Dewolio meaanto mesba u mopowali maó dewo boito mantali? **20** Sababu uito, wonu ngotaalio motadia domi mesba, uito boliilio tio motadia domi mesba, wau domi ngoáamila dewo uwoluo toitaatio. **21** Wau wonu ngotaalio motadia domi Bele lo Eeya, uito boliilio deu tio motadia domi Bele lo Eeya boito, wau domi Allahu Taaala tabilu-biluloáa teto. **22** Wau wonu ngotaalio motadia domi sologa, uito boliilio tio motadia domi tambati biluloá lo Eeya, wau domi Allahu Taaala tahulo-huloáa tambati biluloá boito. **23** Matopotala timongoli guguu-ruwaalo agama wau tau-tauwalo Parisi! Timongoli wambaó tamoohutua udiila otu-otutulo maó. Ramba-ramba debo odelo solasi, denggu-denggu, wau boli jinta, hewohi limongoli ngotayade mopululio ode Eeya. Lebe-lebe pomaó susuu-aliyaalo u polohuna daá todelomo bubuu-toówaalo agama, debo odelo humayaalio: Uaadili, laasa toliángo wau otatapu wau molotolo hilao, diila padulio limongoli.



Lebe-lebe pomaó ui-uitolo u patutilio pohutuo maó limongoli, lou diila momalongo uwewolio olo. **24** Timongoli mongo tauwa pitoó! Lango todelomo minumani limongoli tapisio limongoli, lebe-lebe pomaó unta toloolo limongoli! **25** Matopotala timongoli guguu-ruwaalo agama wau tau-tauwalo Parisi! Timongoli wambaó tamoohutua udiila otu-otutulo maó. Mamaa-nggowalo wau pipii-nggeyalo limongoli heiluheta limongoli lobebe-belesilo maó towimbihu bulemengio, hiambola towimbihu delomio mokootolo daá wolo susuu-aliyaalo uilotapu limongoli wolo pakusa wau langgamu. **26** Parisi pitoó! Wuloipo mobebe-belesilo maó towimbihu delomio lo mamaa-nggowaalo wau pipii-nggeyaalo limongoli, alihu towimbihu bulemengio mowali belesi olo! **27** Matopotala timongoli guguu-ruwaalo agama wau tau-tauwalo Parisi! Timongoli wambaó tamoohutua udiila otu-otutuulo maó! Timongoli debo odelo kukuu-buluwaalo uilamahe lou moputió; to bulemengio oontonga mopiohu, bo todelomio polupolu lotulalo wau ngoáamilalo u hihuutode. **28** Odito olo timongoli. Monto bulemengio timongoli oontonga lotau mopiohu; bo todelomio, timongoli polupolu lou paaluti wau hipo lambangawa wuúdu."

**29** "Matopotala timongoli guguu-ruwaalo agama wau tau-tauwalo Parisi! Timongoli wambaó tamoohutua udiila otu-otutuulo maó! Timongoli helomongu kukuu-buluwalo u mopiohe duólo mongo nabi, wau helo podadai tutuu-guwaalo poéela lotaa tutumulio mopiohe. **30** Wau timongoli hipo loiyawa, 'Humayaalio ami tumutumulo tomaasa linenemoya lami muloololio mai, ami diila tamoduduá olimongolio helomate mongo nabi yila-yilatelo maó.' **31** Oditolio timongoli hipongakua lohihilao deu timongolilo wali mai lotau-tauwalo tahe lomate yila-yilaatelo maó tomongo nabi! **32** Wonu odito, potolongalo mola wau poólapatalo duduu-sawaalo u matilumula linenemoya limongoli boito **33** Timongoli hileeta wau wali mai lotaa moleeto! Woloolo mola timongoli mowali mopoáahu batanga limongoli lohihilao monto hukuumani tonalaka? **34** Dungohilo tióotutua: Wau mamolao mai olemu mongo nabi, tau-tauwalo molinepo, wau guguu-ruwaalo; ngatayadi mongolio mapatee limongoli mate-mateelo maó, wau ngotayade wewolio mapakua limongoli to ayu saalipu. Woluo taposikisa limongoli to bebee-leyaala potabiaalo, wau poheheenela

limongoli monto kota tuwau ode kota uwewo. **35** Sababu uito, timongoli mamootapu hukuumani sababu polomatea yila-yilateelo maó u hepilohutu limongoli ode ngoáamila taadiila ototala tumulalo mai polomatea yila-yilateelo maó olei Habel tadiila ototala tunggula polomatea yila-yilateelo maó olei Jakaria walaée Berekhya, tapilate limongoli yila-yilateelo maó towolota Bele lo Eeya wau mesba. **36** Pomalacayalo: ngoáamilalo boito mabantaa lotau-tauwalo tojamani botie!" **37** "Yerusalemu, Yerusalemu! Mongo nabi pilatemu yila-yilateelo maó. Mongo utolia lo Allahu Taaala hepilaimu lobotu tunggula yilate. Demaa poóngolo Wau ohilaa momuduó ngoáamila tuango lipumu odelo tiilo maluó modaha walaio to walungo polipiio, bo timongoli diila mohuto! **38** Sababu uito Allahu Taaala diilalo peé-peéenta wolemu. **39** Ototai maó; tumulalo mai botia yió diilalo moóonto ola-U tunggula yió mamoloiya, 'Mabala-balakatilo Tio tadungga-dungga mai to tanggulo Eeya.' "

**24:1** Tou ti Isa lololaa maó Bele lo Eeya, tahiduduá o-Lio lonaó mai ode o-Lio wau helolunu mota huhuu-dunguwaalo Bele lo Eeya boito. **2** Ti Isa lotahuda maó ode limongolio, "Wolo timongoli moóonto mota ngoáamilalo boito? Ototai maó, diaaluo penu boli botu ngobotu monto huhuu-dunguwaalo boito mameitolaa susuusungi to tambatilio. Ngoáamilalo mapo lohubuwo." **3** Lapataó ti Isa lonaó mola ode Huludu Jaitun, wau tou Tio donggo hulohuloáa, tahiduduá o-Lio lonaó mai lobiisalawa tutuuwau bo wambaó wolo batanga-Lio. "Polelea mai ode mongowatia omolua ngoáamilalo boito mamotoduo," uali mongolio o-Lio. "Tutuuotio wolo umamo poilaalo podudungga mai li Paaá wau pulito lojamani?" **4** Ti Isa lolametaó, "Poódahai maó, diila bolo o aakalialio timongoli. **5** Sababu ngohuntua tau mamonaó mai loui momake tanggulu-U wau moloiya, 'Waulo Olongia Tamoo-poáahua!' Timongolio mamongakali totaa dadaata. **6** Timongoli mamoo dungshe titii-ngoheyalo polotuuhua wau hahaa-baliyaalo lopopaatea, bo diila maó oohe. Sababu susuu-aliyaalo boito musi motoduo mai, bo uito diila oboliilio deú mawakutuulio kiama. **7** Bangusa u tuwau mamopaatea moluwali bangusa uwewo, wau lipu u tuwau mamoluhu lipu uwewo. Boli toutoonu maódungga lo polobiti wau

liluhu. **8** Ngoáamilalo boito boheli bohulio, debo odelo ngongoto u olaasawa lo taabua ngota tou tío mamotutu mai. **9** Lapatao timongoli mawaupolio wau wuduwolio u sikisaalo wau pateelio mate-mateelo maó. Ngoilanggubu dunia mamó lonui mongoli sababu timongoli muri-U. **10** Tou boito ngohuntua tau momaahe iimani, wau mohiyanati wau mololoónuá ngota-timongota. **11** Dadaata mongo nabi paaluti malumenetai, wau mamó ngaakali taa dadaata. **12** U moleeto mamoloópo boli toutoonú odito hebatilio tilinggula dadaata taa diilalo mototooliánga. **13** Bo tamooó tahangi demola pulitio, mapo aahuwolo. **14** Wau Habari Mopiohe pasali lou woloolo mola Allahu Taála momalenta mapo habariyolo to ngoilanggubu dunia, alihu ngoáamila tau mamooó dungoheó. Lapatao uito deúito meidungga mai kiama." **15** "Timongoli mamooónto 'Ololeeto u mongantulu', debo odelo uiloíya mai li Nabi Daniali, tihutihula totambati u mantali. (Toloéela ode tamopobaca: Poótuoti maó wolo boliilio!) **16** Tou boito, taa u Yudea mamusi tumeteó mola ode hihui-huidea. **17** Taa u towatopo bele diila maó polaahe mola mohama u hituatuawua monto delomo bele. **18** Taa u mota to halabolu diila maó pohualingai mohama jumbalio. **19** Otutu moótihela hapato duduu-laheyaalo boito duólo taabua ombodaá, wau tiilo tadonggo hemo potutu lowalaó taunge! **20** Poduáalo mola alihu timongoli diila bolo tumeteó to polodidi meaalo todulahu Saabati! **21** To duduu-laheyaalo u moótihela hapato boito mawoluo mai sikisaa daá debo odelo diipo peéenta maó lowali tumulalo mai bohulo dunia tunggula tosaaáti botie, wau madiilalo motoduo mai poli. **22** Humayaalio Allahu Taála diila mopolimbuó wakutuulio; yi diaaluo boli ngota maó tamooáahu. Bo sababu umati-Lio, Allahu Taála mopolimbuó maasa boito. **23** Tou boito wonu woluo tahingota-ngotaawa moloíya olimongoli 'Bilohi, Olongia Tamoo-poáhua boito woluo tea!' meaanto 'Tio woluo teto!' -- diila maó palacayai tau boito. **24** Sababu malumenetai tahi poáhua paaluti wau mongo nabi paluti. Timongolio mamokalaja maó totoonulalo huhutu upolu-pulutuó wau momooó-linggolabewalo, wonu mowali, umati lo Allahu Taála olo. **25** Oditolio, poótoloma maó! Wau malo poótaa mai olimongoli leimulo tou suáli boito diipo motoduo mai. **26** Wonu tau moloíya olimongoli,

'Bilohi, Tio maito mola teto tohuta datahu u luasi daá wau delita!' -- timongoli diila maó ponaó mola odito. Meaalo wonu timongolio molojiya, 'Bilohi, Tio tuutuó teaa todelomo huwali!' -- diila maó palacayai. **27** Sababu podudungga mai lo Walaó Manusia debo odelo tinelo ilato puka-pukaái monto tiimulu, wau motinelo demola otolopa. **28** Touitoonu opate, teto olo obulungi mongongaala patelio." **29** "Diila mohiheo lapatio maó loui suusa tomaasa boito, mato lodulahu mamowali modiólomo, wau hulalo diilalo motinelo. Popoo-liyamaalo mamodulahu monto hulungo, wau tahi kawasawa mola tobaangio daá mamo aaa-mbulatia daá. **30** Lapataó uito tuoto lo Walaó Manusia maóontonga mola tohulungo. Tou boito ngoáamila bangusa todunia mahumoyongo. Timongolio mamooónto Walaó Manusia dungga-dungga mai toitaato heengo wolo kawasa wau omumulia uleidaá. **31** Tolompeti leidaá mapo tingohulio, wau Walaó Manusia mamopoáhu maaaa-laiikati-Lio mongambu umati-Lio monto opato dulungo dunia, monto huudu hulungo u tuwau demola huudu hulungo uwewo." **32** "Hamaa maó pongaajali monto bungo lo ayu ara. Wonu tangolio ukekeei moidu wau moluóyo, wau mahi tumbinga mai, otaawa limongoli deú sembo lopolo dulahee malembidei. **33** Odito olo wonu timongoli mamooónto susuu-aliyaalo boito motoduo mai, otaawa limongoli deú wakutuulio malembidei daá. **34** Ototai maó! Susuu-aliyaalo boito mamotoduo mai tou diipo tau-tauwalo tahitumula masaatia botie mateepo ngoáamilalo. **35** Hulungo wau dunia mamooli, bo tahuda-U debo ohiheo-hiheolo maó." **36** "Diaaluo tamotota omolua dulahio wau jamulio, maaaa-laikatiyalo tosologa olo diila motota, Walaó Allahu Taáala olo diila, bo wambaó Allahu Taáala tamotota. **37** Wonu bolo Walaó Manusia demei dungga, owowoluwoalio debo odelo tomaasa lei Noho tou muloololio mai. **38** To duduu-laheyaalo tou diipo taluhee daá boito tau-tauwalo hipolamela hipongiluma, wau hiponikawa. Odi-odieelo mola mololaalaaíta tunggula todulahee tei Noho tilumuwoto ode delomo kapali. **39** Tou taluhee daá boito helo lemba olimongolio ngoáamila, deúito timongolio longalati wolo udonggo todutoduo. Odi-odieelo mola olo owowoluwoalio de wonu Walaó Manusia meidungga mai. **40** Tou boito, duulota tadonggo hemo kalaja to halabolu: Ngotaalio madeloolio, wau

ngotaalio poli matolaalio maó. **41** Taabua duulota donggo hemo hilinga pale: Ngotaalio madeloolio, wau ngotaalio poli matolaalio maó. **42** Oditolio, poódahailo maó, sababu diila otaawa limongoli omolua Eeya limongoli mamei dungga. **43** Poótoloma maó utie! Humayaalio otaawa lotaa ohuuwo lo Bele jamu ngoolo tou hui tamo taówa mamei dungga mai, tio diila tamotuluhu, alihu tamotaówa boito diila tumuwoto ode delomo belelio. **44** Sababu uito, timongoli olo musi mopoóda-dahaalo maó. Sababu Walaó Manusia mamei dungga mai tosaaáti udiila helantobu limongoli." **45** Tahuda li Isa poli, "Wonu odito, tamoomayawa toonu utatapu wau molotolo hilao wau molinepo? Tio-tioolo tamaa puduó lituanilio mowali tauwa totahi pomayawa wewo, alihu tio mongohi maó uáalo olimongolio to wakutuulio. **46** Donggo boli sanangi tutu tio tamoomayawa boito wonu bolo tituanilio muli mohualingai, wau moódungga olio donggo hemo ponaó lo tuugasilio. **47** Pomalacayalo, tituani boito mamopo palacaya maó ngoáamila halataalio to tamoomayawa boito. **48** Bo wonu tamoomayawa boito moleeto, tio mamoloiya todelomo hilaalio, **49** 'Tuani watia donggo mohiheo bolo mohualingai,' tulusi tio mamomate tahi pomayawa wewo, wau molamela mongilu wolo tahi huwoáalo. **50** Lapataó tituanilio mamuli mohualingai todulahee wau jamu udiila helanto-lantobulo. **51** Yi tamoomayawa boito mawumbadelio mongo-mongongotolo maó lituanilio, wau mapo mahulolio ode tambati lotahi munapikia. Timongolio mahumoyongo wau modutolo mola teto."

**25:1** "Wonu bolo Walaó Manusia meidungga mai odelo Eeya, owowoluwoalio debo odelo todelomo pohumaya botie: Mopulu lota mongo dulahu helo lunuhe libulentiti. Ngota-ngota helohama tohe, tulusi mota lolutulai bulentiti lai. **2** Limo lota limongolio hihuulode, wau limo lota wewolio hitinepa. **3** Limo lota mongo dulahu tahi huulode boito malodelo mai tohe, bo diila lopo dapato yinulo. **4** Limo lota mongo dulahu tahi tiinepa lodelo mai tohe wau peé-peéenta lopo dapato yinulo. **5** Tibulentiti lai boito yilanggali mai, tou odito mongo dulahu boito malo diduto tulusi leituluhu. **6** Tomutaó louhui, bolo dungo-dungohei suala

wuwaatiá 'Tibulentiti lai dungga-dungga mai! Dulo botulaa mai tio!' **7**  
Mongo dulahu mopolu lota boito malobongu, wau lopoleitaó tohe  
limongolio. **8** Mongo dulahu tahi huulode boito, malo loiya ode tahi tinepa  
boito, 'Wohia mai olami yinulomu ngoidi, sababu tohe lami mawimbideo  
mate.' **9** 'Diila mowali!' tametaó lomongo dulahu tahi tinepa boito, sababu  
ito ngoáamila bolo didu otuheeta loinulo. Ponaólo mota motali to toko. **10**  
Yi mongo dulahu tahi huulode boito malonaó mota lotali mai yinulo. Tou  
timongolio lopalutaó, malei dungga mai tibulentiti lai. Mongo dulahu limo  
lota tamaa hidapata boito tilumuwoto peé-peéenta woli bulentiti lai ode  
tambati lo potihunggu, wau huhebu mahileutio mai! **11** Lapataó mongo  
dulahu wewolio boito malei dungga mai, Timongolio hipo ngiibode,  
'Tuani, Tuani, huói mai huhebu olamiaatia'. **12** Bo tibulentiti lai boito malo  
lametai, 'Wau diila moótaawa woli mongoli.' " **13** Tulusi ti Isa lopoo  
pulitaó pohumaya-Lio boito odie, "Masababu uito poódaha-dahaalo maó,  
sababu diila otaawa limongoli dulahio meaalo jamulio." **14** "Wonu bolo  
Walaó Manusia meidungga mai odelo Eeya, owowoluwoalio olo debo  
odelo pahumaya botie. Talolai ngota ohilaa monaó ode tambati u  
molamingo. Tio malo tiangai tahi pomayalio, tulusi pilo malacayalio maó  
halataalio to limongolio. **15** Ode timiidu tamoomayawa boito yilohialio  
moduduá u omamboa limongolio ngota-ngota. Ode ngotaalio yilohialio  
limo lolihu doi hulawa. Ode tawewo yilohialio dulo lihu doi hulawa. Wau  
ode tadonggo ngotaalio poli yilohialio ngolihu doi hulawa. Tulusi tio malo  
monggato. **16** Tamoomayawa u lololimo limo lolihu doi hulawa boito lato  
lonaó mota lodaahangi, lapataó luli ilopaéeda mai limo lolihu doi hulawa.  
**17** Odito olo tamoomayawa u lololimo dulo lihu doi hulawa boito luli  
ilopaéeda dulo lihu. **18** Bo tamomayawa u lololimo ngolihu doi hulawa  
boito mota longaliáa huango tohuta, tulusi doi lituanilio tiluuio teto. **19**  
Lohiheo daá lapatio maó, tituani lotahi pomayawa boito luli lohualingai,  
wau malo leekenia woli mongolio. **20** Tamoomayawa u lololimo limo  
lolihu doi hulawa boito malonaó mai, wau lohudu maó mopulu lolihu.  
'Tuani,' loiyaalio maó, 'Ti Tuani malohudu mai limo lolihu doi hulawa  
odelaatia. Bilohilo maó, watia mailo paeeda poli limo lolihu.' **21** 'Ooo,' uali  
tuani boito, 'Yió tamoomayawa mopiohe wau tatapu molotolo hilao.



Sababu yio mowali palacayalo tou ngoidi, yi u dadaata olo debo mapo malacayau mai olemu. Tuwotai wau dulo motisanangi wolau!" **22** Lapatao tamoomayawa u lololimo dulo lihu doi hulawa boito malonaó mai, wau loloiya maó, 'Tuani, ti Tuani malohudu mai dulo lihu doi hulawa olaatia, bilohilo maó, watia mailo paéda dulo lihu poli.' **23** 'Oooó,' uali tuani boito 'Yio tamoomayawa mopiohe wau tatapu molotolo hilao. Sababu yio mowali palacayalo tou ngoidi, u dadaata olo debo mapo malacayau mai olemu. Tuwotai wau dulo motisanangi wolau!" **24** Lapatao tamoomayawa u lololimo doi hulawa ngoliho boito malonaó mai, wau loloiya maó, 'Tuani, otaawa laatia ti Tuani ngotaalio lo taopiili diila gambangi mobolio. Ti Tuani hemolipu hungo diila totambati u pilomuloa li Tuani, wau hemo himoaa tilapulo totambati udiila pilo muayade bili li Tuani. **25** Watia moohe, oditolio watia maloluoó doi li Tuani todelomo huta. Utie doi li Tuani.' **26** 'Yio tamoomayawa u moleeto wau lantingalo!' Uali tuani boito. 'Tingga otaawamu deu wau hemolipu hungo diila totambati u pilomulowau, wau hemohama tilapulo totambati udiila pilo muayadeu?' **27** Wonu odito, patutilio tahuwomu maó doiu boito tobangi, alihu tou wau muli mohualingai, mamuli motapui doiu boito wolo lentelio. **28** Sababu uito, hamaawa mai doi boito monto olio, wau wohia maó ode taa u omopulu lihu doi hulawa boito. **29** Sababu taa u mailoluo, mamootapu lebe dadaata maó, wau tio maolebealio. Bo taa u odiaaa, ngoidi udonggo wolo to olio mahamaalo olo. **30** Wau tamoomayawa tadiila ohuna boito, pomahulalo ode delomo u modiolomo to bulemengio. Mola teto tio mahumoyongo wau modutolo!" " **31** "Wonu bolo Walo Manasia meidungga odelo Olongia dedeelo mai wolo ngoamila malaikati-Lio, Tio mamu tihuloaa toitaato tambati huhuloaa-Lio u lailaió. **32** Ngoamila bangusa maambu-Lio totalu-Lio. Lapatao Tio mamopo walaheo olimongolio mowali dulo polembaó debo odelo diti mopo walaheo himba monto batade. **33** Tau-tauwalo tahi pohutua kahandaki lo Allahu Taaala maambu-Lio to ambahu olowala-Lio, wau tawewo to ambahu olohi-Lio. **34** Lapatao ti Olongia boito mamu tahuda ode tau-tauwala to ambahu olowala-Lio, 'Duloolo timongoli tabilaa-katia li Paapa-U. Tuwotolo mai ode delomo Yiladia u piloheetu olemu tumulalo mai tobohulo dunia. **35**

Sababu tou Wau pola-polango, timongoli longohi ola-U uáalo, wau tou Wau mototoángo timongoli longohi ola-U uilumolo. Wau tau deli ngota, timongoli lololimo ola-U tobele limongoli. **36** Wau diila oboó, timongoli longohi ola-U boó. Wau mongongoto, timongoli lolaawati ola-U. Wau tilutupalio, timongoli lotulungi ola-U.' **37** Lapataó tau-tauwala boito mamoloiya, 'Eeya, omolua mongowatotia peénta loóonto to Eeya pola-polango tulusi mongowatotia longohi to Eeya uáalo meaalo mototoángo tulusi mongowatotia longohi to Eeya uilumolo? **38** Omolua mongowatotia peénta loóonto to Eeya odelo tau deli, tulusi mongowatotia lololimo maó ode delomo bele lomongo watotia? Omolua Eeya peénta diila oboó tulusi mongowatotia longohi to Eeya boó? **39** Omolua mongowatotia peénta loóonto to Eeya mongongoto meaalo tilutupalio, tulusi mongowatotia lotulungi to Eeya?' **40** Ti Olongia boito mamolametai, 'Ototai maó: tou timongoli mohutu maó suáli boito, eleponu ode tala ngota lomongo wutatu-U taahina daá, boliilio maó timongoli malohutu uito ode ola-U!' **41** Lapataó ti Olongia boito mamotahuda maó ode tau-tauwala to ambahu oloihi-Lio, 'Pohinggilo maó monteea tamoleeto daá! Tuwotolo mota ode tulu udiilalo mate, u mapilohetu ode Ibilisi wau mamaa-laikatilio! **42** Sababu tou Wau pola-polaango timongoli diila longohi ola-U uáalo; tou Wau mototoángo timongoli diila longohi ola-U uilumolo. **43** Wau tau deli ngota, timongoli diila lololimo ola-U todelomo bele limongoli. Wau diila oboó, timongoli diila longohi ola-U boó. Wau mongongoto wau tilutupalio, timongoli diila lolaawati ola-U.' **44** Lapataó timongolio mamoloiya o-Lio, 'Eeya, omolua mongowatotia loóonto to Eeya pola-polaango meaalo mototoángo, meaalo odelo tau deli ngota, meaalo diila oboó, meaalo mongongoto, meaalo tilutupalio, wau mongowatotia diila lotulungi to Eeya?' **45** Ti Olongia boito mamolametaó, 'Ototai maó: tou timongoli diila mohuto motulungi tala ngota taahina daá botie, uito boliilio timongoli diila mohuto motulungi ola-U.' **46** Yi tau-tauwalo boito mahukuu-maniyolo wolo hukuumanu u ohiheo-hiheolo maó, hiambola tahi pohutua kahandaki lo Allahu Taáala mamooó toduo tutumulo ututulio tutu wau ohiheo-hiheolo maó."

**26:1** Tou ti Isa yilapato longajali maó ngoáamila suáli boito, Tio malo tahuda ode tahiduduá o-Lio, **2** "Maótaawa limongoli donggo duuhui mola Dulahu Buka Paska, wau Walaó Manusia mawuduolio u salipuolio!" **3** Tou boito mongo iimamu tauwa wau mongo tauwa lo Yahudi hiambua totambati bele biluloá saaha li Iimamu Daá Kayapas. **4** Timongolio loheeluma u moheupa li Isa lou tutuuó wau momate o-Lio mate-mateelo maó. **5** "Bo," uali mongolio "Diila maó pohutuwole suáli boito tou olameyangi, sababu bolo tumoodei tolonggalo towolota lo ulipu." **6** Tou ti Isa to Betania, tobele lei Simon tamuloololio mai ongongoto lo alipo u moóti hela hapato, **7** taabua ngota lonaó mai odeli Isa. Tio lodelo buutulu lo puwalamu moputio, tuatunga yinulo moonu u mahale. Tou ti Isa donggo hulo-huloá hemo lamela, taabua boito malo luwataó yinulo moonu boito to lunggongi Isa. **8** Tahiduduá li Isa loónto u lotoduo boito maloingo. "Wolo hunalio ngoáamilalo botie poloo-yaliyolo?" loiya maó limongolio. **9** "Yinulo moonu boito mowali potali mota wolo halaga u molonggato, wau doilio wohi maó ode taa mosikini!" **10** Otaawa li Isa pikiilangi limongolio, tulusi Tio malo tahuda, "Yilongola timongoli mopoo suusa taabua botie? Tio malohutu tuwaulio u mopiohe wau pujipuji de ola-U. **11** Taa mosikini laito woluo towolota limongoli, bo Wau diila laito woli mongoli. **12** Lou moluwataó yinulo moonu boito ode batanga-U, tio mopo dapato u polobungalo ola-U. **13** Pomalacayalo! To ngoilanggubu dunia, boli tou toonu Habari Mopiohe monto Allahu Taaala pololadulo, wau huhutu lotaabua botie masilitaalio olo odelo poéela de olio." **14** Lapataó ngotaalio lo tamopulaa duulota tahiduduá li Isa, tailunte Yudas Iskariot, lonaó mola ode mongo iimamu tauwa. **15** Tio loloiya maó ode limongolio, "Wolo u mawohi limongoli olaatia wonu watia mamohudu mai li Isa ode limongoli?" Yi timongolio malo lekeni tolo pulu doi talaá, wau yilohilio maó doi boito olio. **16** Tumulalo mai tou boito tei Yudas helohima potaala ohiyango mopiohe u mohiyanati li Isa. **17** Tobohulo dulahu todelomo Lameyangi lo Roti Diila Oragi, tahiduduá li Isa lonaó mai ode o-Lio. Timongolio mai lohintu, "Tou toonu otohila li Paaá podapato maó lamiaatia uáalo Paska odeli Paaá?" **18** Ti Isa lolametaó, "Ponaólo mola ode tahingota-ngotaawa tokota wau loiya maó olio, 'Tahuda mai li Paaá

Guru, malei dungga wakutuulio ola-U; Wau ohilaa mopolame maó Paska tobelemu peé-peéenta wolo tahiduduá ola-U.' " **19** Tahiduduá li Isa malohutu wolo upilo ahulaó li Isa olimongolio. Timongolio mola lopo dapato maó uáalo Paska boito. **20** Tou mahui mai ti Isa wau tamopulaa duulota tahiduduá o-Lio malo tihuloáa lolamelo. **21** Tou timongolio donggo hipolamela, ti Isa lotahuda maó, "Dungohi: ngotaalio limongoli mamó hiyanati ola-U." **22** Loódungohe uito, tahiduduá li Isa mahi suukalia daá. Tulusi timongolio, ngota-ngota malohintu li Isa, "Tantu diila watia tahe makusuduo li Paaá?" **23** Ti Isa lolametaó, "Tamo polomo roti todelomo manggo peé-peéenta wola-U, tio-tiolo tamamo hiyanati ola-U. **24** Memangi Walaó Manusia maamate debo odelo u tulatulade todelomo Kitabi. Bo matopotala taa u mohiyanati Walaó Manusia! Lebe mopiohu tau boito wonu tio diila pilotutulio mai sama-samaata!" **25** Lapataó tei Yudas tamoo-hiyanatia boito loloiya, "Tantu diila watia tahe makusuduo li Paaá Guru?" Ti Isa lolametaó, "Odi-oditolo loiyamu!" **26** Tou timongolio mamó lamelo, ti Isa lohama maó roti, lapataó lolapali mola duá sukuru. Lapataó Tio lomita-mitanga roti boito wolo uluú-Lio tulusi yilohi-Lio ode tahiduduá o-Lio wau lotahuda, "Hamaawa wau tamelalo; uti-utieelo batanga-U." **27** Lapataó uito Tio malohama hakati tuwau lo angguru, tulusi lolapali mola sukuru ode Allahu Taáala. Lapataó yilohi-Lio hakati boito ode tahiduduá o-Lio, wau lotahuda, "Pongilulo, timongoli ngoáamila, **28** Sababu uti-utieelo duhu-U u moposaaha daantia lo Allahu Taáala -- duhu u hiluwato duólo taa dadaata u pongambungualo dusa limongolio. **29** Pomalacayalo; Wau diilalo mongilu angguru botie poli tunggula Wau mamongilu angguru bohu peé-peéenta woli mongoli to Dunia Bohu li Paapa-U." **30** Lapataó timongolio lopolahu mola lahu tuwau poilaalo momuji. Wau lapataó uito timongolio lonaó mola ode Huludu Jaitun. **31** Lapataó ti Isa lotahuda maó ode tahiduduá o-Lio, "Tou huilo botie timongoli ngoáamila matumeteó mololaa maó ola-U; sababu todelomo Kitabi tulatulade: Allahu Taáala lotahuda, 'Wau mamomate-mateelo maó diti boito, wau himbala lohimbalió mamó bubuuálawa.' **32** Bo tou Wau mamuli bongulo-Lio mai, Wau mamó timulo woli mongoli ode Galilea." **33** Tei Petrus malo loiya odeli Isa, "Penu ngoáamila

tawewolio mololaa maó li Paaá, watia sama-samaata diila!" **34** "Eelai maó," tahuda li Isa olio, "Tou huilo botie, tou maluó diipo mokukuyuu, yio mapoóotolu lomaaha ola-U." **35** Tei Petrus lolametaó, "Eleponu watia musi mate peé-peéenta woli Paaá, watia diila tamoloiya deu watia diila moótaawa woli Paaá!" Wau ngoáamila tahiduduá wewolio helo loiya odito olo. **36** Lapataó uito ti Isa lonaó wolo tahiduduá o-Lio ode tambati tuwau u ilunte Getsemani. Mola teto, Tio lotahuda maó olimongolio, "Potihuloópo tewe tou Wau donggo mota modua." **37** Tulusi Tio lotiango olei Petrus wau taduulota walaée Jebedeus lonaó peé-peéenta wo-Lio. Tio masiluukali wau balisa. **38** Tio lotahuda maó ode tahiduduá o-Lio, "Hilaa-U suukali daá, lasaalo debo odelo maamate wambaó. Potitolapo tewe timongoli, wau poduduólo mopoódaha-dahaalo maó wola-U." **39** Lapataó ti Isa lonaó mota lebe lolaminga ngopeé, tulusi Tio leidumulo lomola tohuta wau lodua. "Paapa," ua-Lio, "Wonu mowali, polaminga maó monto olaatia sikisa u musi dutola lowatia botie. Bo diila moduduó hilaa lowatia, bo moduduó u tohilaa li Paapa." **40** Lapataó uito ti Isa luli lohualingai ode tahiduduá o-Lio toulota wau ilodungгаа-Lio timongolio donggo hituluhe. Tio lotahuda maó odelei Petrus, "Bo ngojamu wambaó timongoli toulota diila lopoódaha peé-peéenta wola-U?" **41** Poódaha-dahaalo maó, wau podualo mola alihu timongoli diila odungгаа lomalapo. Memangi rohumu ohilaa mohutu u otutu bo diila mambo timongoli, sababu piili lomanusia boito molulupuhu." **42** Peéentapo ti Isa mota lodua, loiyaa-Lio, "Paapa, wonu sikisaa botie musi dutola lowatia, wau diila mowali powalahulo, hulialo maó utohilaa li Paapa u motoduo mai." **43** Lapataó uito ti Isa luli lohualingai poli, wau ilodungгаа-Lio tahiduduá o-Lio donggo hituluhe, sababu timongolio modiduto daá. **44** Donggo peéentapo ti Isa lololaa maó olimongolio wau u otolulio lodua lolapali tataa-heyaaalo u tutuuwauwa. **45** Lapataó uito Tio luli lohualingai ode tahiduduá o-Lio wau lotahuda, "Debo donggo hituluhe wau hihuheelia timongoli? Bilohi, malei dungгаа wakutuulio Walaó Manusia wuduolio ode kawasa lotahi oduusawa. **46** Pobongulo, duloolo ito monaó. Bilohi! Taa u mohiyanati ola-U malei dungгаа mai!" **47** Tou ti Isa donggo bisa-bisala, tei Yudas, ngotaalio lo tamopulaa duulota muri-Lio boito lonaó mai.

Peé-peéenta wolio, lonaó mai olo dadaata tau tahi delowa wamilo wau ayu pongokoó. Timongolio ilahula mai lomongo iimamu tauwa wau mongo tauwa lo Yahudi. **48** Tamoo-hiyanatia malo poótaa olimongolio tuoto botie, "Taadilo lowatia, maa Tiolo taulio. Waúpa Tio!" **49** Odito leidungga mota ode tambati boito, tei Yudas lato lonaó maó odeli Isa wau loloiya, "Salamu, Paaá Guru!" Tulusi diliilio ti Isa. **50** Ti Isa lolametaó, "Wutato, mai mongola wutato monaó mai odia?" Lapataó taa dadaata boito lodudulaó, wau loheúpa li Isa. **51** Tala ngota lomuri-Lio taamota teto woli Isa, lomahuta wamilio wau lolimade wato li iimamu daá tunggula loputu bulongalio. **52** Ti Isa lotahuda maó ode muri-Lio boito, "Muli potaúpa mola wamilumu to taúpio, sababu ngoáamila taa u mopohuna lo wamilio maamate wolo wamilo. **53** To lantobumu Wau diila mowali mei tulungi mai li Paapa-U, wau Tio wolo molamemeto mamolao mai lebe lou ngodusingi masukani suludadu lo malaikati? **54** Bo wonu odito, diila pongalo aakali motoduo mai debo odelo umaa nilubuwati todelomo Kitabi deu memangi musi motoduo debo odelo u masaatia botie?" **55** Lapataó ti Isa lotahuda maó ode taa dadaata boito, "Wolo Wau botie tamoleeto, tunggula timongoli lonaó mai hidelowa wamilo wau ayu pongokoó mai moheúpa ola-U? Ngohui-ngohui Wau hemo ngaajali to Bele lo Allahu Taáala, wau timongoli diila loheúpa ola-U. **56** Bo memangi mapatutilio odito alihu mamotoduo wolo u tiluladei lomongo nabi todelomo Kitabi." Lapataó uito, ngoáamila tahiduduá o-Lio tilumeteó lololaa maó li Isa. **57** Tahe loheúpa li Isa malodelo mola o-Lio ode bele li iimamu Daá Kayapas. Mola teto guguu-ruwaalo agama wau mongo tauwa lo Yahudi mahiámbua. **58** Tei Petrus loduduó li Isa lonto u molamingo demota paango lobele li iimamu daá. Lapataó tei Petrus tilumuwoto ode delomo paango boito wau lotihuloáa peé-peéenta wolo tahi pokawalia. Tio ohilaa motota woloolo mola ngoáamilalo boito de pulitio maó. **59** Mongo iimamu tauwa wau ngoáamila Mahakama lo Agama hipo tolopania moótapu sakusi paluti u mowali mopodehu hukuumanu mate odeli Isa. **60** Bo diila lotapu limongolio bukuti boli bo tuwau maó eleponu ngohuntua talomaju lowali sakusi yimbulo. Mapulitio maó, woluo duulota talomaju mota ode talu. **61** Uali mongolio, "Tau botie loloiya, 'Wau mowali mopo lohuhu Bele lo



Allahu Taáala, wau todelomo u tolohui mola mowali muli bongulo-U maó'.  
" **62** Lapataó ti iimamu daá matilimihulo, wau loloiya maó odeli Isa,  
"Yilongola diila tilameta-Mu potuludu u pilotuludio ole-Mu boito? **63** Boti  
Isa wambaó lotipoóoyo. Donggo peéntapo ti iimamu daá loloiya maó  
o-Lio, "Domi Allahu Taáala tatumu-tumulo, polelea mai olami wolo Yio  
botie Olongia Tamoo-poáahua, Walaó Allahu Taáala?" **64** Ti Isa  
lolametaó, "Odi-oditolo loiyamu. Bo pomalacayalo: tumulalo mai tosaaáti  
botie, timongoli mamooóonto Walaó Manusia hulo-huloáa to ambahu  
olowala lo Allahu Taáala Taa Laba-labaalo kawasa, wau meidungga mai  
toitaato heengo tohulungo." **65** Yi ti iimamu daá boito malo  
ngai-ngaidingo boólio, wau loloiya, "Tio hemomuayo Allahu Taáala! Didu  
palalu wolo sakusi. Timongoli ngoáamila maloó dungohe lohihilao loiya u  
hemomuayo Allahu Taáala. **66** Botia woloolo mola huhama limongoli?"  
Timongolio lolametaó, "Tio mailo totala, wau musi mate." **67** Lapataó  
timongolio lonula maó loiyohu tobaya li Isa, wau lomate o-Lio. Woluo olo  
tahe lolambali o-Lio, **68** wau loloiya, "Nte lantobe wau polelea mai olami,  
wuu Olongia Tamoo-poáahua! Tatoonu talo lambali ole-Mu?" **69** Tei  
Petrus donggo hulo-huloáa to bulemengio, topaango. Tala ngota lo  
tamoomayawa lonaó mai, wau loloiya olei Petrus, "Diila maa yio olo  
tapeé-peéenta woli Isa taulo Galilea boito?" **70** Bo tei Petrus malomahe  
totalu limongolio ngoáamilalo, "Diila otaawau wolo makusudumu,"  
tametaó lei Petrus, **71** lapataó tio malonaó mota ode huhebu lopaango.  
Ngotaalio taabua tamoomayawa wewo loóonto olei Petrus, wau loloiya  
maó ode tau-tauwalo mota teto, "Tau botie olo engonti peé-peéenta woli  
Isa lonto Najaret boito." **72** Lapataó tei Petrus luli lomaheó, wau  
malotadia. "Otu-otutuulo maó diila otaawau tau boito!" ualei Petrus. **73**  
Diila lohiheo lapataó uito, tau-tauwalo tatihu-tihulaa teto malonaó mai  
odelei Petrus, wau loloiya, "Maatantu yio ngotaalio limongolio. Uito  
oonuhe daá monto lapalimu." **74** Lapataó tei Petrus mahemo taditadia,  
wau loloiya, "Diila otaawau tau boito!" To saaátilo boito maluó  
lokuukuyuu. **75** Wau tei Petrus maloéela mola deú ti Isa malo tahuda olio,  
"Touí diipo maluó mokuukuyuu, yio mapoóotolu lomahe ola-U." Tulusi  
tei Petrus mailumualaó, wau hilumoyongo lou suukali.

**27:1** Donggo didimodupo daa, ngoaamila iimamu tauwa wau tauwa lo Yahudi lohutu maó putuusani u momate li Isa mate-mateelo maó. **2** Timongolio malo mungu o-Lio, wau lodelo o-Lio, tulusi mola lohudu o-Lio odelei Pilaatu, gubolonulu pamalenta lo Roma. **3** Tou tei Yudas tamoo-hiyanatia boito looonto deu ti Isa madilehua hukuumani, malolee tio. Tulusi tio malo powalingo tolo pulu doi talaá boito ode mongo iimamu tauwa wau mongo tauwa lo Yahudi. **4** Tio loloiya maó, "Watia mailodusa lohiiyanati taa diila ototala tunggula Tio hilukuumani yila-yilateelo maó!" Bo timongolio malo lameto, "Pongolaa lami? Uito ulusanimu!" **5** Tei Yudas lopo mahulo doi boito ode delomo Bele lo Eeya, tulusi mota lopontayungo batanga. **6** Mongo iimamu tauwa malo himoaa doi boito wau loloiya, "Doi botie doi loduhu. Moduduá butoo lo agama, doi botie diila mowali potuwotolo ode delomo tambati podewowalo to Bele lo Eeya." **7** Lapatao tou timongolio malo heeluma, pilomake limongolio doi boito pilotali limongolio huta u ilunte Huta lo Tamoohutua Ulonggo. Huta boito pilomake u polobungalo tahideelia. **8** Uitolo sababuulio tunggula todulahee botia huta boito ilunte "Huta Duhu". **9** Woleeto, malo toduo wolo uiloia li Nabi Yeremia, odie, "Timongolio lololimo tolo pulu doi talaá, deuuto-yito halaga u ilakoloa lobangusa Isirailu odelo u pilomayali de o-Lio. **10** Wau doi boito pilomake limongolio u pilotali Huta lo Tamoohutua Ulonggo, debo odelo u piloahu mai lo Eeya de olaú." **11** Tou ti Isa mota lotaalua wolei Pilaatu, Gubolonulu lolipu boito, tei Pilaatu malohintu, "Wolo Yio botie Olongia taulo Yahudi?" "Odi-oditolo loiyamu," tametao li Isa. **12** Bo tou mongo iimamu tauwa wau mongo tauwa lo Yahudi lopo dudulaó dadaata potuludu odeli Isa, Tio diila lolameto sama-samaata. **13** Sababu uito tei Pilaatu malo loiya o-Lio, "Wolo diila ilodungohe-Mu ngoaamila u pilotuludi mongolio boito ole-Mu?" **14** Boti Isa diila lolameto boli bo ngotahe maó tilinggula ti Gubolonulu boito lolinggolabe daa. **15** To motiidu Lameyangi lo Paska, ti gubolonulu biasaalio hemo lopato ngotaalio lo tahuku-hukuumani moduduá tulaotio lotaa dadaata. **16** Tou boito woluo ngotaalio tahuku-hukuumani taotaawa lotaa dadaata jahili daa. Tanggulio Isa Barabas. **17** Oditolio, tou taa dadaata mahiambua, tei Pilaatu lohintu maó olimongolio,

"Tatoonu taótohilaa limongoli malopatou mai olimongoli? Isa Barabas meaanto Isa tailunte Almasi?" **18** Tei Pilaatu loloiya odito sababu otaawalio, deu tahi kawasawa lo Yahudi malohudu mai li Isa olio sababu timongolio mohiihia. **19** Tou tei Pilaatu donggo hulo-huloaa tohudungu polomutoo, dilelio lolahuli maó utie olio, "Diila maó pouulambohe yio to palakala lotaa diila ototala boito, masababu Tio, wau loo tohiilopo u mootihela hapato todulahee botie." **20** Bo mongo iimamu tauwa wau mongo tauwa lo Yahudi wambaó hemo popatu tulusi totaa dadaata boito u lohile olei Pilaatu alihu tei Barabas lopatolo wau ti Isa hukuumaniyolo mate. **21** Lapatao ti gubolonulu boito luli lohintu olimongolio, "To taduulota boito, tatoonu taótohilaa limongoli lopatou mai olimongoli?" "Tei Barabas," uali mongolio. **22** "Wonu odito, wolo u musi pohutuwoú woli Isa tailunte Almasi?" yilintu lei Pilaatu olimongolio. "Salipuwalo Tio!" uali mongolio ngoaamila. **23** "Bo ololeeto wolo u pilohutu-Lio?" yilintu lei Pilaatu. Lapatao timongolio tilonggo watio lebe udaa maó, "Salipua Tio!" **24** Pulitio maó tei Pilaatu malongalati deu tio diilalo mowali mohutu wolo-wolo wau deu tau-tauwalo boito tanu mamó malakala. Oditolio tio malohama mai taluhu, tulusi totalu lotaa dadaata boito yilulowalio uluúlio wau loloiya, "Wau diila momanta tau botie mate! Uito uluusani limongoli!" **25** Ngoaamila tau-tauwala boito malo lameto, "Joo, hulilo mai amiaatia wau mongo walaó lamiaatia tamomanta hukuumani to opopate-Lio!" **26** Lapatao tei Barabas yilopatio lei Pilaatu ode limongolio, wau lopoahu tau lomuboá li Isa; wau lohudu maó o-Lio mota silalipulio. **27** Lapatao mongo pajule lei Pilaatu malodelo mota li Isa tilumuwoto ode bele biluloá li gubolonulu, wau ngoaamila pasukani lotiambu to palito li Isa. **28** Timongolio malo hinggi boó li Isa, wau lopopake maó o-Lio jumba lailoumu. **29** Timongolio lohutu maó makuta tuwau lonto tango kekeei oduhi, wau pilopo hulilio to lunggongi Isa. Lapatao pilopo dihu limongolio tunggudu ngoputu ti Isa to uluu-Lio olowala, tulusi timongolio malo tibonggothu totalu-Lio wau lohentea o-Lio. "Salamu Olongia Taulo Yahudi!" uali mongolio. **30** Timongolio lonula maó loiyohu o-Lio, tulusi lohama tunggudu boito, lapatao pilo mobohio tolunggo-Ngio. **31** Tou mailapato piloithi mongolio Tio, timongolio malo

hinggi jumba lailoumu boito tulusi luli pilopo pake limongolio boó-Lio lohihilao. Lapataó Tio dilelo limongolio ode bulemengio mota silalipulio. **32** Tohuungo dalalo, timongolio lodunggaya wolo ngotaalio lonto Kirene tailunte Simon. Timongolio lomakusa tau boito lomota ayu salipu li Isa. **33** Lapataó timongolio malei dungga mola ode tambati tuwau u ilunte Golgota, u boliilio, "Tambati lo Bakakau." **34** Mota teto timongolio lopeelu li Isa angguru ula-ulau wolo polu. Bo tou ti Isa lolamitaó angguru boito Tio diila lohuto longilu. **35** Lapataó silalipulio Tio, timongolio malo laya-layade boó-Lio wolo undi. **36** Lapataó uito timongolio malo tihuloáa lodaha o-Lio mota teto. **37** Toitaato lunggo-Ngio tiluladi mongolio potuludu tomimbihu o-Lio odie: "Tabotieelo ti Isa, Olongia Taulo Yahudi." **38** Peé-peéenta wo-Lio silalipu limongolio olo duulota pohehu; ngotaalio to ambahu olowala, ngotaalio poli to ambahu oloihi-Lio. **39** Tahilaode teto hitahalilia, wau hipohinawa li Isa. **40** Timongolio hipo loiyawa, "Yió tamamo polohubu Bele lo Allahu Taáala, wau momongu maó todelomo utolo hui! Wonu Yió Walaó Allahu Taáala, polaahulo monto salipu boito wau poáahuwalo lohihilao batanga-Mu!" **41** Odito olo mongo iimamu tauwa wau guguu-ruwaalo agama wolo mongo tauwa lo Yahudi helo henteá li Isa. Timongolio hipo loiyawa, **42** "Tio helo poáahu taawewo, lebe-lebe pomaó batanga-Lio lohihilao diila mowali poáahuwo-Lio! Wonu Tio olongia lo Isirailu, opio-piohelio Tio molaahi botia monto ayu salipu boito, deúito ami mapalacaya o-Lio. **43** Tio palacaya to Allahu Taáala, wau hemolojiya deú Tio Walaó Allahu Taáala. Nte, dulo bilohento wolo Allahu Taáala mamopoáahu mai o-Lio botia." **44** Mongo pohehu tasilaalipu peé-peéenta wo-Lio boito olo tumbaó helohina o-Lio debo odelo uito. **45** Tou dulahee totaú, ngotilonggadu tolo jamu mola, ngoilanggubu lipu boito malo diólomai. **46** Jamu tiga lolaango, ti Isa malo nguatiá wolo suala daá-daáalo maó, "Eli, Eli Lama Sabakhtani?" u boliilio, "oo Allahu Taáala, oo Allahu Taáala, yilongola matilolaa lo Allahu Taáala Watotia?" **47** Dengolo lota taamota teto loódungohe hunggalaá boito wau hipo loiyawa, "Tio hemo ngiibode olei Elia!" **48** Ngotaalio limongolio lolamemeta mota lohama mai bunga patihu, wau pilolomolio todelomo angguru molotingo. Lapataó pilo wunggoio tohuudu lo ayu ngoputu, wau

yiludulio mola ode biihu li Isa. **49** Bo tau-tauwalo wewo malo loiya, "Yimaipo, dulo bilohento wolo tei Elia monaó mai mopoáahu o-Lio!" **50** Lapataó ti Isa luli longuatió wolo sua daa-daaalo maó, tulusi lopulitolo mola napasii-Lio. **51** Lalante u ntaya-ntayanga todelomo Bele lo Eeya lokaidinga duluo lonto yitaato demola tibawa. Huta hilumuhelo wau huhuu-ideyaalo botu lobutaó. **52** Kukuu-buluwalo lohuó, wau dadaata umati lo Allahu Taáala tamalo poowate luli bilongu-Lio mai. **53** Timongolio lumualai monto kukuu-buluwalo lapatio maó ti Isa mobongu mai monto opopate, wau timongolio tumuwoto mola ode Yerusalemu. Wau mola teto dadaata taa moóonto olimongolio. **54** Tauwa lo masukani peé-peéenta wolo mongo pajule tadonggo hidahawa li Isa mailoohe daá tou loóonto liluhu, wau ngoáamila u lotoduo mai boito. Timongolio hipo loiyawa, "Otutu, Tio botie Walaó Allahu Taáala!" **55** Teto woluo olo dadaata mongobua tadonggo hibilohe mai lonto u molamingo. Timongoliolo tahe loduduá li Isa wau lotulungi o-Lio tumulalo mai lonto Galilea. **56** To wolotalio yito ti Maria Mahadalena, tiilo lei Yakobus wau tei Yusu, wau tiilo lomongo walaée Jebedeus. **57** Tou hui boito malonaó mai takaya ngota lonto Arimatea, tailunte Yusu. Tio olo muri li Isa. **58** Tio lonaó mota odelei Pilaatu, wau lohile milate li Isa. Lapataó tei Pilaatu lomalantaó alihu milate li Isa wuduo maó odelei Yusu. **59** Yi tei Yusu malohama milate boito, wau lolaputo lowatu lenani u bohu. **60** Lapataó pilopo balatio milate li Isa todelomo kuubulu milikiilio lohihilao u pilohutu todelomo huludu botu tuwau. Lapataó uito tio lopo lilideó botudaá tuwau pilo heutio wangopa lokuubulu boito, lapataó lonaólo. **61** Ti Maria Mahadalena wau ti Maria wewolio bolo hulo-huloáa mota teto tataalua wolo kuubulu boito. **62** Loloombulio mola, todulahu Saabati, mongo iimamu tauwa wau tau-tauwalo Parisi lonaó peé-peéenta mola lotaalua wolei Pilaatu, **63** wau lolojiya, "Tuani, mailo eela mola lamiaatia tou tamoo-himbuloa boito donggo tumutumulo, Tio mapeéenta lolojiya, 'Lapatio maó tolo hui mola Wau mamuli mobongu mai.' **64** Sababu uito, ahulilo maó tau mola modaha kuubulu boito tióotutua tunggula dulahu otolulio, alihu tahiduduá o-Lio diila mowali motaó milate-Lio lapataó mamopoótaa ode tau-tauwalo deú Tio mabilongu-Lio mai lonto opopate.

Wau polo wimbulo u pulitio botie malebe moleetao wolo ubohulio mai."

**65** "Timongoli o suludadu tamoo-kawalia," ualei Pilaatu olimongolio, "ponaolo mola dahai maó kuubulu boito tiotutua." **66** Lapatao timongolio malonaó mola ode kuubulu, wau loseeheli botu poheuto boito wau pilopo tambatilio maó tamodaha totalulio, alihu diaaluo tamomuyu kuubulu boito.

**28:1** Tou malo paluto dulahu Saabati, todulahu Ahadi donggo molaliyonu, ti Maria Mahadalena wau ti Maria wewolio boito lonaó mola lomilohe kuubulu boito. **2** Debolo lotoduwolo mola liluhu ulaba-labaalo tutu. Malaikati ngota lo Eeya lotuhutai lonto sologa tulusi lopo lilideo heuto botu boito wau lotihuloaa totudulio. **3** Baya lo malaikati boito debo odelo ilato, wau boolio moputio daa. **4** Suludadu tamoo-kawalia tahemodaha teto mailoohe daa tilinggula timongolio hulu-huluhelio, wau lotambuti debo odelo milate. **5** Malaikati boito loloiya maó ode mongobua boito, "Diila oohe! Otaawaú timongoli hemo lolohe li Isa tamaa silalipulio boito. **6** Ti Isa diaaluo tea. Ti Isa malobongu debo odelo upilo tahuda-Lio muloololio mai. Dulo mai bilohi tambati u pilopo wulide o-Lio. **7** Botia, huaa ponaolo, mola polelea to tahidudua o-Lio, 'Tio malobongu, wau masaatia Tio maleimulo mola woli mongoli ode Galilea. Mola teto timongoli mamooonto o-Lio!' Pootoloma maó wolo umaa piloleleu mai olimongoli." **8** Mahi alihe mongobua boito lololaa maó kuubulu boito. Lou laasa duiduito uuulambohe wolo wengahu, timongolio mahitetea mola lopo habari umalo toduo boito to tahidudua li Isa. **9** Debolo ti Isa mai lodunggaya wolo mongobua boito, wau lotahuda maó, "Salamu!" Lapatao timongolio malo himbideo o-Lio, tulusi longoode oaa-Tio wau lolubo o-Lio. **10** "Diila oohe," tahuda li Isa ode limongolio, "ponaolo mola polelea maó tomongo wutatu-U alihu timongolio ode Galilea; mola teto timongolio mamooonto ola-U." **11** Tou mongobua boito malonaó, dengolo lota suludadu tamoo-kawalia tahemodaha kuubulu boito luli lohualinga ode kota wau lopodulohe tomongo iimamu tauwa ngoaamila u lotoduo boito. **12** Mongo iimamu tauwa boito malo dulohupa wolo mongo tauwa lo Yahudi, tulusi longohi maó ngojumula daa doi ode suludadu tamoo-kawalia boito, **13** wau loloiya, "Timongoli musu molojiya maó deu



tahiduduá li Isa malonaó mai tou hui wau mai lotaó milate li Isa tou timongoli donggo hituluhe. **14** Wau wonu tigubolonulu moódungohe suáli boito, mapiyoo lami tio alihu timongoli diila moótapu totolo wolo-wolo." **15** Yi suludadu tamoo-kawalia boito malohama doi boito, wau lohutu debo odelo u pilolahuli maó olimongolio. Masababu uito wungguli boito donggo lolaloladu towolota taulo Yahudi tunggula todulahee botie. **16** Tamopulaa tuwau lota muri li Isa boito lonaó mola ode huludu to Galilea lotuuúde lou pilomalanta li Isa olimongolio. **17** Tou timongolio loóonto li Isa mola teto, timongolio malo sujudu lolubo o-Lio. Bo woluo towolota limongolio tadiila boti palacaya. **18** Ti Isa lohimbideó olimongolio wau lotahuda maó, "Ngoáamila kawasa tosologa wau todunia mailudu-Lio mai ola-U. **19** Sababu uito ponaólo ode ngoáamilalo bangusa to ngoilanggubu dunia, pohutua maó timongolio mowali muri-U. Wau lihua maó timongolio lou molanggula tangguli Paapa, wau Walaó, wau Rohullah. **20** Ajaalia maó timongolio modungohe ngoáamila u mapilo malenta-U mai olimongoli. Wau eelai maó Wau malaito peé-peéenta woli mongoli demola pulito lojamani."

**1:1** Uti-utieelo Habari Mopiohe pasali li Isa Almasi, Walaó Allahu Taáala. **2** Habari Mopiohe boito tumulio debo odelo u tiluladei li Nabi Yesaya odie mola, " 'Utieelo utoliya-U,' tahuda lo Allahu Taáala; 'Wau lolao mai olio leimulo wole-Mu, alihu tio momuó dalalo ole-Mu.' **3** Woluo tawuwa-wuwaatió tohuta hungayo u luasi daá, 'Podapato maó dalalo ode Eeya; popayade maó dadaa-lalaalo u polibayaa-Lio.' " **4** Debo odelo u tulatulade boito, oditolo olo yilumenetai tei Yahya lonto huta datahu u luasi daá wau delita. Tio helo polihu tau wau lopo tunggulo habari lonto Allahu Taáala. "Timongoli musi molilihu monto duduu-sawaalo limongoli, wau musi lihualo, alihu Allahu Taáala mongambungu mai olimongoli," odito loiya maó lei Yahya. **5** Ngoáamila taa lonto madala lo Yudea wau kota lo Yerusalemu lonaó mota lodungohe olei Yahya. Timongolio longaku duduu-sawaalo limongolio, wau tei Yahya helo polihu olimongolio to Dutulaa Yordan. **6** Tei Yahya pakepake boó lonto lambuto unta. Bintolo wohutalio lonto walito, wau uaalolio bulita wau hula lotiiá lo oáayua. **7**

Tio lopohabari maó habari botie, "De lapatio maó lowatia, mamei dungga mai taa ulebe udaá lowatia. Hiambola motidungu momuó tali losapatu-Lio, watia diila patuti. **8** Watia mopolihi olimongoli wolo taluhu, bo Tio mamopolihi olimongoli wolo Rohullah." **9** Tou boito ti Isa leidungga mai lonto Najaret tomadala lo Galilea, wau tei Yahya lopolihi maó o-Lio to Dutulaa Yordan. **10** Odito ti Isa yilumualai lonto dutula boito, Tio loóonto mola hulungo lohuó wau Rohullah lotuhutai debo odelo bulungi poombo ode yitaa-Tio. **11** Lapataó dungo-dungohei suala lo Allahu Taáala lotahuda mai, "Yiöolo Walauu-U tapilonu-U. Yió moósanangi hilaa-U." **12** Lolamemeto lapataó uito Rohullah malodelo mola li Isa ode huta datahu u luasi daá wau delita. **13** Wopato pulu hui Tio mota teto, heilimontala lo Ibilisi. Bibii-natangiyalo u molinggelo woluo olo mota teto peé-peéenta wo-Lio, wau maaaa-laikatiyalo helohinta o-Lio. **14** Lapataó tei Yahya tilutupaalio, ti Isa malonaó mola ode Galilea, wau lopohabari Habari Mopiohe lonto Allahu Taáala mola teto. **15** Tahuda-Lio maó, "Allahu Taáala mahuáa molumula momalenta. Polilihulo monto duduusaamu, wau pomalacayalo to Habari Mopiohe u monto Allahu Taáala!" **16** Tou ti Isa donggo naónaó topentadu lo Bulalo Galilea, Tio loóonto mota duulota tamoohalawa, deüito-yito tei Simon wau tawaliyali lei Andreas. Timongolio donggo hipoheupa tola tobulalo boito wolo pajala. **17** Ti Isa lotahuda maó olimongolio, "Dudui mai Wau. Wau mamongaajali mai olimongoli momajala tau." **18** Lolamemeto timongolio lololaa maó pajala limongolio lapataó loduduó li Isa. **19** Ti Isa lonaó tulusi, lapataó loóonto mota poli tamohutato duulota wewolio, deüito-yito tei Yakobus wolei Yahya, mongo walaée Jebedeus. Timongolio todelomo bulotu, wau donggo hemo poópiohe pajala limongolio. **20** Ti Isa huáa lotianga olimongolio. Wau timongolio lololaa maó oliyamo limongolio todelomo bulotu peé-peéenta wolo tahe wuupaalio. Lapataó timongolio malo dudua li Isa. **21** Ti Isa wau tahiduduá o-Lio leidungga mola ode kota Kapernaum. Todulahu Saabati u wumbutio mola, ti Isa tilumuwoto ode delomo bele potabiaalo, wau lolumula longaajali. **22** Tau-tauwalo talo dungohe o-Lio hilinggolabe to dudelo-Lio helo ngaajali. Sababu, Tio helo ngaajali wolo tilihula diila debo odelo guguu-ruwaalo agama. **23** Tou boito ngotaalio lo

tamailo tuanga lorohu u moleeto boito tilumuwotai ode delomo bele potabiaalo, wau longuatió, **24** "Wuu Isa, taulo Najaret, wolo umaa pohutuwo-Mu olami? Yió mai mopobinasa olami? Otaawa lami tatoonu Yió: Yióolo tamantali lonto Allahu Taaala!" **25** "Poóoyo mola!" antingaó li Isa to rohu boito, "Pohinggi maó monto tau botie!" **26** Yi rohu u moleeto boito malopo lota-lotaiula daá totau boito, lapataó yilumulaó lonto tau boito sambela wuwa-wuwaatió. **27** Ngoáamila tau hilinggolabe daá, tilinggula timongolio malo loiya ngota timongota, "Wei, wolo utie? Tuwaulio lo pongaajali u bohu! Wolo tilihula wau kawasa Tio helo malenta roroo-huwaalo u moleeto yilumualaó, wau timongolio olo lodungohe o-Lio!" **28** Yi habari pasali li Isa huáa loloópolo mola to ngoilanggubu madala lo Galilea. **29** Ti Isa wau tahiduduá o-Lio lololaa maó bele potabiaala boito, wau lonaó mota ode bele lei Simon wolei Andreas. Tei Yakobus wolei Yahya lonaó olo woli mongolio. **30** Tiilo moluhengee Simon donggo mongongoto he huhulolio to potuluhelio. Oditolio tou ti Isa wau tahiduduá o-Lio tilumuwotaó ode bele boito, ti Isa pilolelealio pasali losuáli boito. **31** Yi ti Isa malo himbideó ode tiilo moluhengee Simon, wau lodihu maó uluúlio, lapataó lotulungi olio lobongu. Huhuulio mailoole lomola, wau tio malohinta olimongolio. **32** Lolaangio mola, tou dulahee matumolopo mota, tau-tauwalo helodelo mai odeli Isa ngoáamila tahi ngongota wau tailo tuanga lorohu u moleeto. **33** Ngoáamila tuango kota boito helo ambua mai totalu lobele boito. **34** Lapataó ti Isa helo pooluli dadaata tahi duutola ngongoto hidala-dalaala ngongoto, wau helo pohinggi olo ngohuntua rohu u moleeto. Diila yiluasialio roroo-huwaalo u moleeto boito mobisala, sababu otaawa limongolio tatoonu Tio. **35** Loloombulio mola, tou donggo molaliyonu daá, ti Isa lobongu tulusi lololaa maó bele. Tio lonaó mola ode tambati udiila otau to bulemengo kota, wau lodua mola teto. **36** Bo tei Simon wau mongo sahabatilio lonaó mola mololohe o-Lio. **37** Wau tou timongolio loodungga o-Lio, timongolio loloiya maó, "Ngoáamila tau donggo hemo lolohe li Paaá." **38** Bo ti Isa lolametaó, "Dulo ito mopotolonga mola lo nonaóonto ode kokoo-tawaalo uwewo totili maó leewe. Wau musi mohutuba mola teto olo, sababu maa ui-uitolo makusudulio Wau odia mai." **39** Sababu uito ti Isa lonaó ode utoonulalo

maó to ngoilanggubu lo Galilea, wau helo hutuba to bebee-leyaalo potabiaalo wau lopohinggi roroo-huwaalo u moleeto. **40** Ngotaalio taóngongoto lo alipo u moótihela hapato lonaó mai odeli Isa. Tau boito lotibonggohuú mola, wau loloiya maó, "Wonu ti Paaá mohuto, ti Paaá mowali mopoóluli mai olaatia." **41** Lodehu hilaa li Isa totau boito. Oditolio, tileapu-Lio tau boito, wau lotahuda maó, "Wau mohuto, polulilo mola!" **42** To saaátilo boito ngongotio yilooli wau tio maloluli. **43** Lapataó ti Isa leinaó olio wolo tahuli odie, **44** "Poódahai diila maó wunggulia penu boli olita, bo ponaólo odeli iimamu, wau pohilea maó olio u molantu mai u yió maloluli. Lapataó duólo uiloóluli maó olemu boito, podewowa mola bake moduduá u pilomalentaó lei Musa, odelo bukuti totau-tauwalo deu yió tutuulio tutu maloluli." **45** Bo tau boito lonaó, wau mololaalaita helo hungguli ulotoduo boito ode utoonulalo maó tunggula ti Isa diila lowali tilumuwoto ode kota wolo nanaasa. Tio bo lotibiluloá to bulemengo kota to tataa-mbatiyalo udiila otau. Bo tau tulusi hiponaówa mai lonto utoonulalo maó.

**2:1** Dengolo hui mola lapatio maó ti Isa luli lohualinga ode Kapernaum. Yi malo loladulo mola habari deu Tio woluo tobele. **2** Lapataó dadaata tau lonaó mai. Timongolio helo tiámbu mola teto tunggula diilalo otambati. Tohuhebu olo huhuutoyoá tau. Lapataó ti Isa lopo tunggulaó habari lonto Allahu Taáala ode limongolio. **3** Tou Tio donggo hemo tahuda, tawopatota lohuluhei ngotaalio tadidu mowali monaó dilelolio odeli Isa. **4** Bo sababu tau mailaba huntualio, timongolio diila lowali lohimbideó o-Lio. Oditolio, timongolio malo longgala watopo pasipasi toitaato tambati ti Isa woluo. Lapataó uito, timongolio malo polaahe mola tadidu mowali monaó boito wolo amongio. **5** Tou ti Isa lomiloheó malo odito udaá iimani limongolio, Tio lotahuda maó ode tadidu mowali monaó boito, "Walauu-U, duduusaamu maa ilambungu." **6** Dengolo lota guru lo agama tadonggo hihuloáa teto mahipo hihintua todelomo hilao. **7** "Buheli tutu tau botie mobisala odito! Tio hemohina Allahu Taáala. Tita tamowali mongambungu dusa, Tatoonu ngopohia Allahu Taáala lohihilao?" **8** Tou boito olo ilotaawa li Isa pikiilangi limongolio. Lapataó Tio lotahuda maó,

"Yilongola timongoli hipo hihintua odito todelomo hilaa limongoli? **9** Toonu ulebe gambangi; molanggula, 'Duduusaamu maa ilambungu,' meaalo molanggula 'Bongulo, bintaalo amongumu wau ponaolo'? **10** Bo botia Wau mamopo bukuti mai olemu deu tutuulio tutu toitaato dunia botie Walaó Manusia okawasa mongambungu dusa." Lapatao ti Isa lotahuda maó to tadidu mowali monao boito, **11** "Bongulo, bintaalo amongumu wau pohualingolo!" **12** Tio malobongu wau huaa lohama amongio lapatao yilumualaó silakusia limongolio ngoamila. Tau-tauwala boito hilinggolabe tulusi lomuji mola Allahu Taaala. Uali mongolio, "Diipo peenta maó ito heloonto ulotoduo mai debo odelo utie!" **13** Ti Isa luli lohualinga mota ode Pentadu lo Bulalo Galilea. Ngohuntua tau lonaó mai ode o-Lio, wau Tio helo ngaajali olimongolio. **14** Tou ti Isa donggo ntale-ntalenga teto, iloontonga-Lio ngotaalio tamootagia beya tanggulio Lewi, walaee Alpeus, donggo hulo-huloaa tokantoli lobeya. "Dudui mai Wau," tahuda maó li Isa olio. Yi tei Lewi maa tilimihulo wau loduduó li Isa. **15** Tou ti Isa donggo hemo lamela tobele lei Lewi, ngohuntua tamootagia beya lonaó mai, wau tau-tauwalo tahe anggapuolo diila mopiohu lotuango lipu lolamela pee-peenta woli Isa wau tahiduduá o-Lio. Sababu ngohuntua towolota limongolio loduduái li Isa. **16** Dengolo lota guru lo agama kaumu lo Parisi loonto maó li Isa hemo lamela pee-peenta wolo tahi potagia beya wau tahe anggapuolo diila mopiohu boito. Oditolio timongolio lohintu maó to tahiduduá li Isa, "Yilongola gurumu helo lamela wolo tahi potagia beya wau tau-tauwalo tadiila hipiohe boito?" **17** Ti Isa loodungohe yiyintu limongolio boito, tulusi lolametao, "Taa seehati diila momalalu dokuteli; bo taa u mongongoto. Wau dungga-dungga mai diila mai motianga totaa hipo nganggapua batangalio malo piohu, bo tahe anggapuolo hina." **18** Towakutu tuwau tahiduduá olei Yahya Tamopolihua wau tau-tauwalo Parisi donggo hipuasawa. Lapatao woluo tau lonaó mai odeli Isa wau malohintu, "Yilongola tahiduduá olei Yahya Tamopolihua wau tahiduduá totaulo Parisi hemo puasa, hiambola tahiduduá li Paaá diila?" **19** Ti Isa lolametao, "To potihunggu lonika, wolo tahe tiloduo diila molamelo? Wonu bulentiti lai donggo pee-peenta woli mongolio, maatantu timongolio molamelo. **20** Bo mamei dungga mai wakutuulio bulentiti lai

boito hamaalo monto olimongolio. Tou boito deuito timongolio diila molamelo. **21** Diaaluo taa u momambola boó deedelo wolo kaingi ngopita u bohu. Sababu kaingi pomambola boito mamowali umonggolongo wau mongedenga boó boito, tunggula moosababu kedengio lebe udaá maó. **22** Odito olo diaaluo taa u moluango angguru bohu todelomo bututu lowalito u madeedelo. Sababu angguru bohu boito mamooó sababu bututu boito mobutaó. Pulitio maó duuduluolo mohuáyadu. Angguru u bohu mamusi tuangolo ode delomo bututu lowalito u bohu olo." **23** Todulahu Saabati tuwau tou ti Isa yilumaodeó to halabolu lopale ngopita tahiduduá o-Lio malolipu pale. **24** Lapataó tau-tauwalo Parisi malo loiya odeli Isa, "Yilongola tahiduduá ole-Mu diila moduduá butoo lo agamanto wau hipohutua u dinidini todulahu Saabati?" **25** Ti Isa lolametaó, "Diipo peéenta timongoli lopobaca u pilohutu lei Dauda, tou tei Abyatar donggo hemo kalaja lowali iimamu daá. Tou tei Dauda wau wolo taulio mapilolango, wau diila o uáalo, tio tilumuwoto ode Bele lo Eeya, wau lolamela roti u mapilo dewolio ode Allahu Taaála. Wau roti boito yilohilio olo ode taulio. Lebe-lebe pomaó moduduá agamanto, bo wambaó mongo iimamu tamowali molamelo roti boito." **27** Lapataó ti Isa luli lotahuda maó, "Dulahu Saabati pilohutu duólo manusia; diila manusia duólo dulahu Saabati. **28** Oditolio, Walaó Manusia okawasa, tumbaó todulahu Saabati."

**3:1** Ti Isa luli lohualinga mota ode bele potabiaalo. Mota teto woluo ngotaalio taa uluúlio mailate ngotuwali. **2** Mota teto woluo tahipo lolohe totala li Isa, alihu mowali moó poduloheó o-Lio. Oditolio timongolio tulusi hemo poótuoto o-Lio wolo Tio mamooó pooluli tau todulahu Saabati. **3** Ti Isa lotahuda maó ode taa uluúlio yilate ngotuwali boito, "Dulo tihulai tea, totalu." **4** Tulusi Tio lohintu maó totau-tauwalo teto, "Moduduáá to agama, ito mowali mohutu wolo todulahu Saabati? Mohutu umopiohu meaalo u moleeto? Mopoáahu tau meaalo momate-mateelo maó?" Timongolio bo lotipoóoyo. **5** Wolo nahutu ti Isa lomilohe mota topali-Tio, bo Tio olo siluukali, sababu mailaba baaangi limongolio. Tulusi Tio lotahuda maó ode tau boito, "Wudua mai uluúmu." Tau boito lohudu maó uluúlio, wau uluúlio loluli lomola. **6** Yi tau-tauwalo Parisi malololaa maó



bele potabiaalo boito, lapataó huáa lodulohupa wolo dengolo lota tahiduduá olei Herodes, u momate li Isa mate-mateelo maó. **7** Ti Isa wau tahiduduá o-Lio lonaó tilumouli mota ode Bulalo Galilea. Yi dadaata daá tau lonto Galilea lonaó loduduó li Isa. Dadaata olo talonaó mai lonto Yudea, **8** lonto Yerusalemu, lonto madala Idumea, wau lonto lipu to ambahu tiimulu lo Yordan, wau lonto tili lo kokoo-tawaalo to Tirus wau Sidon. Timongolio ngoáamila lonaó mai odeli Isa, sababu timongolio maloó dungohe pasali u mapilohutu-Lio. **9** Tau-tauwala boito malo odito huntualio, tilinggula ti Isa lopoáhu maó tahiduduá o-Lio lopo dapato bulotu pomake-Lio, sababu de Tio diila bolo poduduupeá lotau-tauwalo boito. **10** Odito huntualio tahe piloóluli-Lio, tilinggula ngoáamila tahi ngongota bolo hipo huhuuntula lomaó motolopani mohimbideó o-Lio alihu moó dedeta o-Lio. **11** Wau tahe ilotuanga lorohu u moleeto, timiidu moóonto o-Lio, tulusi wambaó hemo sujudu mola totalu-Lio wau hemo nguatiá, "Yióolo Walaó Allahu Taáala!" **12** Boti Isa helodini daá roroo-huwaalo u moleeto boito mopoótaa maó tatoonu Tio. **13** Lapataó ti Isa lotaóde mola ode huludu tuwau, wau lotiangaó tahe kilahandaki-Lio. Tau-tauwala boito lonaó mai, **14** tulusi Tio lolulaoto towolota limongolio mopulaa duulota. Tahuda-Lio maó, "Wau molulaotaó olimongoli alihu timongoli moduduá ola-U wau timongoli laolo-U u mopololade Habari Mopiohe monto Allahu Taáala, **15** wau timongoli mamooótapu kawasa u mopohinggi roroo-huwaalo u moleeto." **16** Uti-utieelo tanggulo lo tamopulaa duulota boito; Simon (tailuntelio olo Petrus), **17** Tei Yakobus wolei Yahya wutatio, deúito-yito mongo walaée Jebedeus (timongolio botie ilunte-Lio tanggulo Boanerges boliilio maó "walaó bulonggodu"), **18** Tei Andreas, Piliipus, Bartolomeus, Matiusi, Tomas, Yakobus walaée Alpeus, Tadeus, Simon si Patriot, **19** wau Yudas Iskariot talo hiyanati li Isa. **20** Lapataó ti Isa lohualinga ode bele. Bo ngohuntua tau debo hiponaowa mai lotiambu, tilinggula ti Isa wau tahiduduá o-Lio diila owakutu molamelo. **21** Tau-tauwalo hipo loiyawa deú, "Tio mabiliyongo!" Wau tou ngaalaa-Lio loódungohe suáli boito, malonaó mota timongolio lohama o-Lio. **22** Guguu-ruwaala agama talonaó mai lonto Yerusalemu helo loiya deú, "Tio mailo tuanga lo Beeljebul! Tauwa lo roroo-huwaalo u

moleeto boitolo talongohi kawasa o-Lio helo pohinggi rohu u moleeto."

**23** Yi ti Isa lotiangai taa ngohuntua boito, wau lohungguli maó olimongolio demohelu ngoolo pohumaya. "Diila pongalo aakali rohu u moleeto mopohinggi rohu u moleeto," tahuda li Isa. **24** Wonu lipu tuwau mopoo hipole-polemboá wau tinggai mumuusua, lipu boito diila moó tahangi. **25** Wau wonu todelomo ngaalaá tuwau diila áakolowa wau popoo-ngawaáalio tinggai mumuusua, ngaalaá boito mamóantulu. **26** Wonu todelomo bele biluloá saaha li olongia lo Ibilisi motoduo owowoluwoa lobubuu-alaawa wau polomusa, bele biluloá saaha li olongia boito diila moó tahangi mohiheo wau tantulo maó mamooli. **27** Diaaluo penu boli ngotaa maó tamoó tuwoto ode delomo bele lo ngotaalio tamolotolo wau molambata halataalio wonu tio diila momungupo meimulo tamolotolo boito. Lapataó uito, bolo tio mowali molambato halataalio. **28** Ototai maó! Wonu bolo tau mohutu dusa wau molojiya u mohina, yi tio mowali ambunguolo. **29** Bo wonu bolo tio mohina Rohullah, tio diila mowali ambunguolo! Sababu umohina boito yito dusa u ohiheo-hiheolo maó." ( **30** Ti Isa lotahuda odito sababu woluo taa loloiya deú ti Isa mailo tuanga lorohu u moleeto.) **31** Lapataó uito tiilo li Isa wau mongo wuta-Tio lonaó mai. Timongolio hiwimawa to bulemengio wau mota leitoduo mai li Isa. **32** Tou boito ngohuntua tau donggo hihuloáa topalito li Isa. Timongolio loloiya maó o-Lio, "Paaá, tiilo li Paaá wau mongo wutati Paaá woluo to bulemengio. Timongolio hemo lolohe li Paaá." **33** Ti Isa lolametaó, "Tatoonu tiila-U? Tatoonu mongo wutatu-U? **34** Lapataó Tio lomilohe ode tau-tauwalo tahi huloáa topali-Tio tulusi lotahuda maó, "Tabotieelo tiila-U wau mongo wutatu-U! **35** Taa u mohutu kahandaki lo Allahu Taaala tiolo wutatu-U talolai, wutatu-U taabua, wau tiila-U."

**4:1** Ti Isa luli longajali topentadu lo Bulalo Galilea. Dadaata daá taa helo tiambu mai to o-Lio. Sababu uito Tio mota lotihuloáa todelomo bulotu totudu lotaluhu, wau taa ngohuntua boito hitihula tobiihu bulalo. **2** Lapataó ti Isa helo ngaajali lou dadaata suáli olimongolio lomake pohumaya. Odie mola Tio helo ngaajali olimongolio. **3** "Dungohilo mai! Woluo ngotaalio tamomengia mota lomuáyade bili. **4** Tou tio donggo hemo muáyade,

woluo bili u lobiihuto todalalo. Tulusi bulungi tilumombotai wau bili boito ililaalio lopuli-pulitolo maó. **5** Woluo olo bili u lobiihuto totambati u hibotu-botua u hutalio bo ngoidi. Bibii-liyaalo boito ngointa lobutu sababu hutalio bo ngoidi, **6** Bo tou dulahu lobotulai, tumbingio boito malo lolante tulusi lohengu wau yilate sababu waaatio diila boti modelomo. **7** Woluo olo bili u lobiihuto tohuungo lo diuto oduhi. Diuto oduhi boito lobutu wau lohupeto tutuu-mbingiyalo boito tilinggula diila lomungo. **8** Bo woluo olo bili u lobiihuto tohuta u molomiodu. Bili boito lobutu, lapatao lowali iludaá mola tulusi lomungo, woluo utolo pulu, woluo uwolomo pulu wau woluo u ngohetuto piúwa." **9** Lapatao lohungguli maó lo pohumaya boito, ti Isa lotahuda, "Timongoli obulonga, podungohulo!" **10** Tou ti Isa bo tutuuwau, tau-tauwalo tamaloó dungohe pongaajali-Lio lonaó mai ode o-Lio peé-peéenta wolo tamopulaa duulota tahiduduá o-Lio. Timongolio lei patatao o-Lio boli lo pohumaya boito. **11** Yi ti Isa lotahuda maó olimongolio. "Timongoli mailohia mai ponu lo Eeya u motota maó hituahituawua u milakusudu hetuuólo tomimbihu woloolo mola Allahu Taáala momalenta. Bo tau-tauwalo bulemengio heilaaajali wolo pohumaya, **12** alihu 'Timongolio mamolo laalaaita mopoótuoto bo diila motota wolo umotoduo, timongolio mamolo laalaaita modungohe, bo diila mongalati, utie motoduo mai alihu timongolio diila maó moóonto wau mongalati wau diila maó monaó mai ode Allahu Taáala wau Allahu Taáala mongambungu olimongolio.'" **13** Lapatao ti Isa lotahuda maó ode limongolio, "Wonu timongoli diila mongalati lo pohumaya boito, woloolo mola timongoli mowali mongalati lo popoo-humayaalo uwewo? **14** Tamoo-muáyadea boito yito tamopo loladu habari monto Allahu Taáala. **15** Bili u lobiihuto todalalo debo odelo tau-tauwalo hipo dungohe habari pasali lou woloolo mola Allahu Taáala momalenta. Odito loódungohe, Ibilisi lonaó mai wau lohama wolo u mapilo muáyadu todelomo hilaa limongolio. **16** Bili u lobiihuto totambati u hibotu-botua debo odelo tau-tauwalo hipo dungohe habari boito, wau lato lololimo wolo hilaa sanangi. **17** Bo habari boito diila longuaáto todelomo hilaa limongolio, tilinggula diila loó tahangi lohiheo. Odito timongolio ilodungga lou suusa meaalo ilalinayalio sababu habari boito, timongolio lato lomaathe iimanilio. **18** Bili u lobiihuto

tohuungo diuto oduhi boito debo odelo tau-tauwalo hipo dungohe habari boito, **19** bo molawalo pasali loui tutumuli mongolio wau ohilaa tumumula wimu-wimumuto ngoaamilalo. Napusu duolo tilolahepalo suali maa tilumuwoto ode delomo hilaa limongolio. Sababu uito habari lonto Allahu Taála leihupeto todelomo hilaa limongolio, tilinggula diila lomungo. **20** Wau bili u lobiihuto tohuta u molomiodu boito debo odelo tau-tauwalo hipo dungohe habari boito wau tilolimolio, timongolio helomungo dadaata, woluo utolo pulu, woluo uwolomo pulu, wau woluo u ngohetuto piúwa tilapulio." **21** Wumbutio mola ti Isa luli lotahuda, "Tingga woluo tamopo leiita tohe lapatao taubelio wolo tombe, meaalo podutuolio towalungo lo potuluhelo? Wolo tio diila mopodutu tohe boito to oáato tohe? **22** Diaaluo u tuutuó udiila taóontonga; wau diaaluo u hitua-tuawua umilakusudu hetuuólo diila tamo bonggali. **23** Sababu uito, wonu obulonga, podungohulo!" **24** Lapatao ti Isa luli lotahuda, "Poótuota maó wolo u ilodungohe limongoli botie. Tuuúdu upomake limongoli ode taawewo uito olo u mapomake lo Allahu Taála ode limongoli -- wau tumbaó lebe dadaata maó poli. **25** Sababu tamailoluo, mawohia-Lio lebe dadaata maó poli; bo taa u ilodiaaluo, ungoiidi woluo to olio mamuli hamaalo olo." **26** Ti Isa luli lohumbuta mola tahuda-Lio, "Wonu Allahu Taála momalenta odelo Olongia, owowoluwoalio mowali pohumayaalo debo odelo ngotaalio lotamo muáyade bili to halabolulio. **27** Hui tio motuluhu; dulahu tio mobongu. Wau sambela uito bibii-liyaalo boito hipobutua mola tulusi wau lowali iludaá. Bo woloolo mola dudelolio lo bibii-liyaalo boito mobutu mowali udaá, diila otaawa lotau boito. **28** Huta boitolo uwolo hilaalio mongohi tilapulo: bohu-bohulio tango kekeei, lapatao panggeyangio, tulusi hungolio. **29** Wau wonu pale boito malo lalahu, tau boito olo molumula molotobu sababu matonggadio u mongotolo." **30** "Wonu bolo Allahu Taála momalenta, wolo tatoonu ito mowali mopo ngilabotaó uito?" yilintu maó li Isa. "Lumadu wolo umowali pomakento u motombangaó? **31** Wonu bolo Allahu Taála momalenta, owowoluwoalio debo odelo pohumaya botie: Bili losawi ngobotu hilama lo tahingota-ngotaawa lapatao pilomulolio tohuta. Bili losawi yito bili u pulito kikiió todunia. **32** Bo wonu malobutu mai, mamowali u pulito udaá

towolota lo tilolahepe pilomulo. Tataa-ngolio mohimbungo daá tilinggula bubuu-lungiyalo tumombotai, wau mohutu beelea towalungo lo wolungalio." **33** Odi-odieelo mola ti Isa helo ngaajali tau wolo lopohuna dadaata pohumaya debo odelo uito, ngotilonggadu mowali opahamua limongolio. **34** Ti Isa laito hemomake pohumaya wonu Tio mongaajali tau-tauwala boito. Bo wonu Tio lohihilao wolo tahiduduá o-Lio, Tio mopoo patatao ngoáamilalo to olimongolio. **35** Tou lolaangio boitolo, ti Isa lotahuda maó ode tahiduduá o-Lio, "Duloolo ito mobite ode ngotuwali lobulalo." **36** Yi ti Isa malo titaé tobulotu, wau tahiduduá o-Lio lololaa maó taa ngohuntua tobiihu bulalo, lapatao lotitaé tobulotu u tutuuwauwa. Bubuu-lotuwaalo wewo woluo olo teto. Lapatao ti Isa wau tahiduduá o-Lio malobite. **37** Diila lohiheo lapatio maó lotoduo mai dupoto moóhuu. Bulotu mahe pomailio lobuóolo wau taluhu tilumuwoto ode delomo bulotu, tilinggula bulotu boito ngopeé lopolu lotaluhu. **38** Tokamudi lobulotu boito, ti Isa donggo tuutuluhu wolo lunggo-Ngio toitaato alangulua. Tahiduduá o-Lio malo mongu o-Lio. Uali mongolio, "Paaá Guru, diila paduli li Paaá ito botie matopotala?" **39** Ti Isa malo bongu, tulusi longantinga dupoto boito, wau lotahuda ode bulalo, "Poóoyo, potiduótololo!" Dupoto olo mailoole lomola, wau bulalo loliilo daá. **40** Lapatao ti Isa lotahuda maó ode tahiduduá o-Lio, "Yilongola timongoli moohe? Yilongola timongoli diila palacaya ola-U?" **41** Yi timongolio mailoohe wau hipo loiyawa ngota timongota, "Tutuulio-tutu tatoonu tau botie, tunggula dupoto wau buóola olo modungohe o-Lio."

**5:1** Lapatao ti Isa wau tahiduduá o-Lio leidungga mola ode ngotuwali lo Bulalo Galilea, tomadala lo Gerasa. **2** Tou ti Isa lolaheo tobulotu, Tio nilao mai lo talolai ngota tailumualai lonto gogoo-waalo kuubulu. **3** Tau boito makiluwasa lorohu u moleeto wau bilubiluloá to kukuu-buluwaalo. Tio madiilalo mowali punguwolo; penu boli wolo lante. **4** Malaito oáato wau uluulio hepunguwolo, bo laito lalaa-nteyaalo boito hebuntoolio, wau wate to oátio heboliyolio. Malo odito lotolio tilinggula diaaluo penu boli ngotaa maó tamowali molahangi olio. **5** Hui wau dulahu tio naó mota naó mai tokuubulu wau to huhuu-luduwaalo, sambela wuwa-wuwaatio wau

hemolonto palia wawaaio wolo botu. **6** Tou lonto u molamingo iloontongalio ti Isa dulu-dulungai, yi tilumetea mota tio tulusi losujudu mola totalu li Isa. **7** Wolo suala daa tio longuatio, "Isa Walaó Allahu Taáala Taa Laba-labaalo molanggato! Mapongola-Mu watia botie? Domi Allahu Taáala, watia momolohone diila maó sikisai watia!" ( **8** Tau boito loloiya odito sababu ti Isa lotahuda maó olio, "Rohu u moleeto, pohinggilo maó monto tau botie!") **9** Lapatao ti Isa lohintu olio, "Tatoonu tanggulumu?" Tau boito lolametao, "Tanggulo watia 'Legiun' -- sababu amiaatia botie ngohuntua daa!" **10** Wuwuulia tio helo molohone lou tiootutua alihu ti Isa diila maó mopoahu roroo-huwaalo u moleeto boito lumualaó monto lipu boito. **11** Membideo lo tambati boito woluo ngohuntua daa boi udonggo hipololohe uáalo tobinggi lohuludu. **12** Roroo-huwaalo u moleeta boito lomolohone maó li Isa, "Ahulilo mai ami tumuwota mota ode delomo bobooiyaalo boito." **13** Wau ti Isa akolo. Oditolio, maa tilumuwota mota roroo-huwaalo boito ode bobooiyaalo boito. Ngoáamilalo himbala lobo boito tilumeteo wau lotidehulo mola lonto binggi lopangato ode delomo bulalo tulusi yilumoduó -- ngoáamilalo diila motala dulo lihu boi. **14** Tahipodahawa boito tilumeteo, wau lopololadu habari boito tokota wau kambungu topalitio. Tulusi tau-tauwalo yilumualai mai lomilohe wolo u malo toduo. **15** Timongolio lonaó mai odeli Isa, tulusi maloóonto taa u engontielio ilotuanga lorohu u moleeto boito, donggo hulohuloaa teto. Tio malomake boó, wau pikiilangilio olo masileehati. Yi timongolio ngoáamila mailoohe. **16** Tau-tauwalo tahelo sakusi lohihilao u lotoduo pasali lotau boito wau bobooiyaalo boito helo hungguli wolo u malo toduo. **17** Lapatao tuango lipu lomadala boito lomolohone alihu ti Isa mololaa maó lipu boito. **18** Tou ti Isa malo titaé tobulotu, taa u engontielio kiluwaasa lorohu umoleeta boito lamolohone li Isa, alihu tio mowali moduduó. **19** Boti Isa diila akolo, tahudaa-Lio maó, "Pohualingolo wau polelea maó tomongo ilaatamu, wolo u mapilohutu lo Eeya to olemu, wau odito piohio lo Eeya to olemu!" **20** Tau boito olo malonaó, wau helosilita tomadala Mopuulo Kota wolo u mapilohutu li Isa to olio. Ngoáamila tau hilinggolabe loódungoheo. **21** Ti Isa luli lohualinga mota ode ngotuwali lobulalo. Tobiihu bulalo boito, ngohuntua tau mai



lotiambu topalito li Isa. **22** Malonaó mai ngotaalio tailunte Yairus. Tio yito ngotaalio lo tauwa bele potabiaalo tokota boito. Tou tio loóonto li Isa, tio malo sujudu totalu li Isa. **23** Wau lomolohone tióotutua, "Paaá, walaó watia taabua mongongoto daá. Wonu mowali toduwolo ti Paaá mota modedeta olio, alihu tio moluli wau diila mate!" **24** Yi oditolio ti Isa olo malonaó peé-peéenta wolei Yairus. Ngohuntua talo duduó o-Lio wau helo huntula o-Lio lonto totoonulalo tutulio. **25** To wolotalio woluo olo taabua ngota tamaa mopulaa dulo taunu mongongoto pilobaáta loduhu u aáaita wolo hulalio. **26** Ngoáamila okokayalio malo pulito hepilo makelio lomayali oli dokuteli, bo diaaluo penu boli ngotaa maó talo pooluli olio, tumbaó ngongotio bo lebe tilihua. **27** Taabua boito maloó dungohe dadaata pasali li Isa. Yi to huungo lotaa dadaata, tio lohimbideó li Isa loli wulea, **28** sababu to pikiilangilio, "Asalipo wau moódedeto jumba-Lio, wau mamoluli!" **29** Tio malo dedeta jumba li Isa, wau tou boitolo mola duhulio tilumonggodu. Tio loólaasa deú tio maloluli. **30** Tou boitolo ti Isa loólaasa deú woluo lotolo u yilumualai lonto batanga-Lio. Yi Tio malo milohe ode taa dadaata boito wau lohintu maó, "Tatoonu talo dedeta jumba-U?" **31** Tahidudua o-Lio loloiya maó, "Bilohilo li Paaá lohihilao odito huntualio lo tahipo huhuuntude. Wau ti Paaá donggo hemohintu, tatoonu talo dedeta jumba li Paaá?" **32** Boti Isa debo tulusi hemo milohe mota topali-Tio u mololohe tamalo dedeta o-Lio. **33** Taabua boito tamotota wolo u mailowali to batangalio, yi wolo hulu-huluhelio wau yiloohe tio losujudu mola totalu li Isa wau longaku ngoáamilalo. **34** Lapataó ti Isa lotahuda maó ode taabua boito, "Walauu-U, sababu yio palacaya ola-U, yio maloluli! Ponaólo wolo loáahu. Yio masileehati sama-samaata!" **35** Tou ti Isa donggo hemo tahuda, dengolo lota tamoomayawa lonaó mai lonto bele lei Yairus. "Pusili li Tuani mailate," uali mongolio odelei Yairus. "Diilalo maó poósuusawa li Tuani ti Paaá Guru." **36** Lou diila lomandungi wolo uiloiya lotau-tauwalo boito, ti Isa malo tahuda odelei Yairus, "Diila oohe, pomalacayalo wambaó!" **37** Lapataó ti Isa lonaó tulusi, bo diila yiluasialio-Lio penu boli ngotaa maó talo duduá o-Lio, ngopohia tei Petrus wolei Yakobus wau tei Yahya mohutato. **38** Tou timongolio leidungga mola ode bele lei Yairus, ti Isa loóonto owowoluwoa lo laba-labaalo

buluhuta, wau loódungohe tahe hiyonga wau hihunggalaá daá. **39** Lapataó ti Isa tilumuwotaó wau lotahuda ode limongolio, "Yilongola hibuluhuta wau hehiyonga? Walaó boito diila yilate; tio bo tuutuluhu!" **40** Ti Isa bo hepilo iiiya limongolio. Yi Tio malei lualao olimongolio ngoáamila. Lapataó Tio lodelo tilumuwota mongo dulaa lowalao boito wau toulota tahiduduá o-Lio ode delomo huwali lowalao boito. **41** Ti Isa lodihu uluu lowalao boito lapataó lotahuda maó olio, "Talita kumi," uboliilio maó, "Walaó taabua, Wau motahuda mai olemu: pobongulo!" **42** Walaó tadulahu boito lato lobongu mola, wau lodiambango. (Umululio mamopulaa dulo taunu). Ngoáamila tahi sakusia u lotoduo boito lolinggolabe daá. **43** Boti Isa lodini wolo loóohuu olimongolio alihu timongolio diila mopohabari suáli boito boli olo tatoonu. Lapataó tahuda-Lio, "Potamela maó walaó boito."

**6:1** Lonto tambati boito, ti Isa lohualingo peé-peéenta wolo tahiduduá o-Lio ode kambungu pilohuluta loduhu-Lio. **2** Todulahu Saabati Tio malo lumulo longajali tobele potabiaalo. Woluo taa ngohuntua teto. Tou tau-tauwala boito loódungohe pongajali li Isa timongolio lolinggolabe daá. Timongolio malo loiya, "Lonto utoonu tau botie loótapu ngoáamilalo boito? Tinepo odelo wolo utie uwoluo to o-Lio? Woloolo mola Tio mowali mohutu moólinggolabe? **3** Diila maa Tio botie walaó pani lo ayu, walai Maria, wau wutatee Yakobus, Yoses, Yudas, wau Simon? Ooó, mongo wuta-Tio taabua woluo olo hibiluloáwa tewe." Sababu uito timongolio diila lololimo o-Lio. **4** Tulusi ti Isa lotahuda maó ode limongolio, "Nabi ngota hulumatiolo boli toutoonu, ngopohia to kambungu pilohuluta loduhulio, wau towolota lomongo ilaatolio wau ngaalaálio." **5** To tambati boito ti Isa diila loóhutu penu boli tuwau maó u moólinggolabe, ngopohia lopoóluli dengolo lota tahi ngongota wolo lopodutu uluu-Lio toimbupulu limongolio. **6** Tio lolinggolabe deu timongolio diila palacaya. Lapataó ti Isa lonaó mola ode kaka-mbunguwalo topalitia boito wau helo ngajali. **7** Tio lotiangai mopulaa duulota tahiduduá o-Lio, tulusi lolao olimongolio duduulota wau longohi kawasa olimongolio u mopohinggi roroo-huwaalo u moleeto. **8** Tio longohi potuhata odie olimongolio, "Diila maó podelo

wolo-wolo tononaó limongoli, ngopohia tunggudu. Diila maó podelo uáalo mealo bututu losadaka, mealo doi. **9** Pomake maó sapatu, bo diila podelo boó dulopita." **10** Tio olo lotahuda, "Wonu timongoli tumuwoto ode bele ngowale, poti biluloópo teto tunggula timongoli mololaa maó kota boito. **11** Bo wonu timongoli meidungga totambati tuwau, wau tau-tauwalo teto diila mololimo wau diila mohuto modungohe olimongoli, tolai maó tambati boito. Wau pongeéya maó peaahuó monto paladu oáatumu odelo poéela olimongolio!" **12** Yi mopulaa duulota tahiduduá li Isa boito malo monggato. Timongolio lonaó lopo loladu habari deu manusia musi molilihu monto duduu-sawaalo. **13** Tahiduduá li Isa boito lopohinggi ngohuntua rohu u moleeto, lomadeta yinulo jaitun totahi ngongota wau helo pooluli olimongolio. **14** Habari pasali lo ngoáamila u lotoduo boito debo leidungga mola olo toli Olongia Herodes, sababu tangguli Isa mailotaawa lotaa dadaata boli toutoonu. Woluo taa u hipo loiyawa, "Tei Yahya Tamopolihua maluli tilumumulai! Uitulo sababuulio Tio okawasa helohutu u moólinggolabe boito." **15** Bo tau-tauwala wewo hipo loiyawa, "Tio Elia." Woluo olo talo loiya, "Tio nabi, debo odelo tala ngota lonabi tojamani muloololio mai." **16** Tou tei Herodes loódungohe uito, tio malo loiya, "Tantu utieelo tei Yahya Tamopolihua u muloololio mai mapilei timadeu lunggongio. Botia tio maluli tilumumulai!" **17** Sababu tou diipo uito tei Herodes malei waupo olei Yahya, wau lopotuwoto olio ode delomo tutupa. Tei Herodes lohutu odito sababu pasali li Herodias, dile lowutatio lohihilao, deúito-yito tei Pilipus. Sababu tei Herodes malonika woli Herodias, **18** wau pasali losuáli boito tei Yahya mapipiiúwa helodini olei Herodes odie mola, "Diila mowali yio monika wolo dile lo wutatumu boito." **19** Uitulo sababuulio ti Herodias loniyati olei Yahya wau ohilaa momate olei Yahya mate-mateelo maó, bo tio diila mowali mohutu suáli boito, sababu laito helabuto lei Herodes. **20** Sababu tei Herodes malo poáhu tau lodaha olei Yahya tióotutua alihu tio moáahu to tutupa, sababu tio moohe olei Yahya. Otaawalio tei Yahya tau ngota mopiohe tailao mai lo Allahu Taála. Wau memangi wonu tei Yahya mobisala, tei Herodes motohilaa olo modungohe olio, penu boli tio mowali balisa daá sababu tio. **21** Pulitio maó ti Herodiasi ilohiyango todulahu ilowali mai lei Herodes.

Tou boito tei Herodes lohutu potihunggu ode ngo'amila tahi opanggatia molanggato to bele biluloa saaha li olongia, mongo polowila wau tahi o tanggulawa to Galilea. **22** To potihunggu boito walai Herodias tadulahu helo ngelungo, wau elungio boito loosanangi daa hilaa lei Herodes wolo tahe tiloduwolio. Yi tei Herodes malo loiya ode tadulahu boito, "Yio motohilaa wolo, bolo pohileaalo. Mawohiu mai olemu wolo u otohilaamu!" **23** Lapatao tei Herodes malodanti ode tadulahu boito wolo tadia. Tei Herodes loloiya ma'o, "Penu boli wolo u pohilemu mawohiu mai, penu boli ngotayadu lo yilaidiyau peentalo ma'o!" **24** Yi tadulahu boito mailumualo wau lohintu oli maamalia, "Maama wolo pulito u mopiohe u musi pohile lowatia?" Timaamalia lolametao, "Pohilea ma'o lunggongee Yahya Tamopolihua." **25** Tadulahu boito huaa lohualingai odelei Herodes wau loloiya ma'o, "Watia mohile lunggongee Yahya Tamopolihua wohia mai olaatia to saa'tilo botie tanitani mai tobaki tuwau!" **26** Lo'odungohe hihile boito tei Herodes masiluukali daa. Bo tio didu mowali mopotouli hihile boito sababu tio malo tadia totalu lo tahe tiloduwolio. **27** Oditolio tio lato lomalenta'o ngotaalio lo tamoo-kawalia olio mota lohama mai lunggongee Yahya Tamopolihua boito. Yi pajule boito malona'o mota ode tutupa, lapatao malo limadei lunggongee Yahya. **28** Lapatao dilelolio mai lunggongo boito tanitani tobaki wau yiludulio ode tadulahu boito. Wau tadulahu boito longohi ma'o odeli maamalia. **29** Tou tahidudu'a olei Yahya lo'odungohe suali boito, timongolio malona'o mola lohama milate lei Yahya boito, tulusi yilobungio. **30** Mongo rasulu taheilao li Isa boito lapatao luli lohualingai, wau lotiambu woli Isa. Timongolio mai lopodulohu o-Lio ngo'amila u mapilohutu wau pilo ngaajali limongolio. **31** Dadaata daa tahi pona'owa mai wau tahipo hualinga, tilinggula didu otembo penu bo ngoidi ma'o ti Isa wau tahidudu'a o-Lio molamelo. Sababu uito ti Isa lotahuda ode tahidudu'a o-Lio, "Duloolo ito monao ode tambati udiila otau, toutoonu bo ito-itoolo wambaio wau timongoli mowali mohuheli ngopee' mola." **32** Yi timongolio olo malo monggato wolo bulotu hitalua ode tambati udiila otau. **33** Bo dadaata tau malo'onto olimongolio tou lololaa ma'o tambati boito, wau helotota tatoonu timongolio. Oditolio, lonto ngo'amila kota tomadala boito, tau-tauwalo hitetea loli tudulio lotimulo mota woli Isa wau

tahiduduá o-Lio. **34** Tou ti Isa lolaheo lonto bulotu, Tio loonto taa dadaata. Lodehu hilaa-Lio olimongolio, sababu timongolio debo odelo himba u diilalo oditilio. Yi Tio malo lumulo helo ngaajali dadaata suáli olimongolio. **35** Tou malo laangio mola, tahiduduá li Isa loloiya maó o-Lio, "Bolo ngopeé mai maahui wau tambati botie tihitihi. **36** Lebe mopiohe ti Paaá mopoáhu mota tau-tauwalo botie monaó, alihu timongolio mota motali mai uáalo to kakaa-mbunguwalo wau to dedee-sawaalo totili maó lewe." **37** Boti Isa lolametaó, "Timongolilo tamongohi maó olimongolio uáalo." "Waa, wolo amiaatia musi mota motali mai roti ngohalaga dulo hetuto doi talaá wau mopo tamela olimongolio botie?" odito ualo tahiduduá li Isa boito. **38** Lapataó yilintu maó li Isa, "Ngoolo roti tolimongoli? Nte mota bilohi mai." Lapataó mota bililohei limongolio, malo loiya timongolio, "Woluo roti limo lobutu wau woluo olo dulo botu uponula." **39** Lapataó ti Isa malo poáhu ngoáamila tau boito lotihuloá ngopo-ngopolemboá tohuóyoto u moidu. **40** Tau-tauwala boito olo lotihuloá wolo hiáatulua, ngopo-ngopolemboá. Woluo u ngohetuto lota ngopolemboá, wau woluo olo limo lopulu lota ngopolemboá. **41** Lapataó ti Isa lohama maó limo lobotu roti wau dulo botu uponula boito, tulusi yilumanggela mola ode hulungo wau lolapali sukuru ode Allahu Taáala. Lapataó uito, Tio malo mita-mitangaó roti boito wolo uluu-Lio wau longohi maó ode tahiduduá o-Lio u taya-tayadulo ode taa dadaata boito. Wau uponula dulo botu tila-tilayadio olo ode limongolio ngoáamila. **42** Timongolio malo lamela tunggula lobutuhu. **43** Lapataó lebelio lou aalo boito yilimoó lo tahiduduá li Isa, ngoáamilalo woluo mopulaa dulo kalanji hipolua. **44** Mongo lolai talo lamela roti boito woluo otanu limo lolihu lota. **45** Lapataó uito ti Isa huáa lopoáhu to tahiduduá o-Lio lomonggato wolo bulotu leimulo wo-Lio ode Betsaida to ngotuwali lobulalo, wau Tio donggo hemei walinga mota taa dadaata boito. **46** Lapataó lei walinga mota taa dadaata boito, ti Isa lonaó ode huludu mola loduá. **47** Tou maahui mai, bulotu lo tahiduduá o-Lio maamota tohuungio lobulalo, hiambola ti Isa donggo totudulio. **48** Tio loonto mota olimongolio malo tioopatea hipobiteya bulotu boito sababu dupoto boito lalaawania dulungio wolo bulotu. Sababu uito, tanu towolota jamu **3** wau jamu **6** dimodupo, Tio

lonaó mai ode limongolio loli tudu lotaluhu. Wau Tio lonaó tulusi debo odelo malumaodeó to limongolio. **49** Tou iloontonga limongolio deú Tio lonaó totudu lotaluhu, yi yilantobi mongolio Tio ponggo, **50** tilinggula timongolio hiwatiá mailoohe daá. Sababu timongolio ngoáamilalo loóonto o-Lio wau timongolio iloohea daá. Boti Isa lato lotahuda maó olimongolio, "Potiduóotolo mola! Wau Isa. Diila oohe!" **51** Lapataó Tio lobotulaó ode bulotu limongolio, yi dupoto olo mailoole lomola. Tahiduduá li Isa malo linggolabe daá. **52** Olinggolabe wolo roti limo lobotu boito debo diipo ilopahamua limongolio. Mototolo olimongolio u mongalati. **53** Tou leidungga mola ode ngotuwali lobulalo, timongolio lotilabua topentadu lo Genesaret. **54** Tou timongolio yilumualai lonto bulotu, tau-tauwala loóonto deú talei dungga mai boito ti Isa. **55** Lapataó timongolio bolo hitete-teteeá ode utoonulalo maó to ngoilanggubu madala boito, wau malodelo mai tau-tauwalo tahi ngongota boito to amongo odeli Isa. Wonu timongolio moódungohe deú ti Isa woluo totambati tuwau, hedeloo limongolio tau-tauwalo tahi ngongota boito odito mola. **56** Boli toutoonu ti Isa meidungga -- mopio to kambungu, tokota meaalo todesa -- teto olo tau laito hiponaówa mai wau mopo balataó tau-tauwalo tahi ngongota limongolio boito to tanalapa. Lapataó timongolio mei poluasi wolo tióotutua alihu tau-tauwalo tahi ngongota boito moódedeta jumba li Isa penu bo biihio. Ngoáamila tahe loódedeta jumba boito, maloluli.

**7:1** Ngopolemboá taulo Parisi wau dengolo lota guru lo agama lonto Yerusalemu, lonaó mai odeli Isa. **2** Timongolio loóonto dengolo lota tahiduduá li Isa hipo lamelawa wolo uluú udiila belesi odelo dudelo lo agama, deúito-yito lou diila hiwulowa uluú leimulo loduduá wuúdu lo agama. **3** Tau-tauwalo Parisi, odito olo ngoáamila taulo Yahudi, tatapu wau molotolo hilao hipo duduáawa uúdu linenemoya limongolio. Timongolio diila tamo lamelo, tou diipo mongulo uluú moduduó dudelo utantu-tantu. **4** Wolo u taliyolo topaatali diila tamelolo, tou diipo wulowalo meimulo. Wau ngohuntua wuúdu wewo monto linenemoya limongolio u tióotutua hedihuma limongolio; debo odelo humayaalio wuúdu mongulo halati, manggo, wau pakaa-kasiyaalo tombaha. **5** Sababu uito tau-tauwalo



Parisi wau guguu-ruwaalo agama boito helohintu li Isa, "Yilongola tahiduduá ole-Mu boito hemo lamela wolo uluú udiila hiwulowa? Wolo sababuulio timongolio diila moduduó uúdu linenemoyanto?" **6** Ti Isa lolametaó, "Timongoli tau-tauwalo munapiki! Tiluhata tutu wolo upilo nubuwati mai lei Yesaya pasali limongoli, deúito-yito, 'Odie mola tahuda lo Allahu Taáala, Tau-tauwala boito bo molubo ola-U wolo loiya, bo hilaa limongolio molamingo monto ola-U, **7** Diila ohunalio timongolio molubo ola-U, sababu wuúdu lomanusia u hepo ngaajali limongolio odelo hamahama uito wuúdu-U!" **8** Papaa-lentawalo Allahu Taáala hepalongo limongoli, wau wuwuu-uduwaalo manusia hedihuma limongoli tióotutua." **9** Lapataó ti Isa luli lotahuda maó, "Timongoli motoloáa daá diila mololimo palenta lo Allahu Taáala alihu mowali mopoo tohetaó pongaajali limongoli lohihilao. **10** Tei Musa malongohi mai palenta botie, 'Hulumatia maó tiyamamu wau tiilamu,' wau 'Titaalo tita tamolo-moloiya oliyamolio wau oliilolio, mamusi hukuu-maniyola mate-mateelo maó.' **11** Bo timongoli helo ngaajali: Wonu tamoloiya tomongo dulaálio, 'Wolo u patutilio wohi lowatia odeli paapa woli maama, mapilodewo lowatia ode Allahu Taáala,' **12** yi timongoli molopato tau boito monto uwajibu olio u motulungi olipaapa woli maamalia. **13** Oditolio wolo pongaajalimu lohihilao uilohi limongoli ode tau-tauwala, timongoli hemo podiaalu tahuda lo Allahu Taáala. Donggo ngohuntua suáli debo odelo utie u hepohutuo limongoli." **14** Lapataó ti Isa peéntapo lotiangai taa dadaata boito wau lotahuda maó olimongolio, "Podungohulo alihu mongalati! **15** Diaaluo u hitua-tuawua monto bulemengio tumuwoto ode delomo tau umoó najisi olio. Boliio maó, u lumualai monto tahingota-ngotaawa, ui-uitolo umoó najisi olio. **16** Oditolio, wonu obulonga podungohulo." **17** Tou ti Isa lololaa maó taa dadaata boito wau tilumuwoto ode delomo bele, tahiduduá o-Lio lohintu o-Lio pasali makusudu lo pohumaya boito. **18** Yi ti Isa lotahuda maó olimongolio, "Wolo timongoli debo diipo mongalati? Wolo diila opahamua limongoli deú u tumuwoto ode delomo tahingota-ngotaawa diila moóhutu tau boito najisi? **19** Sababu u tumuwoto boito diila moli hilao bo moli ombongo, wau lapataó muli lumualai." Wolo tahuda boito ti Isa lopoó patataó deú ngoáamila uáalo halale. **20** Lapataó ti Isa luli

lotahuda maó, "U lumualai monto tau, ui-uitolo u mopo najisi olio. **21** Sababu monto delomio, deüito-yito monto delomo hilao, tumoodei pipii-kilangiyalo moleeto u moósababu tau boito mohutu u huloto, motaó, momate mate-mateelo maó, **22** mojina, mohimbulo, mopitana, wau mohutu totoonulalo u moleeto, mowali tamaá, diila o adabu, mohiihia, sombongi, wau mototolo ajaliiyolo. **23** Ngoáamila umoleeta boito tumoodei monto delomio, wau ui-uitolo umoó najisi tau." **24** Lapataó ti Isa lololaa maó tambati boito, wau lonaó mola ode madala totili lokota Tirus. Tio tilumuwoto ode delomo bele ngowale wau diila mohuto otaawa lotau deü Tio woluo teto. Bo Tio diila lowali lotituuó. **25** Ti ibu ngota, tawalaio taabua mailo tuanga lorohu u moleeto, loódungohe pasali li Isa. Tio lonaó mai odeli Isa wau malo sujudu totalu-Lio, **26** sambela lomolohone alihu ti Isa mopohinggi rohu u moleeto boito monto walaio. Taabua boito diila taulo Yahudi, pilotutulio tomadala lo Penesia to Siria. **27** Ti Isa lotahuda maó olio, "Taukekeei musi wohiyalo uáalo meimulo. Diila mopiohu mohama uáalo lo taukekeei wau pomahulola ode apula." **28** "Tuani," tametaó lotaabua boito, "aáapulaalo to walungo meja olo hemongaa lalaa-bitowaalo u hetapilo mola lo taukekeei!" **29** Lapataó ti Isa lotahuda maó olio, "Sababu totametumu boito, pohualingolo; rohu u moleeto mailumualo lonto walaúmu!" **30** Ti Ibu boito malo hualingo. Tobele, ilodunggaalio walaio donggo balabalata to potuluhe, wau rohu u moleeto tutuulio-tutu mailumualo lonto walaio boito. **31** Lapataó ti Isa lololaa maó lipu Tirus, wau lopo tolonga mola lononaó-Lio loli Sidon ode Bulalo Galilea. Tio lohama dalalo lolibaya tomadala Mopuulo Kota. **32** Mota teto tau lodelo mai ode o-Lio ngotaalio tabuubu wau bungolo. Timongolio lomolohone li Isa alihu mopodutu uluu-Lio toimbupulu lotau boito. **33** Ti Isa lodelo tau boito lotitahi mota lonto taa dadaata, lapataó lopodutu tingongoa lo uluu-Lio ode delomo oluo bulonga lotau boito. Tulusi ti Isa lonula maó loiyohu, wau lodedeta dila lotau boito. **34** Lapataó uito Tio yilumanggela mola ode hulungo, tulusi lohilao daá wau lotahuda ode tau boito, "Epata," uboliilio maó, "Weáweáalo!" **35** Bulonga lotau boito lotiweá wau dilalio luli loluóyo, wau tio malo bisala lou gambangi. **36** Lapataó ti Isa lodini olimongolio ngoáamila alihu timongolio diila tamosilita suáli boito penu

boli olo tatoonu. Bo lebe hedinio li Isa, timongolio bo lebe hepilo loladio habari boito. **37** Wau ngoáamila taloo dunohe uito hilinggolabe daa. Timongolio hipo loiyawa, "Ngoáamilalo hepilohutu-Lio lou mopiohu! Tumbaó Tio lohutu taa bungolo loodunohe wau taa buubu loobisala!"

**8:1** Diila lohiheo lapatio maó woluo poli taa ngopo lemboá dadaata lonaó mai lotiambu. Sababu timongolio diila o uáalo, ti Isa malo tiangai tahiduduá o-Lio wau lotahuda maó, **2** "Lodehu hilaa-U totaa dadaata botie. Matolohui hiheolio timongolio wola-U, wau botia timongolio mailo pulita lou aalo. **3** Wonu Wau mopowalinga mota olimongolio wolo ombongo hipolaanga, timongolio maóleeta lohilao tohuungo dalalo. Tidiyolo maó towolota limongolio woluo talonto u molamingo." **4** Tahiduduá li Isa lolametaó, "Totambati u tihitihi mai botie, toutoonu mowali poótapulalo uáalo mowali moótuheo totaa ngoáamila botie?" **5** "Ngoolo maó daatalio roti to limongoli?" yilintu li Isa. "Pitu lobotu," tametaó limongolio. **6** Yi ti Isa lopoáhu totaa dadaata boito lotihuloá tohuta, tulusi Tio lohama roti pitu lobotu boito wau lolapali mola sukuru ode Allahu Taáala. Lapataó Tio lomita-mitangaó roti boito wolo uluu-Lio wau yilohi-Lio ode tahiduduá o-Lio alihu taya-tayadulio mota ode tau-tauwalo. Yi tahiduduá o-Lio malohutu odito. **7** Timongolio olo o uponula kekeei dengolo botu. Ti Isa lolapali mola sukuru ode Allahu Taáala to uuu-ponulaalo boito, lapataó lopoáhu to tahiduduá o-Lio helo laya-layadeó olo uuu-ponulaalo boito olo. **8** Timongolio lolamelo tunggula lobutuhu -- woluo tanu wopato lihu lota talo lamelo. Lapataó tahiduduá li Isa lohimoá lebelio lou aalo -- pitu lokalanji hipolua. Tulusi ti Isa helo poáhu totau-tauwalo boito lohualingo, **10** wau Tio wolo tahiduduá o-Lio lato lotitaé tobulotu wau lonaó ode madala Dalmanuta. **11** Dengolo lota taulo Parisi lonaó mai odeli Isa, wau helo hahaamawa wo-Lio u mohentabu olio. Timongolio meihutu li Isa u moólinggolabe odelo tuoto deú Tio lonto Allahu Taáala. **12** Ti Isa lopoilaalo suusa tulusi lolametaó, "Wolo sababuulio tau-tauwala tojamani botie meihutu ola-U u moólinggolabe? Diila! Wau diila tamongohi tuoto odelo uito ode limongolio!" **13** Lapataó ti Isa lololaa maó olimongolio, wau tilumuwoto

ode delomo bulotu; tulusi lobite ode ngotuwali lobulalo boito. **14**

Tahiduduá li Isa loólipato lodelo roti u tutuúde. Timongolio bo wambaó oroti ngobotu tobulotu. **15** "Poódaha-dahaalo maó toragi tau-tauwalo Parisi wau rahi lei Herodes," tahuda maó li Isa ode limongolio. **16** Yi tahiduduá li Isa boito mahipo bisalawa losuáli boito. Timongolio hipo loiyawa, "Tio loloiya odito, sababu ito diila oroti," **17** Otaawa li Isa wolo u heposuália limongolio. Sababu uito Tio lohintu maó olimongolio.

"Yilongola timongoli hemopo suáli pasali diila oroti? Wolo diila otaawa limongoli wau debo diipo mongalati olo? Odito puntuhu pikiilangimu? **18**

Timongoli omato -- yilongola diila moóonto? Timongoli obulonga -- yilongola diila modungohu? Madiila iloéela mola limongoli **19** toroti limo lobotu boito u mapili-pilitangu-U ode talimo lolihu lota? Ngoolo kalanji lebe lou aalo uilimoi mongoli?" "Mopulaa duluo," tametaó limongolio. **20**

"Wau tou Wau helo mita-mitango roti pitu lobotu ode tawopato lihu lota," yilintu maó li Isa poli, "ngoolo kalanji lebelio lou aalo u mailimoi mongoli?" "Pitu," tametaó limongolio. **21** "Naa, debo diipo olo mongalati timongoli?" tehuda maó li Isa poli. **22** Timongolio malei dungga mota ode Betsaida. Mota teto tau lodelo mai taa pitoó ngota odeli Isa, wau lohile alihu ti Isa modedeto mato lotaa pitoó boito u mopoóluli olio. **23** Yi ti Isa malodihu uluú lotaa pitoó boito wau lodedeá olio ode bulemengo kota boito. Lapataó ti Isa lonula loiyohu tomato lotaa pitoó boito. Tio lopodutu uluú-Lio tomato lotaa pitoó boito, tulusi lohintu maó olio, "Mamowali moóonto yio u hitua-tuawua masaatia?" **24** Tau boito lomilohe mota ode talulio, tulusi loloiya, "Joo, watia maloóonto tau hinaó-naówa; bo timongolio oontonga debo odelo batango ayu." **25** Ti Isa luli lopodutu uluú-Lio tomato lotau boito. Peéenta botie tau boito malo tolopani lomilohe wolo otu-otutuulo maó. Matolio loluli, wau tio maloóonto ngoáamilalo lou mopatato daá. **26** Lapataó ti Isa lotahuda maó olio, "Pohualingolo, wau diilalo pohualinga mota ode kota boito." **27** Ti Isa wau tahiduduá o-Lio lonaó mota ode kakaa-mbunguwalo totili lo Kaisarea Pilipi. Tohuungo dalalo ti Isa lohintu olimongolio, "Moduduá loiya lotau, tatoonu Wau botie?" **28** Timongolio lolametaó, "Woluo talo loiya: Tei Yahya Tamopolihua; woluo olo talo loiya tei Elia, wau tawewo poli

lolojiya: tala ngota lonabi." **29** "Bo moduduá olimongoli lohihilao, Wau botie tatoonu?" yilintu maó li Isa. Tei Petrus lolametaó, "Ti Paaá yito Olongia Tamoo-poáahua!" **30** Tulusi ti Isa lopoéelaó olimongolio, alihu diila mopoótaa penu boli olo tatoonu pasali lo batanga-Lio. **31** Lapataó uito ti Isa malo lumula longajali to tahiduduá o-Lio deú Walaó Manusia mamusi modutolo sikisa dadaata wau tuwalia lomongo tauwa, mongo iimamu tauwa, wau guguu-ruwaalo agama. Tio mapateelio mate-mateelo maó, bo toótolu dulahu Tio mamuli bongulo-Lio mai. **32** Wolo lopatato daá ti Isa lopoótaa suáli boito ode tahiduduá o-Lio. Yi tei Petrus lomantanga li Isa ode ngotuwali, wau lodini o-Lio. **33** Boti Isa loili wau lomiloheó to tahiduduá o-Lio, tulusi longentela olei Petrus, "Pohinggi maó monteea, Tamoo-heingawa ode dusa! Pikiilangimu boito pikiilangi lomanusia; diila pikiilangi lo Allahu Taáala!" **34** Lapataó ti Isa lotiangai taa dadaata tawoluo teto peé-peéenta wolo tahiduduá o-Lio. Tulusi Tio lotahuda maó ode limongolio, "Taa motohilaa moduduá ola-U, mamusi molipataó u polohuna daáalio lohihilao, lapataó momota salipulio, wau tulusi moduduá ola-U. **35** Sababu taa umotohilaa momintengi tutumulio, maóolia lo tutumulio. Bo taa u mopobake tutumulio ode ola-U wau ode Habari Mopiohe monto Allahu Taáala mapo aahuwolio. **36** Wolo paédaalio ode tahingota-ngotaawa, wonu ngoilanggubu dunia botie mowali milikiilio, bo tio maóolia lo tutumulio? **37** Tingga mowali tutumulo boito tuloáalo wolo u hitua-tuawua? **38** Wonu tahingota-ngotaawa moolito momasisi ola-U wau pongajali-U tojamani diila moéelo to palenta wau u moleeto botie, Walaó Manusia olo mamoolito mongaku totau boito, tou Tio demei dungga wolo kawasa li Paapa-Lio diluduá lo mamaa-likatiyalo tamantali."

**9:1** "Ototai maó!" tahuda li Isa, "Towolota limongoli tewe woluo tadiila mate tou diipo moóonto Allahu Taáala momalenta wolo kawasa!" **2** Wolonggui mola lapatio maó ti Isa lodelo olei Petrus wolei Yakobus wau wutatio tei Yahya, lotitahi mola ode huidee tuwau u molanggato. Totalu lomato limongolio ti Isa loboliólo mola lakulio. **3** Pakeyangi-Lio malowali loputió heinta-intaawa. Diaaluo penu boli ngotaa maó todunia botie tamoo

buboáa debo odelo putiio leeto. **4** Lapataó tahiduduá o-Lio toulota loóonto li Isa hemo bisala wolei Elia wau lei Musa. **5** Yi tei Petrus loloiya maó odeli Isa, "Paaá Guru, mopiohe tutu ito teea botie. Lebe mopiohe mongo watotia momongu maó kema mohelu totolu: tuwau uwoli Paaá, tuwau uwolei Musa, wau tuwau uwolei Elia." **6** Otutuulio maó diila otaawa lei Petrus wolo u musi loiyaalio, sababu tio wolo taduulota tamanilio donggo hiwoohea daá. **7** Lapataó heengo lohenggubei olimongolio wau lonto heengo boito dungo-dungohei suala lotahuda mai, "Tabotieelo walauu-U tapilonu-U. Podungohulo o-Lio!" **8** Lolamemeto timongolio lomilohe mota topalito limongolio, wau diilalo loóonto penu boli tatoonu teto peé-peéenta woli mongolio, ngopohia boti Isa. **9** Tou timongolio hilahe mola lonto huidee boito, ti Isa lopoéelaó olimongolio, "Diila maó polelea boli olo tatoonu wolo u iloontonga limongoli engonti tou Walaó Manusia diipo bongulo-Lio mai monto opopate." **10** Timongolio lodungoheó tahuli boito, bo towolota limongolio lohihilao mahi poloiyawa wolo makusudu li Isa lou "Muli tumumulai monto opopate". **11** Yi timongolio malohintu o-Lio, "Yilongola guguu-ruwaalo agama hemoloiya deu tei Elia musi meidungga mai meimulo?" **12** Ti Isa lolametaó, "Tei Elia memangi meidungga mai meimulo u mopobelesi maó totoonulalo u hitua-tuawua. Bo woloolo mola suáliilio wolo Walaó Manusia? Wolo sababuulio todelomo Kitabi tulatulade deu Tio mamodutolo sikisaa dadaata wau hinaa lotau?" **13** Bo Wau motahuda mai olemu; Tei Elia malei dungga mai, wau tau-tauwalo helohutu olio totoonulalo u otohila limongolio. Uito lutuuúde lou malei tulade todelomo Kitabi pasali lo batangalio." **14** Tou ti Isa wau toulota tahiduduá o-Lio mailoluo poli peé-peéenta wolo tahiduduá o-Lio wewolio, timongolio loóonto dadaata taa teto. Dengolo lota guru lo agama donggo hemo haamawa wolo tahiduduá li Isa boito. **15** Odito tau-tauwala boito loóonto li Isa, timongolio malei tontongo, tulusi hiteteá lolutulai o-Lio. **16** "Wolo u hepo susuuália limongoli wolo guguu-ruwaalo agama boito?" yilintu maó li Isa ode tahiduduá o-Lio. **17** Ngotaalio lotaa dadaata boito lolametaó, "Paaá Guru, watia lodelo mai walaó watia odeli Paaá. Tio buubu sababu ilotuanga lorohu u moleeto. **18** Wonu rohu umeleeto boito moluhu olio, wawaio hepo banti-bantilio tohuta, ngangolio lombu-lombula



loiyohu, dungitio polo-polotolio wau ngoáamila wawaio mobualodu didu moónema. Mapilohile lowatia to tahiduduá li Paaá u mopolahi rohu u moleeto boito, bo diila lowali limongolio." **19** Yi ti Isa lotahuda maó ode limongolio, "Mailaba timongoli botie! Timongoli tutuulio tutu taa diila palacaya. Tunggula omolua Wau musi motibiluloá peé-peéenta woli mongoli wau mosabali toli mongoli? Deloa mai walaó boito odia mai!" **20** Timongolio olo malodelo mai walaó boito odeli Isa. Odito rohu umoleeta boito loóonto li Isa, hepilo hutulio wawaó lowalaó boito hemo pohelu-heluto tilinggula walaó boito lodehu lo liliilide tohuta. Ngangolio lombu-lombula loiyohu. **21** Lapataó ti Isa malohintu toliyamo lowalaó boito, "Mangoolo maó hiheolio tio odie?" "Anggadu tio donggo ukikiiái!" tametaó liyamolio. **22** "Matingga maito rohu u moleeto boito hemo tolopani momate olio mate-mateelo maó wolo mopodehu olio ode tulu meaalo ode delomo taluhu. Bo wonu ti Paaá mowali motulungi maó, ambunguolo ti Paaá momonu wau motulungi mai olamiaatia!" **23** "Wolo heloiyamu? Wonu ti Paaá mowali?" tametaó li Isa. "Ngoáamilalo mowali, asali tau palacaya!" **24** Lolamemeto tiyamo boito longuatió, "Eeya, watotia palacaya, bo iimani lowatotia iilangi. Ambunguolo tulungia mai watotia alihu watotia lebe palacaya maó!" **25** Tou ti Isa loóonto deu taa dadaata mahi ponaówa mai lotiambu, yi Tio lomalentaó rohu umoleeta boito wolo lotahuda maó, "Rohu bungolo wau rohu buubu, Wau momalenta olemu luwalaó monto walaó botie wau sama-samaata diilalo potuwotai to olio!" **26** Rohu u moleeto boito malo nguatió, tulusi lohutu wawaó lowalaó boito hemo pohelu-heluto, lapataó tio mailumualo lonto walaó boito. Walaó boito oontonga debo odelo milate tilinggula ngoáamila tau hipo loiyawa, "Tio mailate!" **27** Boti Isa lodihu uluulio wau lotulungi olio lobongu. Walaó boito olo malobongu. **28** Tou ti Isa maatobele, tahiduduá o-Lio lonaó mai ngota-ngota ode o-Lio wau lohintu, "Wolo sababuulio amiaatia diila lowali lopolahi rohu u moleeto boito? **29** Ti Isa lolametaó, "Rohu u moleeto debo odelo uito diila mowali polahiyola penu boli loolo, ngopohia wolo dua." **30** Ti Isa wolo tahiduduá o-Lio lololaa maó tambati boito wau lopo tolonga mola lononaó woli mongolio loli Galilea. Ti Isa diila mohuto otaawa lotau toutoonu Tio woluo, **31** sababu

Tio donggo hemo ngaajali to tahiduduá o-Lio. "Walaó Manusia mawuduolio ode kawasa lomanusia," odito tahuda li Isa, "Wau Tio mapateelio mate-mateelo maó, bo todulahu otolulio Tio mamobongu mai!"

**32** Tahiduduá o-Lio diila mongalati u pilo ngaajali li Isa, bo timongolio moohe mohintu o-Lio. **33** Timongolio leidungga mola ode Kapernaum. Tou maatobele, ti Isa lohintu maó to tahiduduá o-Lio, "Wolo uhepo susuuália limongoli tou donggo hinaówa tohuungo dalalo engontie?" **34** Timongolio diila lolameto, sababu tohuungo dalalo timongolio helo buutola pasali lotatoonu tapulito udaá. **35** Ti Isa malo tihuloó, tulusi lotiangai tamopulaa duulota tahiduduá o-Lio boito. Tio lotahuda olimongolio, "Taa mohuto mowali tanomoro bohulio, tio musi mowali tapulitio wau musi mowali tamoomayawa ode ngoáamila tau." **36** Lapataó ti Isa lotiangai taúkikiiá ngota, wau lopo tihulaó taúkikiiá boito totalu limongolio ngoáamila lapataó Tio lomuduá taúkikiiá boito wau lotahuda maó ode limongolio: **37** "Taa mololimo taúkikiiá ngota debo odelo utie sababu Wau, boliilio maó mololimo ola-U. Wau taa mololimo ola-U, tio diila bo wambaó mololimo ola-U, bo mololimo olo o-Lio talo poáhu mai ola-U." **38** Lapataó tei Yahya lolojiya maó odeli Isa, "Paaá Guru, amiaatia maloóonto tahingota-ngotaawa lopolahi lati totangguli Paaá. Wau amiaatia malodini olio sababu tio diila lonto olanto." **39** Boti Isa lotahuda, "Diila maó podini olio, sababu, diaaluo penu boli ngotaa maó tamoóhutu moólinggolabe to tanggulu-U, mowali tulusi mopoóleeta ola-U. **40** Sababu taadiila moluwali olanto boliilio maó mamó tiwambaó ode olanto. **41** Poótoloma maó! Taa mongohi uilumolo olimongoli masababu timongoli hiduduá Olongia Tamoo-poáahua, tio tantu mamó lolimo wuupalio." **42** "Tatoonu tamoó sababu tala ngota lotau-tauwalo taiimani diila molotolo botie diilalo momalacaya ola-U, lebe mopiohe wonu botu pohilingalo poáwadulo to buloólio, wau tio pomahulolo ode delomo deheto. **43** Wonu uluúmu moósababu olemu ilodusa, putua maó uluú boito! Lebe mopiohe yió tumumulo wolo Allahu Taaala didu ouluú ngotuwali bo yió wolo uluú dulo tuwali matumuwoto ode nalaka, deúito-yito tulu u ohiheo-hiheolo maó. **44** Mola teto tulu diila mowali mate, wau wulodu diila mowali mate. **45** Wau wonu oáatumu moósababu olemu ilodusa, putua maó oáato boito.

Lebe mopiohe yio tumumulo wolo Allahu Taála didu o oáatumu ngotuwali, lou yio wolo oáatumu dulo tuwali pomahulolo ode delomo nalaka. **46** Mola teto tulu diila mowali mate, wau wulodu diila mowali mate. **47** Wonu matomu moósababu olemu ilodusa, luóohe maó mato boito! Lebe mopiohe yio tumuwoto ode Dunia Bohu lo Allahu Taála didu omato ngotuwali, lou yio wolo matomu dulo tuwali pomahulolo ode delomo nalaka. **48** Mola teto tulu diila mowali mate wau wulodu diila mowali mate. **49** Timiidu tau mapo belesiyolo wolo tulu, debo odelo bake pobelesiyolo wolo watingo. **50** Watingo boito mopiohu, bo wonu didu olamita, tingga donggo mowali muli poó panggelolo? Oditolio mamusi timongoli mowali debo odelo watingo -- poti tumulolo peé-peéenta wolo mopiohe wau dame."

**10:1** Lapataó ti Isa lololaa maó tambati boito, wau lonaó ode lipu lo Yudea wau lipu to ngotuwali lo Dutulaa Yordan. Taa dadaata luli lonaó mai lotiambu topalito li Isa. Wau debo odelo biaasa ti Isa helo ngaajali olimongolio. **2** Dengolo lota taulo Parisi olo lonaó mai lohentobu o-Lio. Timongolio malohintu, "Moduduá butoo lo agamanto, tingga mowali tau motalaki dilelio taabua?" **3** Ti Isa lolametaó, "Tei Musa lomalentai wolo olimongoli?" **4** "Tei Musa mopoluasi tau motalaki dilelio taabua, asali tio moluladupo tulade talaki mulomulo," tametaó limongolio. **5** "Tei Musa loluladei palenta boito sababu timongoli mototolo daá ajaliyolo," tahuda maó li Isa olimongolio. **6** "Bo tou bohulio mai tou Allahu Taála lopowali manusia, tilahuda-Lio deu Allahu Taála lopowali olimongolio talolai wau taabua. **7** Uito sababuulio talolai mamololaa maó tiilo tiyamolio wau motituwau wolo dilelio, **8** yi duuduluolo mowali tuwau.' Oditolio, timongolio diilalo duulota, bo ngota. **9** Uito sababuulio, wolo u mapilopo tuwau mai lo Allahu Taála, diila mowali talakio lomanusia!" **10** Tou timongolio tilumuwoto ode bele, tahiduduá o-Lio lohintu o-Lio pasali losuáli boito. **11** Ti Isa lotahuda maó olimongolio, "Tatoonu tamotalaki dilelio lapataó monika wolo taabua wewo, tau boito malojina wolo dilelio tabohulio boito. **12** Odito olo taabua tamotalaki dilelio lapataó monika wolo talolai wewo, tio olo malojina." **13** Woluo tau helodelo mai

taukekeei odeli Isa alihu Tio modedeta wau mobalakati olimongolio. Bo tahiduduá li Isa loingo ode tau-tauwalo boito. **14** Loóonto maó suáli boito, ti Isa maloingo lapataó Tio lotahuda ode tahiduduá o-Lio. "Hulia maó taukekeei boito monaó mai ode ola-U! Diila maó dinia timongolio, sababu taa debo odelo utieelo tamowali pongawaá umati lo Allahu Taáala. **15** Poótoloma maó utie! Titaalo tita tadiila motaalua wolo Allahu Taáala debo odelo taúkikiia ngota, diila tamowali pongawaá umati lo Allahu Taáala." **16** Lapataó lotahuda odito, ti Isa lomuduó taúkikiia boito, tulusi Tio lopodutu uluú-Lio toitaati mongolio ngota-ngota wau helo balakati olimongolio. **17** Tou ti Isa luli lopo tolonga mola lo nonaó-Lio, ngotaalio maa tilumeteai odeli Isa. Tau boito losujudu mola totalu li Isa wau lohintu maó, "Guru tamopiohu, wolo u musi pohutuo lowatia alihu moótapu tutumulo ututuulio tutu wau ohiheo-hiheolo maó?" **18** "Yilongola heloiyamu Wau mopiohu?" yilintu li Isa. "Diaaluo tamopiohe, ngopohia Allahu Taáala lohihilao. **19** Mailo taawamu papaa-lentewalo Allahu Taáala, 'Diila pomate mate-mateelo maó, diila maó pojina, diila maó potaó, diila maó posakusi yimbulo, diila maó pongaakali, hulumatia maó tiyamo wau tiilamu." **20** "Paaá Guru," ualo tau boito, "ngoáamila palenta boito madiluduá lowatia tumulalo mai watia donggo muda," **21** Ti Isa lomiloheó tau boito wolo ponu tulusi lotahuda maó, "Bolo tuwau suáli poli u palaluwomu. Ponaólo mota potalia maó ngoáamila milikiimu; wohia maó doili ode taa mosikini, wau yio mamooótapu halata tosologa. Lapataó uito ponaólo mai wau dudui Wau." **22** Loódungohe tahuda li Isa odito, tau boito diila sanangi, tulusi tio lololaa maó tambati boito wolo suusa lohilao sababu tio kaya daá. **23** Yi ti Isa lomiloheó to tahiduduá o-Lio tulusi lotahuda maó olimongolio, "Mototolo daá taakaya mowali pongawaá umati lo Allahu Taáala!" **24** Tahiduduá o-Lio lolinggolabe loódungohe tahuda li Isa boito. Boti Isa luli lotahuda maó, "Mongo walauu-U, memangi mototolo u mowali pongawaá umati lo Allahu Taáala! **25** Lebe gambangi unta tuwau tumuwoto ode huango dudetu wolo taakaya ngota tumuwoto ode Dunia Bohu lo Allahu Taáala." **26** Tahuda li Isa boito heloóhutu to tahiduduá o-Lio lolinggolabe, tilinggula timongolio mahipo hintua ngota timongota, "Wonu odito, tatoonu tamowali moáahu?" **27** Ti

Isa lomiloheó olimongolio wau lolameto, "To manusia uito pongalo aakali, boto Allahu Taáala uito diila pongalo aakali; ngoáamila mowali duólo Allahu Taáala." **28** Lapataó tei Petrus malo loiya, "Bilohilo, amiaatia malo lolaa mai totoonulalo u hitua-tuawua wau loduduá li Paaá." **29** Tahuda maó li Isa, "Pomalacayalo; taa u malo lolaa maó ngaalaálio, meaalo wutatio talolai meaalo taabua, meaalo tiilolio, meaalo tiyamolio, meaalo mongo walaio, meaalo pangimba wau halabolulio sababu Wau wau sababu Habari Mopiohe monto Allahu Taáala, **30** tau boito mamó lolimo lebe ngohuntua to masaatia botie. Tio mamóotapu ngohetuto piúwa lebe dadaata maó bele, wutato talolai, wutato taabua, tiilo, taukekeei, pangimba wau halabolu, -- wau polosikisa olo. Wau de tojamani u mamei dungga mai, tau boito mamó lolimo tutumulo ututuulio tutu wau ohiheo-hiheolo maó. **31** Bo dadaata taa u masaatia botie tabohulio mamowali tapulitio wau dadaata taa u masaatia botie tapulitio mamowali tabohulio." **32** Ti Isa wau tahiduduá o-Lio donggo hidulunga mola ode Yerusalemu. Ti Isa lonaó totalu, wau tahiduduá o-Lio hilawalo ngoáamilalo. Wau tau-tauwalo talo duduó olimongoli lonto wulea olo hiwoohea. Lapataó ti Isa luli lotiangai to tahiduduá o-Lio wiwi-wiwi u lopoótaa olimongolio wolo u demaa motoduo mai to batanga-Lio. **33** "Dungohilo mai," tahuda-Lio maó, "Ito botia donggo dulu-dulunga ode Yerusalemu. Mola teto Walaó Manusia mawuduolio ode mongo iimamu tauíwa wau guguu-ruwaalo agama. Tio mahukuu-maniyolo mate, lapataó wuduolio ode tau-tauwalo tadiila Yahudi. **34** Timongolio mamó hente-henteó o-Lio, monula loiyohu o-Lio, moposikisa o-Lio, wau moposalipu o-Lio. Bo todulahe otolulio Tio mamuli mobongu mai." **35** Lapataó tei Yakobus wolei Yahya, deuító-yító mongo walaée Jebedeus, lonaó mai odeli Isa. 'Paaá Guru,' uali mongolio "wولو suáli tuwau u otohílaa lamiaatia pohutuo mai li Paaá ode lamiaatia." **36** "Wolo u otohílaa limongoli pohutuwo-U mai olimongoli?" yilintu maó li Isa. **37** Tametaó limongolio, "Amiaatia motohílaa motihuloá to ambahu olowala wau oloihi li Paaá, wonu bolo ti Paaá malo tihuloá totambati u lailaió." **38** "Diila otaawa limongoli wolo upohile limongoli," tahuda li Isa olimongolio. "Mambo timongoli mongilu tohakati polodutolo u mailumo-U wau tumuwoto ode delomo polodutolo uma tuwoto-U?" **39**

"Mambo," tametaó limongolio: yi ti Isa luli lotahuda olimongolio:  
"Memangi, timongoli mamongilu monto hakati polodutolo u mailumo-U wau matumuwoto ode delomo polodutolo umaa tuwoto-U. **40** Bo pasali lo tatoonu tamaa motihuloá to olowala-U meaalo to oloihi-U uito diila hakuu-U u molantu, Allahu Taáala tamolantu tatoonu tamaa motihuloá totambati boito." **41** Tou tamopulu lota tahiduduá li Isa wewolio boito loódungohe suáli boito, timongolio maloingo olei Yakobus wolei Yahya. **42** Oditolio ti Isa malo tiangai olimongolio ngoáamila, tulusi lotahuda maó, "Otaawa limongoli deú mongo tauwa lo bangusa tadiila motota lo Allahu Taáala hipodeehea ulipulio, wau taduduulá lo ulipu limongolio hipo dutonga olimongolio. **43** Bo timongoli diila mowali odito! Boliio maó, taa u motohilaa mowali udaá towolota limongoli, tio musi mowali tamoomayawa olemu. **44** Wau taa u motohilaa mowali tabohulio towolota limongoli, musi mowali wato ode tangoáamila. **45** Sababu Walaó Manusia olo dungga-dungga mai diila meibaaya. Tio dungga-dungga mai u momaya wau mohudu nyawa-Lio u molopata taa dadaata." **46** Timongolio malei dungga mola to Yerikho. Wau tou ti Isa wolo tahiduduá o-Lio wau taa dadaata lololaa maó kota boito, taa pitoó ngota donggo hulohuloá hemohile-hile tobiihu dalalo. Tanggulio Bartimeus, walaée Timeus. **47** Tou tio loódungohe deú tadonggo laolaode boito ti Isa taulo Najaret, tio malo nguatiá, "Isa, Walaée Dauda, Ponua mai watia!" **48** Tio ilingowa lotaa dadaata wau pilei poóyongalio maó. Bo tio longuatió lebe heúdaá mola, "Walaée Dauda, ponua mai watia!" **49** Yi ti Isa malo huheli tulusi lotahuda maó, "Tianga mai tio." Oditolio tiliyangai limongolio taa pitoó boito. Loiya maó limongolio olio, "Poóyolo mola! Yio tiliyango li Isa, tihulolo mai!" **50** Taa pitoó boito olo malo pomahulo jumbalio, tulusi ngointa tilimihulo wau lonaó mota odeli Isa. **51** "Wolo u otohilaamu pohutuwo-U mai olemu?" yilintu li Isa olio, Taa pitoó boito lolametaó, "Paaá Guru, watia motohilaa moóonto." **52** "Ponaólo," tahuda maó li Isa, "Sababu yio palacaya ola-U, yio maloluli." Tou boitolo tau boito maloóonto. Lapataó tio malo dudua li Isa todalalo.

**11:1** Tou lembideó lo Yerusalemu, timongolio leidungga mota tokota



Betpage wau Betania, tobinggi lo Huludu Jaitun. Mota teto duulota tahiduduá o-Lio yilao leimulo woli Isa. **2** "Ponaólo mota ode kambungu u totalu boito," tahuda li Isa ode limongolio. "Odito timongoli tumuwotaó kambungu boito, oontonga limongoli walaó kolodai tuwau donggo tihu-tihuto, udiipo peéenta maó hetilaéya lotau. Hulua maó kolodai boito wau delowa mai odia. **3** Wau wonu woluo tau mohintu olimongoli wolo sababuulio timongoli lomuli kolodai boito, polelea maó, 'Eeya palalu leeto, wau Tio mahuáa mopo walingai.' " **4** Duulota tahiduduá li Isa boito poli malonaó, wau loódungga walaó kolodai tuwau donggo tihu-tihuto tohuhebu lobele tobiihu dalalo. Yi timongolio malo nguáde walaó kolodai boito. **5** Tau-tauwalo tahitihula teto malohintu olimongolio, "Wuu, donggo hipongolawa timongoli? Yilongola timongoli malo nguáde walaó kolodai boito?" **6** Timongolio lolametaó debo odelo u pilotahuda li Isa olimongolio. Yi tau-tauwala boito malo poluli olimongolio lodelo kolodai boito. **7** Tou leidungga mota odeli Isa, wulea lokolodai boito mailapide limongolio wolo jumba limongolio, tulusi ti Isa lotitaé to kolodai boito. **8** Dadaata tahelo powumbato jumba limongolio todalalo, woluo poli tahelo populepe tango lo ayu kekeingo tohuungo dalalo u hilama mai limongolio to halabolu. **9** Tahinaówa totalu wau tahiduduá mai to wulea, ngoáamilalo hetingalaá mengahu, **10** "Pujiaalo mola Allahu Taaala! Mabala-balakatilo Tio tadungga-dungga mai to tanggulo Eeya! Pomali-tutuóolo mola pamalenta-Lio u mamei dungga mai -- pomalenta lei Dauda tinene moyanto! Pujiaalo mola Allahu Taaala Taa Laba-labaalo molanggato!" **11** Pulitio maó ti Isa leidungga mota ode Yerusalemu, tulusi tilumuwoto ode Bele lo Eeya. Mota teto Tio lopoó tuotaó topali-Tio. Bo sababu mabolo ngopeeé mai modiólomo, tulusi Tio malo monggato ode Betania peé-peéenta wolo tamopula duulota tahiduduá o-Lio. **12** Loloombulio mola, tou timongolio donggo hinaówa yilumualaó lonto Betania, ti Isa mapilolango. **13** Lonto u molamingo Tio loóonto mota bungo lo ayu ara u duungio mohumbuyungo. Oditolio Tio lonaó mota ode bungo lo ayu ara boito mota lomilohe bolo woluo hungolio. Bo tou Tio leidungga mota ode bungo lo ayu ara boito, diaaluo maó ilodungga-Lio, ngopohia bo wambaó duungio, sababu tou boito diipo sembo lou momungo. **14** Tulusi ti Isa

lotahuda ode bungo lo ayu ara boito, "Tumulalo mai botia diaaluo penu boli ngotaa maó tamaa molamela monto hungomu botie!" Tahiduduá li Isa loódungohe upilo tahuda-Lio boito. **15** Lapataó timongolio leidungga mola ode Yerusalemu, wau ti Isa luli lonaó ode Bele lo Eeya. Mota teto Tio malopo hinggi ngoáamila tahipo taalia totambati boito. Tio helopo babaan-tulelengaó memee-jawalo lotaa hipo tutuuloá lodoi, wau babaa-nggawalo lotaa hemo potaalia bulungi poombo. **16** Wau diaaluo penu boli ngota maó tailuasia-Lio modelo wolo-wolo lumaode topaango Bele lo Eeya boito. **17** Lapataó ti Isa helo ngaajali totau-tauwalo mota teto. Tio lotahuda maó, "Todelomo Kitabi tulatulade odie mola: Allahu Taáala lopilimani mai, 'Bele-U maunteelo bele tambati poduáalo duólo totoonulalo bangusa.' Bo timongoli lopowali maó beelea lopoheehu!" **18** Mongo iimamu tauwa wau guguu-ruwaalo agama loódungohe tahuda boito. Yi timongolio malo lolohe dalalo u momate li Isa mate-mateelo maó. Timongolio moohe o-Lio, sababu ngoáamila tau helo linggolabu loódungohe pongaajali-Lio. **19** Tou hui dungga-dungga mai ti Isa wolo tahiduduá o-Lio lololaa maó kota boito. **20** Donggo dimodupo loombulio mola, tou timongolio yilumaodeó tobungo lo ayu ara boito, iloontonga limongolio bungo lo ayu ara boito mailate demola waaatio. **21** Lapataó iloéela mola lei Petrus poloutia ngohui tou dipolulio mai. Yi tei Petrus malo loiya odeli Isa, "Paaá Guru, nte bilohi! Bungo lo ayu ara u tiladia li Paaá boito mailate!" **22** Ti Isa lolametaó, "Pomalacayalo to Allahu Taáala. **23** Tutuulio tutu timongoli mowali molojiya maó ode huludu botie, 'Pohuwatolo wau polemailo mola ode delomo dehetu!' Yi suáli boito mapohutuo-Lio mai olimongoli; asali timongoli diila molingu, wau timongoli palacaya deu uiloiya limongoli boito otu-otutuulo maó mamotoduo mai. **24** Sababu uito eelai maó utie: Wonu bolo timongoli moduá wau momolohone u hitua-tuawua, pomalacayalo deu Allahu Taáala malongohi mai olimongoli wolo u pilolohone limongoli, yi timongoli mamololimo maó. **25** Wau wonu timongoli moduá, bo hilaamu diila sanangi ode tahingota-ngotaawa, ambunguwapo tau boito, alihu Allahu Taáala limongoli tosologa mongambungu mai olo duduu-sawaalo limongoli. **26** Wonu timongoli diila mongambungu taawewo, Allahu Taáala limongoli tosologa olo diila tamo

ngambungu mai duduu-sawaalo limongoli." **27** Timongolio luli lohualinga mola ode Yerusalemu. Wau tou ti Isa lojalena lomalito todelomo Bele lo Eeya, mongo iimamu tauwa, guguu-ruwaalo agama wau mongo tauwa lo Yahudi lonaó mai ode o-Lio. **28** Timongolio lohintu maó, "Huta-hutaáa tolo Yio helohutu ngoáamilalo botie? Tatoonu talongohi haku boito to ole-Mu?" **29** Ti Isa lolametaó, "Wau olo ohilaa mohintu olimongoli. Tameti mai wau Wau mamolele mai olemu, wolo haku lo tatoonu Wau malohutu susuu-aliyaalo botie. **30** Tei Yahya helo polihu wolo haku lo tatoonu, Allahu Taáala meaalo manusia?" **31** Lapataó mongo iimamu tauwa wau mongo tauwa lo Yahudi malo dulohupa towolota limongolio. Timongolio loloiya, "Wonu polelento maó, wolo haku lo Allahu Taáala,' Tio mamoloiya mai, 'Yilongola timongoli diila lomalacaya olei Yahya? **32** Bo mototola olo u molele maó, 'Wolo haku lomanusia.' " Sababu timongolio moohe lotaa dadaata, sababu ngoáamila tau hipo nganggapua olei Yahya ngotaalio lonabi. **33** Oditolio, timongolio malo lameto, "Diila otaawa lami." Tulusi ti Isa lotahuda maó olimongolio, "Wonu odito, Wau olo diila mohuto molele mai olimongoli wolo haku lo tatoonu Wau helohutu ngoáamilalo botie."

**12:1** Lapataó ti Isa lolumula helo bisala wolo pohumaya ode mongo iimamu tauwa, guguu-ruwaalo agama wau mongo tauwa lo Yahudi boito. Ti Isa lotahuda, "Woluo ngotaalio lomulo ilengi ngopita lo angguru, wau bilalaalio palipalito. Lapataó uito tio malo ngaúde huango duólo pakaakasi pomitodelo angguru, tulusi tio lomongu maó monala tuwau olo. Lapataó uito tio loposeuwa ilengi lo angguru boito ode ngoolo lota tahi pokalajawa ilengi boito tulusi lonaó odelipu wewo. **2** Tou mawakutuulio sembo loui molipu hungo lo angguru, tau boito lolao mota tamoomayawa ngota ode tahi pokalajawa ilengi boito, mota mololimo tayadio. **3** Bo tahi pokalajawa ilengi boito lohéupai tamoomayawa boito. Lapataó pilate limongolio tio, tulusi pilolontuli mongolio tio lohualingo wolo uluu laulau. **4** Tulusi taa ohuuwo lo ilengi boito lolao mota poli ngotaalio tamoomayawa wewo. Bo tahi pokalajawa ilengi boito lomate lunggongio lo tamoomayawa boito, tulusi pilolontulio boli hepilu-piluwayolio. **5** Taa

ohuuwo lo ilengi boito lolao mota poli ngotaalio tamoomayawa wewo. Bo timongolio malomate tamoomayawa boito yila-yilateelo maó. Wau molo laalaaita mola odito u hepilohutu limongolio to ngohuntua tamoomayawa wewolio olo; woluo tabilobohio wau woluo olo tapilatelio yila-yilateelo maó. **6** Donggo tatoonu poli tamowali laololio botia lotaa ohuuwo lo ilengi boito? Bolo ngota wambaó, deúito-yito walaio lohihilao taa otoliangio. Oditolio pulitio maó tio malo poáhu mota walaio boito ode tahi pokalajawa ilengi boito. 'To pikilangilio tantu walaio mahulumatio mai limongolio.' **7** Bo tahi pokalajawa ilengi boito maloloiya ngota timongota, 'Botie tio taáhali lo walisilio. Dulo pateento tio mate-mateelo maó, alihu ito tamootapu tayadio boito!' **8** Yi walaó boito mailaupio, tulusi pilate limongolio yila-yilateelo maó. Milatelio pilomahuli mongolio ode bulemengo ilengi boito." **9** Lapataó ti Isa malohintu, "Wolo u mapohutuo lotaa ohuuwo lo ilengi boito? Tantulo maó tio mamonaó mai wau momate mateelo maó tahi pokalajawa ilengi boito, lapataó mohudu ilengi boito ode tahi pokalajawa wewo! **10** Timongoli tantuulio malo pobaca ayati odie todelomo Kitabi, 'Botu udiila ilopomakea lo papaa-niyaalo hudungu malowali botu ulaba-labaalo mopiohu. **11** Uti-utieelo huhutu lo Eeya; donggo boli piohio!" " **12** Yi tahimuloa lo ulipu bangusa lo Yahudi taloo dungohe pohumaya boito, mahipo tolopania moheupa li Isa, sababu otaawa limongolio pohumaya boito pilopo dungga li Isa ode limongolio. Bo timongolio moohe lotaa dadaata. Oditolio, timongolio malonaó lololaa maó li Isa. **13** Dengolo lota taulo Parisi wau dengolo lota pongawaá palatei lei Herodes ilahulalio mopeehu totala li Isa wolo yiyintu. **14** Timongolio lonaó mai odeli Isa wau loloiya, "Paaá Guru, otaawa lamiaatia deú ti Paaá juujulu wau diila paduli boli huhama lo tatoonu. Ti Paaá helo ngaajali wolo juujulu pasali kahandaki lo Allahu Taaala ode manusia, sababu ti Paaá diila momilohe tau. Naa, nte polelea mai li Paaá olamiaatia, 'Moduduá wuúdu lo agamanto, tingga mowali momayali beya odeli Kaisali meaalo diila? Wolo ito musi momayali beya boito, meaalo diila?" " **15** Ti Isa malotota omunapiki limongolio. Tio lolametaó, "Wolo sababuulio timongoli motohilaa mopeehu totala to ola-U? Nte pobilohe mai ola-U doi talaá ngopita." **16** Yi timongolio longohi maó li Isa doi talaá ngopita.

Tulusi ti Isa malohintu, "Gambali wau tanggulo tatoonu utie?" "Kaisali," tametao limongolio. **17** "Naa, wonu odito," tahuda li Isa, "Wohia mota odeli Kaisali wolo miliki li Kaisali, wau ode Allahu Taála wolo miliki lo Allahu Taála." Timongolio lolingolabe lodungohe o-Lio. **18** Dengolo lota talonto palatei lo Saduki lonaó mai odeli Isa. (Timongolio yito palatei lotaa ohuhama deu tamalo poowate diilalo mobongu mai). **19** "Paaá Guru," loiya limongolio odeli Isa, "Tei Musa loluladei butoo botie ode olanto: 'Wonu talolai ngota mate wau tio diila owalaó, yi wutatio musi monika wolo jandalio alihu mongohi mai wali ode taa u mailate boito. **20** Peéenta woluo tamohutato pitulota. Tamohuhula daá lonika, lapatao yilate diila lootapu walaó.' **21** Lapatao taoluolio lonika wolo jandalio, bo tio poli yilate diila lootapu walaó. Suáli tutuuwauwa lowali olo wolo wutatio taotolulio, **22** wau tulutulusi demola taopitulio. Mapulitio maó taabua boito olo yilate. **23** Todulahu lotaa lopoowate muli mobongu mai, dile lotatoonu taabua boito? Sababu pitupitu lotaalo malonika wolio!" **24** Ti Isa lolametao, "Matilala daá huhama limongoli. Sababu timongoli diila mongalati lo Kitabi meaalo kawasa lo Allahu Taála. **25** Sababu wonu bolo tahe lopowate muli mobongu mai, timongolio diilalo monika, bo timongolio matumumulo debo odelo malaikati tosologa. **26** Wau pasali lotaamate muli bongulo-Lio mai, diipo peéenta timongoli lopobaca todelomo Kitabi lei Musa pasali lodiuto ulei-leiita boito? Todelomo aaa-yatiyaalo boito leituladei deu Allahu Taála lotahuda odelei Musa, 'Wau Allahu Taála lei Abraham, Allahu Taála lei Isihaka wau Allahu Taála lei Yako.' **27** Allahu Taála boito diila Allahu Taála lotaa yilate. Tio Allahu Taála lotaa tumutumulo. Matilala daá huhama limongoli!" **28** Lapatao malonaó mai guru agama ngota lodungohe bibiisalawa towolota li Isa wolo tau-tauwalo lonto palatei lo Saduki boito. Guru agama boito looonto deu ti Isa malo lameto tau-tauwala boito lou mopiohu. Yi tio malohintu li Isa, "Palenta toonu ulebe polohuna daá monto ngoáamila palenta?" **29** Ti Isa lolametao, "Palenta ubohulio, deuito-yito: 'Dungohilo maó, wuu bangusa lo Isirailu! Eeya Allahu Taáalanto, Eeya boito tatuwa-tuwaulo. **30** Toliangilo Eeya Allahu Taáalamu wolo lealeaatu lohilaamu, wolo lealeaatu lojiwamu, wolo lealeaatu lo aakalimu, wau wolo

totoonulalo lotolumu.' **31** Palenta oluolio yito: 'Toliángilo maó ngota timongotamu, debo odelo yio motoliángo batangamu lohihilao.' Diduuluo palenta wewo ulebe polohuna daá wolo dulo palenta boito." **32** Lapataó guru agama boito loloiya odeli Isa, "Tiluhata daá, Paaá Guru! Memangi otutu wolo upilo tahuda li Paaá: Eeyaaalo Allahu Taáala tatuwa-tuwaulo, wau diduuluo maó Allahu Taáala wewo. **33** Wau manusia musi motoliángo to Allahu Taáala wolo lealeaatu lohilaalio, wau wolo lealeaatu lo aakalilio, wau wolo totoonulalo lotolio. Wau tio olo musi motoliángo timongotalio debo odelo batangalio lohihilao. Uito lebe mopiohe wolo mopodewo bake yilalango wau babaa-keyaalo wewolio ode Allahu Taáala." **34** Ti Isa loóonto maó deü guru agama boito malo lameto lou mopiohe daá. Wau ti Isa luli lotahuda maó olio, "Yio mabolo ngoilambango mowali pongawaá umati lo Allahu Taáala." Lapataó uito diduü penu boli ngotaa maó tabuheli helo podudulaó lo yiyintu odeli Isa. **35** Tou donggo hemo ngaajali to Bele lo Eeya, ti Isa lohintu maó, "Woloolo mola guguu-ruwaalo agama mowali molojiya deü Olongia Tamoo-poáahua boito, wali mai lei Dauda? **36** Lebe-lebe pomaó tei Dauda lohihilao -- sababu ililiami mai lo Rohullah -- lolojiya, 'Eeya lotahuda ode Eeyaaü: huloóolo to ambahu olowala-U tunggula Wau mohutu mumuu-suumu taáaluku to ole-Mu.' **37** Oditolio wonu tei Dauda molanggula Olongia Tamoo-poáahua boito 'Eeya', diila pongalo aakali Tio wali mai lei Dauda?" Taa dadaata tawoluo to Bele lo Eeya boito hisanangia loódungohe li Isa hemo ngaajali. **38** Tio lotahuda ode limongolio, "Poódaha-dahaalo maó to guguu-ruwaalo agama. Timongolio motohilaa monaó wolo jumba u dahu-dahuhi wau motohilaa hulumatilolio to papaa-taliyaalo. **39** Timongolio motohilaa lotambati u hulu-hulumati todelomo bele potabiaala wau to popoo-tihungguwalo. **40** Timongolio hipo ngakalia tomongo janda wau hemo lambata bele limongolio. Wau u modepuheó ololeeti mongolio boito, timongolio hemoduá huhuulayaá. Hukuumani limongolio de mobuheetaó!" **41** Tou hulohuloáa bubuu-lemenga wolo bulua lodewo to Bele lo Eeya, ti Isa hemo poótuoto tau-tauwalo tahi poluanga doi limongolio ode delomo bulua boito. Dadaata tahi kaayawa helo luangaó doi dadaata; **42** Lapataó janda ngota tamosikini lonaó mai olo. Tio loluangaó dulo pita doi tombaha,



deuïto-yito doi u pulito kikiió halagaalio. **43** Yi ti Isa malo tiangai tahiduduá o-Lio tulusi lotahuda olimongolio, "Poótuota maó utie: Janda tamosikini boito loluango ode delomo bulua boito lebe dadaata louí tiluanguio lo ngoáamila tau-tauwalo wewolio. **44** Sababu timongolio ngoáamila helongohi ololebe lohalata limongolio. Bo janda boito penu boli mosikini tutu longohi maó ngoáamila uwoluo to olio -- tumbaó u palaluolio u potumulo."

**13:1** Tou ti Isa lololaa maó Bele lo Eeya, ngotaalio lo tahiduduá o-Lio loloiya, "Paaá Guru, nte bilohinto mota huhuu-dunguwalo boito. Poótuoti mota totoonula botulio. Donggo boli piohio!" **2** Ti Isa lolametaó, "Yio moóonto mota huhuu-dunguwalo uleidaá boito, diila odito? Diaaluo penu boli ngobotu maó tohudungu boito debo susuusungi to dutualio. Ngoáamila maloloo-hubuolio." **3** Lapataó ti Isa lonaó mola ode Huludu Jaitun, wau lotihuloá totambati u tataalua wolo Bele lo Eeya. Tulusi tei Petrus, Yakobus, Yahya wolei Andreas lonaó mai ode o-Lio mai lobisala wo-Lio tutuuwau. **4** "Nte polelea mai li Paaá olamiaatia," uali mongolio ode o-Lio, "Omolua ngoáamilalo botie mamotoduo mai? Wau tutuuotalo wolo u mopoilaalo mai deú mawakutuulio?" **5** "Poódahailo maó," tametaó li Isa, "diila bolo o aakalialio timongoli. **6** Ngohuntua tamamonaó mai louí momake tanggulu-U wau molojiya, 'Waulo Tio!' tulusi mohimbulo totaa dadaata. **7** Wonu timongoli moódungohe titii-ngoheyalo lo polotuhua wau hahaa-baliyaalo lo popaatea, diila maó oohe. Susuu-aliyaalo boito musi motoduo mai, bo uito diila boliilio deú malei dungga wakutuulio louí kiama. **8** Bangusa tuwau mamó paatea moluwali bangusa wewo. Lipu tuwau mamó lambata lipu uwewo. Boli touitoonu mamotoduo liluhu wau polobiti. Ngoáamilalo boito boheli tumulio wambaó, debo odelo ngongoto u olaasawa lotaabua ngota tamo tohilaa motutu. **9** Timongoli musi mopoódaha-dahaalo maó, sababu timongoli mawaupolio, wau dedeólio ode mamaa-hakamawalo. Timongoli mapateelio to bebee-leyaalo potabiaalo. Timongoli madeloolio mota motaalua wolo tahi kawasawa wau mongo olongia sababu timongoli muri-U. Wau ui-uitolo hiyangi mongoli mongohi sakusi pasali-U ode limongolio. **10** Habari Mopiohe

monto Allahu Taáala boito musí popo loladupo meimulo ode ngoáamila bangusa. **11** Wau wonu timongoli waúpolio wau deloolio ode bubutoó, diila maó polawalo pasali wolo umusi loiya limongoli. Wonu malei dungga wakutuulio u mobisala, loiyaalo maó wolo u poótaa-U mai olimongoli to wakutuulio. Sababu loiya u malapalia maó limongoli diila loiyamu lohihilao bo monto Rohullah wambaó. **12** Tau mamó hiyanati wutatio lohihilao u pateelio mate-mateelo maó. Uito olo u mamotoduo towolota lotiyamo wau walaio. Mongo walaio mamó luwali oliilolio wau oliyamolio, wau mohudu olimongolio u pateelio mate-mateelo maó. **13** Timongoli malonuó lotaa ngoáamila sababu timongoli muri-U. Bo tamooó tahangi demola pulitio, mapo aahuwolo." **14** "Timongoli mamooónto 'Ololeeto u Mongantulu' tihutihula totambati u dinidini olio. (Poéela to tamopobaca: Poótuota maó wolo boliilio!) Tou boito tato Yudea musí tumetaá ode hihui-huideo. **15** Taa toitaato watopo bele diila maó polaahu wau tumuwoto ode delomo bele u mohama hitua-tuawua. **16** Taa woluo to halabolu diila maó pohualingi u mohama jumbalio. **17** Malo moótihela hapato duduu-laheyaalo boito ode taabua ombodaá wau tiilo tadonggo hemo potutu mai lo taunge! **18** Poduáalo mola alihu susuu-aliyaalo boito diila maó motoduo mai tosembo lo polodidi. **19** To duduu-laheyaalo u moótihela hapato boito mawoluo mai tuwaulio osuusa udiipo peénta maó lotoduo, tumulalo mai Allahu Taáala lopowali dunia tunggula botia, wau diilalo motoduo mai poli. **20** Humayaalio Allahu Taáala diila mopolimbuó maasa boito, yi diaaluo penu boli ngotaa maó tamoáahu. Bo kalana umati-Lio, Allahu Taáala mopolimbuó maasa boito. **21** Tou boito wonu tahingota-ngotaawa molojiya olimongoli, 'Bilohi, Olongia Tamoo-poáahua boito woluo tea!' meaalo 'Bilohi, Tio mota teto!' -- diila maó palacayai tau boito. **22** Sababu tahi poáahua paluti wau mongo nabi paluti mamei dungga mai. Timongolio mamó kalaja mai huhuu-tuwaalo upolu-polutuó wau momooó-linggolabeyalo u mohimbulo wonu potala mowali, umati lo Allahu Taáala olo. **23** Oditolio, poódahailo maó! Ngoáamilalo boito mapiloótaa-U olimongoli tou dipolulio mai suáli boito motoduo." **24** "Lapatío maó loui suusa boito, mato lodulahu mamowali modiólomai, wau hulalo diilalo motinelo. **25** Popoo-liyamalo mamobiihuto monto hulungo,

wau tahi kawasawa todulente daá toitaato mamowali ambulati daá. **26** Tou boito Walaó Manusia maóontonga motuhutai monto heengo wolo kawasa leidaá wau odudaá. **27** Tio mamopoáhu mai maaaa-laikatiyalo u mongambu umati tatilulao-Tio monto opato tutulo aalamu, monto huhuudu lodunia ode huhuudu lohulungo." **28** "Hamaawa maó pongaajali monto bungo lo ayu ara. Wonu tangolio kekeei moidu wau moluóyo, wau malo tumbingai, otaawa limongoli deú sembo lo polodulahu malembidei. **29** Odito olo wonu timongoli moóonto susuu-aliyaalo boito motoduo mai, otaawa limongoli deú wakutuulio malembidei daá. **30** Ototai maó! Ngoáamila poloutia botie mamotoduo tou dipolulio mai tau-tauwala tahitumula masaatia botie matepo ngoáamilalo. **31** Hulungo wau dunia mamooli, bo tahuda-U debo ohiheo-hiheolo maó." **32** "Eleponu odito, diaaluo penu boli ngotaa maó tamotota omolua dulahio meaalo omolua jamulio. Maaaa-laikatiyalo tosologa diila motota boli Walaó olo diila motota, bo wambaó Allahu Taáala tamotota. **33** Oditolio timongoli musi mopoó daha-dahaalo maó wau eelailo mola, sababu diila otaawa limongoli omolua wakutuulio. **34** Owowoluwoalio debo odelo ngotaalio tamololaa maó belelio tulusi lonaó ode tambati u molamingo. Tio lopoáhu maó tahi pomayaalio longulusi belelio, wau longohi kalaja ode limongolio ngota-ngota. To tamoodahawa huhebu, tio lolahuli maó alihu mopoódaha tióotutua. **35** Sababu uito timongoli musi mopoódaha-dahaalo maó, sababu diila otaawa limongoli omolua taa ohuuwo lobele boito mamuli mohualingai -- mowaliilio tou lolaango, mowaliilio to tomutaa lou hui, mowaliilio tou molaliyonu, meaalo mowaliilio tou mato lodulahu mobutu mai. **36** Wonu tio debolo meidunggalo mai, diila bolo tio moódungga olimongoli donggo hituluhe. **37** Wolo upilo tahuda-U mai olemu botie, potahuda-U olo ode taa ngoáamila; poódaha-dahaalo maó!"

**14:1** Donggo duuhui mola Dulahu Paska, wau Lameyangi lo Roti Diila Oragi. Mongo iimamu tauwa wau guguu-ruwaalo agama donggo hipololohe dalalo u moheupa li Isa lou poópoóyo, wau momate o-Lio mate-mateelo maó. **2** "Bo diila maó pohutuwonto uito towakutu lameyangi," uali mongolio, "Sababu demaa tumoodei tolonggalo." **3** Tou ti

Isa to Betania, tobele lei Simon taómoóomolu ongongoto lo alipo u moóti hela hapato, taabua ngota lonaó mai ode o-Lio. Tio lodelo mai butulu puwalamu moputió tuwau tuatua yinulo moonu u mahale, pilohutulio lonto waáato u moonu. Tou ti Isa donggo hulo-huloáa hemo lamelo, taabua boito lomoó butulu boito wau loluwataó winulo moonu boito odeitaato lunggongi Isa. **4** Dengolo lota tawoluo teto maloingo wau hipo loiyawa ngota timongota, "Wolo hunalio yinulo moonu boito hepo loyali?" **5** Yinulo moonu boito mowali potali maó wolo halaga lebe lou tolo hetuto doi talaá, wau doilio wohi mota ode taa mosikini!" Yi mailingoa limongolio taabua boito. **6** Boti Isa lotahuda maó, "Hulii maó tio! Yilongola timongoli moposuusa olio? Tio lohutu hitua-tuawua u mopiohu wau mailaba mopiohu ode ola-U. **7** Taa mosikini laito woluo towolota limongoli. Motiidu wakutu wonu timongoli mohuto, timongoli mowali motulungi olimongolio. Bo Wau diila laito peé-peéenta wolimongoli. **8** Taabua botie malohutu wolo u mowali pohutuolio. Tio malo podapato ola-U wolo yinulo moonu u polobungalo ola-U tou diipo wakutuulio. **9** Pomalacayalo! To ngoilanggubu dunia, boli toutoonuu Habari Mopiohe monto Allahu Taáala pololadulo, wau huhutu lotaabua botie masilitaalio olo odelo poéela olio." **10** Lapataó tei Yudas Iskariot, ngotaalio lo tamopulaa duulota muri li Isa, malonaó mola ode mongo iimamu tauwa wolo makusudu mohiyanati li Isa duólo olimongolio. **11** Timongolio sanangi daá loódungohe hihiiile boito, wau lodanti mamongohi maó doi odelei Yudas. Yi tei Yudas olo malopeehu dalalo u lohiiyanati li Isa. **12** Tobohulo dulahu todelomo Lameyangi Roti Diila Oragi -- tou tau hipongolota himba lo Paska -- tahiduduá li Isa malohintu o-Lio, "Toutoonuu otohila li Paaá podapato maó lamiaatia uáalo Paska li Paaá?" **13** Yi ti Isa malo poáhu taduulota limongolio, "Ponaólo ode kota, mola teto talolai ngota tadonggo delodelo ginti tuwau tuatua taluhu, mamoo dunggaya woli mongoli. Dudui maó tio, **14** ode bele u potuwotalio, wau loiyai maó ode taa ohuuwo lobele boito, 'Ti Paaá Guru mohintu, toutoonuu tambati lo tahiduduá o-Lio wau Tio mamolamela uáalo Paska.' **15** Tau boito mamopo bilohei olemu huwali leidaá tuwau toitaato. Huwali leidaá boito malei aatulu, wimu-wimumuto wolo pakaakasilio. Podapato maó ngoáamilalo

mola teto de olanto." **16** Lapatao' taduulota tahiduduá li Isa boito malonaó ode kota. Mola teto timongolio loódungga mola ngoáamilalo lutuuide debo odelo u mapilo tahuda li Isa. Lapatao' timongolio olo malo podapato uáalo Paska. **17** Mahuilio mola, ti Isa lonaó mai wolo tamopulaa duulota tahiduduá o-Lio. **18** Wau tou' timongolio donggo hihuloáa hipolamela, Ti Isa lotahuda maó, "Dungohi mai: ngotaalio towolota limongoli, u masaatia botie hemo lamela peé-peéenta wola-U mamó hiyanati ola-U." **19** Loódungohe uito, tahiduduá li Isa mahi suukalia daá. Tulusi ngota-ngota malohintu maó li Isa, "Tantu diila watia tamilakusudu li Paaá?" **20** Ti Isa lolametaó, "Tio tala ngota limongoli tamopulaa duulota botie tahemo lamela ngopingge wola-U. **21** Memangi Walaó Manusia maamate debo odelo u tulatulade todelomo Kitabi. Bo donggo boli topotalalio taa u mohiyanati Walaó Manusia boito! Lebe mopiohu tio boito wonu diila pilotutulio mai sama-samaata!" **22** Tou' timongolio donggo hipo lamela, ti Isa malohama roti wau loduá losukuru mola ode Allahu Taáala. Lapatao' hepili-pilita-Ngio roti boito wolo uluu-Lio, tulusi yilohi-Lio ode tahiduduá o-Lio wau lotahuda maó, "Hamaawa wau tamelalo, uti-utieelo batanga-U." **23** Lapatao' uito Tio malohama hakati tuwau o angguru. Tio loduá losukuru mola ode Allahu Taáala, tulusi lohudu maó hakati boito ode tahiduduá o-Lio. Lapatao' timongolio ngoáamila malongilu angguru boito. **24** Lapatao' uito ti Isa lotahuda maó, "Uti-utieelo duhu-U u moposaaha daantia lo Allahu Taáala, duhu u tiluwato ode taa dadaata. **25** Pomalacayalo: Wau diilalo mongilu angguru botie poli, tunggula tou' Wau mamongilu angguru u bohu peé-peéenta woli mongoli to Dunia Bohu lo Allahu Taáala li Paapa-U." **26** Lapatao' timongolio lopolahu mola lahu lopoilaalo momuji tuwau. Wau lapatao' uito timongolio malonaó mola ode Huludu Jaitun. **27** Lapatao' ti Isa lotahuda maó olimongolio, "Timongoli ngoáamila matumetaó mololaa maó ola-U. Sababu todelomo Kitabi tulatulade, 'Allahu Taáala mamomate mateelo maó ditilio, wau himbala lohimbalió mamó bubuuálawa.' **28** Bo lapatao' Wau muli bongulo-Lio mai, Wau mamonaó motitimulo woli mongoli ode Galilea." **29** "Diila," tametaó lei Petrus, "huliilo maó timongolio ngoáamila mololaa maó li Paaá, bo watia diila sama-samaata." **30** "Eelai maó," tahuda li Isa, tohui botieelo,

tou maluó diipo mokukuyuu poóluo, yio mapoótolu lomaaha ola-U." **31** Tei Petrus lolametaó wolo mopatato wau moilaalo tutu, "Penu boli watia musi mate peé-peéenta woli Paaá, sama-samaata watia diila tamoloiya deu watia diila moótaawa li Paaá!" Wau tahiduduá o-Lio uwewo loloiya maó odito olo. **32** Timongolio malei dungga mota ode tambati tuwau u ilunte Getsemani, wau ti Isa lotahuda maó ode tahiduduá o-Lio, "Potihuloópo tewe Wau donggo mota modua." **33** Lapataó ti Isa malo tiango olei Petrus, Yakobus, wau lei Yahya lonaó peé-peéenta wo-Lio. Tio masiluukali wau balisa. **34** "Hilaa-U siluukali daá," tahuda maó li Isa olimongolio, "lasaallo debo odelo maamate wambaio. Potitolaapo tewe wau poódaha-dahaalo maó!" **35** Ti Isa malonaó lebe lolaminga ngopeé tulusi leidumulo lomola tohuta wau lodua. Todelomo dua-Lio pilohile-Lio wonu mowali Tio sambelolo moólaasa maó saaati polodutolo boito. **36** "Paapa, oo Paapa," ua-Lio maó, "diaaluo penu boli hitua-tuawua udiila pongalo aakali odeli Paapa. Bintaáalo mola polodutolo botie monto Olaatia. Bo diila moduduó u otohilaa lo Watia bo wambaó u otohilaa li Paapa." **37** Lapataó uito ti Isa luli lohualingai wau loódungga tahiduduá o-Lio donggo hituluhe. Tio malo tahuda odelei Petrus, "Simon, tuutuluhu yio? Bo ngojamu wambaó yio diila lopoódaha-dahaalo maó?" **38** Lapataó ti Isa lotahuda ode limongolio, "Poódaha-dahaalo maó, wau poduaáalo mola alihu timongoli diila moótoduo mai malapo. Memangi rohumu ohilaa mohutu ubanali, bo timongoli diila mambo sababu piili lomanusia boito molulupuhu." **39** Peéentapo ti Isa lonaó mota lodua wolo lohulitaó tataa-heyaaalo u tutuuwauwa. **40** Lapataó uito Tio luli lohualingai poli ode tahiduduá o-Lio wau loódungga olimongolio debo donggo hituluhe, sababu timongolio modiduto daá. Yi didu otaawa limongolio wolo umusi loiya limongolio odeli Isa. **41** Tou ti Isa luli lohualingai ode limongolio umaa otolulio, Tio lotahuda maó, "Debo donggo hituluhe wau hihuheelia timongoli? Malo tuuúde! Malei dungga wakutuulio Walaó Manusia mawuduolio ode ului lotau-tauwalo odusa. **42** Pobongulo, dulo ito monaó. Bilohi! Tau u mohiyanati ola-U malei dungga mai!" **43** Tou ti Isa donggo hemobisala, malonaó mai tei Yudas, ngotaalio lo tamopulaa duulota muri-Lio boito. Peé-peéenta wolio lonaó mai olo ngohuntua tahidelo wamilo wau ayu



ngoputu pongokoó. Timongolio ilahula lomongo iimamu tauwa, guguruwaalo agama wau mongo tauwa lo Yahudi. **44** Tamoo-hiyanatia malolantu maó tuoto tuwau olimongolio. Taa u diilo lowatia, loiyaalio maó olimongolio, "maa Tiolo taulio. Waupa Tio wau deloa maó Tio wolo dudaha u tióotutua." **45** Tou tei Yudas leidungga mai, tulusi tio lonaó mota odeli Isa wau loloiya, "Paaá Guru!" Lapataó tio lodiilaó li Isa. **46** Tulusi tau-tauwalo talonaó mai peé-peéenta wolei Yudas boito malo heupa li Isa wau lomungu o-Lio. **47** Bo tala ngota tawoluo teto lomahuta wamilio wau lolimade wato li iimamu daá tunggula lopitango bulongalio. **48** Lapataó ti Isa lotahuda maó ode limongolio, "Wolo Wau botie tamoleeto, tilinggula timongoli lonaó mai lou hiánunga wamilio wau hideloá ayu pongokoó mai moheupa ola-U? **49** Timiidu dulahu Wau hemo ngaajali to Bele lo Eeya totalu limongoli, wau timongoli diila loheupa ola-U. Bo memangi mawajibulio odito, alihu motoduo mai wolo u tulatulade todelomo Kitabi." **50** Ngoáamila tahiduduá o-Lio tilumeteó lololaa maó li Isa. **51** Taamuda ngota, tabo wambaó pakepake kaingi ngopita u pilolanggu batangalio, loduduá li Isa. Tau-tauwalo ohilaa moheupa olio, **52** bo tio lohinggi kaingilio boito, tulusi tilumeteó lou laalaala. **53** Ti Isa dilelolio ode bele li iimamu daá. Mola teto ngoáamila iimamu tauwa, tauwa lo Yahudi, wau guru lo agama donggo hiambua. **54** Tei Petrus loduduó li Isa lonto u molamingo tunggula tilumuwoto ode delomo paango lobebe li iimamu daá. Mola teto tio lotihuloáa lomatú wawaio totili lotulu peé-peéenta wolo tahi-pokawalia. **55** Mongo iimamu tauwa wau ngoáamila Mahakama Agama hipo tolopania bolo moótapu maó bukuti u mopotala li Isa alihu mowali mopodehu hukuumaní mate to o-Lio. Bo timongolio diila loótapu bukuti boli tuwau maó. **56** Ngohuntua sakusi tatiliangio mai longohi sakusi paluti toli Isa, bo ososakusi limongolio bubuu-lemenga ngota timongota. **57** Lapataó dengolo lota sakusi matilimihulo wau longohi maó sakusi paluti odie pasali li Isa. **58** "Amiaatia loódungohe tau botie loloiya, 'Wau mamopo lohuhu Bele lo Allahu Taála botie u pilohutu lomanusia, wau lapataó todelomo utolo hui mola, Wau mamuli momongu uwewo udiila pilohutu lomanusia.' " **59** Bo u silakusia lotau-tauwala boito olo bubuu-lemenga ngota timongota. " **60** Yi ti iimamu daá matilimihulo totalu

limongolio ngoáamila wau lohintu li Isa, "Wolo Yio diila molameto potuludu u pilotuludi mongolio ole-Mu?" **61** Boti Isa wambaó lotipooyo. Tio diila lolameto sama-samaata. Tulusi ti iimamu daá boito peéntapo lohintu o-Lio, "Wolo maa Yioolo Olongia Tamoo-poáhua, Walaó Allahu Taála Taa Laba-labaalo mantali?" **62** "Waulo Tio," tametaó li Isa, "wau timongoli ngoáamila mamooonto Walaó Manusia motihuloáa to ambahu olowala lo Allahu Taála Taa Laba-labaalo kawasa wau dungga-dungga mai todelomo heengo monto hulungo!" **63** Yi ti iimamu daá malo ngai-ngaidingo boólio wau loloiya, "Diilalo palalu sakusi!" **64** Timongoli malo dungohe lohihilao uiloia-Lio u hemomuayo Allahu Taála. Botia wolo putusanimu?" Timongolio ngoáamilalo malo mutusani maó deú ti Isa ototala wau patuti hukuu-maniyolo mate. **65** Lapataó dengolo lota malonula loiyohu li Isa, wau timongolio lolaúbe mato-Lio wau lomate o-Lio, lapataó loloiya, "Nte lolohe tatoonu talomate ole-Mu?" Tahipokawalia olo loduduó helo laambali li Isa. **66** Tou tei Petrus donggo woluo topaango, tala ngota lotaabua tamoomayawa li iimamu daá lonaó mola odito. **67** Tou loóonto olei Petrus hemomatu wawaio totili lotulu, hepiloó tuotio tióotutua baya lei Petrus wau loloiya maó, "Diila maayio olo tapeé-peénta woli Isa tauo Najaret boito?" **68** Bo tei Petrus lomaahu. "Diila otaawau wau wau diila mongalati wolo makusudumu," ualio ode tamoomayawa boito. Lapataó tei Petrus malonaó mota ode huhebu hulubangi bele li iimamu daá boito. Tou boito olo, maluó malo kuukuyuu. **69** Taabua tamoomayawa boito luli lomiloheó olei Petrus, wau loloiya poli ode tau-tauwalo teto, "Tio memangi tala ngota limongolio!" **70** Bo tei Petrus luli lomaheó. Diila lohiheo lapatio maó, tau-tauwalo teto luli loloiya odelei Petrus, "Diilalo mowali paahulo deú yio memangi tala ngota limongolio, sababu yio lonto Galilea!" **71** Tulusi tei Petrus mahelo taditadia wau loloiya, "Diila otaawa lowatia tahe makusuduo limongoli boito!" **72** Tou boito olo maluó malo kuukuyuu u oluolio. Wau tei Petrus maloéela mola deú ti Isa lotahuda olio, "Tou diipo maluó mokuukuyuu poóoluo, yio mapoóotolu lomahe ola-U." Yi oóodito tei Petrus mahilu moyongo hemo potide-tideó.

**15:1** Donggo didimodupo daa, ngoaamila Mahakama Agama tuotuoto mongo iimamu tauwa, mongo tauwa lo Yahudi wau guguu-ruwaalo agama huaa lodulohupa. Timongolio malomungu li Isa, lapatao lodelo o-Lio wau lohudu o-Lio odelei Pilaatu. **2** Tei Pilaatu malohintu li Isa, "Otutu yio Olongia taulo Yahudi?" "Odi-oditolo loiyamu," tametao li Isa. **3** Mongo iimamu tauwa lopo dudulao dadaata potuludu odeli Isa. **4** Lapatao tei Pilaatu luli lohintu ma'o li Isa, "Diila mohuto Yio molameto? Nte bilohi ngoolo ma'o daatalio u hepilo tuludi mongolio ole-Mu!" **5** Boti Isa sama-samaata diilalo lolameto, tilinggula tei Pilaatu lolinggolabu. **6** To motiidu lameyangi lo Paska biasaalio tei Pilaatu hemo lopato ngotaalio lotaa hitahangia modudu'o otohilaa lotaa dadaata. **7** Todelomo tutupa, towolota lo tahipo malakalawa wau tahi pomatea mate-mateelo ma'o tou otolonggalo, woluo ngotaalio tailunte Barabas. **8** Taa dadaata hiambua wau helohile olei Pilaatu alihu tio molopatao ngotaalio lotahi tahangia debo odelo ubiaasa. **9** Tei Pilaatu malohintu olimongolio, "Mohuto timongoli, malopatou mai olongia taulo Yahudi boito ode limongoli?" **10** Sababu tei Pilaatu mongalati deu mongo iimamu tauwa lohudu mai li Isa ode olio kalana mohiihia. **11** Bo mongo iimamu tauwa helo popatu totaa dadaata alihu mohile ma'o olei Pilaatu molopatao olei Barabas ode limongolio. **12** Yi tei Pilaatu luli loloiya ode taa dadaata boito, "Wonu odito, wolo umusi pohutuwo'u totaa heuntee limongoli Olongia taulo Yahudi boito?" **13** Timongolio malo nguatio, "Salipuwalo Tio!" **14** "Bo wolo ololee-Tio?" ualei Pilaatu, Tulusi timongolio longuatio lebe uda-udaalo ma'o, "Salipuwalo Tio!" **15** Tei Pilaatu ohilaa moposanangi totaa dadaata boito, yi mailopatio tei Barabas boito ode limongolio. Lapatao tio lopoahu tau lomuboaa li Isa, lapatao yiludulio ma'o mota silalipulio. **16** Ti Isa dilelolio mota lomongo pajule ode hudungu lo bubutoo tobele biluloa saaha li gubolonulu. Lapatao ngoaamila pasukani ilambulio mai. **17** Tulusi timongolio lopopake ma'o jumba lailoumu odeli Isa wau lohutu makuta lonto tango kekeei oduhi, lapatao pilopopake limongolio to lunggongi Isa. **18** Lapatao uito timongolio malo salamu o-Lio, "Salamu Olongia taulo Yahudi!" loiya ma'o limongolio. **19** Timongolio lomubohe lunggongi Isa wolo tunggudu, tulusi lonula loiyohu

wau helo sujudu totalu-Lio. **20** Lapatao piloitohi mongolio ti Isa, yilinggi limongolio jumba-Lio lailoumu boito tulusi luli pilopopake limongolio boo-Lio lohihilao. Lapatao dilelo limongolio Tio ode bulemengio mota silalipulio. **21** Tohuungo dalalo timongolio helo makusa ngotaalio lomoota ayu salipu li Isa. Tau boito leitaahua boheli lonto kambungu matumuwoto ode kota (Tanggulio Simon, -- asaliilio mai lonto Kirene -- tiyamo lei Aleksander wolei Rupus.) **22** Ti Isa dilelolio mola ode tambati tuwau u ilunte Golgota, boliilio maó "Tambati lo Bakakau". **23** Mota teto timongolio ohilaa mongohi o-Lio angguru ula-ulau lodamahu moonu, boti Isa diila lohuto longilu angguru boito. **24** Lapatao timongolio malomaku o-Lio to ayu salipu, wau helo laya-layadeo kaingi-Lio wolo undi u lolantu tayadio ngota-ngota. **25** Pilopo salipua o-Lio boito lotoduo tou jamu sambila dimodupo. **26** Toitaato salipu-Lio tiluladi mongolio olo tuladee tomimbihu potuludu ode o-Lio, deuto-yito: "Olongia Taulo Yahudi". **27** Peé-peenta woli Isa hesilaalipu limongolio olo pohehu duulota; ngotaalio to ambahu olowala wau ngotaalio poli to ambahu oloihi-Lio. **28** Loui odito malotoduo mai u tulatulade todelomo Kitabi; deuto-yito: "Tio ilanggapu limongolio leituoto totau-tauwalo tahileeta." **29** Tau-tauwalo tahilaode teto hitahalilia wau hipohinawa li Isa. Timongolio hipoloyawa, "Wuu, Yio taohilaa mopolohubu Bele lo Allahu Taála wau muli momongu maó todelomo utolo hui mola. **30** Ntali polaahei monto ayu salipu boito wau poáahuwalo lohihilao batanga-Mu!" **31** Odito olo mongo iimamu tauwa wau guguu-ruwaalo agama helo hentea li Isa. Timongolio malo loiya ngota timongota, "Tio helo poáahu taa wewo, bo batanga-Lio lohihilao diila mowali poáahuo-Lio! **32** Wonu Tio olongia taulo Isirailu, Olongia Tamoo-poáahua, opiohelio Tio botia molaahi monto ayu salipu boito, alihu oontonga lami wau ami mapalacaya o-Lio!" Tau-tauwalo tahe silaalipu peé-peenta woli Isa boito olo helohina li Isa. **33** Tou mangoputu lodulahu, ngotilonggadu tolo jamu mola hiheolio ngoilanggubu lipu boito malo diolomai. **34** Wau tou jamu tiga lolaango, ti Isa malo nguatio wolo suala daa, "Eloi, Eloi, lama sabakhtani?" u boliilio, "Oo Allahu Taáalaa-U, oo Allahu Taáalaa-U yilongola Allahu Taála lololaa maó olaa-Tia?" **35** Dengolo lota tawoluo teto loodungohe wuwati-lo boito, wau hipo loiyawa,

"Dungohilo, Tio hemo tianga olei Elia!" **36** Ngotaalio limongolio huáa lonaó mota lohama bunga lopatihu, lapataó pilolomolio todelomo angguru molotingo. Lapataó bunga lopatihu boito yilunggoio to ayu ngoputu, tulusi yiludulio mola ode biihu li Isa, wau loloiya, "Wimai maó, demaa bilohento wolo tei Elia mai mopolaheó o-Lio monto ayu salipu boito." **37** Lapataó ti Isa longuatiá mola, tulusi yilate. **38** Lalante untaya-ntayanga todelomo Bele lo Eeya lokaidingo lobutaó duluo monto yitaato demola walungo. **39** Polowila tatihu-tihula totalu lo ayu salipu boito, loóonto maó woloolo mola ti Isa yilate. Polowila boito malo loiya, "Memangi otutu tau botie Walaó Allahu Taáala!" **40** Mota teto woluo olo dengolo lota mongobua tadonggo hemo milohei ngoáamilalo boito monto u molamingo. To wolotalio woluo ti Salome, ti Maria Mahadalena, wau ti Maria tiilo lei Yakobus tamuuda wau ti Yoses. **41** Timongoliolo mongobua talo duduái wau tahelo tulungi li Isa tou Tio to Galilea. Wau woluo ngohuntua olo mongobua wewo teto tamaa lonaó mai ode Yerusalemu peé-peéenta woli Isa. **42** Dulahu mahemo diólomo tou tei Yusu lonto Arimatea lonaó mai. Tio pongawaá lo Mahakama Agama tahe hulumatio lotau. Tio olo donggo hemohima wakutuulio lo Allahu Taáala molumulo momalenta odelo Olongia. Dulahu boito dulahu polo dapato (deúito-yito dulahu tou diipo dulahu Saabati). Sababu uito wolo buheli tei Yusu mota lotaalua wolei Pilaatu wau malohile milate li Isa. **44** Tei Pilaatu lolinggolabe daá loódungohe deú ti Isa mailate. **45** Tou loódungohe dudulohio lo polowila boito, tei Pilaatu lopoluasi maó olei Yusu mota lohama milate li Isa. **46** Lapataó tei Yusu malotali watu lenani u moáaluti wau tou pilopo laahio mai milate li Isa, matilaputio lokaingi boito. Lapataó tio lopo wulideó milate boito tokuubulu tuwau u pilohutu todelomo huludu botu. Lapataó uito tio lopo lilideó botu leidaá tuwau pilopo heúitio tongango kuubulu boito. **47** Sambela uito ti Maria Mahadalena woli Maria tiilo li Yoses helo poótuoto toutoonu ti Isa pilopo wulidio.

**16:1** Tou dulahu Saabati malo paluto, ti Maria Mahadalena, ti Maria tiilo lei Yakobus, wau ti Salome lonaó mota lotali mai pipii-delowaalo u polamahulo tomilate li Isa. **2** Donggo didimodupo daá tou mato lodulahu

lobutu mai, tobohulo dulahu to diminggu boito, timongolio lonaó mota ode kuubulu. **3** Tohuungo dalalo malo loiya timongolio ngota timongota, "Tatoonu tamowali motulungi olanto mopohei botu poheúto tongango kuubulu boito?" Sababu botu boito leidaá tutu. Bo tou timongolio leidungga mota odito, iloontonga limongolio botu boito malo lilidu. **5** Lapataó timongolio tilumuwota mola ode delomo kuubulu boito. Todelomio to ambahu olowala, timongolio maloóonto taamuda ngota pakepake jumba moputió donggo hulo-huloáa, tunggula timongolio iloohea. **6** Taamuda boito loloiya, "Diila oohe! Otaawau timongoli hemo lolohe li Isa taulo Najaret tamaa silalipulio. Tio diaaluo tea. Tio malobongu! Bilohilo maó, utie tambati u pilopo wulide limongolio o-Lio. **7** Botia ponaólo, potunggula maó habari botie ode tahiduduá o-Lio, leituoto tei Petrus. Polelea maó, 'Tio monaó meimulo mola woli mongoli ode Galilea. Mola teto timongoli mamooóonto o-Lio debo odelo u mapilo tahuda-Lio olemu.' " **8** Yi timongolio mailumualai lonto kuubulu boito tulusi hiteteá, sababu iloohea wau diluito. Timongolio diila loloiya wolo-wolo boli olo tatoonu, sababu mailoohe. **9** Mongobua boito lonaó mota odelei Petrus wau mongo sahabatilio, tulusi helo hungguli maó wolo limbulimbu ngoáamila u mapiloótaa mai lo taamuda boito ode limongolio. **10** Lapataó uito, ti Isa lohihilao lotimbulude to tahiduduá o-Lio helo pohabari lonto tiimulu demola otolopa habari u mantali wau bakaa tomimbihu oáahu u ohiheo-hiheolo maó. **11** Bo tou timongolio loódungohe deú ti Isa tumutumulo, wau deú ti Maria maloóonto o-Lio timongolio diila palacaya. **12** Lapataó uito ti Isa lopobilohe batanga-Lio ode taduulota muri-Lio wolo dudelo uwewo. Uito lotoduo tou taduulota boito donggo hinaówa ode kambungu tuwau. **13** Oditolio timongolio luli lohualingai wau helo poótaa suáli boito ode tawewo-wewolio. Bo timongolio diila palacaya. **14** Mapulitio, ti Isa lopobilohe batanga-Lio ode tamopulaa tuwau lota muri-Lio, tou timongolio donggo hipolamela. Tio lohimelu maó olimongolio sababu timongolio diila boti o iimani wau baaangiolo daá tilinggula diila palacaya totaa mahelo oonto lohihilao deú ti Isa tumutumulo. **15** Lapataó ti Isa lotahuda ode limongolio, "Ponaólo ode ngoilanggubu dunia wau pololadelo mola Habari Mopiohe monto



Allahu Taáala boito ode ngoáamila umati lomanusia. **16** Taa diila palacaya mamootapu hukuumani. Bo taa palacaya wau lihualio, mamoaahu. **17** Odelo bukuti deu timongolio boito palacaya, tau-tauwala boito mamopo hinggi rohu u moleeto to tanggulu-U; timongolio mamobisala todelomo bahasa udiila otaawa limongolio. **18** Wonu timongolio modihu tulidu meaalo mongilu peedi, timongolio diila tatopotala. Wonu timongolio mopodutu lo uluu toitaato tau-tauwalo tahi ngongota, tau-tauwalo boito mamoluli." **19** Lapatao ti Isa Eeya helo bisala woli mongolio, Tio bilinta-Io, mola ode sologa. Mola teto Tio momalenta peé-peéenta wolo Allahu Taáala. **20** Yi tahidudua o-Lio malonaó wau lopo loladu habari lonto Allahu Taáala penu boli toutoonu. Wau Eeya olo lodudua lokalaja peé-peéenta woli mongolio wau lopo bukuti maó lotimbulude to momoóo-linggolabeyalo deu polo habari limongolio otutu.

**1:1** Teopiilus taa u obudi, Dadaata tau malo tolopani loluladei wolo aáatulu tomimbihu popoo-loutiyalo u mailowali mai to huungonto. **2** Timongolio loluladu lotuuúde lou u silitalio mai ode olanto lotau-tauwala taloóonto lohihilao popoo-loutiyalo boito monto bohulio, wau lapatao helo pololadu habarilio. **3** Tou watia wolo ulintapo lotulete maó ngoáamilalo boito lonto bohulio, ilanggapu lowatia mopiohu u moluladei podulohu tuwau u aáatulu odeli Tuani. **4** Pilohutu lowatia uito, alihu otaawa maó li Tuani deu wolo u mapilo ngaajali odeli Tuani memangi otutu. **5** Tou tei Herodes lowali olongia tolipu lo Yudea, woluo iimamu ngota tanggulio Jakaria. Tio tuotuoto topalatei lomongo iimamu Abia. Dilelio tanggulio Elisabet, olo wali mai li iimamu. **6** Tutumulo lo motolodile boito moósangi hilaa lo Allahu Taáala. Duduulota modungohe palenta wau butoo lo Eeya wolo lealeaatu lohilao. **7** Timongolio diila owalaó sababu ti Elisabet hunusa wau dudulotalo mapanggola. **8** Tou dulahe tuwau, tou palatei lei Abia lootapu tayadu, tei Jakaria loponao tuugasi debo odelo iimamu totalu lo Allahu Taáala. **9** Wolo undiyani, u biasaalio hepohutuo maó lomongo iimamu, tei Jakaria tilunulio u tumuwoto ode delomo Bele lo Eeya wau molapo alama. **10** Tou upacala pomobuwalo alama donggo naónao, dadaata tahi poduaawa to bulemengio. **11** Tou boito malaikati lo Eeya

lopo bilohei lobatanga odelei Jakaria. Malaikati boito tilimihulo to ambahu olowala lomeja tambati hepo lapowalo alama. **12** Tou tei Jakaria looonto malaikati boito, tio lologu wau yiloohe. **13** Bo malaikati boito loloiya maó, "Diila oohe, Jakaria! Allahu Taaala malo dungohe duamu. Dilemu ti Elisabet mamopotutu mai walaó talolai ngota. Yio musi mongohi maó tanggula olio Yahya. **14** Yio mameengahe tutu wau dadaata tamaa motiwengahe wonu walaó boito de mapotutulio mai! **15** Tio mamowali tau daa moduduó bibilohu lo Eeya, wau tio diila tamongilu angguru meaalo minumani u mototoheto. Anggadu potutuolio mai tio makawasaa lo Rohullah. **16** Dadaata taulo Isirailu mamuli podulungolio ode Allahu Taaala, Eeya limongolio. **17** Tio mamowali utolia lo Eeya tamolotolo wau okawasa debo odelo tei Elia. Tio mamopo damea tiyamo wau walaó, wau taadiila modungohe mamuli podulungolio ode dalalo pikiilangi u otutu. Loui odito tio mopo dapato umati tuwau tomalei dapato ode Eeya." **18** "Woloolo mola pongotaawa lowatia deu suali boito mamowali mai?" yilintu lei Jakaria ode malaikati boito. "Watia mapanggola, wau dile lowatotia olo mapanggola." **19** Malaikati boito lolametaó, "Wau botie Jibrailu. Wau hemomaya to Allahu Taaala wau Tiolo talo poahu mai olau u mopo tunggulai habari mopiohu botie ode olemu. **20** Wolo u mailoiyau mai, mamowali to wakutuulio. Bo sababu yio diila palacaya, yio de diila moó bisala; yio mamowali bubu tunggula wolo uiloiyau boito motoduo mai." **21** Sambela uito, tau-tauwalo tulusi hemohima olei Jakaria. Timongolio lolinggolabe yilongola tio odito hiheolio todelomo Bele lo Eeya. **22** Wau tou yilumualai, tio diila loó bisala ode limongolio. Tio tulusi wambaó hemongohi isalati wolo uluulio, wau debo buubu. Yi tau-tauwala olo lotota maó deu tio maloóonto tuwaulio lo bibilohu todelomo Bele lo Eeya. **23** Lapataó lopulito maasa lo tuugasilio to Bele lo Eeya, tei Jakaria olo lohualinga ode bele. **24** Diila lohiheo lapatio maó, ti Elisabet dilelio maa ilombodaá mai, tulusi lotiulungo todelomo bele limo lohula mola hiheolio. **25** Tio loloiya, "Pulitio maó Eeya malo tulungi mai olaatia wau lolulutaó ohihina laatia." **26** Tou ti Elisabet maa ilombodaá mai wolomo hula, Allahu Taaala lopoahu Malaikati Jibrailu ode Najaret, kota tuwau tomadala lo Galilea. **27** Jibrailu yilao mota lo Allahu Taaala ode tadulahu

ngota, tailunte Maria. Tadulahu boito matitii-lantahe wolo talolai ngota tailunte Yusu, wali li Olongia Dauda. **28** Malaikati boito lonaó mai odeli Maria wau lotahuda maó, "Salamu, yió tabilalakati lo Eeya wolo polu-polutuó! Eeya peé-peéenta wolemu!" **29** Loódungohe tahuda lo malaikati boito ti Maria iloohea, tilinggula mahemo hintu-hintu todelomo hilao wolo makusudu lo salamu boito. **30** Yi malaikati boito lotahuda olio, "Diila oohe, Maria, sababu yió motuuúde wolo hilaa lo Allahu Taáala. **31** Yió maómbodaa mai wau mamopotutu mai taúnge ngota, umusi wohiyamu maó tanggulo Isa. **32** Tio mamowali udaá wau maunteelo Walaó Allahu Taáala Taa Laba-labaalo molanggato. Eeya Allahu Taáala mamopowali o-Lio olongia debo odelo ti Olongia Dauda, nene moyalio. **33** Wau Tio mamomalenta debo odelo olongia to wali mai lei Yako ohiheo-hiheolo maó. Yilaidia-Lio diila taópulitio." **34** "Bo watia donggo tadulahu," uali Maria ode malaikati boito, "woloolo mola suáli boito mamowali mai?" **35** Malaikati boito malo lametaó, "Rohullah mamei dungga mai ode olemu, wau kawasa lo Allahu Taáala mamo henggubei olemu. Uitolo sababuulio walaó tapotutumu mai boito maunteelo Mantali, Walaó Allahu Taáala. **36** Eelai maó: ti Elisabet, ilaatamu boito maa ilombodaa wolomo hula, eleponu tio mapanggola wau tau hipoloiyawa deú tio hunusa. **37** Sababu ode Allahu Taáala diaaluo u diila pongalo aakali." **38** Lapataó ti Maria loloiya maó, "Watia botie wato lo Eeya; hulialo mai motoduo to olaatia debo odelo uiloiyamu." Lapataó malaikati boito malonaó lololaa maó oli Maria. **39** Lolamemeto lapatio maó uito, ti Maria lonaó mola ode kota tuwau to Yudea tomadala hihui-huida. **40** Tio lonaó ode bele lei Jakaria, wau tou tilumuwotaó, tio longohi salamu odeli Elisabet. **41** Wau odito ti Elisabet loódungohe salamu li Maria, walaó tato delomo talomo li Elisabet boito ilumoliyoó. Yi ti Elisabet kiluwasa mai lo Rohullah, **42** tulusi longibode, "Yiólo talaba-labaalo bilalakati mai towolota lo ngoáamila mongobua! Babaa-kakatilo walaó tamaa potutumu mai boito! **43** Tatoonu watia botie tilinggula ti Ibu lo Eeya lonaó mai ode laatia? **44** Odito watia loódungohe salamunto, walaó todelomo talomo lowatia ilumoliyoó yileengahe. **45** Potisangilo tutu yió, sababu palacaya deú wolo u tilahuda lo Eeya olemu boito mamotoduo mai!" **46** Ti Maria

lolojiya, "Hilaa lowatotia momuji mola to Eeya, **47** wau jiwa lowatotia meengahu sababu Allahu Taála Tamoo-poáhua lowatotia. **48** Tio loéelai watotia, Wato-Lio taahina! Tumulalo mai botia ngoámila bangusa hemolojiya watotia sanangi tutu. **49** Sababu Allahu Taála Taa Laba-labaalo kawasa lohutu mai susuu-aliyaalo udaá olo watotia. Mantalilo mola tanggu-Lio. **50** Wali domi wali Eeya lodehu hilao totaa moohe to o-Lio. **51** Wolo uluu-Lio u molotolo wau buheli Tio lopo bubuuáyawa tahi sombongia, wau lopo ambulati patuju limongolio. **52** Mongo olongia yilaa-Hio lonto tambati huhuloá li olongia wau taahina pilopolaió. **53** Taa pola-polaango pilopotolu-Lio wolo totoonulalo u mopiohu, taakaya pilopolahi wolo laulau. **54** Tio lotulungi Isirailu wato-Lio, loduduó danti u pilohutu-Lio woli nenemoyanto. **55** Eeya diila lolipata danti-Lio, Tio ilomura lohilao odelei Abraham wau walilio mola tunggula ohiheo-hiheolo maó." **56** Otanu tolo hula mola hiheolio ti Maria lotibiluloá woli Elisabet, bolo tio lohualinga ode belelio. **57** Malei dungga wakutuulio ti Elisabet u motutu mai. Tio lopotutu mai walaó talolai ngota. **58** Mongo tiheedio wau mongo pohutatalio loódungohe malo odito piohio Eeya toli Elisabet, wau timongolio olo loduduá lotiwengahe wolio. **59** Tou taunge boito o umulu walu hui, timongolio lonaó mai loluuna olio. Timongolio motohilaa mongunte maó taunge boito Jakaria moduduá tangguli paapalio, bo timaamalio lolojiya maó, "Diila! **60** Tio musi wohiyalo tanggula Yahya." **61** "Diaaluo penu boli ngotaa maó monto mongo pohutatamu otanggula odito," uali mongolio olio. **62** Tulusi wolo isalati, timongolio lohintu maó odelei Jakaria tanggula wolo u mawohi maó to walaio. **63** Tei Jakaria malohile botulei tuwau tulusi loluladeó, "Tanggulio Yahya." Timongolio ngoámila lolinggolabe. **64** Tou boito olo tei Jakaria luli lowali lobisala wau lomuji mola Allahu Taála. **65** Mongo tiheedio ngoámila mailoohe, wau habari boito lololadulo mola ode ngoilanggubu madala to hihui-huida lo Yudea. **66** Ngoámila taloo dungohe suáli boito helo hintu todelomo hilao, "De mowali wolo walaó boito?" Sababu Eeya peé-peéenta wolio. **67** Tei Jakaria, tiyamo lowalaó boito, kiluwasa mai lo Rohullah tilinggula tio lopo tunggulo tahuli lonto

Eeya. Tio loloiya maó, **68** "Dulo ito momuji mola to Eeya, Allahu Taaála bangusa lo Isirailu! Tio malei dungga mai lotulungi umati-Lio wau lopobebasi olimongolio. **69** Tio longohi mai olanto tamoo-poáahua tamolotolo boli buheli, wali lei Dauda, wato-Lio. **70** Mulooolio mai daá lotimbuludu tomongo nabi tatilulao-Tio, Eeya malongohi danti-Lio. **71** u mopoáahu olanto monto musunto wau monto kawasa lotau-tauwalo tamolonuó olanto. **72** U mopobilohei omura lohilaa-Lio ode loluhulunto, danti-Lio u mantali boito mapomataa-Lio mai. **73** Tio lotadia tolei Abraham tipaapanto, wau lodanti u mopoáahu olanto monto musunto, alihu ito diila moohe momaya o-Lio, **75** laito taaluku wau hulumati o-Lio wau moposanangi hilaa-Lio ngotupa lo tutumulunto. **76** Yio, wuu walauuu maunteelo nabi Allahu Taaála Taa Laba-labaalo molanggato. Yio yilao leimulo wolo Eeya mai momuó dalalo o-Lio, **77** u mopololadu ode umati-Lio deu timongolio mapoáahuwolo wonu Allahu Taaála malo ngambungu duduu-sawaalo limongolio. **78** Eeyanto mura lohilao wau boli moomonua; huna mopoáahu olanto Tio dungga-dungga mai. Debo odelo mato lodulahu mobutu mai tou dimodupo, **79** odieelo mola Tio mongohi mai baangio to ngoáamila tau tahitumula todelomo u modiolomo wau hiwoohea. Tio modelo olanto ode dalalo udulu-dulunga ode odudame." **80** Walaée Jakaria boito he oduhenga mola udaá wau he oduhenga mola lotolo rohulio. Tio lotibiluloá to huta datahu u luasi daá wau delita, tunggula leidungga wakutuulio tio lopobilohe batangalio to bangusa lo Isirailu.

**2:1** Towakutu boito ti Kaisali Agustus lomalanta alihu ngoáamila tuango lipu bele biluloá saaha li olongia lo Roma modaputali batanga duólo pololeekeni jumula ulipu. **2** Pololeekeni jumula ulipu ubohulio botie pilopo naólio towakutu tei Kirenius lowali gubolonulu tolipu lo Siria. **3** Ngoáamila tau tou boito lotinao-nao mota lei daputali to motiidu kotalio. **4** Tei Yusu olo lomonggato lonto Najaret to Galilea, ode Betlehemu to Yudea, tambati pilotutua li Olongia Dauda; sababu tei Yusu wali mai lei Dauda. **5** Tei Yusu lei daputali woli Maria tilantahio, tadonggo ombodaá. **6** Tou timongolio to Betlehemu malei dungga wakutuulio li Maria u motutu.

**7** Tio lopotutu mai walaó talolai kikiiá ngota walaio tamohuhula daá. Walaó boito dilumumulio wolo kaingi, lapataó pilopo wulidio totambati pongongala lo binatangi u tuatunga laato; sababu timongolio diila loótapu tambati u pohepita limongolio. **8** Tohui boito woluo mongo diti tahipo dahawa hihii-mbaalio to huta luasi u pilobutua huóyoto to madala boito. **9** Debolo malaikati lo Eeya lopobilohei batanga olimongolio wau tinela u mobaango lonto Eeya tinetinela loóbaangai olimongolio, wau timongolio mailoohe daá. **10** Bo malaikati boito loloiya maó, "Diila oohe! sababu wau lonaó mai modelo habari u mopiohu ode limongoli-habari umoó wengahe daá totaa ngoáamila. **11** Todulahe botie tokota lei Dauda mapilo tutulio mai Olongia Tamoo-poáahua olemu deúito-yito ti Isa Almasi, Eeya. **12** Utieelo tuotio; timongoli mamooó dungga taúnge ngota dilumumulio lokaingi, wau wuliwulide to tambati pongongala lo binatangi." **13** Debolo malaikati boito diluduá lo malaikati dadaata wewolio, tahi pomujia Allahu Taáala. Timongolio loloiya, **14** "Ilopujialo mola Allahu Taáala tohulungo u pulito molanggato! Wau toitaato dunia, salaamatilo mola manusia tamopo sanangi hilaa lo Eeya!" **15** Lapataó maaa-laikatiyalo boito lololaa maó olimongolio wau lohualinga mola ode sologa, mongo diti mahipo loiyawa ngota timongota, "Dulo ito ode Betlehemu mola momilohe u mailowali boito upilo tahuda mai lo Eeya olanto." **16** Timongolio huáa lonaó, lapataó maloó dungga oli Maria wolei Yusu wau taúnge boito wuliwulide totambati pongongala lo binatangi. **17** Touí mongo diti boito loóonto taúnge boito, timongolio losilita maó wolo u mapilolele mai lo maaa-laikatiyalo boito pasali lo taúnge boito. **18** Wau ngoáamila tau hilinggolabe loódungohe silita lomongo diti boito. **19** Boti Maria malolahu ngoáamilalo boito todelomo hilaalio wau lo toloéelaó. **20** Mongo diti boito luli lohualinga mota ode huta luasi pilobutua huóyoto sambela hipomujia wau helo polaió Allahu Taáala, sababu ngoáamila u mailo dungohe wau iloontonga limongolio, tiluhata debo odelo uiloiya lo malaikati. **21** Touí tutumu-Lio mawalu hui, Walaó boito tilunaalio. Wau timongolio longunte maó o-Lio Isa, tanggulo uilohi lo malaikati o-Lio touí Tio diipo bilanta liilo-Lio. **22** Malei dungga wakutuulio tei Yusu woli Maria moponaó uúdu pomantaliyalo moduduó butoée Musa. Oditolio timongolio lodelo Walaó



boito ode Yerusalemu mola yiludu ode Eeya. **23** Sababu todelomo Butoó Eeya tulatuladu odie, "Timiidu walaó talolai tamohuhula daá, musi wuduolo ode Eeya." **24** Timongolio olo omakusudu mopodewo bake, deüito-yito ngopanggalo bulungi talakuku meaaló mohelu duluo bulungi poombo udonggo muda, debo odelo u tilantulio todelomo Butoó Eeya. **25** Tou boito to Yerusalemu woluo ngotaalio tanggulio Simeon. Tio taa mopiohu, tamoohe to Allahu Taáala wau donggo hemohima saaátilio Allahu Taáala mopoáahu mai Isirailu. Rohullah wolio, **26** wau Rohullah malo poótaa olio deü tio diila tamate tou diipo moóonto Olongia Tamoo-poáahua tadilanti mai lo Eeya. **27** To potuhata lo Rohullah, tei Simeon tilumuwoto ode Bele lo Eeya. Tou boito tei Yusu woli Maria lopo tuwotaó li Isa, tadonggo ukikiia boito u mohutu upacala u pilomalenta butoó lo agama. **28** Yi tei Simeon lohama maó Walaó boito wau lomuduó o-Lio, tulusi lomuji mola to Allahu Taáala, **29** "Botia, Eeya, Eeya maloéela danti-Mu. Poluliaalo mai wato lo Eeya botie mate maó wolo duóduóoto. **30** Sababu wolo mato lowatotia lohihilao watotia maloóonto Tamoo-poáahua u lonto Eeya **31** Tamoo-poáahua boito mapilo dapato lo Eeya duólo totoonulalo bangusa: **32** debo odelo baango ulopo baangai dalalo babaa-ngusawalo wewo, tau monaó mai ode Eeya; deüito-yito baango u mopotoduo mai ohulumati duólo umati-Mu Isirailu." **33** Tiilo wau tiyamo lo Walaó boito lolinggolabe lodungohe wolo uiloiya lei Simeon pasali lo Walaó limongolio. **34** Tei Simeon lobalakati olimongolio wau loloiya maó odeli Maria, tiilo lo Walaó boito, "Walaó botie maa tilulaotai lo Allahu Taáala u mopobinasa wau mopoáahu dadaata taulo Isirailu. Tio mamowali tuoto monto Allahu Taáala, u matehengia lotaa dadaata, **35** wau lou odito mamó bonggalilo mola tuango hilaa limongolio. Osuukali mamoluhi mai hilaamu debo odelo wamilo u molalito." **36** Woluo olo ngotaalio lonabi taabua tamaa panggola daá. Tanggulio ti Hana, walaée Panuel, lonto suku Aser. Tou mapitu lotaunu mola lonika maó, **37** ti Hana malowali janda, wau botia o umulu walu lopula pato lotaunu. Diila peénta maó tio lololaa Bele lo Eeya. Hui dulahu tio hemo taaluku wau hemo hulumati to Allahu Taáala teto wolo hemoduá wau hemopuasa. **38** Tiluhata tou boito olo tio lonaó mai, tulusi lomuji mola to Allahu Taáala wau helo bisala pasali lo

Walaó boito ode ngoáamila tahipo himawa saaátilio Allahu Taáala mopolopato Yerusalemu. **39** Lapataó tei Yusu woli Maria lopohutu maó ngoáamila upilopo wajibu Butoó lo Eeya, timongolio luli lohualinga ode Najaret to Galilea. **40** Walaó boito heúdaá mola wau molotolo. Tio molinepo daá wau pilonua daá lo Allahu Taáala. **41** Timiidu taunu mongo dulaá li Isa hemonaó mola ode Yerusalemu hemopolame Dulahu Buka Paska. **42** Wau tou ti Isa maa omuulu mopulaa dulo taunu, timongolio lonaó mola ode lameyangi boito debo odelo biaasa to limongolio. **43** Lopaluta mota lameyangi boito timongolio malo hualingo, boti Isa, Walaó boito, donggo lotitola to Yerusalemu, wau diila ilotaawa lomongo dulaá-Lio. **44** Helantobu limongolio deu Tio malo duduái wolo ngopoámbua tau. Lapatio lononaó ngohilayaá lodulahu bolo timongolio lotolopani maó mololohe o-Lio towolota lomongo pohutata-Lio wau tamooáa woli mongolio. **45** Bo timongolio diila loódungga o-Lio, oditolio timongolio malo hualinga ode Yerusalemu mololohe o-Lio. **46** Tou matolohui mola hipololohe, malotapu limongolio Tio todelomo Bele lo Eeya. Tio donggo hulohuloó hemo dungohe guguu-ruwaalo agama wau tinggai hemo hihintua. **47** Ngoáamila tahi dungohe o-Lio hilinggolabe sababu molinepo totoonulalo totame-Tio. **48** Mongo dulaá-Lio olo lolinggolabu loóonto o-Lio. Tiilo-Lio malo loiya o-Lio, "Uuti, yilongola odie huhutuu-Mu to olami? Tiyama-Mu wau tiila-Mu mahilawala hemo lolohe ole-Mu!" **49** Ti Isa lolametaó, "Yilongola tipaapa woli maama hemo lolohe olaa-Tia? Wolo diila otaawa lipaapa wau limaama u Watia musi woluo todelomo bele li Paapa lo Watia?" **50** Bo timongolio diila mongalati u pilolametaó li Isa. **51** Lapataó ti Isa malo hualinga woli mongolio ode Najaret, wau lodungohe olimongolio. Ngoáamila suáli boito hetilahu maó liilo-Lio todelomo hilaalio. **52** Ti Isa helebe udaá mola wau oduhenga tine-Pio, boli pilonua lo Allahu Taáala wau aahudu lomanusia.

**3:1** Totaunu opulaa limolio lo pamalenta li Kaisali Tiberius, tei Pontiu Pilaatu lowali gubolonulu to Yudea, wau tei Herodes hemo malenta to Galilea. Tei Pilipu, wutatei Herodes hemo malenta tomadala lo Iturea wau Trakhonistis, hiambola tei Lisantias hemo malenta to Abilene. **2** Tadihudihu

mongo iimamu daá deüito-yito tei Hanas wolei Kayaapas. Totaunu boitolo Allahu Taáala lotahuda odelei Yahya, walaée Jakaria to huta hungayo u luasi daá. **3** Yi tei Yahya malonaó ode utoonulalo maó to ngoilanggubu madala lo Dutulaa Yordan wau helo potunggulo habari lonto Allahu Taáala. Tei Yahya helo ngibodu odie, "Polilihulo monto duduu-sawaalo limongoli, wau timongoli musi lihuwalo alihu Allahu Taáala mongambungu mai olimongoli." **4** Uito tutuuúde lou tulatuladu todelomo buku li Nabi Yesaya: "Woluo tawuwa-wuwaatiá tohuta hungayo u luasi daá, 'Podapato maó dalalo ode Eeya, popayadu maó dalalo o-Lio. **5** Timiidu lumbaya mamusi tambulalo, timiidu huidu wau huludu popayadulo, Dalalo u hiliú-liúwa mamusi potulidulo wau dalalo u hilinggo-linggotua popayadulo. **6** Tau-tauwala to ngoilanggubu dunia mamooónto Allahu Taáala mopoáahu mai manusia!" **7** Dadaata talonaó mai leilihu olei Yahya. Tei Yahya loloiya ode limongolio, "Timongoli tau moleeto! Tatoonu tahe molojiya deü timongoli moóhuli monto hukumani lo Allahu Taáala udungga-dungga mai? **8** Pobilohe maó wolo huhutuumu deü timongoli malo lilihu lonto duduu-sawaalo limongoli! Diila maó polumulo molojiya deü tei Abraham yito tinenemoyamu. Eelai maó: Monto boboo-tuwaalo botie olo Allahu Taáala mambo mohutu mai wali odelei Abraham! **9** Bulingo malei dapato u poluwodela bungo lo ayu demola wuwa-wuwaátiolo maó. Timiidu bungo lo ayu udiila poótapulalo hungolio u mopiohe maluwodulo wau pomahulolo ode delomo tulu." **10** "Oditolio, wolo u musi pohutuo lamiaatia?" yilintu lotau-tauwalo odelei Yahya. **11** Tei Yahya lolametaó, "Taa u oboó dulopita, musi mongohi ngopita to tadiaaluo; wau taa u o uáalo, musi molayadeó." **12** Tahi potagia beya olo lonaó mai odelei Yahya mai leilihu. Timongolio lohintu maó, "Paaá Guru, wolo u musi pohutuo lamiaatia?" Tei Yahya lolametaó, **13** "Diila polagi lebe dadaata lou wolo uma tilantulio." **14** Woluo olo pajule talohintu maó, "Woloolo mola wolamiaatia? Wolo u musi pohutuo lamiaatia?" Tei Yahya lolametaó, "Diila maó pohama untungi daá penu boli olita wau diila maó polambata doi wolo popoo-tuluduwalo paaluti. Polulilo lohilao wolo wuupamu!" **15** Tou boito tau-tauwalo mahipo hihintua, wolo tei Yahya Olongia Tamoo-poáhua taheimaa limongolio. **16** Uito sababuulio tei

Yahya loloiya maó ode limongolio ngoámila, "Watia mopoliu olimongoli wolo taluhu, bo demaa meidungga mai Taa lebe udaá maó wolaatia. Penu boli bo monguáde tali losapatu-Lio watia diila patuti. Tio mamó polihu olimongoli wolo Rohullah wau tulu. **17** To uluu-Lio otiitihe u polaapalo ngoámila palelio tunggula belesi. Pale maimoo-Lio todelomo yibungo, bo ngoámila taapo mapobuo-Lio todelomo tulu udiila mowali mate!" **18** Odieelo mola tei Yahya helo nasehati totau-tauwala wolo pohuli u hidala-dalaala, tou tio lopo loladu Habari Mopiohe. **19** Bo tei Herodes, takawa-kawasa to Galilea, hedilini lei Yahya tomimbihu ninikatio woli Herodias, dile lowutatio, wau tomimbihu ngoámila ololeeto wewo umaa pilohutulio. **20** Bo tei Herodes tumbaó helo tolongaó totoonulalo ololeetio wolo lopo tuwoto olei Yahya ode delomo tutupa. **21** Lapataó ngoámila tau boito yilihualio, ti Isa olo mailihualio. Wau tou Tio donggo hemoduá, hulungo lohuó, **22** wau Rohullah lotuhutai ode yitaa-Tio debo odelo bulungi poombo, tulusi dungo-dungohei suala lo Allahu Taála lotahuda, "Yiöolo Wala-U tapilonu-U. Yiö moósanangi hilaa-U." **23** Tou ti Isa lolumula kalajaa-Lio, Tio o umulu otanu tolo pulu lotaunu. Moduduó huhama lotau, Tio walaée Yusu, walaée Eli, **24** walaée Matat, walaée Lewi, walaée Malkhi, walaée Yanai, walaée Yusu, **25** walaée Matica, walaée Amos, walaée Nahum, walaée Hesli, walaée Nagai, **26** walaée Maat, walaée Matica, walaée Simeu, walaée Yosekh, walaée Yoda, **27** walaée Yohanan, walaée Resa, walaée Jerubabel, walaée Sealtiel, walaée Ner, **28** walaée Malkhi, walaée Adi, walaée Kosam, walaée Elmadam, walaée Eri, **29** walaée Yesua, walaée Eliejer, walaée Yorim, walaée Matat, walaée Lewi, **30** walaée Simeon, walaée Yehuda, walaée Yusu, walaée Yonam, walaée Elyakim, **31** walaée Melea, walaée Mina, walaée Matata, walaée Natan, walaée Dauda, **32** walaée Isai, walaée Obed, walaée Boas, walaée Salmon, walaée Nahason, **33** walaée Aminadab, walaée Admin, walaée Arni, walaée Hejron, walaée Peres, walaée Yehuda, **34** walaée Yako, walaée Isihaka, walaée Abraham, walaée Terah, walaée Nahor, **35** walaée Serug, walaée Rehu, walaée Peleg, walaée Eber, walaée Salmon, **36** walaée Kenan, walaée Arpakhsad, walaée Sem, walaée Noho, walaée Lamekh, **37** walaée Metusalah, walaée Henokh,

walaée Yared, walaée Mahalaleel, walaée Kenan, **38** walaée Enos, walaée Set, walaée Adamu, Walaó Allahu Taála.

**4:1** Ti Isa kiluwasa lo Rohullah tou Tio lololaa maó Dutulaa Yordan. Rohullah lodelo o-Lio ode huta datahu u luasi daá wau delita. **2** Mota teto Tio yilimontala lo Ibilisi wopato pulu hui mola hihewolio. Ngohilayaó wakutu boito Tio diila lolamela wolo-wolo. Oditolio tou pulitio maó Tio mapilolango. **3** Ibilisi loloiya maó o-Lio, "Yió botie Walaó Allahu Taála, diila odito? Oditolio, nte ahuli maó botu botie mowali roti." **4** Ti Isa lolametaó, "Todelomo kitabi tulatuladu, 'Manusia diila mowali bo tumumulo wolo roti wambaó.'" **5** Lapataó Ibilisi malodelo li Isa ode tambati u molanggato, wau ngointa lomato Ibilisi lopobilohé o-Lio ngoáamila bele biluloá saaha li olongia todunia. **6** "Ngoáamila okokawasa wau okokaya mawuduwoú mai ole-Mu," loiya maó lo Ibilisi odeli Isa, "Sababu ngoáamilalo mailudulio mai olaú wau wau mowali mongohi boli olo tatoonu taóhila wohiyau. **7** Ngoáamilalo boito mamowali miliki-Mu wonu yió taáluku molubo olaú." **8** Ti Isa lolametaó, "Todelomo Kitabi tulatuladu, 'Tubowa mola Allahu Taála Eeyamu wau bayailo Eeya wambaio.'" **9** Lapataó Ibilisi malodelo li Isa ode Yerusalemu wau lopotihula mola o-Lio to bolutuó Bele lo Eeya wau loloiya maó o-Lio, "Yió botie Walaó Allahu Taála, diila odito? Oditolio, potidehulo mola montea. **10** Sababu todelomo Kitabi tulatuladu, 'Allahu Taála mamopoáhu mai maaa-laikati-Lio u modaha ole-Mu mopio-piohulo maó.'" **11** Wau olo, 'Maaa-laikatiyalo mamololimo ole-Mu wolo uluú limongolio, alihu penu boli oáatumu diila meiteduó tobotu.'" **12** Ti Isa lolametaó, "Todelomo Kitabi tulatuladu, 'Diila maó pohimontala Allahu Taála Eeyamu'." **13** Lapataó Ibilisi yilapato lohimontala li Isa wolo totoonulalo dudelolio, tio lololaa maó li Isa wau lohima wakutu u mopiohu. **14** Lapataó ti Isa lohualinga mola ode Galilea; wau Tio kiluwasa maó lo Rohullah. Habari pasali lo batanga-Lio malo loladulo mola ode ngoilanggubu madala boito. **15** Tio helo ngaajali to bebee-leyaalo potabiaala, wau ngoáamila tau hipomujia o-Lio. **16** Ti Isa lonaó mola poli ode Najaret, tambati u pilopo udaá mai o-Lio. Todulahu Saabati, moduduá

obobiasaa-Lio Tio hemonaó ode bele potabiaalo. Tio tilimihula mola u lopobaca maó Kitabi, **17** wau yilohilio o-Lio buku li Nabi Yesaya. Tio lomuó mola lilibu lobuku boito, tulusi ilodungga-Lio ayati botie, **18** "Rohu lo Eeya woluo to ola-U, sababu Tio malo muduó ola-U mopohabari Habari Mopiohe ode taa mosikini. Tio lalao mai ola-U mopo malalumu polobebasi totaa leitawalo wau mopoóluli totaa pitoó: u mopobebasi taa hideehe **19** wau mopohabari dudunggalio mai saaáti lo Eeya mopoáahu umati-Lio." **20** Ti Isa luli lolilibeó buku boito, wau luli lopo walingaó ode tahi otuugasia, lapataó lotihuloó. Ngoáamila taa todelomo bele potabiaala boito lomilohe o-Lio. **21** Wau ti Isa lolumulo lotahuda maó olimongolio, odie, "Aáa-yatiyaala lo Kitabi botie todulahe botie mapiloó polu mai tosaaáti timongoli loódungohe uito." **22** Tataa-heyaaalo u yilapali-Lio mopiohe daá, tilinggula timongolio lolinggolabe wau lodaha o-Lio. Timongolio maloloiya, "Diila bo walaée Yusu Tio botie?" **23** Yi ti Isa lotahuda maó ode limongolio, "Tantu timongoli mamomake lumadu botie ode ola-U, 'Dokuteli, poólulialo maó batanga-Mu lohihilao. Umoo linggolabe u ilodungohe lami u pilohutu-Mu to Kapernaum, pohutuwalu maó olo to pilohuluta loduhu-Mu lohihilao.'" **24** Ti Isa loduhengaó, "Eelai maó, diaaluo nabi tahulumatiolio to kambungu pilohuluta loduhulio lohihilao. **25** Bo dungohe mai: tojamani lei Elia, tou diila dilidia mai tolo taunu wau ngoputu hiheolio, lotoduo mai polobiti daá to ngoilanggubu madala. Tou boito woluo dadaata mongo janda to Isirailu. **26** Openu boli odito, Allahu Taaala diila lopoáhu olei Elia lonaó ode tala ngota lomongo janda boito, bo wambaó ode janda ngota to Sarpat to madala lo Sidon. **27** Odito olo tojamani li Nabi Elisa woluo dadaata tau to Isirailu ongongoto lo alipo u moótihela hapato, bo diaaluo penu boli ngotaa maó limongolio tapiloóluli. Ngopohia tei Naáman taulo Siria boito." **28** Ngoáamila tau tobele potabiaalo boito maloingo daá tou loódungohe suáli boito. **29** Timongolio tilimihula mola wau lopolahi maó li Isa ode bulemengo kota, wau lodelo mola o-Lio ode binggi lohuidee, toutoonu kota limongolio bilongulio. Timongolio omakusudu mohuntude o-Lio ode delomo liito. **30** Boti Isa tilumuwota mota ode taa dadaata boito tulusi lonaó. **31** Lapataó ti Isa lonaó mola ode kota Kapernaum to Galilea. Mola teto Tio helo ngaajali



tau-tauwala todulahu Saabati. **32** Timongolio lolinggolabe loóonto dudelo-Lio loui mongaajali, sababu Tio helo ngaajali wolo tilihula. **33** Mota teto tobele potabiaala woluo ngotaalio takiluwasa lorohu u moleeto. Tau boito wuwa-wuwaatiá, **34** "Wuu Isa, taulo Najaret, wolo umaa pohutuo-Mu olami? Yio dungga-dungga mai mopobinasa olami? Otaawa lami tatoonu Yio botie: Yio botie utolia tamantali lonto Allahu Taaála!" **35** "Poóoyo mola!" antingaó li Isa ode rohu u moleeto boito. "Hinggi maó totau botie!" Tulusi rohu u moleeto boito lopobanti tau boito totalu limongolio ngoáamila, lapataó yilumualo lonto tau boito wau diila lopo ngongoto olio. **36** Ngoáamila tau lolinggolabe wau hipo loiyawa ngota timongota, "Malo odito hebati tahuda-Lio. Wolo tilihula wau kawasa, Tio lomalenta roroo-huwaalo u moleeto yilumualo, wau timongolio yilumualaó olo!" **37** Yi habari pasali li Isa malo loladulo mola to ngoilanggubu lipu boito. **38** Ti Isa lololaa maó bele potabiaalo boito, tulusi lonaó ode bele lei Simon. Moluhengee Simon taabua mongongoto he huhulolio, wau tau-tauwalo malo poótaa suáli boito odeli Isa. **39** Ti Isa lonaó mota ode tambati potuluhe li ibu boito, tulusi lopoáhu maó huhulo boito. Huhulo boito yilooli, wau tiilo moluhengee Simon lato lobongu mola wau lohinta maó olimongolio. **40** Toui dulahee donggo tulotulopa mota, ngoáamila tau helodelo mai odeli Isa mongo wutatio tahi ngongota tilolahepaalo ngongoto. Ti Isa helo podutu uluu-Lio toitaati mongolio ngota-ngota wau lopoóluli olimongolio. **41** Roroo-huwaalo u moleeto boito olo yilumualaó lonto taa dadaata boito, sambela wuwa-wuwaatiá, "Yioólo Walaó Allahu Taaála!" Boti Isa longantinga olimongolio wau lodini olimongolio mobisala, sababu otaawa limongolio deú Tiolo Olongia Tamoo-poáahua. **42** Toui dulahee butubutu mai ti Isa lololaa maó kota boito tulusi lonaó mota ode tambati tuwau udiila otau. Tau-tauwalo mahemo lolohe o-Lio, wau toui timongolio loódungga o-Lio, timongolio lotolopani alihu Tio diila tamololaa maó olimongolio. **43** Boti Isa lotahuda maó, "Habari Mopiohe pasali woloolo mola Allahu Taaála momalenta musi pohabariyo-U olo to kokoo-tawaalo, sababu duólo ui-uitolo Allahu Taaála lolao mai ola-U ode dunia." **44** Sababu uito ti Isa helo hutuba todelomo bebee-leyaalo potabiaala to ngoilanggubu lipu lo Yudea.

**5:1** Toui wakutu tuwau, ti Isa tilimihulaó to pentadu lobulalo Genesaret. Dadaata tahipo huhuuntula motohilaa modungohe habari monto Allahu Taaála. **2** Ti Isa loóonto mota bulotu mohelu duluo to pentadu boito; tahi pahalalio malolaahei lonto bubuu-lotuwalo boito wau donggo hiponguloa pajala limongolio. **3** Ti Isa lobotulaó ode tala tuwau lobulotu, deüito-yito bulotu lei Simon, lapataó lopoáhu olei Simon lohuntudeó bulotulio boito lolamingo ngopeé lonto pentadu. Ti Isa malo tihuloó todelomo bulotu boito wau helo ngaajali taa dadaata. **4** Lapataó mailapato longaajali, Tio lotahuda maó odelei Simon, "Biteyalo mota ode tambati ulebe modelomo, wau pomahula mota pajalamu u moheúpaá tola." **5** "Paaá Guru," tametaó lei Simon, mailo-ilonua mongo watotia hipo kalajawa tióopatea, bo diila loátapu wolo-wolo! Bo sababu ti Paaá talo poáhu, mopiohulo; watotia mamuli mopo loladeó pajala botie." **6** Lapataó timongolio lopohutu maó uito, timongolio maloótapu mai dadaata daá tola tunggula pajala limongolio malo kaidingo. **7** Sababu uito timongolio lohile tulungi tomongo sahabati limongolio tobulotu uwewo. Mongo sahabati limongolio boito lonaó mai tulusi peé-peéenta woli mongolio loluwangaó bulotu boito duuduluo tunggula lopolu wolo tola tilinggula bubuu-lotuwalo boito ngopeé loáhumo. **8** Toui tei Simon loóonto maó uito, tio malo sujudu mola totalu li Isa, tulusi loloiya maó, "Tolailo maó watotia, yaa Eeyau! Sababu watotia taa odusa!" **9** Tei Simon wau ngoáamila tapeé-peéenta wolio lolinggolabe loóonto maó dadaata tola uilaúpo limongolio. **10** Odito olo wolo mongo sahabati lei Simon, deüito-yito tei Yakobus wolei Yahya, mongo walaée Jebedeus. Ti Isa malo tahuda odelei Simon, "Diila maó oohe! Tumulalo mai botia yió mamowali tamoo-majalawa tau." **11** Tei Simon wau mongo sahabatilio malo dedea mota bubuu-lotuwalo boito ode pentadu, lapataó lololaa maó ngoáamilalo, tulusi loduduó li Isa. **12** Toui dulahee tuwau, ti Isa woluo tokota tuwau. Mola teto woluo talolai ngota u wawaio polupolu wolo ngongoto lo alipo u moótihela hapato. Toui loóonto li Isa, tio losujudu lomola totalu li Isa, sambela lomolohone maó, "Paaá, wonu ti Paaá mohuto, ti Paaá moó poluli mai olo watotia!" **13** Ti Isa loleyapu maó tau boito wau lotahuda, "Wau mohuto polulilo! To saaati boitolo ngongotio loluli. **14** Lapataó ti Isa lodini tau boito mohungguli

suáli boito penu boli olita, tahuda-Lio maó, "Ponaólo mota odeli iimamu, wau pohilea maó olio u molantu mai deú yió maloluli. Lapataó ponaólo mopodewo bake debo odelo u pilomalanta lei Musa, debo odelo bukuti totau-tauwalo deú yió tutuulio tutu maloluli." **15** Bo habari pasali li Isa bo lebe helo loladulo mola ode tilolahepaalo maó, wau dadaata tahi ponaówa mai modungohe o-Lio wau mai lei pooluli ngongoto limongolio. **16** Lapataó uito ti Isa malonaó mota loduá totambati udiila otau. **17** Todulahee tuwau tou ti Isa donggo hemo ngaajali, woluo dengolo lota taulo Parisi wau guguu-ruwaalo agama hihuloáa teto. Timongolio lonaó mai lonto Yerusalemu, lonto kokoo-tawaalo to Galilea wau Yudea. Kawasa lo Eeya woluo toli Isa u mopoóluli tahi ngongota. **18** Tou boito dengolo lota talonaó mai lodelo ngotaalio tadidu mowali monaó bala-balata toitaato amongo. Timongolio helo tolopani modelo mota tau boito ode delomo bele alihu mowali mopo balataó olio totalu li Isa. **19** Bo sababu tau malo odito daatalio mola teto, yi timongolio diila lowali lopotuwoto olio. Masababu uito timongolio lopo botula mola olio odeitaato watopo lobebe. Lapataó timongolio lomonggali gentengilio, wau lopolaathe mola olio peé-peéenta wolo amongio totalu li Isa tohuungo lotaa dadaata boito. **20** Tou ti Isa loóonto malo odito udaá iimani limongolio, Tio lotahuda maó ode tau boito, "Wutato, dusamu maa ilambungu." **21** Guguu-ruwaalo agama wau tau-tauwalo Parisi malo loiya ngota timongota, "Tatoonu tau botie buheli Mohina Allahu Taáala? Tatoonu tamowali mongambungu dusa, ngopohia Allahu Taáala lohihilao?" **22** Otaawa li Isa yiyintu limongolio boito. Oditolio Tio lotahuda maó, "Yilongola timongoli helohintu odito todelomo hilaamu? **23** Toonu ulebe gambangi, molojiya maó, 'Dusamu maa ilambungu', meaalo molojiya maó, 'Pobongulo wau ponaólo'? **24** Bo botia mapo bukutiyo-U mai olimongoli deú toitaato dunia botie Walaó Manusia okawasa mongambungu dusa." Lapataó ti Isa lotahuda ode tadidu mowali monaó boito, "Pobongulo, wau bintaáalo tambati pilo tibalatamu, wau pohualingolo!" **25** Lolamemeto tau boito lobongu mola totalu limongolio ngoáamila, tulusi lomintaó tambati pilo tibalatalio, wau lohualingo sambela hemomuji Allahu Taáala. **26** Timongolio ngoáamilalo lolinggolabe daá tulusi helomuji Allahu Taáala.

Wau wolo laasa yiloohe, timongolio hipoloiyawa, "Moólinggolabe daá poloutia u silakusiyanto todulahe botie!" **27** Lapataó uito ti Isa yilumualao wau loóonto ngotaalio tamootagia beya, tanggulio Lewi, donggo hulohuloáa to kantolilio. Ti Isa lotahuda maó olio, "Duduilo mai Wau." **28** Tei Lewi tilimihulo wau lololaa maó ngoáamilalo, tulusi loduduó li Isa. **29** Lapataó uito tei Lewi lohutu potihunggu tobelelio odeli Isa. Dadaata tamootagia beya wau tau-tauwalo wewolio loduduá lolamela peé-peéenta woli mongolio. **30** Dengolo lota taulo Parisi wau guguu-ruwaalo agama diila sanangi, tulusi loloiya maó odeli Isa, "Yilongola timongoli ngoáamila lolamela longilu wolo tamootagia beya wau tau-tauwalo tadiila hipiohe?" **31** Ti Isa lolametaó, "Taa seehati diila momalalu dokuteli; bo taa mongongoto wambaó. **32** Wau lonaó mai diila motianga tahi ponganggapua batangalio malopiohe, bo tahi oduusawa alihu timongolio molilihu monto duduu-sawaalo limongolio." **33** Tau-tauwala loloiya maó odeli Isa, "Tahiduduá olei Yahya wau tahiduduá totau-tauwalo Parisi tingga maito hemopuasa wau hemoduá. Bo tahiduduá ole-Mu hemolamelo wau hemongilu." **34** Ti Isa lolametaó, "Wolo timongoli mowali mopoáhu to tahe tiloduo mopuasa to potihunggu lonika, ngotilonggadu tibulentiti lai donggo peé-peéenta woli mongoli? Tantu diila! **35** Bo mamei dungga wakutuulio bulentiti lai boito mahamaalio monto olimongolio. Tou boitolo timongolio mamopuasa." **36** Lapataó ti Isa losilita maó olimongolio pohumaya botie, "Diaaluo tau momambola boó deedelo wolo kaingi ngopita monto boó u bohu. Sababu tio moó kaidingo boó u bohu boito. Donggo poli kaingi u pomambolo u donggo bohu boito diila motuuúde wolo boó u deedelo. **37** Odito olo diaaluo tau moluwato angguru bohu ode delomo bututu lowalito u deedelo, sababu angguru bohu boito mamooó sababu bututu boito mobutaó. Yi anggurulio mohuáyade, wau bututulio moáantulu. **38** Angguru u bohu musi tuwangolo ode delomo bututu u bohu olo. **39** Odito olo diaaluo tau mohuto mongilu angguru bohu lapataó mongilu angguru deedelo, 'Angguru deedelo boito lebe mopiohe,' ualio maó."

**6:1** Todulahu Saabati tuwau, tou ti Isa yilumaode to halabolu lopale

ngopita, tahiduduá o-Lio lolipu pale. Timongolio lohudedu pale boito wolo uluú, lapataó tilameli mongolio. **2** Dengolo lota taulo Parisi loloiya maó "Yilongola timongoli lolambanga bubuu-toówaalo agamanto wolo lohutu u dinidini todulahu Saabati?" **3** Ti Isa lolametaó, "Diipo peéenta timongoli lopobaca pasali u pilohutu lei Dauda, touí tio wau taulio pilolaango? **4** Tio tilumuwoto ode delomo Bele lo Eeya wau lohama roti umaa pilodewolio ode Allahu Taáala, lapataó pilolamelio. Lapataó yilohilio olo roti boito ode tau-aulio. Lebe-lebe pomaó moduduó butoo lo agamanto, bo mongo iimamu wambaó tamowali molamela roti boito." **5** Lapataó ti Isa lotahuda maó, "Walaó Manusia okawasa todulahu Saabati!" **6** Todulahu Saabati tuwau uwewo, ti Isa lonaó mota longajali tobele potabiaalo. Teto woluo taa uluúlio yilate ngotuwali. **7** Dengolo lota guru lo agama wau taulo Parisi motohilaa mopeehu totala li Isa alihu mowali mopodulohe o-Lio. Oditolio timongolio tulusi hemo poótuoto o-Lio wolo Tio mamó pooluli tau todulahu Saabati. **8** Bo otaawa li Isa pikiilangi limongolio. Yi Tio lotahuda maó ode taa uluúlio yilate ngotuwali boito, "Dulo tihulai teea totalu!" Tau boito malobongu, tulusi tilimihulaó teto. **9** Lapataó ti Isa lohintu maó totau-tauwalo tawoluo teto, "Moduduá lo agama, ito mowali mohutu wolo todulahu Saabati? Mohutu u mopiohu meaalo mohutu u moleeto? Mopoáahu tau meaalo mopoó topotala?" **10** Ti Isa lomiloheó palitio limongolio ngoáamila, tulusi lotahuda ode tau boito, "Wudua mai uluúmu." Tau boito malohudu uluúlio, wau uluúlio tulusi loluli. **11** Bo guguu-ruwaalo agama wau tau-tauwalo Parisi boito loingo daá, wau lolumula lodulohupa tomimbihu wolo u mowali pohutuo limongolio li Isa. **12** Tou boito ti Isa lotaódee huludu tuwau mola loduá. Teto Tio loduá mola ode Allahu Taáala ilo-iloona. **13** Tou dulahee malobaango, Tio lotiangai tahiduduá o-Lio, tulusi lolulaoto mopulaa duulota lonto olimongolio. Tio longunte maó tamopulaa duulota boito mongo rasulu. Timongolio boito deuító-yito. **14** Simon (tailunte olo Petrus), wau Andreasi wutatee Simon; Yakobus wau Yahya, Pilipus wau Bartolomeus, **15** Matusi wau Tomas, Yakobus walaée Alpeus, wau Simon (tailunte Patriot), **16** Yudas walaée Yakobus wau Yudas Iskariot talapatio maó lowali tamoo-hiyanatia. **17** Lapatio maó ti Isa lotuhutai lonto huludu boito peé-peéenta wolo mongo

rasulu boito, tulusi lohuheli wau tilimihulo totambati tuwau u datadatahu. Teto woluo olo ngojumula daá tahiduduá o-Lio uwewo wau dadaata tau lonaó mai lonto utoonulalo maó to ngoilanggubu Yudea, Yerusalemu, wau kokoo-tawaalo Tirus wau Sidon u tobiihu deheto. **18** Timongolio mai lodungohe li Isa, wau piloóluli-Lio lonto tilolahepaalo ngongoto limongolio. Timongolio tailo tuanga lorohu u moleeto lonaó mai olo wau piloóluli-Lio. **19** Ngoáamila tau hipo tolopania modedeta li Isa, sababu woluo kawasa u yilumualai lonto batanga-Lio u helo pooluli maó olimongolio ngoáamila. **20** Ti Isa lomiloheó tahiduduá o-Lio tulusi lotahuda maó, "Potisanangilo tutu timongoli tahi mosikinia, sababu timongoli yito pongawaá umati lo Allahu Taáala! **21** Potisanangilo tutu timongoli tahi polaanga masaatia; timongoli mapo butuhu-Lio! Potisanangilo tutu timongoli tahe hiyonga masaatia; timongoli mamoiiii! **22** Potisanangilo tutu timongoli wonu lonuólio, potoulilio, hinaalio wau pitanaalio sababu Walaó Manusia! **23** Mongo nabi tojamani muloololio mai hepilo hutulio odito olo. Wonu suáli boito motoduo mamusi timongoli motiwengahe mola lohilao wau mongelungo wolo wengahe, sababu udaá wuupa u pilopo dapatio olimongoli tosologa. **24** Bo matopotala timongoli tahi kayaawa masaatia botie; sababu timongoli maloólaasa oniimatilio! **25** Matopototala timongoli tahi buutuhe masaatia botie; sababu timongoli mapolangolo! Matopototala timongoli tahi poiiiya masaatia botie; sababu timongoli maa osuukalia lohilao wau humoyongo! **26** Matopotala timongoli, wonu ngoáamila tau momujimu; sababu odito olo tinenemoya limongolio helomuji mongo nabi paaluti tojamani muloololio mai." **27** "Bo toli mongoli tamodungohe ola-U masaatia botie, Wau mongohi mai tahuli odie; toliánga maó timiidu musumu, wau pohutua maó umopiohe totaa molonuumu. **28** Balakatia maó tamolaánati olemu, wau duái mola tamohutu umoleeta olemu. **29** Wonu tau molambali putongimu u ngotuwali hulii maó tio molambali putongimu u ngotuwali olo. Wonu jumbamu wahuwolio, wohia maó olo boómu. **30** Wonu woluo taa mohile hitua-tuawua to olemu; wohia maó uito olio; wau wonu hakuumu wahuwolio, diilalo maó pohilea. **31** Pohutua maó taawewo debo odelo otohilaa limongoli pohutuo mai limongolio. **32** Wonu timongoli motoliángo totau-



tauwala bo wambaó totaa motoliangi mongoli, wolo huhutuumu u mopiohu? Tahí oduusawa olo motoliango totaa hipo toliangawa olimongolio! **33** Wau wonu timongoli mohutu maó mopiohu bo totau-tauwalo hipohutua u mopiohu to olemu wambaó, wolo huhutuumu u mopiohu? Tahí oduusawa olo hipohutua odito! **34** Wau wonu timongoli bo mopobulota doi totau-tauwalo tamoó powalingai, wolo huhutuumu u mopiohu? Tahí oduusawa olo hemo pobulota doi totaa odusa, lapataó muli pohileelio. **35** Musiilio diila odito! Timongoli boliio maó musí motoliango musuumu wau mohutu u mopiohu toli mongolio. Timongoli musí mopobulotaó, wau diila maó pahalapu muli powalingolio mai. Wonu odito, wuupamu maúdaá wau timongoli mamowali mongo walaó Allahu Taáala Taa Laba-labaalo molanggato. Sababu Allahu Taáala mopiohe hilaa ode taa diila motota mongohi sukuru, wau ode taa moleeto olo. **36** Mamusi timongoli odehu hilao debo odelo ti Paapamu olo odehu hilao!" **37** "Diila maó pomutoó taawewo, alihu timongoli lohíhilao olo diila butoó lo Allahu Taáala. Diila maó pohukumani taawewo, alihu timongoli lohíhilao olo diila hukumanio lo Allahu Taáala. Ambungua maó taawewo, alihu Allahu Taáala olo mongambungu olimongoli. **38** Pongohi maó ode taawewo, alihu Allahu Taáala olo mongohi mai olemu; timongoli mamó lolimo wowohi dadaata tutu umaá tilimengio wobuwobuoó olemu. Sababu titimenga u pomake limongoli ode taawewo mapomake lo Allahu Taáala olemu." **39** Lapataó ti Isa losilita maó olimongolio pohumaya u wumbutio mola botie, "Wonu taapitoó modedeá taapitoó uwewo, tantu duduulotalo mamodehu ode delomo tanggi. **40** Diaaluo muri talebe udaá wolo gurulio. Bo muri tamai lapato lóbalajali, mamowali tutuuwauwa debo odelo gurulio. **41** Yílongola timongoli moóonto pulingo ayu todelomo mato lo wutatumu, hiambola balaki u tomatomu lohíhilao diila poótuoto limongoli? **42** Woloolo mola timongoli mowali molojiya ode wutatumu, 'Dulo, wutato, yinggilou mai pulingo ayu boito monto matomu boito,' hiambola todelomo matomu lohíhilao woluo balaki udiila oontonga limongoli? Wuu taa munapiki! Yinggilapo balaki uwoluo todelomo matomu lohíhilao. Deúito timongoli mowali moóonto wolo mopatato wau mowali mohinggi pulingo ayu monto mato lo wutatumu." **43** "Bungo lo ayu u molomiodu diila

mongohi hungo u moleeto. Odito olo bungo lo ayu udiila molomiodu diila mongohi hungo u mopiohu. **44** Timiidu bungo lo ayu oonuhe monto hungolio. Pilomulo aáayuwalo kekeei wau hiwoopawa u oduhi diila mongohi hungo lo ara, wau diuto oduhi diila mongohi hungo lo angguru. **45** Taa mopiohe mopobilohe susuu-aliyaalo u mopiohu sababu hilaalio polupolu lou mopiohu. Taa moleeto mopobilohe susuu-aliyaalo u moleeto sababu hilaalio polupolu lou moleeto. Sababu wolo u wulito lotunggilo ui-uitolo u lumepetai monto hilao." **46** "Yilongola timongoli mongibode ola-U, 'Eeya, Eeya,' bo diila mopohutu maó wolo upilo tahuda-U mai olemu? **47** Wolita mowali potutuu-wauwonto tahi ponaówa mai ode ola-U, wau modungohe tahuda-U wau mopohutu maó? -- Mopiohulo Wau mopoilalo mai olemu --. **48** Tio debo odelo taa u tou momongu bele mongaude modelo-delomolo maó, lapataó mohutu pandemenilio tobotu. Tou woluo taluhe daá wau taluhu dutula molemba bele boito, bele boito diila mowali moéetu, sababu mabilongu toitaato pandemeni u mopiohe. **49** Bo taa modungohu tahuda-U wau diila mopohutu maó, deúito-yito debo odelo ngotaalio tamomongu bele diila opandemeni. Wonu taluhee daá molemba, bele boito huáa mololohubu; wau antululio boito laba-labaalo daá!"

**7:1** Lapataó mailapato lotahuda maó susuu-aliyaalo boito ode taa dadaata, ti Isa lonaó ode Kapernaum. **2** Teto woluo polowila lo Roma owato taa otoliángio daá. Wato boito mongongoto wau ngopeeé yilate. **3** Tou polowila boito loódungohe pasali li Isa, tio lopoáhu dengolo lota tauwa lo Yahudi lonaó ode o-Lio mota lohile alihu Tio monaó mai mopoóluli watolio. **4** Tou leidungga mota odeli Isa tau-tauwalo boito malo laba-labaalo lomolohone alihu Tio motulungi polowila boito. "Polowila botie patuti tulungia maó li Paaá," uali mongolio odeli Isa, **5** "sababu tio motoliángo bungusanto wau malomongu bele potabiaalo ode lamiaatia." **6** Yi ti Isa malonaó pee-peeenta woli mongolio. Tou ti Isa ngopeeé meidungga mota tobele boito, polowila boito lolao mongo sahabatilio ode o-Lio mai lolojiya maó, "Sambelolo ti Paaá susasusa monaó mai ode bele laatia. Watia diila patuti mololimo li Paaá tobele lowatia. **7** Uito sababuulio watia lohihilao

diila buheli motaalua woli Paaá. **8** Sababu watia olo taaluku topalenta lotaa toitaato lowatia wau totibawa lowatia woluo olo mongo pajule tamusi taaluku topalenta lowatia. Wonu watia mopoáhu pajule ngota, 'Monaó!' tio olo monaó; wau wonu watia molojiya ode tawewo, 'Odia mai!' tio olo monaó mai. Wau wonu watia momalenta wato lowatia, 'Pohutua maó utie!' tio olo mopohutu uito." **9** Ti Isa lolinggolabe loódungohe uito. Tio loili maó wau lotahuda ode taa dadaata tadonggo hiduduá o-Lio, "Malo moólinggolabe tau botie. Penu boli towolota taulo Isirailu diipo peéenta maó Wau loódungga iimani debo odelo utie udaálio!" **10** Tou tau-tauwalo tahe ilahulalio boito luli lohualingai ode bele lo polowila boito, wato boito maloluli. **11** Diila lohiheo lapatio maó, Ti Isa lonaó ode kota Nain. Tahiduduá o-Lio wau taa dadaata lonaó wo-Lio. **12** Tou ti Isa leidungga totili huhebu hulubangi lokota, tau-tauwalo donggo hemo depita milate ode bulemengo kota. Tailate yito walaó talolai, walaó bo tuwa-tuwaulo ngotaalio lojanda. Dadaata tuango lipu lokota loduduó woli Ibu boito. **13** Tou ti Isa loóonto taabua boito, Tio malomonu tulusi lotahuda maó, "Diila hiyongo, Ibu!" **14** Lapataó ti Isa lodudulaó ode huhulihe lo tailate boito wau lodedetaó. Yi tahi pohulihe malo huheli. Ti Isa lotahuda maó, "Wuu tabohulotau, Wau mohehulai olemu pobongulo!" **15** Tabohulotau tamailate boito, lobongu lotihuloá wau malo bisala. Yi ti Isa malohudu olio odeli maamalio. **16** Ngoáamila tau mailoohe wau mahi pomujia Allahu Taáala. Timongolio lolojiya, "Ngotaalio lonabi daá maa yilumenetai tohuunginto! Allahu Taáala maledungga mai mopoáahu umati-Lio!" **17** Habari pasali li Isa botie lololadulo mola to ngoilanggubu Yudea wau madala topalitio. **18** Tahiduduá olei Yahya lopoótaa maó olei Yahya ngoáamila u mailowali boito. Yi tei Yahya malo tiangai duulota tahiduduá olio, **19** tulusi lopoáhu olimongolio odeli Isa wau lohintu, "Ti Paaá tamaa meidungga mai moduduó danti lo Allahu Taáala, meaalo mamusi amiaatia mohima mai ngotaalio wewo?" **20** Taduulota tahiduduá olei Yahya boito lonaó odeli Isa wau malo loiya, "Tei Yahya Tamopolihua lopoáhu olamiaatia mai mohintu toli Paaá, wolo ti Paaá tamaa meidungga mai moduduó danti lo Allahu Taáala, meaalo amiaatia mamusi mohima mai taa wewo?" **21** Towakutu boito, ti Isa helo pooluli taa dadaata, wau

lopolahi dadaata rohu u moleeto, wau lohutu tahi piitoá lowali loóonto. **22** Oditolio ti Isa lolametaó, "Pohualingolo mola odelei Yahya wau poótaa maó wolo u iloontonga wau ilodungohe limongoli: taa pitoó loóonto, taadidu mowali monaó malowali lonaó, taa ongongoto lo alipo u moótihela hapato maloluli, taa bungolo maloó dungohu, taa yilate luli tilumumulai, wau Habari Mopiohu lonto Allahu Taáala pilopo habari totaa himosikinia. **23** Potisanangilo tutu taa diila o alaasani u diila mololimo ola-U." **24** Lapatio maó mongo utolia lei Yahya boito lonaó, ti Isa lolumulo lotahuda totau-tauwalo pasali lei Yahya, tahuda-Lio maó, "Timongoli lonaó ode huta datahu u luasi daá wau delita udelita mola lomilohe wolo? Huóyoto ngopata u hiliipa lodupoto? **25** Timongoli lonaó mola lomilohe wolo? Ngotaalio tapake-pake lou mopiohu? Tau-tauwalo tahapakea uóditu wau tatumu-tumulo dadaata ngoáamilalo bilubiluloá tobele biluloá saaha li olongia! **26** Oditolio, timongoli lumualo mola lomilohe wolo? Mola lomilohe nabi ngota? Otutu, tumbaó bo lebe maó lonabi ngota. **27** Sababu tei Yahya boi-boitolo tamilakusudu todelomo ayati lo Kitabi botie, 'Tabotieelo utoliya-U,' tahuda lo Allahu Taáala, 'Wau mamolao mai olio meimulo wole-Mu, alihu tio momuó dalalo ole-Mu!' " **28** "Poótoloma maó," tahuda poli li Isa, "todunia botie diipo peéenta maó woluo taalebe udaá wolei Yahya Tamopolihua. Bo taa u pulito kikiió towolota umati lo Allahu Taáala, lebe udaá wolei Yahya Tamopolihua." **29** Ngoáamila tau -- tuotuoto tahi pohimoá beya olo -- loódungohe li Isa lotahuda suáli boito; timongoliolo tau-tauwalo tamalo duduó totoonulalo hiihile wolo moóhuu lo Allahu Taáala wau ohilaa mei polihu olei Yahya. **30** Bo tau-tauwalo Parisi wau guguu-ruwaalo agama diila lohuto lololimo lanjana lo Allahu Taáala ode batanga limongolio. Timongolio diila lohuto lihua lei Yahya. **31** Lapataó ti Isa luli lotahuda, tahuda-Lio maó, "Tingga wolita musi pobandingiyo-U tau-tauwalo tojamani botie? Debo odelo wolo timongolio? **32** Timongolio debo odelo taukekeei tahi huloáa topaatali; ngopoambua hipongibode totaa wewo, 'Ami mopoitohei lahu u moéengahu olimongoli, bo timongoli diila mohuto mongelungo! Ami mopolahu mai lahu u ilopatea, wau timongoli diila humoyongo!' **33** Tei Yahya Tamopolihua lonaó mai -- tio lopuasa wau diila longilu angguru --

wau timongoli loloiya, 'Tio mailo tuanga lolati!' **34** Walaó Manusia lonaó mai -- Tio lolamelo wau longilu -- tulusi timongoli loloiya, 'Bilohi tau boito! Olalowa, hehuwoálo waitio lotahi pohimoá beya wau waitio lotaa odusa!' **35** Openu boli odito tinepo lo Allahu Taáala ilobukuti lonto ngoáamila taa u lololimo maó." **36** Ngotaalio lo Parisi tanggulio Simon, loloduwo li Isa lolamelo. Ti Isa lonaó ode belelio wau malo tihuloá lolamelo. **37** Tokota boito woluo olo taabua ngota tatumu-tumula todelomo dusa. Touí tio loódungohe u ti Isa donggo hemo lamelo tobele taulo Parisi boito, tio malonaó mota lodelo buutulu tuwau tuatunga yinulo moonu. **38** Tio tilimihula towulea li Isa totili lo oáa-Tio, wau hilumoyongo louí helo pobata oáati Isa wolo ponulio. Lapataó oáati Isa piloo hengulio wolo huwoio tulusi diliilio wau bilatalio loinulo moonu. **39** Touí taulo Parisi talo loduwo li Isa loóonto maó suáli boito, tio loloiya todelomo hilaalio, "Humayaalo tau botie nabi, tantu otaawa-Lio tatoonu taabua boito tamalo dedeta o-Lio, wau deú taabua boito tumutumula todelomo dusa!" **40** Lapataó ti Isa lotahuda maó odelei Simon, "Simon, woluo hitua-tuawua u potahuda-U mai olemu." "Joo Paaá Guru," tametaó lei Simon, "poleleyalo mai." **41** Ti Isa lotahuda maó, "Woluo taduulota obiloli totaa upilo bulotalio doi. Tangotaalio obiloli limo lohetuto doi talaá, wau tangotaalio poli limo lopulu doi talaá. **42** Duduulotalo diila loóbayali biloli boito, yi biloli limongolio mailulutio. Nte tatoonu towolota limongolio duulota boito talebe motoliángo totaa lopobulota doi boito?" **43** "To lantobu lowatia taa u dadaata daá pilo lulutalio to biloli!" tametaó lei Simon. "Huhamaamu otutu," tametaó li Isa. **44** Lapataó ti Isa lomiloheó taabua boito wau lotahuda odelei Simon, "Yio maloóonto taabua botie? Wau lonaó mai ode belemu, wau yio diila lopohetu taluhu u lopobelesi oáatu-U; bo taabua botie malo pobelesi oáatu-U wolo ponulio, wau lopohengu wolo huwoio. **45** Yio diila lololimo ola-U louí lodilo, bo taabua botie diila lohuheli lodilo oáatu-U anggadu Wau leidungga mai odia. **46** Yio diila loloheó yinulo moonu to lunggongu-U, bo taabua botie maloloohu yinulo moonu to oáatu-U. **47** Otutu: toliángio u udaá boito mopoilaalo deú dusalio u dadaata mailambungu! Wonu tau ambunguolo ngoidi, toliángio olo bo ngoidi." **48** Lapataó ti Isa lotahuda maó to taabua boito, "Duduusaamu

mailambungu." **49** Tau-tauwala wewo tahi huloáa hipolamela woli Isa mahipo bisalawa ngota-timongota "Tatoonu tau botie tunggula mowali mongambungu dusa?" **50** Boti Isa lotahuda maó to taabua boito, "Sababu yió palacaya to ola-U, yió mapiloáahu. Ponaólo wolo damee!"

**8:1** Diila lohiheo lapatio maó, ti Isa malonaó ode kokoo-tawaalo wau kakaa-mbunguwalo, mola lopohabari Habari Mopiohu deü Allahu Taaála momalenta odelo Olongia. Mopulu wau duulota tahiduduá o-Lio loduduá o-Lio. **2** Odito olo dengolo lota mongobua tamaa piloóluli lonto rohu u moleeto wau ngongoto. Timongolio boitolo ti Maria tailunte Mahadalena (pitu rohu u moleeto u mailinggi lonto oli Mahadalena); **3** ti Yohana olo, dile lei Khuja, pogawee lobele biluloá saaha lei Herodes; ti Susana, wau donggo dadaata mongobua wewo. Wolo onggosi limongolio lohihilao, timongolio helomantu li Isa wau tahiduduá o-Lio. **4** Tau-tauwala debo laito hiponaówa mai odeli Isa lonto totoonulalo kota. Wau touí madadaata tahiámbua, ti Isa losilita maó olimongolio pohumaya odie mola botie: **5** "Tamoomengia ngota lonaó lomuáyade bili. Touí tio donggo hemo muáyade, woluo bili u lobiihuto todalalo. Ngotayadu he ilodutaá lotau wau uwewolio he ilila lobulungi. **6** Woluo olo u lobiihuto totambati u hibotubotua. Touí tumbingio yilumualai pilomulo boito malo lolante sababu hutalio mohengu. **7** Woluo olo bili u lobiihuto tohungio lodiúto oduhi. Diúto oduhi boito tilumumulo peé-peéenta wolo bili boito, wau lohupeta bili boito tilinggula yilate. **8** Bo woluo olo bili u lobiihuto tohuta u molomiodu, lapataó tilumumulo wau lomungo ngohetuto piúwa." Lapataó losilita pohumaya boito, ti Isa lotahuda maó, "Wonu obulonga, podungohulo!" **9** Tahiduduá li Isa lohintu o-Lio boli lo pohumaya boito. **10** Ti Isa lolametaó, "Timongoli maloó toduo wowohi lo Eeya u motota maó hitua-tuawua u sangaja hetuuólo pasali louí woloolo mola Allahu Taaála momalenta odelo Olongia. Bo tau-tauwalo wewo ilaajali wolo pohumaya, alihu timongolio mopoótuoto, bo diila motota wolo u motoduo; wau timongolio moódungohe, bo diila mongalati." **11** "Utieelo boli lo pohumaya boito: Bili boito deüito-yito tahuda lo Allahu Taaála. **12** Bili u lobiihuto todalalo debo odelo tahipo dungohe tahuda boito. Bo ibilisi mai



lolambata habari boito lonto hilaa limongolio, alihu timongolio diila maó palacaya wau poáahuwolo. **13** Bili u lobiihuta to hibotu-botua debo odelo taa u towakutu lodungohe habari boito, lololimo wolo hilaa sanangi. Bo habari boito diila longuwaáto todelomo hilaa limongolio. Timongolio palacaya bo ngopeeé mola. Wau tou yimontala meidungga timongolio momaahu. **14** Bili u lobiihuta todelomo diúta oduhi debo odelo taa u modungohe habari boito, bo molawalo pasali lo tutumuli mongolio wau motohilaa tumumula dadaata ngoáamilalo wau sanangi todelomo dunia botie. Ngoáamilalo boito mohupeta olimongolio tilinggula diila mongohi hungo u mopiohu. **15** Bili u lobiihuta tohuta u molomiodu debo odelo taa u modungohe habari boito, lapataó tilahulio todelomo hilao u mopiohu wau motulidu. Timongolio moó tahangi tunggula mongohi hungo." **16** "Diaaluo tamo poleito tohe tulusi molaúbe wolo tombe, meaalo dutuolio to walungo potuluhe. Tio mamopodutu tohe boito to oáato tohe, alihu taa u tumuwotai moóonto baangio. **17** Diaaluo u hituuá udiila oontonga; wau diaaluo u hitua-tuawua u sangaja hetuuólo udiila tamo bonggali wau otaawa. **18** Sababu uito poótuota maó tióotutua wolo u dilungohe limongoli. Sababu taa u mawoluo, mawohialio lebe dadaata maó; bo taa u diaaluo, ngoidi udonggo woluo to olio mahamaalio olo." **19** Tiilo wau mongo wutati Isa lonaó mai ode o-Lio, bo timongolio diila lowali tilunggula mota o-Lio sababu malo odito daata lotau. **20** Yi woluo ngotaalio taloloiya maó odeli Isa, "Paaá, tiilo li Paaá wau mongo wutati Paaá woluo to bulemengio. Timongolio ohilaa modunggaya woli Paaá." **21** Boti Isa lotahuda maó olimongolio, "Tau-tauwala tamodungohe tahuda lo Allahu Taaála wau pohutuolio, maa timongoliolo tiilo wau mongo wutatu-U." **22** Todulahu tuwau ti Isa wolo tahiduduá o-Lio lotitaé tobulotu. "Dulo ito monaó ode ngotuwali lobulalo," tahuda maó li Isa olimongolio. Yi timongolio olo malo monggato. **23** Tou timongolio donggo hibitea, ti Isa malei tuluhi. Debolo dutalo daá lolemba mai bulalo boito. Taluhu mahe tumuwoto ode delomo bulotu, tilinggula mamoo topotala olimongolio ngoáamilalo. **24** Tahiduduá li Isa lonaó mai ode o-Lio wau malo pobongu o-Lio. Timongolio loloiya, "Paaá Guru, Paaá Guru, matopotala ito!" Ti Isa lobongu wau longantingao dupoto wau

buóola udonggo bale-baleyanga daá boito. Dupoto wau buóolo boito olo yiloole tulusi bulalo maloliilo. **25** Lapataó ti Isa lotahuda to tahiduduá o-Lio, "Yilongola timongoli diila palacaya ola-U?" Timongolio malo linggolabu wau yiloohe. Wau timongolio malo loiya ngota-timongota, "Tatoonu tutuulo tutu tau botie tilinggula longohi palenta todupoto wau buóolo, wau Tio olo dilungohelio!" **26** Ti Isa wau tahiduduá o-Lio tulusi lobite tilinggula mola ode madala lo Gerasa to ngotuwali lo Bulalo Galilea. **27** Tou ti Isa lobotulai ode tudulio, tio nilaó mai lo talolai ngota tamaa ilotua ngorohu u moleeto. Tau boito lonto kota. Malohiheo tio diilalo hemohiboó wau diila mohuto motitola tobele. Tio bo mohuto motitola to gogoowaalo tambati lokuubulu. **28** Tou loóonto maó li Isa, tio longuatió tulusi losujudu totalu li Isa wau longibodu. "Isa, Walaó Allahu Taaala Taa Laba-labalo molanggato! Mapongola-Mu wau botie? Pohileu diila maó sikisai wau!" **29** Tau boito loloiya odito sababu ti Isa malo malenta rohu u moleeto boito lohinggi maó lonto olio. Tingga maito tio hekawasa lorohu u moleeto boito tilinggula penu boli uluu wau oátio mailawadu wolo lante wau hedahaalo tióotutua, bo debo donggo mowali buntoolio lante boito tulusi hedeloo lorohu u moleeto ode huta hungayo u luasi daá. **30** Ti Isa lohintu maó totau boito, "Tatoonu tanggulumu?" "Tanggulo watia 'Legiun'," tametaó lotau boito -- sababu woluo ngohuntua rohu u moleeto umaa tilumuwoto ode delomo batangalio. **31** Roroo-huwaalo u moleeto boito lohile lou tióotutua alihu ti Isa diila mopolahi olimongolio ode delomo liito malikili-mautu. **32** Membideó lotambati boito ngohuntua daá boi hipo peehuma uaalolio tobinggi lohuludu. Roroo-huwaalo u moleeta boito lohile tióotutua odeli Isa alihu poluasialio tumuwoto ode delomo boboiyalo boito. Wau ti Isa akolo. **33** Yi roroo-huwaalo umoleeta boito yilumualaó totau boito wau tilumuwoto ode boboiyalo boito. Lapataó boboiyalo boito tilumeteó wau lotidehu lonto binggi loliito ode bulalo, tulusi loáhumo. **34** Tahipodahawa boi boito loóonto wolo u mailowali. Yi timongolio tilumeteó wau lopololadu habari boito tokota wau kambungu totililio. **35** Lapataó tau-tauwalo yilumualai lomilohe wolo u mailowali. Timongolio lonaó mai odeli Isa, wau teto ilodungga limongolio taa u malo lopato lonto roroo-huwaalo u moleeto boito donggo hulohuloáa totili lo

oáati Isa. Tio maboóboó wau pikiilangilio malobaango. Timongolio mailoohe. **36** Timongolio taloóonto uilowali boito malo silita totau-tauwala woloolo mola tau boito piloóluli-Lio. **37** Lapataó ngoilanggubu tuango lipu lo Gerasa boito lohile tióotutua alihu ti Isa mololaa maó tambati boito, sababu timongolio ngoáamila moohe daá. Oditolio ti Isa lotitaé tobulotu malo hualingo. **38** Taa u malo lopato lonto roroo-huwaalo u moleeto boito lomolohone maó li Isa alihu tio mowali moduduó. Boti Isa lopoáhu olio lonaó, tahuda-Lio maó, **39** "Pohualingolo wau pohabaria maó wolo umaa pilohutu lo Allahu Taáala olemu." Yi tau boito malonaó helopo habari to ngoilanggubu tutulo kota, wolo umaa pilohutu li Isa olio. **40** Tou ti Isa luli lohualinga mota to ngotuwali lobulalo, Tio yilimaalio lou hiwengahe lotau-tauwalo sababu timongolio donggo hemohima o-Lio. **41** Lapataó malonaó mai tauwa ngota lobebe potabiaalo u teto. Tanggulio Yairus. Tio losujudu totalu li Isa wau lohile tióotutua alihu ti Isa monaó mai ode belelio, **42** sababu bo ngota-ngotaalo walaio taabua u tutumulio mopulaa dulo taunu mawimbide mate. Tou ti Isa donggo dulu-dulungo ode bele lei Yairus, tau-tauwalo hemo huntuhuntula o-Lio lonto totoonulalo tutulio. **43** To wolotalio woluo olo taabua ngota tamaa mopulaa dulo taunu mongongoto pilobaáta loduhu u aáaita wolo dulahio. Tio malo poópulito ngoáamila milikiilio lei wunemo toli dokuteli, bo diaalo maó talowali lopoóluli. **44** Taabua boito lohimbido li Isa loli wulea, tulusi lodedeta biihu lo jumba-Lio. Tou boitolo mola duhu lotaabua boito lotonggodu. **45** Ti Isa malo hintu, "Tatoonu talo dedeta ola-U?" Ngoáamila tau lomaahu. Tulusi tei Petrus loloiya, "Paaá, dadaata daá tau topalito li Paaá; timongolio hemo huntuhuntula li Paaá!" **46** Ti Isa lotahuda maó, "Bo woluo talo dedeta ola-U. Otaawa-U uito, sababu woluo lotolo u yilumualai lonto ola-U." **47** Taabua boito lotota mai loutau deu huhutuulio mailo tahua. Oditolio tio malonaó mai lou hulu-huluhelio wau losujudu totalu li Isa. Yi tio malo silita totalu lotaa ngoáamila, yilongola tio lodedeta li Isa, wau deu ngongotio loluli tosaaátilo boito. **48** Ti Isa lotahuda maó olio, "Walauu-U, sababu yio palacaya ola-U, yio maloluli. Ponaólo wolo moáahu." **49** Tou ti Isa donggo hemobisala, wato ngota lonaó mai lonto bele lei Yairus. Tio loloiya maó olei Yairus, "Pusili li Tuani mailate. Sambelolo ti Tuani

moposuusa li Paaá guru poli." **50** Tou ti Isa loódungohe uito, Tio lotahuda maó odelei Yairus, "Diila oohe, tumbaó pomalacayalo wau walaumu mamoluli." **51** Tou leitungga mota ode bele lei Yairus, ti Isa diila longohi openu bo ngotaa maó tumuwoto wo-Lio ngopohia tei Petrus, tei Yahya, tei Yakobus wau mongo dulaá lo walaó boito wambaó. **52** Ngoáamila tau mahe hiyongo wau hihunggalaá sababu ilopatea lowalaó boito. Boti Isa lotahuda maó, "Diila hiyongo. Walaó boito diila yilate, tio bo tuutuluhu!" **53** Timongolio helopoi li Isa, sababu otaawa limongolio walaó taabua boito mailate. **54** Lapataó ti Isa malodihu uluu lo walaó boito wau lotahuda maó "Pabongulo, Nou!" **55** Nyawa lo walaó boito luli lohualingai ode walaó boito, wau tou boitolo mola tio malobongu. Lapataó uito ti Isa lopoáhu olimongolio lopo tamelaó walaó boito. **56** Mongo dulaá lo walaó boito lolinggolabe daá. Boti Isa malodini olimongolio mopohabari u mailowali boito openu boli olita.

**9:1** Ti Isa lotiangai mopulaa duulota tahiduduá o-Lio, tulusi longohi kawasa olimongolio mopolahi roroo-huwaalo u moleeto wau mopoóluli ngongoto. **2** Lapataó Tio lopoáhu olimongolio lonaó mopoóluli tahi ngongota wau mopololadu habari pasali woloolo mola Allahu Taaala mamomalenta odelo Olongia. **3** "Diila maó podelo wolo-wolo to nonaómu," tahuda li Isa olimongolio. "Diila maó podelo tunggudu, meaalo bututu losadaka, meaalo uáalo, meaalo doi, meaalo kaingi dulopita. **4** Openu boli tóutoonu timongoli tolimoolio, potitolapo teto sambe timongoli mololaa maó kota boito. **5** Wau tóutoonu timongoli diila tolimoolio, tou timongoli mololaa maó kota boito, polotaá maó peahuó topaladu oáatumu, odelo poéela ode limongolio." **6** Tahiduduá li Isa malo monggato, tulusi lonaó ode kakaa-mbunguwalo mota lopohabari Habari Mopiohu boito wau lopoóluli tahi ngongota to utoonulalo maó. **7** Tou tei Herodes, hemo malenta to Galilea, loódungohe pasali lo ngoáamila uilowali boito, tio malolingu. Sababu woluo talo loiya deú tei Yahya Tamopolihua maaluli tilumumulai. **8** Woluo olo talo loiya deú tei Elia maaluli tilimimbulu mai. Taawewo olo loloiya deú ngotaalio lonabi lonto mongo nabi to muloololio mai daá maaluli tilumumulai. **9** Tei Herodes

lolojiya, "Wau malo poahu talo limade lunggongee Yahya. Bo Tau botie, tutuulio tutu tatoonu Tio? Madadaata u ilodungoheú pasalii-Lio." Yi tei Herodess lotolopani u momilohe li Isa. **10** Mongo rasulu li Isa luli lohualingai wau helo hungguli maó toli Isa ngoáamila u mapilohutu limongolio. Ti Isa lotianga olimongolio, tulusi lonaó peé-peéenta woli mongolio lotiwiwi tokota Betsaida. **11** Bo tou ilotaawa lotau-tauwalo suáli boito, timongolio malo dudua li Isa. Tio lololimo olimongolio, tulusi lotahuda maó ode limongolio pasali lou wolo mola Allahu Taála momalenta odelo Olongia. Wau Tio olo helo pooluli tahi ngongota towolota limongolio. **12** Tou dulahee matumolopa mola, tamopulaa duulota tahidudua li Isa lonaó mai ode o-Lio wau lolojiya, "Paaá tambati botie tihitihi mai. Lebe mopiohu pei naowalo li Paaá tau-tauwala botie, alihu timongolio mota motali mai uáalo wau tambati pohuheliyalo to kakaa-mbunguwalo wau dedee-sawaalo totili maó leewe." **13** Boti Isa lolametaó, "Timongolilo tamopo tamelaó olimongolio." Tahidudua li Isa lolojiya maó, "Woluo to olamiaatia roti bo limo lobotu wau uponula dulo botu. Wolo amiaatia tamusi motali mai uáalo ode taa ngoáamila botie?" **14** (Woluo otanu limo lolihu lota mongo lolai teto.) Ti Isa lotahuda maó to tahidudua o-Lio, "Ahuli maó tau-tauwalo botie motihuloá ngopo-ngopolemboá, otanu limo lopuulota ngopolembua." **15** Tahidudua li Isa boito malohutu wolo u tilahuda maó li Isa olimongolio. **16** Lapataó ti Isa malohama limo lobotu roti wau dulo botu uponula boito tulusi yilumanggela mola ode hulungo wau lolapali sukuru to Allahu Taála. Lapataó uito Tio malo mita-mitangaó roti wau uponula boito tulusi longohi maó to tahidudua o-Lio alihu taya-tayadulio mota totaa dadaata boito. **17** Timongolio ngoáamilalo lolamela tunggula lobutuhu. Lapataó tahidudua li Isa malo himoó lebe lou aalo boito daatalio mopulaa dulo kalanji. **18** Todulahee tuwau, tou ti Isa donggo hemodua tutuwau, tahidudua li Isa lonaó mai ode o-Lio. Ti Isa lohintu maó olimongolio, "Modudua loiya lotau, tatoonu Wau botie?" **19** Timongolio lolametaó, "Woluo talo loiya tei Yahya Tamopolihua. Woluo olo talo loiya tei Elia, tawewo olo lolojiya tala ngota lonabi tojamani muloololio mai tamaa tilumumulai." **20** "Bo moduduó olimongoli lohihilao, tatoonu Wau botie?" yilintu maó li Isa. Tei

Petrus lolametaó, "Ti Paaálo Olongia Tamoo-poáahua tapilo danti mai lo Allahu Taaála." **21** Lapataó ti Isa lotahuda to tahiduduá o-Lio. "Diila maó polelea sama-samaata suáli botie penu boli olita." **22** Ti Isa lotahuda olo, "Walaó Manusia memangi musi modutolo dadaata wau tehengia lomongo tauwa wau mongo iimamu tauwa, wau guguu-ruwaalo agama. Tio mapateelio mate-mateelo maó, bo todulahu otolulio mamuli bongulo-Lio mai." **23** Lapataó ti Isa lotahuda maó totaa ngoáamila tawoluo teto, "Tamotohilaa moduduó ola-U, musi molipataó polohuna daá lo batangalio lohihilao, momota salipulio timiidu dulahu, wau tulusi moduduó ola-U. **24** Sababu taa u motohilaa momintengi tutumulio, maóolia lo tutumulio. Bo taa u mopobake tutumulio duólo polohuna daá ola-U mapoáahuwolo. **25** Wolo paédaalio to tahingota-ngotaawa wonu ngoilanggubu dunia botie mowali hakuulio, bo tio moluusa wau oolia lo tutumulio? **26** Wonu tau moolito momasisi ola-U wau pongaajali-U, Walaó Manusia olo mamoolito momasisi tau boito tou Tio meidungga mai wolo kawasaa-Lio, wau wolo kawasa li Paapa wau maaaa-laikatiyalo tamantali! **27** Ototai maó: towolota limongoli teewe woluo tadiila mate tou tio diipo moóonto Allahu Taaála momalenta." **28** Otanu ngodimmingu mola lapataó ti Isa helo ngaajali susuu-aliyaalo boito, Tio lodelo olei Petrus, Yahya wolei Yakobus ode huidee tuwau mola loduá. **29** Tou ti Isa donggo hemoduá teto, laku-Lio malobolió wau boó-Lio malowali loputió hiinta-intaawa. **30** Debolo taduulota, deúito-yito tei Musa wolei Elia lopobilohei batangalio wolo tinelo lonto sologa. Timongolio helo bisala woli Isa pasali lo opopate-Lio udiilalo mohiheo matolimoo-Lio to Yerusalemu. **32** Towakutu boito tei Petrus wau mongo tamanilio malei tuluhu, bo debolo lobongu lomola, wau loóonto li Isa matine-tinela wau taduulota boito tihutihula wo-Lio. **33** Tou taduulota boito malo lolaa maó li Isa, tei Petrus loloiya odeli Isa, "Paaá Guru, sanangi tutu ito tea. Lebe mopiohu amiaatia momongu maó kema tolo wale; tuwau uwoli Tuani tuwau uwolee Musa, wau tuwau olo uwolee Elia." (Tei Petrus loloiya odito diila mongalati wolo uloiyalio.) **34** Tou tei Petrus donggo bisabisala, timongolio matilaúbei loheengo, tilinggula timongolio mailoohe. **35** Lapatio maó lonto heenga boito ilodungohe suala u lotahuda mai, "Tabotieelo Walaú-U tatilulaotu-U,



Dungohi maó Tio!" **36** Toui suala boito malopooyo, timongolio looonto li Isa tutuwau teto. Tahiduduá li Isa hipooyonga wambaó pasali ngoaamilalo boito, wau diila lopoótaa penu boli olita wolo umaa iloontonga limongolio. **37** Loloombulio mola ti Isa wau toulota tahiduduá o-Lio lotuhutai lonto huidee boito, wau taa dadaata lonaó mai odeli Isa. **38** Talolai ngota lonto huungo lotaa dadaata boito malo nguatió, "Paaá Guru, tulungia mai bilohi maó walaó watia -- tio ngota-ngotaalo walaó watia! **39** Wonu rohu umoleeta boito mopo ngongoto olio, tio bolo monguatiólo mola wau wawaio hemo buwalodu tunggula ngangolio he lumolombula. Rohu umoleeta boito laito hemo posikisa olio, wau diila mohuto lumuwalo monto olio! **40** Mapilohile lowatia to tahiduduá li Paaá u mopolahi rohu u moleeto boito, bo timongolio diila loówali." **41** Ti Isa lolametaó, "Mailaba timongoli botie! Tutuulio tutu timongoli tau-tauwalo tahelo halahu lonto dalalo u otutu wau diila palacaya! Tunggula omolua Wau musi motibiluloá woli mongoli, wau mosabali woli mongoli? Delowa mai walaumu boito odia mai!" **42** Toui walaó boito donggo dulu-dulungai odeli Isa, rohu umoleeta boito lopobanti olio wau lohutu wawaio helo buwalodu. Boti Isa lomalentaó rohu umoleeta boito yilumualo wau walaó boito maloluli. Lapataó walaó boito luli yiludulio maó ode liyamolio. **43** Ngoaamila tau hilinggolabe looonto kawasa lo Allahu Taála u odito udaálio. Toui tau-tauwalo donggo hilinggolabe looonto ngoaamila u pilohutu-Lio, ti Isa malo tahuda to tahiduduá o-Lio, **44** "Poótuotalo mopio-piohulo maó wau diila lipata upilo tahuda-U mai botie: Walaó Manusia mawuduolio ode kawasa lomanusia." **45** Bo tahiduduá li Isa boito diila mongalati tahuda-Lio boito. Suáli boito hitua-tuawua u sangaja hetuuólo toli mongolio alihu timongolio diila mongalati. Bo timongolio moohe mohintu suáli boito o-Lio. **46** Towolota lo tahiduduá li Isa malo hahaamawa pasali lo tatoonu monto olimongolio tapulito udaá. **47** Otaawa li Isa pikiilangi limongolio, sababu uito Tio malohama taúkikiia ngota pilopotihu-Lio totili-Lio. **48** Lapataó Tio lotahuda maó to tahiduduá o-Lio, "Taa molilimo walaó botie sababu Wau, boliilio maó mololimo ola-U. Wau taa mololimo ola-U, mololimo o-Lio talolao mai ola-U. Sababu taa upulito kikiio towolota limongoli, matio-tiolo tapulito udaá!" **49** Tei Yahya loloiya maó,

"Tuani, amiaatia loóonto tau lopolahi lati to tangguli Tuani, wau amiaatia lodini olio, sababu tio diila lonto olanto." **50** "Diila maó dinia tio," tahuda li Isa odelei Yahya wau to tahiduduá li Isa wewolio, "Sababu taa diila moluwali olimongoli, boliilio maó motiwambaó toli mongoli." **51** Tou malembidu wakutuulio li Isa bintaó-Lio mola ode sologa, Tio lohama maó putusani u monaó ode Yerusalemu. **52** Yi Tio lopoáhu talo timulo wo-Lio. Tau-tauwala tailahula-Lio boito malonaó, tulusi tilumuwoto ode kambungu tuwau to Samaria u lopodapato totoonulalo hitua-tuawua odeli Isa. **53** Bo tau-tauwalo to kambungu boito diila lohuto lololimo li Isa, sababu loilaalo daá Tio donggo dulu-dulungo ode Yerusalemu. **54** Yi tou tahiduduá li Isa, deúito-yito tei Yakobus, wau tei Yahya lotota pasali losuali boito, timongolio malo loiya, "Eeya, wolo Eeya mohuto, mongowatotia mohile tulu motuhutai monto hulungo mai mopobinasa totau-tauwalo botie?" **55** Ti Isa lopalingaó, tulusi loingo olimongolio. **56** Lapataó uito timongolio malonaó ode kambungu uwewo. **57** Tou ti Isa wau tahiduduá o-Lio donggo hemo tolonga mola lononaólio, woluo taa loloiya maó li Isa, "Paaá, watia yinao moduduó li Paaá penu boli deútoonuu!" **58** Ti Isa lolametaó, "Saligala oliyango, wau bulungi obeealelio, bo Walaó Manusia diila otambati potibalatalo." **59** Lapataó ti Isa lotahuda maó ode ngotaalio wewo, "Dudui mai Wau," Bo tau boito loloiya, "Paaá, polulia mai watia mohualingopo mola molobunga oliyamo lowatia." **60** Ti Isa lolametaó, "Huliimaó taamate molobungo taa matelio lohihilao. Bo yio, ponaólo wau pololade mota habari deú Allahu Taaála malo lumulo lomalenta." **61** Woluo olo ngotaalio wewo talo loiya, "Paaá, watia yinao moduduó li Paaá, bo poluliyapo mai watia mohualingopo mola mohintu." **62** Ti Isa lotahuda maó ode tau boito, "Taa umaa lolumula lomadeó, lapataó moili ode wulea, diila paatuti mowali pongawaa umati lo Allahu Taaála."

**10:1** Lapataó uito Eeya lolulaotaó pitu lopusulota muri poli, tulusi lalao olimongolio duduulota lotimulo wo-Lio ode timiidu kota wau tambati u manaóo-Lio. **2** "Tilapulo u otoloolo dadaata," tahuda-Lio maó ode limongolio, "bo tamokalaja u mongotolaó bo ngoidi. Sababu uito, pohilea maó totaa ohuúo lo halabolu alihu tio molao mai tamokalaja u mongotolo

tilapulo pilomulo-Lio. **3** Naa, pomonggatolo! Wau molao olimongoli debo odelo himba tohuungo saligala. **4** Diila podelo dompeti meaalo bututu losadaka, meaalo sapatu. Diila maó pohuheli tohuungo dalalo u mosalamu penu boli to ngotaalio olo. Wonu timongoli tumuwoto tobele ngowale, polelea maó mulomulo, 'Pohileaala duá moáahulo tato delomo bele botie.'

**6** Wonu teto woluo taa u motohilaa dame, salamu dameemu boito matatapu to olio; wonu diila, muli potoulia mai salamu dameemu boito. **7** Potitolaalo wambaó tobele ngowale. Tolimoa maó wolo u pohintalio olemu teto, sababu taa u mokalaja ohaku mololimo wuupalio. Diila maó limbataó-limbataó monto bele ngowale ode bele uwewo. **8** Wonu timongoli meidungga tokota tuwau wau mola teto timongoli tolimoolio lou mopiohu, tamela maó wolo u pohintalio olimongoli teto. **9** Poólulia maó tau-tauwalo tahi ngongota tokota boito, wau pohabaria maó totau-tauwalo teto, 'Allahu Taáala mahuáa molumulo momalenta odelo Olongia tohuungi mongoli.' **10** Bo wonu timongoli meidungga tokota tuwau wau teto timongoli diila tolimoolio, lualaó ode dalalo wau loiya maó, **11** 'Tumbaó peyahuó lokotamu u medembinga to oáato lami, polotaó lami odelo poéela olemu. Bo ototai maó dei malembidei saaátalio Allahu Taáala molumulo momalenta odelo Olongia tohuungi mongoli!' **12** Poótoloma maó, todulahu kiama, taulo Sodom malebe gambangi ambunguo lo Allahu Taáala wolo taulo kota boito!" **13** "Matopotala timongoli, Korajim! Wau matopotala timongoli, Betsaida! Humayaalio mamooó-linggolabeyalo u pilohutu tohuungi mongoli boito mapilohutu tokota Tirus wau Sidon, matantu tau-tauwalo mola teto malohiheo lolilihu to duduu-sawaalo limongolio, wau momake boó motilimi wau mopodutu peyahuó to lunggongi mongolio. **14** Todulahu kiama, tau-tauwalo Tirus wau Sidon malebe gambangi ambunguo lo Allahu Taáala woli mongoli. **15** Wau timongoli, Kapernaum! To pikiilangi limongoli, timongoli mapolaióolo demolo sologa? Diila! Tumbaó timongoli bo mapomahulio ode nalaka!" **16** Lapataó ti Isa lotahuda maó to tahiduduá o-Lio, "Taa u modungohe olimongoli, modungohe ola-U. Taadiila mololimo olimongoli, diila mololimo ola-U, wau taadiila mololimo ola-U, diila mololimo olo to talolao mai ola-U." **17** Tapitu lopulu lota muri boito malo hualingai lou

hiwengahe daa. "Eeya," loiya maó limongolio, "roroo-huwaalo umoleeta olo lodungohe to mongowatotia wonu mongowatotia momalenta olimongolio to tanggulo Eeya!" **18** Ti Isa lolametaó, "Wau loóonto Ibilisi lodehu mai lonto hulungo odelo ilato. **19** Ototai maó! Timongoli mailohiya-U kawasa alihu timongoli mowali modutaáa tulidu wau bambau wau mongantulu ngoáamila lotolo musu, wau diaaluo penu boli tuwau maó u mowali mopoo topotala olimongoli. **20** Opendu boli odito diila maó potiwengahu timongoli sababu roroo-huwaalo u moleeto modungohe olemu. Lebe mopiohu timongoli motiwengahu sababu tanggulumu leitulade tosologa." **21** To waktu boito olo, ti Isa leengahu sababu kiluwasa lo Rohullah. Ti Isa loloiya, "Paapa, Eeya takawa-kawasa hulungo wau dunia! Watia mosukuru toli Paapa sababu ngoáamilalo boito u hitua-tuawua u sangaja hetuuó li Paapa totau-tauwala tahi tootawa wau tahi o ilimua, bo piloilaalo li Paapa totau-tauwalo tadiila osikolawa. Uitulo umopo sanangi hilaa li Paapa. **22** Toonulalo u hitua-tuauwa mailudu mai li Paapa to olaa-Tia. Diaaluo maó penu boli ngota tamotota to Walaó, ngopohia li Paapa. Diaaluo olo tamotota li Paapa, ngopohia lo Walaó; wau tau-tauwala toolita Walaó boito yinao mopooáa li Paapa." **23** Lapataó ti Isa lomiloheó to tahiduduá o-Lio, tulusi lotahuda olimongolio wiwi-wiwi, "Mailo paaéda timongoli sababu maloóonto u iloontonga limongoli masaatia botie. **24** Sababu eelai maó: Dadaata nabi wau olongia motohilaa momilohe u iloontonga limongoli masaatia botie bo timongolio diila moóonto. Timongolio ohilaa modungohe u ilodungohe limongoli masaatia botie, bo timongolio diila moódungohe." **25** Lapataó ngotaalio guru lo agama lotibilohei u lopotala li Isa. Tio lohintu maó, "Paaá Guru, mawolo umusi pohutuo lowatia alihu mololimo tutumulo tutu wau ohiheo-hiheolo maó?" **26** Ti Isa lolametaó, "Wolo u tulatulade todelomo Kitabi? Woloolo mola huhamaamu tomimbihu suáli boito?" **27** Tau boito lolametaó, "Toliánga maó Allahu Taáala Eeyamu lou lealeaatu lohilaamu, lou lealeaatu lojiwamu, lou ngoáamila lotolumu, wau lou totoonulalo aakalimu,' wau 'Toliánga maó timongotamu debo odelo yio motoliángo batangamu lohihilao'. " **28** "Totametumu boito otutu," tahuda maó li Isa. "Pohutuwalu uito, yio matumumulo." **29** Bo guru lo agama boito ohilaa mopobanali

batangalio. Tio lohintu maó, "Tatoonu timongota lowatia boito?" **30** Ti Isa lolametaó, "woluo talolai ngota lolaahi lonto Yerusalemu ode Yerikho. Tohuungo dalalo tiluhu lo tamoo-lambata, yilahulio totoonulalo u mililikiilio, pilatelio ngopeé yilate, tulusi tilolaalio maó banti-banti to dalalo lou palipali daá. **31** Leitahua ti iimamu ngota naónaó olo to dalala boito. Tou iloontongalio tau boito, tio lohei maó ode ngotuwali lo dalalo lapataó lonaó tulusi. **32** Odito olo ngotaalio lo Lewi tanaónaó teto: tou iloontongalio tau boito, lohimbideó tio wau lopoó tuoto olio. Bo tio olo debo lohei maó ode ngotuwali lo dalaalo, lapataó lonaó tulusi. **33** Bo lapatio maó tau ngota lo Samaria donggo pasi-pasiyali, yilumaode olo teto. Tou loóonto tau boito, mawunu-wunulo daá hilaalio, sababu motoliango. **34** Yi diludulalio tau boito tulusi mapiloó belesilio paliilio wolo angguru wau yilunemio wolo yinulo, lapataó bilolulio papaa-liyaalo boito. Lapataó uito, mapilopo taélio tau boito to kolodailio lohihilao, tulusi dilelolio ode tambati pohuhepita ngowale wau yilawatialio. **35** Tou loombulio mola tio lohama dulopita doi talaá wau yilohilio totaa ohuuwo lotambati pohuhepita boito wau loloiya, 'Lawatia maó tio, wau wonu woluo onggosi wewo, de watia tamomayali tou watia muli mohualingai.' "**36** Lapataó ti Isa lopoó pulito silita boito lou lohintu maó odie, "To otolulota boito tatoonu, moduduó huhamaamu, talohutu odelo timongotalio monto taa u yilambatio boito?" **37** Guru lo agama tapilo hintua boito lolametaó, "Taa u malo tulungi tau boito." "Naa, naóolo wau pohutua maó odelo uito olo!" tahuda li Isa. **38** Lapataó ti Isa wau tahiduduá o-Lio lotolonga mola lononaó-Lio, tulusi leidungga to kambungu tuwau. Teto taabua ngota, tanggulio Marta, loloduo o-Lio ode belelio. **39** Ti Marta owutato taabua tanggulio Maria. Ti Maria botie lotihuloó titiilia li Isa Eeya helo dungohe popoo-ngajalii-Lio. **40** Boti Marta dadaata daá kalajaalio hemo ngulusi belelio. Tio lonaó mota odeli Isa wau loloiya, "Eeya, wolo Eeya diila pandungi oli Maria bo hemo poluli maó olaatia hemokalaja tutuwau? Ahuli maó tio motulungi mai olaatia!" **41** "Marta, Marta!" tametaó lo Eeya. "Yio molawalo wau bo hemo mikiilangi uito wau utie; **42** lebe-lebe pomaó u polohuna daá bo tuwau. Wau ti Maria malo lulaoto u mopiohu, udiila mowali hamaalo monto olio."

**11:1** Todulahu tuwau ti Isa loduá totambati tuwau. Tou mailapato loduá ngotaalio lo tahiduduá o-Lio loloiya, "Eeya, nte ajalia mai mongowatotia odelo tei Yahya helo ngaajali loduá to tahiduduá olio." **2** Yi ti Isa lotahuda maó olimongolio, "Wonu timongoli moduá, loiya maó odie, 'Allahu Taáala, Eeyalo Paapa bo Tuwa-tuwaulo. Pohileaala duá Eeya tuboolo wau hulumatiolo. **3** Wuduwalo mai timiidu dulahu uáalo upalaluo lo mongowatotia, **4** Ambungua mai duduu-sawaalo mongowatotia, sababu mongowatotia olo hemo ngambungu timiidu tau taótotala to mongowatotia. Wau diila maó polulia mongowatotia oolia lo palacaya towakutu mongowatotia yimontalalio.'" **5** Ti Isa lotahuda maó to tahiduduá o-Lio, "Humayaalio ngotaalio limongolio monaó ode bele lo tamanilio to tomutaá lou hui, wau molojiya, 'Tamani bulotipo mai roti tolobotu, **6** sababu tamaniú tadonggo todelomo nonaó, boheli lohepitaó ode bele wau wau madidu o uáalo pohinta olio.'" **7** Humayaalio tamani tanilaómu boito molametaó odie, monto delomo belelio, 'Diila maó posuusawa wau! Huhebu maleiuunti wau wau wolo mongo walauúú malo tuluhu. Wau diilalo moó bongu wau mongohi mai wolo-wolo olemu.'" **8** "Lapataó woloolo mola?" Tahuda maó li Isa wumbutio mola. "Wau motahuda mai, ooó! Openu yio tamanilio, tio diila tamohuto mobongu wau mongohi mai wolo-wolo olemu. Bo tumbaó sababu yio diila molaasa moolito mohile to olio mololaalaita, yi tio mamobongu olo wau mamongohi olemu wolo u palaluwomu. **9** Oditolio, Wau motahuda mai olemu: Pohileelo, yi timongoli mawohialio; loloheelo, yi timongoli mamootapu; pongokoólo, yi huhebu mahuóolio olemu. **10** Sababu tamohile mamololimo; tamololohu mamootapu wau tamongokoó mahuówalio tohuhebu. **11** Towolota limongoli tingga woluo tiyamo tamongohi tulidu to walaio, wonu walaio mohile uponula? **12** Meaalo mongohi bambau, wonu walaio mohile putito? **13** Openu timongoli moleeto, debo otaawa limongoli olo mongohi u mopiohu towalai mongoli. Tidiyolo maó Allahu Taáala to Sologa! Allahu Taáala mamongohi mai Rohu-Lio to limongolio tamohile to o-Lio!" **14** Todulahu tuwau ti Isa lopohinggi rohu u moleeto yilumualaó lonto ngotaalio buubu. Tou rohu u moleeto boito yilumualaó, tau boito malo bisala. Dadaata tau lolinggolabu,



**15** bo woluo talo loiya, "Tio mowali mopohinggi rohu u moleeto sababu kawasa lo Beeljebulu, tauwa lorohu u moleeto boito." **16** Woluo olo tau-tauwalo wewo taohilaa mopotala li Isa, oditolio timongolio lohile li Isa mohutu u moolinggolabe odelo tuoto deu Tio leidungga mai lonto Allahu Taáala. **17** Bo otaawa li Isa makusudu limongolio. Yi Tio lotahuda maó olimongolio, "Wonu lipu tuwau mopoó mowali hipala-palateiya u tinggai mumuusua, lipu boito diila moó tahangi. Wau wonu ungaalaa tuwau mamobubuuálawa wau mumuusua ngota timongota, ungaalaa boito mamoaंतulu. **18** Odito olo todelomo bele biluloá saaha li olongia lo Ibilisi; wonu ngopolemboá moloohulua wolo polemboá uwewo, yiladia boito mamoaंतulu. Timongoli hipoloiyawa deu Wau lopohinggi rohu u moleeto boito sababu kawasa lo Beeljebul. **19** Wonu odito, wolo kawasa lo tatoonu tahidudua olemu lopohinggi roroo-huwaalo u moleeto boito? Tahidudua olemu boitolo talo poilaalo mai deu timongoli tilala! **20** Bo Wau lopohinggi rohu u moleeto boito wolo kawasa lo Allahu Taáala, wau uito boliilio maó deu Allahu Taáala malo lumulo lomalenta tohuungi mongoli. **21** Wonu tamolotolo ngota, wolo otingolo wimu-wimumuto, modaha belelio lohihilao, ngoáamila milikiilio mamoaáahu. **22** Bo wonu ngotaalio talebe molotolo moluhu wau moólaahe olio yi taa u lebe molotolo boito mamohuhu ngoáamila tingolo u hepo ngakulio lotaa ohuuio lobeboito, lapatao molaya-layadeo ngoáamila balangilio. **23** Taa u diila motiwambaó de ola-U, tutuulio tutu moluwali ola-U, wau taa diila momantu ola-U, tutuulio tutu mopoólusa kalajaa-U!" **24** "Wonu bolo rohu u moleeto mololaa maó tahingota-ngotawa, rohu boito momalito to tataa-mbatiyalo u mohengu u molololohe pohuhelialio bo diila motapulio. Masababu uito, tio moloiya, "Wau mamuli mohuwalinga mola ode bele u matilolau mai!" **25** Tou tio leidungga mola odito, ilodunggalio bele boito belesi wau aátulu. **26** Lapatao tio lonaó wau lodelo pitu rohu uwewo ulebe maó moleeto wolio. Tulusi timongolio tilumuwoto ode delomo tau boito lapatao lotibiluloá teto. Wau pulitio maó owowoluwoa lotau boito lowali lebe loleetao wolo ubohulio." **27** Lapatao ti Isa lotahuda maó odito, taabua ngota towolota lotaa dadaata boito loloiya li Isa, "Otutu sanangi tutu taabua talo potutu mai wau longohi tutu ole-Mu!" **28** Boti Isa lolametao,

"Lebe sanangi tutu poli taa u modungohe tahuda lo Allahu Taaala wau pohutuolio!" **29** Tou tau-tauwalo donggo hiambua totili li Isa, Tio lopo tolonga mola bibiisalawa-Lio, "Ua-Lio maó. Donggo boli leetio tau-tauwalo tojamani botie. Timongolio meihutu tuwaulio moólinggolabu alihu timongolio moó palacaya ola-U. Bo timongolio diila tawohiyalo penu boli tuwau maó moólinggolabu, ngopohia moólinggolabu li Nabi Yunu. **30** Odelo woloolo mola ti Nabi Yunu tuwaulio u moólinggolabe totau-tauwalo kota to Niniwe, odito olo Walaó Manusia mamowali tuwaulio lo moólinggolabe totau-tauwala tojamani botie. **31** Todulahu kiama Olongia Tabua monto Huliaalio mamobongu mai peé-peéenta wolo tau-tauwala tojamani botie, wau mopotuludu olimongolio. Sababu, u modungohe pongaajali lei Salomo tamolinepo, Olongia Tabua boito malo huwato ode u molaminga daá monto huudu dunia. Bo tea botia woluo talebe udaá wolei Salomo! **32** Todulahu kiama, tuango lipu lo Niniwe mamobongu peé-peéenta wolo tau-tauwalo tojamani botie, wau mopotuludu olimongolio, sababu taulo Niniwe boito lolilihu to duduu-sawaalo limongolio tou tei Yunu lohutuba to limongolio. Bo tea botia woluo talebe udaá wolei Yunu!" **33** "Diaaluo taa u mopoleitaa tohe lapataó tuuólio meaalo taúbelio wolo tombe. Madutuolio tohe boito to oáato tohe, alihu taa tumuwotaó mamooónto tilangio. **34** Mato yito tohe lobatanga. Wonu matomu motilango, ngoáamila batangamu mobaango daá. Bo wonu matomu mopulau, ngoáamila batangamu mowali modiólomo daá. **35** Masababu uito, poódaha-dahaalo maó, diila bolo tinelo uwoluo to batangamu boito mowali modiólomo. **36** Wonu ngoáamila batangamu mobaango, wau penu boli ngotayadu diila modiólomo, yi ngoáamila batangamu boito mobaango daá debo odelo tilinela lotinelo tohe." **37** Tou ti Isa lapato lotahuda maó, ngotaalio lo Parisi loloduo o-Lio lolamelo to belelio. Ti Isa malonaó mota lolamela teto. **38** Taulo Parisi boito lolinggolabu loónto li Isa lolamela lou diila longulo uluu-Lio loduduó wuúdu lo agama. **39** Sababu uito Eeya lotahuda maó olio, "Memangi timongoli tau-tauwalo Parisi u biasaalio hemo poóbelesi manggo wau pingge towimbihu bulemengio, bo to batangamu lohihilao polupolu wolo palangi wau moleeto. **40** Timongoli mohulodu! Diila maa Allahu Taaala

talohutu towimbihu bulemengio boito, malohutu olo towimbihu delomio?

**41** U woluo todelomo manggo wau pinggemu boito, uitolo umusi wohi maó limongoli totau-tauwalo mosikini. Wolo pohuli boito, ngoáamilalo mamowali belesi olemu. **42** Matopotala timongoli, tau-tauwalo Parisi! Tilapulo lou pilomulomu debo odelo solasi wau denggu-denggu wau lamba-lamba uwewolio, yilohi limongoli ngotayade mopulu ode Allahu Taáala, bo uáadili wau motoliango to Allahu Taáala diila padulio limongoli. Lebe-lebe pamaó uitolo u patutilio pohutuo maó limongoli, lou diila momalongo uwewolio olo. **43** Matopotala timongoli, tau-tauwalo Parisi! Timongoli motohilaa huhuloáa u hehulumatio lotau todelomo bele potabiaalo, wau motohilaa hulumatolio to papaa-taliyaalo. **44** Matopotala! Timongoli debo odelo kuubulu u diilalo opaitalio, u hepo duduutaá lotau lou diila totatota lou tau." **45** Tala ngota guru lo agama loloiya maó odeli Isa, "Paaá Guru, wolo tataa-heyaalo boito, ti Paaá malohina olami olo!" **46** Ti Isa lolametaó, "Matopotala timongoli olo, guguu-ruwaalo agama! Timongoli hemohile wolo moóohuú susuu-aliyaalo u mototolo wau hemongohi wuwuu-uduwaalo u hibuuheta, bo timongoli lohihilao openu bo ngoidi maó diila mohuto motulungi tau moponaó uito. **47** Matopotala timongoli! Timongoli lomongu kuubulu ode mongo nabi, u tumbaó hepilate yila-yilatelo maó linenemoyamu lohihilao. **48** Oditolio timongoli lohihilao lomasisi deu timongoli akolo wolo umaa pilohutu linenemoyamu; sababu memangi timongolio talomate yila-yilatelo maó mongo nabi boito wau timongolilo talo mongu kuubululio. **49** Uito sababuulio Tinepo lo Allahu Taáala lotahuda, 'Wau mamolao mai ode limongolio mongo nabi wau mongo utoliya-U ngotayadu mapateelio mate-matelo maó wau ngotoyadu maa alinayalio!' **50** Allahu Taáala mohutu mai uito alihu tau-tauwala tojamani botie moótapu hukumani sababu timongolio malomate yila-yilatelo maó u pilohutu limongolio tomongo nabi ngoáamila anggadu dunia botie pilopowali, **51** tumulalo maó monto pilomatea olei Habel yila-yilatelo maó demola pilomatea olei Jakaria yila-yilatelo maó uilowali towolota lomesba wau Bele lo Eeya. Pomalacayalo: Tau-tauwalo tojamani botie tantu mahuku-maniyolo sababu ngoáamilalo boito. **52** Matopotala timongoli, guguu-ruwaalo agama!

Uuunti u pomuó huhebu lo pongotota tahutahu to limongoli, bo timongoli lohihilao diila mohuto tumuwoto ode delomio u mololohe pongotota boito. Boliio maó timongoli hemo ngabu-ngabuto tau-tauwalo tahemo tolopani tumuwoto ode delomio!" **53** Tou ti Isa lololaa maó tambati boito, guguu-ruwaalo agama wau tau-tauwalo Parisi helo tulete wolo ulintapo li Isa wolo moóohui. Timongolio mahemo podudulaó totoonulalo yiyintu u motota maó tuango hilaa lotau to o-Lio alihu Tio mohuto mobisala pasali lou dadaata suáli. **54** Wau sambela uito timongolio hemo poótuoto tióotutua o-Lio wau hemololohe totala lou wolo u heloiyaa-Lio.

**12:1** Hilihu-lihua tau hipo huhuuntula tunggula woluo tailo dutaaa to oáatio. Tou tau-tauwalo boito donggo hiambua ti Isa lotahuda maó ode tahidudua o-Lio, "Poódaha-dahaalo maó ragi tau-tauwalo Parisi, makusudu-U omunaapiki limongolio. **2** Diaaluo utuutuó udiila oontonga, diaaluo u hitua-tuawua u sangaja hetuuólo wau diila tamo bonggali. **3** U heloiya limongoli tou hui maódungohe towakutu dulahu; wau u pilolohumi mongoli ode bulonga lotau todelomo huwali heúheúto, mapo malalumu lomola moloópo-oopolo maó." **4** "Poótoloma maó, mongo sahabati-U! Diila maó oohe toli mongolio tamomate batanga mate-mateelo maó bo diila mowali mohutu ulebe maó leeto. **5** Mopiohulo poilaalo-U mai olemu tatoonu tawajibu oohe limongoli. Oohelo mola Allahu Taáala! Sababu lapataó momate mate-mateelo maó, Tio okawasa olo mopomahulo ode delomo nalaka! Pomalacayalo, Tiolo tawajibu oohe limongoli. **6** Dinggota mohelu limo pilotali ngohalaga deeduluo mato lodoi upulito kikiio. Eleponu odito diaaluo penu boli tuwau maó olipata lo Allahu Taáala. **7** Huwoó to lunggongumu olo mailiáapa ngoáamilalo, sababu uito diila maó oohe; timongoli lebe maó ohalaga daá wolo diding-gotawalo boito!" **8** "Poótoloma maó tióotutua: Tamo tolongaku totalu lotaa dadaata deú tio muri-U, tio matoloákuo olo lo Walaó Manusia totalu lo mamaa-laikatiyalo Allahu Taáala. **9** Bo tamomaahu totalu lotaa dadaata deú tio muri-U tio mapaahu olo lo Walaó Manusia totalu lo mamaa-laikatiyalo Allahu Taáala. **10** Wonu tau molojiya u hitua-tuawua lou motehengi Walaó Manusia, tio mowali ambunguolo; bo wonu tio mohina Rohullah, yi tio diila mowali

ambunguolo. **11** Wonu timongoli deloolio ode bebee-leyaalo potabiaala u butoolio totalu lo pamalenta meaalo takawa-kawasa, diila maó polowalo tomimbihu woloolo mola timongoli musi mopodulua batanga meaalo tomimbihu wolo umusi loiya limongoli. **12** Sababu wolo umusi loiya limongoli boito maaajalio lo Rohullah olemu to wakutuulio." **13** Ngotaalio towolota lotaa dadaata loloiya odeli Isa, "Paaá Guru, nte ahuli maó li Paaá wutato lowatia molayadei halata ngotayadu monto halata u tilolaa maó liyamo lamiaatia." **14** Ti Isa lolametaó, "Wutato, tita talomuduó ola-U lowali hakimu meaalo tamooloyade pusaka towolota limongoli duulota?" **15** Lapatio maó totaa ngoáamila tawoluo teto, ti Isa lotahuda, "Poódaha-dahaalo maó wau poulintapolo mola, diila bolo timongoli mowali tamaá. Sababu tutumulo manusia diila tolomodu mohalapu to okokayalio, eleponu halataalio laba-labaalo daata." **16** Lapataó ti Isa lohungguli maó pohumaya botie, "Woluo taakaya ngota. Tio ohuta u hemongohi tilapulo ngohuntua daá. **17** Taakaya boito mahemo mikiilangi mola todelomo hilaalio, 'Madidu otambati poli u polahuwalo tilapulo hutau. Wolo aakaliu botia?' **18** Lapataó tio muli lomikiilangi mola wau loloiya to batangalio lohihilao, 'Naa, wau oáakali; yibungui mapei longgalui tulusi mapei bongui ulebe udaá maó. Mota teto matahuwou paleu ngoáamila wau wolo babalangiui uwewo. **19** Lapataó maloiyai maó to batangai lohihilao: Yio mapilaaeda! Totoonulalo umopio malo tapumu wau diila huáa mopulito ngotilonggadu ota-otaunualio mola. Pohuhelilo masaatia! Polamelolo pongilulo wau niimatiyalo tutumulumu!" **20** Bo Allahu Taála lotahuda mai olio, 'Wuu tamohulodu! Tohuilo botie yio maamate, lapataó tatoonu tamaa moótapu ngoáamila okokaya u mailimoumu ode batangamu boito?' **21** Odieelo mola waliilio lou timiidu tahemo tolopani mowali kaya ode batangalio lohihilao, bo diila motolopani mowali kaya tomato lo Allahu Taála." **22** Lapataó ti Isa lotahuda maó to tahiduduá o-Lio, "Uito sababuulio Wau motahuda mai, 'Diila maó polawalo tomimbihu tutumulumu, wolo uma polameli mongoli, meaalo wolo uma pomake limongoli.' **23** Tutumulo botie lebe maó lou aalo, wau batanga lebe maó wolo pakeyangi. **24** Poótuota maó bubuu-lungiyalo paaó! Timongolio diila helo pomulo, diila helolipu, diila olo ohudungu meaalo oyibungo. Bo

Allahu Taáala helolaala olimongolio! Timongoli lebe ohalaga daá wolo bubuu-lungiyalo boito! **25** Tatoonu towolota limongoli wolo ololawalio mowali mopohayaó tutumulio eleponu bo ngoidi? **26** Wonu suáli debo odelo kikiio leeto olo, madiila mowali pohutuo limongoli, yilongola molawalo u wewolio? **27** Poótuota maó woloolo mola bubuu-ngawaalo patihu boito mobutu; bubuu-ngawaalo boito diila hipo kalajawa, diila olo hipo hewola; Bo Olongia Salomo taóditu kayalio olo diila helomake boó u odito piohio odelo bubuu-ngawaalo boito! **28** Huóyoto tohuta datahu wau luasi mobutu dulahe botie wau loombu mola mapobuolio tunggula maahu. Openu boli odito Allahu Taáala helo podadai huóyoto boito odito piohio. Tidiyolo maó timongoli! Bo timongoli diila boti palacaya! **29** Oditolio, diila maó polawalo wau polingu tomimbihu wolo uma polamelu wau yilumolo. **30** Susuu-aliyaalo debo odelo uito heilapita lotaa diila motota lo Allahu Taáala. Lebe-lebe pomaó otaawa lo Allahu Taáala limongoli deu timongoli palalu ngoáamilalo boito. **31** Bo timongoli musi motolopani alihu Allahu Taáala momalenta to tutumulumu, yi uwewolio boito mawohi lo Allahu Taáala olo olemu. **32** "Timongoli u bo ngoidi jumulaalio, diila maó oohe! Sababu Allahu Taáala limongoli sanangi mongohi mai olimongoli balakati monto Pomalenta-Lio. **33** Potaliyalo milikimu wau wohia mota doilio ode taa mosikini. Pohutua maó ode batangamu lohihilao dompeti udiila mowali moodulo, deu-to-yito halata u tilahu tosologa. Halata boito diila mowali mooli sababu tamootaówa diila mowali mohama wau wale olo diila mowali mopolusa maó. **34** Sababu toutoonuu halatamu teto olo hilaamu!" **35** Poódaha-dahaalo maó motaalua lotimiidu suáli. Timongoli musi laito dapadapato mohiboó wau tohemu debo leileiito, **36** tutuwauwa odelo tahi pomayawa tadonggo dapadapato hemohima oli tuanilio mohualingai monto potihunggu lonika. Wonu tituani boito mohualingai wau mongokoá huhebu, timongolio mahuáa momuó huhebu. **37** Donggo boli paédaalio tahi pomayawa u odungga donggo hemohima towakutu tituanilio meidungga mai. Pomalacayalo: tituani boito mamoti dapato wau mopoáhu maó tahi pomayalio boito motihuloáa, tulusi tio mohinta olimongolio. **38** Donggo boli paédaalio tahi pomayawa boito wonu tituani limongolio moódungga olimongolio donggo hiwimawa,



eleponu tio meidungga to tomutaá lou hui meaalo lebe moboyu mai woleeto! **39** Eelai maó utie! Wonu otaawa lotaa ohuuwo lobele jamu ngoolo tamootaówa monaó mai, tio mamó poódaha alihu tamootaówa diila tumuwoto ode delomo belelio. **40** Sababu uito timongoli olo musi motidapato sababu Walaó Manusia mamei dungga mai tosaaáti udiila helantobu limongoli." **41** "Eeya, wolo pongaajali boito pilomatuju lo Eeya ode mongowatotia meaalo totaa ngoáamilalo?" yilintu maó lei Petrus. **42** Eeya lolametaó, "Tatoonu tamoomayawa u tatapu wau molotolo hilao wau molinepo tilinggula piluduó lituanilio mowali tauwa lo tahi pomayawa wewolio alihu tio mopotamela olimongolio to wakutuulio? **43** Donggo boli sanangilio tamoomayawa boito wonu tituanilio mohualingai wau moódungga olio donggo hemoponaó tuugasilio! **44** Pomalacayalo: Tituani boito mamó pomalacaya maó ngoáamila halataalio to tamoomayawa boito. **45** Bo wonu tamoomayawa boito molojiya todelomo hilaalio, 'Tuani donggo mohiheo watia mohualingai,' tulusi tio momate ngoáamila tamomayawa wau molamelo mongilu tunggula huwoáalo, **46** yi tituanilio mamó hualingai todulahu wau jamu udiila ota-otaawa maó. Wau tamoomayawa boito mapateelio mongo-mongongotolo maó lituanilio wau pohutuolio ngopaladu wolo tau-tauwalo tadiila modungohe to Allahu Taáala. **47** Tamoomayawa tamotota hilaalio, bo diila motidapato wau diila mohutu u kahandakio lituanilio boito, mabuboálio mongo-mongongotolo maó. **48** Bo tamoomayawa tadiila motota u otohilaalio lituanilio, lapataó mohutu hitua-tuawua utalatala tilinggula musi buboálo, yi mabuboálo lou moheelo wambaó. Sababu taa u mailohia dadaata, monto olio mopohilelio wolo moóohuu u dadaata olo. Wau tamaa pilo-malacaya maó udadaata, monto olio mapohilelio wolo moóohuu u dadaata olo." **49** "Wau dungga-dungga mai mopotoodei u moópobu todunia botie. Donggo boli piohio wonu tululio madilumeito! **50** Donggo woluo polodutolo polu-polutuó umusi dutola-U. Wau hilaalio-U balisa daá tou uito boito diipo motoduo mai. **51** Wolo to lantobi mongoli Wau meidungga mai modelo polodame ode dunia? Diila, diila polodame bo wambaó pololawani. **52** Tumula maó botia ungaalaa tilitangoa lou limolota tinggai motehengia, toulota moluwali taduulota meaalo taduulota moluwali

tatoulota. **53** Tiyamo mamoluwali walaio talolai wau walaio talolai mamoluwali oliyamolio. Tiilo moluwali walaio bua wau walaio bua mamoluwali oliilolio. Tiilo moluhengo mamoluwali moluhengio bua wau moluhengo bua mamoluwali tiilo moluhengio." **54** Ti Isa lotahuda maó olo totaa dadaata, "Wonu timongoli moóonto heengo mobotulo ode ambahu otolopa, timongoli huáa molojiya, 'Madidiyalo.' Wau otu-otutuulo maó dilidia mai. **55** Wonu timongoli moólaasa dupoto meidungga mai monto hulialio, timongoli mamolojiya, 'Mamopatu mai' Wau otu-otutuulo maó mopatu. **56** Timongoli taa u motohilaa diila otu-otutuulo maó! Timongoli mowali motakusili lou momilohe owowoluwoa lohulungo wau dunia. Yilongola tutuuotaalo jamani botie diila mowali takusilio limongoli?" **57** "Yilongola timongoli diila molantu lohihilao wolo ubanali? **58** Wonu wولو tau mopodulohu olimongoli ode bubutoó, tolopania maó tióotutua u mopoo lapato palakala boito wolio tou timongoli donggo tohuungo dalalo. Wonu diila, de tio tamodedea olimongoli ode talu lobutoó wau butoo boito mamohudu olimongoli ode Pulisi, wau Pulisi mamopo tuwoto olimongoli ode delomo tutupa. Pomalacayalo! **59** Timongoli diila talumualai monto tutupa boito tou diipo moóbayali dintamu ngoáamila."

**13:1** Towakutu boito tau lohungguli maó li Isa tomimbihu dengolo lota taulo Galilea tapilate lei Pilaatu, tou timongolio donggo hemo podewo bake ode Allahu Taála. **2** Lomaahamu silita boito, ti Isa lotahuda maó, "Sababu tau-tauwalo Galilea boito pilatelio yila-yilateelo maó debo odelo uito, wolo helantobu limongoli uito bukutiilio timongolio lebe odusa wolo ngoáamila taulo Galilea uwewolio? **3** Sama-samaata diila! Bo eelai mola: wonu timongoli diila molilihu monto duduu-sawaalo limongoli, timongoli ngoáamila debo mate olo, debo odelo timongolio. **4** Woloolo mola olo wolo mopulaa walulota tailate to Siloam, tou monala boito lolemba olimongolio? Wolo uito tolantobi mongoli mopobayahei olimongolio lebe odusa wolo tau-tauwalo wewo tabilu-biluloá to Yerusalemu? **5** Sama-samaata diila! Peéntapo potahuda-U mai; Wonu timongoli diila molilihu monto duduu-sawaalo limongoli, timongoli ngoáamila maamate olo debo odelo timongolio." **6** Lapatao uito ti Isa malo hungguli olo

pohumaya botie, "Woluo tahingota-ngotawa obungo lo ayu ara to ilengi lo anggurulio. Todulahu tuwau lonaó tio mota lopeehu hungo lo ara boito, bo diila loótapu openu bo ngobotu. **7** Oditolio, tio loloiya maó to tamoo-kalajawa ilengilio, 'Bilohi, matolo taunu watia hemonaó mai mopeehu hungo lo ara u tobungo lo ara botie, bo diila hemoótapu openu bo ngobotu. Luwodelo bungo lo ayu boito! Tio bo hemo poópulito sati lou aalo monto huta!" **8** Bo tamoomengia boito lolametaó, 'Huliaalo maó tio tumutumulo tou ngotaunu pomola, Tuani. Watia mamomati huta topalitio wau dutuwalo puupuki. **9** Tanu tio de momungo mai totaunu talutalu botie. Bo wonu diila, mowalilio ti Tuani mei luwodeó'. " **10** Tou dulahu Saabati tuwau, ti Isa longajali tobele ngowale potabiaalo. **11** Mota teeto woluo taabua ngota tamaa mopulaa walu lotaunu mongongoto, sababu woluo rohu u moleeto todelomo batangalio. Taabua boito bunggu wau sama-samaata diila mowali timihulo motulidu. **12** Tou ti Isa loóonto olio, maa ilibode li Isa tio, "Ibu, ti Ibu molopato monto ngongoti Ibu!" **13** Lapataó ti Isa loleaapu maó yimbupulu lotaabua boito, wau to saaátalo boito tio matilimihulo lotulidu tulusi lomuji Allahu Taáala. **14** Tauwa lobebe potabiaala boito moloingo, deu ti Isa lopoóluli tau todulahu Saabati, sababu uito tio loloiya maó totau-tauwalo, "Woluo wolonggui mola u mokalaja; ponáolo mai to duduu-laheyaalo boito mei poóluli, diila maó todulahu Saabati!" **15** Eeya lolametaó, "Munapiki timongoli botie! Todulahu Saabati ngoáamila tau momuli sapi meaalo kolodailio monto lantunga wau deloolio ode bulemengio mota pelumolio. **16** Naa, tea botia woluo taabua ngota wali mai lei Abraham, uma mopulaa walu lotaunu hiheolio ilotihuta lo Ibilisi. Wolo tio diila mowali huliyalo to tihutalio todulahu Sabati?" **17** Totameti Isa boito maloóhutu mumuu-suwaalo li Isa loolito daá; bo ngoáamila tau-tauwalo wewolio sanangi loóonto tilolahepaalo moólinggolabe u pilohutu li Isa. **18** Ti Isa lohintu maó, "Wonu bolo Allahu Taáala momalenta, tingga woloolo mola owowoluwoalio? Mahinta woloolo mola mowali pobandingiyo-U maó? **19** Owowoluwoalio debo odelo pohumaya botie. Bili losawi ngobotu hilama lo tahingota-ngotawa tulusi pilomulolio to ilengilio. Bili losawi boito malobutu mai tulusi lowali ayu ngobungo, wau bubuu-lungiyalo mai lohutu

beelealio to tataa-ngowaalo ayu boito." **20** Peéentapo ti Isa lohintu maó, "Wonu Allahu Taaala momalenta, mahinta woloolo mola mowali pobandingiyo-U owowoluwoalio? **21** Owowoluwoalio yito debo odelo ragi u hilama lotaabua ngota wau ilulau wolo wopato pulo loliiteli labu, tunggula lolesi ngoáamilalo." **22** Todelomo nonaó ode Yerusalemu, ti Isa lolibaya to kokoo-tawaalo wau kakaa-mbunguwalo sambela helo ngaajali. **23** Lapataó woluo talohintu o-Lio, "Paaá, wolo bo ngoidi wambaó taa umapo aahuwolo?" **24** Ti Isa lolametaó, "Potolopanilo u tumuwoto moli huhebu umeepito. Sababu, eelai! Dadaata tahemo tolopani tumuwoto bo diila mowali. **25** Towakutu taa ohuuwo lobeles mobongu wau moheúta huhebulio, timongoli hitihula to bulemengio wau hemo ngoko-ngokoó sambela hemoloiya, 'Tuani, huówalo mai huhebu olamiaatia!' Tituani boito mamolametai, 'Diila otaawa lowatia timongoli lonto utoonu!' **26** Timongoli mamolameta, 'Amiaatia malo lamelo wau longilu woli Tuani, wau ti Tuani malo ngaajali olo to dadaa-lalaalo lokota lamiaatia!' **27** Boti Tuani boito mamoloiya poli, 'Diila otaawa lowatia timongoli lonto utoonu. Pohinggi maó montee, timongoli tahipo hutua u moleeto!' **28** Tou timongoli moóonto olei Abraham, Isihaka wolei Yako wau ngoáamila nabi hiwengahe todelomo Dunia Bohu lo Allahu Taaala, mahumoyongo timongoli wau modutolo sababu timongoli lohihilao polahilio ode bulemengio! **29** Tau-tauwala mamonaó mai monto tiimulu wau otolopa, monto tilayo wau hulialio, wau mamoloiya tiwengahe todelomo Dunia Bohu lo Allahu Taaala. **30** Tutuulio tutu, woluo tapulitio mamowali tabohulio, wau woluo tabohulio mamowali tapulitio." **31** Towakutu boitolo, woluo dengolo lota taulo Parisi lonaó mai odeli Isa wau loloiya, "Diila maó potitola tewe! Naólo ode tambati uwewo, sababu tei Herodes ohilaa momate mateelo maó ole-Mu." **32** Ti Isa lolametaó, "Ponaólo poótaa maó totaa diila ohunalio boito, 'Dulahee botie wau loombu Wau mopolahi rohu u moleeto wau mamoloiya poóluli taa mongongoto, bo todulahee otolulio, Wau mamopoó lapato kalajaa-U.' **33** Openu odito Wau mamusi mopotolonga mola lo nonaó-U todulahee botie, loombu wau loombu ngonu, sababu diila mopiohu nabi ngota pateelio mate-mateelo maó to bulemengo Yerusalemu. **34** Yerusalemu, Yerusalemu! Mongo nabi hepilatemu yila-yilateelo maó!

Motiidu tamailao mai lo Allahu Taála hepilaimu lobotu tunggula yilate! Mapoo ngoolo Wau ohilaa moloopu tuango lipumu odelo tiilo lomaluó modaha mongo walaio towalungo polipio, bo yio diila mohuto! **35** Sababu uito Allahu Taála diilalo wolemu. Ototai maó, tumula maó botia yio diilalo moóonto ola-U, tunggula yio molojiya, 'Mabala-balakatilo Tio tadungga-dungga mai to tanggulo Eeya.' "

**14:1** Todulahu Saabati tuwau ti Isa lonaó lolamelo tobele ngotaalio lo Parisi taó tanggulo. Teto tau-tauwalo helo poótuoto li Isa loui motombipidu. **2** Yi malonaó mai odeli Isa ngotaalio tamo ngongoto ombongo momatango u oáatio wau uluúlio himata-matanga. **3** Tulusi ti Isa lohintu maó to guguu-ruwaalo agama wau tau-tauwalo Parisi tawoluo teto, "Moduduó wuúdu lo agamanto, tingga mowali ito mopoóluli taa mongongoto todulahu Saabati meaalo diila?" **4** Guguu-lawaaloo agama wau tau-tauwalo Parisi boito bo wambaó lotipoóyo. Tulusi ti Isa lotiangai tau boito wau lopoóluli olio, lapataó lopoáhu olio lonaó. **5** Lapataó uito ti Isa lotahuda maó totau-tauwalo, "Humayaalio ngotaalio limongoli owalaó ngota meaalo sapi tuwau ulodehu ode delomo ali todulahu Saabati, wolo diila huáa bantangalo ode bulemengio walaó meaalo sapi boito tou boitolo?" **6** Diaaluo penu boli ngotaa maó taloo tameto li Isa tomimbihu suáli boito. **7** Ti Isa loóonto maó woluo tahe tiloduo tahi polulaoto tataa-mbatiyalo u mopiohu daá. Sababu uito Tio malongohi pangaajali odie olimongolio ngoáamila. **8** "Wonu bolo timongoli toduwolio ode potihungu lonika, diila maó potihuloáa tokadela uhulu-hulumati. Sababu diila otaawa bolo woluo ngotaalio wewo talebe polohuna daá wolemu matilo duwolio olo, **9** tilinggula taa ohuuwo lobebe tamaa loloduo olimongoli duulota boito, wolo pakusa monaó mai ode olemu wau molojiya, 'Maaapu, tambati botie mapilohetu ode tamu boito.' Yi wolo woolito daá yio bolo pakusa motihuloáa totambati to dibalaka daá. **10** Sababu uito, wonu timongoli toduwolio, polulaotolo tambati u to dibalaka daá, alihu taa ohuuwo lobebe mamonaó mai ode olemu wau molojiya, 'Tamani, toduwolo motihuloáa totambati ulebe mopiohe.' Loui odito timongoli hilulumatilio totalu lo ngoáamila tatiloduo uwewo. **11** Sababu timiidu tamopolaió lobatanga

mapo dupapaalio, bo tamoti dupapa lobatanga mapolaiolio." **12** Tulusi tahuda maó li Isa totaa ohuuwo lobe, "Wonu bolo yio moloduo tau ode potihunggu molamela dulahu meaalo melamelo hui, diila maó poloduo tamani meaalo wutato, meaalo mongo ilaato, meaalo tiheedumu takaya. Sababu de timongolio tamaa moloduo olemu olo, wau lou odito yio mololimo pahala to huhutuumu. **13** Oditolio, wonu bolo yio mohutu potihunggu, todawaalo taa mosikini, taa o aibu, taa didu mowali monao, taapitoo. **14** Yio mabalakatia-Lio mai, sababu tau-tauwalo boito diila tamoó baalasi opopiohumu. Opopiohumu mawohia mai pahala lo Allahu Taála tou tau-tauwalo tamopiohu muli potumulo-Lio mai monto opopate. **15** Tou tala ngota talo lamelo pee-peeenta teto loodungohu tahuda li Isa, tio loloiya, "Paeda daa taa uma molamelo pee-peeenta wolo Allahu Taála wonu Tio meidungga odelo Olongia!" **16** Boti Isa lotahuda maó ode tau boito, "Towakutu tuwau woluo ngotaalio talohutu potihunggu uleidaa wau loloduo taa dadaata. **17** Tou mawakutuulio u molumulo potihunggu, tau boito lopoahu tamoomayawa olio lonaó ode tahe tiloduo wau loloiya, 'Toduwolo monao mai, ngoamilalo mahidapata!' **18** Bo timongolio ngoamila, ngota-ngota mahi pohilea maapu. Tabohulio loloiya maó ode tamoomayawa boito, 'Watia boheli lotali maó huta ngopita wau palalu mota palakisa lowatia. Maapuwa mai watia.' **19** Tawewo loloiya, 'Watia boheli lotali sapi limo lo panggalo, wau ohilaa yimontalalo sasaa-piyaalo boito. Maapuwa mai watia.' **20** Tawewo poli loloiya, 'Watia boheli lonika maó, sababu uito watia diila moonaó mai.' **21** Tamoomayawa boito lohualingo wau lopoootaa suali boito odeli tuanilio. Tituani boito maloingo daa wau loloiya maó to tamoomayawa olio. 'Huua ponaolo ode dadaalalaalo daa wau huhuu-lupilowalo to kota. Tianga mai taa mosikini, taa o aibu, taapitoo wau taa didu mowali monao.' **22** Lapatao tamoomayawa boito loloiya maó, 'Tuani, palenta li Tuani mapilo ponaó, bo tambati donggo dadaata.' **23** Tulusi tituani boito loloiya, 'Ponaolo mota ode dadaalalaalo daa wau huhuu-lupilowalo to bulemengo kota, wau wuntuli maó tau-tauwalo monao mai, alihu beleu mopolu. **24** Pootoloma maó! Diaaluo penu boli ngota monto tahe tiloduo tamaa tiloduo boito mamoolaasa ualoo potihunggu laatia botie!' " **25** Dadaata tau loduduo lonaó woli Isa. Ti Isa



maloili wau lotahuda mao ode limongolio, **26** "Wonu taa monao mai ode ola-U, bo lebe motoliango oliilolio, oliyamolio, dilelio bua mongo walaio, mongo wutatio, tumbao batangalio lohihilao, tio diila mowali muri-U. **27** Taa u diila mohuto momota salipulio wau moduduó ola-U, diila mowali muri-U. **28** Wonu ngotaalio limongoli motohilaa momongu monala tuwau, tantu tio mamotihuloó molekenipo onggosilio alihu otaawalio wonu doilio moótuheho mopoo lapato monala boito meaalo diila. **29** Sababu wonu moilaalo mai tio diila mowali mopoo lapato uito, lebe-lebe pomaó pandasilio mapilohutu, yi ngoáamila tau u moóonto kalaja boito mamohanti olio. **30** Timongolio mamoloiya, 'Wii, tau botie momongu, bo diila mowali mopoo lapato!' **31** Wonu onlongia ngota taópajule mopuloliu lota motohilaa mopaatea wolo onlongia wewo taópajule dulo puloliu lota, tantu onlongia boito mamotihuloó motimbangipo meimulo wolo tio moó tahangi moluwali musulio boito. **32** Wonu otaawalio u tio diila molotolo, matantu tou musulio boito donggo molamingo, tio mamolao utolialio motaa mohile modaamea." **33** Pulitio maó ti Isa lotahuda, "Oditio olo woli mongoli. Diaaluo penu boli ngotaa maó limongoli mowali muri-U, wonu tio diila mopobake totoonulalo u hitua-tuawua." **34** "Watingo boito mopiohu, bo wonu diilalo olamita tingga mowali muli poó panggelolo?" **35** Diilalo ohunalio, mopio ode halabolu meaalo ode puupuki. Oditolio tapilaalo maó wambaó. Wonu obulonga, podungohulo!"

**15:1** Todulahee tuwau, dadaata tahi potagia beya wau tau-tauwalo tahe anggapuolio diila mopiohu lotuango lipu, mai lodungohe li Isa. **2** Tau-tauwalo Parisi wau guguu-ruwaalo agama mahibiihe. Timongolio loloiya, "Wii, tau botie lololimo tau-tauwalo tadiila mopiohu wau tumbao lolamela woli mongolio!" **3** Masababu uito ti Isa lohungguli maó ode limongolio pohumaya botie. **4** "Humayaalo maó ngotaalio limongoli ohimba ngohetuto lapataó tio iloolia tuwau -- tingga wolo umaa pohutuolio? Matantu tio mololaa maó himba u tio lopulaa tio boito tohuta luasi u pilobutua lohuóyoto, wau mota mololohe u mailooli boito tunggula motapu. **5** Wau wonu muli motapulio mai himba boito, tio mameengahe daá tilinggula himba boito mapotaalio to binggungio, **6** tulusi deloolio

mohualingo. Lapatao tio motiango mongo tamani wau mongo tiheedio, wau molojiya maó, 'Dulo ito motiwengahu. Himbau uilooli maluli lotapui mai!' **7** Naa, oditolo olo tosologa woluo wengahe ulebe udaá totaa ngota odusa molilihu, wolo taa tio lopulaa tio lota tamaa lopiohe wau diila palalu molilihu." **8** "Meaalo humayaalo maó taabua ngota odoi mopulo pita doi talaá, tulusi iloolia ngopita -- tingga wolo umaa pohutuolio? Tio mamó podeito tohe wau mongaato belelio wau mololohe penu boli deutoonu tunggula motapulio doi boito. **9** Tou motapulio mai doi boito, tio motianga mongo tamanilio wau mongo tiheedio, tulusi molojiya maó, 'Wau sanangi daá maluli loodungga doi uilooli. Dulo ito motiwengahu!' **10** Oditolo malaikati lo Allahu Taaala meengahu wonu woluo ngotaalio tamoleeto molilihu monto duduusaalio. Pomalacayalo!" **11** Ti Isa luli lotahuda maó, "Woluo tiyamo ngota owalaó mongo lolai duulota. **12** Tawali-yali loloiya maó olio, 'Paapa, wohia mai ode laatia masaatia botie tayadu lowatia monto okokayanto. Oditolio tiyamolio malo layadeó okokayalio boito towolota lomongo walaio.' **13** Ngoolohui mola lapatio maó walaio tawali-yali boito malo potali tayadio, tulusi lonaó odelipu tuwau u molamingo. Mola teto tio malo poloyali doilio boito lou tumutumulo bo hemo tisa-tisanangi. **14** Tou doilio malo pulito ngoáamila, lipu boito ilodungga lo polobiti daá, tilinggula tio masilikisa. **15** Lapatao tio malonaó mota lokalaja to ngotaalio lotuango lipu teto, tamaa lopoáhu olio ode halabolulio u lodaha boilio. **16** Malo odito polaangio tilinggula tio ohilaa molamela uáalo lo bobooiyaalo boito. Eleponu tio malo odito polaangio, diaaluo maó penu boli ngota tamopo tamela olio. **17** Pulitio maó tio lotota mai loutau wau loloiya, 'Tau-tauwalo tahipo kalajawa toliyamaú o uáalo dadaata daá, wau wau tewe ngopeé yilate lopolaango! **18** Wau mamó monggato wau monaó odeliyamaú, wau molojiya olio: Paapa watia mailodusa to Allahu Taaala wau toli Paapa. **19** Diilalo paatuti watia tanggulalo walai Paapa. Anggapualo maó watia ngotaalio tahemo kalaja toli Paapa.' **20** Yi lomonggatolo tio lohualinga odeli paapalio. Donggo molamingo monto bele, tio mailoontonga lipaapalio. Lou lodehu daá hilaa lipaapalio tilumeteá mota lodunggaya wolio, tulusi longoóde wau lodiilo olio. **21** 'Paapa,' loiya maó lowalaó boito, 'watia mailodusa to Allahu

Taála wau toli Paapa. Diilalo paatuti watia tanggulalo walai Paapa.' **22** Boti paapalio malo tiangai tahi pomayalio wau loloiya, 'Aliheó! Hamaa mai boó u mopiohe daá, wau popakea maó olio. Popohulia maó huálimo to tingongoa lo uluúlio, wau sapatu to oáatio. **23** Lapataó uito podedeái sapi kikiió u molingohu wau olota maó. Ito mamolamela wau motiwengahu. **24** Sababu walaiuuu botie mailate, masaatia luli tilumumulai; tio mailooli masaatia luli lotapu mai.' Tulusi timongolio malohutu potihunggu. **25** Tou boito, walaó tamohuhula donggo to halabolu. Tou tio malo hualingai wau malembidu bele, tio maloó dungohe muusiki wau tahi pongelunga. **26** Tio malo tiango tala ngota lo tahi pomayalio, tulusi lohintu maó, 'Wolo u malowali tobele botie?' **27** Tamoomayawa boito lolametaó, 'Tawali-yali li Tuani malo hualingai! Wau tiyamo li Tuani malei olotaó sapi u molingohu, sababu maluli lotapulio mai walaio todelomo owowoluwoa uloáahu!' **28** Walaio tamohuhula boito maloingo daá tilinggula didu lohuto tio tilumuwoto ode delomo bele. Tulusi tipaapalio yilumualai wau lomaluto olio tilumuwoto. **29** Bo tio loloiya maó, 'Ilotaa-taunuwalio mola hiheolio watia helo kalaja tióotutua toli Paapa. Diipo peéenta maó watia helo buutola topalenta li Paapa. Wau wolo u mailohi li Paapa olaatia? Openu bo batade tuwau diipo peéenta maó yilohi mai li Paapa olaatia u mohutu potihunggu wolo mongo sahabati lowatia! **30** Walai Paapa boito malo poópulita okokaya li Paapa wolo mongobua suntali, bo odito tio lohualingai, pilongolota li Paapa walaó sapi u molingohu olio!' **31** 'Walaiuuu,' tametaó li Paapalio, 'yió laito wolai tewe. Ngoáamila hakuuu hakuumu olo. **32** Bo ito wajibu mohutu potihunggu wau motiwengahu, sababu wutatumuawali-yali boito mailate, bo botia luli tilumumulai; tio mailooli, bo botia luli lotapu mai.' "

**16:1** Ti Isa lotahuda maó to tahiduduá o-Lio, "Woluo taakaya ngota. Tio opogawee ngota tamotota mongulusi doi u hemo ngulusi okokayalio. Taakaya boito lololimo poótaa deú pogaweelio boito malo poloyali doilio. **2** Oditolio matiliyangio mai pogawee tahe mongulusi doilio boito wau loloiya, 'Wolo utie umailo dungoheú tomimbihu olemu? Masaatia, podulohe mai olai wolo wimu-wimumuto tomimbihu kalajamu hemo

ngulusi okokayau. Yio madiilalo mowali pogawee mongulusi doiu.' **3** Yi pogawee boito mahemo mikilangi mola, 'Mawolo u pohutuwoi botia? Tituanii mamopo huheli olai. Momati wai diila molotolo; mohile-hile wai moolito. **4** Wai o aakali; wonu wai mailinggilio, wai musi otamani dadaata tamohuto mololimo olai tobele limongolio!' **5** Oditolio pogawee boito malo tiangai timiidu taa obiloli toli tuanilio. To tabohulio, tio loloiya maó, 'Ngoolo bilolimu toli tuanii?' **6** Tau boito lolametaó, 'Ngohetuto bolinggo yinulo jaitun?' Pogawee boito loloiya maó olio, 'Utie tuladu lo bilolimu. Huloóolo wau aliheó tuladelo maó: limo lopulu.' **7** Lapataó tio loloiya maó totaa oluolio, 'Wau Wutato, ngoolo biloli lowutato?' Tau boito lolametaó, 'Ngolihi lokado pale.' Pogawee boito loloiya olio, 'Utie tuladu lobilolimu. Tuladelo maó walu lohetuto.' **8** Yi tituani lo pogawee tamotota mengulusi doi tadiila juujulu boito helomuji pogaweelio boito sababu huhutuulio u motota boito, sababu tau-tauwala lodunia botie lebe motota mongaatulu ulusani limongolio wolo tau-tauwala tahitumula todelomo u mobaango." **9** Lapataó ti Isa luli lotahuda, tahuda-Lio maó, "Dungohilo! Pomakea maó okokaya lodunia botie u moótapu tamani, alihu wonu okokaya lodunia botie madiilalo ohalaga, timongoli matolimoolio totambati biluloá u ohio-hiheolo maó. **10** Taa u mowali palacayalo to susuu-aliyaalo ukikiió mowali palacayalo olo to susuu-aliyaalo uleidaá. Bo taadiila mowali palacayalo to susuu-aliyaalo ukikiió, diila mowali olo palacayalo to susuu-aliyaalo uleidaá. **11** Oditolio, wonu tomimbihu okokaya lodunia botie timongoli madiilalo mowali palacayalo, tatoonu tamohuto mopo palacaya maó olemu okokaya lo lohani? **12** Wau wonu tomimbihu balangi u mililikiki lotaa wewo, timongoli ilobukuti diila mowali palacayalo, tatoonu tamohuto mongohi olimongoli wolo umowali haku limongoli? **13** Diaaluo maó penu bo ngotaa mowali mokalaja ode tuani duulota; sababu tio malebe motoliango tangota wolo tawewo, meaalo tio malebe tatapu wau molotolo hilao toli tuani ngota woli tuani wewo. Odito olo wolimongoli. Timongoli diila mowali mokalaja ode Allahu Taaala wau ode halata upango olo." **14** Tau-tauwalo Parisi loódungohu ngoáamila upilo tahuda li Isa. Tulusi bo heiiya limongolio Tio, sababu timongolio motohilaa doi. **15** Boti Isa lotahuda maó olimongolio,

"Timongolilo taa u totalu lotaa wewo oontonga otutu, bo otaawa lo Allahu Taáala todelomo tuango hilaamu. Sababu wolo u heánggapuo lomansia lailaió, oontonga dupadupapa lo Allahu Taáala. **16** Butoó uilohi mai lei Musa wau pongaajali lomongo nabi debo pohupohutu demola tomaasa lei Yahya Tamopolihua. Anggadu towakutu boito Habari Mopiohu tomimbihu woloolo mola Allahu Taáala momalenta odelo olongia pilo habarilio mololaalaita. Wau tau hipo makusawa lobatanga u mowali pongawaa umati lo Allahu Taáala. **17** Bo lebe gambangi duólo hulungo wau dunia mooli, wolo hulupu tuwau todelomo Butoó lo Allahu Taáala mowali diila pohupohutu. **18** Tatoonu tamotolaki dilelio bua, lapataó monika wolo taabua wewo, tau boito lojina. Wau taa u monika wolo taabua tamaa tilalakilio, tio olo lojina." **19** "Woluo taakaya ngota. Pakeyangilio himahalea, wau tutumulio ngoáamilalo dadaata timiidu dulahu. **20** Totalu lohuhebu belelio pilopo huloio ngotaalio tamosikini tanggulio Lajarus. Wawaio polupolu lokukudu onana mohutodu. **21** Tio ohilaa molamelo mumuio lou aalo u loduduulahu lonto meja lotaakaya boito. Apula tumbaó malonaó mai lodelita kukudio onana mohutodu. **22** Taa mosikini boito lapatio maó yilate tulusi dilelo malaikati ode tambati hulu-hulumati totili lei Abraham tosologa. Taakaya boito yilate olo wau yilobungio. **23** Todunia lotailate tio sikisa daá. Wau tou tio lomilohe lonteeto mola ode yitaato, tio maloóonto olei Abraham totambati molamingo wau tei Lajarus totili lei Abraham. **24** 'Paaá Abraham!' wuwaatio lotaakaya boito. 'Tolianga mai watia. Ahuli mai tei Lajarus mopolomo lo uluulio todelomo taluhu tulusi mai mopobata maó dila lowatia. Watia sikisa daá todelomo tulu botie!' **25** Bo tei Abraham lolameto, 'Eelai maó walauuu: ngotupa lo tutumulumu yio maloótapu ngoáamila u hipiohe, hiambola tei Lajarus loótapu u hileeleta. Masaatia tio sanangi teea, wau yio sikisa. **26** Uwewolio maó leeto, towolotamu wolami mapilo hutualio liito leidaá tuwau, alihu tamonteea diila mowali odito mola, wau tamola monteeto diila mowali odia mai!' **27** 'Wonu odito, Paaá,' loiya lotaakaya boito, 'watia tióotutua mohile ti Paaá molao olei Lajarus ode bele liyamo lowatia. **28** Woluo limo lota wutato lowatia mota teto. Ahuli maó tei Lajarus mopoéela olimongolio, alihu timongolio diila bolo modehu ode tambati

usikisa botie.' **29** Tei Abraham lolameto, 'Timongolio maó kikii-tabiyaalo lei Musa wau kitabi lomongo nabi! Huliilo maó timongolio moduduó wolo u tulatulade todelomo kikii-tabiyaalo boito!' **30** Bo taakaya boito lolameto, 'Uito diila motuuheta, Paaá Abraham. Bo wonu woluo taamate muli tumumulai wau monaó mai ode limongolio, timongolio mamolilihu monto duduú-sawaalo limongolio.' **31** Bo tei Abraham loloiya, 'Wonu timongolio diila momandungi palenta lei Musa wau mongo nabi, matantulo maó timongolio diila tapalacaya olo, openu boli woluo taamate tamuli tumumulai.' "

**17:1** Ti Isa lotahuda maó to tahiduduá o-Lio, "Suáli umoó sababu tau mohutu dusa tantulo maó debo woluo. Bo matopotala taa u moósababu maó! **2** Lebe mopiohu wonu botu pohilingalo potihutolo to buloólio, tulusi tio pomahulolo ode delomo deheto loui tio mamoo sababu tala ngota lotau-tauwalo tabiasa botie mohutu dusa. **3** Sababu uito, poódahailo! Wonu wutatumu odusa, dinia maó tio. Wonu tio moleée, ambungua maó tio. **4** Wonu tio odusa to olemu poóopitu ngohui wau timiidu monaó mai ode olemu wau molojiya, 'Watia mohile maáapu,' ambungua maó tio." **5** Mongo rasulu malo loiya odeli Isa Eeya, "Yaa Eeya, poolotola mai iimani lomongo watotia." **6** Eeya lolametaó, "Wonu timongoli o iimani debo odelo udaá bili losawi, timongoli mowali molojiya ode bungo lo ayu mulubei botie, 'Pobunggatolo yio wau meilodungolo mola todelomo deheto,' tantulo maó bungo lo ayu botie mamoduduó palentamu." **7** "Humayaalio ngotaalio limongoli owato u hemomadeó to halabolu meaalo hemo himbala himba. Wonu bolo wato boito mohualingai, wolo tio mamolojiya olio, 'Dulo aliheó molameló?' **8** Tantulo maó diila! Boliio maó tio mamolojiya olio, 'Pohetua maó uáalou. Pomakeyalo boó ubelesi wau wimai maó wau donggo hemolameló wau hemongilu; lapataó uito yio mamowali molameló.' **9** Wato boito diila palalu pujiolo sababu malo dungohe palenta lituanilio, diila odito? **10** Odito olo timongoli. Wonu timongoli malohutu ngoáamila upilo malentalio mai olimongoli, loiyawa maó, 'Ami bo wato biaasa; ami bo wambaó mohutu uwajibu olami'. " **11** To nonaó ode Yerusalemu, ti Isa lolibaya to sipatana madala lo Samaria



wau Galilea. **12** Tou tilumuwoto to kambungu tuwau, Tio nilao mai lo tamopulu lota taongongoto lo alipo u mootihela hapato. Timongolio hitihula tou molamingo, **13** wau hiwaatia, "Isa! Tuani! Ponua mai mongowatotia!" **14** Tou ti Isa loonto olimongolio, Tio lotahuda ma, "Ponaolo ode mongo iimamu, pohilea ma olimongolio momalakisa wawaumu." Tou timongolio donggo hinaowa, mailooli ngongoti mongolio. **15** Tou ngotaalio limongolio loolaasa ma deu tio maloluli, tio malo hualingo sambela wenga-wengahe da helomuji Allahu Taala. **16** Tulusi totalu li Isa tio losujudu wau lolapali oduolo o-Lio. Tau boito ngotaalio lo Samaria. **17** Lapatao ti Isa lotahuda ma, "Diila mopulu lota tamaa pilooluli? Matoutoonu taa tiolota? **18** Yilongola bo taa deli botie talo hualingai lolapali oduolo to Allahu Taala?" **19** Lapatao ti Isa lotahuda ma ode tau boito, "Pobongulo, wau naolo. Sababu yio palacaya ola-U, yio maloluli." **20** Dengolo lota taulo Parisi lohintu toli Isa omolua Allahu Taala meidungga mai u momalenta. Ti Isa lolametao, "Pamalenta lo Allahu Taala diila tumulalio wolo tutuuotalo umowali oontonga lotau, tilinggula tau mowali molojiya, **21** 'Dulo, bilohi, botie Tio!' meaalo, 'Teto mola Tio!' Sababu Allahu Taala malo lumulo lomalenta tohuungi mongoli." **22** Lapatao uito ti Isa lotahuda to tahidudu o-Lio, "Mamei dungga wakutuulio timongoli ohilaa momilohe dulahe tuwau monto duduu-laheyaala lo Wala Manusia, bo timongoli diila mowali moonto ma. **23** De tau mamolojiya olemu, 'Bilohi, teto!' meaalo 'Bilohi, tea!' Bo timongoli diila polualao u mololohe olio. **24** Odelo woloolo molo ilato pukapuka tohulungo, wau motinelo monto huudio ode huudio, odito olo de owowoluwoa lo Wala Manusia todulahio. **25** Bo bohu-bohulio Tio musi modutolopo dadaata wau diila tolimoo lotau-tauwalo tojamani botie. **26** Todulahee lo Wala Manusia de poilaalolio, owowoluwoalio odelo tojamani li Nabi Noho tou boito. **27** Tau molamelo mongilu, wau monika; oditolo mola mololaalaita tunggula ti Nabi Noho tilumuwoto ode kapali wau taluhe da leidungga tunggula loosababu tau-tauwala boito lopunungo ngoamila. **28** Wau olo debo odelo tojamani lei Lot. Tau-tauwala hipo lamela hipo ngiluma, hipopo taalia, hipo tolopania halabolu wau pangimba wau hipo mongula bele. **29** Bo tou tei Lot yilumualai lonto Sodom,

todulahu boito tulu wau walilangi lotuhutai lonto hulungo wau lopobinasa olimongolio ngoamila. **30** Odieelo mola owowoluwoalio de todulahee lo Walaó Manusia poilaalolio mai. **31** Todulahee boito taa donggo woluo toitaato watopo belelio diila maó polaahu u mohama babaa-langilio todelomo bele. Odito olo taa donggo to halabolu diila maó pohualingo ode belelio. **32** Eelai mola wolo u malowali todile lei Lot! **33** Taa motolopani mopoáahu tutumulio, maóolia lo tutumulio. Bo taóolia lo tutumulio mapoáahuwolo. **34** Pomalacayalo: Tohui boito, duulota tadonggo tuutuluhu toheetule tuwau, ngota madeloolo; wau ngota tolaalio maó poli. **35** Mongobua duulota donggo hemo hilinga pale, ngota madeloolo wau ngota tolaalio maó poli. **36** Taduulota donggo hemokalaja to halabolu, ngota madeloolo, wau ngota tolaalio maó poli" **37** Tahiduduá li Isa malohintu maó, "Mamowali toutoonu uito Eeya?" Ti Isa lolametaó, "Toutoonu omilate, teto obulungi mongongala milate."

**18:1** Lapataó uito ti Isa lohungguli maó pohumaya tuwau u longajali to tahiduduá o-Lio alihu timongolio laito moduá wau diila maó mopulito halaapani. **2** Ti Isa lotahuda maó, "Tokota tuwau woluo hakimu ngota tadiila moohe to Allahu Taáala, wau diila momandungi openu boli olita. **3** Tokota boito woluo olo janda ngota tamaa poó-poódaata helo taalua woli hakimu boito mei podulua to palakalalio. 'Tulungi mai watia motaalua wolo musu lowatia,' loiya lojanda boito. **4** Dengolo mola hiheolio tihakimu boito diila lohuto lotulungi janda boito. Bo pulitio maó tihakimu boito helo mikiilangi mola, 'Eleponu wau diila moohe to Allahu Taáala wau diila momandungi penu boli olita, **5** bo sababu janda botie laito bo momuyu olau, lebe mopiohu wau mamopo podulua palakalalio. Wonu diila, tio mamolo laalaaita monaó mai wau mopoósuusa olau'. " **6** Tulusi Eeya lotahuda maó, "Poótuota maó wolo uiloiya lihakimu tadiila adili boito! **7** Naa, wolo Allahu Taáala diila tamo podulua palakala lo umati-Lio lohihilao tahi pongibode o-Lio hui wau dulahu? Wolo Tio mamopo lohudu lowakutu mai motulungi olimongolio? **8** Pomalacayalo: Tio mahuáa mopodulua palakala limongolio! Bo wonu Walaó Manusia meidungga mai, wolo donggo odungga taa palacaya o-Lio todunia botie?" **9** Ti Isa

lohungguli maó olo pohumaya botie u pilomatuju-Lio ode tahe monganggapu dupadupapa taawewo, bo yakini deu batangalio lohihilao mopiohu. **10** Tahuda maó li Isa, "Woluo taduulota lonaó ode Bele lo Eeya mota loduá. Ngotaalio taulo Parisi, tawewolio ngotaalio tamootagia beya. **11** Taulo Parisi boito tilimihula lotiwiwi wau loduá, 'Oo Allahu Taáala, wototia molapali oduólo to Allahu Taáala, sababu watotia diila debo odelo taawewo, talanggamu, hale diila motulidu meaaló hemojina. Watotia mosukuru sababu watotia diila debo odelo tamootagia beya boito. **12** Watotia hemo puasa poólo ngodiminggu, wau watotia hemo podewo to Eeya ngotayade mopulu monto ngoáamila tilapulo watotia.' **13** Bo tamootagia beya boito tilimihula tou molamingo wau tumbaó diila buheli lumanggela ode hulungo. Sambela hemoleaapu duhelio tio maloloiya, 'Oo Allahu Taáala, ponua mai watotia, taa odusa botie!' " **14** "Pomalacayalo," tahuda maó li Isa, "tou malo hualinga ode bele, tamootagia beya boitolo tatilolimo lo Allahu Taáala wau diila taulo Parisi boito. Sababu timiidu tamopolaió batangalio mapo dupapaalio; wau timiidu tamopo dupapa batangalio mapolaiólio." **15** Woluo tau-tauwalo talodelo mai taukekeei odeli Isa alihu Tio moleaapu wau mobalakati olimongolio. Tou tahiduduá li Isa loóonto maó, timongolio maloingo totau-tauwala boito. **16** Boti Isa malo tiangai taukekeei boito tulusi lotahuda maó to tahiduduá o-Lio. "Hulii maó taukekeei boito monaó mai ode ola-U! Diila maó dinia timongolio, sababu taa debo odelo utieelo tamowali pongawaá umati lo Allahu Taáala. **17** Eelai maó! Taa diila motaalua wolo Allahu Taáala debo odelo taúkikiia ngota, diila mowali pongawaá umati lo Allahu Taáala." **18** Tauwa ngota lo Yahudi lohintu maó li Isa, "Paaá Guru tamopiohu, watia musi mohutu wolo alihu mowali mololimo tutumulo tutu wau ohiheo-hiheolo maó?" **19** "Yilongola heloiyamu Wau tamopiohu?" yilintu li Isa olio. "Diaaluo tamopiohu, ngopohia Allahu Taáala wambaó. **20** Maa ilotaawamu ngoáamila palenta lo Allahu Taáala: 'Diila maó pojina, diila maó pomate mateelo maó, diila maó potaó, diila maó posakusi yimbulo, wau hulumatia maó tiilamu wau tiyamamu.' " **21** "Ngoáamila palenta boito madiluduá lowatia tou watia donggo muda mai," tametaó lotau boito. **22** Loódungohe uito, ti Isa lotahuda maó, "Donggo woluo suáli tuwau umusi

pohutuwomu: Potaliyalo ngoáamila milikimu, wohia maó doilio totaa mosikini, wau yio mamootapu halata tosologa. Lapataó ponaólo mai moduduá ola-U." **23** Bo tou tau boito loódungohe uito, tio tilapakulu sababu tio kaya daá. **24** Otaawa li Isa tau boito tilapakulu, sababu uito tio lotahuda maó, "Suukali daá taakaya mowali pongawaá umati lo Allahu Taáala. **25** Lebe gambangi unta tuwau tumuwoto huwango dudetu, wolo taakaya ngota tumuwoto ode Dunia Bohu lo Allahu Taáala." **26** Tau-tauwalo taloo dungohe li Isa lotahuda odito malohintu, "Wonu odito, tatoonu tamowali moáahu?" **27** Tametaó li Isa, "Udiila mowali ode manusia, mamowali ode Allahu Taáala!" **28** Tulusi tei Petrus loloiya maó, "Bilohilo! Amiaatia malo lolaa maó ungaalaá lamiaatia wau loduduó li Paaá." **29** "Pomalacayalo!" tahuda li Isa. "Taa malo lolaa maó belelio, meaalo dilelio, meaalo wutatio, meaalo tiilo wau tiyamolio meaalo mongo walaio sababu momaya to Allahu Taáala, **30** tau boito mabalasiyalo dadaata daá tomaasa botie, wau tomaasa u mamei dungga mai tio mawohialio tutumulo tutu wau ohiheo-hiheolo maó." **31** Ti Isa malongambu mopulu wau duulota tahiduduá o-Lio wiwiwiwi, tulusi lotahuda maó, "Dungohi! Ito masaatia dulu-dulunga ode Yerusalemu. Mola teto, ngoáamila u tiluladio lomongo nabi tomimbihu Walaó Manusia, mamotoduo. **32** Tio mawuduolio ode tau-tauwalo tadiila Yahudi, tamamo hente-henteá o-Lio, mohina, wau monula loiyohé o-Lio. **33** Timongolio mamopo sikisa wau momate mateelo maó o-Lio, bo tou dulahee otolulio, Tio mamobongu mai." **34** Ngoáamilalo boito diila ilotoneá penu boli ngoidi maó lo tahiduduá li Isa boito. Boli lo tataahe-Lio boito hehuliyo-Lio monto olimongolio. Diila otaawa limongolio Tio helo bisala pasali loolo. **35** Tou ti Isa ngopeé meidungga ode Yerikho, ngotaalio tapitoó donggo hulohuloáa hemohile-hile tobiihu dalalo. **36** Tou ilodungohelio taa dadaata boito yilumawodu, tio malohintu, "Owolo?" **37** "Ti Isa, taulo Najaret boito, lawolawodu," loiya maó limongolio ode olio. **38** Yi taapitoó boito malo nguatió, "Isa, walaée Dauda! Ponua mai watotia!" **39** Tau-tauwalo tatotalu, maloingo wau pilei poóyongalio tio. Bo tio lebe loóohuu longuatiá poli, "Walaée Dauda! Ponua mai watotia!" **40** Ti Isa malo huheli wau lopoáhu mota tau lodelo mai ode o-Lio taapitoó

boito. Tou tío leitungga mai, ti Isa malohintu, **41** "Wolo u otohilaamu pohutuwo-U mai olemu?" "Tuani," tametao lotaa pitoo boito, "watotia ohilaa moonto." **42** Tulusi ti Isa lotahuda maó, "Wonu odito, pomilohulo! Sababu yio palacaya ola-U, yio maloluli." **43** Tou boitolo tío malowali loonto, tulusi tío malo duduó li Isa sambela hemo lapali oduolo ode Allahu Taála. Tou taa dadaata boito loonto maó suáli boito, timongolio ngoamila mahipo muji-mujia Allahu Taála.

**19:1** Tou ti Isa leitungga mola ode Yerikho, Tio lonaó tulusi loli kota boito. **2** Tokota boito woluo tauwa ngota tamootagia beya wau kaya. Tanggolio Jakheus. **3** Tio ohilaa momilohe wonu tatoonu ti Isa boito, bo sababu mailaba daatalio lotau wau tío lohihilao limbo-limbongo, yi tío diila lowali lomilohe li Isa. **4** Oditolio, tío matilumeteo lotitimulo wolo tau-tauwalo, tulusi malo miaata ayu ngobungo, alihu moonto li Isa bolo ngopee mola lumaode teto. **5** Tou ti Isa leitungga mota ode bungo lo ayu boito, Tio yilumanggela mola ode yitaato tulusi lotahuda, "Jakheus, aliheo polaahei! Sababu Wau musi mohepita ode belemu todulahee botie." **6** Tei Jakheus ngointa lolaahi wau malohima li Isa loui wenga-wengahu. **7** Ngoamila taloonto suáli boito mahibiihe. Timongolio hipoloiyawa, "Wii! Tio lonaó ode bele lotaa diila mopiohu!" **8** Lapatao tobelelio, tei Jakheus tilimihulo wau loloiya maó li Isa, "Eeya, ngotayadu halata lowatotia maposadaka lowatotia ode taa mosikini; wau titaalo tita tamaa peenta ilaakalia lowatotia, mamuli bayalia lowatotia poopato piúwa!" **9** Tulusi tahuda maó li Isa, "Todulahee botie yio wau ngoamila ngaalaamu poahua mai lo Allahu Taála wau mootoduo tutumulo u bohu, sababu yio olo wali mai lei Abraham. **10** Walaó Manusia leitungga mai u mololohe wau mopoahua taa u yilapalo." **11** Tou tau donggo hidungohe li Isa hemobisala, Tio malo hungguli maó pohumaya tuwau. Sababu, tou boito Tio membideo lo Yerusalemu, wau helantobu lotau deu Allahu Taála mahuáa momalenta odelo Olongia todunia. **12** Ti Isa lotahuda maó, "Woluo tabangusa ngota u lonaó ode lipu molamingo mola hiluwatio lowali olongia, lapatao luli lohualingai. **13** Tou diipo lomonggato, tío lotiangai tamo pululota tahi pomayalio tulusi longohi maó olimongolio

ngota-ngota doi hulawa ngopita. 'Podahangilo wolo doi botie tou wau diaaluo,' loiyaalio maó to limongolio. **14** Bo tuango lipulio boito molonuio. Oditolio, tou tio lomonggato, timongolio malolao mongo utolia mota loloiya, 'Ami diila mohuto tau botie mowali onlongia lami.' **15** Bo tabangusa boito piluduió lowali onlongia, lapataó luli lohualingai ode lipulio. Huáa tiliangio tamoomayawa olio mai lotaalua wolio, alihu otaawalio ngoolo maó paéeda u malotapu limongolio. **16** Tamoomayawa bohulio lonaó mai wau loloiya, 'Tuani, doi hulawa ngopita uilohi li Tuani boito, mapilowali lowatia mopuulo pita.' **17** 'Mopiohu,' loiya maó lituani boito, 'yió tamoomayawa mopiohu! Sababu todelomo susuu-aliyaalo ukikió yió mowali palacayalo, wau mamomuduo olemu taókawasa to mopuulo kota.' **18** Tamoomayawa oluolio lonaó mai wau loloiya, 'Tuani, doi hulawa ngopita uilohi li Tuani, mapilowali lowatia limo lopita.' **19** To tamoomayawa boito ti onlongia maloloiya, 'yió mamowali taókawasa to limo lokota.' **20** Tamoomayawa wewo lonaó mai wau loloiya, 'Tuani, botie doi li Tuani; matilahu lowatia toleto. **21** Moohe watia toli Tuani; sababu ti Tuani tamoingowa daá. Tituani hemohama wolo udiila haku li Tuani, wau ti Tuani hemohimoá tilapulo totambati udiila pilomuloa li Tuani.' **22** Olongia boito malo loiya olio, 'Yió tamoomayawa moleeto! Lotuuúde wolo loiyamu lohihilao, wau mamo hukumani olemu. Otaawamu wau tamoingowa daá; wau hemohama wolo udiila hakuú wau hemo himoá tilapulo totambati udiila pilomulowau. **23** Wonu odito yilongola yió diila lopotuoto doi boito ode bangi alihu wonu wau mohualingai wau mamowali mololimo doi boito wolo lentelio?' **24** Lapataó ti onlongia boito loloiya maó totau-tauwalo tahitihula teto, 'Hamaa maó doi boito toólio wau wohia maó to tamoomayawa u odoi hulawa mopuulo pita boito.' **25** Bo tau-tauwala boito loloiya, 'Tuani, tio maa omopuulo pita.' **26** Olongia boito lolametaó, 'Eelai maó: tamaa ilowoluo, toólio mawohialio lebe dadaata maó. Bo taadiila ilowoluo hitua-tuawua, wolo u mailoluo toólio mamuli hamaalio monto olio. **27** Wau botia delowalo mai mumuusuuú boito tadiila motohilaa olau mowali onlongialio. Pateyalo timongolio ngoáamila mate-mateelo maó totaluu!' " **28** Tou lapataó ti Isa lotahuda maó ngoáamilalo boito Tio lonaó totalu limongolio lotidulungo ode



Yerusalemu. **29** Tou leitungga mola totili lo Betpage wau Betania to Huludu lo Jaitun, Tio lopoáhu duulota tahiduduá o-Lio lotitimulo. **30** "Ponaólo mota ode kambungu u totalu boito," tahuda maó li Isa olimongolio, "Wonu bolo timongoli tumuwoto mola odito, timongoli mamooónto walaó kolodai tuwau u tihutihuto. Kolodai boito diipo peéenta maó tilaéa lotau. Hulia maó kolodai boito wau delowa mai. **31** Wonu tau mohintu olemu, 'Yilongola timongoli lomuli kolodai boito?' polelea maó, 'Eeya palalu leeto.' " **32** Taduulota hiduduá li Isa boito malonaó, wau ilodunggaalio ngoáamilalo tiluhata debo odelo upilo tahuda-Lio. **33** Tou timongolio lomuli walaó kolodai boito, taa ohuiwolio loloiya maó ode limongolio, "Yilongola hilulia limongoli kolodai boito?" **34** Timongolio lolametaó, "Eeya palalu leeto." **35** Tulusi timongolio lodelo walaó kolodai boito odeli Isa. Lapataó timongolio lopo hepideó jumba limongolio towulea lo kolodai boito wau lopotaé li Isa toitaatio. **36** Tou Tio yilumaodeó donggo toitaato kolodai boito, tau-tauwalo helo pohepide jumba limongolio todalalo. **37** Tou ti Isa ngopeé meitungga ode Yerusalemu, todalalo motuhuto to Huludu lo Jaitun, ngoáamila tahiduduá o-Lio u dadaata boito mahiwatiá hemomuji Allahu Taáala wau helo lapali sukuru to o-Lio sababu ngoáamila moólinggolabe u masilakusia limongolio. **38** Timongolio malo nguatió, "Mabala-balakatilo Olongia tadungga-dungga mai to tanggulo Eeya! Salaamati tosologa, wau ilopujialo mola Allahu Taáala!" **39** Ngoolo lota taulo Parisi towolota lotaa dadaata boito loloiya maó odeli Isa, "Paaá Guru, Pei poóyongilo mola tahiduduá li Paaá." **40** Ti Isa lolametaó, "Pomalacayalo! Wonu timongolio motipoóyo, boboo-tuwaalo botie mamonguatió." **41** Tou ti Isa lebe hemembideó wolo Yerusalemu, wau loónto mota kota boito, mahiliyonga-Lio kota boito. **42** Tahuda-Lio maó, "Atiíolo, donggo boli piohio wonu todulahu botie otaawamu wolo u mowali mopotoduo mai polodame! Bo botia yió diila mowali moónto maó. **43** Yió mamooálaasa maasa tuwau, toutoonuu musumu mamohutu popoo-mubulaalo to palitumu; timongolio mamomala olemu wau mohuntula olemu monto totoonulalo tutulio. **44** Timongolio mamoo ngantulu olemu wolo ngoáamila tuango lipumu; wau diaaluo penu boli botu ngobotu mapoluli limongolio meitolaa,

susuusungi to tambatilio, sababu yio diila lopoootuoto saaati tou Allahu Taáala leidungga mai mopoáahu olemu!" **45** Ti Isa tilumuwoto ode Bele lo Eeya wau lolumulo helo polahi to tahipo dahangia teto. **46** "Todelomo Kitabi," Tahuda-Lio maó olimongolio, "tulatuladu odie; Allahu Taáala lotahuda, 'Bele-U mamowali tambati poduáalo.' Bo timongoli lopowali beelea lopohehu!" **47** Timiidu dulahu ti Isa hemo ngaajali to Bele lo Eeya. Mongo iimamu tauwa, wau guguu-ruwaalo agama wolo mongo tauwa lo Yahudi, ohilaa momate-mateelo maó o-Lio, **48** bo diila lootapu dalalo u mohutu maó suáli boito, sababu taa ngoáamila wambaó hemo dungohe laito o-Lio, wau iloáanga to tataahe-Lio.

**20:1** Todulahee tuwau, ti Isa donggo hemo ngaajali wau hemo pohabari Habari Mopiohu monto Allahu Taáala ode tau-tauwala todelomo Bele lo Eeya. Mongo iimamu tauwa, guguu-ruwaalo agama wolo mongo tauwa lo Yahudi, lonaó mai, **2** wau loloiya li Isa, "Nte polelea mai olami dutadutaá tolo yio helohutu ngoáamilalo botie? Tatoonu talongohi haku boito to ole-Mu?" **3** Ti Isa lolametaó, "Wau ohilaa mohintu. Nte polelea mai ola-U, **4** Tei Yahya helo polihu wolo haku lo tatoonu? Allahu Taáala meaalo manusia?" **5** Yi timongolio malo lumulo lodulohupa, "Wonu maloiyanto 'Wolo haku lo Allahu Taáala,' Tio mamoloiya, 'Wonu odito, yilongola timongoli diila palacaya o-Lio?' **6** Bo wonu ito moloiya, 'Wolo haku lomanusia,' taa ngoáamila mamomai olanto wolo botu, sababu timongolio palacaya deu tei Yahya nabi ngota." **7** Oditolio timongolio lolametaó, "Diila otaawa lami." **8** Yi ti Isa lotahuda maó ode limongolio, "Wonu odito Wau olo diila tamolele mai olemu wolo haku lotatoonu Wau malohutu ngoáamilalo botie." **9** Ti Isa lohungguli maó totau-tauwalo boito, pohumaya odie mola, "Woluo ngotaalio talo pomulo angguru to ilengi ngopita. Pilopo seuwalio ilengi boito ode tangolo lota tahi pokalajawa, tulusi lomonggato odelipu uwewo wau mola lotibiluloá lohiheo teto. **10** Tou mawakutuulio molipu hungo lo angguru, taa ohuuwo lo ilengi boito lolao tamoomayawa olio ode tahi pokalajawa ilengi boito mola mololimo tayadio. Bo tahi pokalajawa ilengi boito lomate tamoomayawa boito wau huáa pilei walinga limongolio lou laulau lo uluu. **11** Yi taa ohuuwo lo

ilengi boito luli lolao tamoomayawa wewo; bo debo pilate mai limongolio olo tamoomayawa boito boli hilinaalio lo tahi pokalajawa boito tulusi pilei walingalio wolo laulau lo uluu. **12** Lapatao taa ohuuwo lo ilengi boito lolao mota tamoomayawa otolulio. Bo tamoomayawa boito debo pilatelio olo lo tahi pokalajawa boito wau pilomahuli mongolio ode bulemengo lo ilengi boito. **13** 'Pulitio maó taa ohuuwo lo ilengi boito loloiya, mawolo umusi pohutuwoú poli? Wau mamolao walauuu lohihilao taa otolianguu. Tantu tio mahulumatio mai limongolio!' **14** Bo tou tahi pokalajawa ilengi boito loóonto walaó lotaa ohuuwo lo ilengi boito, timongolio maloloiya ngota-timongota, 'Botie tio taáhali lo walisilio. Dulo pateento tio mate-mateelo maó, alihu motapunto walisilio.' **15** Yi madiledei mongolio tio ode bulemengo ilengi boito lapatao pilate limongolio yila-yilateelo maó." Lapatao ti Isa lohintu mao, "Naa, wonu taa ohuuwo lo ilengi boito mohualingai, mawolo u pohutuolio to tahi pokalajawa ilengi boito? **16** Matantu tio monao mai wau momate-mateelo maó to tahi pokalajawa ilengi boito, tulusi mongohi ilengi boito to tahi pokalajawa wewo." Loódungohe uito, maloloiya tau-tauwala odeli Isa, "Sama-samaata diila!" **17** Ti Isa lomiloheo ode limongolio lapatao lotahuda, "Wonu odito, wolo boliilio ayati lo Kitabi botie? 'Botu udiila ilopomakea pani lo hudungu, malowali botu ulaba-labaalo mopiohu.' **18** Ngoaamila tamodehu tobotu boito mamoaंतulu; wau tatoonu taódeehe lobotu boito mamotoyopu mowali peaahuó." **19** Guguu-ruwaalo agama wau mongo iimamu tauwa motota deu pohumaya boito pilomatuju li Isa ode limongolio. Sababu uito timongolio ohilaa moheupa o-Lio to saaátulo boito, bo timongolio moche totaa dadaata. **20** Oditolio timongolio malo lolohe hiangio u mopiohu. Timongolio losoloi totaa u lotihutu odelo taa ihilasi, wau lopoáhu tau-tauwalo boito lohentobu li Isa wolo totoonulalo yiyintu, alihu timongolio mowali mohudu o-Lio to taóhaku molantu wau to okokawasa li gubolonulu. **21** Yi tau-tauwala tamaa siloloi boito loloiya li Isa, "Paaá Guru, otaawa lamiaatia deu ngoaamila uiloia li Paaá boito otutu. Otaawa lamiaatia olo ti Paaá helo ngaajali lou juujulu tomimbihu kahandaki lo Allahu Taála ode manusia, sababu ti Paaá diila bo wambaó momilohe tau. **22** Sababu uito nte polelea mai li Paaá olamiaatia, moduduó wuúdu lo

agamanto, wolo mowali momayali beya odeli Kaisali meaalo diila?" **23** Bo otaawa li Isa siyasati limongolio. Sababu uito tio lotahuda maó, **24** "Nte pobilohe mai ola-U doi talaá ngopita. Gambali wau tanggulita utie?" "Kaisali!" tametaó limongolio. **25** "Wonu odito," tahuda li Isa olimongolio, "wohia maó li Kaisali, wolo miliki li Kaisali wau ode Allahu Taáala wolo miliki lo Allahu Taáala." **26** Malo patata totalu lotaa dadaata boito timongolio diila loótapu totala penu boli tuwau maó toli Isa. Timongolio bo wambaó hipoóyonga wau hilinggolabe to totame-Tio boito. **27** Dengolo lota talonto palatei lo Saduki lonaó mai odeli Isa. (Timongolio botie palatei taó huhama deú tamailate diilalo mobongu mai.) Timongolio lohintu li Isa, **28** "Paaá Guru, Tei Musa loluladei butoó botie ode olanto: Wonu talolai ngota mate wau diila owalaó, yi wutatio musi monika wolo jandalio alihu moótapu mai wali totaa mailate boito. **29** Peéenta woluo tamohutato pitu lota. Tamohuhula lonika, lapataó yilate diila owalaó. **30** Lapataó taóluolio lonika wolo jandalio, bo tio olo yilate wau diila loótapu walaó. **31** Suáli u tutuuwauwa lowali olo wolo wutatio taótolulio demola taópitulio. **32** Pulitio maó taabua boito yilate olo. **33** Todulahu muli pobongula mai lotaa malo punungo, dile lo tatoonu taabua boito? Sababu pitupitu lotaalo malonika wolio." **34** Ti Isa lolametaó, "Tau-tauwalo tahitumula masaatia botie hiponikawa, **35** bo tau-tauwalo tapaatuti u muli potumulolio mai tou malo punungo, wau tumumulo tojamani u mamei dungga, timongolio diila mowali monika. **36** Owowoluwoa limongolio debo odelo malaikati, wau diila mowali mate. Timongolio yito mongo walaó Allahu Taáala, sababu timongolio maluli bilongulio mai lonto opopate. **37** Tei Musa lohihilao malo poilaalo lou mopatato deú taamate mamuli bongulolio mai. Todelomo tuladio tomimbihu diuto u leileita boito tio longunte Eeya odelo 'Allahu Taáala lei Abraham, Allahu Taáala lei Isihaka wau Allahu Taáala lei Yako'. **38** Naa, Allahu Taáala boito diila Allahu Taáala lotaa yilate! Tio Allahu Taáala lotau-tauwalo tahitumula! Sababu ode Allahu Taáala, ngoáamila tau tumutumulo." **39** Ngoolo lota guru lo agama loloiya maó, "Totameti Paaá Guru mopiohe daá." **40** Sababu uito timongolio diilalo buheli helohintu hitua-tuawua toli Isa. **41** Ti Isa lohintu maó olimongolio, "Wooloo mola mowali loiyalo deú Olongia Tamoo-poáahua boito wali

mai lei Dauda? **42** Lebe-lebe pomaó tei Dauda lohihilao loloiya todelomo Jaburu, 'Eeya lotahuda to Eeyau: Potihuloólo to ambahu olowala-U, **43** tunggula Wau mohutu mumuusuu-Mu taaluku ole-Mu.' **44** Oditolio wonu tei Dauda longunte Olongia Tamoo-poáahua boito 'Eeya', mawoloolo mola Tio wali mai lei Dauda?" **45** Tou tau-tauwala donggo hipo dungohe li Isa hemobisala, Tio lotahuda maó to tahiduduá o-Lio, **46** "Poódaha-dahaalo maó to guguu-ruwaalo agama. Timongolio motohilaa mojalena wolo jumba hayahayaó, wau motohilaa mei hulumati to papaa-taliyaalo. Timongolio motohilaa tataa-mbatiyalo u hulu-hulumati todelomo bele potabiaalo wau to popoo-tihungguwalo. **47** Timongolio hemohimbulo tomongo janda, wau hemohehu belelio. Wau u modepuheó ololeeti mongolio boito, timongolio hemoduá hayahayaó! Hukumani limongolio de mobuheetai!"

**21:1** To Bele lo Eeya, ti Isa loóonto tau-tauwalo tahi kaayawa helo luwango doi ode delomo bulua lodewo. **2** Iloontonga-Lio olo janda ngota tamosikini daá, loluwango doi tombaha dulopita. **3** Lapataó ti Isa lotahuda maó, "Dungohi: janda botie loluwango lebe dadaata wolo ngoáamila taawewo. **4** Sababu timongolio ngoáamila longohi ololebe lohalata limongolio. Bo janda botie, eleponu mosikini tutu, malongohi ngoáamila uwoluo toólio u palaluolio lohihilao u potumulo." **5** Woluo tahipo loiyawa tomimbihu woloolo mola piohio Bele lo Eeya dadaiyalo wolo boboo-tuwaalo u mopiohu wau wolo babaa-langiyalo u pilopodewo ode Allahu Taáala. Yi ti Isa lotahuda maó olimongolio, **6** "De woluo mai saaátilio, ngoáamila u iloontonga limongoli botie malolo hubuolio; diaaluo maó penu boli botu ngobotu tewe u meitolaa susuusungi to tambatilio!" **7** Timongolio lohintu maó li Isa, "Paaá Guru, omolua suáli boito mamotoduo mai? Wau wolo tuotio deu malei dungga saaátilio suáli boito mamotoduo mai?" **8** Ti Isa lotahuda maó, "Poódahailo, diila bolo timongoli o aakalialio. Dadaata taa mamonaó mai lou momake tanggulu-U, wau molojiya, 'Wau lo Tio!' wau 'Mawakutuulio.' Bo timongoli diila maó poduduá olimongolio. **9** Diila maó oohe olo wonu timongoli modungohe habari tomimbihu lo popaatea wau polo malakala. Ngoáamilalo boito musi motoduwopo mai. Bo uito diila

oboliilio deü mawakutuulio kiama." **10** Lapatao ti Isa malo potolonga mola bisalaa-Lio, tahuda-Lio maó, "Bangusa u tuwau mamopaatea moluwali bangusa uwewo wau lipu tuwau mamoluhu lipu uwewo. **11** Teto tea mamotoduo liluhu daá, polobiti, wau wembolo longongoto. Mamei dungga mai susuu-aliyaalo u moótihela hapato wau dahasati tohulungo. **12** Bo tou dipolulio mai ngoáamilalo boito motoduo, timongoli mawaupolio wau alinayalio. Timongoli mabutoolio to bebee-leyaalo potabiaalo wau potuwotolio ode delomo tutupa. Wau timongoli madedeolio ode talu lomongo olongia wau tahi okawasawa sababu timongoli muri-U. **13** Uitolo hiyango olimongoli u mopohabari Habari Mopiohu monto Allahu Taaala. **14** Poóhuiuwaló hilao deü timongoli diila tamolawalo tomimbihu wolo umusi loiya limongoli u mopodulua batanga. **15** Wau lohihilao mamongohi mai tataa-heyaaalo wau tinepo olimongoli, tilinggula diaaluo maó penu boli ngota monto mumuusumu mowali moluwali meaalo momaahu wolo uloiya limongoli. **16** Timongoli mahiyanatio lipaapa wau limaamamu, lomongo wutatumu, lomongo ilaatumu wau lomongo tamanimu. Ngotayadi mongoli mapateelio mate-mateelo maó limongolio. **17** Timongoli malonuó lotaa ngoáamila sababu timongoli muri-U. **18** Bo penu boli huwoó ngopata monto lunggongumu diila tameenggi. **19** Wonu timongoli moótahangi wau sabali, yi timongoli moáahu." **20** "Wonu bolo timongoli moóonto Yerusalemu bilaala lopajule, maótaawa maó limongoli deü kota boito diilalo mohiheo maántuluolio. **21** Towakutu boito mamusi tau to Yudea tumeteó ode hihui-huidea. Timongolio tawoluo todelomo kota mamusi mololaa maó kota, wau timongolio to bulemengo kota diila maó potuwoto ode delomo kota. **22** Sababu duduu-laheyaalo boito tutuulio tutu 'Duduu-laheyaala lo Hukumani Podehuwolo mai', alihu lou odito motoduwolo mola wolo u malei tuladu todelomo Kitabi. **23** Malo moótihela hapato duduu-laheyaalo boito ode taabua tadonggo ombodaá, wau tiilo tadonggo hemo potutu lotaunge. Lipu botie maódungga lou suusa daá, wau Eeya mamó hukumani mai bangusa botie. **24** Woluo tamaa pateelio lobanggo mate-mateelo maó, woluo olo tamaa deloolio odelo tatilawalo ode lilii-puwaalo lotau; wau tau-tauwalo tadiila motota lo Allahu Taaala mamó dutadutaá Yerusalemu tunggula mopulito



wakutuulio u matilantu lo Eeya ode limongolio." **25** "De tomato lodulahu, hulalo, wau popoo-liyamalo maöntonga tutuu-wotalo. Todunia babaa-ngusawalo mamoohe wau molingu motaalua wolo tingohu dupota daá wau oliyoó buoóolo uwali-walihuhu lodeheto. **26** Manusia mamoohe tióopatea motaalua lou wolo u mamotoduo mai to ngoilanggubu dunia botie, sababu tahi kawasawa todulente daá mamowali moáaa-mbulatia. **27** Tou boitolo Walaó Manusia mamei dungga todelomo heengo wolo kawasa wau ololaió daá. **28** Wonu bolo susuu-aliyaalo boito mamotoduo mai, pobongulo wau bintaáa mola lunggongumu, sababu ngopeéepo mai timongoli mapo aahuwolo." **29** Lapataó ti Isa lohungguli maó olimongolio pohumaya odie mola, tahuda-Lio, "Poóbilohe maó bungo lo ayu ara wau ngoáamila bungo lo ayu wewo. **30** Wonu bolo duduungio muda to wohutio mahe oontonga, otaawa maó limongoli deu malembidu sembo lou mopatu. **31** Odito olo wonu timongoli moóonto suáli boito motoduo maótaawa limongoli deu Allahu Taáala mahuáa momalenta odelo Olongia. **32** Ototai maó! Susuu-aliyaalo boito mamotoduo tou dipolulio mai tau-tauwalo tahitumula masaatia botie mate ngoáamilalo. **33** Hulungo wau dunia mamooli, bo tahuda-U debo ohiheo-hiheolo maó." **34** "Poódahawa batangamu, diila bolo timongoli mopusingi daá wolo popoo-tihungguwalo wau mimii-numaniyalo u moóhuwoó, meaalo mailaba momikiilangi susuu-aliyaala lo tutumulumu, tilinggula timongoli diila dapadapato tou dulahee boito tumahuólo mola lumenetai. **35** Sababu Dulahee boito mamei dungga debo odelo talele to ngoáamila tau todunia botie. **36** Poódaha-dahaalo maó, wau poduáalo laito alihu timongoli moó tahangi tou ngoáamila suáli de motoduo mai wau timongoli mowali motaalua lo Walaó Manusia." **37** Ti Isa helo ngaajali to Bele lo Eeya wakutu dulahu wau huilio maó Tio lonaó ode huludu lo Jaitun wau lotitolaa teto. **38** Timiidu dumodupo ngoáamila tau hiponaówa mai ode Bele lo Eeya hemo dungohe pongaajali li Isa.

**22:1** Lameyangi lo Roti Diila Oragi u ilunte Paska malembidei. **2** Mongo iimamu tauwa wau guguu-ruwaalo agama hipololohe dalalo lou poó-poóoyo u momate li Isa mate-mateelo maó, sababu timongolio moohe

totaa dadaata. **3** Lapatao Ibilisi tilumuwoto odelei Yudas tailunte olo Iskariot, deuto-yito ngotaalio lo tamopulu wau duulota tahiduduá li Isa. **4** Sababu uito tei Yudas malonaó mola lodulohupa wolo mongo iimamu tauwa wau wolo mongo tauwa lo tamoo-kawalia Bele lo Eeya pasali woloolo mola tio mowali mohudu li Isa ode limongolio. **5** Timongolio leengahe daá wau lodanti u mamongohi doi olio. **6** Tei Yudas olo akolo wau malopeehu hiyango u mohudu li Isa ode limongolio, lou diila ilotaawa lotau. **7** Malei dungga dulahio todelomo Lameyangi lo Roti Diila Oragi deu himba u pohutu uáalo lo Paska maólotolo. **8** Yi ti Isa lopoáhu olei Petrus wolei Yahya, "Ponaólo podapato maó uáalo lo Paska olanto." **9** "Toutoonuu otohilaá li Paaá podapato maó lamiaatia?" uali mongolio. **10** Ti Isa lolametaó, "Tou timongoli tumuwoto ode kota, talolai ngota tadonggo delodelo bolinggo tuwau tuatuaanga taluhu mamoo dunggaya wolimongoli. Dudui maó tio ode bele u potuwotalio, **11** wau polelea maó totaa ohuuwo lobele boito: Ti Guru loloiya mai, 'Toutoonuu tambatilio lo tahiduduá ola-U wau Wau molamela uáalo lo Paska?' **12** Taa ohuuwo lobele boito mamopotunu mai olemu huwali lopahu tuwau u leidaá, wimu-wimumuto wolo pakakasilio. Podapato maó ngoáamilalo teto mola." **13** Yi malonaó tei Petrus wolei Yahya, tulusi loodungga ngoáamilalo lotuuide debo odelo u tilahuda li Isa. Timongolio olo malopo dapato uáalo lo Paska boito. **14** Tou malei dungga wakutuulio u molamelo uáalo lo Paska boito, ti Isa lotihuloáa pee-peeenta wolo tahiduduá o-Lio totambati polamelalo. **15** Lapatao Tio lotahuda maó olimongolio, "Otohilaá-U daá molamelo uáalo lo Paska botie pee-peeenta wolimongoli tou Wau diipo modutolo sikisa! **16** Sababu, pomalacayalo: Wau diilalo molamela uáalo botie tunggula boliilo totamela botie poilaalolo to Dunia Bohu lo Allahu Taála." **17** Lapatao uito ti Isa lomintaáa hakati lo angguru, tulusi lolapali dua sukuru ode Allahu Taála, lapatao lotahuda maó, "Hamaalo utie, wau taya-tayadelo mota; **18** sababu ototai maó: tumula maó masaatia botie Wau diilalo mongilu angguru botie poli tunggula Allahu Taála mailo kawasa wolo lealeaatulo maó." **19** Lapatao uito ti Isa malohama roti. Wau tou mailapato lolapali dua sukuru, hepili-pilita-Ngio roti boito wolo uluu-Lio tulusi yilohi-Lio maó olimongolio, wau lotahuda, "Uti-utieelo

batanga-U uiludu ode limongoli. Pohutuwalo utie u mopoéela ola-U." **20** Odito olo lapataó lolamelo, Tio longohi maó olimongolio hakati lo angguru boito wau lotahuda, "Hakati botie tutuulio tutu daantia lo Allahu Taáala u bohu, u piloposaaha wolo duhu-U -- duhu u bilanguatai ode limongoli." **21** "Bo bilohi! Taa u mohiyanati ola-U woluo tewe peé-peéenta wola-U. **22** Walaó Manusia memangi maamate odelo woloolo mola u matilantu mai lo Allahu Taáala; bo matopotala taa u mohiyanati o-Lio!" **23** Yi timongolio mahipo hihintua ngota timongota, tatoonu towolota limongolio tamamohutu maó suáli boito. **24** Towolota lo tahidudua li Isa tilumoodu polohamawa tomimbihu tatoonu monto olimongolio tamusi anggapuwolo tapulito udaá. **25** Ti Isa lotahuda maó ode limongolio, "Mongo onlongia lobangusa tadiila motota lo Allahu Taáala hipodeehe ulipulio, wau tahi okawasawa ulipulio tailunte, 'Tamoduólawa Ulipu'. **26** Bo timongoli diila mowali odito. Boliio maó, taa pulito udaá towolotamu musi debo odelo tapulito ukikiio, wau tauwa mamusi mowali debo odelo tamoomayawa. **27** Tatoonu talebe udaá: taa u hulohuloá hemolamela tomeja, meaalo taa u hemohinta olio? Matantu taa u hulohuloá boito. Bo Wau woluo towolota limongoli odelo tamoomayawa. **28** Todelomo totoonulalo polodutolo-U, timongoli laito peé-peéenta wola-U. **29** Odelo woloolo mola Allahu Taáala malongohi palenta ola-U haku u momalenta, odito olo Wau mamongohi mai olemu haku boito. **30** Lou odito timongoli mowali moduduó motisana-sanangi wola-U towakutu Wau mowali Olongia. Wau timongoli mamu tihuloó toitaato mopulaa duluo tambati huhuloá li onlongia u momalenta tomopulaa duluo suku bangusa lo Isirailu." **31** "Simon, Simon, dungehe mai! Ibilisi mailohiya luasi u motesi olimongoli; debo odelo pale yinggilolo monto alipo tilinggula u mopiohu yilinggi monto u moleeto. **32** Bo Wau malodua mola olemu, Simon, alihu iimanimu diila maó moluluto. Wau wonu yio malo hualingai ode ola-U, yio mamusi mopoó lotolaó mongo wutatumu." **33** Tei Petrus lolametaó, "Eeya, watotia ihilasi tumuwoto ode tutupa wau mate peé-peéenta wolo Eeya!" **34** "Pomalacayalo, Petrus," tahuda maó li Isa, "tou maluó diipo mokukuyuu mai todulahee botie, mapoóotolu yio lomahe ola-U." **35** Lapataó uito ti Isa lotahuda maó ode limongolio,

"Mulooolio mai tou Wau lolao olimongoli lou diila lopoluasi olimongoli helodelo dompeti, bututu meaalo sapatu, wolo timongoli ilopulita lolo-lolo?" "Diila!" tametao limongolio. **36** "Bo botia," tahuda maó li Isa, "tatoonu taodompeta meaalo bututu, mamusi modelo uito; wau tatoonu tadiila owamilo, musi mopotali jumbalio mota motali wamilo. **37** Sababu, pomalacayalo, ayati lo Kitabi u tingohio odie: 'Tio ilanggapu odelo tau ngota tamoleeto,' musi motoduo mai tobatanga-U. Sababu wolo u tulatulade todelomo Kitabi tomimbihu-U donggo todutoduo masaatia botie." **38** "Eeya," loiya maó lo tahiduduá li Isa, "bilohi, teea woluo wamilo mohelu duluo." "Sambelolo!" tametao li Isa. **39** Ti Isa lololaa maó kota wau malonaó debo odelo ubiaasa ode Huludu Jaitun, wau tahiduduá o-Lio lonaó olo wo-Lio. **40** Tou malei dungga mota teto, "Tio lotahuda maó ode limongolio, Poduaalo mola alihu timongoli diila maó odusa wonu timongoli yimontalalio." **41** Lapatao Tio lonaó lebe lolaminga ngopee lonto olimongolio, tanu lamingio ngopopai lobotu, tulusi loti bonggohuu wau lodua, **42** "Oo Paapa," ua-Lio maó, "wonu mowali, powalahe maó monto olaa-Tia polodutolo umusi olaasawa lowa-Tia botie. Bo diila moduduó utohilaa lowa-Tia, bo moduduó utohilaa li Paapa wambaó." **43** Malaikati ngota malonaó mai ode o-Lio wau lopoó lotolaó o-Lio. **44** Ti Isa lodutola daá lohilao tilinggula Tio helebe tiotutua lodua. Wula-Tio debo odelo duhu u hilumeheta ode huta. **45** Yilapato lodua, ti Isa luli lohualingai ode tahiduduá o-Lio. Tio loodungga olimongolio donggo hituluhe sababu siluukali daá lohilao. **46** Tulusi Tio lotahuda maó olimongolio, "Yilongola timongoli bo hituluhe? Pobongulo wau poduaalo mola alihu timongoli diila odungga loimontala." **47** Tou ti Isa donggo hemotahuda leitungga mai ngopolemboá tau. Tauwa limongolio tei Yudas, tala ngota muri li Isa. Lapatao tei Yudas lonaó mota odeli Isa wau malodilo o-Lio. **48** Boti Isa lotahuda maó olio, "Yudas, wolo yio lodilo ola-U botie, yio ohilaa mohiyanati Walaó Manusia?" **49** Tou tahiduduá li Isa tawoluo teto looonto maó wolo u mamotoduo, timongolio lolojiya, "Eeya, matuhuwo wambaó lomongo watotia wolo wamilo!" **50** Tulusi tala ngota limongolio lolimadeo wato li iimamu daá wolo wamilo tilinggula loputu bulongalio olowala. **51** Boti Isa lotahuda maó, "Sambelolo!" Tulusi dilede-Tio bulonga lotau boito

wau lopoóluli maó. **52** Lapataó ti Isa lotahuda ode mongo iimamu tauíwa wau mongo polowila tamoo-kawalia, Bele lo Eeya, wau mongo tauíwa lo Yahudi talonaó mai odito u moheúpa o-Lio, "Yilongola Wau botie tamoleeto, tunggula timongoli lonaó mai wolo wamilo wau ayu pangokoo u moheúpa ola-U? **53** Ngohui-ngohui Wau wolimongoli to Bele lo Eeya, timongoli diila loheúpa ola-U. Bo uti-utieelo saaátilio limongoli moponaó uito, saaáti kawasa lou modiólomo modihu poloitohu." **54** Timongolio loheúpa li Isa wau lodelo o-Lio ode Bele lomongo iimamu daá. Tei Petrus lohunuhe lonto u molamingo. **55** Tohuungo pango boito tulu towungolo mapilo leiitio wau tei Petrus mota lotihuloáa peé-peéenta wolo tahihuloáa to palitio. **56** Tala ngota lowato taabua loóonto olei Petrus hulohuloáa tobiihu polulo tulu boito; tulusi wato taabua baito helo poótuoto olei Petrus, lapataó loloiya maó, "Tau botie olo engonti woluo peé-peéenta woli Isa!" **57** Bo tei Petrus malomaahu. Tio loloiya, "Watia sama-samaata diila moótaawa wolo tau boito!" **58** Ngosaaáti lapatio maó, ngotaalio wewo loóonto olei Petrus wau loloiya, "Yio olo ngotaalio limongolio!" Bo tei Petrus lolametaó, "Diila, diila watia!" **59** Tanu ngojamu lapatio maó, ngotaalio wewo poli malo loiya wolo suala daá, "Memangi tau botie muri li Isa, sababu tio taulo Galilea!" **60** Bo tei Petrus lolametaó, "Wolo makusudumu, diila otaawau!" To saaátilo boito, tou tei Petrus donggo hemobisala, maluó lokukuyuu. **61** Ti Isa poli loili maó wau lomilohe olei Petrus. Tulusi tei Petrus loóéela mola to Eeya u malo tahuda olio, "Tou diipo maluó mokukuyuu todulahe botie, yio mapoóotolu lomaaha ola-U." **62** Yi tei Petrus mailumuwalo lonteto wau hilumoyongo mopotide-tideó. **63** Tau-tauwala tadonggo hidahawa li Isa, helo poitohe wau lomate o-Lio. **64** Matolio tilaúbe limongolio wau hepilo hintualio, "Nte tapula tatoonu talomate ole-Mu?" **65** Donggo dadaata tataa-heyaaalo u mohina hepomukaó limongolio o-Lio. **66** Dimodupio mola, mongo tauíwa lo Yahudi, mongo iimamu tauíwa, wau guguu-luwalo agama lotiambu, tulusi lodelo li Isa, ode talu lo Mahakama Agama limongolio. **67** "Poótaawa mai olami," uali mongolio o-Lio, "wolo Yio botie Olongia Tamoo-poáahua?" Ti Isa lolametaó, "Wonu polele-U mai olimongoli, timongoli debo diila tapalacaya. **68** Wau wonu Wau mohintu mai olemu, timongoli debo diila

tamolameto. **69** Bo tumula maó botia, Walaó Manusia mamó tihuloáa to ambahu olowala lo Allahu Taáala Taa Laba-labaalo kawasa." **70** Yi timongolio ngoáamila malo loiya, "Wonu odito, Yio botie Walaó Allahu Taáala?" Ti Isa lolametaó, "odito uali mongoli." **71** Yi timongolio malo loiya, "Diilalo palalu sakusi! Ito maloó dungohu lonto tunggi-Lio lohihilao!"

**23:1** Ngoáamila majalisi boito tilimihulo, tulusi lodelo li Isa ode talu lei Pilatus. **2** Teto timongolio malo potulude o-Lio, "Timongolio loloiya, 'Malotapu lami tau botie hemopo lapalo ulipu. Tio hemo popatu totau alihu diila momayali beya toli Kaisali, sababu heloiyaa-Lio deú Tio yito Almasi, ngotaalio li olongia." **3** Lapataó tei Pilatus lohintu maó li Isa, "Tingga otutu Yio olongia taulo Yahudi?" Tametaó li Isa, "Oditolo loiyamu." **4** Yi loiya maó lei Pilatus ode mongo iimamu tauwa wau taa dadaata boito, "Wau diila loótapu totala penu boli tuwau maó totau botie u pohukuu-maniyalo o-Lio." **5** Bo timongolio lebe hemo huntulaó olo, "Wolo pongaajali-Lio, Tio hemo popatu taa to ngoilanggubu Yudea; bohu-bohulio to Galilea, wau botia matilinggula poli odiamai." **6** Tou tei Pilatus loódungohe uito, tio malohintu, "wolo Tio botie taulo Galilea?" **7** Tou piloótaalio maó deú ti Isa asalii-Lio lonto madala to kawasa lei Herodes, tei Pilatus malolao li Isa odelei Herodess, u tou boito woluo olo to Yerusalemu. **8** Tei Herodes sanangi daá tou loóonto li Isa, sababu malohiheo tio loódungohe pasalii-Lio wau ohilaa momilohe o-Lio. Tio hemo halapu moó sakusi li Isa mohutu u moólinggolabe. **9** Sababu uito tei Herodes heloówoli maó dadaata yiyintu ode o-Lio, boti Isa diila peéenta maó lolameto. **10** Mongo iimamu tauwa wau guguu-ruwaalo agama lotaalua olo teto wau helo potulude wolo moóohuú li Isa. **11** Tei Herodes wau mongo pongowaa lo suludadulio helo poitohe wau lohina li Isa, lapataó pilakealio Tio boó odudaá, lapataó luli yilaolio Tio odelei Pilatus. **12** To dulahulo boito tei Herodes wolei Pilatus, tou muloololio mai mumuusua, maluli lotamania." **13** Tei Pilatus malongambu mongo iimamu tauwa, mongo tauwa, wau ulipu, **14** lapataó loloiya maó olimongolio, "Timongoli malodelo mai tau botie ode olaú wau loloiya deú Tio helo



poolapalo totau-tauwalo. Botia totalu limongoli wau malo malakisa o-Lio, bo wau sama-samaata diila lootapu u moleeto penu bo tuwau maó u hepotuludi mongoli o-Lio. **15** Odito olo huhama lei Herodes, sababu tio olo maluli lolao mai li Isa boito ode olami. Tau botie diila helohutu penu bo tuwau maó upaatuti pohukuu-maniyalo o-Lio wolo hukumani mate. **16** Sababu uito wau mamó muboáa o-Lio, tulusi mopoluli maó o-Lio." **17** Totimiidu lameyangi lo Paska, tei Pilatus musi mopobebasi ngotaalio lotutupa ode ulipu. **18** Ngoáamila tahiambua teto longuatió, "Pateyalo Tio mate-mateelo maó! Bebasia maó tei Barabas olami!" ( **19** Tei Barabas tiluwotio ode tutupa sababu polomalakala ulowali tokota wau sababu polomatea yila-yilatelo maó.) **20** Tei Pilatus ohilaa mopoluli maó li Isa, sababu uito tio luli lobisala peéntapo totaa dadaata boito. **21** Bo timongolio longuatió, "Salipua Tio, salipua Tio!" **22** Lapataó u otolulio tei Pilatus longibode olimongolio, "Bo wolo totalaa-Lio? Wau diila lootapu penu boli tuwau maó totala to o-Lio upaatuti pohukuu-maniyola o-Lio hukumani mate! Wau mamó muboáa o-Lio tulusi mopoluli maó o-Lio." **23** Bo timongolio tulusi hiwatiá lodaá-daáalo maó deu ti Isa musi salipuolo. Wau pulitio maó wuwaatii mongolio lomata. **24** Yi tei Pilatus malo podehu hukumani mate li Isa loduduó utohilaa lotaa dadaata boito, **25** wau lopoluli taa u pilohile limongolio, deuító-yito taa u tiluwotio ode tutupa sababu polo molakala wau polomatea yila-yilatelo maó. Lapataó ti Isa yiludulio ode limongolio u lololimo totoonulalo u otohilaa pohutuo limongolio o-Lio. **26** Yi ti Isa madilelo limongolio. Tohuungo dalalo, timongolio lodunggaya wolo ngotaalio tailunte Simon, u asaliilio mai lonto Kirene, tadonggo tuwo-tuwotai ode kota. Timongolio loheupa olio, tulusi lomakusa olio lomota ayu salipu boito to wulea li Isa. **27** Dadaata taa tunu-tunuhe towulea li Isa -- to wolotalio woluo olo dengolo lota mongobua. Mongobua boito hehiyonga wau hipo hilimutawa li Isa. **28** Boti Isa malomilohe ode limongolio wau lotahuda maó, "Mongobua lo Yerusalemu! Diila maó hiyongi Wau. Hiyongilo mola batangamu lohihilao wau mongo walaumu. **29** Sababu mamei dungga wakutuulio tau mamoloiya, 'Donggo boli paédaalio mongobua tadiila peénta maó ilombodaá, tadiila peénta maó owalaó wau diila peénta maó lopotutu

lotaunge!" **30** Toui boitolo tau mamolojiya to huhuu-iduwaalo, 'Deehilo mai ami!' Wau to huhuu-luduwalo, 'Tambulilo mai ami!' **31** Sababu wonu to ayu udonggo hitumula, tau malohutu debo odelo utie, wolo poli u mapohutuo limongolio to ayu umalo hengu!" **32** Woluo poli taduulota wewo -- duduulotalo tamoleeto -- tadilelo limongolio u hukuu-maniyola mate peé-peéenta woli Isa. **33** Toui malei dungga mola totambati u ilunte "Bakakau," timongolio malo salipu li Isa wolo taduulota tamoleeto boito -- ngotaalio to ambahu olowala wau ngotaalio poli to ambahu oloihi li Isa. **34** Tulusi ti Isa maloduá, "Paapa, ambunguwalo mai timongolio! Diila otaawa limongolio wolo upilohutu limongolio." **35** Pakeyangi li Isa hetila-tilayadio teto towolota limongolio wolo undi. Tau-tauwalo tahitihula teto sambela hibilohe, tulusi mongo tauwa lo Yahudi hipohenteá li Isa wolo loiya, "Tio malo poáahu taa wewo; ntali botia Tio mopoáahu batanga-Lio lohihilao, wonu Tio tutuulio tutu Olongia Tamoo-poáhua tatilulaoto Allahu Taáala!" **36** Mongo pajule olo hemohenteá li Isa. Timongolio lonaó mai longohi angguru molotingo o-Lio **37** wau loloiya, "Wonu Yio olongia taulo Yahudi, poáahuwalo lohihilao batanga-Mu!" **38** Toitaato ayu salipu li Isa, tulatuladu tataa-heyaaalo odie: "Tabotieelo Olongia Taulo Yahudi." **39** Tala ngota lo tamoleeto tasilalipu teto hemohina li Isa. Tio loloiya, "Yio Olongia Tamoo-poáhua, diila odito? Nte, poáahuwalo batanga-Mu wau ami!" **40** Bo tamoleeto ngota poli lodini to tamaniilio boito, loiyaalio maó, "Tingga yio diila moohe to Allahu Taáala? Yio peé-peéenta hilukuu-manilio mate debo odelo Tio. **41** Bo hukuu-maninto duulota memangi malo tuuude wolo huhutuunto. Bo Tio sama-samaata diila ototala! **42** Tulusi tio loloiya, "Isa, Eelai mai watia, wonu Ito meidungga mai odelo Olongia!" **43** "Pomalacayalo," tahuda maó li Isa olio, "Dulahee botie yio mapeé-peéenta wola-U to Pirdaus." **44** Otanu dulahee totaü, mato lodulahu diila otinelio, wau ngoilanggubu lipu boito lowali lodiólomo daá tunggula jamu tiga lolaango. **45** Lalante untaya-ntayanga todelomo Bele lo Eeya, lokaidingo duluo. **46** Tulusi ti Isa longuatiá wolo suala daá, "Paapa! Ode delomo uluu li Paapa wuduo mola lo Watia batanga lo Watia!" Toui yilapato loloiya odito, Tio yilate! **47** Toui polowila lo pasukani loóonto wolo u mailowali, tio malomuji Allahu Taáala. Tulusi tio loloiya, "Otutu

Tio diila ototala!" **48** Taa dadaata talonaó mai odito u momilohe, loóonto maó wolo u mailowali. Timongolio ngoáamila malo hualingo wolo hilaa uleé-leée daá. **49** Wau ngoáamila tamoótaawa woli Isa, tuwotuwoto mongobua talo duduái o-Lio lonto Galilea, hitihula lonto u molamingo wau loóonto ngoáamilalo boito. **50** Woluo ngotaalio tailunte Yusu, u asaliilio mai lonto kota Arimatea tolipu lo Yudea. Tio tau ngota mopiohu tahe hulumatío lotau, wau tadonggo hemohima wakutuulio Allahu Taáala molumula momalenta odelo Olongia. Eleponu tio waito Mahakama lo Agama, tio diila akolo wolo putuusani wau huhutu lo mahakama boito. **52** Tei Yusu botie lonaó mota lotaalua wolei Pilatus wau lohile alihu milate li Isa wohi maó olio. **53** Lapataó yilaahio milate li Isa lonto ayu salipu, tulusi tilaputio wolo latu lonto lenani. Lapataó uito tio malopo balato li Isa todelomo kuubulu upilohutu todelomo huludu botu -- kuubulu boito diipo peéenta maó pilomake. **54** Dulahu boito dulahu Jumaáti; wau dulahu Saabati wimbedeó tumulalio. **55** Mongobua talonaó mai woli Isa lonto Galilea loduduá olei Yusu wau lomilohe kuubulu boito. Timongolio olo loóonto woloolo mola milate li Isa pilopo balatio todelomo kuubulu. **56** Lapataó timongolio malo hualingo tulusi lopodapato lamba-lamba wau yinulo moonu u polamahio tomilate li Isa. Todulahu Saabati, timongolio lohuheli lokalaja u loduduo butoo lo agama.

**24:1** Todulahu Ahadi, didimodupo daá, mongobua boito lonaó ode kuubulu li Isa lodelo yilonta u mapilo dapato limongolio. **2** Tokuubulu ilodungga limongolio botu heütio malo lilidu. **3** Tulusi timongolio tilumuwota mola ode delomo kuubulu boito, bo diila loódungga milate li Isa teto. **4** Tou timongolio hitihula teto wau lolingu hemo mikiilangi suáli boito, debolo taduulota wolo boó heinta-intawa tilimihulai totili limongolio. **5** Timongolio mailoohe daá, lapataó losujudu demola huta, sambela taduulota boito loloiya maó ode limongolio, "Yilongola timongoli hemo lolohe totaa tumutumulo towolota lotaa yilate? **6** Diaaluo Tio tea. Tio malobongu! Eelai mola wolo u mapilo tahuda-Lio olemu tou Tio donggo to Galilea, **7** deú 'Walaó Manusia musi wuduolio totaa odusa, lapataó salipuolio wau todulahe otolulio Tio mamobongu mai.' " **8** Yi

mongobua boito maloéela mola tataa-heyaalo li Isa. **9** Tou malo hualingai lonto kuubulu boito timongolio helo hungguli u lotuduo boito to tamopulaa tuwau lota rasulu wau ode ngoáamila tahiduduá wewolio. **10** Mongobua talo poótaa ngoáamilalo boito to tahiduduá li Isa, yito: ti Maria Mahadalena, ti Yohana wau ti Maria tiilo lei Yakobus wau mongobua wewolio tapeé-peéenta woli mongolio. **11** Bo mongo rasulu boito hemo lantobu mongobua boito bo hipo hunggulia udiila pongalo aakali. Timongolio diila palacaya silita lo mongobua boito. **12** Bo tei Petrus malobongu wau tilumeteó ode kuubulu. Sambela lotibunggu tio lohedupa mola ode delomo kuubulu, tulusi loóonto mola bo wambaó taputo u teto. Tei Petrus lolinggolabe daá, tulusi lohualingo wolo dadaata yiyintu todelomo hilaalio tomimbihu wolo u mailowali. **13** To dulahulo boito, duulota tahiduduá li Isa donggo hinaówa ode kambungu tuwau u ilunte Emaus, tanu mopulaa tuwau lokilo lamingio lonto Yerusalemu. **14** Tou hinaówa timongolio bibiisalawa pasali lou totoonulalo poloutia u mailowali boito. **15** Tou timongolio donggo bibiisalawa wau hipotuuloá lo pikiilangi, ti Isa lohihilao leidungga mai wau lonaó peé-peéenta woli mongolio. **16** Timongolio loóonto li Isa, bo woluo hitua-tuawua u lohutu olimongolio diila loónuhe o-Lio. **17** Lapataó ti Isa lotahuda maó, "Wolo u hebisala limongoli tohuungo dalalo botie?" Timongolio malo huheli wolo baya suukali. **18** Tulusi ngotaalio limongolio, tailunte Kleopas, lohintu maó li Isa, "Mati Paaá ngota-ngotaalo tau deli to Yerusalemu tadiila motota poloutia uilowali teto mola towoli-woli mai botie?" **19** "Poloutia wolo?" yilintu maó li Isa. "Pasali uilowali woli Isa, talonto Najaret boito," tametaó limongolio. "Tio Nabi. Tataahe-Lio wau huhutuu-Lio okawasa daá -- mopio moduduó huhama lo Allahu Taála meaalo moduduó huhama lotaa ngoáamila. **20** Mongo iimamu tauwa wau mongo tauwa lo bangusanto malohudu o-Lio u hilukuu-manilio yila-yilaatelo maó, wau timongolio loposalipu o-Lio! **21** Lebe-lebe pomaó hehalapuo lami deú Tiolo tamamo lopato Isirailu! Wau dulahee botie dulahee otolulio anggadu suáli boito lotoduo mai. **22** Donggo poli, dengolo lota mongobua towolota lami malohutu olami iloohea. Didimodupo daá timongolio ode kuubulu, **23** bo diila loódungga milate li Isa mola teto. Tulusi timongolio luli lohualingai

wau loloiya deü timongolio maloóonto malaikati, wau maaaa-laikatiyalo boito loloiya deü ti Isa tumutumulo. **24** Dengolo lota tawolami tulusi lonaó ode kuubulu wau loódungga mola deü wolo uiloiya lo mongobua boito memangi odito, bo timongolio diila loóonto li Isa." **25** Lapataó ti Isa lotahuda maó olimongolio, "Timongoli memangi mohulodu! Mailaba pomboyongi mongoli u momalacaya ngoáamila u mailoiya lomongo nabi! **26** Memangi Olongia Tamoo-poáahua musi moólaasapo sikisa boito, bolo moó toduo mai ololai-Io." **27** Lapataó ti Isa lotombangaó olimongolio wolo u tulatuladu todelomo ngoilanggubu Kitabi tomimbihu batanga-Lio tumulalo mai monto bubuu-kuwaalo lei Musa wau bubuu-kuwaalo lomongo nabi. **28** Sambela uito timongolio mahe membideó kambungu u hepatujuo limongolio. Ti Isa lotiwali debo odelo taóhilaa mopotolonga mola lononaó-Lio, **29** bo timongolio lolahangi o-Lio, "Potitolaapo totambati lamiaatia, "loiya maó limongolio o-Lio," masaatia mabolo ngopeé mola hui wau mamó diólomai olo." Yi ti Isa tilumuwotaó u lotitihui totambati limongolio. **30** Tou hihuloáa hipolamela peé-peéenta woli mongolio, ti Isa lohama roti, lolapali sukuru ode Allahu Taáala, wau lomita-mitangaó roti boito wolo uluu-Lio, tulusi longohi maó ode limongolio. **31** Lapataó timongolio malongalati deü tau boito ti Isa. Bo Tio mailooli to poomilohi mongolio. **32** Uali mongolio ngota timongota, "Memangi laasa lohilaanto debo odelo wali-walihuhu, tou Tio hemobisala wolanto to huungo dalalo, wau helo tombango tuango Kitabi ode olanto?" **33** To saaátilo boito timongolio matilimihulo wau tulusi lohualinga ode Yerusalemu. Mola teto timongolio loódungga tamopulaa tuwau lota tahiduduá li Isa donggo hiámbua wolo tawewolio. **34** Timongolio boito loloiya, "Memangi otutu Eeya maluli tilumumulai! Tio malopo bilohe batanga-Lio odelei Simon!" **35** Duulota hiduduá li Isa taboheeli leidungga mai boito tulusi lohungguli maó u mailo laasawa limongolio tou hinaówa, wau woloolo mola timongolio loóonuhe Eeya tosaaáti Tio helo mita-mitanga roti. **36** Tou timongolio donggo hemosilita, debolo ti Isa lohihilao matihu-tihula tohuungi mongolio wau lotahuda, "Salaamatilo timongoli!" **37** Timongolio iloohea wau mailoohe, sababu helantobu limongolio loóonto lati. **38** Boti Isa lotahuda maó, "Yilongola timongoli

yiloohe? Yilongola timongoli pilotoodei lou molilimbuto todelomo hilaa limongoli? **39** Bilohi uluu-U wau bilohi oáatu-U. Ototai maó, deú utie Wau lohihilao! Tontali mai wau poótuota maó, sababu lati diila otapu wau tulalo, odelo u iloontonga limongoli to ola-U." **40** Ti Isa lotahuda odito sambela hemo pobiloheó uluu wau oáa-Tio olimongolio. **41** Wau tou timongolio debo donggo diipo palacaya, sababu malo odito wengahu wau linggolabu, ti Isa malohintu olimongolio, "Wolo timongoli o uáalo tewe?" **42** Timongolio malongohi maó o-Lio uponula tilinanga ngoputu. **43** Ti Isa malohama uponula boito, lapataó lolamela totalu limongolio. **44** Lapataó uito Tio lotahuda maó olimongolio, "Utieelo susuu-aliyaalo umaa piloótaa-U mai olimongoli tou Wau donggo peé-peéenta woli mongoli; deú timiidu suáli u tulatuladu tomimbihu tanggulu-U todelomo Bubuu-kuwaalo lei Musa, lomongo Nabi, wau Jaburu, musi motoduo mai." **45** Lapataó ti Isa malomuó pikiilangi limongolio alihu mongalati makusudu lo Kitabi. **46** Tulusi Tio lotahuda maó ode limongolio, "Todelomo Kitabi tulatuladu deú Olongia Tamoo-poáahua musi modutolo wau musi muli mobongu mai monto opopate todulahee otolulio. **47** Wau olo deú to tanggulo Olongia Tamoo-poáahua boito mamusi pololadulo to ngoáamilalo bangusa deú manusia musi molilihu, wau deú Allahu Taáala mongambungu dusa. Wau habari boito musi pololadulo tumula mai to Yerusalemu. **48** Matimo-timongolilo tamowali sakusi tou ngoáamilalo boito. **49** Wau Wau lohihilao mamolao mai olemu wolo u madilanti lo Allahu Taáala. Bo timongoli musi debo mohima tokota botie tunggula kawasa monto Allahu Taáala mohenggubei olimongoli." **50** Lapataó uito ti Isa lodelo olimongolio ode bulemengo kota demola Betania. Teto Tio lomintaá mola uluu-Lio, tulusi lomalakati olimongolio. **51** Tou tio donggo hemohutu uito, Tio bilintaio ode sologa, tulusi lobuáala woli mongolio. **52** Timongolio losujudu lolubo olio, lapataó lohualinga ode Yerusalemu wolo hilao leengahe daá, **53** wau molo laalaaita hemo muji boli puji to Allahu Taáala to Bele lo Eeya.

**1:1** Tobohulio, tou diipo dunia pilowali mai, Tahuda boito mailoluo. Tahuda woluo peé-peéenta wolo Allahu Taáala. Wau Tahuda tutuuwauwa wolo Allahu Taáala. **2** Tumulalo bohulio mai Tio peé-peéenta wolo Allahu



Taaala. **3** Ngoaamilalo pilowali mai lotimbulude o-Lio, wau monto ngoaamilalo uwoluo diaaluo maó penu boli tuwau u pilowali mai wonu diila monto o-Lio. **4** Tahuda boito bungo lo tutumulo, wau tutumulo boito mongohi mai tilango tomanusia. **5** Tilango boito tinetinelo tou modiólomo, wau modiólomo diila mowali momate tilango boito. **6** Dunga-dungalo mai tailao lo Allahu Taaala, tei Yahya tanggulio. **7** Tio lonaó mai lopo habari pasali lotilango boito, alihu ngoaamila tau palacaya. **8** Tio lohihilao diila tilango boito, tio bo mopo habari mai uito. **9** Tilango ututuulio tutu u mopo baangai ngoaamila tau dunga mai ode dunia. **10** Tahuda woluo todunia, dunia pilowali mai lotimbulude o-Lio, bo dunia diila moónuhe o-Lio. **11** Tio dunga-dunga mai odelipu-Lio lohihilao bo bangusaa-Lio diila mololimo o-Lio. **12** Penu boli odito debo woluo olo talo lolimo o-Lio wau palacaya o-Lio: timongolio yilohia-Lio haku lowali Walaó Allahu Taaala, **13** tapilo tutulio mai diila lonto manusia, sababu tutumula bohu boito lonto Allahu Taaala asaliilio. **14** Tahuda malowali manusia, Tio bilubiluloá to wolotanto, wau ito maloóonto odudaá-Lio. Odudaá boito tilolimo-Lio odelo Walaó Allahu Taaala tatuwa-tuwaulo. Lotimbulude o-Lio ito maloóonto Allahu Taaala wau ponu-Lio ode olanto. **15** Tei Yahya lonaó mai odelo sakusii-Lio, tio lopo habari: "Tabotieelo Tio tailoiyaaú: Tio mamei dunga meimulo wolau, bo lebe maó udaá wolau, sababu tou wau dipoolu, tio mailoluo." **16** Tio polupolu loponu: diila ohuheli-Lio, Tio mobalakati olanto. **17** Butoó Eeya tilolimonto lotimbulude olei Musa. Bo ponu wau otatapu wau oootolo hilao lo Allahu Taaala piloilaalo lotimbulude li Isa Almasi. **18** Diaaluo tapeéenta maó loóonto Allahu Taaala, ngopohia Walaó tuwa-tuwaulo lo Allahu Taaala, u tutuuwauwa wolo Allahu Taaala wau mohulanga daá wo-Lio. Tiolo talo poilaalo mai Allahu Taaala to olanto. **19** Tahidihima kawasa lo Yahudi to Yerusalemu lopoáhu mongo iimamu wau tau-tauwalo Lewi lonaó odelei Yahya wau lohintu olio, "Yio botie tatoonu?" **20** Tei Yahya malongaku wolo juujulu, "Watia diila Olongia Tamoo-poáhua." **21** "Wonu odito, tatoonu yio?" yilintu maó limongolio. "Wolo yio tei Elia?" "Diila," tametaó lei Yahya. "Wolo yio Nabi?" yilintu maó limongolio poli. "Diila," tametio maó. **22** "Wonu odito, poleleaalo mai olami tatoonu yio botie," uali mongolio,

"alihu ami moó tametaó totau-tauwalo talo poáhu mai olami. Wolo u heloiyamu tomimbihu batangamu lohihilao?" **23** Tei Yahya lolametaó, "Watiaalo tio tailoiya li Nabi Yesaya: 'Taa u hemo ngiibode tohuta hungayo u luasi daá: Popayade maó dalalo ode Eeya.'" **24** Tau-tauwalo tailao mai taulo Parisi **25** malohintu, "Wonu yió diila Olongia Tamoo-poáahua, diila tei Elia, diila olo nabi, yilongola yió hemo polihu?" **26** Tei Yahya lolametaó, "Watia mopolihu wolo taluhu. Bo tohuungi mongoli woluo taa diila oonuhe limongoli. **27** Tio meidungga mai lapatio maó lowatia, bo u monguádeó tali losapatu-Lio watia diila paatuti." **28** Ngoáamilalo boito lotoduo to Betania, to ambahu Tiimuru lo Dutula Yordan tambati hepopo lihua lei Yahya. **29** Loloombulio mola, tei Yahya loóonto li Isa lonaó mai ode olio. Tulusi tei Yahya lolojiya maó, "Bilohi, boi-boitolo Walaó Himba lo Allahu Taáala tamo luluto dusa lodunia. **30** Tiolo taheloiya laatia mamei dungga mai lapatio maó laatia, bo lebe udaá wolaatia, sababu tou watia diipo pilotutulio mai, Tio mawoluo. **31** Tou dipolulio mai, diila otaawa laatia tatoonu Tio boito. Lebe-lebe pomaó watia lonaó mai mopolihu wolo taluhu alihu bangusa lo Isirailu moóonuheó o-Lio." **32** Tei Yahya olo longohi sakusi odie, "Watia loóonto Rohullah lotuhutai debo odelo poombo lonto hulungo lapataó lotitolaa toita-Tio. **33** Tou boito diipo otaawa laatia tatoonu Tio. Bo Allahu Taáala talo poáhu mai olaatia mopolihu wolo taluhu malo tahuda olaatia, 'Wonu yió moóonto Rohullah motuhutai, lapataó motitolaa toitaato lo ngotaalio, yi Tiolo tamamo polihu wolo Rohullah.' **34** Watia lohihilao maloóonto o-Lio," ualei Yahya, "wau watia mongohi mai sakusi deú Tiolo Walaó Allahu Taáala." **35** Loloombulio mola tei Yahya woluo totambati boito poli wolo taduulota murilio. **36** Tou tio loóonto li Isa yilumaodeó, tio malolojiya, "Bilohi! Tiolo Walaó Himba lo Allahu Taáala." **37** Taduuulota muri lei Yahya loódungohe loiya boito, tulusi lonaó loduduá li Isa. **38** Ti Isa loili ode wulea, wau loóonto olimongolio donggo hiduduá o-Lio. Tio malohintu maó, "timongoli hemo lolohe olita?" Tametaó limongolio, "Rabbi, toutoonuu biluloá li Rabbi?" ('Rabbi' boliilio maó guru). **39** "Dulo mai bilohi lohihilao," tahuda maó li Isa. Timongolio malonaó wo-Lio wau mota lomilohe toutoonuu piloti biluloá-Lio. Wakutu boito jamu ampa

lolaango. Todulahu boito timongolio lotibiluloá wo-Lio. **40** Tala ngota lo taduulota tamaloó dungohe wolo uiloiya lei Yahya wau lapataó lonaó loduduá li Isa, deüito-yito tei Andreas, wutatio lei Simon Petrus. **41** Lolamemetaó tei Andreas lololohe olei Simon, wutatio, wau loloiya olio, "Ami malo dunggaya woli Mesiasi!" (Mesiasi tutuuwauwa woli Almasi, deüito-yito: Olongia Tamoo-poáhua). **42** Tei Andreas malo depita mota olei Simon odeli Isa. Ti Isa lolontonga olei Simon, lapataó lotahuda maó, "Yiό Simon, walaée Yona, yiό maunteelo Kepas." (Kepas tutuuwauwa wolei Petrus, bolilio maó: huidee botu.) **43** Loloombulio mola ti Isa lolantu maó u monaó ode Galilea. Tio lodunggaya wolei Pilipus wau lotahuda maó olio, "Dulo dudui mai Wau!" **44** Tei Pilipus asaliilio lonto Betsaida, deüito-yito tambati piloti biluloá lei Andreas wau lei Petrus. **45** Tei Pilipus lodunggaya wolei Natanael wau loloiya maó olio, "Ami maloó dungga tahe untee lei Musa todelomo Buku Butoó lo Allahu Taaala, wau tapilo habari mai lomongo nabi. Tio boito ti Isa talonto Najaret, Walaée Yusu." **46** Bo tei Natanael lolametaó, "Wolo pongalo aakali hitua-tuawua umopiohe meidungga mai monto Najaret?" Dulo mai bilohi lohihilao tametaó lei Pilipus. **47** Ti Isa loóonto olei Natanael lonaó mai, lapataó loloiya pasali olio, "Bilohi, uito taulo Isirailu ututuulio tutu! Diaaluo maó upaluti to olio." **48** "Woloolo mola ti Paaá moóonuhe olaatia?" yilintu maó lei Natanael li Isa. Ti Isa lolametaó, "Tou tei Pilipus diipo lotianga olemu, Wau maloóonto olemu towalungo bungo lo ara boito." **49** "Paaá Guru," loiya maó lei Natanael, "ti Paaá yito Walaó Allahu Taaala! Ti Paaáalo Olongia bangusa lo Isirailu!" **50** Ti Isa lotahuda maó, "Yiό palacaya, bo sababu Wau loloiya mai deü Wau maloóonto olemu towalungo bungo lo ara boito? Susuu-aliyaala ulebe udaá maó tutu woleeto maóontongamu!" **51** Uali Isa poli, "Otutu, pomalacayalo, yiό mamooóonto mola hulungo mohuó, wau mamaa-laikatiyala lo Allahu Taaala laahe bootula to Walaó Manusia."

**2:1** Duuhui mola lapatio maó woluo potihunggu lonika tokota Kana to Galilea, wau tiilo li Isa woluo mola teto. **2** Ti Isa wolo tahiduduá o-Lio tiloduwolio olo ode potihunggu boito. **3** Tou angguru malo pulito, tiilo-Lio

lolojiya maó odeli Isa, "Timongolio mailo pulita lo angguru." **4** Ti Isa lolametaó, "Maama, diila maó ahuli Watia. Diipo leidungga wakutuulio Watia mopoilaalo batanga." **5** Bo tiilo li Isa lolojiya maó to tahi pohintawa, "Wambaó pohutuwalu wolo u mapilo tahuda-Lio olemu." **6** Teto woluo mohelu wolomo tombe upilohetu odelo tambati pongulowalo moduduá uuudu lo Yahudi. Timiidu tombe boito tuangio tanu ngohetuto liiteri. **7** Ti Isa lotahuda maó to tahi pohintawa boito, "Tuangi maó timiidu tombe boito wolo taluhu." Yi matiluanga limongolio tombe boito tunggula lopolu. **8** Lapataó ti Isa lotahuda maó ode limongolio, "Botia hamaawa maó taluhu boito ngoidi wau delowa mai ode tauwa lo potihunggu. Timongolio malodelo taluhu boito ode tauwa lo potihunggu." **9** Wau tio lolamitaó taluhu umalo bolió lowali angguru. (Diila otaawalio lonto utoonu angguru boito, bo tahi pohintawa talo luango taluhu boito tamotota). Yi tauwa lo potihunggu boito lohimbideó ode bulentiti talolai, **10** tulusi lotahuda maó olio, "Biasaalio tau mopo hintapo angguru umopiohe daá meimulo wau wonu tahe tiloduo malotolu longilu, deúito angguru ubiasa. Bo Wutato lolahu angguru u mopiohe daá tunggula botia!" **11** Ui-uitolo bohulo moólinggolabe u pilohutu li Isa. Tio lohutu uito to Kana to Galilea. Wolo tuoto boito Tio lopobilohu odudaá-Lio. Yi tahiduduá o-Lio palacaya o-Lio. **12** Lapataó uito ti Isa lonaó mola ode Kapernaum peé-peéenta woliilo-Lio, mongo wuta-Tio wau tahiduduá o-Lio. Timongolio lotibiluloá mola teto dengolo hui mola hiheolio. **13** Tou Dulahu Buka Paska lo Yahudi malembidei, ti Isa lonaó mola ode Yerusalemu. **14** To Bele lo Eeya to Yerusalemu Tio loódungga tahe mopotaalia losapi, himba, wau bulungi poombo; wau olo tahipo tutuuloá lodoi hihuloá teto. **15** Ti Isa lohutu maó buuboá ngohuú lonto tali tulusi lolanenga ngoáamila binatang boito, himba wau sapi, lonto delomo Bele lo Eeya. Memee-jawaalo lotaa hipo tutuuloá lodoi hebilantulele-Ngio tilinggula doi limongolio lo pupuulepelo maó. **16** Lapataó Tio lotahuda maó ode tahe mopotaalia lo bulungi poombo, "Bintaáalo ngoáamilalo monteea. Diila maó pohutua Bele li Paapa-U tambati podaa-hangiyalo!" **17** Yi tahiduduá o-Lio maloéela mola ayati lo Kitabi botie. "Toliangu-U duólo Bele lo Eeya, yaa Allahu Taáala, molumbila hilaa-U." **18** Tahidihima kawasa lo Yahudi helo tehengi li Isa,

uali mongolio, "Nte pohutua mai u moolinggolabe odelo tuoto olami deu yio ohaku mohutu maó debo odelo utie." **19** Ti Isa lolametaó, "Lolohubelo Bele botie, wau todelomo utolo hui mola Wau mamuli momongu maó." **20** Lapataó timongolio loloiya, "Wopato pulaa wolomo lotaunu upilo mongulalio Bele lo Eeya botie. Wau Yio mamuli momongu bo todelomo utolo hui?" **21** Bo Bele lo Eeya u milakusudu li Isa yito batanga-Lio lohihilao. **22** Oditolio lapatio maó, tou ti Isa bilongu mai monto opopate, mailoéela mola lo tahiduduá o-Lio deu suáli boito mapeéenta pilotahuda-Lio. Yi malo malacaya timongolio tou wolo u tulatuladu todelomo Kitabi wau tou wolo u tilahuda li Isa. **23** Tou ti Isa donggo to Yerusalemu tou Lameyangi lo Paska, dadaata taa palacaya o-Lio sababu ngoáamila moolinggolabe u hepilohutu-Lio. **24** Boti Isa lohihilao diila palacaya olimongolio, sababu oonuhe-Lio ngoáamila tau. **25** Diila palalu tau mongohi tombango to o-Lio pasali penu boli olo tatoonu wambaó, sababu otaawa-Lio lohihilao wolo uwoluo todelomo hilaa lomanusia.

**3:1** Woluo ngotaalio taótanggulo to agama towimbihu taulo Parisi tailunte Nikodemus. **2** Tou huilio tuwau tio lonaó mai odeli Isa wau loloiya maó, "Paaá Guru, otaawa lamiaatia ti Paaá tailao mai lo Allahu Taáala. Sababu diaaluo penu boli ngotaa maó tamowali mohutu u moolinggolabe debo odelo upilohutu li Paaá, Wonu Allahu Taáala diila wolio." **3** Ti Isa lolametaó, "Pomalacayalo, diaaluo penu boli ngotaa maó tamowali pongawaa umati lo Allahu Taáala, wonu tio diila muli potutuolio mai." **4** "Diila pongalo aakali tamaa iludaa muli potutuolio mai," loiya maó lei Nikodemus odeli Isa, "Tingga mowali tio muli tumuwoto ode delomo talomo liilolio wau muli pututuolio mai?" **5** Ti Isa lolametaó, "Otutu banali tahuda-U botie: Wonu tau diila potutuolio mai monto taluhu wau monto Rohullah, tau boito diila mowali pongawaa umati lo Allahu Taáala. **6** Manusia odelo pohuli lotapu pilotutu mai lomongo dulaalio, bo odelo pohuli lorohani pilotutu mai lo Rohullah. **7** Diila maó polinggolabu wonu Wau motahuda mai: timongoli ngoáamila paatuti muli potutuolio mai. **8** Dupoto mohiipo deutoonu otohilaalio; ito moódungohe tingohio, bo diila otaawanto monto utoonu dudunggaalio mai wau deutoonu dulungio. Odito

olo wolo taa potutuo mai lo Rohullah." **9** "Woloolo mola uito mowali motoduo mai?" yilintu lei Nikodemus. **10** Ti Isa lolametao, "Yio Guru lo agama to Isirailu; diila pongalo aakali diila otaawamu? **11** Pomalacayalo; ami mobisala bo tomimbihu wolo u otaawa lami, wau ami mongohi sakusi bo tomimbihu wolo umaa iloontonga lami; bo timongoli diila mohuto mololimo u silakusia lami. **12** Timongoli diila palacaya wonu Wau mohungguli mai olimongoli pasali susuu-aliyaala lodunia botie; woloolo mola timongoli mowali palacaya, wonu Wau mohungguli mai olimongoli pasali lo sologa? **13** Diaaluo penu boli ngotaa tapeenta maó lobotula mola ode sologa, ngopohia Tio tamalo laahei ode dunia, deuito-yito Walaó Manusia. **14** Tutuuwauwa debo odelo tei Musa malopo botula mola tulidu tombaha tobatango ayu ngoputu tohuta datahu u luasi daa wau delita, odito olo Walaó Manusia paatuti pobotulolo, **15** alihu ngoaamila taa palacaya o-Lio mootapu tutumulo ututuulio tutu wau ohiheo-hiheolo maó." **16** Sababu Allahu Taála odito momonu mai manusia todunia botie, tilinggula Allahu Taála longohi mai Wala-Io tatuwa-tuwaulo, alihu timiidu taa palacaya o-Lio diila binasa, bo mootapu tutumulo ututuulio tutu wau ohiheo-hiheolo maó. **17** Sababu Allahu Taála lolao Wala-Io diila mai momutoo dunia botie, bo mai mopoahu maó. **18** Taa palacaya o-Lio diila hukuu-maniyola. Bo taa diila palacaya mahi lukuumani lo Allahu Taála, sababu tio diila palacaya to Walaó Allahu Taála tatuwa-tuwaulo. **19** Tio pilohile moohui dadaasali tosuáli botie; Tilango boito malei dungga mai ode dunia, bo manusia lebe motohilaa u modiolomo wolo u mobaango, sababu huhutu limongolio moleeto. **20** Timiidu taa hipohutua u moleeto, molonuó u mobaango; tio diila motohilaa u mobaango, alihu huhutuulio u moleeto diila oontonga. **21** Bo taa u hipohutua kahandaki lo Allahu Taála monao mai ode mobaango alihu mowali moilaalo deu wolo u pilohutulio boito yito moduduá kahandaki lo Allahu Taála. **22** Lapatao uito ti Isa wau tahiduduá o-Lio malonaó ode Yudea. Tio lotitola mola teto dengolo wakutu hiheolio woli mongolio wau helo polihu tau. **23** Tou boito tei Yahya diipo tilumuwoto ode tutupa. Tio helo polihu to Ainom, diila molamingo monto Salim, sababu mola teto dadaata taluhu. Tau-tauwalo helonaó mai ode olio, wau tio lopolihu olimongolio. **25** Dengolo lota



tahiduduá olei Yahya helo haamawa wolo taulo Yahudi pasali lowuúdu u mopoo belesi. **26** Timongolio lonaó mota odelei Yahya, wau loloiya maó, "Paaá Guru, wolo donggo oéela mola li Paaá tapeé-peéenta woli Paaá to ngotuwali lo Dutulaa Yordan boito, tou boito pilotunu mai li Paaá olamiaatia omoómolu? Tio masaatia olo hemo polihu, wau ngoáamila tau hiponaówa ode o-Lio!" **27** Tei Yahya lolametaó, "Manusia diila mowali owolo-wolo wonu tio diila wohia mai lo Allahu Taáala. **28** Timongoli lohihilao maloó dungohe olaatia loloiya mai, 'Watia diila Olongia Tamoo-poáahua. Watia ilutolia leimulo mai wo-Lio.' **29** Bulentiti taabua yito hakuulio libulentiti talolai. Sahabati libulentiti talolai boito wambaó tihutihula totili wau modungohe, wau tio sanangi wonu modungohe suala libulentiti talolai. Odito olo wolaatia. Masaatia watia sanangi daá. **30** Tiolo tamusi helebe polohuna daá, wau watia diila boti polohuna daá." **31** Tadungga-dungga mai monto yitaato mongilabotaó lou ngoáamilalo. Tadungga-dungga mai monto dunia, meituwoto tau lodunia, wau mobisala pasali lodunia. Tio tadungga-dungga mai monto yitaato mongilabotaó lou ngoáamilalo. **32** Tio mobisala tomimbihu wolo umaa iloontonga wau ilodungohe-Lio, bo diaaluo penu boli ngotaa maó tapalacaya tou silakusia-Lio. **33** Taa palacaya tou silakusia-Lio boito, motolongaku maó deu Allahu Taáala banali. **34** Sababu taa uilao mai lo Allahu Taáala mopo tunggulai tataa-heyalo Allahu Taáala, sababu Rohullah mailohi ode o-Lio lealeaatulo maó. **35** Allahu Taáala momonu Wala-Io, wau malohudu totoonulalo kawasa to o-Lio. **36** Taa palacaya to Walaó boito mamootapu tutumulo ututuulio tutu wau ohiheo-hiheolo maó. Bo taa diila modungohe to Walaó boito diila moótapu tutumulo. Tio hukuumanio lo Allahu Taáala u ohiheo-hiheolo maó.

**4:1** Tau-tauwalo Parisi loódungohe deu ti Isa loótapu wau helo polihu lebe dadaata maó muri wolei Yahya. ( **2** Otutuulio maó ti Isa lohihilao diila lopolihu bo tahiduduá o-Lio wambaó.) **3** Tou ilotaawa li Isa deu tau-tauwalo Parisi maloó dungohu pasali losuáli boito, Tio malo monggato lonto Yudea lohualinga ode Galilea. **4** Todelomo nonaóo-Lio boito Tio musi lumaodeó to Samaria. **5** Yi malei dungga ti Isa tokota tuwau to

Samaria u iluntee Sikhar, diila molaminga monto huta u muloololio mai yilohi lei Yako odelei Yusu walaio. **6** Mota teto woluo ali lei Yako. Ti Isa moongolo daá sababu nonaóo-Lio boito, sababu uito Tio lotihuloáa tobiihu ali. Tou boito otanu dulahu matotai, **7** wau tahiduduá li Isa malonaó ode kota mota lotali mai uáalo. Lapataó taabua ngota lo Samaria mai lolime taluhu. Ti Isa lotahuda maó olio, "Ibu, mowali Watia mohile taluhu uilumolo?" **9** Taabua lo Samaria boito lolametaó, "Ti Tuani tauo Yahudi, wau watia tauo Samaria; yilongola ti Tuani mohile uilumolo monto olaatia?" (Sababu tau-tauwalo Yahudi diila owumbuta wolo tauo Samaria). **10** Ti Isa lolametaó, "Humayaalio otaawamu wowohi mai lo Allahu Taáala wau tatoonu talohile taluhu olemu, tantuulo maó yio lohihilao tamohile uilumolo to o-Lio, wau Tio mamongohi mai olemu taluhu lo tutumulo." **11** Loiya maó lotaabua boito, "Ti Tuani diila otuuntu, wau ali botie modeloma daá. Monto utoonu ti Tuani moótapu mai taluhee lo tutumulo?" **12** Tei Yako, tipaapa loluuhuru lamiaatia, longohi mai ali botie. Tio lohihilao malohama taluhu yililumio lonteea; odito olo mongo walaio wau binatang bibiaahio. Wolo tolantobu li Tuani deu ti Tuani talebe udaá wolei Yako?" **13** "Taa mongilu taluhu botie mamuli mototoángo," tahuda maó li Isa, **14** "bo taa mongilu taluhu u mawohi-U mai madiilalo mototoángo poli ohiheo-hiheolo maó. Sababu tahulu u mawohi-U boito mamowali mato lotaluhu todelomo batangalio u mopentelai ode bulemengio wau mongohi olio tutumulo ututuulio tutu wau ohiheo-hiheolo maó." **15** Loiya maó lotaabua boito. "Tuani wohiyalo mai taluhu boito olaatia alihu watia diilalo mototoángo; wau watia diilalo palalu mohualingai odia mai mohama taluhu." **16** "Ponaólo, mota tianga mai dilemu, lapataó muli pohualingai," tahuda maó li Isa. **17** "Watia diila odile," tametaó lotaabua boito. "Memangi otutu loiyamu," tahuda li Isa, **18** "Sababu yio mapoóolimo lonika, wau talolai tatumu-tumulo wolemu botia diila dilemu." **19** "Botia mailotaawa lowatia ti Tuani nabi ngota," loiya lotaabua boito. **20** "Nenemoya lamiaatia helolubo Allahu Taáala tohuludu botie, bo bangusa li Tuani malo loiya deu bo to Yerusalemu wambaó tambatilio polubowa lotau to Allahu Taáala." **21** "Pomalacayalo," tahuda li Isa olio, "Tosaaáti tuwau tau mamolubo Allahu Taáala, diilalo tohuludu

botie wau diila olo to Yerusalemu. **22** Timongoli taulo Samaria hipolubowa tadiila otaawa limongoli, hiambola ami taulo Yahudi hemolubo o-Lio taótaawa lami, sababu osalaamati dudunggaalio mai monto taulo Yahudi. **23** Bo wakutuulio mamei dungga, tumbaó malei dungga mai, deü wolo kawasa lo Rohullah tau-tauwalo mamolubo li Paapa odelo Allahu Taáala tabanali debo odelo u otohilaa li Paapa. **24** Sababu Allahu Taáala boito Rohu, wau bo wolo kawasa lo Rohullah tau-tauwalo moótubo li Paapa odelo woloolo mola Tio woluo." **25** Taabua boito loloiya maó li Isa. "Otaawa lowatia Olongia Tamoo-poáhua (tailunte Almasi) mamei dungga. Wonu Tio meidungga, Tio mamo poótaa totoonulalo u hitua-tuawua to olanto." **26** "Wau lo Tio," tahuda li Isa, "Wau tabotia donggo hemo bisala wolemu." **27** Tou boito tahiduduá li Isa lohualingai. Timongolio lolinggolabu loóonto li Isa hemobisala wolo taabua ngota. Bo diaaluo penu boli ngotaa maó limongolio talohintu totaabua boito, "Ti ibu palalu wolo?" meaalo lohintu toli Isa, "Yilongola ti Paaá hemobisala wolo taabua boito?" **28** Yi taabua boito lololaa maó tombelio teto lapataó tilumeteó ode kota wau loloiya totau-tauwalo mola teto. **29** "Dulo mai bilohi talo poótaa mai olaatia totoonulalo hitua-tuawua u mapeéenta pilohutu lowatia. Wolo otanu Tiolo boito Olongia Tamoo-poáhua?" **30** Yi tau-tauwala boito olo malo lolaa maó kota tulusi lonaó odeli Isa. **31** Tou boito tahiduduá o-Lio malo loduo li Isa lolamelo, "Paaá Guru," uali mongolio, "toduwolo molamelo." **32** Boti Isa lolametaó, "Woluo uáalo to ola-U, udiila otaawa limongoli." **33** Yi tahiduduá o-Lio mahipo hihintua, "Wolo woluo talodelo mai uáalo ode o-Lio?" **34** Lapataó ti Isa lotahuda maó, "Uáalo-U yito moduduá u otohilaa-Lio lo tamalolao mai ola-U, wau mopoó lapato kalaja uiludu-Lio mai ola-U. **35** Timongoli hemoloiya, 'Donggo wopato hula mola sembo pongotolaalo.' Bo Wau molojiya mai olemu: Bilohi mota hahaa-laboluwalo u mahilalahe, dapadapato otololo: **36** Taa u mongotolo malo lumulaó hipo lolimoa wuupalio wau hipo himoá tilapulio duólo tumumulo ututuulio tutu wau ohiheo-hiheolo maó. Yi taa u momuáyadu wau taa u mongotolo mowali motisanangi peé-peénta. **37** Lumadu botie otutu olo, 'Tangota mopomulo, tawewo mongotolo.' **38** Wau mopoáhu olimongoli mota mongotolo to

halabolu udiila tilolopani limongoli; taawewo malo kalaja mola teto, wau timongoli tamololimo paéda lokalaja limongolio." **39** Dadaata taulo Samaria tuango kota boito palacaya li Isa, sababu taabua boito loloiya, 'Tio lolele mai to olaatia totoonulalo hitua-hituwua u mapeéenta pilohutu lowatia.' **40** Yi tou tau-tauwalo Samaria boito lodunggaya woli Isa, timongolio lohile tióotutua alihu Tio motibiluloá woli mongolio. Oditolio ti Isa malo tibiluloá teto duuhui mola hiheolio. **41** Lapataó lebe dadaata maó poli taa palacaya li Isa sababu wolo u hepilo ngaajali-Lio lohihilao olimongolio. **42** Timongolio loloiya maó ode taabua boito, "Ami palacaya masaatia, diila bo kalena u pilolelemu mai olami, bo sababu ami lohihilao malo dungehe o-Lio, wau otaawa lami deú Tio memangi Tamoo-poáahua dunia." **43** Lapataó duuhui mola lotibiluloá to Sikhar, ti Isa lonaó mola ode Galilea. **44** Ti Isa lohihilao malo tahuda, "Nabi ngota diila hulumatolio to lipulio lohihilao." **45** Bo tou Tio leidungga mola ode Galilea, tau-tauwalo mola teto lolutulaó o-Lio wolo hiwengahe, sababu timongolio woluo to Yerusalemu to Dulahu Buka Paska, wau maloóonto ngoáamila u hepilohutu li Isa. **46** Lapataó ti Isa luli lohualingo ode Kana to Galilea, toutoonu Tio mapeéenta lomolio taluhu lowali angguru. Tokota boito woluo pogawee ngota lo pamalenta, walaio donggo mongongoto to Kapernaum. **47** Tou ilodungohelio deú ti Isa malei dungga ode Galilea lonto Yudea, tio malonaó mota odeli Isa wau loloduo li Isa ode Kapernaum u mopoóluli walaio ungopee mate. **48** Ti Isa lotahuda maó ode pogawee lo pamalenta boito, "Wonu timongoli diila loóonto totoonulalo moólinggolabe, yi timongoli diila palacaya." **49** "Tuani," ualo pogawee lo pamalenta boito, "aliheó ponaólo mai tou walaó lowatia boito diipo mate." **50** Tahuda maó li Isa olio, "Pohualingolo, walaumu moluli." Tau boito palacaya u tilahuda li Isa, tulusi tio malonaó. **51** Tohuungo dalalo, tahi pomayalio malonaó mai ode olio wau lopohabari maó, "Walai Tuani maloluli." **52** Lapataó tio malohintu olimongolio, jamu ngoolo walaó boito loluli. Timongolio lolametaó, "Olaango tanu jamu satu mohulun polipitio yilooli." **53** Lapataó tiyamo lowalaó boito loóeela mola deú tosaaati boito ti Isa lotahuda olio, "Walaumu moluli." Yi tio wau ngoáamila ngaalaálio palacaya li Isa. **54** Uitolo u moólinggolabe oluolio u pilohutu li Isa to

Galilea tou dudungaa-Lio mai lonto Yudea.

**5:1** Lapatao uito woluo lameyangi lo Yahudi, yi ti Isa lona o mola ode Yerusalemu. **2** To Yerusalemu totili "Huhebu lo Himba" woluo kulamu tuwau, u todelomo bahasa lo Ibrani iluntee Betesda. Mota teto woluo sulambe mohelu limo. **3** To susuu-lambeyalo boito dadaata taa mongongoto hibalata; woluo taapitoo, woluo taapenggo, wau woluo tadidu mowali monao. Timongolio ngoaamila hipo himawa taluhu tokulamu boito mobuolai. **4** Sababu tingga maito malaikati lo Eeya motuhutai ode delomo kulamu boito wau mopo buolai taluhio. Wau tahi ngongota tabohulio tumuwoto ode delomo kulamu boito tou taluhio donggo mobuolo mamoluli penu boli ngongota wolo u hedutolalio. **5** Totambati boito woluo talolai ngota u ngongotio matolo pulaa walu lotaunu hiheolio. **6** Ti Isa loonto olio balabalata mola teto, wau otaawa li Isa deu tio malohiheo daa mongongoto; yi ti Isa malohintu olio, "Mohuto yio moluli?" **7** Taa mongongoto boito lolametao, "Paaa, diaaluo taatewe umopo tuwota o laatia ode delomo kulamu tou taluhio mobuolai. Wau tou watia maode kulamu, taawewo maa tilumuwoto leimulo." **8** Yi ti Isa lotahuda ma o olio, "Bongulo mola, bintaalo amongumu wau ponaolo." **9** Tou boitolo olo tau boito loluli. Tio malo mintaa amongio wau lona o. Suali boito lotoduo mai todulahu Saabati. **10** Sababu uito tahidihima kawasa lo Yahudi malo loiya totaa boheli loluli ma o boito, "Dulahu botie dulahu Saabati. Yio diila mowali momintaa amongumu." **11** Bo tau boito lolametao, "Taa u lopooluli mai laatia engonti boito talo poahu laatia lomintaa amongo lowatia wau lona o." **12** "Tatoonu Tio talo poahu olemu lomintaa amongumu wau lona o?" yilintu ma o limongolio. **13** Bo tailoluli boito diila lotota tatoonu taulio, sababu ti Isa mailooli lomola towolota lotaa dadaata boito. **14** Lapatao ti Isa lodungaya wolo tau boito todelomo Bele lo Eeya, wau lotahuda ma o olio, "Botia yio maloluli. Diilalo pohutu dusa, alihu yio diila moolaasa mai suali ulebe moleetao." **15** Yi malona o tau boito lapatao lopoootaa to tahidihima kawasa lo Yahudi deu ti Isaalo talo pooluli olio. **16** Wau sababu uito timongolio mahipo tolopania mopoosusa li Isa, sababu Tio lopooluli tau todulahu Saabati. **17**

Boti Isa lotahuda maó olimongolio, "Allahu Taáala debo hemo kalaja tunggula botia, wau Wau olo musi mokalaja." **18** Tahuda boito maloó sababu to tahidihima kawasa lo Yahudi lebe maó hipo tolopania u momate o-Lio mate-mateelo maó. Timongolio lohutu uito, diila bo sababu u Tio lolambanga wuúdu lo agama tomimbihu dulahu Saabati, bo olo kalana Tio malo tahuda deú Allahu Taáala boito ti Paapa-Lio; boliilio maó Tio mopo tutuuwauwa batanga-Lio wolo Allahu Taáala. **19** Ti Isa lolametaó ode tau-tauwala boito odie, "Pomalacayalo, Walaó diila mowali mohutu wolo-wolo, wolo kawasaa-Lio lolohilao. Tio bo mohutu wolo u iloontonga-Lio pilohutu li Paapa-Lio. Sababu wolo u pilohutu li Paapa-Lio, uito olo u pohutuo lo Walaó. **20** Sababu Allahu Taáala lomonu to Walaó wau lopobilohei o-Lio ngoáamila u pilohutu-Lio lohihilao. Tumbaó Allahu Taáala mamopo bilohei o-Lio totoonulalo huhutu ulebe udaá maó poli tilinggula timongoli molinggolabe. **21** Allahu Taáala boito mopobongu mai taamate, wau mongohi olimongolio tutumulo ututuulio tutu wau ohiheo-hiheolo maó; odito olo Walaó mongohi mai tutumulo u ohiheo-hiheolo maó totaa mohuto wohia-Lio tutumulo. **22** Allahu Taáala lohihilao diila momutoó boli olita. Ngoáamila kawasa u momutoó mailudu-Lio to Wala-lo. **23** Allahu Taáala lohutu uito alihu ngoáamila tau mohulumati to Walaó debo odelo timongolio mohulumati to Allahu Taáala. Taa diila mohulumati to Walaó diila mohulumati olo to Allahu Taáala tamalolao mai to Walaó. **24** Otutu banali totoonulalo tahudaa-U botie: Taa umopoó tuotaó totoonulalo tahudaa-U, wau palacaya o-Lio talolao mai ola-U, o tutumulo ututuulio tutu wau ohiheo-hiheolo maó. Tio diila tahukuu-maniyolo; tio malo lopato lonto opopate wau loótapu tutumulo. **25** Pomalacayalo: Mamei dungga wakutuulio -- tumbaó malei dungga wakutuulio -- taamate mamo dungohe suala lo Walaó Allahu Taáala. Wau taa modungoheó matumumulo. **26** Debo odelo Allahu Taáala lohihilao bungo lo tutumulo, yi Tio olo mopowali mai wala-lo bungo lotutumulo. **27** Tio malohudu ode wala-lo haku u momutoó, sababu Tio Walaó Manusia. **28** Diila maó polinggolabu timongoli modungohe suáli botie, sababu wakutuulio mamei dungga deú ngoáamila taa mailate modungohe sualaa-Lio, **29** lapataó lumualai monto kuubulu. Taa malohutu



u mopiohe mamobongu mai ode tutumulo. Bo taa malohutu u moleeto mamobongu mai u hukuu-maniyolo." **30** "Wau diila mowali mohutu wolo-wolo moduduá otohilaa-U lohihilao. Wau bo momutoó motuuúde lou wolo u pilomalentai lo Allahu Taáala. Wau putuusani-U aadili, sababu Wau diila moduduá u otohilaa-U lohihilao, bo wambaó u otohilaa lo Allahu Taáala talolao mai ola-U. **31** Humayaalio Wau mongohi mai sakusi pasali lobatanga lohihilao, diila mowali palacayalo. **32** Bo woluo taawewo tamongohi sakusi tomimbihu ola-U, wau otaawa-U deú u silakusialio boito otutu. **33** Timongoli malolao utolia odelei Yahya, wau tio malongohi sakusi ubanali tomimbihu ola-U. **34** Suáli botie tahudaa-U mai, diila bo sababu Wau momalalu sakusi monto manusia, bo alihu timongoli poáahuwolo. **35** Tei Yahya boito debo odelo tohe ulei-leiita wau mopo bulilangai lotilango. U ngopeé mola waktu timongoli sanangi mololimo tinelio boito. **36** Bo u silakusiya-U lebe udaá maó lou silakusia lei Yahya. Wolo u masaatia pilohutu-U botie, deúito-yito kalaja u pilotuugasi mai li Paapa ola-U, u mopobukuti deú ti Paapa malolao mai ola-U. **37** Wau ti Paapa talolao mai ola-U olo longohi sakusi pasali ola-U. Timongoli diipo peéenta maó lodungohe sualaa-Lio meaalo loóonto baya-Lio. **38** Tataahe-Lio diila leitahu todelomo hilaamu sababu timongoli diila palacaya to ola-U tailao-Lio mai. **39** Timongoli mopoóolato kitabi sababu helantobu limongoli deú wolo dudelo boito timongoli otutumulo ututuulio tutu wau ohiheo-hiheolo maó. **40** Bo timongoli diila motohilaa monaó mai ode ola-U u moótapu tutumulo ohiheo-hiheolo maó. **41** Wau diila mololohe poloilaalo momuji monto manusia. **42** Oonuhe-U timongoli. Otaawa-U timongoli diila motolianga to Allahu Taáala todelomo hilaamu. **43** Wau dungga-dungga mai wolo kawasa li Paapa-U, bo timongoli diila mololimo ola-U. Bo wonu taawewo dungga-dungga mai wolo kawasaalio lohihilao, timongoli motohilaa mololimo olio. **44** Woloolo mola timongoli moó palacaya, wonu timongoli bo ohilaa meipuji monto timongotamu, wau diila motolopani u moótapu poloilaalo momuji monto Allahu Taáala u Tuwa-tuwaulo? **45** Diila maó polantobu Wau mamopotala olimongoli totalu lo Allahu Taáala. Tumbaó tamaa mopotala olimongoli yito tei Musa. **46** Humayaalio timongoli palacaya olei Musa, timongoli mapalacaya to

ola-U, sababu pasali-Ulo tunggula tio loluladei. **47** Bo wonu timongoli diila palacaya tou wolo u tiluladio lei Musa, woloolo mola timongoli moó palacaya tou wolo upilo tahudaa-U mai?"

**6:1** Dengolo wakutu lapatio maó ti Isa lonaó mola ode ngotuwali lobulalo Galilea, u ilunte olo Bulalo Tiberias. **2** Leidungga mola odito, dadaata talo duduá o-Lio sababu timongolio maloóonto u moólinggolabu hepilohutu-Lio wolo lopoóluli tahi ngongota. **3** Ti Isa lotaódee mola ode huludu, lapataó lotihuloá mola teto wolo tahiduduá o-Lio. **4** Towakutu boito mabolo ngopeé mola Dulahu Buka Paska lo Yahudi. **5** Tou ti Isa lomilohe mota ode pali-Tio, Tio loóonto taa dadaata hinaówa mai ode o-Lio. Yi Tio lotahuda maó odelei Pilipus. "Touitoonu mowali potaliyanto uáalo, alihu ngoáamila tau botie mowali molamelo?" ( **6** Mailotaawa li Isa wolo u mapo hutuo-Lio, bo Tio lotahuda maó odito sababu Tio motohilaa motesi olei Pilipus.) **7** Tei Pilipus lolametaó, "Roti u ngohalaga dulo hetuto doi talaá diila tamoó tuheta totau-tauwalo botie, eleponu ngota-ngota bo moótapu ngoidi wambaó." **8** Ngotaalio lomuri li Isa wewolio deúito-yito tei Andreas, wutatei Simon Petrus malo loiya, **9** "Tewe woluo walaó talolai wolo limo lobotu roti wau uponula dulo botu. Bo wolo boliilio uito totaa dadaata botie?" **10** "Ahulaalo mota tau-tauwalo boito motihuloó," tahuda maó li Isa. Totambati boito o huóyoto dadaata, oditolio tau-tauwala boito malo tihuloó to huóyoto -- ngoáamilalo tanu limo lolihu lota mongo lolai. **11** Lapataó ti Isa malohama roti boito tulusi losukuru mola ode Allahu Taaala. Lapataó uito Tio lolaya-layadeó roti boito totaa dadaata. Lapataó Tio lolaya-layadeó uponula boito, wau timongolio malo lamelo lotolu-toluulo maó. **12** Lapataó ngoáamilalo malo lamelo tunggula lobutuhu ti Isa lotahuda ode tahiduduá o-Lio, "Yimoálo labitio lo uáalo boito; diila bolo woluo u mohuáyadu." **13** Lapataó timongolio malo himoa mopulaa dulo kalanji hipolua lebe lo uáalo monto limo lobotu roti upilo lamela lotaa dadaata boito. **14** Tou taa dadaata loóonto maó moólinggolabe u pilohutu li Isa, timongolio malo loiya, "Otutu, utieelo Nabi tahe halapuwolo meidungga mai ode dunia!" **15** Otaawa li Isa timongolio malonaó monaó mai momakusa o-Lio mowali

olongia limongolio. Sababu uito Tio malolahi ode madala ohuludu. **16** Tou mahemo diólomai, tahiduduá li Isa lotuhutaa mola ode bulalo. **17** Lapataó timongolio malo titaé tobulotu lobalango bulalo boito lotidulunga ode Kapernaum. Dulahu malo diólomai ti Isa debo diipo leitungga mai ode limongolio. **18** Tou boito bulalo mahemo buóolai sababu dupoto daá. **19** Tou malobite mota tanu limo meaalo wolomo kilo, timongolio loóonto mota li Isa tahu-tahudei ode bulotu wau naónaó totudu lotaluhu. Timongolio mailoohe daá. **20** Boti Isa lotahuda olimongolio, "Diila oohe, utie Wau!" **21** Tulusi wolo sanangi lohilao timongolio malo lolimo o-Lio ode delomo bulotu, wau tosaaátilo boito bulotu limongolio boito malei dungga mota ode tambati u pilatuju. **22** Loloombulio mola taa dadaata tadonggo leitolaá to ngotuwali lobulalo, lotota loutau deú engontielio bo woluo bulotu tuwau mola teto. Otaawa limongolio deú tahiduduá li Isa malo monggata mota wolo bulotu boito, hiambola ti Isa diila loduduó. **23** Lapataó demohelu ngoolo bulotu lonto kota lo Tiberias leitungga mai wau lotirabua totili lotambati lotaa dadaata boito hipo lamela roti u mailapato silukuru mola lo Eeya. **24** Tou taa dadaata boito loóonto deú mopio ti Isa meaanto tahiduduá o-Lio diaaluo teto, timongolio olo malo titaé to bubuu-lotuwalo boito wau lobite ode Kapernaum mola mololohe li Isa. **25** Tou tau-tauwala boito lodunggaya woli Isa to ngotuwali lobulalo, timongolio lohintu o-Lio, "Paaá Guru, omolua ti Paaá leitungga mai odie?" **26** Ti Isa lolametaó, "Otutu, timongoli hemo lolohe ola-U diila bo sababu timongoli malo ngalati makusudu totoonulalo moólinggolabe u hepilohutu-U, bo sababu timongoli malo lamela tunggula lobutuhu. **27** Diila maó pokalaja u moótapu mai uáalo u mowali mopulito wau mobunuto. Pokalajaalo u moótapu mai uáalo udiila mowali mobunuto u mongohi tutumulo ututuulio tutu wau ohiheo-hiheolo maó. Uáalo boito mawohi mai lo Walaó Manusia olemu, sababu Tio mapiluduó lo Allahu Taáala." **28** Lapataó timongolio lohintu maó o-Lio, "Amiaatia musi mohutu maó wolo u moponaó kahandaki lo Allahu Taáala?" **29** Ti Isa lolametaó, "Utieelo u otohilaa lo Allahu Taáala monto olimongoli: pomalacayalo o-Lio tailao mai lo Allahu Taáala." **30** "Wonu odito," uali mongolio, "bukuti wolo u mowali wohi mai li Paaá alihu amiaatia moóonto wau palacaya li Paaá? Wolo u mapohutuo

li Paaá? **31** Tinenemoya lamiaatia lolamela manna tohuta datahu u luasi daá wau delita, debo odelo u leitulade todelomo Kitabi, 'Tio longohi olimongolio uáalo roti lonto sologa!' " **32** Lapataó ti Isa lotahuda maó olimongolio, "Pomalacayalo: Diila tei Musa, boti Paapa-Ulo tamongohi mai olemu roti u otutuulio maó monto sologa. **33** Sababu roti uwohi mai lo Allahu Taáala yito Tio tamo tuhutai monto sologa wau mongohi tutumulo ode manusia todunia." **34** "Paaá," uali mongolio, "wohiyalo mai laito roti boito ode lamiaatia." **35** "Waulo roti tamongohi mai tutumulo," tahuda maó li Isa olimongolio. "Taa u monaó mai ode ola-U diila tapolaangolo poli u ohiheo-hiheolo maó." Wau taa u palacaya ola-U diila tamotoángo poli u ohiheo-hiheolo maó. **36** "Bo debo odelo u mapilo tahuda-U mai olemu, eleponu timongoli maloóonto ola-U, timongoli diila palacaya. **37** Ngoáamila tailudu mai li Paapa ode ola-U mamonaó mai ode ola-U. Wau diila tamopo touli boli tatoonu tamonaó mai ode ola-U. **38** Sababu Wau lotuhutai lonto sologa, diila mai mohutu u otohilaa-U lohihilao, bo u otohilaa-Lio lo talolao mai ola-U. **39** Wau uti-utieelo u otohilaa-Lio lo talolao mai ola-U: alihu monto ngoáamila tailudu-Lio mai ola-U, diaaluo penu boli ngotaa maó tamooli; bo alihu Wau mopobongu mai olimongolio to Dulahu Kiama. **40** Memangi uti-utieelo u otohilaa li Paapa-U: alihu ngoáamila tau moóonto to Walaó boito wau palacaya o-Lio o tutumulo tutu wau ohiheo-hiheolo maó, wau muli bongulo-U mai to Dulahu Kiama." **41** Tau-tauwalo Yahudi maloingo toli Isa, sababu Tio lotahuda: "Wau roti talo tuhutai lonto sologa." **42** Timongolio loloiya maó, "Diila maa Tio botie ti Isa walaée Yusu? Otaawa lami mongo dulaá-Lio! Woloolo mola Tio mowali molojiya deú Tio malo tuhutai lonto sologa?" **43** Lapataó ti Isa lotahuda ode limongolio, "Diila maó poingo. **44** Diaaluo penu boli ngotaa tamowali monaó mai ode ola-U, wonu Allahu Taáala talolao ola-U, diila modelo mai olio ode ola-U; wau tatoonu tamonaó mai ode ola-U, mabongulo-U to Dulahu Kiama. **45** Todelomo Buku lomongo nabi tulatulade odie, 'Ngoáamila tau maáalarío lo Allahu Taáala.' Oditolio ngoáamila taa modungohe li Paapa-U wau mobalajali monto o-Lio, monaó mai ode ola-U. **46** Uito diila oboliilio deú woluo tamaa loóonto li Paapa-U. Bo Tio tadungga-dungga mai lonto Allahu Taáala, maloóonto li Paapa. **47**

Ototai maó: Taa u palacaya, o tutumulo ututuulio tutu wau ohiheo-hiheolo maó. **48** Waulo roti tamongohi mai tutumulo. **49** Tinenemoyamu lolamelo manna tohuta datahu u luasi daá wau delita wau timongolio yilate olo. **50** Bo diila odito wolo roti u lotuhutai lonto sologa; taa u molamela roti boito diila tamaate. **51** Waulo roti u lotuhutai lonto sologa -- roti u mongohi tutumulo. Taa u molamela roti botie matumumulo ohiheo-hiheolo maó. Roti u mawohi-U ode tutumulo manusia todunia ui-uitolo tapu-U." **52** Loódungohe uito, tau-tauwalo Yahudi mahipo hahaamawa ngota-timongota. "Wooloo mola tau botie mowali mongohi tapu-Lio ode olanto u polamelo?" uali mongolio. **53** Lapataó ti Isa lotahuda maó olimongolio, "Pomalacayalo: Wonu timongoli diila molamelo tapu lo Walaó Manusia wau mongilu duhu-Lio, timongoli diila taótu-otutuulo maó tumumulo. **54** Taa u molamelo tapu-U wau mongilu duhu-U o tutumulo ututuulio tutu wau ohiheo-hiheolo maó wau Wau mamopo bongu mai olio to Dulahu Kiama. **55** Sababu tapu-U tutuulio tutu uáalo, wau duhu-U tutuulio tutu minumani. **56** Taa u molamelo tapu-U wau mongilu duhu-U, debo motituwau wola-U, wau Wau wolio. **57** Allahu Taála tatumu-tumulo boito, lolao mai ola-U wau Wau olo tumumulo monto Allahu Taála. Odito olo taa u molamelo tapu-U matumumulo monto ola-U. **58** Uti-utieelo roti u lotuhutai lonto sologa; diila debo odelo roti u pilolameli nenemoyamu. Sababu tou malo lamelo roti boito, timongolio debo yilate olo. Bo taa u molamelo roti botie matumumulo ohiheo-hiheolo maó." **59** Ngoáamilalo boito pilotahuda li Isa tou Tio helo ngaajali tobele potabiaalo to Kapernaum. **60** Tou loódungohe tataa-heyaaalo li Isa boito, dadaata towolota lo tahiduduá o-Lio loloiya maó, "Pongaajali botie mailaba buheetio. Tatoonu tamowali mololimo maó!" **61** Ti Isa lohihilao motota deu tahiduduá o-Lio hiwingoa pasali losuáli boito. Yi Tio malo tahuda, "Wolo timongoli diila sanangi sababu tataa-heyaaalo boito? **62** Wooloo mola waliilio dewonu timongoli moóonto Walaó Manusia muli mobotula mola ode tambati-Lio u bohulio? **63** Tamohutu mai manusia tumumulo yito Rohullah. Olootolo manusia diaaluo hunalio. Tataa-heyaaalo upilo tahuda-U mai olemu botie tataa-heyaaalo Rohullah wau tataa-heyaaalo u mongohi tutumulo. **64** Bo debo woluo olo towolota limongoli tadiila

mohuto palacaya." (Mailotaawa li Isa tou bohulio mai titatita tadiila mohuto palacaya, wau tatoonu tamamo hiyanati o-Lio.) **65** Lapatao ti Isa luli lotahuda maó, "Uitolo sababuulio Wau mopoótaa mai olemu deu diaaluo penu boli ngotaa maó tamowali monao mai ode ola-U, wonu ti Paapa-U diila mongohi olio." **66** Tumulalo mai tosaaati boito dadaata tahiduduá o-Lio, lololaa maó o-Lio, wau diilalo mohuto moduduá o-Lio. **67** Lapatao ti Isa lohintu maó to tamo pulaa duulota tahiduduá o-Lio, "Wolo timongoli olo mohuto mololaa maó ola-U?" **68** "Eeya," ualei Simon Petrus o-Lio, "ode tatoonu mongowatotia musi monao? Tahuda lo Eeya mongohi tutumulo ututuulio tutu wau ohiheo-hiheolo maó. **69** Mongo watotia mapila-lacaya wau yakini deu Eeyaalo utolia tamantali lonto Allahu Taála." **70** Ti Isa lolametao, "Wolo diila maa Wau talo lulaotao olimongoli tamo pulaa duulota botie? Bo ngota towolota limongoli yito lati!" **71** Tapilatuju li Isa yito tei Yudas walaée Simon Iskariot. Sababu eleponu tei Yudas ngotaalio lo tamo pulaa duulota muri li Isa, tio mamohiyanati li Isa.

**7:1** Lapatao uito ti Isa malonaó ode utoonulalo maó to Galilea. Tio diila lohuto ode madala lo Yudea sababu tahidihima kawasa lo Yahudi mola teto o makusudu momate olio mate-mateelo maó. **2** Towakutu boito malembidei Dulahu Buka Wombohe Duungo. **3** Yi mongo wutati Isa loloiya maó o-Lio, "Tolailo maó tambati botie wau ponaolo ode Yudea, alihu tahiduduá ole-Mu mowali momilohe olo kalajaa-Mu. **4** Diaaluo taa u mamoluuó wolo u pohutuolio, wonu tio motohilaa mowali otaawa lotaa dadaata. Wonu Yio mohutu susuu-aliyaalo debo odelo uito ngoilanggubu dunia musi motota!" ( **5** Sababu mongo wuta-Tio lohihilao olo diila palacaya o-Lio). **6** "Diipo wakutuulio ola-U," tahuda maó li Isa ode limongolio, "bo ode limongoli timiidu wakutu mowali. **7** Dunia botie diila pongalo aakali molonui mongoli. Bo Wau memangi lonuo lodunia, sababu Wau laito hemo tahuda ode dunia deu huhutuulio moleeto. **8** Ponaolo timongoli lohihilao ode lameyangi boito. Wau diila monao sababu diipo wakutuulio ola-U." **9** Oditolo tahuda li Isa ode mongo wuta-Tio, wau Tio olo malo tibiluloá to Galilea. **10** Lapatao mongo wuta-Tio lonaó ode



lameyangi boito, wolo poó-poóoyo ti Isa malonaó lohihilao lou diila ilotaawa lotau. **11** Ngotilonggadu lameyangi boito, tahidihima kawasa lo Yahudi hemo lolohe o-Lio wau hemohintu-hintu, "Touutoonu Tio?" **12** Dadaata tau mahipo loloohuma tomimbihu o-Lio. Woluo talo loiya, "Tio taa mopiohu." Waluo poli talo loiya, "Diila! Tio hemo polapalo totaa dadaata." **13** Bo diaaluo penu boli ngotaa maó tabuheli mobisala juujulu tomimbihu o-Lio sababu timongolio moohe to tahidihima kawasa lo Yahudi. **14** Tohuungo lo lameyangi, ti Isa tilumuwoto ode delomo Bele lo Eeya, tulusi lolumulaó longajali. **15** Tahidihima kawasa lo Yahudi lolinggolabe daá wau loloiya, "Woloolo mola tau botie malotota odito daatalio, lebe-lebe pomaó Tio diipo peéenta maó helo sikola?" **16** Ti Isa lolametaó, "U pilongajali-U botie diila ajalani-U, bo ajalani-Lio lo talolao mai ola-U. **17** Taa u mohuto moduduó u otohilaa lo Allahu Taáala, mamotota maó wolo pongajali-U boito dudunggalio mai monto Allahu Taáala meaambo monto ola-U lohihilao. **18** Taa u mongohi ajalanelio lohihilao mololohe ohulumati ode batangalio lohihilao. Bo taa u mololohe ohulumati ode o-Lio tailalio mai, tau boito juujulu, diaaluo wimbulo to olio. **19** Diila tei Musa tamaa longohi mai papaa-lentawalo Allahu Taáala ode olemu? Bo towolota limongoli diaaluo maó talo dudua papaa-lentawalo boito. Yilongola timongoli ohilaa momate ola-U mate-mateelo maó?" **20** Taa dadaata boito lolametaó, "Yio biyongo! Tatoonu taohilaa momate ole-Mu mate-mateelo maó?" **21** Ti Isa lolametaó, "Bo wambaó tuwau kalaja pilohutu-U todulahu Saabati, wau timongoli lolinggolabu. **22** Tei Musa longohi mai olimongoli wuudu u polunaalo -- eleponu sunati boito otutuulio maó asaliilio mai diila lonto olei Musa bo lonto mongo tiyamo loluuhuru tou dipolulio mai tei Musa. Sababu uito, penu boli todulahu Saabati timongoli ohilaa moluuna tau. **23** Wonu timongoli mohutu uito alihu diila maó molambanga wuudu lei Musa pasali lou sunati, yilongola timongoli moingo ola-U, sababu lopoóluli ngangaa-waalo maó batanga lotau todulahu Saabati? **24** Diila maó pomutoó tau bo dadaasari tou oontonga, bo dadaasari tou aadili." **25** Lapataó woluo dengolo lota taulo Yerusalemu loloiya, "Diila maa Tio botie tau-Lio tahe lolohulo u pateelo mate-mateelo maó? **26** Bilohi maó Tio hemobisala lou bebasi

totalu lotaa dadaata, wau diaaluo tamoloiya wolo-wolo to o-Lio! Wolo tahidihima kawasa to olanto botie tanu malotota loutau deu Tio botie Olongia Tamoo-poáahua? **27** Bo wonu Olongia Tamoo-poáahua boito meidungga mai diaaluo penu boli ngotaa maó tamotota monto utoonu asalii-Lio! Lebe-lebe pomaó otaawanto lonto utoonu asalii-Lio lotau botie." **28** Lapataó, tou ti Isa donggo hemo ngaajali todelomo Bele lo Eeya, Tio longibode mola wolo suala daá, "Oditolio otaawa limongoli tatoonu Wau botie, wau lonto utoonu asalii-U? Wau diila leidungga mai sababu otohila-U lohihilao. Wau yilao-Lio mai lo taóhaku lolao mai ola-U, wau Tio mowali palacayalo. Bo timongoli diila moóonuhe o-Lio. **29** Wau moóonuhe o-Lio, sababu Wau asaliilio mai lonto o-Lio, wau Tiolo talolao mai ola-U." **30** Tou boito timongolio ohilaa moheupa li Isa, bo diaaluo tabuheli modihu o-Lio, sababu diipo leidungga wakutuulio. **31** Dadaata towolota lotau-tauwalo boito mapilacaya o-Lio, wau hemoloiya, "Wonu Olongia Tamoo-poáahua boito meidungga mai, wolo Tio mowali mohutu lebe dadaata maó u moólinggolabe wolo tau botie?" **32** Tau-tauwalo Parisi loódungohe woloolo mola taa dadaata boito hipo lolohuma pasali li Isa. Sababu uito peé-peéenta wolo mongo iimamu tauwa, timongolio malo poáhu dengolo lota tamoo-kawalia Bele lo Eeya loheupa li Isa. **33** Ti Isa lotahuda maó totaa dadaata boito todelomo Bele lo Eeya, "Bo ngopeé mola wambaó Wau donggo peé-peéenta woli mongoli. Lapataó uito Wau mamuli mohualinga mola ode talolao mai ola-U. **34** Timongoli mamu lolohu ola-U, bo diila moóduungga ola-U; sababu timongoli diila moónaó mai ode tambati toutoonu Wau woluo." **35** Lapataó tahidihima kawasa lo Yahudi malo loiya ngota timongota "Tau botie ohilaa monaó ode utoonu tilinggula ito diilalo moóduungga o-Lio? Wolo Tio ohilaa monaó ode tau-tauwalo Yahudi tahi biluloáawa to bulemengo lipu towolota taulo Yunani, wau mongaajali taulo Yunani? **36** Wolo makusudu-Lio wolo lotahuda deu ito mamololohe o-Lio bo diila moóduungga o-Lio wau deu ito diila moónaó mai ode tambati toutoonu Tio woluo?" **37** Topulito dulahu lo lameyangi boito, deúito-yito dulahu ulaba-labaalo polohuna daá, ti Isa tilimihulaó todelomo Bele lo Eeya tulusi longiibode, "Taa u mototoángo ponaólo mai ode ola-U mai mongilu. **38**

Tomimbihu taa upalacaya to ola-U, tulatulade todelomo Kitabi, 'Monto delomo hilaalio tumolohei totoo-lohuwaalo taluhu u mongohi tutumulo.' " ( **39** Ti Isa lotahuda pasali lo Rohullah, u matolimo lotau-tauwalo tapalacaya o-Lio. Sababu tou boito Rohullah diipo yilohi-Lio mai; sababu ti Isa diipo pilolaió wolo opopate-Lio.) **40** Dadaata taa loódungohu wolo upilo tahuda li Isa, wau towolota limongolio woluo talo loiya, "Tau botie maatantu Nabi boito!" **41** Tawewo loloiya, "Utieelo Olongia Tamoo-poáahua!" Bo woluo olo talo loiya, "Aa, diila pongalo aakali Olongia Tamoo-poáahua dudunggaalio mai lonto Galilea? **42** Todelomo Kitabi tulatuladu deü Olongia Tamoo-poáahua yito wali mai lei Dauda wau mamei dungga montó Betlehemu, deüito-yito kambungu pilohuluta loduhu lei Dauda." **43** Pulitio maó tau-tauwalo mahipo hahaamawa tomimbihu li Isa. **44** Woluo taóhilaa moheüpa o-Lio, bo diaaluo penu boli ngotaa maó tamodihu o-Lio. **45** Tou tahi pokawalia Bele lo Eeya taa ilahulalio mota loheüpa li Isa luli lohualingai, mongo iimamu tauwa wau tau-tauwalo Parisi boito lohintu maó olimongolio, "Yilongola timongoli diila lodelo mai o-Lio odia?" **46** Tahi pokawalia boito lolametaó, "Waa, diipo peéenta maó woluo tahelo bisala debo odelo Tio!" **47** "Wolo timongoli olo mapilo lapalo-Lio?" ualo tau-tauwalo Parisi boito. **48** "Wolo woluo tahidihima kawasa lonto olanto meaambo taulo Parisi tapalacaya o-Lio? **49** Bo taa dadaata botie, diila otaawa limongolio butoée Musa, wau penu boli woloolo mola olo timongolio malaá-laánati." **50** Tala ngota towolota lotau-tauwalo Parisi boito yito tei Nikodemus tamaa peéenta lonaó mai odeli Isa. Tei Nikodemus loloiya maó ode tau-tauwalo Parisi wewo, **51** "Moduduá butoó, tahingota-ngotaawa diila mowali hukuu-maniyola tou palakalalio diipo dilungohe wau huhutuulio pilalakisa." **52** "Wolo yio olo lonto Galilea?" tametaó limongolio, "Palakisai maó Kitabi! Yio mamooónto deü diaaluo nabi taásaliilio mai lonto Galilea!" **53** Lapataó uito, ngoáamila tau malo hualinga ode bele.

**8:1** Boti Isa lonaó mola ode Huludu Jaitun. **2** Loloombulio mola dimodupo Tio lonaó mota poli ode Bele lo Eeya, wau dadaata tahe lonaó mai ode o-Lio. Ti Isa malo tihuloáa mola, tulusi lolumulo longaaajali maó

olimongolio. **3** Toui boito, guguu-ruwaalo agama wau tau-tauwalo Parisi lodelo mai ode o-Lio taabua ngota tailo dungga hemojina. Timongolio lopoahu taabua boito tilimihulo tohuungio, **4** lapatao loloiya maó odeli Isa, "Paaá Guru, taabua botie ilodungga lamiaatia donggo hemojina. **5** Todelomo butoée Musa woluo wuudu dei taabua debo odelo utie paatuti paiyola lobotu tunggula mate. Botia woloolo mola huhama li Paaá?" **6** Timongolio lohintu odito u mohentobe o-Lio, alihu timongolio mowali mopotala o-Lio. Boti Isa wambaó dungudungu, wau hemo lulade tohuta wolo tingoonga lo uluu-Lio. **7** Toui timongolio tulusi hemo huntula o-Lio, yi Tio malo mintaaí lunggo-Ngio wau lotahuda maó olimongolio, "Taa udiila odusa towolota limongoli, hulialo maó tio tamomai lobotu ode taabua boito." **8** Lapatao uito ti Isa luli lotidungu mola wau luli lolulade tohuta. **9** Lapatao loodungohe li Isa lotahuda odito, malo tinaonaó timongolio lololaa maó tambati boito, ngota-ngota tumulalo mai tahulangio. Pulitio maó bolo ti Isa tutuuwau taleitolaa teto wolo taabua tadonggo tihutihula totambati boito. **10** Lapatao ti Isa malo mintaaí mola lunggo-Ngio wau lotahuda maó ode taabua boito, "Touutoonu timongolio ngoaamila? Diaaluo talo hukuumani olemu?" **11** "Diaaluo, Paaá," tametio maó. "Ooo," uali Isa, "Wau olo diila mohukuumani mai olemu. Botia ponaólo, diilalo pohutu dusa." **12** Ti Isa luli lotahuda totaa dadaata, tahuda-Lio maó, "Wauilo tilango dunia. Taa u moduduó ola-U diila tamonaó toui modiólomo, bo o tilango tutumulo." **13** "Botia Yio longohi sakusi pasali lo batanga-Mu lohihilao," ualo tau-tauwalo Parisi boito to o-Lio, "Sakusi-Mu boito diila otutu." **14** Ti Isa lolametao, "Eleponu Wau mongohi mai sakusi pasali lo batanga-U lohihilao, sakusi-U boito otutu; sababu otaawa-U lonto utoonu mai dudungaa-U wau ode utoonu nonaóo-U. Diila otaawa limongoli lonto utoonu mai dudungaa-U, wau ode utoonu nonaóo-U. **15** Timongoli momutoó tau wolo dudelo lomanusia; Wau diila momutoó penu boli ngotaa maó. **16** Bo humayaalio Wau momutoó tau, putuusani-U boito aadili, sababu Wau diila tutuuwau; Allahu Taaala talolao mai ola-U woluo wola-U. **17** Todelomo butoée Musa tulatuladu odie; ososakusi u otutu yito ososakusi monto taduulota. **18** Tamongohi sakusi pasali lo batanga-U woluo duulota Wau wau ti Paapa-U

talolao mai ola-U." **19** "Ti Paapa-Mu boito tou'oonu?" loiya maó limongolio. Ti Isa lolametaó, "Timongoli diila moóonuhe ola-U meaambo li Paapa-U. Humayaalio timongoli olo moóonuhe ola-U, maatantu timongoli moóonuhe li Paapa-U." **20** Ngoáamilalo botie pilotahuda li Isa tou' Tio donggo hemo ngaajali to Bele lo Eeya totili bubuu-luwaalo lodoi podewo. Bo diaaluo penu boli ngotaa maó talo heúpa o-Lio, sababu diipo leidungga wakutuulio. **21** Ti Isa luli lotahuda maó ode limongolio, "Wau mamonaó wau timongoli mamó lolohe ola-U, bo timongoli maamate todelomo dusamu. Ode tambati ponaówa-U, diila mowali onaówa limongoli." **22** Yi tahidihima kawasa lo Yahudi malo loiya, "Tanu Tio motohilaa motitipate, sababu tio malo tahuda, 'Ode tambati ponaówa-U, diila mowali onaówa limongoli.'" **23** Lapataó ti Isa lotahuda maó ode limongolio, "Timongoli dungga-dungga mai lonto walungo; bo Wau dungga-dungga mai lonto yitaato. Timongoli lonto dunia; Wau diila lonto dunia. **24** Uito sababuulio Wau motahuda mai olemu, deú timongoli maamate todelomo duduu-saamu. Wau memangi timongoli maamate todelomo duduu-saamu, wonu diila palacaya deú, 'Waulo Tio tailunte WAU WOLUO'." **25** "Otutuulio maó tatoonu Yio?" yilintu maó limongolio. Ti Isa lolametaó, "Donggo pongoola muli mobisala woli mongoli! **26** Donggo dadaata suáli tomimbihu olimongoli u ohilaa potahuda-U mai wau pomutoálo. Bo Tio talolao mai ola-U mowali palacayalo. Wau Wau mopoótaa ode dunia wolo u ilodungohe-U lonto o-Lio." **27** Timongolio diila mongalati deú Tio donggo hemo bisala toli mongolio pasali li Paapa. **28** Sababu uito ti Isa lotahuda maó olimongolio, "De wonu timongoli malo palaió mola Walaó Manusia, timongoli mamotota deú 'Waulo Tio tailunte WAU WOLUO', wau timongoli mamotota deú diaaluo penu boli tuwau maó u pilohutu-U monto batanga-U lohihilao. Wau bo wambaó motahuda wolo upilo ngaajali mai li Paapa ola-U. **29** Wau Tio tamalolao mai ola-U woluo wola-U. Diila peéenta maó Tio mopoluli ola-U tutuuwau, sababu Wau laito hemohutu wolo umoo sanangi hilaa-Lio." **30** Lapatio maó ti Isa lotahuda u ngoáamilalo boito, dadaata taa palacaya o-Lio. **31** Lapataó ti Isa lotahuda totau-tauwalo Yahudi tamaa pilalacaya o-Lio, "Wonu timongoli tumumulo moduduá

pongaajali-U otu-otutuulio maó muri-U, **32** yi maóonuhe limongoli Allahu Taáala taótutu, wau masababu uito timongoli malopatolo!" **33** "Amiaatia botie wali mai lei Abraham," uali mongolio. "Diipo peéetna maó amiaatia lowali wato penu boli lo tatoonu! Wolo makusudu-Mu wolo tahuda, 'Timongoli malopatolo?'" **34** "Otutu banali tahuda-U botie," tahuda maó li Isa ode limongolio. "Taa u mohutu dusa, taboitolo wato lodusa. **35** Wau wato ngota diila otambati utatapu todelomo ungaalaa, hiambola walaó u ohiheo-hiheolo maó otambati todelomo ungaalaa. **36** Sababu uitolo, wonu Walaó mopo lopotai olimongoli, timongoli otu-otutuulio maó molopato. **37** Memangi otaawa-U timongoli botie wali mai lei Abraham. Bo timongoli motohilaa momate ola-U mate-mateelo maó, sababu timongoli diila mohuto mololimo pongaajali-U. **38** Wolo u iloontonga-U toli Paapa-U, uitolo olo upilo tahuda-U mai. Hiambola timongoli mohutu wolo u pilo ngaajali lipaapamu olemu." **39** Timongolio lolametaó, "Ti Paapa lamiaatia deuuto-yito tei Abraham." "Humayaalio timongoli tióotutua walaée Abraham," tahuda Isa, "tantuulo maó timongoli mohutu wolo u pilohutu lei Abraham. **40** Wau mopo tunggulai olemu obobanali u ilodungohe-U lonto Allahu Taáala, bo timongoli ohilaa momate ola-U mate-mateelo maó. Tei Abraham diila lohutu debo odelo uito! **41** Timongoli helohutu wolo upilohutu lipaapamu lohihilao." Tametaó limongolio, "Amiaatia diila mongo walaó haramu. Ti Paapa lamiaatia bo ngota, deuuto-yito Allahu Taáala lohihilao." **42** Lapataó ti Isa lotahuda ode limongolio, "Humayaalio Allahu Taáala boito ti Paapamu, timongoli mamó tolianga ola-U, sababu Wau dungga-dungga mai lonto Allahu Taáala. Wau dungga-dungga mai diila wolo hilaa-U lohihilao, bo Tiolo tamalolao mai ola-U. **43** Wolo sababuulio timongoli diila mongalati wolo upilo tahuda-U? Sababu timongoli diila moó tahangi modungohe pongaajali-U. **44** Ibilisi wambaó ti paapamu, wau timongoli mohuto moduduá u otohilaa lipaapamu. Tumulalo mai bohulio ibilisi boito moomatea mate-mateelo maó. Tio diila peéenta maó motiwambaó ode u otutu, sababu diaaluo u otutu to olio. Wonu tio mohimbulo, uito mawaajibu, sababu maóditó piililio. Tio mohimbuloa wau bungo lou totoonulalo yimbulo. **45** Bo Wau motahuda mai u otutu, wau sababu uitolo timongoli diila palacaya ola-U. **46** Tatoonu



towolota limongoli mowali mongohi bukuti deü Wau odusa? Wonu Wau motahuda mai u otutu, yilongola timongoli diila palacaya ola-U? **47** Taa asaliilio mai monto Allahu Taáala, modungohe tahuda lo Allahu Taáala. Bo timongoli diila lonto Allahu Taáala, uitolo sababuulio timongoli diila mohuto modungohu." **48** Tau-tauwalo Yahudi boito lolametaó li Isa, "Wolo diila otutu loiya lami botie deü Yio taulo Samaria tailo tuanga lolati?" **49** Ti Isa lolametaó, "Wau diila ilotuanga lolati. Wau hemo hulumati li Paapa-U, bo timongoli lohina ola-U. **50** Wau diila hemo lolohe hulumati ode batanga-U lohihilao. Woluo ngota tahemo tolopani mai ohulumati ode ola-U, wau Tiolo tamo mutoái. **51** Otutu banali tahuda-U botie, taa u moduduó tahuda-U, ohiheo-hiheolo maó diila tamaate." **52** Lapataó tau-tauwalo Yahudi boito loloiya maó odeli Isa, "Botia mailotaawa lami deü yio botie otu-otutuulo maó ilotuanga lolati! Tei Abraham lohihilao mailate, odito olo ngoáamila nabi. Bo Yio malo tahuda, 'Taa u moduduá tahuda-Mu, ohiheo-hiheolo maó diila tamaate.' **53** Wonu tei Abraham lohihilao mailate, wau mongo nabi ngoáamilalo olo mailate, Yio botie tatoonu? Diila pongalo aakali Yio talebe udaá woli paapa lami tei Abraham!" **54** Ti Isa lolametaó, "Humayaalio Wau mololohe ohulumati ode batanga-U lohihilao, ohulumati boito diaaluo hunalio. Tamo hulumati ola-U yito ti Paapa-U tahe anggapuo limongoli Allahu Taáala limongoli, **55** lebe-lebe pomaó timongoli diila moóonuhe o-Lio. Bo Wau moóonuhe o-Lio. Humayaalio Wau motahuda mai deü Wau diila moóonuhe o-Lio, yi Wau ngotaalio lo tamoo-himbulowa, tutuwauwa debo odelo timongoli. Wau moóonuhe o-Lio wau modungohe tahudaa-Lio. **56** Ti Paapamu Abraham sanangi daá deü tio mamooonto dulahu-U. Tio maloóonto wau tio sanangi!" **57** Lapataó tau-tauwalo Yahudi loloiya maó odeli Isa, "Umulu-Mu diipo limo lopulu lotaunu, wau Yio maloóonto olei Abraham?" **58** Ti Isa lolametaó, "Otutu Wau motahuda mai olemu: tou tei Abraham diipo pilotutulio mai, Wau mawoluo." **59** Lapataó tau-tauwalo Yahudi boito lohama botu u pomailio o-Lio; boti Isa loluoó batanga-Lio, tulusi lonaó lololaa maó Bele lo Eeya.

**9:1** Tou ti Isa naónaó, iloontonga-Lio taa pitoó anggadú pilotutulio mai. **2**

Tahiduduá li Isa lohintu maó odeli Isa, "Paaá Guru, yilongola tau botie pilotutulio mai pitoó? Wolo kalana tio lohihilao odusa meaalo mongo dulaálio taódusa?" **3** Ti Isa lolametaó, "Tio pitoó diila sababu dusalio lohihilao meaalo dusa lomongo dulaálio, bo alihu tau mowali moóonto maó okokawasa lo Allahu Taaála mokalaja todelomo batangalio. **4** Ngotilonggadu donggo dulahu, ito musi mokalaja maó kalajaa-Lio lo talolao mai ola-U. Hui mamei dungga, wau penu boli ngotaa maó diila tamowali mokalaja. **5** Ngotilonggadu Wau todunia botie, Waulo tinelyo dunia." **6** Lapataó lotahuda odito ti Isa lonula loiyohu ode huta, wau longaaheó yiyoo-Hio boito wolo huta. Lapataó piloseka-Lio tomato lotau boito, tulusi lotahuda maó olio, **7** "Ponaólo pobelesia maó bayamu to Kulamu Siloam." (Siloam boliilio 'Ilutolia'.) Yi tau boito malonaó wau lopobelesi bayalio. Tou tio lohualingai, tio malowali loóonto. **8** Mongo tiheedio wau tau-tauwalo tou dipolulio mai loóonto olio hemohile-hile, ngoáamilalo malo loiya, "Diila bo maatio botie tabiasaalio hulohuloáa hemohile-hile?" **9** Woluo talo loiya, "Memangi maatio." Bo woluo olo talo loiya, "Diila, tio bo ngopeé motutuuwau wolo tau boito." Bo tau boito lohihilao loloiya, "Wawaatiaalo tio." **10** "Woloolo mola waliilio tunggula yio malowali loóonto?" uali mongolio olio. **11** Tio lolametaó, "Taa ilunte Isa boito lohutu maó lataó ngoidi tulusi piloseka-Lio mai tomato lowatia wau lotahuda, 'Ponaólo pobelesia maó bayamu to Kulamu Siloam.' Tulusi watia lonaó. Wau tou watia hemo pobelesi baya lowatia, watia malowali loóonto." **12** "Toutoonuu tau boito?" yilintu maó limongolio. Tio lolametaó, "Diila otaawa." **13** Todulahu boito dulahu Saabati tou ti Isa longaaheó huta wolo yiyoo-Hio u lohutu taa pitoó boito lowali loóonto. Yi taa engontielio pitoó boito dilelolio mota ode tau-tauwalo Parisi. **15** Timongolio olo lohintu maó olio woloolo mola tio malowali loóonto. Tio lolametaó, "Tio malodutu mai lataó tomato lowatia, lapataó pilobelesi maó lowatia lataó boito watia malowali loóonto." **16** Dengolo lota towolota tau-tauwalo Parisi boito loloiya, "Diila pongalo aakali taa ulohutu utie asaliilio mai lonto Allahu Taaála, sababu Tio diila momandungi dulahu Saabati." Bo taa wewo loloiya, "Diila pongalo aakali taa odusa mohutu momoo-linggolabeyalo debo odelo utie?" Lapataó tilumoodulo mola

huhama u hihihede towolota limongolio. **17** Yi tau-tauwalo Parisi boito luli lohintu maó totau boito, "Wolo huhamaamu pasalii-Lio lo talohutu mai olemu loóonto?" "Tio nabi." tametaó lotau boito. **18** Bo mongo tauwa lo Yahudi boito diila lohuto palacaya deú tau boito memangi pitoó tou dipolulio mai wau botia malowali loóonto. Sababu uito timongolio malo tianga mongo dulaálio, **19** wau lohintu maó, "Otutu tio botie walaumu tahe loiyamu pilotutulio mai pitoó? Woloolo mola tio malowali loóonto botia?" **20** Mongo dulaá lotau boito lolametaó, "Memangi tio botie walaó lamiaatia; wau tio memangi pitoó anggadu pilotutulio mai. **21** Bo woloolo mola tio malowali loóonto botia, diila otaawa lamiaatia. Wau tatoonu talohutu olio malowali loóonto, uito olo diila otaawa lamiaatia. Yintuwalo olio, tio maleidaá; tio mowali molameto lohihilao." **22** Mongo dulaá lotau boito loloiya maó odito sababu timongolio moohe tomongo tauwa lo Yahudi; sababu timongolio boito malo heeluma, deú tamo tolongaku maó li Isa debo odelo Olongia Tamoo-poáhua, diilalo mowali tumuwoto ode bele potabiaalo. **23** Uito sababuulio mongo dulaá lotau boito loloiya maó, "Tio maleidaá; yintuwalo olio." **24** Lapataó timongolio luli lotiango taa u engontielio pitoó boito, wau loloiya maó olio, "Potadiaalo mola deú yio mamoloiya mai u otutu. Otaawa lami tau boito taa odusa." **25** "Wolo tio odusa meaalo diila," tametaó lotau boito, "diila otaawa lowatia. Bo tuwau suáli u otaawa lowatia; muloololio mai watia pitoó, botia watia maloóonto." **26** Lapataó timongolio luli loloiya maó olio, "Mawolo u pilohutu-Lio olemu? Woloolo mola Tio lohutu olemu lowali loóonto?" **27** Tau boito lolametaó, "Mailungguli mai lowatia olimongoli bo timongoli diila mohuto modungohu. Yilongola timongoli ohilaa modungohe poli? Otanu timongoli ohilaa mowali muri-Lio olo?" **28** Lapataó timongolio malomuayo olio wau loloiya maó, "Yio-yioóolo muri-Lio; ami diila! Ami muri lei Musa. **29** Otaawa lami deú Allahu Taáala malo tahuda odelei Musa. Bo pasali lotau boito, diila otaawa lami lonto utoonu asalii-Lio." **30** Tau boito lolametaó, "Moólinggolabe daá deú diila otaawa limongoli lonto utoonu asalii-Lio, hiambola Tio malohutu olaatia lowali loóonto. **31** Otaawanto deú Allahu Taáala diila modungohe taa odusa, bo taa u mohulumati Allahu Taáala, wau tamohutu kahandaki-Lio. **32** Tumulalo

mai bohulo dunia diipo peéeta maó ilodungohe woluo talohutu tau pilotutulio mai pitoó malowali loóonto. **33** Wonu tau boito diila monto Allahu Taáala, tio diila mowali mohutu wolo-wolo." **34** Tametaó limongolio, "Wolo? Yio tapolu-polu lodusa anggadu pilotutulio mai, yio mamó ngaajali olami?" Yi tumulalo mai tou boito tio dilinilio tumuwoto ode bele potabiaalo. **35** Ti Isa loódungohe deu tau boito mailinggi limongolio lonto bele potabiaalo. Tio malo lolohe tau boito lapataó lotahuda olio, "Wolo yio palacaya to Walaó Manusia?" **36** Tau boito lolametaó, "Tatoonu Tio. Tuani? Tulungia poótaa mai alihu watia palacaya o-Lio." **37** "Yio maloóonto o-Lio," tametaó li Isa. "Tiolo tamasaatia botie donggo hemobisala wolemu." **38** "Watotia, palacaya, Eeya," loiya maó lotau boito, lapataó losujudu mola tio totalu li Isa. **39** Ti Isa lotahuda maó, "Wau dungga-dungga mai ode dunia botie mai momutoó; alihu taa pitoó mowali moóonto, wau taa moóonto, mowali pitoó." **40** Dengolo lota taulo Parisi tawoluo teto loódungohe li Isa lotahuda odito, tulusi timongolio lohintu o-Lio, "Makusudu-Mu ami botie pitoó olo?" **41** Ti Isa lolametaó, "Humayaalio timongoli pitoó, timongoli diila odusa. Bo sababu timongoli malo loiya, 'Ami moóonto,' uito boliilio maó timongoli donggo odusa."

**10:1** "Otutu banari tahudaa-U botie: Taa tumuwoto ode delomo lantunga lohimba moli bala, wau diila moli huhebu, bo momiaata moli dalalo wewo, tau boito mototaówa wau tamoo-lambata. **2** Bo taa tumuwoto moli huhebu, tio-tiolo diti lohimba. **3** Tamoodahawa lantunga momuo maó huhebu to olio, wau hihii-mbawaalo mamó dudua súalaalio tou tio motiango timiidu tanggulo hihii-mbawaalo boito wau modelo hihii-mbawaalo ode bulemengio. **4** Lapataó hihii-mbawaalo boito dilelolio ode bulemengio, diti boito monaó totalu, wau hihii-mbawaalo boito modudua olio sababu hihii-mbawaalo moóonuhe súalaalio. **5** Hihii-mbawaalo diila tamohuto modudua taawewo, tumbaó matumateó monto tau boito, sababu diila moóonuhe súalaalio." **6** Ti Isa lohungguli maó pohumaya boito, bo timongolio diila mongalati wolo u milakusudu-Lio. **7** Yi ti Isa peéentapo lotahuda maó, "Otutu banali tahudaa-U botie: Waulo huhebu duólo himba. **8** Ngoáamila tamonaó mai tou dipolulio Wau deúito-yito tamootaówa wau

tamoo-lambata, bo hihii-mbawaalo diila modungohe sua la limongolio. **9** Waulo huhebu. Tatoonu tatumuwoto moli ola-U mamoaahu; tio tumuwoto lumualo wau mootapu uaaloo. **10** Tamootaowa monao mai bo mai motao, mai momate mate-mateelo maoo wau mai mongantulu. Bo Wau dungga-dungga mai alihu manusia mootapu tutumulo -- tutumulo laba-labaalo daata. **11** Waulo diti tamopiohu. Diti tamopiohu mongohi nyawalio ode hihii-mbalio. **12** Tahe wuupalio tadiila diti wau diila olo taa ohuuwo lo hihii-mbawaalo boito, matumeteo mololaa maoo hihii-mbawaalo wonu tio moonto soligala monao mai. Yi hihii-mbawaalo boito madangapolio wau pobubuu-alaalio lo sorigala. **13** Tahe wuupalio boito tumetao, sababu tio mokalaja duolo wuupa. Tio diila momandungi hihii-mbawaalo boito. **14** Waulo diti tamopiohu. Tutuuwauwa debo odelo ti Paapa moonuhe ola-U wau Wau moonuhe li Paapa, odito olo Wau moonuhe hihii-mbaa-U wau hihii-mbaa-U olo moonuhe ola-U. Wau mohudu nyawa-U ode limongolio. **16** Donggo woluo hihii-mbawaalo uwewo hakuu-U olo, bo diila waiwaito todelomo himbala lohimba botie. Timongolio olo musi deloo-U wau timongolio mamoo dungohe sua la-U. Timongolio ngoamilalo mamowali ngopo himbala wolo ngota ditilio. **17** Ti Paapa lomonu ola-U sababu Wau lohudu nyawa-U, u muli tolimoolo poli. **18** Diaaluo penu boli ngotaa tamowali mohama maoo monto ola-U. Wau mohudu maoo modudua otohila lohilao. Wau okawasa u mohudu maoo, wau okawasa muli mohama maoo. Ui-uitolo tuugasi u tilolimo-U lonto li Paapa-U." **19** Sababu ti Isa lotahuda odito, yi tau-tauwalo Yahudi mahipo hahaamawa. **20** Dadaata tahi poloiyawa, "Tio mailo tuanga lolati! Tio biyongo! Pongoola timongoli modungohe o-Lio?" **21** Bo woluo olo tahe moloia, "Taa u ilotuanga lolati diila hemobisala odito! Wolo lati mowali mohutu taa pitoo mowali moonto?" **22** To Yerusalemu tau-tauwalo donggo hemo polame dulahu Buka Pongo-saahalo Bele lo Eeya. Tou boito sembo lohuhulo. **23** Ti Isa donggo naonaoo to Sulambe Salomo todelomo Bele lo Eeya, **24** tou tau-tauwalo Yahudi lonaoo mai lotiambu topalito li Isa. Timongolio malo loia, "Tunggula omolua Yio ohilaa mopoluli olami diila otatapua lohilaoo? Poleleaalo mai wolo juujulu, wonu Yio otu-otutuulo maoo Olongia Tamoo-poaahua." **25** Ti Isa lolametao, "Mapilo tahuda-U mai

olimongoli, bo timongoli diila palacaya. Ngoáamila kalaja u pilohutu-U to tangguli Paapa-U, mongohi mai bukuti pasalii-U. **26** Timongoli diila palacaya sababu timongoli diila waiwaito to hihii-mbaa-U. **27** Hihii-mbaa-U modungohe sualaa-U. Otaawa-U timongolio, wau timongolio moduduá ola-U. **28** Wau mongohi mai olimongolio tutumulo ututuulio tutu wau ohiheo-hiheolo maó, wau u ohiheo-hiheolo maó timongolio diila tabinasa. Diaaluo penu boli ngotaa maó tamowali molambata olimongolio monto ola-U. **29** Ti Paapa-U tamalohudu mai olimongolio ode ola-U, mongilabotaó lou totoonulalo maó. Wau diaaluo penu boli ngotaa maó tamowali molambata olimongolio monto uluu li Paapa-U. **30** Wau wau ti Paapa-U yito tuwau." **31** Lapataó tau-tauwalo Yahudi luli lohama botu u pomailio li Isa. **32** Boti Isa lotahuda maó olimongolio, "Timongoli maloóonto ola-U helohutu dadaata kalaja umopiohu, uiludu mai li Paapa ola-U. Monto ngoáamila kalaja boito, toonu umoó sababu olimongoli ohilaa momai ola-U?" **33** Tau-tauwalo Yahudi boito lolametaó, "Diila bo kalana ngoáamila kalaja-Mu u mopiohu boito ami ohilaa momai wolo botu ole-Mu, bo sababu Yio hemo muayo Allahu Taáala. Yio ngotaalio lomanusia, wau ohilaa mopowali batanga-Mu Allahu Taáala." **34** Lapataó ti Isa lolametaó, "Diila matodelomo Buku lo Butoumu leitulade: Allahu Taáala lotahuda mai, 'Timongoli yito ila'? **35** Otaawanto deu wolo u leitulade todelomo Kitabi pohupohutu u ohiheo-hiheolo maó. Oditolio, wonu Allahu Taáala mongunte mai 'ila' totaa hipo lolimoa tuhudaa-Lio, **36** yilongola timongoli helo loiya ola-U hemo muayo Allahu Taáala sababu Wau lotahuda Walaó Allahu Taáala? Lebe-lebe pomaó Wau tilulaoto Allahu Taáala wau yilao-Lio mai ode dunia. **37** Wonu Wau diila mohutu kalaja u pilomalentai lo Allahu Taáala, diila maó pomalacaya ola-U. **38** Bo sababu Wau helohutu maó uito, pomalacayalo tou wolo u pilohutu-U boito, eleponu timongoli diila mohuto palacaya ola-U. Lou odito otaawa maó limongoli wau mongalati deu Allahu Taáala debo tuwau wola-U, wau Wau debo tuwau wolo Allahu Taáala." **39** Timongolio luli lotolopani moheupa li Isa, bo Tio loólahi lonto olimongolio. **40** Ti Isa luli lohualinga ode ngotuwali lo Dutula Yordan, totambati u muloololio mai hepopolihua lei Yahya, lapataó malo tibiluloá mola teto. **41** Dadaata tau lonaó mai ode



o-Lio. Timongolio malo loiya. "Tei Yahya diila helohutu momoó-linggolabeyalo, bo ngoáamila uiloiyaalio pasali lotau botie otutu." **42** Tulusi dadaata taa mola teto palacaya li Isa.

**11:1** Ngotaalio tailunte Lajarus bilu-biluloá to Betania peé-peéenta wolo wutatio ti Maria woli Marta. **2** Ti Maria yito taabua talo looheó yinulo moonu ode oáati Isa, wau pilaidelio wolo huwoio. Tou wakutu tuwau tei Lajarus longongoto. **3** Mongo wutatio duulota lopohabari maó odeli Isa, "Eeya, wutato mongowatotia tapilonua lo Eeya boito mongongoto." **4** Tou ti Isa laódungohe habari boito, Tio lotahuda maó, "Ngongoto botie diila tamooóate. Utie lotoduo mai alihu Allahu Taaála poudaáalo, wau alihu woleeto olo Walaó Allahu Taaála poudaáalo mola." **5** Ti Isa momonu oli Marta, Maria wolei Lajarus. **6** Bo tou ti Isa loótapu maó habari deu tei Lajarus mongongoto, Tio sangaja lotibiluloá to tambati-Lio donggo duuhui mola. **7** Lapataó uito bolo Tio lotahuda maó to tahiduduá o-Lio, "Dulo ito mohualinga ode Yudea." **8** Timongolio lolametaó, "Paaá Guru, botiboti mola tau-tauwalo Yahudi ohilaa momai li Paaá wolo botu wau botia ti Paaá ohilaa poli mohualinga mola odito?" **9** "Wolo diila ilo-ilolaanga hiheolio mopulaa dulo jamu?" tahuda maó li Isa. "Taa monaó tou dulahu, diila meiteduó sababu tio moóonto baango dunia botie. **10** Bo taa monaó tou hui meiteduó, sababu diaaluo baango to olio." **11** Odi-oditolo tahuda li Isa. Lapataó Tio luli lotahuda maó, "Sahabatinto tei Lajarus malei tuluhu, bo Wau maamota mopobongu olio." **12** Tahiduduá li Isa loloiya maó, "Eeya, wonu tei Lajarus tuutuluhu, de tio mamoluli mai." **13** Makusudu li Isa deu tei Lajarus mailate. Bo timongolio hemo lantobu deu makusudu li Isa yito tei Lajarus bo tuutuluhu biasa. **14** Sababu uito ti Isa lotahuda maó ode limongolio wolo juujulu, "Tei Lajarus mailate. **15** Bo Wau sanangi olo deu Wau diaaluo mola teto, sababu lebe mopioheó olimongoli, alihu timongoli moó palacaya. Duloolo ito monaó mota botia odelei Lajarus." **16** Tei Tomas tailunte "Taa Pingi" loloiya maó ode mongo sahabatilio tahiduduá li Isa, "Dulo ito moduduó, penu boli ito mate wo-Lio!" **17** Tou ti Isa leidungga mota ode tambati boito, tei Lajarus mawopahui hiheolio tokuubulu. **18** Betania membideó lo Yerusalemu, tanu tolo kilo lamingio.

**19** Dadaata tauho Yahudi malonaó mai lomilohe oli Marta woli Maria u lomalongo olimongolio sababu timongolio ilopatea lo wutatio. **20** Tou ti Marta loódungohe ti Isa lonaó mai, tio yilumualai lolutulo li Isa, hiambola ti Maria lotibiluloáa tobele. **21** Loiya maó li Marta odeli Isa, "Eeya, humayaalio Eeya woluo tea tou boito, tantu wutato lowatotia diila yilate. **22** Boli odito otaawa lowatotia deu masaatia botieelo Allahu Taáala mamongohi mai penu boli wolo upohile mola lo Eeya o-Lio." **23** "Wutatumu mamuli tumumulai," tahuda maó li Isa oli Marta. **24** Ti Marta lolametaó, "Otaawa lowatotia tei Lajarus mamuli tumumulai wonu taa mate bonguloola to Dulahu Kiama." **25** "Waulo tamongohi mai tutumulo wau mopobongu mai taa mate," tahuda maó li Isa odeli Marta "Taa u palacaya ola-U matumumulo, eleponu tio mailate. **26** Wau taa tumu-tumulo wau palacaya ola-U, diilalo mate ohiheo-hiheolo maó. Wolo yió palacaya tosuáli boito?" **27** "Eeya," tametaó li Marta, "Watotia palacaya Eeya Walaó Allahu Taáala, Olongia Tamoo-poáahua tamamei dungga mai ode dunia botie." **28** Lapataó ti Marta loloiya maó odito, tio mota lotiangai oli Maria, wutatio wau lopo lohumaó olio, "Ti Paaá Guru woluo tewe; tio hemohintu olemu," **29** Loódungohe uito, ti Maria huáa tilimihulo, tulusi malo dunggaya woli Isa. **30** Tou boito, ti Isa diipo tilumuwoto ode kambungu. Tio donggo totambati li Marta tou lodunggaya wo-Lio. **31** Tau-tauwalo Yahudi tadonggo hipoliyanga oli Maria tobele, loónto oli Maria tilimihulo wau huáa yilumualao; oditolio timongolio malo duduá olio, sababu helantobu limongolio tio monaó ode kuubulu mola humoyongo. **32** Tou ti Maria leidungga totambati li Isa wau loónto o-Lio, maloti bongghuulo mola ti Maria totalu li Isa wau loloiya, "Eeyau, wonu Eeya woluo tea tou boito, tantu wutato lowatotia diila yilate." **33** Tou ti Isa loónto oli Maria hiyo-hiyongo, wau tau-tauwalo Yahudi talonaó mai woli Maria boito olo hehiyonga, hilaa-Lio masiluukali, wau oontonga lodehu daá hilaa-Lio. **34** Yi Tio malohintu maó olimongolio, "Touitoonu pilolobunga limongoli olio?" "Toduwolo mai bilohi lo Eeya," tametaó limongolio. **35** Lapataó ti Isa mahilu moyongo. Yi tau-tauwalo Yahudi boito malo loiya, "Bilohi, donggo boli ponu-Lio olei Lajarus!" **37** Bo woluo towolota limongolio talo loiya, "Tio lopoóluli taa pitoó maloónto,

yilongola Tio diila mowali mongabuto olei Lajarus alihu diila maó mate?"

**38** Luli lodehu daá hilaa li Isa, lapataó malonaó mota ode kuubulu.

Kuubulu boito yito gowa tuwau u hileutalio wolo botu leidaá. **39** "Poheiya maó botu boito," tahuda li Isa. Ti Marta wutato lo tailate boito, lolametaó,

"Bo Eeyau, tio mawopahui tokuubulu. Tantulo maó maboobolo

mohutodu!" **40** Ti Isa lolametaó oli Marta, "Diila mapilo tahuda-U mai olemu; Wonu yio palacaya, yio mamooonto malo odito udaá kawasa lo

Allahu Taaala!" **41** Yi timongolio malo pohinggi botu boito. Lapataó ti Isa yilumanggela mola ode hulungo wau loloiya, "Oduólo, Paapa, sababu ti

Paapa malo dungohei olaatia. **42** Otaawa lowatia ti Paapa laito

modungohei olaatia, bo watia moloiya maó utie, ode tau-tauwalo tawoluo tea; alihu timongolio palacaya deu boti Paapalo talolao mai olaatia." **43**

Lapataó loloiya maó odito, ti Isa malo ngiibode wolo suala u loóohui,

"Lajaru, lualoolo mai!" **44** Yi mailumualai taa mailate boito. Uluu wau

oátio donggo bolubolu lolatu, wau bayalio donggo tautaubu wolo kaingi taubu baya. "Yinggilalo latulio alihu tio bebasi monaó," tahuda maó li Isa

tatau-tauwalo teto. **45** Dadaata tau-tauwalo Yahudi talonaó mai lomilohe oli Maria, palacaya toli Isa tou timongolio loóonto u lotoduo mai boito. **46**

Bo dengolo lota towolota limongolio lonaó mota ode taulo Parisi wau lopo duloheó wolo u mapilohutu li Isa. **47** Sababu uito tau-tauwalo Parisi wau

mongo iimamu tauwa malohutu dudunggaya wolo Mahakama Agama.

Timongolio loloiya, "Wolo umusi pohutuwonto? Tau botie malohutu

dadaata u moolinggolabu! **48** Wonu hulianto maó Tio mololaalaita odie, ngoáamila tau mapalacaya o-Lio. Wau pulitio maó tahidihima kawasa lo

Roma mamonaó mai wau mongantulu Bele lo Eeya wau ngoilanggubu bangusanto!" **49** Ngotaalio limongolio tailunte Kayapas, iimamu daá

totaunu boito, loloiya, "Timongoli diila motota lolo-loolo. **50** Wolo

timongoli diila mongalati deu domi ulipu, lebe mopioheó taangota mate wolo ngoilanggubu bangusa moántulu?" **51** Otutuulio maó tei Kayapas

loloiya uito, diila lonto pikiilangilio lohihilao. Bo odelo iimamu daá totaunu boito tio lonubuwati mai deu ti Isa maamate duólo bangusa lo

Yahudi. **52** Wau diila bo ode bangusa lo Yahudi wambaó, bo olo u

mongambu wau mopotuwau maó mongo walaó Allahu Taaala tamalo

bubuuáyawa. **53** Tumulalo mai todulahu boito tahidihima kawasa lo Yahudi malo heeluma u momate li Isa mate-mateelo maó. **54** Sababu uito ti Isa diilalo lotibilohi totalu lotaa dadaata towolota taulo Yahudi. Tio malo lolaa maó Yudea, tulusi lonaó ode kota u ilunte Epraim membideó lohuta datahu u luasi daá wau delita. Mota teto Tio lotibiluloá peé-peéenta wolo tahiduduá o-Lio. **55** Tou boito malembidei Dulahu Buka Paska lo Yahudi. Dadaata taa lonto kakaa-mbunguwalo malonaó mola ode Yerusalemu moponaó lo upacala mopobelesi batanga tou dipolulio lameyangi boito. **56** Timongolio hemo lolohe li Isa wau tou hiambua to Bele lo Eeya, timongolio malo loiya ngota timongota, "Woloolo mola huhamaamu? Tanu tio diila monaó mai ode lameyangi botie." **57** Timongolio loloiya maó uito sababu mongo iimamu tauwa wau tau-tauwalo Parisi malo polualao palenta deu taa motota toutoonu ti Isa woluo, musi mopo dulohei alihu Tio mowali waupolo.

**12:1** Wolonggui mola tou diipo Dulahu Buka Paska, ti Isa lonaó mola ode Betania. Totambati boito bilu-biluloá tei Lajarus tamaa bilongu-Lio mai lonto opopate. **2** Mola teto ti Isa tilamelaó limongolio, wau ti Marta talohinta o-Lio. Tei Lajarus wau tahe tiloduo lotihuloáa lolamela peé-peéenta woli Isa. **3** Lapataó ti Maria lonaó mai lodelo yinulo Narwastu moonu u mahale daá otanu ngoputu loliiteri. Tio loluwataó yinulo boito ode oáati Isa, lapataó malo maideó wolo huwoio. Ngoilanggubu bele boito mailoonulo mola, sababu yinulo moonu boito. **4** Bo tei Yudas Iskariot, tala ngota muri li Isa -- talapatio maó lohiyanati o-Lio -- loloiya maó. **5** "Yilongola yinulo moonu boito diila pilotali wolo halaga tolo hetuto doi talaá, wau doilio wohi mota ode taa mosikini?" **6** Tei Yudas loloiya odito diila kalana tio mopoótuoto taa mosikini bo sababu tio mootawa. Tio helohama doi lokasi peé-peéenta wolo doi utilahu maó to olio. **7** Boti Isa lotahuda, "Huliaalo maó taabua boito! Tio lohutu uito duólo dulahu u polobungalo ola-U. **8** Taa mosikini laito woluo towolota limongoli, bo Wau diila." **9** Dadaata taulo Yahudi loódungohe deu ti Isa woluo to Betania, oditolio timongoli malonaó mola odito. Timongolio lonaó mola diila bo sababu ti Isa, bo sababu timongolio olo ohilaa

momilohe olei Lajarus tamaa bilongu li Isa lonto opopate. **10** Uito sababuulio mongo iimamu tauwa ohilaa momate olo olei Lajarus mate-mateelo maó; **11** sababu tio maloó sababu dadaata taulo Yahudi lololaa maó olimongolio wau palacaya li Isa. **12** Loloombulio mola taa dadaata tamalonaó mai u mopolame Paska loódungohe deu ti Isa donggo tononaó-Lio dulu-dulunga ode Yerusalemu. **13** Yi timongolio malohama duduu-ngowaalo Palemu tulusi mota lolutulai o-Lio, sambela hiwaatia wolo wengahe daá, "Pujiaalo mola Allahu Taaala! Mabala-balakatilo Tio tadungga-dungga mai to tanggulo Eeya. Mabala-balakatilo Olongia lo Isirailu!" **14** Ti Isa loótapu kolodai tuwau udonggo buboto, wau tilaéa-Lio. Yi malo toduwolo u leitulade todelomo Kitabi: **15** "Diila oohe, puusili lo Sion! Bilohilo Olongiaamu dungga-dungga mai, taétaé tokolodai buboto tuwau!" **16** Tou boito tahiduduá li Isa diipo mongalati ngoáamilalo boito. Bo lapatio maó ti Isa piloudaá wolo opapate-Lio, bolo timongolio loóéela mola deu u pilohutu lotau-tauwala o-Lio boito malei tuladu todelomo Kitabi tomimbihu o-Lio. **17** Tau-tauwalo tawoluo tou ti Isa lotianga olei Lajarus yilumulai lonto kuubulu wau lopobongu mai olio lonto opopate, mololaita helongohi sakusi pasali losuáli boito. **18** Uito sababulio taa dadaata boito lonaó mota odeli Isa sababu timongolio loódungohu deu maa Tiolo talohutu u moólinggolabe boito. **19** Yi tau-tauwalo Parisi malo loiya ngota timongota, "Ito diila mowali mohutu wolo-wolo! Bilohilo wambaó, ngoilanggubu dunia lonaó loduduá o-Lio!" **20** Towolota lotau-tauwalo talonaó ode Yerusalemu mola lomaya to lameyangi boito woluo olo dengolo lota taulo Yunani. **21** Timongolio lonaó mai odelei Pilipusi wau loloiya maó, "Wutato, wonu mowali amiaatia ohilaa modunggaya woli Isa." (Tei Pilipus asaliilio lonto Betsaida to Galilea.) **22** Yi tei Pilipus lonaó mota lopoótaa suáli boito odelei Andreas, wau lapataó timongolio duduulota lopo tunggulaó odeli Isa. **23** Ti Isa lotahuda maó ode limongolio, "Mawakutuulio Walaó Manusia poudaáalo. **24** Otutu banali tahuda-U botie; Wonu pale ngobotu diila pomulolo ode delomo huta wau mate, pale boito madebo ngobotu wambaó. Bo wonu bili lopale boito mate, bolo bili boito mamongohi mai tilapulo dadaata pale. **25** Taa motoliángo tutumulio todunia botie, maóolia lo tutumulio. Bo taa molonuó

tutumulio todunia botie, mamolaalaó duólo tutumulo ututuulio tutu wau ohiheo-hiheolo maó. **26** Taa u motohilaa momaya ola-U musí moduduá ola-U; alihu tamoomayawa ola-U mowali peé-peéenta wola-U toutoonu Wau woluo. Taa u momaya ola-U mahulumatio li Paapa-U." **27** "Hilaa-U lawa-lawalo; wolo umusi loiyaa-U botia? Wolo waajibu Wau molojiya, 'Paapa, lopatalo mai Watia monto saaáti botie'? Bo tumbaó u molaasa maó saaáti polodutolo botieelo Watia lonaó mai. **28** Paapa, poudaáalo mola tangguli Paapa!" Yi dungo-dungohei suala lonto hulungo lotahuda mai, "Wau malo poudaá o-Lio, wau Wau mamuli mopoudaá o-Lio." **29** Taa dadaata tawoluo teto loódungohe suala boito. Timongolio malo loiya, "Uito bulonggodu!" Bo woluo olo talo loiya, "Diila! Malaikati tahemo bisala wo-Lio". **30** Lapataó ti Isa lotahuda maó olimongolio. "Suala boito ilodungohe, diila duólo polohuna daá ola-U, bo duólo polohuna daá olemu. **31** Botia maa wakutuulio dunia butoólo; botia takawa-kawasa todunia botie powulidulo. **32** Bo Wau botie, wonu Wau mapilo laiio toitaato dunia, mabantanga-U ngoáamila tau ode ola-U." **33** Tio lotahuda odito u lopoilaalo woloolo mola dudelolio tou Tio maamate maó. **34** Taa dadaata boito loloiya maó o-Lio. "Moduduá Buku lo Butoó lami, Olongia Tamoo-poáahua matumumulo ohiheo-hiheolo maó. Woloolo mola Yió mowali molojiya deu Walaó Manusia musí polaiólo toitaato dunia? Tatoonu Walaó Manusia boito?" **35** Ti Isa lolametaó, "Bo u ngopeé mola tilango boito woluo towolota limongoli. Oditolio pononaólo ngotilonggadu tilango boito donggo woluo, alihu timongoli diila maó odungga lou modiólomo. Taa monaó todelomo u modiólomo diila otaawalio ode utoonu naóolio. **36** Pomalacayalo to tilango boito, ngotilonggadu tilango boito donggo woluo to olemu, alihu timongoli mowali mongo walaó lo tilango." Lapataó ti Isa lotahuda maó odito, Tio lonaó lonteeto mola wau diila mohuto mopobilohe batanga olimongolio. **37** Eleponu madadaata u moólinggolabe hepilohutu li Isa totalu limongolio, timongolio debo diila palacaya o-Lio. **38** Yi malo toduo wolo uiloiya li Nabi Yesaya, "Eeya, tatoonu tapalacaya tohabari lomongo watotia? To olita kawasa lo Eeya pilopo bilohei?" **39** Uito sababuulio timongolio diila moó palacaya, sababu tei Yesaya malo loiya olo, "Allahu Taáala lotahuda, **40** 'Wau mopopitoó mato limongolio,



mohutu hilaa limongolio diila mowali bolióolo; alihu mato limongolio diila maó moóonto, pikiilangi limongolio diila maó mongalati. Alihu timongolio diila maó mohualingai ode ola-U, lapataó Wau mamó pooluli olimongolio.' "

**41** Tei Yesaya loloiya odito sababu tio maloóonto odudaá li Isa, wau helo bisala tomimbihu o-Lio. **42** Eleponu odito, dadaata tau, tumbaó towolota lo tahidihima kawasa lo Yahudi palacaya li Isa. Bo timongolio diila buheli motolongaku uito wolo juujulu, sababu timongolio moohe diila bolo taulo Parisi diila mongohi olimongolio tumuwoto ode bele potabiaalo. **43** Timongolio lebe motohilaa moótapu poloilaalo momuji monto manusia wolo polohalaga lo Allahu Taáala. **44** Lapataó ti Isa malo ngiibodu, "Taa palacaya ola-U, diila to ola-U tio palacaya, bo to o-Lio talolao mai ola-U. **45** Wau taa umoóonto ola-U, moóonto o-Lio talolao mai ola-U. **46** Wau dungga-dungga mai ode dunia botie odelo tilango, alihu ngoáamila taa palacaya ola-U diila tamoti biluloá todelomo u modiólomo. **47** Taa modungohe pongaajali-U, bo diila moduduáaó -- diila Wau tamo huumani olio. Sababu Wau dungga-dungga mai diila mai momutoó dunia botie, bo mai mopoáahu maó. **48** Taa diila mololimo ola-U wau diila modungohe u tilahuda-U, mawoluo tamo mutoái olio. Tahuda upilo tunggulo-U mai, ui-uitolo u mamó mutoó olio to Dulahu Kiama. **49** Sababu Wau diila lotahuda mai to hilaa-U lohihilao; ti Paapa talolao mai ola-U, mati Paapalo boito talo malentai ola-U wolo uwajibu potahuda-U wau u potunggulo-U. **50** Wau otaawa-U deú palentaa-Lio boito mongohi tutumulo ututuulio tutu wau ohiheo-hiheolo maó. Yi Wau mopo tunggulai debo odelo upilo ngaajali li Paapa ola-U."

**13:1** Ngohui tou diipo Dulahu Buka Paska, otaawa li Isa deú maa wakutuulio Tio mololaa maó dunia botie wau muli mohulinga mola odeli Paapa-Lio. Tio momonu totau-tauwalo talowali milikii-Lio todunia, wau Tio debo momonu olimongolio tunggula pulitio. **2** Ti Isa wau tahidudua o-Lio donggo hipolamela hui. Ibilisi malo potuwoto niyatilio ode hilaa lei Yudas walaée Simon Iskariot u mohiyanati li Isa. **3** Otaawa li Isa deú ti Paapa-Lio malohudu mai ngoáamila okokawasa ode o-Lio. Otaawa-Lio olo deú dudungga-Lio mai monto Allahu Taáala wau mamuli mohulinga

mola ode Allahu Taaala. **4** Sababu uito Tio tilimihulaó, malomuó jumba-Lio, wau lopo bintolaó hando to wohuta-Lio. **5** Lapataó uito Tio lohuwataó taluhu ode delomo basi tuwau, tulusi malongulo oáato lo tahiduduá o-Lio wau pilohengu-Lio wolo hando u bibiintolo to wohuta-Lio. **6** Maa tilunggulaó Tio odelei Simon Petrus, talo loiya, "Eeya, diila pongalo aakali Eeya tamaa mongulo oáato lowatotia?" **7** Ti Isa lolametaó, "Botia yio diila mongalati wolo u pohutuwo-U botie, bo yio de mamongalati maó." **8** "Keke, Yaa Eeyau," loiya maó lei Petrus odeli Isa, "Sama-samaata diila maó wuloi oáato lowatotia yaa Eeyau!" Bo tahuda maó li Isa, "Wonu Wau diila mongulo maó olemu, yio diila owumbuta wola-U." **9** Ualei Simon Petrus, "Wonu odito, yaa Eeyau, diila bo oáato wambaó bo wolo uluu wau lunggongo lowatotia olo!" **10** "Taa u malolihi, malo belesi ngangaawaalo maó," tahuda li Isa odelei Petrus. "Tio diilalo palalu pobelesiyolo; ngopohia oáati. Timongoli botie malo belesi, bo diila ngoáamilalo." ( **11** Mailotaawa li Isa tatoonu tamamo hiyanati o-Lio. Uito sababuulio Tio lotahuda maó, "Timongoli botie malo beresi, bo diila ngoáamilalo.") **12** Lapataó ti Isa longulo oáati mongolio, Tio luli lopomake jumba-Lio wau luli lotihuloó. Lapataó Tio lotahuda maó olimongolio, "Tingga mongalati timongoli wolo u boheli pilohutu-U mola olimongoli? **13** Timongoli longunte ola-U Guru wau Eeya. Wau memangi odito. **14** Wonu Wau odelo Eeya wau Guru mongulo mai oáatumu, yi timongoli olo waajibu mongunguuloa maó oáati mongoli. **15** Wau mongohi mai obaaya botie olimongoli, alihu timongoli olo mopohutu maó wolo umaa pilohutu-U mai olimongoli. **16** Otutu banali tahuda-U botie: wato ngota diila lebe udaá woli tuanilio, wau utolia ngota diila lebe udaá wolo talolao olio. **17** Wonu mailotaawa limongoli ngoáamilalo botie, potisangilo tutu timongoli wonu mopohutu maó uito. **18** Wolo u tilahuda-U mai botie diila tomimbihu olimongoli ngoáamila. Otaawa-U tita-tita tamaa tilulaotu-U. Bo wolo u tulatuladu todelomo Kitabi, musi motoduo mai, deuuto-yito, 'Taa molamela wola-U, mamoluwali ola-U.' **19** Suáli boito potunggulo-U mai botia olemu, tou diipo motoduo mai, alihu wonu suáli boito de motoduo mai, timongoli mapalacaya maó deu Wauilo Tio tailunte, WA-U WOLUO. **20** Otutu banali tahuda-U botie: Tatoonu taa u mololimo

tailawo-U, mololimo ola-U. Wau tatoonu tamololimo ola-U, mololimo o-Lio tamalolao mai ola-U." **21** Lapatao ti Isa lotahuda odito, malodehu daa hila-Lio. Lapatao Tio lotahuda maó, "Otutu banali tahuda-U botie: tala ngota limongoli mamó hiyanati ola-U." **22** Tahiduduá o-Lio lobibiilohe ngota timongota wolo hilinggolabe daa sababu diila otaawa limongolio tatoonu tahe makusuduo-Lio. **23** Muri tapilonu li Isa hulohuloaa to ngotuwali li Isa. **24** Tei Simon Petrus longohi isalati olio, alihu tio mohintu maó li Isa wonu tatoonu tahe makusuduo-Lio. **25** Yi muri boito malo dudulaó odeli Isa wau lohintu, "Tatoonu tio, Eeya?" **26** Ti Isa lolametao, "Taa u wohiya-U roti u polomo-U ode delomo manggo, matio-tiolo taulio." Yi ti Isa malohama roti ngopita, pilopo lomo-Lio ode delomo manggo; tulusi yilohi-Lio odelei Yudas walaée Simon Iskariot. **27** Lolamemeto lapatao tei Yudas lololimo roti boito, Ibilisi matilumuwo to ode delomo hilaalio. Lapatao ti Isa lotahuda maó olio, "Huáa pohutuwalo wolo u otohila pohutuwomu." **28** Diaaluo penu boli ngotaa maó limongolio tahi huloaa hipo lamelawa teto mongalati deu yilongola ti Isa lotahuda odito odelei Yudas. **29** Woluo tahemo lantobu li Isa deu Tio lopoahu olei Yudas motali hitua-tuawua u palaluwolo to potihunggu boito, meaalo mongohi doi ngoidi ode taa mosikini -- sababu tei Yudas yito tamo dihimawa doi lokasi limongolio. **30** Lapatao tei Yudas lololimo roti boito, tio lato yilumualaó. Malei dungga mai hui. **31** Tou tei Yudas malonaó, ti Isa lotahuda maó, "Botia Walaó Manusia poudaaalo, wau Allahu Taaala mapo udaaalo moli o-Lio. **32** Wonu Allahu Taaala poudaaalo moli o-Lio, Tio olo poudaa mai lo Allahu Taaala moli batanga-Lio lohihilao. Tumbaó Allahu Taaala mahuáa mopoudaa mai o-Lio. **33** Mongo walaa-U, Wau diilalo mohiheo motibiluloa woli mongoli. Timongoli mamó lolohe ola-U, bo debo odelo umapilo tahuda-U ode tahidihima kawasa lo Yahudi, odito olo potahuda-U mai olimongoli; ode tambati u ponaowa-U, diila mowali onaowa limongoli. **34** Palenta bohu wohi-U mai olemu: Toliangilo ngota timongota, debo odelo Wau motoliangai olimongoli odito olo timongoli musi mototoo-lianga. **35** Wonu timongoli mototoo-lianga, ngoamila tau mamotota deu timongoli muri-U." **36** "Eeya, Eeya mamonaó ode utoonu?" yilintu maó lei Simon Petrus odeli Isa. Tametao li Isa, "Ode utoonu

ponaówa-U, yió diila mowali moduduá ola-U botia. Yió mamoduduá ola-U delapatio maó." **37** "Eeya, yilongola watotia diila mowali moduduá to Eeya botia?" yilintu maó lei Petrus poli, "Watotia iloheela lohilao mate wolo Eeya!" **38** Ti Isa lolametaó, "Otutu yió iloheela lohilao mate wola-U? Ototai maó, tou diipo maluó de mokukuyuu mai, yió mapoóotolu loloiya deú yió diila moóonuhe ola-U!"

**14:1** "Diila maó pobalisa hilaamu," tahuda li isa olimongolio.

"Pomalacayalo to Allahu Taáala, wau pomalacayalo ola-U olo. **2** Tobe le li Paapa-U otambati dadaata upoti biluloáalo. Wau odito mola u mopo dapato tambati olimongoli. Wau diila tamo tahuda mai odito olemu, humayaalio uito diila odito. **3** Lapatio maó Wau odito mola u mopo dapato tambati olimongoli, Wau muli mohualingai wau mai molutula olimongoli, alihu toutoonu Wau woluo, timongoli olo woluo. **4** Ode tambati ponaówa-U otaawa limongoli dalalio." **5** Lapataó tei Tomas loloiya maó odeli Isa, "Eeya, diila otaawa lo mongowatotia ode utoonu ponaówa lo Eeya, woloolo mola otaawa lo mongowatotia dalalio?" **6** Tametaó li Isa, "Wau lo dalalo u pongo taawalo Allahu Taáala wau poótapulalo tutumulo. Diaaluo penu boli ngotaa maó tamowali monaó ode Allahu Taáala, wonu diila moli ola-U. **7** Humayaalio timongoli moóonuhe ola-U, tantulo maó timongoli mamooonuhe li Paapa-U olo. Botia timongoli malo oonuhe o-Lio wau malo oonto o-Lio." **8** Yi tei Pilipus loloiya maó odeli Isa, "Eeya, pobilohe mai ti Paapa boito to mongowatotia, alihu mongowatotia molaasa sanangi." **9** Boti Isa lolametaó, "Maa odito hiheolio Wau peé-peéenta woli mongoli, wau debo diipo iloonuhemu Wau, Pilipusi? Taa u malo oonto ola-U, malo oonto oli Paapa. Woloolo mola yió mowali moloiya, 'Pobilohe mai ti Paapa to mongowatotia'? **10** Pilipus! Wolo yió diila palacaya, deú Wau tuwau woli Paapa wau ti Paapa tuwau wola-U? Wolo umapilo tahuda-U mai olemu, diila lonto ola-U lohihilao. Ti Paapa-U tadebo tuwau wolau, Tiolo tamohutu mai ngoáamilalo boito. **11** Pomalacayalo ola-U, deú Wau tuwau woli Paapa wau ti Paapa tuwau wola-U. Meaalo wonu diila, pomalacayalo sababu wolo u mapilo hutu-U mai. **12** Otutu banali tahuda-U botie: Taa palacaya ola-U, mamohutu maó

wolo u mapilo hutu-U mai, -- tumbaó tio mamohutu ulebe udaá poli -- sababu Wau monaó mola odeli Paapa. **13** Wau penu boli wolo upohile limongoli to tanggulu-U, uito mapo hutuwo-U mai olimongoli, alihu ti Paapa-U poudaáalo moli Walaó. **14** Boli wolo wambaio upohile limongoli to tanggulu-U, mapo hutuwo-U mai." **15** "Wonu timongoli motoliángu-U, timongoli mamó duduá totoonulalo palentaa-U. **16** Wau mohile mola li Paapa-U, wau Tio mamongohi mai olemu Tamoo-tulungia wewo, tamaa motibiluloá peé-peéenta woli mongoli u ohiheo-hiheolo maó. **17** Tio boito Rohullah tamamo poilaalo mai obobanali pasali lo Allahu Taaála. Dunia diila loótolimo o-Lio, sababu diila loóonto meaalo loóonuhe o-Lio. Bo timongoli moóonuhe o-Lio, sababu Tio bilu-biluloá peé-peéenta woli mongoli wau tuwau woli mongoli. **18** Timongoli diila tatolaa-U tutuwau debo odelo tadidu otiilo otiyamo. Wau muli mohualingai ode olemu. **19** Bolo ngopeé mola dunia diilalo moóonto ola-U. Bo timongoli mamóóonto ola-U. Wau sababu Wau tumutumulo, timongoli olo matumumulo. **20** Wonu meidungga mai dulahu boito, maótaawa limongoli deú Wau motituwau woli Paapa, timongoli motituwau wola-U, wau Wau motituwau woli mongoli. **21** Taa mololimo totoonulalo palentaa-U wau pohutuolio, tio-tiolo tamo toliángu-U. Ti Paapa-U mamomonu mai taa motoliángo ola-U. Wau olo mamó toliángo tau boito wau mopo bilohei batanga-U olio." **22** Tei Yudas (diila tei Yudas Iskarioti) lohintu maó li Isa, "Eeya, yilongola Eeya motohilaa mopoilaalo batanga lo Eeya to mongowatotia wau diila ode dunia?" **23** Ti Isa lolametaó, "Taa motoliángu-U, mamó duduá pongaajali-U. Ti Paapa-U mamomonu mai olio. Ti Paapa wau Wau mamei dungga mai ode olio wau motibiluloá wolio. **24** Taa diila motoliánga ola-U, diila moduduá pongaajali-U. Pongaajali u ilodungohe limongoli boito, diila lonto ola-U, bo lonto li Paapa-U talolao mai ola-U. **25** Ngoáamilalo boito potahuda-U mai olemu ngotilonggadu Wau peé-peéenta woli mongoli. **26** Bo Rohullah, Tamoo-tulungia tamaa laolo mai li Paapa-U to tanggulu-U, Tiolo tamaa mongaajali olimongoli totoonulolalo maó wau mamopoéela olimongoli ngoáamila umaa piloótaa-U olimongoli. **27** Salaamati tolaa-U maó olimongoli. Salaamati-U lohihilao uwahi-U mai olemu. Uwahi-U mai boito diila debo odelo uwahi

lodunia olemu. Diila maó pobalisa hilaamu, diila maó oohe. **28** Mailo dunohe limongoli upilo tahuda-U mai, 'Wau mamonaó, bo Wau mamuli mohualingai ode limongoli' Wonu timongoli motolianga ola-U timongoli masanangi Wau monaó mola odeli Paapa-U, sababu ti Paapa-U lebe udaa wola-U. **29** Wau mopoótaa mai uito to olemu botia, tou ngoáamilalo boito diipo motoduo mai, alihu de wonu motoduo mai, timongoli mapalacaya. **30** Wau diilalo mobisala mai lebe dadaata maó toli mongoli, sababu mawakutuulio tahidihima kawasa lodunia botie mamonaó mai. Bo tio diila okawasa to batanga-U. **31** Bo ngoáamila boito musi motoduo mai alihu dunia mongalati deu Wau momonu oli Paapa wau hemohutu ngoáamila u pilomalentai li Paapa to ola-U. Naa, dulo ito monaóolo monteea."

**15:1** Tahuda maó li Isa poli, "Wau bungo lo angguru ututuulio tutu wau ti Paapa-U yito tamokele-kela maó ilengilio. **2** Timiidu tango to ola-U udiila momungo, panggee-Lio, wau timiidu tango u momungo, ilangiyalo duungio wau pobelesiyolo alihu lebe dadaata poli hungolio. **3** Timongoli malo belesi sababu pongaajali uilohi-U mai olimongoli. **4** Debo potituwaulo wola-U wau Wau olo madebo motituwau woli mongoli. Tango wambaó diila mowali momungo mai, ngopohia wonu tango boito debo to bungolio. Odito olo timongoli bo mowali momungo, wonu debo motituwau wola-U. **5** Waulo bungo lo angguru, wau timongoli tataa-ngolio. Taa u debo motituwau wola-U wau Wau wolio, mamomungo dadaata; sababu wonu diila wola-U, timongoli diila mowali mohutu wolo-wolo. **6** Taa u debo diila motituwau wola-U, mapo mahulolio debo odelo tango, lapataó mowali mohengu. Tataa-ngowaalo udebo odelo uito maimoóolo wau pomahulola ode delomo tulu, tulusi tumbilalo. **7** Wonu timongoli debo motituwau wola-U wau pongaajali-U debo todelomo hilaamu, pohileaalo odeli Paapa-U boli wolo u otohilaa limongoli; hihile limongoli boito mapoó poluo-Lio mai. **8** Wonu timongoli momungo dadaata, ti Paapa-U poudaáalo mola; wau lou odito otu-otutuulo maó timongoli mowali muri-U. **9** Debo odelo ti Paapa-U lomonu mai ola-U, oditolo olo Wau momonu olimongoli. Mamusi timongoli tatapu wau molotolo hilao tumutumulo odelo taa u pilonu-U. **10** Wonu timongoli



moponaó ngoáamila palentaa-U, timongoli debo tatapu wau molotolo hilao toponu-U. Tutuuwauwa debo odelo Wau debo molotolo hilao toponu li Paapa-U sababu loponaó ngoáamila palentaa-Lio. **11** Ngoáamilalo botie poótaa-U mai olimongoli, alihu owengahu-U woluo todelomo hilaa limongoli, wau owengahi mongoli mowali wimu-wimumuto ngoáamilalo. **12** Uti-utieelo palentaa-U; toliángalo ngota timongota, tutuuwauwa debo odelo Wau momonu olimongoli. **13** Taa motoliánga daá mongo sahabatilio tio-tiolo tamongohi maó tutumulio ode limongolio. **14** Timongoli mongo sahabati-U, wonu timongoli mohutu maó wolo upilo malenta-U mai olimongoli. **15** Timongoli diilalo tanggula-U wato, sababu wato diila motota wolo u hekalaja lituanilio. Timongoli tanggula-U mai sahabati, sababu ngoáamila u dilungohe-U lonto li Paapa-U, mapiloótaa-U mai olimongoli. **16** Diila timongoli talo lulaoto ola-U. Waulo talo lulaotai olimongoli, wau mopoáhu olimongoli u momungo dadaata -- huhuu-ngowaalo udiila mowali binasa. Yi ti Paapa-U mamongohi mai olimongoli boli wolo upohile mola limongoli o-Lio to tanggulu-U. **17** Uti-utieelo palentaa-U to olemu: toliángalo ngota timongota." **18** "Wonu dunia molunui mongoli, eelai maó deú Wau maleimulo yilonuó lodunia. **19** Humayaalio timongoli miliki lodunia, timongoli matoliángo lodunia debo odelo milikiilio. Bo Wau malo lulaoto olimongoli lonto dunia botie, oditolio timongoli diilalo miliki lodunia, uito sababuulio dunia molonui mongoli. **20** Eelei maó wolo umapilo tahuda-U mai olimongoli, 'Wato diila lebe udaá woli tuanilio.' Wonu timongolio malo ngalinaya ola-U, timongolio olo mamu ngalinaya olimongoli. Wonu timongolio moduduó pongaajali-U, timongolio olo mamoduduó pongaajalimu. **21** Ngoáamilalo boito mapohutuo limongolio ode limongoli, sababu timongoli muri-U, sababu timongolio diila moóonuhe o-Lio talolao mai ola-U. **22** Humayaalio Wau diila lonaó mai wau diila lopoótaa ngoáamilalo boito ode limongolio, timongolio diila ilodusa. Bo botia timongolio diilalo o alaasani duólo dusa limongolio. **23** Taa molonuuu-U, molonua li Paapa-U. **24** Humayaalio tohuungi mongolio Wau diila lohutu susuu-aliyaala udiipo peéenta maó pilohutu lotaa wewo, yi timongolio diila ilodusa. Bo botia timongolio malo oonto wolo u pilohutu-U, wau timongolio molonuuu-U

meaalo li Paapa-U. **25** Bo mawajibulio odito, alihu motoduo mai wolo u tulatuladu todelomo Buku Butoó limongolio, deúito-yito: 'Timongolio molonuuu-U diila o alaasani.' **26** Wau mamolao mai olemu Tamoo-tulungia u asaliilio mai monto li Paapa-U. Tiolo Rohu tamamo poilaalo mai obobanali pasali lo Allahu Taaála. Wonu bolo Tio meidungga mai Tio mamongohi sakusi pasali ola-U. **27** Wau timongoli olo musi mongohi sakusi pasali ola-U, sababu timongoli mapeé-peéenta wola-U anggadu bohuliolo mai.

**16:1** Ngoáamilalo boito poótaa-U mai olimongoli alihu timongoli diila maó momaahu iimani limongoli. **2** Timongoli malualolio monto bebee-leyaala potabiaalo. Wau mamei dungga wakutuulio deú taa momate olimongoli mate-mateelo maó mamó lantobu tio hemotiwato to Allahu Taaála. **3** Timongolio mohutu mai uito olemu sababu timongolio diipo moóonuhe li Paapa-U meaalo ola-U. **4** Bo botia poótaa-U mai uito olemu, alihu wonu uito bolo motoduo mai, maéela mola limongoli deú Wau malo poótaa mai uito olimongoli." "Suáli botie diila piloótaa-U olimongoli tou bohulio mai, sababu Wau donggo peé-peéenta woli mongoli. **5** Bo botia Wau mamó hualinga mola ode o-Lio talolao mai ola-U; wau diaaluo penu boli ngotaa maó monto olimongoli tamohintu mai ode utoonu ponaówa-U. **6** Botia tumbaó hilaamu lowali siluukali, sababu Wau lopoótaa mai suáli boito olemu. **7** Bo Wau molele mai u otutu olemu: Lebe mopioheó olimongoli, wonu Wau mohualinga mola; sababu wonu wau diila mohualinga mola, Tamoo-tulungia boito diila tamei dungga ode olemu. **8** Wonu Tio meidungga, Tio mamopo ilaalo ode dunia boli lodusa u otutuulio maó, monto wolo u otutu, wau monto hukuumani lo Allahu Taaála. **9** Tio mamopo ilaalo mai deú diila palacaya to ola-U yito dusa; **10** deú Wau otutu, sababu Wau mohualinga mola odeli Paapa wau timongoli diilalo moóonto ola-U; **11** wau deú Allahu Taaála malo lumula lohukuumani mai, sababu tahidihima kawasa lodunia botie mahilu-kuumani. **12** Donggo dadaata u ohilaa polele-U mai olemu, bo masaatia botie timongoli diipo mambo mololimo maó. **13** Bo wonu Rohu boito meidungga mai, deúito-yito Tio tamopo ilaalo mai obobanali pasali lo Allahu Taaála,

timongoli madeloo-Lio u moóonuheó ngoáamilalo obobanali. Tio diila tamotahuda monto batanga-Lio lohihilao bo motahuda mai wolo u mailo dunohe-Lio, wau Tio mamopo poótaa mai olemu wolo u mamowali todulahu momooli. **14** Tio mamopo údaá ola-U, sababu wolo u pilotunggu-Lio mai olemu, tilolimo-Lio lonto ola-U. **15** Ngoáamila uwoluo toli Paapa yito hakuu-U. Uito sababuulio Wau motahuda mai deu wolo upilo tunggulai lo Rohu olemu, tilolimo-Lio lonto ola-U." **16** "Bolo ngopee mola timongoli diilalo moóonto ola-U, wau olo bolo ngopee mola poli timongoli mamooonto ola-U." **17** Dengolo lota tahiduduá li Isa mawiwiintua ngota timongota, "Wolo makusudu-Lio u Tio lotahuda olanto: 'Bolo ngopee mola timongoli diilalo moóonto ola-U, wau olo bolo ngopee mola timongoli mamooonto ola-U'? Wolo poli makusudu-Lio lou: 'Wau mohualinga mola odeli Paapa?'" **18** Timongolio hipohintua laito "Wolo boliilio maó, 'ngopee mola'? Ito diila mongalati Tio hemobisala pasali loolo!" **19** Otaawa li Isa timongolio motohilaa mohintu o-Lio. Oditolio Tio lotahuda maó, "Engonti tilahuda-U mai, 'Bolo ngopee mola, timongoli diilalo moóonto ola-U, wau olo bolo ngopee mola timongoli mamooonto ola-U'. Maa uito u heposuáalia limongoli towolota limongoli?" **20** Pomalacayalo, timongoli mahumoyongo wau mohilimuta, bo dunia mameengahu. Timongoli maa osuusawa lohilao, bo osuusamu boito mamoboliá mowali owengahu. **21** Wonu taabua ngota wimbideó motutu mai, tio suusa, sababu maa wakutuulio tio modutolo. Bo odito walaio mapilo tutulio mai, taabua boito mamolipato dudutolio sababu meengahu deu taunge ngota mapilo tutulio mai ode delomo dunia. **22** Odito olo woli mongoli: Botia timongoli osuusawa lohilao, bo Wau mamuli modunggaya woli mongoli, yi hilaamu mameengahu; wau diaaluo penu boli ngotaa maó tamowali mohama owengahu boito monto hilaamu. **23** Todulahu boito, timongoli diilalo mohintu wolo-wolo poli ola-U. Pomalacayalo: Penu boli wolo upohile mola limongoli toli Paapa-U to tanggulu-U, uito mawohi mai li Paapa-U olemu. **24** Tunggula tosaaati botie timongoli diipo lohile mola wolo-wolo to tanggulu-U. Pohileaalo mola, yi timongoli mamooonto lolimo, alihu owengahumu wimu-wimumuto ngoáamilalo." **25** "Ngoáamila botie polele-U mai olemu wolo lumadu. Bo mamei dungga wakutuulio, Wau

diilalo momake lumadu, bo motahuda wolo juujulu pasali li Paapa-U. **26** Tou boito timongoli mamohile li Paapa-U to tanggulu-U; ototai maó, Wau diila tamohile monto li Paapa-U duólo olimongoli, **27** sababu ti Paapa-U lohihilao momonu olimongoli. Tio momonu olimongoli sababu timongoli motolianga ola-U, wau palacaya deú Wau dungga-dungga mai lonto li Paapa-U. **28** Memangi asalii-U lonto li Paapa-U, wau malei dungga mai ode delomo dunia. Bo botia Wau mamololaa maó dunia u mohualinga mola odeli Paapa-U." **29** Lapataó tahiduduá li Isa loloiya o-Lio, "Botia Eeya lotahuda mai wolo juujulu wau diila lomake lumadu, **30** wau otaawa lo mongowatotia deú otaawa lo Eeya totoonulalo u hitua-tuawua. Diila palalu penu boli ngotaa maó mohintu wolo-wolo ode Eeya. Sababu uito mongowatotia palacaya to Eeya dungga-dungga mai lonto Allahu Taáala." **31** Ti Isa lolametaó olimongolio, "Oditolio mapalacaya timongoli botia? **32** Eelai maó! Saaátilio mamei dungga, tumbaó malei dungga mai, timongoli mapo bubuu-ayaalio. Ngota-ngota timongoli mamo hualinga ode bele lohihilao wau mololaa maó ola-U tutuuwau. Bo Wau diila tutuuwau sababu ti Paapa-U woluo peé-peéenta wola-U. **33** Ngoáamilalo botie polele-U mai alihu timongoli moótodo mai moáahu sababu motituwau wola-U. To dunia timongoli mamodutolo. Bo poótoheeta mola hilaamu! Dunia maa ilolahe-U!"

**17:1** Lapataó lotahuda maó odito, ti Isa yilumanggela mola ode hulungo wau loloiya, "Paapa, botia malei dungga wakutuulio. Poudaáalo mai Walai Paapa, alihu Walai Paapa olo mopoudaá mola li Paapa. **2** Ti Paapa malohudu mai kawasa to ngoáamila umati lomanusia ode Walaó, alihu Tio mongohi tutumulo ututuulio tutu wau ohiheo-hiheolo maó ode ngoáamila tamailudu mai li Paapa o-Lio. **3** Uti-utieelo tutumulo ututuulio tutu wau ohiheo-hiheolo maó; alihu tau motota li Paapa, tuwa-tuwaulo Allahu Taáala tabanali, wau moóonuhe li Isa Almasi tailao mai li Paapa. **4** Watia malo poudaá mola li Paapa toitaato dunia botie wolo lopoó lapato kalaja u pilopoáhu mai li Paapa olaa-Tia. **5** Paapa! Poudaáalo mai Watia botia toli Paapa, wolo odudaá u mililiki lo Watia peé-peéenta woli Paapa tou dunia botie diipo pilowali mai. **6** Watia malo poótaa li Paapa ode tau-tauwalo

lonto dunia botie tamailudu mai li Paapa olaa-Tia. Timongolio yito miliki li Paapa, wau ti Paapa malohudu mai olimongolio ode Laatia. Timongolio malo duduá tahuda li Paapa. **7** Botia otaawa limongolio deú ngoáamila uiludu mai li Paapa olaa-Tia asaliilio mai lonto li Paapa. **8** Mapilo tunggulaó lo Watia olimongolio tahuda u pilotahuda mai li Paapa olaa-Tia; wau timongolio malo lolimo maó. Otaawa limongolio deú Watia otu-otutuulo maó dungga-dungga mai lonto li Paapa wau timongolio palacaya deú ti Paapaalo tamalolao mai olaa-Tia. **9** Watia moduá mola ode limongolio. Watia diila moduá duólo dunia bo duólo tamailudu mai li Paapa olaa-Tia, sababu timongolio deúito-yito miliki li Paapa. **10** Ngoáamila miliki lo Watia yito miliki li Paapa olo; wau ngoáamila miliki li Paapa yito miliki lo Watia olo. Watia pilopo udaá towolota limongolio. **11** Botia Watia monaó mai odeli Paapa. Watia diilalo motibiluloá todunia; bo timongolio woluo todunia. Paapa tamantali! Dahailo mai timongolio wolo okokawasa tangguli Paapa, deúito-yito tanggulo u mailohi mai li Paapa olaa-Tia -- alihu timongolio mowali tuwau, tutuuwauwa debo odelo ti Paapa wau Watia tuwau olo. **12** Tou Watia donggo peé-peéenta woli mongolio, Watia malodaha olimongolio wolo okokawasa tangguli Paapa -- tanggulo uilohi mai li Paapa olaa-Tia. Watia malodaha olimongolio wau diaaluo penu boli ngotaa maó limongolio tailooli, ngopohia tio tameemangi musiilio mooli; alihu woleeto boito motoduwolo mai wolo u tulatuladu todelomo Kitabi. **13** Botia Watia monaó mai odeli Paapa. Ngoáamilalo botie tilahuda maó lo Watia tou donggo todunia; alihu timongolio wolo tióotutua moólaasa owengahu lo Watia. **14** Watia malopo tunggulaó olimongolio tahuda li Paapa, wau dunia molonui mongolio, sababu timongolio diila miliki lodunia, tutuuwauwa debo odelo Watia olo diila miliki lodunia. **15** Watia diila mohile alihu ti Paapa mohama mola olimongolio monto dunia botie, bo Watia mohile alihu ti Paapa modaha olimongolio monto Ibilisi. **16** Tutuuwauwa suáliilio debo odelo Watia diila miliki lodunia, timongolio olo diila miliki lodunia. **17** Powaliyalo mai timongolio tolomodu miliki li Paapa moli obobanali; tahuda li Paapa boitolo obobanali. **18** Debo odelo ti Paapa malolao mai olaa-Tia ode dunia, odito olo Watia lolao olimongolio ode dunia. **19** U polohuna daá

olimongolio, Watia mohudu mola batanga odelo tolomodu miliki li Paapa, alihu timongolio olo mowali tolomodu miliki li Paapa moli obobanali. **20** Diila bo ode limongolio wambaó Watia modua mola. Watia modua mola olo ode tau-tauwalo tamaa palacaya olaa-Tia lo ososakusi limongolio botie. **21** Pohile laa-Tia, Paapa, alihu timongolio ngoáamila mowali tuwau, debo odelo ti Paapa lotituwau mai wolaa-Tia, wau Watia woli Paapa. Pohileaala dua timongolio mowali tuwau wolaan-To alihu dunia palacaya deu ti Paapa talolao mai olaa-Tia. **22** Watia malohudu maó olimongolio odudaá, uiludu mai li Paapa olaa-Tia, alihu timongolio mowali tuwau, tutuuwauwa debo odelo Ito olo tuwau; **23** Watia woli mongolio, wau ti Paapa wolaa-Tia; alihu timongolio otu-otutuulo maó tuwau. Yi dunia mamotota maó deu ti Paapaalo talolao mai olaa-Tia, wau deu ti Paapa momonu olimongolio debo odelo ti Paapa lomonu olaa-Tia. **24** Paapa, otohila laa-Tia alihu timongolio, tailudu mai li Paapa olaa-Tia, woluo peé-peéenta wolaa-Tia totambati Watia woluo, alihu timongolio moóonto odudaá laa-Tia; deuito-yito odudaá uiludu mai li Paapa olaa-Tia; sababu ti Paapa lomonu olaa-Tia tou dunia diipo pilowali mai. **25** Paapa taaadili! Dunia diila moóonuhe li Paapa; bo Watia moóonuhe li Paapa; wau tau-tauwala botie motota deu ti Paapa talolao mai olaa-Tia. **26** Watia malo poilaalo tangguli Paapa ode limongolio; wau Watia madebo mohutu maó odito, alihu ponu li Paapa olaa-Tia debo todelomo hilaa limongolio wau Watia motituwau woli mongolio."

**18:1** Lapatio maó ti Isa lodua mola odito, Tio wolo tahiduduá o-Lio malonaó ode ngotuwali lo Dutula Kidron. Mota teto woluo ilengi tuwau u pilomuloa wolo bubuu-ngawaalo, wau ti Isa wolo tahiduduá o-Lio tilumuwoto ode ilengi u pilomuloa wolo bubuu-ngowaalo boito. **2** Tei Yudas tamoo-hiyanatia boito, motota lotambati boito; sababu ti Isa tingga maito hemo tiambu mota teto wolo tahiduduá o-Lio. **3** Yi tei Yudas lonaó mota ode tambati boito wolo ngopasuukani suludadu lo Romawi wau dengolo lota tamoo-kawalia Bele lo Eeya tailahula lomongo iimamu tauwa wau tau-tauwalo Parisi. Timongolio hideloa tingolo, lantera wau molongo. **4** Otaawa li Isa ngoáamila u mamotoduo mai to batanga-Lio. Oditolio Tio



malo himbide mota ode tau-tauwala boito wau lohintu maó, "Tatoonu tahe lolohu limongoli?" **5** "Ti Isa, taulo Najaret," tametaó limongolio. "Wau lo Tio," tahuda maó li Isa. Tei Yudas tamoo-hiyanatia tihutihula teto woli mongolio. **6** Tou ti Isa lotahuda maó olimongolio, "Wau lo Tio," timongolio ngoáamila matilumouli tulusi leibalata mola tohuta. **7** Peéentapo ti Isa lohintu maó olimongolio, "Tatoonu tahe lolohu limongoli?" "Ti Isa taulo Najaret," tametaó limongolio. **8** "Mapilolele-U mai Wau lo Tio," tahuda Isa. "Wau wonu memangi Wau tahe lolohu limongoli, poluliaalo mota tawewo limongoli botie monaó." ( **9** Wolo lotahuda maó odito, lotoduwolo mola wolo u mapilo tahuda li Isa tou dipo-dipolulio: "Paapa, monto tau-tauwala tailudu mai li Paapa ola-Tia, diaaluo penu boli ngota maó tailooli.") **10** Tei Simon Petrus u delodelo mai wamilo tuwau, lomahutaó tulusi lolimadeó wato li iimamu daá tunggula loputu bulongalio olowala. Tanggulo wato boito Malkus. **11** Yi ti Isa lotahuda maó odelei Petrus, "Muli potaúpa mola wamilumu ode taúpio! Wolo to pikiilangimu Wau diila tamongilu hakati lo dudutolo uilohi mai li Paapa ola-U?" **12** Lapataó mongo pajule lo Romawi wolo kamudangilio wau tahipo kawalia lo Yahudi malo heúpo wau lomungu li Isa. **13** Bohu-bohulio timongolio lodelo li Isa lotaalua wolei Hanas, tiyamo moluhengo lei Kayapas. Tei Kayapas boitolo iimamu daá totaunu boito. **14** Wau tio-tiolo tamalo nasehati to tahidihima kawasa taulo Yahudi deu lebe mopiohu ngotaalio mate maó duólo ngoáamila bangusa. **15** Tei Simon Petrus wau ngotaalio lomuri wewo loduduá li Isa. Muri uwewo botie oonuhe li iimamu daá; oditolio tio loduduá tilumuwoto peé-peéenta woli Isa ode paango lobe le li iimamu daá; **16** hiambola tei Petrus wimawima to bulemengio, tohuhebu. Lapataó muri uwewo boito lonaó mota ode bulemengio wau helo bisala wolo taabua moomayawa tahemodaha huhebu, lapataó malopo tuwotaó olei Petrus ode delomio. **17** Wato taabua tamoodahawa huhebu boito loloiya maó odelei Petrus, "Wuu, diila mayiö-yiöolo tala ngota muri lotau boito?" "Diila," tametaó lei Petrus. **18** Tou boito dulente mohuhulo, oditolio tahi pomayawa wau tahi pokawalia malopo leiita tulu duito wau timongolio lopo dengengo wawai mongolio teto. Tei Petrus lonaó mola odito wau tilimihulo peé-peéenta loti dengengo woli mongolio. **19** Ti

iimamu daá helohintu li Isa pasali lo tahiduduá o-Lio wau pasali lo pongaajali-Lio. **20** Ti Isa lolametaó, "Wau laito hemo bisala wolo juujulu totalu lotaa dadaata. Wau laito hemo ngaajali tobele potabiyaalo wau to Bele lo Allahu Taála, tambati taulo Yahudi u biasaalio hemo ambuwa. Diila peénta maó Wau helo bisala wolo-wolo lou tuuáaó-tuuáaó. **21** Oditolio yilongola ti Tuani hemohintu mai olaa-Tia? Yintuwalo maó olimongolio tamaa loódungohe olaa-Tia helo ngaajali. Tantu otaawa limongolio wolo u yiloiyaa-U maó." **22** Tou ti Isa lotahuda maó odito, tala ngota lo tamoo-kawalia teto, lolambali o-Lio wau loloiya, "Buheli daá Yio mobisala debo odelo uito odeli iimamu daá!" **23** Ti Isa lolametaó, "Wonu Wau mobisala mai hitua-tuawua utalatala, poleleaalo mai tewe wolo totalaalio! Bo wonu u pilolele-U mai boito memangi otutu, yilongola yio lolambali ola-U?" **24** Lapataó tei Hanas lopoáhu talodelo mota li Isa wolo pungu-pungu odeli iimamu Daá Kayapas. **25** Tei Simon Petrus olo donggo tihutihula hemo tidengengo teto. Tau-tauwalo loloiya maó olio. "Diila mayio-yioolo muri lotau boito?" Bo tei Petrus lomaheó, ualio maó, "Diila!" **26** Wato ngota li iimamu daá, deúito-yito ilaato lotaa bulongalio pilutu maó lei Petrus, loloiya, "Wolo diila wau taloóonto olemu to ilengi u pilomuloa lo bubuu-ngawaalo boito peé-peénta wo-Lio?" **27** Lapataó tei Petrus luli lomaheó, "Diila" -- wau tiluhata tou boi-boitolo maluo malo kuukuyuu mai. **28** Didimodupo daá timongolio lodelo mota li Isa lonto bele lei Kayapas ode bele biluloá saaha li Gubolonulu. Tau-tauwalo Yahudi lohihilao diila tilumuwoto ode delomo bele biluloá saaha li olongia, alihu timongolio diila mowali najisi moduduó dudelo lo agama, sababu timongolio ohilaa molamela uáalo lo Paska. **29** Sababu uito tei Pilatus yilumualaó ode bulemengio ode limongolio wau lohintu maó, "Wolo dudulohumu totau botie?" **30** Timongolio lolametaó, "Humayaalio Tio diila ototala, amiaatia diila talodelo mai o-Lio odeli Paaá Gubolonulu." **31** Tei Pilatus loiya maó olimongolio, "Hamaalo mota Tio wau butoilo maó Tio moduduó butoi mongoli lohihilao!" Bo tau-tauwalo Yahudi boito lolametaó, "Amiaatia diila mowali mohukuumani mate totau." (**32** Utie motoduo alihu pohupohutu wolo upilo tahuda li Isa tomimbihu pohuliilio tou Tio maamate maó.) **33** Tei Pilatus luli tilumuwoto ode bele biluloá

saaha li onlongia wau lotiangaó li Isa, lapataó malohintu, "Wolo Yio onlongia taulo Yahudi?" **34** Ti Isa lolametaó, "Wolo yiyintu botie lonto olemu lohihilao meaalo woluo taawewo tamalo poótaa mai olemu tomimbihu ola-U?" **35** Tei Pilatus lolametaó, "Wolo wau botie taulo Yahudi? Tamalohudu mai ole-Mu ode olaú yito bangusaa-Mu lohihilao wau mongo iimamu tauwa. Wolo umaa pilohutu-Mu?" **36** Tametaó li Isa, "Yilaidiaa-U diila lonto dunia botie. Humayaalio yilaidiaa-U lonto dunia botie, tautau-U mamohipate alihu Wau diila tawuduolio ode tahidihima kawasa lo Yahudi. Bo memangi yilaidiaa-U diila lonto dunia botie!" **37** Yi tei Pilatus lohintu maó o-Lio, "Wonu odito, Yio botie onlongia?" Ti Isa lolametaó, "Yio loloiya deu Wau botie onlongia. Wau pilotutulio wau dungga-dungga mai ode dunia wolo makusudu tuwau, deuuto-yito mai mongohi sakusi pasali lo obobanali. Taa monto obobanali boito mamongohe ola-U." **38** Tei Pilatus lohintu o-Lio, "Wolo boliilio obobanali?" Lapataó tei Pilatus luli yilumualo lonto bele biluloá saaha li onlongia wau loloiya maó ode tau-tauwalo Yahudi, "Wau diila loótapu totala penu boli tuwau maó lonto o-Lio. **39** Bo moduduáaó obobiasa limongoli, wau laito hemo lopato ngotaalio lotaa hihukuu-mania to Dulahu Buka Paska. Wolo mohuto timongoli alihu wau molopataó oli onlongia taulo Yahudi botie ode limongoli?" **40** Timongolio lolametaó wolo hiwaatia, "Diila, diila Tio, bo tei Barabas!" (Tei Barabas yito ngotaalio tamoo-lambata.)

**19:1** Lapataó tei Pilatus tilumuwotaó tulusi lopoáhu tau mota lomuboá li Isa. **2** Mongo pajule lohutu maó makuta lonto tataa-ngowaalo kekeei u oduhi, lapataó lopohuli to lunggongi Isa, lapataó uito timongolio lopopake maó o-Lio jumba lailoumu, **3** tulusi wuwuulia timongolio hiponaówa mai ode o-Lio wau helo loiya maó, "Pomali-tutuólo mola onlongia taulo Yahudi!" Lapataó timongolio helo lambali o-Lio. **4** Lapataó uito tei Pilatus peéntapo yilumualai wau loloiya ode taa dadaata, "Bilohilo! Wau lodelo mai o-Lio ode bulemengio ode limongoli, alihu otaawa maó limongoli Tio diila piloó tapulau totala penu boli tuwau maó." **5** Yi ti Isa yilumualaó wolo pakepake makuta duhi wau jumba lailoumu. Lapataó tei Pilatus loloiya ode limongolio, "Bilohilo tau boito." **6** Tou mongo iimamu tauwa

wau tahi pokawalia boito loóonto li Isa, timongolio malo nguwatió mola, "Salipuwalo Tio! Salipuwalo Tio!" Tei Pilatus loloiya maó ode limongolio, "Hamaawa mota Tio, wau salipuwalo limongoli lohihilao, Tio diila piloó tapulaú totala penu boli tuwau maó." **7** Tau-tauwalo Yahudi boito lolametaó, "Moduduá butoó lamiaatia Tio musu hukuu-maniyolo mate-mateelo maó sababu Tio longaku batanga-Lio Walaó Allahu Taáala." **8** Tou tei Pilatus loódungohe olimongolio loloiya odito, yi malebe yiloohe tio. **9** Yi tio luli tilumuwoto ode delomo bele biluloá saaha li onlongia wau lapataó ti Isa pilotuotio mai, tei Pilatus lohintu maó o-Lio, "Lonto utoonu mai asalii-Mu?" Boti Isa diila lolameto. **10** Oditolio tei Pilatus luli loloiya maó, "Yio diila mohuto mobisala wolau? Ototai maó wau okawasa molopata ole-Mu, wau okawasa moposalipu ole-Mu!" **11** Ti Isa lolametaó, "Wonu Allahu Taáala diila mongohi mai kawasa boito olemu, yio sama-samaata diila okawasa ola-U. Sababu uito talohudu mai ola-U ode olemu, lebe udaá maó dusalio wolemu." **12** Tou tei Pilatus loódungohe uito, tio helo tolopani u molopata o-Lio. Bo tau-tauwalo Yahudi mahiwatiá, "Wonu ti Tuani molopata o-Lio, ti Tuani diila sahabati li Kaisari! Taa motolongaku batangalio onlongia, tau boito musu li Kaisari!" **13** Tou tei Pilatus loódungohe tataa-heyaalo boito, tio malodelo li Isa ode bulemengio lapataó lotihuloá tokadera lobubutoó totambati u ilunte Wumbato Botu. (To delomo bahasa lo Ibrani ilunteelio Gabata.) **14** Tou boito dulahu wimbideó totaú, dulahu tou diipo Dulahu Buka Paska. Tei Pilatus loloiya maó ode tau-tauwala boito, "Taboti-botieelo onlongiyamu!" **15** Timongolio hiwuwa-wuwaatiá, "Pateyalo Tio mate-mateelo maó! Pateyalo Tio mate-mateelo maó! Salipuwalo Tio!" Tei Pilatus lohintu maó, "Tingga wajibu wau mosalipu maó onlongia limongoli?" Mongo iimamu tauwa malo lametaó, "Boti Kaisari wambaó tuwa-tuwaulo onlongia lamiaatia!" **16** Yi tei Pilatus malohudu li Isa ode limongolio mota silalipulio. Timongolio malohama li Isa tulusi dilelolio mota. **17** Ti Isa yilumualai wolo potapota lohihilao salipu-Lio ode tambati u ilunte "Tambati lo Bakakau". (Todelomo bahasa lo Ibrani ilunte Golgota.) **18** Mota teto Tio silalipulio. Pee-peenta wo-Lio woluo olo duulota wewo tasilalipu; taangota to ambahu olohi, taangota to ambahu olowala wau ti

Isa tohuungio. **19** To ayu salipu li Isa, tei Pilatus lei tuladeó odie: "Ti Isa lonto Najaret, Olongia taulo Yahudi". **20** Dadaata taulo Yahudi loóbaca maó u tulatuladu boito, sababu tambati upilo salipua li Isa boito diila molamingo monto kota. Tuladu boito todelomo bahasa lo Ibrani, Latini wau Yunani. **21** Mongo iimamu tauwa malo loiya odelei Pilatus, "Diila maó tulade 'Olongia taulo Yahudi', bo tulade maó, 'Tau botie loloiya, Wau Olongia taulo Yahudi.'" **22** Bo tei Pilatus lolametaó, "U maa tiluladui, hulialo maó debo tulatuladu." **23** Lapataó mongo pajule boito lopo salipu li Isa, timongolio malohama boó-Lio. Pakeyangi boito tilayadio wopato: ngota-ngota loótapu ngotayadu. Hilama limongolio olo jumba-Lio. Jumba boito diila odetumalio -- hilewolio lonto yitaato demola tibawa. **24** Mongo pajule boito malo loiya ngota timongota, "Diila maó kede-kedenganto jumba botie. Dulo undionto u molantu tatoonu tamoótapu maó." Suáli boito motoduo mai alihu pohupohutu wolo u tulatuladu todelomo Kitabi, deuító-yito: "Timongolio malo laya-layade boó-U, wau longundi jumba-U." Wau memangi mongo pajule boito lohutu maó odito. **25** Totili losalipu li Isa tihutihulo tiilo li Isa, wutatiilo-Lio taabua, ti Maria dile lei Kleopas, wau ti Maria Mahadalena. **26** Tou ti Isa loóonto oliilo-Lio wau muri tapilonu-Lio tihutihula teto, Tio loloiya maó oliilo-Lio, "Maama uito walai Maama." **27** Lapataó ti Isa lotahuda maó tomuri-Lio boito, "Uito ibumu." Tonggadio tou boito muri boito lololimo oliilo li Isa u lotibiluloá tobelelio. **28** Otaawa li Isa deu botia mailapato ngoáamilalo, wau alihu wolo u tulatuladu todelomo Kitabi mowali motoduo mai, Tio malo tahuda "Wau mototoángo." **29** Teto woluo manggo tuwau polupolu lo angguru molotingo. Yi bunga lopatihu tuwau pilopo lomolio todelomo angguru boito, wau tiluwohio tohisop ngopangge, tulusi piloheduio mola ode biihio li Isa. **30** Ti Isa lolamitaó angguru boito tulusi lotahuda, "Mailapato!" Tulusi Tio lotidungu mola wau yilate. **31** Tahidihima kawasa lo Yahudi diila mohuto milate lotau-tauwalo tahi salipua boito debo hintayanga to ayu salipu todulahu Saabati, tidiyolo maó peénta botie Sabaati boito Dulahu Buka utolo-tolomodu. Sababu dulahu tou ti Isa silalipulio lotaahua tou diipo dulahu Saabati boito, tau-tauwalo Yahudi lohile luasia olei Pilatus u mota momoli oáato lotau-tauwala tahe silalipulio boito wau

mopolaabei mimii-lateyaalo boito monto ayu salipu. **32** Yi mongo pajule boito lonaó mota wau lomoli bohulio oáato lo taduulota tasilalipu peé-peéenta woli Isa. **33** Tou timongolio leitungga odeli Isa, iloontonga limongolio Tio mailate. Oditolio timongolio diila lomata lomoli oáa-Tio. **34** Bo tutuálobu li Isa hebiletuio wolo totobuó lo ngotaalio lomongo pajule boito; wau huáa yilumualai duhu wau taluhu. **35** Taa loóonto lohihilao u lotoduo boito, tio-tiolo talo pohabari suáli boito, alihu timongoli olo palacaya. Wau u silakusialio boito otutu, wau otaawalio deu uito otutu. **36** Suáli boito motoduo mai alihu pohupohutu wolo u tulatuladu todelomo Kitabi, deúito-yito "Diaaluo penu boli tuwau maó tulalio maboliyolo". **37** Todelomo Kitabi olo tulatuladu, "Timongolio mamooóonto o-Lio tamaa biletui mongolio". **38** Lapataó uito tei Yusu lonto Arimatea lohile maó luasi olei Pilatus u mota lohama milate li Isa. (Tei Yusu yito muri li Isa, bo wolo tutuuó, sababu tio moohe to tahidihima kawasa lo Yahudi.) Tei Pilatus longohi maó luasi olio, oditolio tio mota lohama milate li Isa. **39** Tei Nikodemus, tamuloolo mapeéenta lonaó mai odeli Isa tou hui, lonaó olo peé-peéenta wolei Yusu. Tei Nikodemus lodelo pidelo damahu moonu wau gaharu -- Ngoáamilalo otanu tolo pulu lokilo daatalio. **40** Taduuulota boito lohama milate li Isa tulusi lolaputaó wolo latu peé-peéenta wolo pidelo moonu boito loduduá uúdu polobungalo tauo Yahudi. **41** Totambati pilo salipua li Isa woluo ilengi u pilomulua lo bubuu-ngawaalo tuwau. To ilengi u pilomulua lo bubuu-ngawaalo boito woluo kuubulu bohu, udiipo peéenta maó pilomake pilolobunga tau. **42** Sababu kuubulu boito membidu, wau dulahu Saabati bolo ngopee mola tumulalio, timongolio malo lobunga li Isa mola teto.

**20:1** Todulahu ahadi dimodupo, tou donggo modiolomo, ti Maria Mahadalena lonaó ode kuubulu. Tio loóonto maó botu poheútio mahileilio lonto huango kuubulu boito. **2** Yi tio tilumeteó malo lolohe olei Simon Petrus wau muri tapilonu li Isa, wau loloiya maó olimongolio, "Eeya mahilama lotau lonto kuubulu, wau diila otaawa laatia toutoonu Tio pilopo balatio." **3** Tulusi tei Petrus wau muri wewo boito malonaó ode kuubulu. **4** Duduulotalo hiteteá, bo muri wewo boito lebe molinggaheó wolei Petrus,



wau tio leidungga mola leimulo tokuubulu. **5** Tio lomilohe mola ode delomo kuubulu wau loóonto latu dutudutu teto, bo tio diila tilumuwota mola. **6** Tei Simon-Petrus tunu-tunuhe lonto wulea, tulusi lato tilumuwota mola ode delomo kuubulu boito. Tio loóonto maó latu dutudutu teto, **7** bo kaingi u pilolihutio to lunggongi Isa diaaluo to tiliilio bo leililibe wiwiwiwi. **8** Lapataó muri tamaa leimulo tilunggulaó ode kuubulu, tilumuwota mola olo. Tio loóonto maó wau palacaya. (**9** Tunggula tou boito timongolio diipo mongalati wolo u tulatuladu todelomo Kitabi deu Tio musi mobongu mai monto opopate.) **10** Lapataó uito tahiduduá li Isa boito malo hualingo. **11** Ti Maria Mahadlena tilimihulaó totalu lokuubulu sambela hiyo-hiyongo. Tou donggo hiyo-hiyongo, tio lomilohe mola ode delomo kuubulu, **12** lapataó maloóonto malaikati duulota hipakea moputio. Timongolio boito hihuloáa tobakasi lotambati milate li Isa, ngota towimbihu lunggongo wau tawewolio towimbihu oáato. **13** Mamaa-laikatiyalo boito lohintu maó, "Ibu yilongola hiyo-hiyongo?" Ti Maria lolametaó, "Eeya lowatia mahilamalio, wau diila otaawa lowatia toutoonu Tio pilopo balatio." **14** Lapataó tio loloiya maó odito, tio loili ode wulea wau loóonto li Isa tihutihula teto. Bo diila otaawalio deu taboitolo ti Isa. **15** Ti Isa lohintu maó olio, "Ibu, yilongola hiyo-hiyongo? Ti Ibu hemo lolohe olita?" Ti Maria hemo lantobu tau boito tamomengia, oditolio tio loloiya maó, "Paaá, wonu ti Paaá talopo limbata o-Lio lonteea, tulungia polelea mai olaatia toutoonu pilopo balata li Paaá o-Lio, alihu watia mowali mohama o-Lio." **16** Ti Isa lotahuda maó olio, "Maria!" Ti Maria loili maó odeli Isa tulusi loloiya todelomo bahasa lo Ibrani, "Rabuni!" (Boliilio maó "Guru".) **17** "Diila maó dihima Wau," tahuda li Isa olio, "Sababu Wau diipo lobotula mola odeli Paapa. Bo ponaólo mota ode mongo wutatu-U, wau polelea maó olimongolio deu botia Wau mamobotula mola odeli Paapa-U wau odeli Paapamu, Allahu Taáala-U wau Allahu Taáalamu." **18** Yi ti Maria malonaó lopoótaa to tahiduduá li Isa deu tio maloóonto Eeya wau deu Eeya malo tahuda mai ngoáamilalo boito olio. **19** Todulahu ahadi boitolo, tou maahui, tahiduduá li Isa lotiambu maó tobele ngowale wolo huhuu-hebuwaalo hiuntia, sababu timongolio moohe to tahidihima kawasa lo Yahudi. Debolo ti Isa lonaó mai wau tilimihulaó

tohuungi mongolio wau lotahuda, "Salamu moáahu olemu." **20** Lapataó lotahuda odito, ti Isa lopo biloheó olimongolio uluú wau tutuálobe-Lio. Tou loóonto maó to Eeya, timongolio lengahee daá. **21** Lapataó ti Isa peéentapo lotahuda maó olimongolio, "Salamu moáahu olemu. Debo odelo ti Paapa-U lolao mai ola-U, odito olo Wau mamolao olimongoli." **22** Lapataó ti Isa lopo hiipaó napasi-Lio ode limongolio wau lotahuda maó, "Tolimowalo Rohullah. **23** Wonu timongoli mongambungu dusa lo tahingota-ngotaawa, Allahu Taáala olo mongambungu mai olio. Wonu timongoli diila mongambungu dusa lo tahingota-ngotaawa, Allahu Taáala olo diila mongambungu olio." **24** Tei Tomas (tailunte "Pingi") ngotaalio lo tamo pulaa duulota muri li Isa, diaaluo peé-peéenta wolo tawewo tou ti Isa leidungga mai. **25** Yi tahiduduá li Isa wewolio loloiya maó odelei Tomas, "Ami maloóonto Eeya!" Bo tei Tomas lolametaó, "Wonu watia diipo loóonto bakasi lopaku to uluú-Lio, diipo lopodutu tingoonga lo uluú laatia to babaa kasiyalo pali lopaku boito wau diipo lopodutu uluú laatia to tutuálobe-Lio sama-samaata watia diila mohuto palacaya." **26** Ngodimingu lapatio maó tahiduduá li Isa woluo poli totambati boito, wau tei Tomasi woluo olo. Huhebu ngoáamila hiúntia. Boti Isa malonaó mai wau tilimihulaó tohuungi mongolio, lapataó lotahuda, "Salamu moáahu olemu." **27** Lapataó ti Isa lotahuda odelei Tomas, "Bilohilo mai uluuu-U, wau podutua mai tingoonga lo uluúmu tea. Wudua mai uluúmu wau podutua to tutuálobe-U. Diila maó polingu poli, bo pomalacayalo!" **28** Tei Tomas malo loiya odeli Isa, "Eeyau wau Allahu Taáalau!" **29** Yi ti Isa lotahuda maó olio, "Yio palacaya sababu maloóonto ola-U, diila odito? Potisanangilo tutu taa palacaya eleponu diila moóonto ola-U!" **30** Debo donggo dadaata poli totoonulalo moólinggolabe wewo u hepilohutu li Isa totalu lo tahiduduá o-Lio, bo diila tiluladio todelomo buku botie. **31** Bo ngoáamilalo botie tiluladio mai, alihu timongoli palacaya deu ti Isa yito Olongia Tamoo-poáahua, Walaó Allahu Taáala, wau sababu palacaya to o-Lio, timongoli mamootapu tutumulo.

**21:1** Lapataó uito ti Isa lopobilohe batanga peéentapo to Bulalo Tiberias to tahiduduá o-Lio. Odie mola waliilio: **2** Tou dulahee tuwau tei Simon

Petrus, tei Tomas tailunte Pingi, tei Natanael lonto Kana to Galilea, mongo walaée Jebedeus wau duulota muri li Isa tawewolio, donggo hiambua. **3** Ualei Simon Petrus ode tawewo, "Watia motohilaa mota moheupa tola." "Ami moduduó," loiya maó limongolio olio. Yi malonaó timongolio lotitaé tobulotu. Bo ilo-ilonua lou hui boito timongolio diila loó waüpa wolo-wolo. **4** Touí dulahu malobutu mai, ti Isa tilimihulaó to pentadu, bo diila ilotaawa limongolio deü taboitolo ti Isa. **5** Ti Isa lotahuda maó olimongolio, "Mongo walaó, wolo timongoli otola?" "Diaaluo," tametaó limongolio. **6** Ti Isa lotahuda maó olimongolio, "Pomahulalo mota pajalamu ode ambahu olowala lobulotu, alihu timongoli moótapu mai tola." Tulusi pajala boito pilomahulio mota limongolio, bo timongolio diilalo mambo lomantangai pajala boito sababu malo odito daatalio lotola todelomio. **7** Muri tapilonu li Isa loloiya maó odelei Petrus, "Uito Eeya!" Touí tei Simon Petrus loódungohe deü uito Eeya, tio malo pomake mola boólio (sababu tio diila boóboó) tulusi lotidehulo mola ode delomo taluhu. **8** Tahiduduá wewo lolunuheó ode tudulio wolo bulotu, sambela hipo mantanga pajala u polupolu wolo tola. Timongolio diila boti molamingo monto tudulio, tanu bo ngohetuto meeteri lamingio. **9** Touí timongolio lolaheó lonto bulotu, iloontonga limongolio woluo bohu lotulu mola teto wolo tola toitaatio wau roti. **10** Ti Isa lotahuda maó olimongolio, "Nte deloa mai odia tola ngoolo botu u heli yilaüpai limongoli." **11** Tei Simon Petrus malotitaé mola tobulotu, tulusi lodedeáa pajala ode tudulio. Pajala boito polupolu wolo tola u duduulaa; ngoáamilalo woluo ngohetuto limo lopulaa tolo botu. Wau eleponu odito daatalio, pajala boito diila lokaidingo. **12** Ti Isa lotahuda maó olimongolio, "Dulo molamelo." Diaaluo penu boli ngotaa maó lo tahiduduá o-Lio buheli lohintu, "Ti Paaá tatoonu?" Sababu otaawa limongolio deü Tio Eeya. **13** Lapataó ti Isa lohimbideó olimongolio, wau lohama roti boito, wau yiludu-Lio olimongolio. Tio malohutu odito olo wolo tola boito. **14** Uti-utieelo otolulio ti Isa lopo biloheó batanga-Lio ode tahiduduá o-Lio lapataó Tio bilongu-Lio mai touí yilate maó. **15** Lapatio maó lolamelo, ti Isa lotahuda odelei Simon Petrus, "Simon, walaée Yona, wolo yio lebe motolianga ola-U wolo toliangi mongolio ola-U?" "Otutu, Eeya," tametaó lei Petrus,

"Otaawa lo Eeya watotia motoliango to Eeya." Ti Isa lotahuda olio, "Biyacheelo mongo walaó himba-U." **16** U oluolio ti Isa lohintu olio, "Simon walaée Yona, wolo yió motoliango ola-U?" "Otutu, Eeya," tametaó lei Petrus, "Otaawa lo Eeya watotia motoliango to Eeya." Ti Isa luli lotahuda olio, "Biyacheelo ngoámila himba-U." **17** U otolulio ti Isa luli lotahuda maó olio, "Simon walaée Yona, wolo yió motoliango ola-U?" Tei Petrus masiluukali sababu ti Isa malohintu olio tunggula poótolu. Yi tei Petrus luli lolametaó, "Eeya, otaawa lo Eeya totoonulalo u hitua-tuawua. Otaawa lo Eeya watotia motoliango to Eeya!" Tulusi ti Isa lotahuda olio, "Biyacheelo ngoámila himba-U. **18** Otutu banali tahudaa-U botie: Tou yió donggo muda mai, yió lohihilao lomintolo wohutamu, wau lolontale penu boli ode utoonu u otohilaamu. Bo wonu yió de mapanggola mola, yió mamohudu maó uluúmu, wau taawewo tamo ngawade olemu wau modelo olemu ode utoonu udiila otohila naóomu." **19** (Wolo tataa-heyalo boito ti Isa mopo biloheó woloolo mola tei Petrus dewonu mate maó u mopoudaá mola Allahu Taála.) Lapataó uito ti Isa lotahuda maó odelei Petrus, "Duduilo mai Wau!" **20** Tou tei Petrus loili mota, tio loóonto to wuleaalio muri tapilonu li Isa. (Tio-tiolo talo tihuloáa totili li Isa tou donggo hemo lamelo wau talohintu o-Lio, "Eeya tatoonu tamaa mohiyanati to Eeya?") **21** Loóonto olio, tei Petrus malohintu li Isa, "Eeya, woloolo mola wolio botie?" **22** Ti Isa lolametaó, "Wonu humayaalio Wau mohuto u tio debo tumutumulo tunggula odungga-U mai, uito diila uluusanimu. Bo yió poduduólo mai ola-U!" **23** Yi lolooladulo mola habari tohuungo lo tahidudua li Isa deu muri boito diila tamaate. Lebe-lebe pomaó ti Isa diila lotahuda deu muri boito diila taamate, bo: "Humayaalio Wau mohuto u tio debo tumutumulo tunggula odungga-U mai, uito diila uluusanimu." **24** Muri boi-boitolo talongohi sakusi pasali popooloutiyaalo botie. Tio-tiolo olo tamaa loluladeó. Wau otaawanto deu wolo uiloiyaalio boito otutu. **25** Donggo dadaata suáli wewo u hepilohutu li Isa. Humayaalio ngoáamilalo boito tuladulo tuwau-tuwau, pongolaasa laatia diila moótuheo tambati to ngoilanggubu dunia u modetoheó ngoámila buku uma tuladulo boito.

**1:1** Teopilus taa u owatade, Todelomo bohulo bukuu ubohulio matilombangai mai ngoamilalo u pilohutu wau pilo ngaajali li Isa anggadu Tio lolumulaó kalajaa-Lio, **2** tunggula todulahu Tio bilintaáa mola ode sologa. Tou Tio diipo lobotula mola ode sologa, wolo kawasa lo Rohullah Tio helongohi totoonulalo tomongo rasulu-Lio tatilulao-Tio. **3** Lapataó Tio yilate maó ngotilonggadu wopato pulu hui mola laito Tio hemo pobilohe wolo dudelo u moilaalo daá tomongo rasulu boito deu Tio tutuulio tutu tumutumulo. Timongolio loóonto o-Lio, wau Tio helo bisala woli mongolio tomimbihu woloolo mola Allahu Taála momalenta odelo Olongia. **4** Wau tou Tio lotiambu woli mongolio, Tio longohi maó palenta botie olimongolio, "Diila maó tolai Yerusalemu. Pohimaapo teto tunggula ti Paapa-U mongohi mai wolo umapilo dantia-Lio, deúito-yito umapilo otaa-U olimongoli tou muloololio mai. **5** Sababu tei Yahya helo polihu lotaluhu, bo donggo ngoolo huipo mola timongoli malihualo wolo Rohullah." **6** Tou mongo rasulu boito donggo hiambua peé-peéenta woli Isa, timongolio lohintu maó o-Lio, "Eeya, tingga mabotia Eeya ohilaa muli mopotihula pamalenta bangusa lo Isirailu?" **7** Ti Isa lolametaó, "Ti Paapa-U lohihilao tamolantu mai dulahu wau wakutuulio. Uito diila palalu otaawa limongoli sababu uito haku li Paapa-U. **8** Bo timongoli mamootapu kawasa, wonu Rohullah malei dungga mai ode limongoli. Wau timongoli mamowali sakusi ola-U to Yerusalemu, to ngoilanggubu Yudea, to Samaria, wau tunggula ode huudio lodunia." **9** Lapataó ti Isa lotahuda maó odito Tio bilinta-Io mola ode sologa iloontonga limongolio, wau heengo lohenggubei o-Lio to pomilohi mongolio. **10** Tou timongolio donggo hilanggela mola ode hulungo, towakutu ti Isa leibintaáa mola, debolo duulota tahapakea lou moputió hitihula totili limongolio. **11** "Wuu, tau-tauwalo Galilea," loiya maó lo taduulota boito, "yilongola timongoli bo wambaó hitihula teto hilanggela mola ode hulungo? Ti Isa, taa iloontonga limongoli lobintaáa mola ode sologa boito totalu limongoli, mamuli mohualingai poli wolo dudelo uito olo debo odelo u iloontonga limongoli engontie." **12** Lapataó mongo rasulu boito luli lohualingo ode Yerusalemu lonto Huludu Jaitun. Huludu boito maito tanu ngokilo lamingio lonto Yerusalemu. **13** To Yerusalemu timongolio lonaó mota ode bele upilo

tihangata limongolio, tulusi lobotula mola ode huwali u toitaato. Mongo rasulu boito, deũito-yito tei Petrus wolei Yahya, tei Yakobus wau Andreas, tei Pilipus wau Tomas, tei Baratolomeus wau Matiusi, tei Yakobus walaée Alpeus, tei Simon Patriot wau Yudas walaée Yakobus; **14** Ngoáamilalo laito wolo tuwau lohilao helo tiambu wau hipoduáawa. Timongolio loduá peé-peéenta wolo mongobua teto tuwotuwoto ti Maria tiilo li Isa, wau wolo mongo wutati Isa. **15** Todulahu tuwau, tou timongolio donggo hiambua -- maito tanu ngohetuto dulo pululota tahi hadilia -- tei Petrus tilimihulo u lobisala maó. Tio lolojiya, **16** "Mongo wutato! Wolo u tulatulade todelomo Kitabi, uito mamusi motoduo. Mulooolio mai loli olei Dauda, Rohullah malo nubuwati mai pasali lei Yudas, tauwa lotau-tauwalo talo heupa li Isa boito. **17** Tei Yudas yito tala ngota lonto olanto, wau tio maa tilulaota olo u loduduá lokalaja peé-peéenta wolanto." ( **18** Tei Yudas botie maloótapu huta polobungalo olio lonto wuupa ololeeto lopolo hiyanatilio. Tio lodehu wau yilate wolo ombongio lobutaó tunggula tuango ombongio yilumualai ngoáamilalo. **19** Ngoáamila tahi biluloáwa to Yerusalemu motota pasali losuáli boito. Uito sababuulio todelomo bahasa limongolio, ilunte limongolio huta boito Akeldama, uboliilio maó 'Huta Duhu'.) **20** "Sababu todelomo Buku Jaburu woluo tulatuladu odie, 'Huliaalo maó biluloálio mamowali diila otau; diila mowali boli ngotaa maó motibiluloá todelomio.' Woluo tulatuladu odie olo, 'Huliaalo maó huhuloálio hamaa lotaawewo.' **21** Sababu uito, musi woluo tahingota-ngotaawa tamoduduá wolanto mowali sakusi deũ ti Isa Eeya maluli tilumumulai lonto opopate. Tau boito mamusi tala ngota lotau-tauwalo talaito peé-peéenta wolanto tou ito heloduduó li Isa Eeya boli ode utoonulalo maó, tumulalo mai tei Yahya lolumula lopolihi tunggula tou ti Isa bilintaá mola ode sologa to wolotanto." **23** Tau-tauwalo tawoluo teto longohi maó nasehati duulota, deũito-yito tei Yusu tailunte olo Barsabas (tio iluntelio olo Yustus), wau tei Matias. **24** Tulusi timongolio loduá. Timongolio lolojiya, "Yaa Eeya otaawa lo Eeya hilaa lotaa ngoáamila. Tei Yudas malodehu lonto huhuloálio odelo rasulu wau mailate. Oditolio poilaalo mai ode mongowatotia, tatoonu to taduulota botie tatulaoto lo Eeya u wohiyalo tuugasi boito mobuulota wolei Yudas." **26** Lapataó uito



tanggulo taduulota boito pilahutio maó, tulusi popahuto boito lodehu tolei Matias. Oditolio tio piluduó lowali rasulu loduduá peé-peéenta wolo tamopulaa tuwau lota rasulu wewolio.

**2:1** Tou malei dungga dulahu Pantekosta, ngoáamila taa palacaya lotiambu totambati tuwau. **2** Debolo dungo-dungohei tingohe lonto hulungo debo odelo dupoto daá hihiipo. Tobele toutoonu tau-tauwala boito donggo hihuloáa, ngoáamilalo lopolu lomola lotingohe boito. **3** Tulusi timongolio loóonto didii-lawaaló debo odelo deito tulu lotiálapo ode utoonulalo maó wau leáito toli mongolio ngota-ngota. **4** Timongolio ngoáamila kiluwaasa lo Rohullah, wau malo lumula lobisala todelomo bahasa wewo u hidala-dalaala. Timongolio helo bisala loduduá wolo uilohi lo Rohullah boito u lapalia maó limongolio. **5** Tou boito ngohuntua taulo Yahudi lonto lipu hidala-dalaala to ngoilanggubu dunia hibiluloáwa to Yerusalemu. Timongolio boito tau-tauwalo tahi podungohe to Allahu Taaála. **6** Tou loódungohe tingohe boito ngohuntua daá tau lonaó mai lotiambu. Timongolio ngoáamila iloohea loódungohe totau-tauwalo tapalacaya boito hipo bisalawa todelomo bahasa limongolio lohihilao. **7** Wolo hilinggolabe wau leitontongo timongolio malo loiya, "Tau-tauwalo tahi pobisalawa botie ngoáamilalo tau-tauwalo Galilea, diila odito? **8** Woloolo mola ilowaliilio tilinggula ito modungohe olimongolio hemobisala todelomo bahasa lolipunto ngota-ngota? **9** Ito tau-tauwalo talonto Partia, Media, Elam; lonto Mesopotamia, Yudea wau Kapodokia; lonto Pontus wau Asia, **10** lonto Prigia wau Pampilia, lonto Masiri wau mamaa-dalawaalo Libia totili lo Kirene; woluo talonto olanto lonaó mai lonto Roma, **11** woluo tau-tauwalo Yahudi wau woluo olo tau-tauwalo bangusa wewo tamaa tilumuwoto agama lo Yahudi; woluo olo talonaó mai lonto Kreta wau Arabi. Ito ngoáamila loódungohe olimongolio hemo bisala lo bahasanto ngota-ngota tomimbihu susuu-aliyaalo moólinggolabe upilohutu mai lo Allahu Taaála!" **12** Wolo hilinggolabe wau leitontongo timongolio ngoáamila mahipo hintua ngota timongota, "Wolo boliilio lewe botie?" **13** Bo woluo olo tau-tauwalo tahi poluúde. Timongolio malo loiya, "Aa, tau-tauwala boito bo hihuwoá wambaio!" **14** Lapataó tei Petrus tilimihula

mola wolo tamopulaa tuwau lota rasulu uwewo, tulusi lobisala ode taa dadaata boito. Wolo suala daa tio loloiya, "Mongo wutato, tau-tauwalo Yahudi wau ngoaamila tahi biluloawa to Yerusalemu! Poodungohe mopio-piohulo maó, sababu suali botie palalu tombanga mai lowatia olimongoli.

**15** Tau-tauwala botie diila hihuwoa, debo odelo helantobu limongoli; sababu botia boheli jamu sambila dumodupo. **16** Bo utie mapiloótaa mai lo Allahu Taála lotimbulude toli Nabi Yoel; **17** Allahu Taála lotahuda mai, 'Topulito lojamani Wau mamu luwatai Rohu-U ode ngoaamila tau. Mongo walaumu talolai wau mongo walaumu taabua mamopoótaa olemu susuu-aliyaalo u piloótaa-U olimongolio. Tahi-muudawa limongoli mamooónto susuu-aliyaalo upilopo bilohu-U olimongolio. Mongo dulaamu mamooó tohiilopo tomimbihu tohiilopo uilohi-U olimongolio. **18** Tomongo wato-U olo -- mopio mongo lolai meaalo mongobua --, maa bangguwato-U mai Rohu-U to duduu-laheyaalo boito. Timongolio mamopoótaa susuu-aliyaalo u piloótaa-U olimongolio. **19** Wau mamopo wولو momooó-linggolabeyalo toitaato mola tohulungo, wau susuu-aliyaalo upolu-polutuó to walungo lewe todunia; mawولو mai duhu wau tulu, wumbuó wau poloó. **20** Mato lodulahu mamowali modiólomo, hulalo mamowali meela debo odelo duhu tou dipolulio mai Dulahu Eeya, Dulahee u udaa wau molamahu boito meidungga mai. **21** Towakutu boito, taa u mongiibodu to Eeya mapoaahuwolo.' **22** Mongo wutato tau-tauwalo Isirailu! Dungohilo wolo uiloia mai lowatia botie: ti Isa taulo Najaret boito mailohia tuugasi lo Allahu Taála ode wutato. Uito loilaalo daa tou tilolahepalo u moólinggolabu wau susuu-aliyaalo upolu-polutuó upilohutu mai lo Allahu Taála tohuungi mongoli lotimbulude toli Isa boito. U ngoaamilalo boito mailotaawa lowutato lohihilao. **23** Lotuuúde wolo lanjána-Lio lohihilao, Allahu Taála malolantu u mohudu li Isa ode limongoli. Wau tou Tio yiludu mai, timongoli lomate o-Lio yila-yilateelo maó, wolo lopoluli totau-tauwalo tahileeta boito lopo salipu o-Lio. **24** Bo Allahu Taála luli lopotumulai o-Lio lonto wolota lotau-tauwalo tahe lopowate. Tio tiloloolo lo malikili mautu, bo Allahu Taála lolopata o-Lio, sababu diila pongalo aakali Tio kawasaalio tulusi lo opopate. **25** Pasali li Isa botie tei Dauda mapeenta loloiya, 'Wau laito hemoónto Eeya totaluu; Tio hemodaha

ola-U, alihu wau diila moétu penu boli loolo. **26** Uito sababuulio hilaau motiwengahe, tunggiluu molapali puji poloilaalo momuji: wau batangau botie mamohima wolo amani todelomo kuubulu. **27** Sababu Eeya diila mopoluli himuüduü meitolaa todelomo dunia lotaa lopowate. Eeya diila mopoluli wato lo Eeya taa tatapu wau molotolo hilao boito motoyopu wau mopulito. **28** Eeya malo pobilohei olaü dalalo udulu-dulunga ode tutumulo utuutu. Owengahuü lepa-lepato sababu Eeya woluo pee-peenta wolau.'

**29** Mongo wutato, poluasia mai watia mobisala lou juujulu pasali lei Dauda, tiyamo loluuhurunto boito. Tio mailate wau mailobungio; kuubululio donggo to huungonto tunggula botia. **30** Allahu Taaala malodanti odelei Dauda, wolo tadia, deu tala ngota lowaliilio mola mapuduó lo Allahu Taaala mowali olongia. Sababu maótaawa lei Dauda danti boito wau sababu tio nabi ngota olo, **31** yi otaawalio olo wolo u mapohutuo mai lo Allahu Taaala. Oditolio tio malo nubuwati deu Olongia Tamoo-poáahua tapilo danti mai lo Allahu Taaala boito, mamuli tumumulai monto opopate. Tei Dauda loloiya, 'Tio diila piloluliilio leitolaa todelomo dunia lotahe lopowate; batangalio diila mowali moántulu wau mopulito.' **32** Ti Isa botieelo taluli pilo tumulai lonto opopate lo Allahu Taaala. Ami ngoáamila malo sakusi lohihilao suáli boito. **33** Tio piludu-Io ode huhuloáa ulailaió wau yiludua kawasa lo Allahu Taaala, lapataó lololimo Rohullah umaa pilodanti li Paapa. Wau u masaatia botie u ilodungohe wau iloontonga limongoli deuüto-yito Rohu boito u bilanguwa-Tio mai ode olami. **34** Tei Dauda lohihilao diila lobotula mola ode sologa, bo tei Dauda loloiya, 'Eeya lotahuda ode Eeyau: **35** Potihuloólo towimbihu olowala-U, tunggula Wau mohutu mai ngoáamila musu-Mu taaluku to ole-Mu!' **36** Uito sababuulio ngoáamila taulo Isirailu musi motota otu-otutuulo maó deu ti Isa tasilalipu limongoli boito, ti Isa boitolo olo tamaa pilowali lo Allahu Taaala lowali Eeya wau Olongia Tamoo-poáahua!" **37** Tou tau-tauwala boito loódungohe suáli boito, hila limongolio lobalisa daá. Tulusi timongolio malohintu odelei Petrus wau mongo rasulu wewolio, "Mongo wutato, wolo umusi pohutuo lamiaatia?" **38** Tei Petrus lolametaó, "Polilihulo monto duduu-sawaalo limongoli. Wau mawajibulio timongoli ngota-ngota lihuwalo to tangguli Isa Almasi, alihu

ngoáamila dusa limongoli maa ambungulo. Yi Mongo wutato mamololimo palaseni Rohullah monto Allahu Taáala. **39** Sababu upilo dantia lo Allahu Taáala boito yito ode olemu wau walimu mola wau ode tau-tauwalo tawoluo to tataa-mbatiyalo u molamingo -- deüyito-yito ngoáamila taa u tiliyango Allahu Taáala Eeyanto u monaó mai ode o-Lio." **40** Odieelo mola tei Petrus helo tombangaó olimongolio. Wau wolo dadaata loiya uwewo olo hepilo nasehatilio maó olimongolio alihu timongolio mopolahi batanga monto bangusa u moleeta botie tamaa huumanio lo Allahu Taáala. **41** Ngohuntua tamaa pilalacaya tou yiloiya lei Petrus, lapataó timongolio yilihualio. Yi jumulaa taa palacaya todulahee boito donggo iloduhenga mola tololihi lota. **42** Wolo moóolohu timongolio hipo balajalia tulusi lonto mongo rasulu wau laito hemo tiambu peé-peéenta. Timongolio hemo lamelo peé-peéenta wau hipoduáwa peé-peéenta. **43** Ngohuntua daá moólinggolabe u hepilohutu lomongo rasulu boito tilinggula ngoáamila tau lolinggolabu wau yiloohe. **44** Tau-tauwalo tapalacaya boito ngoáamilalo tulusi hemo tituwau wau wolo ulowali miliki limongolio, hepilomake limongolio peé-peéenta. **45** Timongolio helo potali babaa-langiyalo wau halata miliki limongolio, tulusi helo laya-layadeó doilio towolota limongolio ngoáamilalo loduduá u palaluo lo tahingota-ngotaawa. **46** Timiidu dulahu timongolio tulusi hemo tiambu to Bele lo Eeya; wau hemo lamelo peé-peéenta, wolo hiwengahe wau hidupapawa lohilao to bebee-leyaalo limongolio. **47** Timongolio tulusi hipomuji-mujia Allahu Taáala wau aahudu lotaa ngoáamila. Timiidu dulahu jumulaa limongolio tulusi he oduhenga mola sababu Eeya lohudu ode limongolio tau-tauwalo tadonggo hepo aahuwolo.

**3:1** Todulahee tuwau tei Petrus wolei Yahya lonaó mola ode Bele lo Eeya jamu tiga lolaango, deüito-yito towakutu u moduá. **2** Mola teto tohuhebu hulubangi u ilunte "Huhebu Gaagadaá", woluo talolai ngota tadidu mowali monaó anggadu pilotutulio mai. Timiidu dulahu tau boito hedeloolio mola odito u mohile-hile totahi tuwota maó ode Bele lo Eeya. **3** Tou tau boito loóonto olei Petrus wolei Yahya donggo tuwo-tuwotai ode Bele lo Eeya, tio lohile maó olimongolio u mongohi mai hitua-tuawua olio. **4** Yi

mapiloóo tontongi mongolio tio, lapataó tei Petrus loloiya maó, "Bilohi mai ami!" **5** Tulus tau boito malo poóotuoto olimongolio wolo halaapani mamooótapu u hitua-tuawua monto olimongolio. **6** Bo tei Petrus loloiya maó olio, "Wau diila odoi sama-samaata. Bo wolo uwoluo to olaú, uito mawohiú mai olemu: wolo kawasa li Isa Almasi taulo Najaret boito, ponaóolo!" **7** Lapataó tei Petrus malodihu uluú olowala lo tadidu mowali monaó boito wau lotulungi olio tilimihula mola. Tulusi oáato tau boito wau pailio lowali lolotolai. **8** Lapataó tio tilumayanga mola tilimihulo, wau malowali lonaó odito mota odia mai. Lapataó tio tilumuwoto ode Bele lo Eeya peé-peéenta wolei Petrus wau lei Yahya, sambela naónaó wau lantiáaó-lantiáaó hemomuji mola Allahu Taáala. **9** Ngoáamila tau loóonto olio naónaó wau hemomuji-muji mola Allahu Taáala. **10** Tulusi timongolio malongalati deú tio-tiolo tamoohilea u biasaalio hulohuloáa to "Huhebu Gaagadaá" to Bele lo Eeya. Timongolio lolinggolabe daá wau leitontongo loóonto maó wolo u malotoduo mai to olio boito. **11** Tau boito bolo wambaó hemoduduá olei Petrus wolei Yahya. Wau tou timongolio toulota leidungga mota ode sulambe u ilunte "Sulambe Salomo", ngoáamila tau lonaó mai lotiámbu toli mongolio sababu lolinggolabu. **12** Tou tei Petrus loóonto maó tau-tauwala boito, malo loiya tio olimongolio, "Wuu tau-tauwalo Isirailu, yilongola Mongo wutato lolinggolabu to ulotoduo mai botie? Yilongola timongoli hemo lontongo tulusi olami? Wolo to lantobu limongoli tau botie malowali lonaó sababu woluo kawasa to olami meaalo sababu ami lodungohe to Allahu Taáala? **13** Allahu Taáala tahe tuboo lei Abraham, lei Isihaka, lei Yako, Allahu Taáala linenemoyanto, Allahu Taáala boito tamaa lopolaió Wato-Lio, deúito-yito ti Isa. Ti Isa boitolo tailudu limongoli ode tahidihima kawasa, wau hetiluwali limongoli totalu lei Pilatus, tou tei Pilatus ohilaa molopata o-Lio. **14** Tio mantali boli mopiohu bo timongoli lotehengi o-Lio wau helo huntulo alihu tei Pilatus molopataó ngotaalio lo tamoomatea mate-mateelo maó ode limongoli. **15** Mongo wutato lomate o-Lio yila-yilateelo maó, lebe-lebe pomaó tumbaó Tiolo bungo lo tutumulo duólo taa ngoáamila. Wau Allahu Taáala maluli lopo tumulai o-Lio lonto opopate. Masilakusia lami lohihilao suáli boito. **16** Mongo wutato maloóonto wau losakusi wolo u malotoduo mai totaa

didu mowali monaó botie. Tio malowali lolotolai wau luli silehati mai sababu tio palacaya li Isa wau kawasaa-Lio. Sababu palacaya li Isa yi tau botie maluli silehati totalu lomongo wutato ngoáamila. **17** Mongo wutato! Botia mailotaawa lowatia deú wolo u hepilohutu limongoli wau mongo tauwa limongoli odeli Isa, uito pilohutu limongoli sababu diila otaawa limongoli wolo udonggo hepohutuo limongoli. **18** Wau sababu uitolo lotoduo mai olo wolo u mapilootaa lo Allahu Taáala tou muloololio mai daá lotimbulude tomongo nabi-Lio ngoáamila, deú Olongia Tamoo-poaahua upilo dantia boito musi modutolo. **19** Masababu uito Mongo wutato, polilihulo monto duduu-sawaalo limongoli, wau pohualingolo ode Allahu Taáala, alihu Tio moluluto duduu-sawaalo limongoli. **20** Eeya mamei dungga mai ode limongoli wau timongoli mamoolaasa rohu useehati. Wau Eeya mamopoáhu li Isa monaó mai ode limongoli, sababu Tio matilantu mai lo Allahu Taáala mowali Olongia Tamoo-poaahua olimongoli. **21** Tio musi motibiluloá tosologa tunggula Allahu Taáala mopowali mai ngoáamilalo bohu debo odelo upilo tahuda lo Allahu Taáala lotimbulude tomongo nabi-Lio tou muloololio mai. **22** Tei Musa peéenta loloiya, 'Allahu Taáala Eeyamu mamolao ode olemu nabi ngota monto bangusamu lohihilao, debo odelo Tio lolao mai olaú. Timongoli musi modungohe ngoáamila uiloíya lonabi boito olemu. **23** Taa diila mopoótuoto wolo uiloíya lonabi boito, tau boito mainggilolo monto umati lo Allahu Taáala wau pobinasaalio.' **24** Mongo nabi tapeéenta lopo tunggulai habari lonto Allahu Taáala, tumulalo mai lonto li Nabi Semuel wau mongo nabi wewolio talei dungga mai leewoli, ngoáamilalo helo pohabari pasali lojamani botie. **25** Dadaa-ntiyaalo lo Allahu Taáala upilopo tunggulai lomongo nabi yito ode mongo wutato. Todelomo daantia u pilohutu lo Allahu Taáala woli nenemoyamu, Allahu Taáala lotahuda odelei Abraham odie, 'Monto walimu mola Wau mamoo balakati mai totoonulalo bangusa todunia.' Daantia boito yito olo ode limongoli. **26** Uito sababuulio Allahu Taáala lolulaoto Wato-Lio, lapataó lopoáhu mai o-Lio leimulo ode limongoli, alihu Tio mobalakati olimongoli. Dudelo-Lio u Tio mobalakati yito wolo mohutu to Mongo wutato ngoáamila molilihu monto pohuli lo tutumulumu u moleeto."



**4:1** Toui tei Petrus wolei Yahya donggo bibiisalawa wolo tau-tauwalo boito, mongo iimamu tauwa wau kamudangi tamoodahawa Bele lo Eeya wau tau-tauwalo Saduki lonaó mai odelei Petrus wolei Yahya. **2** Timongolio loingo sababu tei Petrus wolei Yahya loloiya totau-tauwalo deu ti Isa maluli tilumumulai lonto opopate. Wau uito mopo bukuti mai deu taamate mamuli tumumulai. **3** Yi timongolio malo heupa rasulu duulota boito tulusi lopotuwoto ode delomo tutupa. Wau sababu maahui mai, yi tei Petrus wolei Yahya matilaa-hangialio teto tunggula lombulio mola. **4** Bo tau-tauwalo tamaloó dungohe pongaajali lomongo rasulu boito, dadaata tapalacaya. Yi jumulaa limongolio heilo duhenga mola tunggula malowali tanu limo lolihu lota. **5** Lombulio mola tahimuloa lo Mahakama Agama, mongo tauwa lo Yahudi wau guguu-ruwaalo agama malo tiambu to Yerusalemu. **6** Timongolio lodunggaya woli iimamu Daá Hanas, wolei Kayapas, Yahya, Aleksander, wau ngoáamila tatuwo-tuwoto ilaato li iimamu daá boito. **7** Tei Petrus wolei Yahya dilelolio ode talu limongolio, tulusi timongolio lohintu maó, "Woloolo mola pohuliilio timongoli lopoóluli totaa didu mowali monaó boito? Lo olootolo wolo boli wolo kawasa lonto olita pilohutu limongoli uito?" **8** Tei Petrus, takiluwasa lo Rohullah boito, lolametaó, "Mongo tuani tauwa lobangusa wau Mongo tuani pongawaá lo Mahakama! **9** Amiaatia butoolio todulahu botie sababu lohutu mopiohu u lotulungi ngotaalio tadidu mowali monaó, wau sababu mongo tuani ohilaa motota woloolo mola tau boito piloóluli. **10** Naa, mongo tuani ngoáamilalo musi motota wau ngoáamila bangusa lo Isirailu olo musi motota maó deu tau botie tilimihulo masaatia botie wolo batanga u sileehati totalu lomongo tuani, uito sababu lotolo wau kawasa li Isa Almasi taulo Najaret boito. Mongo tuani malo posalipu li Isa boito, bo Allahu Taáala maluli lopotumulai o-Lio. **11** Ti Isa botieelo u milakusudu lo ayati botie todelomo Kitabi, 'Botu udiila ilopomakea limongoli mongo pani lohudungu, malo ilaalo lowali botu ulaba-labaalo mopihu.' **12** Bo motimbulude li Isa wambaó tau mowali moáahu. Sababu to ngoilanggubu dunia towolota lomanusia diaaluo penu boli ngotaa maó wewolio taloótapu kawasa lonto Allahu Taáala u mopoáahu mai olanto." **13** Popoo-ngawaáalo majalisi lobubutoó boito lolinggolabu loóonto obuheli lei Petrus

wolei Yahya, tidiyolo maó otaawa limongolio deú rasulu duulota boito yito tau-tauwalo biasa tadiila he osikolawa. Lapataó timongolio bolo longalati maó deú rasulu duulota boito yito tau-tauwalo talo duduó li Isa. **14** Bo timongolio diila lowali loloiya wolo-wolo, sababu tamaa piloó luliilio boito woluo tihutihula teto totalu limongolio peé-peéenta wolei Petrus wau lei Yahya. **15** Yi timongolio malo poáhu rasulu duulota boito yilumualo lonto tambati lomajalisi boito, lapataó timongolio malo dulohupa. **16** Timongolio loloiya, "Mamusi pohutunto woloolo mola totau-tauwalo botie? Ngoáamila tahi biluloáawa to Yerusalemu malotota deú moólinggolabe upolu-polutuó botie, hepilohutu limongolio duulota. Uito diila mowali paahunto. **17** Bo alihu suáli botie diila maó mololadu lebe motanggalaó poli ode tau-tauwalo, dulo ito monganjamu olimongolio duulota deú timongolio didu mowali boli peéenta maó mobisala penu boli olita momake tangguli Isa." **18** Yi timongolio malo tiangai rasulu duulota boito luli tilumuwotai, wau lopoótaa maó deú timongolio sama-samaata diilalo mowali molanggula meaanto mongaajali wolo tangguli Isa. **19** Bo tei Petrus wolei Yahya lolametaó, "Pikilangia mola lohihilao wolo u otutu totalu lo Allahu Taáala: moduduá palenta lomongo tuani meaanto moduduá palenta lo Allahu Taáala. **20** Sababu amiaatia diila mowali mohuheli mobisala tomimbihu wolo u mailoontonga wau ilodungohe lamiaatia lohihilao." **21** Popoo-ngawaálo lomajalisi boito diila loótapu alasani penu boli tuwau maó u mohukuumani olei Petrus wolei Yahya. Oditolio timongolio malo nganjamu rasulu duulota boito, lapataó yilopatio duduulotalo, sababu ngoáamila tau hipomuji-mujia Allahu Taáala sababu ulotoduo mai boito. **22** Taa u maloluli wolo moólinggolabe boito malebe lou wopato pulu lotaunu tutumulio. **23** Tou tei Petrus wolei Yahya yilopatio, timongolio luli lohualinga mota ode mongo sahabati limongolio wau lohungguli maó ngoáamila uiloia lomongo iimamu tauwa wau mongo tauwa lo Yahudi olimongolio. **24** Tou mongo sahabati limongolio boito loódungohe uito, maloduá mola timongolio peé-peéenta wolo ngohilao ode Allahu Taáala. Timongolio loloiya, "Yaa Eeya, Eeyaalo talopowali mai hulungo wau dunia boli dehetu wolo totoonulalo tuangio. **25** Wolo Rohu lo Eeya, Eeya peéenta lotahuda mai lotimbulude toli

nenemoya lomongo watotia Dauda, deuyito-yito wato lo Eeya; Eeya lotahuda, 'Yilongola tau-tauwala, tadiila mooonuhe to Eeya, moingo; yilongola babaa-ngusawalo hipohutua lanjana udiila ohunalio? **26** Mongo olongia lodunia dapadapato u mopaatea, wau mongo tauwa motituwau moluwali to Eeya wau Olongia Tamoo-poahua.' **27** Sababu memangi tei Herodes wau tei Pontius Pilatus malohutu dudunggaya wolo tau-tauwalo tadiila mooonuhe to Eeya wolo tau-tauwalo Isirailu tokota botie. Timongolio lodunggaya u moluwali li Isa Wato lo Eeya tamantali boito, tamaa piluduó lo Eeya lowali Olongia Tamoo-poahua. **28** Timongolio lotituwau u mohutu totoonulalo u hitua-tuawua, u matilantu lo Eeya leimulo deú uito mamotoduo mai. Wau Eeya lolantu mai uito to okokawasa wau ilohilaa lo Eeya lohihilao. **29** Botia, yaa Eeya, bilohilo mai woloolo mola timongolio longanjamu mongowatotia, wau poluasiyalo mai mongo watotia, mongo wato lo Eeya botie, mopololade habari lo Eeya wolo diila wohewohe. **30** Wohiyalo mai polo tulungi lo Eeya alihu taa mongongoto mowali pooluliolo wau ngoáamila u moólinggolabe wau susuu-aliyaalo upolu-polutuó motoduo mai motimbulude to okokawasa wau olootolo monto tangguli Isa, Wato lo Eeya tamantali boito." **31** Lapataó timongolio yilapato lodua mola, tambati upilo tiambua limongolio boito hilumeulo. Timongolio ngoáamilalo kiluwaasa mai lo Rohullah, wau malo bisala wolo buheli daá pasali lohabari lonto Allahu Taáala. **32** Ngoáamila taa palacaya boito hitumula ngohilao wau ngojiwa. Diaaluo penu boli ngota maó limongolio hemo nganggapu deú wolo u mililikilio yito uolio lohihilao. Tootoonulalo u hitua-tuawua uwoluo toli mongolio, pilomake limongolio peé-peéenta. **33** Wolo kawasa u udaá mongo rasulu boito helongohi sakusi deú ti Isa maluli tilumumulai. Yi Allahu Taáala laba-labaalo lotalakati mai olimongolio. **34** Wau diaaluo penu boli ngotaa maó towolota limongolio tailo kulangia lolo-loolo. Sababu timongolio taóhuta meaalo bele, helo potali huta meaalo bele limongolio boito; lapataó doilio boito dilelo limongolio, **35** wau yilohi limongolio ode mongo rasulu. Lapataó doi boito hetila-tilayadi mongolio ode timiidu taa palalu leeto. **36** Odito olo wolei Yusu. Tio olo lopotali huta milikilio, tulusi halagaalio boito dilelolio wau yilohilio ode mongo rasulu. Tei Yusu botie

yito ngotaalio wali mai lei Lewi lonto Siprus, mongo rasulu longunte olio olo Barnabas (boliilio Tamoo-liyango).

**5:1** Bo woluo talolai ngota tailunte Ananias. Tio wolo dilelio tailunte Sapira, malo potali olo huta ngopita haku limongolio. **2** Doi halaga lohutalio boito ngotayadu tilaa-hangialio ode batangalio lohihilao wau uwewolio yiludulio ode mongo rasulu. Pilohutulio uito wolo ilotaawa lodilelio. **3** Yi tei Petrus loloiya maó olio, "Ananias, yilongola pilolulimu Ibilisi longawasa hilaamu, tunggula yió malo himbulo to Rohullah, wolo poó-poóoyo helo laahangi ode batangamu lohihilao ngobutaio halaga lohuta boito? **4** Huta boito uwolemu tou diipo pilotalimu. Wau lapatio maó huta boito pilotali doilio olo donggo uwolemu. Oditolio yilongola omakusudu todelomo hilaamu umohutu debo odelo uito? Diila manusia tailaa-kalimu bo Allahu Taaala!" **5** Odito tei Ananias loódungohe loiya boito, tio malei balatolo mola tulusi yilate. Ngoáamila taloo dungohu pasali uilowali boito mailoohe. **6** Yi mongo bohulotau mai lolaputaó milate lei Ananias, lapataó lodelo milatelio ode bulemengio mota yilobungi mongolio. **7** Tanu tolo jamu lapatio maó dilelio tilumuwotai. Diila otaawalio wolo uheli lowali mola. **8** Tei Petrus loloiya maó olio: Nte polelea mai olai: Wolo huta u pilotalimu wolo dilemu boito, odelo daata lewe halagaalio?" "Otutu, odito halagaalio," tametaó lodile lei Ananias. **9** Tulusi tei Petrus loloiya maó olio, "Yilongola yió wau dilemu malo woomboa lohimontala Rohu lo Eeya. Dungohilo! Tau-tauwala tamota lolobunga dilemu maluli lohualingai. Timongolio mamodelo olemu olo ode bulemengio." **10** Tosaátילו boito dile lei Ananias boito malei balatolo mola wau yilate totalu lei Petrus. Wau tou mongo bohulotau boito tilumuwotai, ilodungga limongolio tio mailate. Lapataó timongolio malodelo milatelio ode bulemengio wau yilobungio totili lodilelio. **11** Yi ngoáamila taa palacaya boito wau tau-tauwalo wewolio taloo dungohe pasali uilowali boito, mailoohe. **12** Sababu bubaya lomongo rasulu yi ngohuntua u moólinggolabe wau susuu-aliyaalo upolu-poluto lotoduo mai towolota lotaa dadaata. Wolo ngohilao ngoáamila taa palacaya lotiambu to Sulambe Salomo to Bele lo Eeya. **13** Wau tauo bulemengio diaaluo maó tabuheli

mai lotiambu wolo taa palacaya boito. Bo ngoamila taa palacaya boito hehulumatio daa lo ulipu. **14** Wau lebe hihiiheo maó lebe he oduhenga mola taa palacaya to Eeya -- mopio mongo lolai meaalo mongobua. **15** Tumbaó owowoluwoalio tingga malowali odito, tilinggula tahi ngongota pilopo balatio toitaato tambati potuluhelo meaanto amongo, lapataó dilelolio mota ode dalalo, alihu timongolio penu bo ngoidi otuhata lowolilu lei Petrus, wonu tei Petrus lumaodeó teto. **16** Totoyunuta dadaata daa talonaó mai lonto kokoo-tawaalo topalito Yerusalemu. Timongolio lodelo mai tahi ngongota wau tailo tuanga lo roroo-huwaalo u moleeto. Wau tau-tauwala boito piloólulio ngoamilalo. **17** Pulitio maó ti iimamu daa wau ngoamila tahiduduá olio, deúito-yito palatei tau-tauwalo Saduki, lolumula lohutu hitua-tuawua, sababu timongolio mohiihia. **18** Mongo rasulu boito yilaúpio, tulusi pilotuwotio ode delomo tutupa ulipu. **19** Bo huilio mola, ngotaalio malaikati lo Eeya mai lomuó huhuu-hebuwaala lotutupa, tulusi lodelo mongo rasulu boito ode bulemengio. Malaikati boito loloiya maó ode mongo rasulu boito, **20** "Ponaóolo mota tihulolo to Bele lo Eeya wau polelea maó ode tau-tauwalo pasali lo tutumulo ubohu botie." **21** Yi mongo rasulu boito olo malo dungohe tahuli lo malaikati boito. Didimodupo daa timongolio lonaó mota ode Bele lo Eeya wau malo ngaajali teto. Tou boito, ti iimamu daa wau tahiduduá olio lonaó mai, tulusi lohutu maó sidangi lo mahakama wolo mongo tauwa lo Yahudi, lapataó timongolio lopoáhu tau mola lohama mongo rasulu boito lonto tutupa mai lotaalua woli mongolio. **22** Bo tou tahe ilahulalio boito leidungga mola ode tutupa, diila ilodungga limongolio mongo rasulu boito mola teto. Oditolio timongolio luli lohualingai, tulusi lopoótaa maó suali boito ode mahakama. **23** "Tou amiaatia leidungga mola ode tutupa uali mongolio to mahakama, "ilodungga mola lamiaatia huhebu lotutupa boito hiúntia mopiohu, wau tahi pokawalia donggo hidahawa tohuhebu. Bo tou amiaatia lomuó maó huhebu boito, amiaatia diila loódungga penu boli ngotaa maó todelomio." **24** Tou polowila tamoo-kawalia Bele lo Eeya wau mongo iimamu tauwa loódungohe poótaa boito malolingu timongoli pasali lomongo rasulu boito wau moohe tou wolo u mamotoduo mai. **25** Lapataó lonaó mai talolai ngota, lodelo mai habari botie, "Dungohi!

Tau-tauwala tahe tilahangia lomongo tuani totutupa boito, masaatia donggo hemo ngaajali taa dadaata to Bele lo Eeya!" **26** Yi polowila tamoo-kawalia Bele lo Eeya boito wolo tahi pokawalia olio malonaó mota luli lohama mai tomongo rasulu boito. Bo timongolio diila lomakusai sababu timongolio moohe totaa dadaata; tolongaó taa dadaata boito de momai olimongolio wolo botu. **27** Mongo rasulu boito dilelolio tilumuwoto lotaalua wolo mahakama. Tulusi ti iimamu daá lomalakisaó olimongolio. **28** Tio loloiya maó, "Ami malodini olimongoli wolo loóohuu alihu diila maó mongaajali pasali lo Tau boito. Bo botia nte bilohilo maó wolo u mapilohutu limongoli! Mapilopo loladi mongoli pongaajali limongoli boito to ngoilanggubu Yerusalemu, wau tumbaó timongoli ohilaa mopotuludu deú ami-amiilo taloó sababu Tau boito yilate." **29** Tei Petrus wau mongo rasulu wewolio boito lolametaó, "Amiaatia musu moduduá to Allahu Taáala wau diila moduduá tomanusia. **30** Ti Isa tasilalipu limongoli boito, maluli pilotumu-Lio mai lonto opopate lo Allahu Taáala tinenemoyaanto. **31** Wau Allahu Taáala malohudu o-Lio huhuloáa wau okokawasa ulailaió odelo Tauwa wau Tamoo-poáahua; alihu bangusa lo Isirailu moótoduo wakutu u molilihi monto ngoáamila dusalio wau moótoduo pongo ngambungu. **32** Amiaatiaaalo sakusi tomimbihu ngoáamilalo boito -- amiaatia wau olo Rohullah tailudu mai lo Allahu Taáala ode tau-tauwalo tahemo duduá palentaa-Lio." **33** Tou popoo-ngawaáalo Mahakama Agama boito loódungohe uito, timongolio loingo daá, wau timongolio malo tituwau u momate mongo rasulu boito mate-mateelo maó. **34** Bo towolota popoo-ngawaáalo mahakama boito woluo ngotaalio lo Parisi tailunte Gamaliel. Tio guru lo agama tahe hulumatío daá lotaa ngoáamila. Tio tilimihula mola tulusi lopoáhu tamodelo mota mongo rasulu boito ode bulemengio ngopeeé mola. **35** Lapataó tio loloiya maó ode Mahakama Agama boito, "Mongo wutato tau-tauwalo Isirailu! Pikiilangia maó tióotutua tomimbihu wolo u mapohutuo lomongo wutato ode tau-tauwalo botie. **36** Sababu omoóomolu peéenta yilumenetai tei Teudas, tahe monganggapu batanga taa udaá, tilinggula tanu wopato hetuto lota heloduduá olio. Bo tio pilatelio yila yilateelo maó wau ngoáamila tahiduduá olio lo bubuuálawa,



wau oliyoio olo yilooli sama-samaata. **37** Lapataó uito, tou woluo poloyiáapo jumulaa ulipu, debolo yilumenetai poli tei Yudas, talonto Galilea. Sababu waingio, dadaata olo tahe loduduá olio. Bo tio olo pilatelio yila-yilateelo maó, wau ngoáamila tahiduduá olio lo bubuuálawa. **38** Oditolio botia wolo poloutia botie, naseehati lowatia yito: Diila maó pongopongolawa tau-tauwalo botie, huliilo maó timongolio. Sababu wonu pongaajali wau oóoliyoi mongolio botie yito lonto manusia, yi pongaajali wau oóoliyoá boito mamooli. **39** Bo wonu uito lonto Allahu Taáala, yi Mongo wutato diila tamoolaahe olimongolio. Tumbaó tanu mamoilalo mai deu Mongo wutato moluwali Allahu Taáala." Naseehati lei Gamaliel boito tilolimo lo mahakama. **40** Yi mongo rasulu boito pilei tiangio mai, tulusi biluboálio, lapataó dilinilio muli mongaajali pasali li Isa. Lapataó uito, deuimo timongolio yilopatio. **41** Mongo rasulu boito lololaa maó Mahakama Agama wolo wengahu sababu Allahu Taáala malo nganggapu olimongolio paatuti u moótapu maó hihiina sababu ti Isa. **42** Wau timiidu dulahu to Bele lo Eeya wau to bebee-leyeyaalo lotau, timongolio debo hemo ngaajali tulusi wau hemo pololadu Habari Mopiohe pasali li Isa deu Tiolo Olongia Tamoo-poáhua u pilodanti mai boito.

**6:1** Tahiduduá li Isa helebe mohiheo maó helebe oduhenga mola dadaata. Towakutu boito tau-tauwalo Yahudi tahipo bahasawa lo Yunani, diilalo sanangi totau-tauwalo Yahudi pulua. Tahipo bahasawa lo Yunani boito loloiya maó, "Mongobua lami tamaa janda diila ilotayade lo dembulo onggosi ngohui-ngohui utila-tilayadio ode tau-tauwalo." **2** Sababu uito, mongo rasulu tamopulaa duulota boito longambu mai ngoáamila tahiduduá wau loloiya maó olimongolio, "Diila mopiohe wonu ami mohuheli mopo loladu tahuda lo Allahu Taáala, sababu musi mongulusi susuu-aliyaalo lo uáalo. **3** Oditolio, mopiohulo wonu Mongo wutato molulaotaó towolota limongoli pitulota taa otanggulo mopiohe wau kiluwaasa lo Rohullah wau molinepo, tamowali wohia lami tuugasi u mongulusi maó susuu-aliyaalo botie; **4** sababu ami ohilaa moduá wau mopohabari tahuda lo Allahu Taáala wambaó." **5** Ngoáamila tau boito akolo wolo potuhata lomongo rasulu boito. Tulusi timongolio lolulaota olei Stepanus, ngotaalio lo

tapalacaya daa li Isa wau kiluwaasa lo Rohullah. Ilotulaotalio olo: tei Pilipus, Prokhorus, Nikanor, Timon, Parmenas, wau tei Nikolaus lonto Antiokhia; tio diila taulo Yahudi bo matilu muwoto agama lo Yahudi. **6** Taapitu lota boito tiloowolio maó ode mongo rasulu, tulusi mongo rasulu boito lodua mola wau lomolohone balakati to Eeya ode limongolio. **7** Odieelo mola habari lo Allahu Taála helebe lololadu mola wau tahidudua li Isa to Yerusalemu olo helebe iloduhenga mola daatalio, wau dadaata olo mongo iimamu tapalacaya li Isa. **8** Tei Stepanus laba-labaalo bilalakati lo Allahu Taála, tilinggula tio helohutu ngohuntua u moolinggolabe wau susuu-aliyaalo upolu-polutuó towolota lo ulipu. **9** Bo woluo tau-tauwalo tahi potehengia olio; timongolio yito popoo-ngawaáalo bele potabiaalo u ilunte Bele Potabiaalo Tau-tauwalo Bebas. Popoo-ngawaáalo bele potabiaalo boito yito tau-tauwalo Yahudi lonto Kirene wau Aleksandria. Timongolio wolo tau-tauwalo Yahudi lonto Kilikia wau Asia helo hahaamawa wolei Stepanus. **10** Bo timongolio diila lowali lobatata wolo uiloiya lei Stepanus, sababu Rohullah longohi olio tinepo u mobisala. **11** Masababu uito timongolio helosoloi maó dengolo lota talo bisala, "Iلودungohe lami tau boito helohina olei Musa wau Allahu Taála!" **12** Odieelo mola timongolio helo popatu maó tau-tauwalo, wau mongo tauwa lo Yahudi, wolo guguu-ruwaalo agama. Tulusi timongolio mota loheupa olei Stepanus lapataó lodelo olio lotaalua wolo Mahakama Agama. **13** Wau timongolio olo helo potaalua maó mongo sakusi tahe longohi tombango udiila otutu pasali lei Stepanus. Mongo sakusi boito loloiya maó, "Tau botie laito hemohina Bele lo Eeya umantali wau hemohina totoonulalo palenta lo Allahu Taála upilo tunggulai lei Musa. **14** Amiaatia malo dungohe tio loloiya deu ti Isa lonto Najaret boito mamopo lohubeó Bele lo Eeya botie, lapataó molomela ngoáamila uudu u tiluhutai lei Musa olanto!" **15** Ngoáamila tau tawoluo tosidangi lo Mahakama Agama boito hibilohe odelei Stepanus. Wau towakutu boito baya lei Stepanus oontonga debo odelo baya lo malaikati.

**7:1** Ti iimamu daa lohintu maó olei Stepanus, "Wolo ngoáamila uiloiya lotau boito otutu?" **2** Tei Stepanus lolametaó, "Mongo wutato wau mongo

tiyamo! Nte dungohi mai watia! Tou dipolulio mai tinenemoyaanto Abraham lolimbata ode Haran, tou tio donggo bilubiluloa to Mesopotamia, Allahu Taala talailaió dungga-dungga mai ode olio **3** wau lotahuda, 'Tolailo maó lipumu wau mongo ilaatamu. Ponaóolo odelipu u potunuwo-U mai olemu.' **4** Yi tei Abraham malo lolaa maó lipu lo Kasdim, tulusi lolimbata ode Haran. Lapataó tiyamo lei Abraham yilate maó, Allahu Taala lohutu olei Abraham lolimbatai odelipu botie upilo tibiluloa lo Mongo wutato wau Mongo tiyamo ngoáamilalo masaatia botie. **5** Tou boito diaaluo penu boli ngotayadu lolipu botie uilohi lo Allahu Taala odelei Abraham lowali miliki lei Abraham; penu boli odelo paladu lo uluu diila yilohi-Lio olio. Bo Allahu Taala lodanti deu Tio mamongohi maó odelei Abraham u mowali miliki lei Abraham wau waliilio mola. Tou boito tei Abraham diila owalaó. **6** Bo uti-utieelo u pilotahuda lo Allahu Taala olio, 'Waliimu mola mamoti biluloa debo odelo tau deli tolipu lo taawewo. Tau-tauwala tolipu boito mamopowato olimongolio wau mohutu maó wolo diila omanusia olimongolio wopato hetuto lotaunu mola hiheolio. **7** Bo Wau mamu hukuumani mai bangusa tahemo powato olimongolio, wau timongolio malumualo monto lipu boito wau mamolubo ola-U totambati botie.' **8** Lapataó lotahuda odito buuhuta lodanti boito silaaha lo Allahu Taala wolo upacala losuunati. Yi lapataó tei Isihaka, walaée Abraham pilotutulio mai, tei Abraham loluuna olio tou maa o umulu walu hui. Lapataó tei Isihaka loluuna maó walaio olo, deuító-yito tei Yako. Wau tei Yako olo loluuna walaio tamopula duulota, deuító-yito talowali tiyamo loluhuru bangusa lo Yahudi. **9** Mongo tiyamo loluhurunto boito lohiihia to olei Yusu, tilinggula timongolio malo potali olio lowali wato to Masiri. **10** Bo Allahu Taala wolio wau lolopata olio lonto totoonulalo osuusalio. Allahu Taala longohi olio watade wau tinepo tou tio lodudulaó odelei Piraun onlongia lo Masiri, tilinggula tei Piraun lomintaáa olio lowali Gubolonulu tolipu lo Masiri wau taókawasa to bele biluloa saaha li onlongia lei Piraun. **11** Lapataó malotoduo maasa lopolobiti daa to ngoilanggubu lipu lo Masiri wau Kanaan tilinggula tau helo dutolo daa. Ti nenemoyaanto diila lowali loótapu mai uáalo. **12** Yi tou tei Yako loódungohe woluo pale to Masiri tio malo poáhu mongo walaio, tinenemoyaanto, lonaó mola u

bohulio. **13** Tou timongolio lonaó mola to oluolio, tei Yusu malo poótaa maó tomongo wutatio boito deú tiolo tei Yusu. Deúito towakutu boito ilotaawa li olongia lo Masiri pasali lomongo wutatee Yusu. **14** Lapataó tei Yusu malo pohabari oliyamolio, deúito-yito tei Yako, u mohile olio peé-peéenta wolo ngoilanggubu ngaalaálio molimbatai ode Masiri -- ngoáamilalo woluo pitu lopulaa limolota. **15** Yi tei Yako malo limbata ode Masiri wau mota teteetolo tio woli nenemoyaanto yilate. **16** Milate limongolio lapataó luli pilohualingo ode Sikhem wau yilobungio tokuubulu u matilali lei Abraham wolo ngojumula doi lonto suku bangusa lo Hemor to Sikhem. **17** Tou malembidu wakutuulio Allahu Taáala lopoópolu danti-Lio odelei Abraham, bangusanto to Masiri mailo duhenga mola huntualio. **18** Mapulitio ngotaalio li olongia wewo tadiila motota olei Yusu, malo malenta to Masiri. **19** Olongia boito helo poitohe bangusanto wau diila omanusia odeli nenemoyaanto. Tio lomakusa olimongolio helo pomahulo tahi ungea limongolio uheli pilotutulio mai alihu lulia maó odito wau mate. **20** Tomaasa boitolo pilotutulio mai tei Musa; tio taunge gaaga daá. Tolo hula mola hiheolio tio tilaala tobele lipaapalio, **21** wau tou tio tilapilio, tipuusili Piraun malohama olio, tulusi tilaalalio tio debo odelo walaio lohihilao. **22** Ngoáamila ilimi bangusa lo Masiri pilo ngaajali maó olio wau tio lowali taa okawasa daá toloiya wau huhutuulio. **23** Tou tei Musa maa o umulu wopato pulu lotaunu, tilumoodei lonto hilaalio ohilaa mota momilohe owowoluwoa lo bangusaalio taulo Isirailu. **24** Lapataó tio loóonto ngotaalio limongolio he alinaya ngotaalio lo Masiri; yi tio malo poduulua totahe alinayaalio boito wolo lomate taulo Masiri boito yila-yilateelo maó. **25** Tolantobu lei Musa bangusaalio boito mamongalati deú Allahu Taáala donggo hemomake olio u mopo lopata olimongolio. Bo malo ilaalo deú timongolio diila mongalati. **26** Loombulio mola tio loóonto poli duulota taulo Isirailu donggo hemolohulua, tulusi tio lotolopani u mopodame olimongolio. Tio loloiya maó, 'Timongoli botie mohutato. Yilongola timongoli hemolohulua?' **27** Bo tahe momate waitio boito lohuntudeó olei Musa ode biihio tulusi loloiya maó, **28** 'Tatoonu talo muduó olemu lowali butoó lami? Yilongola yio botie ohilaa momate olai olo mate-mateelo maó debo odelo yio lomate taulo Masiri boito

yila-yilateelo maó olaango?' **29** Toui tei Musa loódungohe wolo uiloiya lotau boito, yi malolahi tei Musa lonto Masiri tulusi mola lotibiluloá to Midian. Mola teto tio loótapu walaó duulota. **30** Wopato pulu lotaunu mola lapatio maó malaikati ngota lonaó mai odelei Musa tohuta datahu u luasi daá wau delita membideó lo Huidee Sinai. Malaikati boito dungga-dungga mai todelomo tulu todiúto udonggo hinta-hintalabu. **31** Tei Musa lolinggolabe loóonto suáli boito, tilinggula tio lohimbide mota lomilohe u motota maó wolo uito. Lapataó tio loódungohe suala lo Allahu Taáala lotahuda mai, **32** 'Waulo Allahu Taáala tinenemoyaamu; Wau Allahu Taáala lei Abraham, Isihaka, wau Yako.' Tei Musa hilumuhela yiloohe tilinggula diilalo buheli lomilohe mota ode diúto boito. **33** Lapataó Eeya lotahuda poli, 'Yinggila maó sandale u pakepake olemu boito, sababu huta tambati ilotihulamu boito yito huta mantali. **34** Wau maloóonto wau lopoo tuotai paátio u hedilutola lo umati-U to Masiri. Wau malo dungohe poloilaalo suusa limongolio wau Wau lotuhutai u molopata olimongolio. Botia, dulo! Wau mamolao olemu muli mohualinga mola ode Masiri.' **35** Tei Musa botieelo tei Musa tadiila ilaku lobangusa Isirailu wau tadiila tilolimo wolo loiya botie, 'Tatoonu talo muduó olemu lowali tauwa wau butoo lami?' Bo tumbaó tio-tiolo taa u yilao lo Allahu Taáala u lowali tauwa wau tamoo-poáahua, wolo bubantu lo malaikati talonaó mai ode olio todiúto u hinta-hintalabu boito. **36** Tei Musa boitolo talodelo bangusa lo Isirailu yilumualai lonto Masiri wolo helohutu u moólinggolabe wau susuu-aliyaalo upolu-polutuó to Masiri, to Deheto Meela, wau tohuta datahu u luasi daá wau delita wopato pulu lotaunu mola. **37** Tio-tiolo olo tei Musa talo loiya ode bangusa lo Isirailu, 'Allahu Taáala mamongohi mai olemu nabi ngota tatulaotolo to wolotamu lohihilao, tutuuwauwa debo odelo Tio lolulaota olau!' **38** Tei Musaalo tato huungo bangusa lo Isirailu tohuta ohungaya u luasi daá, talowali pilo timbulude ode malaikati u lobibii-salawa wolio to Huidee Sinai wolinenemoyaanto. Tiolo talo lolimo habari utumu-tumulo u pilopo tunggulai ode olanto. **39** Openu boli odito tinenemoyaanto diila lohuto lodungohe olio. Timongolio diila lololimo olio wau ohilaa muli mohualinga ode Masiri. **40** Timongolio loloiya odelei Haruna, 'Pohutua mai dedee-waalo olami, alihu dedee-waalo boito modelo

olami. Sababu madidu otaawa lami wolo u malotoduo tolei Musa talopo lualai olami lonto Masiri boito!' **41** Lapatao towakatu boito timongolio lohutu bui tuwau lowalao sapi, lapatao timongolio helo podewo bake ode bui boito wau malohutu potihunggu u lomuja balangi huhutu limongolio lohihilao. **42** Yi Allahu Taala lololaa olimongolio wau lopoluli olimongolio hipoluboa popoo-liyamaalo tohulungo. Uito lotuuide lou wolo u tulatuladu todelomo buku lomongo nabi. Odie mola, 'Wuu tau-tauwalo Isirailu! Diila ode ola-U timongoli longoloto wau lopobake binatang ngotilonggadu wopato pulu lotaunu mola hiheolio to huta ohungaya u luasi daa. **43** Kema lo balaahala Molokhilo u hedeloo limongoli pee-peenta wolo bui lo binatang balaahalamu, deuito-yito Repan; ui-uitolo bui upilohutu limongoli u hetuboolo. Masababu uito Wau mamolapi olimongoli tunggula molamingo ode ngotuwali tolipu lo Babel.' **44** Kema tambati lo Allahu Taala dungga-dungga mai ode manusia woluo tolinenemoyaanto tohuta datahu u luasi daa wau delita. Kema boito pilohutulio topalenta lo Allahu Taala odelei Musa wau loduduá pongawaá upilo bilohei lo Allahu Taala odelei Musa. **45** Lapatao kema boito dilelolio tulusi linenemoyanginto tou timongolio wolei Yosua mota lohehu lipunto botie lonto okokawasa lo babaa-ngusawalo tapilolahi lo Allahu Taala totalu limongolio. Kema boito woluo teto tunggula tojamani lei Dauda. **46** Tei Dauda loosanangi hilaa lo Allahu Taala wau lomolohone o-Lio alihu tio luasia-Lio momongu bele ngowale ode Allahu Taala tahe tuboo lei Yako boito. **47** Bo tei Salomoolo tama lomongu bele lo Allahu Taala. **48** Bo Allahu Taala Taa Laba-labaalo molanggato diila lotibiluloa tobele upilohutu lomanusia; sababu todelomo Buku linabi tulatuladu odie mola, **49** 'Hulungo yito tambati huhuloaa-U, wau huta wapidu oatu-U. Bele wolo u mabongulo limongoli ola-U? Toutoonu tambati u pohuheliya-U? **50** Diila maa Wau lohihilao talo powali mai totoonulalo u hitua-tuawua?' odieelo mola tahuda lo Allahu Taala. **51** Donggo boli baaangilio lo Mongo wutato wau odito totolio modungohe to Allahu Taala! Bulongamu bungolo tiotutua to tahuda lo Allahu Taala! Timongoli tutuwauwa woli nenemoya limongoli; laito hemoluwali Rohullah! **52** Wolo woluo nabi tadiila ilalinaya linenemoya limongoli?



Timongolio helomate mongo utolia lo Allahu Taáala yila-yilateelo maó u muloololio mai daá malopo malalumu deü Wato lo Allahu Taáala taótutu boito madungga-dungga mai. Wau botia timongoli lohiyanati wau lomate yila-yilateelo maó Wato lo Allahu Taáala boito. **53** Mamaa-laikatiyalo malopo tunggulai papaa-lentawalo Allahu Taáala olemu bo timongoli diila loduduááo!" **54** Odito popoo-ngawaáalo Mahakama Agama boito loódungohu ngoáamila uiloiya lei Stepanus, lopalato hilaa limongolio wau maloingo daá olio. **55** Bo tei Stepanus tamaa kiluwaasa lo Rohullah, yilumanggela mola ode hulungo. Tio loóonto mola ololaió Allahu Taáala wau ti Isa tihutihula totambati okawasa to ambahu olowala lo Allahu Taáala. **56** "Bilohi," loiya maó lei Stepanus, "Watia loóonto mola sologa lohuó wau Walaó Manusia tihutihula to ambahu olowala lo Allahu Taáala!" **57** Popoo-ngawaáalo Mahakama Agama lolaúbeó bulonga limongolio sambela hiwuwa-wuwaatiá, tulusi peéntalo maó loluhu olei Stepanus. **58** Timongolio lodedeá olio ode bulemengo kota lapataó hepilailio lobotu. Tau-tauwalo tahi sakusia ulotoduo mai boito lopo hangataó boó limongolio to tabohulotau ngota taa tailunte Saulus. **59** Tou timongolio donggo hemomai olei Stepanus lobotu, tei Stepanus malo ngiibodu, "Eeya Isa, tolimowalo rohu lowatotia!" **60** Tulusi tio loti bonggohuúlo mola wau lomotaalo tingalahu, "Eeya, diila maó pobantawa mai dusa botie olimongolio!" Tou yilapato loloiya maó odito tio yilate.

**8:1** Wau tei Saulus sanangi olo to polomatea yila-yilateelo maó boito. To dulahulo boito jamaá to Yerusalemu maheila-yilapitalio tilinggula ngoáamila tahi o iimania, ngopohia mongo rasulu, malo bubuuálaalo maó ode ngoilanggubu madala lo Yudea wau Samaria. **2** Tau-tauwalo tamoohe to Allahu Taáala lolobunga olei Stepanus wau helo hiyongaó olio wolo hisuukalia daá. **3** Bo tei Saulus debo tulusi hemo tolopani mongantulu jamaá. Tio monto bele ngowale ode bele ngowale helo dedeá ode bulemengio ngoáamila taa palacaya, lapataó helo potuwoto olimongolio ode delomo tutupa. **4** Tau-tauwalo tapalacaya tamalo bubuuálawa boito helo pohabari Habari Mopiohe lonto Allahu Taáala boito ode utoonulalo maó. **5** Tei Pilipus lonaó ode kota Samaria wau lopohabari totau-tauwala

mola teto pasali li Olongia Tamoo-poáahua u pilodanti mai lo Allahu Taáala. **6** Tou tau-tauwala loódungohe olei Pilipus bisabisala wau timongolio loóonto ngoáamila moólinggolabe u hepilo hutulio, ngohuntua lonto olimongolio lopoótuoto wolo u heloiya lei Pilipus. **7** Sababu roroo-huwaalo u moleeto mailumualaó lou hiwatiá lonto taa dadaata tailo tuanga lolati. Tadidu mowali monaó wau penggo olo dadaata tapiloó lulilio. **8** Yi tau-tauwalo tokota lo Samaria boito hiwengahe daá. **9** Tokota boito woluo talolai ngota tailunte Simon, tamaa dengolo wakutu mola hiheolio helohutu totau-tauwalo Samaria leitontongo to ilimi lo sihirilio. Tio maloloiya olimongolio deu tio taa upolu-polutuó. **10** Yi ngoáamila taa tokota boito lonto ngoáamila wolude lo ulipu hemo poótuoto daá olio. "Tau botie yito olootolo Allahu Taáala u otaawa lotaa dadaata odelo 'Olootolo Daá' boito," uali mongolio. **11** Malohiheo daá tio heloó tontonga totau-tauwala wolo olootolo sihirilio, tilinggula timongolio hemo poótuoto daá olio. **12** Bo tei Pilipus lopohabari maó olimongolio pasali lo Habari Mopiohe tomimbihu woloolo mola Allahu Taáala mamó malenta odelo olongia wau pasali li Isa Almasi, Olongia Tamoo-poáahua boito. Yi timongolio palacaya to habari upilo tunggulai lei Pilipus lapataó timongolio yilihualio -- mopio mongobua meaalo mongo lolai. **13** Tei Simon lohihilao olo palacaya. Wau lapataó yilihualio, tio tulusi loduduá olei Pilipus. Momoóo-linggolabeyalo ulotoduo mai boito helohutu olei Simon molaasa hileerani daá. **14** Mongo rasulu to Yerusalemu loódungohe deu tau-tauwalo Samaria malo lolimo tahuda lo Allahu Taáala. Sababu uito timongolio lolao olei Petrus wolei Yahya odito mola. **15** Tou tei Petrus wolei Yahya leidungga mola, timongolio heloduá ode tau-tauwalo Samaria boito alihu timongolio moótoduo mai Rohullah, **16** sababu Rohullah diipo leidungga mai longaawasa maó penu boli ngotaalio limongolio; timongolio boheli yilihualio to tanggulo Eeya Isa wambaó. **17** Tulusi tei Petrus wolei Yahya lopodutu uluu limongolio ode yitaato lotau-tauwalo Samaria boito; yi timongolio lololimo Rohullah. **18** Tei Simon loóonto deu sababu uluu lomongo rasulu dilutu ode yitato lotau-tauwala boito, yi Rohullah yilohi ode limongolio. Sababu uito tei Simon lodelo doi odelei Petrus wolei Yahya, **19** lapataó loloiya maó, "Wohia mai olai

kawasa boito olo alihu wonu uluuuu podutuwolo boli toitaato lotatoonu, tau boito mamó lolimo Rohullah." **20** Bo tei Petrus lolameto, "Matopotala yio wau doimu! To lantobumu deu wowohi mai lo Allahu Taaala boito mowali taliyola lodoi? **21** Yio diila ohaku u moduduá todelomo kalajaa lami, sababu hilaamu diila otutu to Allahu Taaala. **22** Sababu uito tolai maó makusudumu u moleeto boito, wau pohilelo mola dua ode Eeya alihu Eeya mongambungu mai pikiilangimu umoleeta boito! **23** Sababu otaawau yio polupolu lou mohihia wau pilowatolio lou moleeto." **24** Lapatao tei Simon loloiya maó odelei Petrus wolei Yahya, "Tulungia mai u mohile mola ode Eeya alihu diaaluo penu boli tuwau maó u heloiya lomongo wutato boito motoduo mai olaatia." **25** Lapatao longohi ososakusi limongolio wau helo pohabari tahuda lo Allahu Taaala, tei Petrus wolei Yahya luli lohualinga ode Yerusalemu. Wau tou hinaowa, timongolio helo pohabari Habari Mopiohe boito to dadaata kambungu lo Samaria. **26** Malaikati ngota lo Allahu Taaala loloiya maó odelei Pilipus, "Ntali pomonggatolo! Ponaolo talutalu ode hulialio ode dalalo mopo wumbuta Yerusalemu wau Gasa." Dalalo boito diila otau. **27** Yi tei Pilipus olo malo monggato. Tou boito woluo pogawee ngota lobele biluloa li olongia Etiopia tadonggo tononaolio mohualinga ode lipulio. Tau boito ngotaalio lopogawee talailaió wau tatihu-tihulo tou ngoamila okokaya lo Kandake, olongia taabua lolipu Etiopia. Tau boito malonaó ode Yerusalemu mola motaaluku wau mohulumati to Allahu Taaala wau botia donggo to wuwalingio mai wolo kaletaalio. Tou donggo hulohuloaa todelomo kaletaalio boito tio hemobaca Buku li Nabi Yesaya. **29** Rohullah lotahuda mai odelei Pilipus, "Ponaolo duduli mota kaleta boito." **30** Yi tei Pilipus malo dudula mota ode kaleta boito, lapatao ilodungohelio tau boito hemobaca Buku lei Yesaya. Tei Pilipus lohintu maó olio, "Wolo ti Tuani mongalati u hepobaca li Tuani boito?" **31** Tau boito lolameto, "Woloolo mola watia mongalati, wonu diaaluo tamo tombangai uito olaatia?" Tulusi tiloduwolio tei Pilipus lotitae mola ode kaleta lotihuloaa pe-peenta wolio. **32** Utieelo aaa-yatiyalo u hepilo bacalio boito, "Tio debo odelo himba u dilelolio u olotolo, debo odelo walaó himba udiila momembeleo wonu lambutio huntingalo, odieelo mola Tio diila lolapali penu boli

ngotahe maó. **33** Tio hilinaalio wau pilohutulio lou diila aadili. Nyawa-Lio pilahutio lonto tudu lodunia tilinggula diaaluo penu boli ngotaa maó tamooó wungguli pasali lo walii-Lio." **34** Pogawee talailaió lonto Etiopia boito malo loiya odelei Pilipus, "Nte poótaa mai olaatia, tatoonu tapilatuju linabi botie? Wolo batangalio lohihilao meaalo taawewo?" **35** Yi tei Pilipus olo malo lumula lobisala; tio lomake aaa-yatiyaalo boito odelo pomuoó u lopohabari Habari Mopiohe pasali li Isa ode pogawee talailaió boito. **36** Tohuungo lononaó, timongolio malei dungga ode tambati tuwau u otaluhu. Pegawee boito malo loiya, "Bilohi uito otaluhu! Donggo wolo poli ukuulangi u mopolihu olaatia?" **37** Tei Pilipus lolojiya maó, "Wonu ti Tuani palacaya wolo lealeaatu lohilao, ti Tuani mowali lihuwalo." "Watia palacaya deu ti Isa Almasi yito Walaó Allahu Taáala," loiya maó lopogawee talailaió lonto Etiopia boito. **38** Lapataó pilei huheliilio kaletaalio; tulusi timongolio duulota, tei Pilipus wau pogawee boito, lolaahé mola ode taluhu wau tei Pilipus malo polihu olio. **39** Tou timongolio lobotulai lonto taluhu, Rohullah lohama olei Pilipus lonteeto. Pogawee talailaió lonto Etiopia boito diilalo loóonto olio. Wolo wengawengahé pogawee talailaió boito lopo tolonga mola lononaólio. **40** Lou diila ota-otaawa maó tei Pilipus mawoluo to Asdod. Wau tou tio lopo tolonga mola lononaólio, tio helo pohabari Habari Mopiohe pasali li Isa to ngoáamila kota tunggula tio leidungga mola ode Kaisarea.

**9:1** Tou boito tei Saulus tulusi wambaio ohilaa monganjamu wau momate-mateelo maó tahiduduá lo Eeya Isa. Tio lonaó odeli iimamu daá, **2** wau malohile tulade kawasa u monaó ode mongo tauwa lo bebee-leyaalo potabiaalo taulo Yahudi to Damusiki, alihu wonu tio moódungga mola teto tau-tauwalo tapalacaya li Isa, tio mamooó waupaó olimongolio wau modelo olimongolio ode Yerusalemu. **3** Tou donggo dulu-dulunga ode Damusiki, tou malembide mota wolo kota boito, debolo tinelo tuwau lonto hulungo lolinelai topalito lei Saulus. **4** Tio lodehu lewumbade tohuta tulusi loódungohe suala tuwau lotahuda mai olio, "Saulus, Saulus! Wolo sababuulio yio mongalinaya ola-U?" **5** "Tatoonu Ito, Tuani?" yilintu maó lei Saulus. Suala boito lolametai, "Waulo ti Isa, taa ilalinayamu. **6** Bo botia

pobongulo wau tuwotolo ode kota, mota teto mapo tahuda-U mai olemu wolo umusi pohutuwomu." **7** Tahiduduá peé-peéenta wolei Saulus iloohea tilinggula diilalo osuala; sababu timongolio maloó dungohe suala boito bo diila loóonto penu boli ngotaa maó. **8** Lapataó tei Saulus tilimihula mola wau lomulahei, bo matolio diilalo mowali moóonto wolo-wolo. Oditolio timongolio malodihu uluúlio wau lodedeá olio tilumuwoto mota ode Damusiki. **9** Tolo hui mola hiheolio tio diila mowali moóonto wau tou boito tio diila lolamela wau longilu sama-samaata. **10** To Damusiki woluo ngotaalio muri li Isa tanggulio Ananias. Todelomo bibilohe tuwau, Eeya lotahuda mai olio. Eeya lotahuda, "Ananias!" Tametaó lei Ananias, "Watotia, Eeya." **11** Eeya lotahuda mai, "Ntali pomonggatolo botia. Ponaólo mola ode bele lei Yudas todalalo motulidu. Yintua maó mola teto u tanggulio Saulus, taa asaliilio mai lonto kota Tarsus. Tau boito donggo hemoduá, **12** wau todelomo bibilohe tuwau tio loóonto talolai ngota, u tanggulio Ananias, lonaó mai ode olio wau lopodutu uluú toitaatio alihu tio muli moóonto." **13** Tei Ananias lolametaó, "Eeya, watotia maloó dungohe dadaata tahi poloiyawa pasali lotau botie, detidiyolo maó tomimbihu totoonulalo polo ngalinaya u hepilo hutulio ode umati lo Eeya to Yerusalemu. **14** Wau botia tio malonaó mai odia wolo yiluwasia lomongo iimamu tauwa u moheúpa ngoáamila taa palacaya to Eeya." **15** Bo Eeya lotahuda mai odelei Ananias, "Wambaó ponaólo! Sababu Wau malo lulaota olio u momaya ola-U, alihu tio mopohabari pasalii-U ode babaa-ngusawalo wewo tadiila o agama Yahudi wau ode mongo olongia wau ode umati lo Isirailu olo. **16** Wau Wau lohihilao mamopo bilohei olio ngoáamila polodutolo umusi dutolalio sababu Wau." **17** Yi tei Ananias malonaó mota olo ode bele boito wau lopodutu uluúlio odeitaato lei Saulus. "Wutato Saulus," loiya maó lei Ananias, "Ti Isa Eeya taa iloontonga lo Wutato tohuungo dalalo tou Wutato maódia mai, Tiolo talo poáhu olaatia odia mai alihu Wutato mamuli moóonto wau kawaasa mai lo Rohullah." **18** Tou boitolo olo hitua-tuawua udebo odelo tolitio tola lodehu lonto mato lei Saulus wau tio maluli loóonto. Yi tio malobongu mola, lapataó yilihualio. **19** Wau lapatao lolamelo, tio maluli lolotolai. Tei Saulus lotibiluloá to Damusiki wolo tahiduduá li Isa dengolo hui mola

hiheolio. **20** Tio tulusi lonaó ode bebee-leyaalo potabiaalo wau lolumula helo pohabari deú ti Isa boitolo Walaó Allahu Taaala. **21** Ngoáamila tau lolinggolabu loódungohe olei Saulus. Timongolio malo loiya, "Diila tio botie taamota to Yerusalemu malomate yila-yilateelo maó ngoáamila taa palacaya li Isa? Tio lonaó mai odia tumbaó bo mai moheúpa wau modelo olimongolio ode mongo iimamu tauíwa!" **22** Bo helebe moóohuí waingio lei Saulus. Bubuu-kutiyaalo u tiloówolilio pasali li Isa odito moóyakini deú ti Isa boitolo Olongia Tamoo-poáahua, tunggula tau-tauwalo Yahudi tahi biluloáwa to Damusiki diilalo loó batala. **23** Lapataó lopaluto dengolo wakutu mola hiheolio tau-tauwalo Yahudi malo heeluma u momate olei Saulus mate-mateelo maó. **24** Bo patuju limongolio boito ilotahualio. Hui wau dulahu timongolio hipohimawa tohuhebu hulubangi lokota u momate olio mate-mateelo maó. **25** Bo tou huilio tuwau, tahiduduá olei Saulus malohama olio, tulusi lopolahe mola olio todelomo kalanji tuwau loli dingingo botu lokota. **26** Tei Saulus lonaó mola ode Yerusalemu, wau mola teto tio helo tolopani motituwau wolo tahiduduá li Isa. Bo timongolio moohe olio sababu timongolio diila palacaya deú tio otu-otutuulo maó malowali muri li Isa. **27** Lapataó tei Barnabas lonaó mai ode olio, tulusi lodelo olio ode mongo rasulu. Tei Barnabas lohungguli maó olimongolio pasali woloolo mola tei Saulus loóonto Eeya tohuungo dalalo wau woloolo mola Eeya lotahuda mai olio. Tei Barnabas lopoótaa maó olo pasali woloolo mola obuheli lei Saulus helo ngaajali to Damusiki to tangguli Isa. **28** Sababu uito tei Saulus lotibiluloá woli mongolio, wau helo hutuba wolo buheli to ngoilanggubu Yerusalemu to tanggulo Eeya. **29** Tio lobisala wau helo tataameta olo wolo tau-tauwalo Yahudi tahipo bahasawa lo Yunani, bo timongolio hipo tolopania u momate olio mate-mateelo maó. **30** Tou tau-tauwalo tapalacaya wewolio lotota maó pasali losuáli boito, madilelo limongolio tei Saulus ode Kaisarea, lapataó lolao olio ode Tarsus. **31** Yi jamaá to ngilanggubu Yudea, Galilea, wau Samaria malowali aamani. Bilantua mai lo Rohullah, lou yiloohe to Eeya, jajaa-maáalo boito he iloduhenga mola lotolio wau daatalio. **32** Tei Petrus lonaó ode utoonulalo maó helo biilohe wolo jajaa-maáalo. Todulahee tuwau tio mola lobiilohe wolo umati lo Eeya tahi biluloáwa to Lida. **33**



Mola teto tio lodungaya wolo talolai ngota tanggulio Eneas, tadidu mowali monaó wau diilalo hemo pobongu-bongu monto potuluhelio mawalu lotaunu mola hiheolio. **34** Tei Petrus loloiya maó odelei Eneas, "Eneas, ti Isa Almasi mamó pooluli mai olemu. Pobongulo mola wau pobelesia maó potuluhemu." Tou boitolo olo tei Eneas lobongu. **35** Ngoáamila tuango lipu to Lida wau Saron loóonto olei Eneas, tulusi timongolio ngoáamilalo palacaya to Eeya. **36** To Yope woluo taabua ngota tanggulio Tabita. Tio ngotaalio tapalacaya li Isa. (Tanggulio tobahasa Yunani yito Dorkas u boliilio maó buúlu.) Tio laito bo wambaó hemohutu susuu-aliyaalo u mopiohu wau hemo tulungi totahi mosikinia. **37** Tou boito tio mongongoto lapataó yilate. Lapataó milatelio yilihualio maó, tio pilobalatio tohuwali u toitaato. **38** Yope diila botie molamingo monto Lida. Oditolio tou tahiduduá li Isa to Yope loóungohe olei Petrus to Lida, timongolio malo poáhu mota duulota lonaó odelei Petrus wolo tahuli odie, "Huáa pohuwalingai odia." **39** Tei Petrus huáa lobongu wau malo dudua woli mongolio. Tou leitungga mola odito, tio dilelolio ode huwali u toitaato. Ngoáamila tahi jandawa teto malo tiambu totili lei Petrus sambela hehiyonga wau lopo biloheó olio bobooówalo wau jujuu-mbawaalo u hediletu li Dorkas ode limongolio tou tio donggo tumutumulo. **40** Tei Petrus malo poáhu olimongolio ngoáamilalo yilumualo, lapataó tio loti bonggohuúlo mola wau loduá. Lapataó uito tio lotitalu maó ode milate li Dorkas wau loloiya, "Tabita, pabongulo!" Yi ti Dorkas malo mulahei, wau tou tio loóonto olei Petrus tio malo tihuloó. **41** Tulusi tei Petrus lodihu uluúlio wau lomantu lopo tihula mola olio. Lapataó tei Petrus lotiangai tau-tauwalo tapalacaya teto wau peé-peéenta wolo mongo janda boito, tulusi lohudu maó oli Dorkas tamaa tilumumulai boito ode limongolio. **42** Habari pasali u lotoduo mai boito malo loladulo mola ode ngoilanggubu Yope, tilinggula dadaata taa palacaya li Isa odelo Olongia Tamoo-poáahua limongolio. **43** Tei Petrus lotibiluloá teto dengolo hui mola tobele ngotaalio tamoolahea walito lo binatanggi tanggulio Simon.

**10:1** To Kaisarea woluo talolai ngota tanggulio Kornelius. Tio kapitengi lo "Pasuukani Italia." **2** Tio ngotaalio lotaa u moohe to Allahu Taáala wau

ngoáamila ilaatolio hipo tabiyawa ode Allahu Taáala. Tio mapoó-poódaata helomantu tau-tauwalo Yahudi tamosikini, wau tio laito hemoduá ode Allahu Taáala. **3** Tou dulahee tuwau tanu jamu tiga lolaango tio loóonto wolo mopatatao tuwaulio lo bibilohu, ngotaatio lo malaikati lo Allahu Taáala dungga-dungga mai wau lotianga olio, "Kornelius!" **4** Tei Kornelius lomiloheó malaikati boito wolo wohe-wohe lapataó lolojiya maó, "Mahinta wolo Tuani?" Malaikati boito lolametaó, "Duámu wau omuula lohilaamu matilolimo lo Allahu Taáala wau Allahu Taáala loéelai olemu. **5** Botia ahulilo mota tau ode Yope motiangai olei Simon tailunte wimu-wimumuto Simon Petrus. **6** Tio donggo hanga-hangato tobele lo ngotaatio tamoolahea walito tanggulio Simon, tabilu-biluloá tobiihu pentadu." **7** Lapataó malaikati talo bisala wolei Kornelius boito lonaó, tei Kornelius malo tiangai duulota tamoomayawa belelio wau suludadu ngota mokawalia olio taó iimani. **8** Tei Kornelius lohungguli maó olimongolio wolo u malo toduo mai, tulusi lopoáhu mola olimongolio ode Yope. **9** Loombulio mola, tou timongolio donggo todelomo nonaó limongolio wau wimbideó meidungga ode Yope, tei Petrus malo botula odeitaato bele mola loduá. **10** Lapataó tio maloólaasa pilolaango daá wau ohilaa molamelo. Tou uáalo donggo hepo dapatolio, tio loóotoduo mai tuwaulio lobibilohu. **11** Tio loóonto mola hulungo lohuó wau u hitua-tuawua debo odelo kaingi u motanggalo wuduwudu mai ode dunia, ntaya-ntayanga to opaato tutulio. **12** Todelomio woluo tilolahepalo binatangi hidala-dalaala u oáatio wopato, tilolahepalo binatangi u hiálapa wau bulungi u hilinggela. **13** Lapataó woluo suala lotahuda mai olio, "Petrus, bongulo! Olotaalo wau polamelolo!" **14** Tei Petrus lolametaó, "Diila, Eeya! Diipo peénta maó watotia helo lamela wolo-wolo u haramu mealo najisi." **15** Bo suala boito luli lotahuda mai olio, "Wolo u mapilo ilaalo halale lo Allahu Taáala, diila maó anggapua uito haramu." **16** Bibilohe boito helo piúwa tunggula poóotolu, lapataó kaingi boito leibintaa mola ode sologa. **17** Tei Petrus malolingu lomikiilangi mola wolo boliilio lou bibilohe boito. Tou tei Petrus donggo hemo mikiilangi mola, tahe ilahula lei Kornelius boito maloó dungga bele lei Simon wau timongolio mawoluo totalu lohuhebu. **18** Lapataó timongolio lotiangai tau wau lohintu maó, "Wolo tewe otamu talo titihui,

tailunte Simon Petrus?" **19** Tou tei Petrus donggo wambaó hemo tolopani tulusi u motota maó boli lou iloontongalio boito, Rohullah lotahuda mai olio, "Wuu Petrus woluo toulota tadonggo hemololohe olemu. **20** Ntali, lato polaahulo mola ode walungo wau diila maó polingu moduduá olimongolio, sababu Waulo talo poáhu olimongolio." **21** Yi tei Petrus malolaáhe mola ode walungo wau loloiya maó ode tau-tauwala boito, "Wawaatiyalo tahe lolohu lomongo wutato. Mongo wutato lonaó mai odia mai mongola?" **22** Timongolio lolametaó, "Ti Kapitengi Kornelius malo poáhu olamiaatia odia mai. Tio ngotaalio lo tamopiohu wau moohe to Allahu Taáala, wau hehulumatio daá lo ngoáamila taulo Yahudi. Malaikati ngota lo Allahu Taáala lopoáhu olio, mohalapu li Tuani monaó mai ode belelio sababu odelo totameto toduálio, tio ilahulalio modungohe wolo u maloiya li Tuani olio." **23** Yi tei Petrus malo loduo olimongolio tilumuwo to u motitihui teto. Lombulio mola tei Petrus lobongu wau lonaó peé-peéenta woli mongolio. Dengolo lota tapalacaya lonto Yope loduduá olo. **24** Ngohui mola lapataó uito timongolio malei dungga mola ode Kaisarea. Mola teto timongolio maheimaa lei Kornelius wolo mongo ilaatolio wau mongo sahabatilio tamodudula wolio tamaa tiloduwolio. **25** Tou tei Petrus malei dungga, tei Kornelius mota lolutulai olio wau losujudu mola totalulio. **26** Bo tei Petrus lomantu olio tilimihula mola wau loloiya maó, "Pobongulo! Watia lohihilao olo manusia wambaó." **27** Tou donggo hemo bisala wolei Kornelius tei Petrus tilumuwo to á ode delomo bele. Teto tio loóonto ngohuntua tau mahiámbua. **28** Tulusi tio loloiya maó olimongolio, "Mongo wutato lohihilao motota deú taulo Yahudi hedinio lo agamaalio u mobiilohe meaanto mohumbuta wolo tau-tauwalo monto bangusa wewo. Bo Allahu Taáala malo pobilohei ode laatia deú watia diila mowali monganggapu penu boli tatoonu olo najisi meaanto haramu. **29** Uito sababuulio tou ti Tuani lohile alihu watia monaó mai, watia diila okabalatani lonaó mai. Oditolio botia ohilaa otaawa maó lowatia yilongola pileinaó mai li Tuani watia." **30** Tei Kornelius lolametaó, "Tolo hui uilalu maó, tanu towakutu debo odelo utie, watia donggo hemoduá tobele jamu tiga lolaango. Debolo talolai ngota tilimihulai totalu lowatia. Pakeyangi lotau boito heinta-intawa. **31** Tio malo loiya, 'Kornelius! Allahu Taáala

malo lolimo duámu wau loéelai omuura lohilaamu. **32** Oditolio ahulilo mota tau ode Yope motiangai tailunte Simon Petrus. Tio donggo hanga-hangaata tobele ngotaalio lo tamoolahea walito; bele boito tobiihu deheto.'

**33** Uito sababuulio watia huáa lopoáhu tau mota loloduo mai li Tuani. Wau hilaa li Tuani otutu mopiohe u monaó mai. Botia amiaatia ngoáamila mahiámbua tewe totalu lo Allahu Taáala u modungohe ngoáamila upilei loiya lo Allahu Taáala toli Tuani ode lamiaatia." **34** Lapataó tei Petrus loloiya maó, "Botia otu-otutuulo maó watia malo ngalati deü Allahu Taáala lohutu mai ngoáamila tau tutuuwauwa. **35** Taa u moohe to Allahu Taáala wau mohutu u otutu, tau boito tolimoo lo Allahu Taáala, diila paduli tio monto bangusa wolo. **36** Mongo wutato malotota tuango habari upilo tunggulai lo Allahu Taáala ode bangusa lo Isirailu. Habari boito yito pasali lo Habari Mopiohe tomimbihu lou damee lotimbulude li Isa Almasi, deüito-yito Eeya lotaa ngoáamila. **37** Otaawa limongoli wolo u malo toduo to ngoilanggubu lo Yudea, deüito-yito u tumulalo mai lonto Galilea lapataó popolihu upilo nasehati lei Yahya. **38** Otaawa limongoli deü Allahu Taáala malo lulaotaó li Isa taulo Najaret boito wau longohi o-Lio Rohullah wau kawasa. Otaawa limongoli olo deü ti Isa boito malonaó ode tilolahepalo maó helohutu u mopiohe; Tio lopoóluli ngoáamila tau tahe kiluwaasa lo Ibilisi, sababu Allahu Taáala peé-peéenta wo-Lio. **39** Ami botieelo tau-tauwalo tahe loóonto lomato lami lohihilao totoonulalo hitua-tuawua u pilohutu-Lio tolipu taulo Yahudi wau to Yerusalemu. Openu boli odito timongolio lopo salipu wau lomate o-Lio yila-yilatelo maó. **40** Bo todulahee otolulio Allahu Taáala luli lopo tumulai lonto opopate wau lopobilohe o-Lio tomanusia; **41** diila ode ngoáamila tau, bo wambaó ode olami tamaa tilulaoto Allahu Taáala leimulo u lowali mongo sakusii-Lio: Ami lolamela wau longilu wo-Lio tou Tio luli tilumumulai. **42** Wau Tio lopoáhu olami mopohabari Habari Mopiohe boito ode tau-tauwalo wau mongohi sakusi deü Tiolo tapiluduó Allahu Taáala lowali Butoó totau-tauwalo tadonggo hitumula wau tau-tauwalo tamailate. **43** Ngoáamila mongo nabi helo bisala pasali o-Lio. Timongolio loloiya deü ngoáamila taa palacaya li Isa, maámbunguwolo dusa limongolio wolo okokawasa li Isa." **44** Tou tei Petrus donggo bisabisala, Rohullah lotuhutai wau helo

ngawaasa ngoáamila tau tahi dungohe habari boito. **45** Tau-tauwalo Yahudi tapalacaya li Isa wau heloduduó olei Petrus lonto Yope, ngoáamilalo lolinggolabe olo loóonto Allahu Taáala lopo tuhutai Rohu-Lio ode tau-tauwala bangusa wewo tadiila Yahudi. **46** Sababu timongolio loódungohe tau-tauwala boito hipo bisalawa todelomo bahasa u hidala-dalaala wau hemomuji-muji mola odudaá lo Allahu Taáala. Lapataó tei Petrus loloiya maó, **47** "Nte, bilohi, tau-tauwala botie maloó toduo mai Rohullah debo odelo ito. Oditolio tingga mowali tau mongabu-ngabuto olimongolio u lihuwalo wolo taluhu?" **48** Yi tei Petrus lopoáhu olimongolio lihuwalo to tangguli Isa Almasi. Lapataó uito timongolio lohile maó alihu tei Petrus motitolaapo ngoolo hui mola woli mongolio.

**11:1** Mongo rasulu wau tau-tauwalo tapalacaya to ngoilanggubu Yudea maloó dungohe deü tau-tauwalo tadiila o agama Yahudi olo malo lolimo tahuda lo Allahu Taáala. **2** Lapatio maó tou tei Petrus lonaó mola ode Yerusalemu, tau-tauwalo Yahudi tamalo malacaya boito, helo henteá olei Petrus. Timongolio loloiya, **3** "Yilongola yió lonaó mota ode bele lotau-tauwalo tadiipo hetuunawa? Yió tumbaó malo lamela olo peé-peéenta woli mongolio!" **4** Sababu uito tei Petrus lotombangaó olimongolio ngoáamilalo u malotoduo, tumulalo mai monto bohulio. Tei Petrus loloiya maó, **5** "Watia donggo hemoduá tokota Yope, lapataó watia loóonto tuwaulio lobibilohi. Watia loóonto woluo u hitua-tuawua debo odelo kaingi u motanggalo ngopita tiluhutio mai lonto hulungo, ntaya-ntayanga to opaato tutulio wau lapataó lotipoóoyo totili lowatia. **6** Tou watia lopoó tuotaó ode delomio, watia maloóonto bibii-natangiyalo u oáatio wopato, bibii-natangiyalo u hilinggela, bibii-natangiyalo u hiálapa wau bubuu-lungiyalo u hilinggela. **7** Lapataó watia loódungohe suala tuwau lotahuda mai ode laatia, 'Ntali bongulo, Petrus! Olotalo uito wau tamelalo!' **8** Bo watia lolametaó, 'Diila, Eeya! Diipo peéenta mao watotia lolamela uáalo haramu meaalo najisi.' **9** Bo suala boito luli lotahuda mai lonto hulungo, 'Balangi u mapilo ilaalo lo Allahu Taáala halale diila maó tangguli haramu.' **10** Iloontonga laatia suáli boito tunggula poóotolu wau pulitio maó ngoáamilalo luli leibintaáa mola ode sologa. **11** Lotuhatawa tou boito olo

toulota lonto Kaesarea, tailaolio ode laatia, leidungga mai ode bele upilo tihangata laatia. **12** Lapatao Rohullah malo poahu olaatia lonaó peé-peéenta woli mongolio lou diilalo lologu. Mongo wutato wolomota botie olo, loduduá olaatia ode Kaisarea wau amiaatia ngoáamila tilumuwoto ode delomo bele lei Kornelius. **13** Lapatao tei Kornelius malo hungguli mai olamiaatia woloolo mola tio loóonto malaikati ngota tihutihula tobelelio wau lotahuda, 'Ahuli maó tau ode Yope mola motiangai talolai ngota tailunte Simon Petrus. **14** Tio mamopo tunggulai olemu habari u mopoáahu olemu wau ngaalaámu.' **15** Wau tou watia malo lumula lobisala odito," odie mola tei Petrus lopo tolonga mola lo wunggulilio, "Rohullah dungga-dungga mai odeitaati mongolio, tutuuwauwa debo odelo u malotoduo mai to olanto muloololio mai tou bohulio. **16** Lapatao watia loóéela mola, Eeya peéenta lotahuda mai, 'Tei Yahya lopolihi wolo taluhu, bo timongoli malihua-Lio wolo Rohullah.' **17** Oditolio loilaalo mai deu Allahu Taáala longohi olo ode tau-tauwalo tadiila o agama Yahudi boito, wowohi u tutuuwauwa uilohi-Lio mai olanto tou ito palacaya ode Eeya Isa Almasi. Sababu uito, diila pongalo aakali watia modini to Allahu Taáala." **18** Tou loódungohe uito, timongolio diilalo lobatata. Lapatao timongolio lomuji mola Allahu Taáala. Timongolio loloiya, "Wonu odito tau-tauwalo tadiila Yahudi olo yilohia wakutu lo Allahu Taáala u molilihi monto ngoáamila dusalio wau moólaasa maó tutumulo utuutu!" **19** Lapatao tei Stepanus pilatelio yila-yilateelo maó, tau-tauwalo tapalacaya li Isa mahe yila-yilapitalio, tilinggula timongolio malo bubuuálawa bolo ode utoonulalo maó. Woluo talolahi demola Penesia, wau woluo olo taa demola Siprus wau Antiokhia. Timongolio helo pohabari Habari lonto Allahu Taáala, bo wambaó ode tau-tauwalo Yahudi. **20** Bo towolota lotau-tauwalo tapalacaya boito, taa asaliilio mai lonto Siprus wau Kirene, woluo olo tau-tauwalo talonaó mola ode Antiokhia, wau helo pohabari Habari Mopiohe pasali li Isa boito ode tau-tauwalo tadiila o agama Yahudi olo. **21** Kawasa lo Eeya woluo toli mongolio tilinggula dadaata talowali palacaya wau helohudu batangalio ode Eeya. **22** Wuwuung-guliyalo pasali lo popoo-loutiyaalo botie demola olo jamaá to Yerusalemu. Yi timongolio malolao mola olei Barnabas ode



Antiokhia. **23** Wau tou̯ tei Barnabas leidungga mola odito, wau loóonto woloolo mola Allahu Taaala lotalakati tau-tauwala boito, tio leengahe daá. Lapataó pilohilelio alihu timongolio tióotutua tatapu wau molotolo hilao modungohe to Eeya wolo lealeaatu lohilaa limongolio. **24** Tei Barnabas botie tamopiohe halelio wau kiluwaasa lo Rohullah wau palacaya daá to Eeya tilinggula ngohuntua talo dudua̯ to Eeya. **25** Lapataó tei Barnabas lonaó ode Tarsus mola lololohe olei Saulus. **26** Tou̯ lodunggaya wolei Saulus, tio lodelo olei Saulus ode Antiokhia wau ngotaunu mola polupolu timongolio helo tiambu wolo jamaá mola teto sambela helo ngaajali totaa dadaata. To Antiokhia boitolo tau-tauwalo tapalacaya li Isa ubohu-bohulio iluntelio tau-tauwalo Nasara. **27** Tomaasa boito woluo dengolo lota nabi lonaó mai lonto Yerusalemu ode Antiokhia. **28** To wolotalio woluo ngotaalio tailunte Agabus. Bolo yiluntula lo Rohullah tio malo nubuwati deu̯ to ngoilanggubu dunia mamei dungga mai polobiti daá. (Wau suáli boito memangi lotoduo olo tou̯ ti Kaisari Klaudius hemo malenta.) **29** Yi ngoáamila tahidudua̯ li Isa boito malo heeluma u molao mola dembulo ode mongo wutatio tahi biluloáwa to Yudea; ngota-ngota lolao mola u owaliyalio. **30** Polo akolowa boito pilonaólio olo, lapataó tei Barnabas wolei Saulus yilaolio mola u lodepita dembulo boito ode mongo tauwa lojamaá.

**12:1** Membideó lomaasa boito olo ti Olongia Herodes lumula helodeehe popoo-ngawaáalo jamaá. **2** To palentaalio, tei Yakobus wutatee Yahya tilimadelio yila-yilateelo maó wolo wamilo. **3** Tou̯ tei Herodes loóonto deu̯ huhutuulio boito loósanangi hilaa lotau-tauwalo Yahudi, tio luli lohutu maó udebo odelo uito; tio malo poáhu olo talo heúpa olei Petrus. Suáli boito lotoduo to Dulahu Buka Roti Diila Oragi. **4** Tou̯ mailaúpio mai, tei Petrus pilopo tuwotio ode tutupa. Wopato dusingi suludadu pilei dahalio olei Petrus teto -- motiidu dusingi wopatota suludadu. Lapataó rameyangi lo Paska lopalutaó, deu̯ito tei Herodes mamomutoó olei Petrus totalu lotaa dadaata. **5** Oditolio tei Petrus tilahangialio to tutupa; bo popoo-ngawaáalo jamaá bolo wambaó hipoduaáwa mola wolo tióotutua ode Eeya tolei Petrus. **6** Tohui tou̯ diipo tei Herodes mamopo taalua olei Petrus ode taa

dadaata, tei Petrus lotuluhu tihutihuto wolo dulo titihuto towolota lo suludadu duulota tamoo-kawalia. Tohuhebu lotutupa, tahi pokawalia wewo olo donggo hipodahawa tutupa. **7** Debolo malaikati lo Eeya tilimihulaó teto wau tinela tuwau lolinela ode delomo huwali lotutupa boito. Malaikati boito helo poheu-heulaó olei Petrus tilunggala tio lobongu. Tulusi malaikati boito lotahuda maó, "Wuu, huáa pobongulo!" To saaátilo boito malodehu lomola rante wate lonto uluu lei Petrus. **8** Lapataó uito malaikati boito lotahuda maó, "Pomakeyalo mola boómu wau tihutaalo tali lo sapatumu." Yi tei Petrus malo pomake mola boólio wau lolihutaó tali lo sapatulio. Lapataó malaikati boito luli lotahuda, "Pomakeyalo mola jumbamu wau duduilo mai wau." **9** Yi tei Petrus maloduduá malaikati boito yilumualaó lonto tutupa. Bo tei Petrus diila mongalati deú wolo udonggo hepohutuo lo malaikati boito yito tuwaulio u tutuulio-tutu ulotoduo mai. To lantobu lei Petrus uito bo tuwaulio lobibilohu. **10** Tou timongolio mailumaode totambati u hepodahalo bohulio wau oluolio, timongolio malei dungga ode huhebu wate, udulu-dulunga ode kota. Huhebu boito malo huóolo mola lohilaalio, tulusi timongolio yilumualo wau lonaó loli hulupila tuwau. Debolo malaikati boito malo lolaa maó olei Petrus. **11** De lapataó uito bolo tei Petrus longalati wolo u malo toduo mai to olio, tulusi tio loloiya, "Botia mailo taawau deú Eeya otu-otutuulo maó malo poáhu mai malaikati-Lio u lolopota olaatia lonto kawasa lei Herodes wau lonto totoonulalo hitua-tuawua u mapohutuo bangusa lo Yahudi ode laatia." **12** Tou malo ngalati lo owowoluwoa boito, tei Petrus lonaó mota ode bele li Maria, tiilo lei Yahya tailuntelio olo Markusi. Mota teto ngohuntua tahiámbua wau donggo hipoduáawa. **13** Tei Petrus longokoó huhebu bulemengio, tulusi taabua ngota tamoomayawa tailunte Rode, lonaó mai u lomuó maó. **14** Lato ilonuhelio suala lei Petrus, sababu wengahio, tio ngointa tilumuwoaó poli wau diilalo lomuó mai huhebu, tulusi lopoótaa maó ode tau-tauwala teto deú tei Petrus woluo to bulemengio. **15** "Yió biyongo!" loiya maó limongolio. Boti Rode helo poótoheto deú tio otu-otutuulo maó tei Petrus. Yi timongolio malo loiya, "Uito malaikatilio!" **16** Tou boito tei Petrus debo tulusi hemongokoó huhebu. Yi tou timongolio lomuó mai huhebu, wau

loóonto olei Petrus, timongolio lolinggolabe daá. **17** Tei Petrus longohi isalati wolo uluúlio alihu timongolio motipoóoyo, lapataó tio lohungguli maó woloolo mola Eeya malodelo olio lopolualai lonto tutupa. Lapataó tio loloiya, "Pooáalo maó utie odelei Yakobus wau tomongo wutato wewo olo." Lapataó uito tei Petrus lololaa maó tambati boito wau lonaó ode tambati wewo. **18** Loombulio mola dimodupo malotoduo mai tolonggalo towolota lo suludadu tamoo-kawalia. Timongolio lolingu daá pasali wolo u malo toduo wolei Petrus. **19** Tulusi tei Herodes lopoáhu tau mota mololohei olei Petrus, bo timongolio diila loódungga olio. Oditolio tei Herodes lomalantaó alihu tamoo-kawalia boito pohintuwalo lapataó pateelo mate-mateelo maó. Lapataó uito tei Herodes malonaó lonto Yudea wau mola lotibiluloá ngoolo mola hiheolio to Kaisarea. **20** Tei Herodes loingo daá totau-tauwalo Tirus wau Sidon. Masababu uito timongolio peé-peéenta lonaó mai lotaalua wolio. Bohu-buhulio timongolio helomiyo olei Blastus, taú taútaúwa tobele biluloá saaha li onlongia Herodes, tilunggula tio lotiwambaó ode limongolio. Lapataó timongolio mota lotaalua wolei Herodes, tulusi lohile lodaamea, sababu lipu limongolio bo hemo haalapu uáalo lonto lipu lei Herodes. **21** Todulahee tuwau u matilantu maó, tei Herodes lomake boó lo odudaálio wau lotihuloá tokadera lo bele biluloá saaha li onlongia wau lolumula lopidato totalu lo ulipu. **22** Ulipu tadonggo hidungohe boito hiwuwa-wuwaatiá, "Utie suala lodewa, diila suala lomanusia!" **23** Tou boitolo malaikati lo Eeya lolambali olei Herodes, sababu tio diila mohulumati Allahu Taaála. Tei Herodes iliilaa loluwanti tulusi yilate. **24** Yi tahuda lo Allahu Taaála malebe hemo lolade mola wau lebe hemo totohetaó. **25** Lapataó tei Barnabas wolei Saulus lopoó lapato kalaja limongolio, timongolio luli lohualinga lonto Yerusalemu wolo lodelo olei Yahya Markusi peé-peéenta woli mongolio.

**13:1** Todelomo jamaá to Antiokhia woluo mongo nabi wau guguu-ruwaalo, deúito-yito tei Barnabas, Simon tatiloli Tei Moito, tei Lukius lonto Kirene, tei Menahemi tailu damanga mola peé-peéenta woli Olongia Herodes, wau tei Saulus. **2** Tou timongolio donggo hemotabia to Bele lo Eeya wau hemopuasa, Rohullah lotahuda olimongolio, "Tulaotalo tei

Barnabas wolei Saulus tomodu bo ode ola-U, alihu timongolio mokalaja maó kalaja umaa tilantu-U olimongolio." **3** Lapataó lopuasa wau loduá mola timongolio lopodutu ului mongolio toitaato lei Barnabas wolei Saulus tulusi longutolio olimongolio duulota. **4** Sababu ilutolia lo Rohullah, tei Barnabas wolei Saulus lomonggata mola ode Seleukia. Mola lonteeto timongolio lobite ode pulo Siprus. **5** Tou leitungga mola ode Salamis, timongolio helo pohabari tahuda lo Allahu Taáala to bebee-leyaalo potabiaala lo Yahudi. Tei Yahya Markusi lomantu olimongolio tononaó limongolio. **6** Ngoáamila pulo boito yilontale limongolio demola Papos. Mola teto timongolio lodunggayawolo taulo Yahudi ngota, tailunte Bar Isa. Tio tamoo-sihiria helongaku batangalio nabi. **7** Tei Sergius Paulus, gubolonulu lopulo boito yito sahabati modudulo lo tamoo-sihiria boito. Ti Gubolonulu boito yito ngotaalio lo tamotoloó wau molinepo. Tio lotiangai olei Barnabas wolei Saulus, sababu tio motohilaa modungohe tahuda lo Allahu Taáala. **8** Bo tei Barnabas wolei Saulus hetilehengi lei Elimas ahali losihiri boito, sababu tei Elimas, (uitolo tanggulio tobahasa lo Yunani) helo tolopani alihu ti gubolonulu boito diila bolo palacaya li Isa. **9** Bo tei Saulus -- tailuntelio olo Paulus -- kiluwaasa lo Rohullah, tilinggula tio lolontongo taáhali losihiri boito, **10** lapataó loloiya maó, "Wuu tamoo-himbuloa tutu, walaó jahanama! Yio musu lo totoonulalo umopiohe. Yilongola yio diila mohuheli mongantulu patuju lo Allahu Taáala u mopoáahu manusia? **11** Botia bilohi, Eeya mamohukumani mai olemu! Yio mamowali pitoó tunggula yio diilalo mowali moóonto tinelo mato lodulahu tou ngopeé wakutu mola." Tosaátילו boito tei Elimas maloólaasa woluo wambulo moitomo lolaúbei matolio, tilunggula tio bolo oáapaó-oáapaó monaó hemo lolohe tamo dedeá olio. **12** Tou ti gubolonulu boito loóonto maó wolo u malotoduo mai, tio palacaya li Isa; sababu tio lolinggolabe daá tomimbihu pongaajali lo Eeya. **13** Lonto Papos, tei Paulus wau mongo sahabatilio lobite ode Perga to Pampilia. Mota teto tei Yahya Markusi lololaa maó olimongolio, tulusi luli lohualinga ode Yerusalemu. **14** Lonto Perga, timongolio lopo tolonga mola lononaó limongolio ode Antiokhia to Pisidia, lapataó todulahu Saabati timongolio mota lotihuloá tobele potabiaalo. **15** Lapataó Buku lei Musa wau Buku lomongo nabi pilobacalio maó, mongo

tauwa lobele potabiaalo boito lopoáhu taa lohintu olei Paulus wolo mongo sahabatilio, "Mongo wutato, wonu mongo wutato bolo o naseehati hitua-tuawua ode tau-tauwalo botie, yi toduwolo umopo tunggulaó naseehati boito." **16** Tei Paulus matilimihula mola, tulusi longohi maó isalati lo uluúlio, lapataó loloiya, "Mongo wutato bangusa lo Isirailu wau ngoáamila mongo wutato wewolio tewe tamo dungohe to Allahu Taaála! Nte dungohi mai watia: **17** Allahu Taaála lobangusa Isirailu malo lulaoto linene moyaanto, wau lohutu mai bangusa botie bangusa udaá tou timongolio hibiluloáwa to Masiri debo odelo tau deli. Lapataó wolo kawasa uleidaá lo Allahu Taaála lodelo olimongolio yilumualo lonto Masiri. **18** Tio sabari topiili wau huhutu limongolio tohuta datahu u luasi daá wau delita wopato pulu lotaunu mola hiheolio. **19** Pitu bangusa hebilinasaa-Lio tolipu lo Kanaán u lolaya-layadeó lipu boito ode bangusa lo Isirailu alihu lipu boito mowali haku limongolio. **20** Ngoáamilalo boito pohupohutu ngotilonggadu wopato hetuto limo lopulu lotaunu mola hiheolio. Lapataó lolaya-layadeó lipu lo Kanaán boito, Allahu Taaála malongohi olimongolio mongo hakimu. Hakimu pulitio yito Nabi Samuel. **21** Lapataó timongolio malohile onlongia ngota. Allahu Taaála longohi olimongolio olei Saulu walaée Kisi lonto suku bangusa Benyamini lowali onlongia limongolio wopato pulu lotaunu mola hiheolio. **22** Lapataó Allahu Taaála lopohinggi olio lonto huhuloálio, Allahu Taaála malo muduá poli olei Dauda lowali onlongia limongolio. Wau utieelo upilo tahuda lo Allahu Taaála pasali olei Dauda, 'Wau maloó dungga olei Dauda Walaée Isai boito ngotaalio lo tamoó sanangi hilaa-U. Tiolo taa mamohutu u otohilaa-U.' **23** Lonto wali mola lei Dauda boitolo Allahu Taaála lopohetu ode Bangusa lo Isirailu ngotaalio Olongia Tamoo-poáahua, debo odelo uma pilodanti-Lio mai. Wau ti Isa boitolo Olongia Tamoo-poáahua boito. **24** Tou ti Isa diipo lolumula loponaó tuugasi-Lio, tei Yahya malo pongiibode ode tau-tauwalo Isirailu alihu timongolio molilihi monto dusa limongolio wau meilihi. **25** Wau tou mamembideó mopulito kalajaalio, tei Yahya loloiya ode tau-tauwalo, 'Tatoonu watia botie moduduá huhama limongoli? Watia diila taa u heimaa limongoli. Poótoloma maó, Tau boito mamei dungga mai mobuulota wolaatia; u monguádeó tali lo sapatu-Lio olo watia diila

paatuti.' **26** Mongo wutato wali mai lei Abraham, wau ngoáamila Mongo wutato tawewolio tewe tamo dungohe to Allahu Taáala! Allahu Taáala malolao mai ode olanto habari u mopoáahu boito; **27** Sababu tahi biluloáwa to Yerusalemu wau mongo tauwa limongolio diila mongalati deu Tiolo tamoo-poáhua boito. Timongolio diila mongalati pongaajali lomongo nabi u hepo bacaalio timiidu Saabati, tilinggula timongolio malo hukuumani li Isa. Bo tumbaó wolo helohutu u odito boito timongolio maloó sababu deu wolo upilo nubuwati lomongo nabi boito lotoduo mai. **28** Eleponu timongolio diila loódungga u hitua-tuawua olo to o-Lio upaatuti pohukuu-maniyalo o-Lio lo hukuumani mate, bo timongolio lohile maó olei Pilatus alihu Tio pateelo mate-mateelo maó. **29** Wau lapataó timongolio yilapato loponaó ngoáamilalo u malei tuladu todelomo Kitabi pasali o-Lio, timongolio lopo tuhutai milate-Lio lonto ayu salipu, tulusi lopobalata o-Lio todelomo kuubulu. **30** Bo Allahu Taáala luli lopo tumulai o-Lio lonto opopate. **31** Lapataó oduduu-laheelio mola hiheelio Tio helonaó mai lopobilohe batanga totau-tauwalo talonaó mai wo-Lio lonto Galilea ode Yerusalemu. Timongolio boitolo tamasaatia lowali mongo sakusii-Lio ode bangusa lo Isirailu. **32** Oditolio, masaatia botie ami mopo tunggulai Habari Mopiohe boito olemu: Wolo u mapilo dantia lo Allahu Taáala odeli nene moyaanto, **33** uito mapilohutu-Lio olanto lou luli lopo tumulai li Isa lonto opopate. Sababu todelomo Jaburu oluolio woluo tulatulade odie, 'Yióolo Walauu-U, todulahee botie Wau malowali ti Paapa-Mu.' **34** Allahu Taáala maluli lopo tumulai o-Lio lonto opopate. Botia Tio diilalo tamoolasa opopate todelomo kuubulu. Pasali losuáli boito Allahu Taáala lotahuda, 'Wau mamongohi mai Ole-Mu danti mantali u tantu maéelalo, uma pilodanti-U odelei Dauda.' **35** Odito olo todelomo ayati wewo loi-loiya, 'Yió diila tamopoluli Wato-Mu taa tatapu wau molotolo hilao boito mohutodu todelomo kuubulu.' **36** Tei Dauda mailate wau yilobungio olo peé-peéenta wolinenemoyaalio, lapataó tio lohutu maó wolo u pileihutu lo Allahu Taáala olio. Milate lei Dauda olo malo aantulu ngoáamilalo. **37** Boti Isa, taluli pilopo tumulai lo Allahu Taáala lonto opopate, ti Isa boito diila loántulu sama-samaata. **38** Sababu uito Mongo wutato, wajibulio otaawa maó limongoli deu motimbulude li Isa botieelo



habari pasali lou ponga-mbungualo dusa pilopo habari de olemu; wajibu otaawa maó limongoli deu timiidu taa palacaya o-Lio, lopato-Lio monto totoonulalo dusa udiila mowali lulutolo motimbulude to papaa-lentawalo Allahu Taaála upilopo tunggulai lei Musa. **40** Uito sababuulio timongoli musi mopoo tuoto mopio-piohulo maó, alihu diila bolo motoduo mai ode limongoli wolo uiloiya lomongo nabi odie mola, **41** 'Poótuota maó tióotutua, wuu timongoli tau-tauwalo taóhila mohina! Timongoli mamó linggolabe, tulusi mate! Sababu tojamani botie Wau donggo hemohutu mai hitua-tuawua u timongoli lohihilao diila tamo malacaya maó, eleponu woluo tamo tombangai uito olimongoli.' " **42** Tou tei Paulus wolei Barnabas lololaa maó bele potabiaalo boito, tau-tauwalo tobele potabiaala boito lohile olimongolio muli mohualingai todulahu Saabati talutalu mai, u lebe motombango wumbutio mola pasali lo susuu-aliyaalo boito. **43** Lapatao tau-tauwala boito yilumualaó lonto bele potabiaala boito, tei Paulus wolei Barnabas tilunuhe lotaa dadaata taulo Yahudi wau bangusa wewo tamaa tilumuwoto agama lo Yahudi. Yi mongo rasulu boito lonaseehati maó olimongolio alihu timongolio tulusi motiwunela to odehu hilaó lo Allahu Taaála. **44** Todulahu Saabati wumbutio mola, ngopee ngoáamila tau tokota boito lonaó mai lodungohe tahuda lo Eeya. **45** Tou tau-tauwalo Yahudi loóonto taa dadaata boito, timongolio lohiihia daá. Timongolio malohina olei Paulus wau helo tehengi ngoáamila uiloiyaalio. **46** Tumbaó bo lebe buheli tei Paulus wolei Barnabas helo bisala lou juujulu. Timongolio loloiya, "Tahuda lo Allahu Taaála memangi wajibu potunggulopo ode limongoli. Bo sababu timongoli diila mohuto mololimo uito, timongoli malolantu lohihilao deu timongoli diila paatuti mololimo tutumulo utuutu wau ohiheo-hiheolo maó. Wau botia ami mamololaa maó olimongoli wau monaó ode bangusa wewo. **47** Sababu utieelo palenta mai lo Eeya olami; Eeya lotahuda, 'Wau malolantu mai olimongoli lowali tinela tuwau ode tau-tauwalo bangusa wewo tadiila bangusa lo Yahudi, alihu timongoli mopotoduo mai osalaamati ode ngoilanggubu dunia.' " **48** Towakutu tau-tauwalo bangusa wewo tadiila Yahudi loódungohe uito, timongolio leengahe daá, lapatao helomuji-muji tahuda lo Eeya. Wau tau-tauwalo tamaa tilantu mai lo Allahu Taaála u moótapu tutumula utuutu

wau ohiheo-hiheolo maó, tau-tauwala boito palacaya. **49** Tahuda lo Eeya olo malo loladulo mola ode utoonulalo maó to ngoilanggubu madala boito. **50** Bo taduduulaá lokota boito wau mongobua lonto kaumu lotau-tauwalo talailaió tamoohe to Allahu Taáala, mapilopatu lotau-tauwalo Yahudi. Timongolio helo potoodei polomuusua tolei Paulus wolei Barnabas, wau lopolahi olimongolio duulota lonto madala boito. **51** Yi mongo rasulu boito malo polotaaa peahuó to oáati mongolio totalu lotaa dadaata boito odelo poéela, lapataó malonaó ode Ikonium. **52** Tahiduduá to Antiokhia leengahe daá wau kiluwaasa mai lo Rohullah.

**14:1** Tei Paulus wolei Barnabas loótodo mai suáli u tutuuwauwa to Ikonium. Timongolio lonaó mota olo ode bele potabiaalo tauulo Yahudi wau helo bisala teto odito rupalio tilunggula ngohuntua tauulo Yahudi wau taa diila Yahudi lowali palacaya li Isa. **2** Bo tau-tauwalo Yahudi tadiila mohuto palacaya, helo popatu totau-tauwalo tadiila Yahudi, tilunggula timongolio malo lonuó totau-tauwalo tapalacaya li Isa. **3** Sababu uito tei Paulus wolei Barnabas lotibiluloá lohiheo teto. Wau wolo buheli timongolio helo bisala pasali ponu lo Eeya. Yi Eeya olo lopobukuti mai deu habari limongolio pasali loponu-Lio boito otutu; Tio lohudu mai olimongoli okawasa u mohutu totoonulalo u moólinggolabe wau susuu-aliyaalo upolu-polutuó. **4** Bo ulipu lokota boito malo hulinggila ngota timongota; woluo talo tiwambaó wolo tauulo Yahudi wau woluo talo tiwambaó wolo mongo rasulu boito. **5** Lapataó tau-tauwalo Yahudi wolo mongo tauwalio peé-peéenta wolo tadiila Yahudi malo heehea lopusikisa wau lolembai mongo rasulu boito wolo botu. **6** Bo mongo rasulu boito malo ngalati lo owowoluwoa boito, lapataó lolahi mola ode Listra wau Derbe, deúito-yito kokoo-tawaalo to Likaonia, wau ode madala topalitio. **7** Mola teto timongolio luli lopohabari Habari Mopiohe boito. **8** To Listra woluo talolai ngota u oáatio didu mowali monaó anggadu pilotutulio mai, tilunggula tio diila peéenta maó loówali lonaó, sababu oáatio molulupuhe daá. **9** Tau boito hulohuloáa mola teto modungohe olei Paulus hemobisala. Tei Paulus loóonto deu tau boito palacaya wau sababu uito tio lowali piloó luliilio. Yi tei Paulus lomiloheó olio, **10** wau wolo suala daá tei Paulus

lolojiya maó, "Tihuloolo mola motulidu!" Tau boito tilumayango tilimihulo tulusi lonaó. **11** Tou taa ngohuntua boito loóonto maó wolo u pilohutu lei Paulus, timongolio malo nguatió todelomo bahasa Likaonia, "Dedeewaalo malo tuhutai ode dunia wolo batanga lomanusia." **12** Lapataó tei Barnabas ilunte limongolio Jeus, wau tei Paulus ilunte limongolio Hermes, sababu tio-tioolo tahelo bisala. **13** Ti Iimamu Dewa Jeus, u kuiliilio woluo totalu lokota, lonaó mai lodelo sasaa-piyaalo ulai wau bubuu-ngawaalo ode huhebu hulubangi lokota. Tio motohilaa moduduá wolo taa dadaata boito u mopodewo bake ode mongo rasulu boito. **14** Tou tei Barnabas wolei Paulus loódungohe wolo utohilaa lotaa dadaata boito, timongolio malongai-ngaidinga boó limongolio sambela hiteteá ode huungo lotaa dadaata boito, lapataó longuatió, **15** "Wuu, yilongola timongoli helohutu utie? Ami botie manusia olo debo odelo Wutato! Ami meeteea mai mopohabari Habari Mopiohe ode limongoli alihu timongoli mololaa maó susuu-aliyaalo udiila ohuna botie wau monaó mai ode Allahu Taaala tatumu-tumulo, talo powali hulungo wau dunia wau deheto boli ngoáamila uwoluo todelomio. **16** Tomaasa uilalu mola Allahu Taaala helo poluli babaa-ngusawalo hitumula loduduá utohilaa limongolio ngota-ngota. **17** Bo diila ilolipata-Lio longohi mai bubuu-kutiyaalo pasali lobatanga-Lio, deuító-yito lou lohutu umopiohu. Tio lopo tuhutai didi olemu lonto hulungo wau tilapulo huta to sembolio. Tio longohi mai uáalo olemu wau lopsanangi hilaamu." **18** Bo penu boli wolo tataa-heyaaalo boito donggo mototola olo ode mongo rasulu boito molanggu totau-tauwala boito mopodewo bake ode limongolio. **19** Dengolo lota taulo Yahudi talonaó mai ode Listra lonto Antiokhia to Pisidia wau lonto Ikonium helo heingo taa dadaata boito lotiwambaó ode limongolio. Timongolio lolembai olei Paulus wolo botu, lapataó lodedeá olio ode bulemengo kota. To lantobi mongolio tio mailate, **20** bo tou tau-tauwalo tapalacaya teto tilimihulaó topalitio, tio lobongu mola wau luli tilumuwoto mota ode kota. Loombulio mola tio lomonggato ode Derbe peé-peéenta wolei Barnabas. **21** To Derbe, tei Paulus wolei Barnabas helo pohabari Habari Mopiohe boito wau ngohuntua talowali palacaya li Isa. Lapataó uito timongolio luli lohualinga ode Listra, tulusi ode Ikonium, tulusi ode Antiokhia to Pisidia.

**22** To kokoo-tawaalo boito timongolio helo poolotolo hilaa lo tahiduduá li Isa wau helo nasehati to tahiduduá boito alihu debo palacaya li Isa. "Ito wajibu meimulopo modutolo dadaata deuyito ito mamoo' toduo mai usanangi tutu to Dunia Bohu lo Allahu Taáala," odieelo mola mongo rasulu boito helo ngaajali to tahiduduá li Isa to kokoo-tawaalo boito. **23** Wau totimiidu jamaá, tei Paulus wolei Barnabas helomuduó mongo tauwa ode jajaa-maáalo boito. Lapataó wolo dua' wau puasa, timongolio helohudu mola mongo tauwa boito ode Eeya tahe palacayawa limongolio boito. **24** Lapataó uito tei Paulus wolei Barnabas lopo tolonga mola lononaó limongolio lolibaya tomadala lo Pisidia wau demola Pampilia. **25** Wau lapataó timongolio helo pohabari tahuda lo Allahu Taáala to Perga, timongolio malonaó ode Atalia. **26** Lonteto timongolio luli lobite ode Antiokhia. Ui-uitolo kota tambati u muloololio mai timongolio yiludulio ode odehu hilaa lo Allahu Taáala, alihu timongolio mohutu maó kalaja u botia mapiloó lapato limongolio. **27** Tou' leidungga mola ode Antiokhia, timongolio malongambu mai tau-tauwala lonto jamaá boito, tulusi lohungguli maó olimongolio wolo u mapilohutu lo Allahu Taáala lotimbuludei olimongolio. Timongolio lohungguli maó olo pasali woloolo mola Allahu Taáala malomuó dalalo alihu tau-tauwalo tadiila Yahudi palacaya li Isa. **28** Tokota boito tei Paulus wolei Barnabas lotibiluloá lohiheo wolo tau-tauwalo tapalacaya.

**15:1** Dengolo lota talonto Yudea lonaó mai ode Antiokhia wau helo ngaajali tau-tauwalo tapalacaya to Antiokhia boito deu' wonu timongolio diila tunaalo moduduá butoée Musa, timongolio diila mowali moaahu. **2** Tei Paulus wolei Barnabas helo tehengi daá huhama lotau-tauwala boito. Pulitio tilantulio maó alihu tei Paulus wolei Barnabas wolo dengolo lota wewolio lonto Antiokhia lonaó ode Yerusalemu mola mobisala suáli boito wolo mongo rasulu wau mongo tauwa mola teto. **3** Jamaá to Antiokhia lodepita olimongolio demota bulemengo kota, lapataó timongolio lonaó loli Penesia wau Samaria. Mola teto timongolio lohungguli maó woloolo mola tau-tauwalo tadiila Yahudi malohudu batanga limongolio ode Allahu Taáala. Habari boito helo eengahe daá totau-tauwalo tapalacaya mota teto.

**4** Tou timongolio leidungga mola ode Yerusalemu, timongolio tilolimolio lou mopiohe lojamaa, wau lomongo rasulu wolo mongo tauwa. Tulusi timongolio lohungguli maó ode tau-tauwala boito pasali lou ngoaamilalo uma pilohutu lo Allahu Taála lotimbuludei olimongolio. **5** Bo dengolo lota talonto kaumu lo Parisi tamaa pilalacaya, tilimihula mola wau loloiya, "Tau-tauwala bangusa wewo tamaa pilaracaya boito wajibu tunaalo wau wajibu olo moduduá butoée Musa." **6** Lapataó mongo rasulu wau mongo tauwa malo tiambu u lobiisalawa suáli boito. **7** Lohiheo daa timongolio tutuuloa lo pikiilangi. Pulitio tei Petrus matilimihulo wau loloiya, "Mongo wutato! Otaawa limongoli lohihilao deú dengolo wakutu mola uilalu maó Allahu Taála malo lulaotai olau to wolotamu u mopohabari Habari Mopiohe boito totau-tauwalo tadiila Yahudi, alihu timongolio olo modungohe wau momalacaya. **8** Wau Allahu Taála tamotota hilaa lomanusia malo pobilohei deú Tio lololimo olimongolio; Tio lopo bilohei suáli boito wolo longohi olimongolio Rohullah tutuwauwa odelo u mailohi-Lio mai olanto olo. **9** Allahu Taála diila lopo hihihede olanto woli mongolio. Allahu Taála lopo mantali hilaa limongolio sababu timongolio palacaya. **10** Naa, wolo sababuulio timongoli botia motohilaa moluwali to Allahu Taála wolo longohi tuwaulio uwajibu mobuheeto to tahiduduá botie, lebe-lebe pomaó tinenemoyaanto wau penu boli ito lohihilao diila mambo mohutu maó uito? **11** Boliio maó, ito palacaya wau ito piloáahu sababu lodehu hilaa li Isa Eeya; odito olo timongolio." **12** Yi malei poóoyolo mola ngoaamila tahiambua teto. Lapataó timongolio malo dungohe olei Barnabas wolei Paulus luli lohungguli maó ngoaamila u moolinggolabe wau susuu-aliyaalo upolu-polutuó u mapilohutu lo Allahu Taála lotimbuludei olimongolio towolota lotau-tauwalo bangusa wewo tadiila Yahudi. **13** Tou timongolio yilapato lobisala, tei Yakobus loloiya, "Mongo wutato! Nte dungohi mai watia. **14** Tei Simon boheli lotombangai woloolo mola Allahu Taála tou bohulio helo poótuoto totau-tauwalo tadiila Yahudi, wolo makusudu molulaotaó towolota limongolio tau-tauwalo wewo tamaa mowali umati-Lio. **15** Uito lotuuúde lou mapilo nubuwati mai lomongo nabi. Sababu woluo tulatuladu odie mola, **16** 'Lapataó uito Wau mamuli meidungga mai,' tahuda lo Eeya, 'Wau mamuli

momongu bele lei Dauda u malo lohuhu, wau mopoo pioheo tuodio, lapatao muli mopotihula mola; **17** alihu ngoamila taa donggo ilolabita boito mololohe Eeya, pee-peenta wolo ngoamila bangusa wewo tadiila Yahudi tamaa tiliangu-U u lowali miliki-U.' Odi-odieelo mola tahuda lo Eeya, **18** tamaa lopoootaa mai suali boito anggadu muloololio mai." **19** "Oditolio moduduohuhama lowatia," ualei Yakobus, "ito diila mowali moposuusa tau-tauwalo tadiila Yahudi boito tamohudu batanga ode Allahu Taala. **20** Bo ito musi moluladee mota tuladu ode limongolio wau monaseehati alihu timongolio diila molamela ualo najisi u mapilo dewo limongolio ode balaahala, meaambo molamela tapu lo binatangi uilate tilingolo, meaambo molamela duhu! Wau olo alihu timongolio mopo halahu batanga monto totoonulalo huhutu u huloto. **21** Sababu butoe Musa maa anggadu muloololio mai hepilo bacalio totimiidu dulahu Saabati to bebee-leyaalo potabiaalo, wau hepilo habari to ngoaamila kota." **22** Mongo rasulu wau mongo tauwa, pee-peenta wolo ngoamila pongawa lojama boito lolantu u molulaoto dengolo lota towolota limongolio tamaa utolialo ode Antiokhia pee-peenta wolei Paulus wau Barnabas. Yi timongolio malo lulaota olei Silas wolei Yudas tailunte olo Barsabas Taduulota botie yito tahimuloa lo ulipu towolota lotau-tauwalo tapalacaya to Yerusalemu. **23** Pee-peenta wolo mongo utolia boito timongolio lolao olo tuladu ngopita u tingohio odie mola, "Ode ngoamila mongo wutato taa asaliilio mai lonto babaa-ngusawalo wewo tadiila Yahudi, tahi biluloawa to Antiokhia, Siria wau Kilikia. Salamu monto olami, mongo rasulu wau mongo tauwa, deuto-yito mongo wutatumu. **24** Ildungohe lami woluo dengolo lota towolota lami tamaa lona mola ode limongoli wau lopo tolonggalo wau lopolingu olimongoli wolo popoongajaliyalo limongolio. Lebe-lebe poma ami diila lopoahu mola olimongolio lohutu suali boito. **25** Uitolo sababuulio ami malo dulohupa wau ngoamilalo akolo u mamu lulaota dengolo lota wau molao mola olimongolio ode olemu. Timongolio mamona pee-peenta wolo Wutato Barnabas wolei Paulus taotoliango lami. **26** Taduulota botie yito tamaa lohudu nyawa limongolio sababu Eeyanto Isa Almasi. **27** Oditolio, ami molao mola olei Yudas wolei Silas ode Mongo wutato. Timongoliolo



tamaa mopo tunggula lohihilao wolo loiya ode limongoli habari u tulatuladee todelomo tuladee botie olo. **28** Rohullah maakolo -- wau ami olo akoro -- alihu timongoli diila maó wohialio totoonulalo u wawaa-jibuwaalo ulebe mobuheeto wolo u wawaa-jibuwaalo u palaluwola botie wambaó: **29** diila maó polamela uáalo uma pilodewo ode balaahala; diila maó polamela duhu, diila maó polamela tapu lo binatangi uilate tilingoloó, wau pohalaheó monto huhuu-hutuwaalo u huloto. Wonu timongoli mopohalahu batanga monto susuu-aliyaala boito, timongoli malohutu u mopiohe. Bo oditopo, pohileaala duá moáahu!" **30** Lapataó losalaamua maó, timongolio tailaolio boito lomonggato ode Antiokhia. Mola teto timongolio loloduo ngoáamila pongawaa lo jamaá lotiambu lapataó lopobaca maó tuladee boito. **31** Tou popoo-ngawaalo jamaá boito lobaca tuladee boito, timongolio silanangi daá tuango tuladu boito uloo liyango hilaa limongolio. **32** Tei Yudas wolei Silas, deuito-yito nabi olo, lohiheo hipo bisalawa wolo mongo wutato tapalacaya to Antiokhia boito, helongohi maó sumangati wau obobuheli olimongolio. **33** Lapataó tei Yudas wolei Silas lotibiluloá mola teto dengolo mola hiheolio, tau-tauwalo tapalacaya to Antiokhia boito luli lolao olimongolio wau lopoáhu olimongolio lopo tunggulaó salamu ode tau-tauwala talolao mai olimongolio. **34** Bo tei Silas lolantu maó u debo lotibiluloá to Antiokhia. **35** Tei Paulus wolei Barnabas olo lotibiluloá dengolo mola hiheolio to Antiokhia. Mola teto timongolio helo ngaajali wau lopohabari tahuda lo Eeya peé-peéenta wolo taa dadaata wewolio. **36** Diila lohiheo lapatio maó tei Paulus loloiya odelei Barnabas, "Duloolo ito muli momilohe mongo wutato tapalacaya li Isa to ngoáamila kota toutoonu umapilo habariyanto maó tahuda lo Eeya; alihu ito moóonto woloolo mola owowoluwoa limongolio." **37** Tei Barnabas ohilaa modelo olei Yahya Markusi, **38** bo tei Paulus molaasa diila mopiohe modelo olei Markusi, tadiila mohuto mokalaja peé-peéenta woli mongolio wau malo lolaa maó olimongolio to Pampilia. **39** Yi tei Paulus wolei Barnabas malo hahaamawa daá tilinggula pulitio timongolio lobuuála: tei Barnabas malohama olei Markusi wau lobite wolio ode Siprus. **40** Tei Paulus lolulaoto olei Silas tulusi lomonggato wolio lapatio maó mongo wutato tato Antiokhia boito lohudu

olimongolio ode odehu hilaa lo Eeya. **41** Timongolio olo lomalita Siria wau Kilikia; mola teto timongolio helo poolotolo hilaa lo jajaa-maáalo.

**16:1** Tei Paulus lopo tolonga mola lononaólio ode Derbe, lapataó ode Listra. Mota teto woluo talolai ngota, muri li Isa tanggulio Timotius. Tiilolio Yahudi ngota, tamalo malacaya li Isa; bo tiyamolio taulo Yunani. **2** Towolota lotau-tauwalo tapalacaya tahi biluloáwa to Listra wau Ikonium, tei Timotius otaawa lotaa dadaata odelo taa mopiohe. **3** Tei Paulus motohilaa alihu tei Timotius moduduá wolio; sababu uito tio loluuna olei Timotius. Tio lohutu uito, sababu tau-tauwalo Yahudi to madala boito ngoáamila motota deú tiyamo lei Timotius ngotaalio lo Yunani. **4** Totimiidu kota unilaó limongolio, timongolio helo potunggulaó ode tau-tauwalo tapalacaya to pupuu-tusaniyalo u matilantu lomongo rasulu wau mongo tauwa to Yerusalemu. Timongolio helo naseehati tomongo wutato tamalo malacaya boito alihu moduduá wuwuu-uduwaalo boito. **5** Yi jajaa-maáalo boito iloduhenga mola lotolo iimanilio, wau timiidu dulahu heilo duhenga mola jumulaalio. **6** Rohullah diila longohi olei Paulus wolei Silas mopo loladu tahuda lo Allahu Taaala to polopinsi lo Asia. Oditolio nonaó limongolio pilopo tolonga mola limongolio ode madala lo Prigia wau Galatia. **7** Tou leidungga mola, ode sipatana lo Misia, timongolio mohimontala tumuwoto ode polopinsi lo Bitinia, bo Rohu li Isa lodini olimongolio odito mola. **8** Oditolio timongolio lolaapata to Misia wau tulusi ode Troas. **9** Huilio maó, to Troas, tei Paulus loóonto tuwaulio lobibilohu. Todelomo bibilohio boito tio loóonto taulo Makedonia ngota tihutihula totalulio sambela hemohile lou tióotutua alihu tio monaó ode Makedonia mola motulungi olimongolio. **10** Lapataó tei Paulus loóoduo mai bibilohe boito, ami lato lotidapa-dapato u lonaó mola ode Makedonia. Sababu wolo yakini ami lolantu maó deú Allahu Taaala malo poáhu olami mopohabari Habari Mopiohe boito ode tau-tauwala mola teto. **11** Ami lololaa maó Troas wau lobite tulusi ode Samotrake, wau loombulio mola ode Neapolis. **12** Lonteeto ami ode Pilipi, kota tuwau tobohulo madala Makedonia. Pilipi yito kiluwaasa bele biluloá saaha li olongia lo Roma. Mola teto ami lotibiluloá dengolo hui mola. **13** Todulahu Saabati ami

lonaó mota ode biihu dutula to bulemengo huhebu hulubangi lokota, sababu to pongolaasa lami teto woluo tambati potabiaalo duólo taulo Yahudi. Lapataó ami malo tihuloó wau lobibii-salawa wolo mongobua tahi ambua totambati boito. **14** Ngotaalio limongolio yito tamoo-dahangia kaingi lailoumu, tailunte Lidia wau asaliilio mai lonto Tiatira. Tio motoliángo to Allahu Taáala, yi Eeya malo ngoliyoó hilaalio alihu tio mololimo wolo upilo ngaajali lei Paulus olio. **15** Ti Lidia wau ngotuango belelio yiluhualio. Lapataó yilihualio tio loloduó olami. Ualio maó, "Wonu Mongo wutato molaasa u watia otu-otutuulo maó malo malacaya li Isa, toduwolo motihangata tobele lowatia." Tulusi tio helo huntula alihu ami moduduó hihiielio. **16** Todulahee tuwau touí ami donggo hinaówa ode tambati poduaáalo, ami lodunggaya wolo taabua ngota; tio wato. Taabua boito kiluwaasa lorohu u moleeto umoó laamali popoo-louútiyalo umamei dungga mai. Wolo topo laamalia paladu lotau, taabua boito hemoó paéeda daá odeli mongo tuanilio. **17** Taabua boito loduduá tulusi wambaó olei Paulus wau wolami sambela wuwa-wuwaatiá, "Tau-tauwala botie wato lo Allahu Taáala Taa Laba-labaalo molaio! Timongolio lonaó mai mopooótaa to Mongo wutato woloolo mola pohuliilio timongoli mowali moáahu!" **18** Dengolo hui mola hiheolio taabua boito mololaalaaita hemo nguatiá odito. Oditolio tei Paulus madiilalo loósabari, tilunggula tio maloili, tulusi lolojiya maó ode rohu boito, "To tangguli Isa Almasi wauí momalenta olemu polahilo monto taabua botie!" Touí boitolo olo rohu boito lololaa maó taabua boito. **19** Touí timongo tuanilio longalati maó deuí hiangi mongolio upooó tapulalo doi madidui, yi timongolio loheupa olei Paulus wolei Silas, wau duduulotalo diledei mongolio ode tanalapa mota pilopo taluolio wolo tawaajibu. **20** Timongolio lopotaluo maó olei Paulus wolei Silas ode tahidihima pantungo pamalenta lo Roma, lapataó lolojiya maó, "Tau-tauwala botie taulo Yahudi. Timongolio tahelo potoodei tolonggalo tokota botie. **21** Timongolio helo poáhu tau moponaó adati obobiasa u bubuu-lemenga wolo bubuu-toóonto, tau-tauwalo Roma. Ito diila mowali mololimo meaanto moduduó adati obobiasa boito!" **22** Taa dadaata olo loduduá loluhu olei Paulus wolei Silas; wau tahidihima pantungo lo pamalenta malo ngaidinga boó u hipakea to rasulu duulota boito lapataó

lopoáhu tau lomuboáa olimongolio duulota. **23** Lapataó biluboáa limongolio longongotolo maó, timongolio pilo tuwotio ode delomo tutupa. Tauíwa lotutupa ilahulalio lodaha olimongolio wolo lotoheetolo maó. **24** Sababu palenta boito, tauíwa lotutupa boito malo lahangi olimongolio tohuwali lotutupa umola todelomio daá, wau lomungu oáati mongolio tobaalaki. **25** Tanu to tomutaáa lou hui tei Paulus walei Silas heloduá wau lopolahu mola puji poloilaalo momuji ode Allahu Taáala. Tahi tahangia wewolio olo helo dungohe olimongolio hipolahua mola. **26** Debolo lotoduwolo mola liluhu ulaba-labaalo tutu, tilinggula pundasi lotutupa boito olo hilumeulo loóohuu. Ngoáamila huhebu lotutupa boito lohuó wau lalaa-nteyaalo u hipungua to ngoáamila tahi tahangia malo lopato. **27** Tauíwa lotutupa boito mailoohea lobongu. Tou tio loóonto ngoáamila huhebu lotutupa mahi huówa, tio malo mahuto wamilio wau mamó tipate wolo wamilio boito sababu to lantobio deú tahi tahangia boito matilumeteó ngoáamila. **28** Bo tei Paulus malo nguatiá loóohuu-huuulo mola, "Diila maó potipate! Amiaatia ngoáamila donggo maatia tea!" **29** Tauíwa lotutupa boito malohile tohe tulusi tilumeteá mota ode delomio, wau wolo hulu-huluhelio tio leidumulolo mola totalu lei Paulus wolei Silas. **30** Lapataó tio malodelo olimongolio ode bulemengio wau loloiya, "Mongo tuani, wolo umusi pohutuo lowatia alihu watia moáahu?" **31** Tei Paulus wolei Silas lolametaó, "Pomalacayalo li Isa Eeya! Yio mamóáahu -- yio wau ngoáamila taa tobelemu!" **32** Lapataó tei Paulus wolei Silas lotombangaó tahuda lo Eeya ode tauíwa lotutupa boito wau ode ngoáamila taa u woluo tobelelio. **33** To tomutaáa lou huilo boito, tauíwa lotutupa boito lodelo olimongolio tulusi lopoó belesi maó papaa-liyaalo limongolio. Yi tio wau ngoáamila taa tobelelio lato yilihualio. **34** Lapataó tio lodelo mota olei Paulus wolei Silas ode belelio wau lopohinta uáalo ode limongolio. Tio wau ngoáamila ngaalaálio sanangi daá sababu timongolio botia palacaya to Allahu Taáala. **35** Loombulio mola dimodupo, tahidihima pantungo pamalenta lo Roma malolao mota pulisi ode tutupa u lopo tunggulaó palenta alihu tei Paulus wolei Silas lopatolo. **36** Tauíwa lotutupa boito lopoótaa maó suáli boito odelei Paulus. Tio malo loiya, "Mongo tuani, tahidihima pantungo lo pamalenta malo malentai u

molopata tomongo tuani. Botia mongo tuani mamowali mohualingo. Hinta moáahu todalalo!" **37** Bo tei Paulus loloiya ode pulisi tahi otuugasia boito, "Ami walaó lipu lo Roma. Lou diilalo bilutoio ami mabiluboálio totalu lotaa dadaata wau tiluwotio ode tutupa. Wau botia timongolio meinaó olami wolo poó-poóoyo? Ami diila mohuto! Peinaó mai lohihilao tahidihima pantungo lo pamalenta boito odia mai u molopata olami." **38** Pulisi tahi otuugasia boito lopo duloheó suáli boito ode tahidihima pantungo pamalenta lo Roma. Tou tahidihima pantungo lo pamalenta boito loódungohe deú tei Paulus wolei Silas walaó lipu lo Roma, timongolio mailohe. **39** Lapataó timongolio malonaó mota lohile maáapu olei Paulus wolei Silas, lapataó lodepita olimongolio duulota yilumualaó lonto tutupa, wau lohile maó alihu timongolio monaóolo monto kota boito. **40** Tei Paulus wolei Silas lololaa maó tutupa boito tulusi lonaó ode bele li Lidia. Lapataó lodungaya wolo tau-tauwalo tapalacaya mola teto, wau helongohi maó sumangati olimongolio, tei Paulus wolei Silas lomonggato.

**17:1** Tei Paulus wolei Silas lotolonga mola lononaó limongolio loli Ampipolis wau Apolonia tulusi leidungga mola ode Tesalonika. Mola teto woluo bele potabiaalo tauulo Yahudi. **2** Yi tei Paulus olo lonaó mota ode bele potabiaalo boito -- debo odelo ubiasa hepo hutuolio wonu woluo bele potabiaalo ngowale tauulo Yahudi -- lapataó lotuuloá pikiilangi wolo tau-tauwalo teto pasali lo aáa-yatiyaalo lo Kitabi. Tio helohutu uito poóotolu tutuuntunga mola timiidu Saabati. **3** Lotimbulude to aáa-yatiyaalo lo Kitabi boito tio helo poópatataó wau lopobukuti deú Olongia Tamoo-poáahua tapilo danti lo Allahu Taáala palalu modutolo wau muli tumumulai monto opopate. "Ti Isa tahe pilohabari lowatia olimongoli boito, maa Tiolo Olongia Tamoo-poáahua tapilo danti-Lio," ualei Paulus. **4** Dengolo lota malowali palacaya tulusi loduduá olei Paulus wolei Silas; odito olo ngojumulaa daá tau-tauwalo Yunani tamoohe to Allahu Taáala, wau dadaata poli mongobua tahimuloa lo ulipu. **5** Bo tau-tauwalo Yahudi lohiihia. Timongolio malo tiangai tau-tauwalo tadiila tantu tambati poti biluloálio wau kalajaalio to dadaa-lalaalo wau lopo tihulaó woomboa tamoo-tolonggalo. Lapataó timongolio helopo

tolonggalo ngoilanggubu kota boito wau maloluhu bele ngotaalio tapalacaya tailunte Yason u mololohe olei Paulus wolei Silas, sababu timongolio ohilaa modelo olei Paulus wolei Silas ode bulemengio potaluolio wolo taa dadaata. **6** Bo tou timongolio diila loodungga olei Paulus wolei Silas, yi timongolio malo dedea olei Yason wau dengolo lota tapalacaya wewolio ode talu lo tahidihima pantungo taokawasa tokota boito. Timongolio malonguatiá, "Tau-tauwala botie helohutu tolonggalo tou toonulalo maó! Botia kotaanto olo manilaó mai limongolio, **7** wau tei Yason malo lolimo olimongolio tobelelio. Timongolio ngoáamila malo lambanga totoonulalo putusani li Kaisari lo Roma, sababu timongolio hipoloiyawa deu donggo woluo poli olongia wewo tailunte Isa." **8** Wolo tataa-heyaalo boito timongolio heloo buluhuta totaa dadaata wau tahidihima kawasa tokota boito. **9** Lapatao tahidihima kawasa boito malo poahu olei Yason wau tau-tauwalo tapalacaya wewolio boito helo mayali doi pongaku. De lapatao uito bolo timongolio yilopatio. **10** Tou hui boito tau-tauwalo tapalacaya tokota boito leinao olei Paulus wolei Silas ode Berea. Leidungga mota odito tei Paulus wolei Silas lonaó ode bele potabiaalo Yahudi. **11** Tau-tauwalo to Berea lebe lohuo hilaa limongolio wolo tau-tauwalo to Tesalonika. Wolo sanangi lohilao timongolio helo dungohe habari pasali li Isa, wau timiidu dulahu timongolio hemotulete Kitabi alihu motota maó wolo u hepo ngaajali lei Paulus boito otutu. **12** Dadaata towolota limongolio palacaya li Isa, wau diila bo ngoidi tau-tauwalo Yunani tahimuloa lo ulipu, tapalacaya; mopio mongobua meaalo mongo lolai. **13** Tou tau-tauwalo Yahudi to Tesalonika loodungohe deu tei Paulus helo pohabari olo tahuda lo Allahu Taála to Berea, timongolio olo lonaó mai ode Berea wau helo popatu wau helohutu maó totau-tauwala teto lowali balisa. **14** Ali-alihu mongo wutato to Berea boito malo depita olei Paulus ode pentadu, hiambola tei Silas wolei Timotius debo bilubiluloá tokota boito. **15** Lapatao lodepita olei Paulus demola Atena, mongo wutato boito luli lohualingai ode Berea wolo lodelo mai tahuli lonto olei Paulus alihu tei Silas wolei Timotius huáa mohunuhe mola olio. **16** Tou tei Paulus donggo hemohima olei Silas wolei Timotius to Atena, hilaalio siluukali loonto maó kota boito polupolu lo bubuu-iyalo.



**17** Masababu uito tobele potabiaalo, tei Paulus lotuuloá pikiilangi wolo tau-tauwalo Yahudi wau tau-tauwala wewolio tahi poluboa Allahu Taáala mota teto. Odito olo to papaa-taliyaalo ngohui-ngohui tio hemo tuuloá pikiilangi wolo timiidu taa woluo teto. **18** Guguu-ruwaalo alilani Epikuros wau alilani Stoa helo susuuália olo wolio. Dengolo lota limongolio hipoloiyawa, "Wolo otaawa lotau botie? Pongototalio bo ngoidi, bo tio dadaata bisalaalio!" Dengolo lota tawewolio hipoloiyawa, "Oontonga maó tio hemo pohabari pasali lo dedeewaalo bangusa wewo." Timongolio loloiya odito, sababu tei Paulus helo bisala pasali li Isa wau pasali loui muli tumumulai monto opopate. **19** Tulusi timongolio malodelo olei Paulus ode dudungaya mola tohuludu Areopagus. Mola teto timongolio loloiya maó olio, "Otohilaa lami modungohe pongaajali bohu u hepo habariyomu boito. **20** Sababu yio heloóowoli susuu-aliyaalo umoó linggolabu tobulonga lami. Masababu uito ohilaa otaawa maó lami boliilio." ( **21** Sababu ngoáamila taulo Atena wau tahideelia tahi biluloáwa teto ohilaa daá mopoó pulita waktu uperei limongolio bo modungohe wau mobisala pasali lo susuu-aliyaalo u bohu.) **22** Toui tei Paulus tilimihulaó totalu lo tahiambua to Areopagus boito, tei Paulus loloiya maó, "Wuu tau-tauwalo Atena! To pomilohu lowatia deui todelomo ngoáamila suáli timongoli tutuulio tutu o agama. **23** Sababu toui watia lolontale mota topalito kotamu wau helo poótuoto tataa-mbatiyalo potabiaamu, watia loóonto olo tambati tuwau uhepo dewowalo bake; totambati boito tulatuladu, 'Duólo Allahu Taáala Taa Diila Otaawa.' Naa, Allahu Taáala tahe tuboo limongoli bo diila oonuhe limongoli boitolo, tahepo habariyoui mai olimongoli. **24** Allahu Taáala tamalo powali mai dunia botie wolo totoonulalo tuangio, Tiolo Eeya lohulungo wau dunia. Tio diila bilu-biluloá todelomo bebee-leyaalo lobui u pilohutu lomanusia. **25** Tio olo diila palalu bantua lomanusia, sababu maa Tiolo talongohi mai tutumulo wau napasi wau totoonulalo u hitua-tuawua ode manusia. **26** Lonto ngotaalio lomanusia pilohutu-Lio mai ngoáamila bangusa wau lopoáhu olimongolio lotibiluloá to ngoilanggubu dunia. Tiolo olo talolantu tumulalo mai bohulio, omolua wau toutoonu timongolio mowali tumumulo. **27** Allahu Taáala lohutu mai uito alihu timongolio mololohe o-Lio. Pohileaala dua timongolio modungaya

wo-Lio tou timongolio donggo hemo lolohe o-Lio. Bo tutuulio tutu Allahu Taála diila molamingo monto olanto ngota-ngota. **28** Debo odelo u heloiya lotau, 'Ito hitumula wau hióoliyoá wau woluo todunia botie sababu okokawasa-Lio!' Tutuuwauwa olo lou heloiya lo dengolo lota tamoo-sairia limongoli. Timongolio loloiya, 'Ito ngoámila yito mongo wala-Io.' **29** Naa, sababu ito yito mongo walaó Allahu Taála, diila mowali ito monganggapu Allahu Taála yito tutuuwauwa debo odelo bui upilohutu monto hulawa meaalo talaá meaalo botu upilohutu moduduá pongotota lomanusia. **30** Wakutu ohulodunto boito maa ilolipata lo Allahu Taála, bo botia Tio lomalentai ngoámila tau to ngoilanggubu dunia molilihu monto duduu-sawaalo limongolio. **31** Sababu Tio malolantu mai wakutu tuwau u momutoó ngoilanggubu dunia botie wolo aadili. Tuugasi boito mapohutuo lo ngotaalio tamaa tilulaoto Allahu Taála u mohutu maó suáli boito. Wau alihu ngoámila tau yakini losuáli boito, Allahu Taála maluli lopo tumulai tau boito lonto opopate!" **32** Tou tau-tauwala boito loódungohe pasali lou muli tumumulai tou mailate maó, woluo towolota limongolio tahe lopoiiii maó olei Paulus. Woluo olo talo loiya, "Ami ohilaa modungohe Wutato muli mobisala mai pasali losuáli botie." **33** Lapataó tei Paulus malo lolaa maó dudunggaya boito. **34** Bo woluo towolota limongolio talo tiwambaó odelei Paulus wau palacaya li Isa, to wolotalio: tei Dionisius pongawaa majalisi lo Areopagus, wau taabua ngota tailunte Damaris, wau dengolo lota tawewolio olo.

**18:1** Lapataó uito tei Paulus lololaa maó Atena wau lonaó ode Korintus. **2** Mota teto tio lodunggaya wolo taulo Yahudi ngota tailunte Akwila, asaliilio mai lonto lipu lo Pontus. Tei Akwila boheli leidungga mai lonto Italia wolo dilelio ti Priskila. Timongolio lonaó mai ode Korintus sababu ti Kaisari Klaudius malo poáhu ngoámila taulo Yahudi lumualo lonto Roma. Tei Paulus lonaó mota lobiilohe woli mongolio duulota, **3** lapataó lotibiluloá mota teto woli mongolio wau helo kalaja peé-peéenta woli mongolio, sababu mato lopopeehu limongolio tutuuwauwa wolei Paulus, deuuto-yito mohutu kema. **4** Bo totimiiidu dulahu Saabati, tei Paulus hemonaó mota hemo bibiisalawa tobele potabiaalo u mohutu tau-tauwalo

Yahudi meaalo tau-tauwalo Yunani, palacaya li Isa. **5** Toui tei Silas wolei Timotius leidungga mai lonto Makedonia, tei Paulus lopohuna maó ngoáamila tembolio helo pololadu habari lonto Allahu Taaála ode tau-tauwalo Yahudi deú ti Isaalo boito Olongia Tamoo-poáahua tapilo danti mai lo Allahu Taaála. **6** Bo sababu tau-tauwala tulusi wambaó hemo tehengi wau hemo henteá olio, yi tei Paulus lopongeeé peahuó lonto boolio odelo tuoto u mopoéela totala limongolio. Tio loloiya, "Wonu timongoli topotala, tingga totala limongoli lohihilao! Diila otaawau! Tumulalo mai botia wau mamonaó ode tau-tauwalo tadiila Yahudi." **7** Lapataó tei Paulus malo lolaa maó olimongolio wau lonaó mota lotibiluloá tobele u titiilia wolo bele potabiaala boito. Bele boito bele longotaalio tadiila Yahudi, bo tio hemolubo Allahu Taaála. Tanggulo tau boito tei Titus Yustus. **8** Bo tei Krispus, tauwa lobebe potabiaala boito wolo ngoáamila mongo ilaatolio palacaya li Isa Eeya. Wau dadaata olo tau-tauwalo Korintus wewolio lodungohe habari upilo tunggulai lei Paulus, wau timongolio palacaya li Isa lapataó yiluhualio. **9** Toui huilio tuwau todelomo tuwaulio lobibilohé, Eeya lotahuda mai odelei Paulus, "Diila maó oohe! Pobisalaalo tulusi wau diila maó potipoooyo. **10** Sababu Wau peé-peéenta wolemu. Diaaluo penu boli ngotaa maó tamoóhutu mai u moleeto olemu, sababu ngohuntua taa tokota botie yito tautau-U." **11** Masababu uito tei Paulus malo tibiluloá to Korintus ngotaunu wau ngoputu hiheolio wau helo ngaajali tahuda lo Allahu Taaála toli mongolio. **12** Toui tei Galio lowali gubolonulu lo Akhaya, tau-tauwalo Yahudi lotituwau helo tehengi olei Paulus wau lodelo olio ode bubutoó. **13** Timongolio lopo dudulaó lo dudulohe botie, "Tau botie helo heinga taa dadaata alihu molubo Allahu Taaála wolo pohuli u bubuu-lemenga wolo butoée Musa!" **14** Oditotei Paulus mamó lametaó, tei Galio malo loiya ode tau-tauwalo Yahudi, "Wuu tau-tauwalo Yahudi! Wonu upilopo dulohei mai botie tuwaulio loui totala meaalo tuwaulio loui moleeto, memangi patutilio wau sabari modungoheó pilopo dulohumu mai botie. **15** Bo utie yito polohaamawa pasali lo tataa-heyaaalo wau tataang-gulalo boli bubuu-toóomu lohihilao! Oditolio timongoli tamusi mopoó lapataó. Wau okabalatani momutoó susuu-aliiyaalo u odie botie!" **16** Lapataó tei Galio lopolualao olimongolio ode

bulemengio. **17** Yi timongolio malo heupa olei Sostenes, tauwa lobele potabiaalo boito, wau lomate olio totalu lomeja bubutoo. Bo tei Galio diila lomaduli sama-samaata to suali boito. **18** Lapatao uito tei Paulus donggo lohiheo mola lotibiluloa to Korintus. Lapatao tio loloiya maó hinta moáahu mobuuála totau-tauwalo tapalacaya teto, tulusi malobite wolei Priskila woli Akwila ode Siria. To Kengkrea, tei Paulus longuluhu huwoio umaa hilulialio lowali hilumayaó sababu dantilio to Eeya. **19** Tou leidungga mola ode Epesus, tei Paulus lololaa maó olei Priskila woli Akwila, tulusi tilumuwoto ode bele potabiaalo wau helotuuloa pikiilangi wolo tau-tauwalo Yahudi mota teto. **20** Pihile limongolio alihu tio motibiluloa mohiheo woli mongolio, bo tio diila lohuto. **21** Penu boli odito, tou mamonggato, malo loiya tio, "Wonu Allahu Taála potala mopoluasi, watia muli mohualingai odia." Lapatao loloiya maó odito, tio lomonggato lonto Epesus. **22** Lapatao tio lotuhuta mola to Kaisarea, tio lonaó ode Yerusalemu mota longohi salamu tojamaa mota teto, lapatao tulusi ode Antiokhia. **23** Lapatao lotibiluloa teto dengolo mola hiheolio, tio luli lomonggata mola lomilohe madala lo Galatia wau Prigia u helo poolotolo iimani lotau-tauwalo tapalacaya. **24** Tou boito, malonaó mai ode Epesus Yahudi ngota tapilo tutulio to Aleksandria, tailunte Apolos. Tio motota mobisala wau mongalati daa pasali lotuango Kitabi, **25** wau mailaa-jaliilio u motota maó pongaajali tomimbihu li Isa. Yi wolo sumangati uwali-walihuhu tio helo ngaajali wolo moulintapo pasali li Isa, eleponu heli popolihu lei Yahya wambaó u otaawalio. **26** Wolo buheli tei Apolos malo lumula lobisala tobele potabiaalo wau tou tei Priskila woli Akwila lodungohe pongaa-jaliilio, timongolio malodelo olio ode bele. Mola teto timongolio lotombangaó olio wolo lebe tiluhata maó pasali patuju lo Allahu Taála u mopoáahu mai manusia motimbulude li Isa. **27** Lapatao tei Apolos omakusudu monaó mola ode Akhaya. Yi tau-tauwalo tapalacaya li Isa to Epesus malolao mola tuladee tomongo wutato tapalacaya to Akhaya alihu timongolio mahuto mololimo olei Apolos. Wau tou tei Apolos leidungga mola ode Akhaya, bubantulio malo ilaalo ilohuna daa ode tau-tauwala u sababu odehu hilaa lo Allahu Taála malo malacaya li Isa. **28** Sababu wolo otilihula daa tei Apolos loólaaheo

tau-tauwalo Yahudi todelomo bubuutola moduduó huhamaalio ngota-ngota. Wau tio helo pobukuti maó wolo aáa-yatiyaala lo Kitabi deu ti Isaalo Olongia Tamoo-poáahua tapilo danti mai.

**19:1** Toui tei Apolos donggo mola to Korintus, tei Paulus donggo hemo lontale kambungu tomadala boito lapataó leitungga mola ode Epesus. Mola teto tio lodunggayo wolo dengolo lota tamalo malacaya li Isa. **2** Tio lohintu maó olimongolio, "Wolo Mongo wutato botie malo lolimo Rohullah toui timongolio palacaya li Isa?" Timongolio lolametaó, "Diipo. Tumbaó diipo peéenta maó amiaatia loódungohe deu woluo Rohullah." **3** "Wonu odito, wolo polihu lotatoonu timongolio yilihualio?" yilintu maó lei Paulus. "Wolo polihu lei Yahya," tametaó limongolio. **4** Lapataó tei Paulus loloiya maó, "Tei Yahya helo polihu tau u mopoó patatai deu tau-tauwala boito malo lilihu lonto duduu-sawaalo limongolio. Bo sambela uito olo tei Yahya helo poótaa ode tau-tauwalo Isirailu deu timongolio musi palacaya to Taa mamei dungga mai lapataó tio, deúito-yito ti Isa." **5** Toui timongolio loódungohe uito, timongolio mailihualio to tangguli Isa Eeya. **6** Wau toui tei Paulus lopodutu uluulio toitaati mongolio, Rohullah longaawasa mai olimongolio, lapataó timongolio lolumulo lobisala todelomo babaa-hasawaalo umoó linggolabu wau helopo tunggulo habari lonto Allahu Taáala. **7** Jumulaa limongolio ngoáamila woluo tanu mopulaa duulota. **8** Tolo hula mola hiheolio tei Paulus tulusi helo bisala loui buheli ode tau-tauwala tobele potabiaalo wau helo susuu-alia woli mongolio u lopoyakini maó olimongolio pasali woloolo mola Allahu Taáala momalenta odelo Olongia. **9** Bo dengolo lota towolota lotau-tauwala boito baangiola wau diila mohuto palacaya. Totalu lo ngoáamila tahiambua teto hilantiá limongolio pongaajali pasali lanjana lo Allahu Taáala, mopoáahu manusia motimbulude li Isa. Masababu uito tei Paulus lololaa maó olimongolio, tulusi lonaó wolo tahiduduá li Isa ode huwali leidaá lokulia lei Tiranus. Mota teto ngohui-ngohui tio helo susuu-alia wolo tau-tauwalo. **10** Hepilo hutulio uito diila obuntoolio dulo taunu mola hiheolio tunggula ngoáamila tahi biluloáwa to polopinsi Asia, mopio taulo Yahudi meaambo taa bangusa wewo, ngoáamilalo helo dungohe tahuda lo Eeya. **11** Allahu

Taála helohutu mai totoonulalo moólingolabe upolu polutuó lotimbulude tolei Paulus. **12** Wonu leto meaanto kaini pobintolo wohuta u boheli peéenta pilomake lei Paulus deloolio ode tahi ngongota, ngongoti mongolio mooli, wau rohu lolati olo molahi monto olimongolio. **13** Woluo dengolo lota hulango lo Yahudi talonaó ode utoonulalo maó, helo polahi roroo-huwaalo umoleeta lonto tau-tauwalo. Mongo hulango boito helo himontala olo lomake tangguli Isa Eeya lopohinggi rohu lolati boito. Timongolio loloiya ode roroo-huwaala lolati boito, "To tangguli Isa tapilo habari mai lei Paulus boito, wau mopohinggi maó olimongoli!" **14** Woluo pitulota walaó mongo lolai longotaalio li iimamu tauwa, tailunte Sekewa, tahe lohutu maó suáli debo odelo uito. **15** Bo rohu lolati boito loloiya olimongolio, "Otaawau ti Isa wau olo tei Paulus otaawau, bo timongoli botie tatoonu?" **16** Tulusi tailo tuanga lolati boito tilumayango wau lodangapo olimongolio wolo palangi daá tilinggula timongolio tilumeteó lonto bele boito lou pipiilalia wau lou hilaalawa, sababu boó limongolio kilaidingio lonto wawaai mongolio. **17** Ngoáamila taulo Yahudi wau taa bangusa wewo tahi biluloáwa to Epesus loódungohe ulotoduo boito, lapataó timongolio mailoohe. Yi tangguli Isa Eeya malebe hepo pujiaalio. **18** Ngohuntua tamalowali palacaya li Isa, lonaó mai helongaku totalu lotaa dadaata totoonulalo huhutu limongolio tou yilalu maó. **19** Wau timongolio tabiaasa hemo ponaó lo ilimi mojinaka totau, malo himoa bubuu-kuwaalo limongolio wau pilobulio totalu lotaa dadaata. Halaga lo bubuu-kuwaalo boito wonu jumulaalo ngoáamilalo tanu limo lopulu lolihu doi talaá. **20** Odieelo mola wolo pohuli upolu-polutuó boito tahuda lo Eeya helebe lololadu lomola wau helebe lolotolaó heingio. **21** Lapataó popoo-loutiyalo boito, tei Paulus malolantu u monaó mola ode Makedonia wau Akhaya lapataó tulusi ode Yerusalemu. "Lapataó odito mola," ualei Paulus, "Watia musi monaó ode Roma." **22** Yi tio malolao duulota tamoohiyowa olio, deuító-yito tei Timotius wolei Erastus u lonaó mola ode Makedonia, sambela uito tio donggo loti biluloópo dengolo tembo mola hiheolio to polopinsi Asia. **23** Tanu tou boitolo lotoduo mai tolonggalo daá to Epesus sababu pongaajali pasali li Isa. **24** Sababu tokota boito woluo ngotaalio tamoomania talaá tailunte Demetrius, tahe mohutu u mohaamawa wolo



bele ode Dewi Artemis. Kelakela lotau boito heloo todoo tilapula uleidaa ode tahi pokalajaalio. **25** Masababu uito tio longambu mai tahi pokalajaalio peé-peéenta wolo tahi pokalajawa pani lotalaa wewolio, tulusi loloiya maó, "Mongo wutato! Otaawa lo Wutato deu ito hemoo todoo mai tilapulo monto kalaja botie! **26** Botia maa iloontonga lo Wutato wau lodungohe lohihilao wolo u hepilohutu lei Paulus boito. Tio loloiya deu dedeewaalo u pilohutu lomanusia sama-samaata diila dewa. Wau tio maloohutu totaa dadaata palacaya to pongaajalilio, wau diila bo wambaó tewe to Epesus, bo ngopee to ngoilanggubu madala lo Asia olo. **27** Topotalalio yito deu polokela-kelanto botie mamoo todoo mai tanggulo u moleeto. Wau diila bo uito wambaó, bo bele li Dewi Artemis olo maa anggapuolio diila ohuna wau odudaalio poduduu-taalio; lebe-lebe pomaó tio dewi u hepujaa lo ngoaamila tau to Asia wau ngoilanggubu dunia!" **28** Odito tau-tauwalo boito loodungohe uito malopatu hilaa limongolio, tulusi timongolio mahi wuwa-wuwaatia, "Pomaluu-tutuolo mola Artemis, dewi taulo Epesus!" **29** Yi tolonggalo boito lololadu lomola ode ngoilanggubu kota. Lapatao woomboa lo tahipo tolonggaloa boito malo heupa olei Gayus wolei Aristarkus, deuito-yito tau-tauwalo Makedonia tahe lohiyo olei Paulus todelomo nonaolio, lapatao lodedeá mola olimongolio ode tanalapa lokota boito. **30** Tei Paulus ohilaa tumuwoto modudua olimongolio, bo tau-tauwala tapalacaya li Isa mola teto lodini olio. **31** Dengolo lota taduduulaa lo polopinsi Asia boito olo, tasasaa-habatia wolei Paulus, malo poahu tau lopoootaa olei Paulus alihu tio diila mopobilohe batanga to tanalapa boito. **32** Tou boito tau-tauwalo tadonggo hiambua to tanalapa boito malowali ambulati daa. Woluo talo nguatia odie, woluo talo nguatia odito, sababu odaata limongolio diila motota wolo sababuulio timongolio helo ambua teto. **33** Ngotayadu lotau-tauwala boito hemo lantobu deu tei Aleksander tapilo timuatai leeto, sababu tiolo tahe yiluntulalio ode talu lotau-tauwalo Yahudi. Yi tei Aleksander malongohi mota isalati lo uluulio u leiwohi mai tembo mopoduulua batanga totalu lotau-tauwala boito. **34** Bo odito timongolio loonto deu tio taulo Yahudi, timongolio malo nguatio peentalo mola wolo daa-daalo maó, "Pomaluu-tutuolo mola Artemis, dewi taulo Epesus!" **35** Mapulitio dulutuli lokota

lowali lopo duóotaó taa dadaata boito. Tio loloiya maó, "Tuango lipu lo Epesus! Ngota-ngota motota deú Epesus wambaó kota u hemolaala bele li Dewi Artemis wau botu mantali umodehu mai monto hulungo. **36** Diaaluo penu boli ngota maó tamowali mobatata suáli boito. Sababu uito potipoóyolo mola wau diila maó pohutu u hitua-tuawua wolo majanunu. **37** Tau-tauwala botie, dilelo limongoli odia mai diila bo sababu timongolio malo lambata bele lodewa meaalo sababu timongolio malohina dewinto. **38** Wonu tei Demetrius wolo tahi pokalajaalio boito odudulohe tuwau to tahingota-ngotaawa, hulua maó timongolio modelo palakalalio boito ode bubutoó. Bubutoó huóhuó u mololimo olimongolio wau tahidihima pantungo lo pamalenta olo laito woluo. **39** Bo wonu donggo woluo poli hitua-tuawua wewolio u otohila limongoli, uito musi poolapatolo todelomo dudunggaya lotaa dadaata alihu saaha. **40** Sababu wolo u motoduo mai todulahee botie mowali mopo topotala olanto. Ito mowali potuludelio hemo potoodei polo malakala, sababu ito diila o alasani penu boli tuwau maó u mopobanali tolonggalo botie." **41** Lapataó loloiya u ngoáamilalo boito, tidulutuli lokota boito lopoáhu totaa dadaata boito lohualingo.

**20:1** Tou owowoluwoa to Epesus luli loduóoto mola, tei Paulus longambu mai jamaá wau helongohi sumangati olimongolio. Lapataó tio loloiya maó hinta moáahu mobuuála, tulusi tio lohumbuta mola nonaólio ode Makedonia. **2** Tio lonaó mola ode lilii-puwaalo Makedonia wau helo naseehati maó dadaata totau-tauwalo tapalacaya li Isa mola teto wau longohi sumangati olimongolio. Lapataó tio lonaó ode Yunani. **3** Tolo hula mola hiheolio tio mola teto. Lapataó tou tio donggo hemo podapato u mobite mola ode Siria, woluo mai habari deú tau-tauwalo Yahudi donggo hipo heeluma u momate olei Paulus mate-mateelo maó. Masababu uito tio lolantu maó u muli mohualinga moli Makedonia. **4** Tei Sopater walaée Pirus u asaliilio mai lonto Berea lonaó peé-peéenta wolio; odito olo tei Aristarkus wolei Sekundus taulo Tesalonika, wau tei Gayus taulo Derbe. Tei Timotius olo tei Tikhikus wolei Tropimus, tau-tauwala lonto polopinsi Asia. **5** Timongolio lotitimulo wolami lapataó mola lohima olami to Troas.

**6** Lapatao Rameyangi lo Roti Diila Oragi, ami malobite lololaa maó Pilipi. Limo hui mola lapatio maó ami luli lotiambu woli mongolio mola to Troas. Mola teto ami lotibiluloá ahadilio tuwau. **7** Tohuilo ahadi ami lotiambu u molamelo peé-peénta debo odelo tamohutato. Tei Paulus helo bibiisalawa wolo tau-tauwalo, sababu loombulio mola tio oniyati mamó monggato. Tunggula lo tomutaá lou hui tei Paulus helo bisala tulusi. **8** Tohuwali u belebelea toitaato, tambati upilo tiambua lami boito, otohe ngohuntua. **9** Tabohulotau ngota tailunte Eutikhus hulohuloáa to tutuloa. Sababu tei Paulus diila lopo huhe-huheli lobisala, tabohulotau boito malo diduto daá tunggula tio leituluhi to tutuloa boito, lapatao lodehu mola ode walungo lonto belebelea otolulio. Tou bilintaio maó limongolio, tio mailate. **10** Bo tei Paulus lolaahe mola ode walungo, lapatao lopo wombaheo batangalio odeitaato lo tabohulotau boito wau longooodeo. Tei Paulus loloiya maó, "Diila maó polawalo, tio donggo tumutumulo!" **11** Lapatao tei Paulus luli lobotula mola odeitaato, tulusi lolaya-layadeo roti wau lamelo peé-peénta. Lapatao lohiheo mola bibiisalawa wolo tau-tauwala tunggula dimodupo, tei Paulus lomonggato. **12** Tau-tauwala boito lodelo tabohulotau tatumu-tumulo boito luli lohualinga ode belelio. Timongolio lootoduo mai sanangi wau iloliyanga daá. **13** Ami lonaó mola ode kaapali lapatao lobite leimulo ode Asos u lolutulo olei Paulus ode kaapali mola teto. Tio malo ngaatulu odito sababu tio maodito mola moli dalalo tudulio. **14** Lapatao lodunggaya maó to Asos, tei Paulus huáa lotitaé tokaapali tulusi ami lobite mola ode Matilene. **15** Tou mola teto ami luli lobite poli, wau loombulio mola leidungga ode tambati u tataalua wolo Khios. Ngonulio mola ami leidungga to Samos wau ngohui lapatio maó to Miletus. **16** Tei Paulus malolantu udiila mohepita to Epesus, alihu diila mopoluhi lowakutu tomadala lo Asia. Hiambola wonu mowali otohilaalio ngointa mola meidungga ode Yerusalemu to Dulahu Buka Pantekosta. **17** Lonto Miletus tei Paulus lolao mola habari ode Epesus u lohile mongo tauwa lojamaa mola teto mai modunggaya wolio. **18** Tou timongolio leidungga mai, tei Paulus loloiya maó olimongolio, "Otaawa lo Mongo wutato deu woloolo mola watia tumutumulo ngotilonggadu botie towolota limongoli tumulalo mai tobohulo dulahu watia leidungga mai to Asia. **19**

Wolo dupadupapa lohilao wau wolo hehe-heheeta ponu dadaata, watia helo kalaja ode Eeya tohuungo polodutolo u helo toduo mai olaatia sababu lanjana u moleeto lotau-tauwalo Yahudi. **20** Otaawa lo Wutato deu watia diila mopomomu-momu helo poótaa mai olimongoli wolo u ohuna olimongoli. Watia helo ngaajali olimongoli totimiidu dudunggaya lo ulipu to bebee-leyaalo. **21** Mopio ode tau-tauwalo Yahudi meaalo ode tau-tauwala bangusa wewo watia laito hemopoéela alihu timongolio molilihu monto duduu-sawaalo limongolio wau monaó mai ode Allahu Taáala, wau palacaya li Isa Eeya. **22** Botia u modungoheó palenta lo Rohullah, watia monaó ode Yerusalemu. Wau diila otaawa lowatia wolo u mamotoduo mai olaatia mola teto. **23** Bo wambaó u otaawa lowatia deu to timiidu kota, Rohullah malo popintalo lopoótaa mai olaatia, deu watia matumuwoto ode tutupa wau mamó dutolo. **24** Bo watia diila pandungi wolo tutumulo watia botie, asali watia mowali mopoó lapato tuugasi upilo malacaya mai li Isa Eeya olaatia wau asali watia tatapu wau molotolo hilao tunggula mate u mopo loladu Habari Mopiohe boito pasali odehu hilaa lo Allahu Taáala. **25** Watia malo biilohe wolo Mongo wutato ngoáamilalo wau malo pohabari olo pasali loui woloolo mola Allahu Taáala momalenta odelo Olongia. Botia to pongolaasa lowatia diilalo modunggaya wolo Mongo wutato. **26** Masababu uito wolo pintalo loiya mai lowatia olimongoli todulahee botie deu wonu woluo towolota limongoli de mabinasa, uito diila totala lowatia. **27** Diila peéenta watia tilumeteó lololaa maó tuugasi lowatia u motombangai olimongoli ngoáamila lanjana lo Allahu Taáala. **28** Mamusi timongoli modaha batanga wau dahai maó olo ngoáamila jamaá u mailudu mai lo Rohullah olimongoli upei dahaa-Lio; sababu timongoli mapiludu-Io lowali tamoo-ngimatoa jamaá lo Allahu Taáala boito debo odelo diti hemodaha himbalio, sababu Allahu Taáala malo powali mai jamaá boito milikii-Lio lohihilao lotimbulude to ilopate lo Wala-Io lohihilao. **29** Toui tolaa maó lowatia, tantulo maó mamonaó mai sasaa-rigalaalo u mongantau tohuungi mongoli. Wau tau-tauwala tahedahaa limongoli boito mamowali mangusa lo sasaa-rigalaalo boito. **30** Tumbaó towolota lo Mongo wutato lohihilao olo malumunetai tau-tauwalo tamamo pohabari habari udiila otutu.

Timongolio mohutu u odito alihu tau-tauwala tamalo malacaya li Isa malapalolo wau moduduá olimongolio. **31** Sababu uito poódaha-dahaalo maó! Poótoloma deú tolo taunu mola hiheolio wolo ponu dadaata, hui wau dulahu watia diila peénta maó lohuheli helo ngaajali timiidu tau lonto olimongoli. **32** Botia mawuduo mai lowatia timongoli ode Allahu Taáala alihu Tio tamaa molaala olimongoli wau alihu timongoli motidihu tohabari odehu hilaa lo Allahu Taáala. Allahu Taáala okawasa u mopoo lotolai olimongoli wau mongohi olimongoli babaa-lakatiyalo umaa pilohetu-Lio ode ngoáamila umati-Lio. **33** Diipo peénta maó watia ilohilao todoi meaalo boó penu boli monto tahingota-ngotaawa. **34** Otaawa lo Wutato lohihilao, deú wolo lotolo lowatia lohihilao watia helo kalaja u lopoópolu upalaluo lowatia wau mongo sahabati laatia tahiduduá wolaatia. **35** Todelomo totoonulalo palakala watia malongohi mai obaaya olimongoli deú wolo mokalaja tióotutua debo odelo utie ito musi motulungi tau-tauwalo tadiila hilotola. Sababu ito musi moéela mola wolo u mapilo tahuda mai li Isa Eeya lohihilao, 'Lebe sanangi tutu mongohi wolo mololimo.' " **36** Tou tei Paulus lapato lobisala maó, tio maloti bongghuulo mola woli mongolio ngoáamila tulusi loduá. **37** Timongolio ngoáamila hilumoyongo sambela helongoode olei Paulus wau lolele maó hinta moáahu todalalo. **38** Timongolio siluukali daá tidiyolo maó tou tei Paulus loloiya deú timongolio diilalo moóontonga wolio. Tulusi timongolio malo depita olio demota kaapali.

**21:1** Ami malohintu lonaó wolo mongo tauwa lojamaá lonto Epesus boito, lapataó lololaa maó olimongolio. Tulusi ami lobite demola pulo Kos; wau loombulio mola ami leidungga topulo Rodos. Lonteeto ami lobite tulusi demola rabua lo Patara. **2** To Patara, ami loódungga kaapali u made Penesia. Yi ami malotitaé tokaapali boito, tulusi lomonggato **3** wau lobite tunggula ami loóonto pulo Siprus to ambahu olohi lami; bo ami lobite tulusi hitalua ode Siria. Ami malo tirabua to Tirus sababu mota teto kaapali utilaéa lami boito mamonggali detohio. **4** Totambati boito ami mota lobiilohe wolo tau-tauwala tapalacaya li Isa, lapataó lotibiluloá woli mongolio ahadilio tuwau hiheolio. To potuhata lo Rohullah timongolio

helo naseehati olei Paulus alihu tio diila monaó mola ode Yerusalemu. **5** Bo tou lopulito wakutuulio u ami motibiluloá teto, ami lololaa maó olimongolio wau lopo tolonga mola lononaó lami. Timongolio ngoáamilalo peé-peéenta wolo mongo walaio wau dilelio taabua lodepita olami demola bulemengo kota. Mola teto tobiihu pentadu, ami ngoáamila maloti bongghuú wau loduá. **6** Lapataó uito ami malo sasaalamua tulusi ami lotitaé tokaapali wau timongolio olo malo hualinga ode bele. **7** Ami lobite tulusi lonto Tirus demola Ptolemaisi. Mola teto ami mota lobiilohe wolo mongo wutato tapalacaya, mota longohi salamu olimongolio, tulusi lotibiluloá ngohui mola woli mongolio. **8** Lolombulio mola ami lomonggata poli, lapataó leidungga mota ode Kaisarea. Mota teto ami lonaó lonaó ode tamoo-nginjilia tailunte Pilipus, tulusi lotibiluloá to belelio. Tio yito tala ngota lo tapitulota tailo tulaota to Yerusalemu. **9** Wopatota walaio mongo dulahu mailohia lo Allahu Taáala u mambo mopohabari habari monto Allahu Taáala. **10** Tou mangolo wakutu mola hiheolio ami mola teto, malei dungga mai lonto Yudea nabi ngota tailunte Agabus. **11** Tio lonaó mai ode olami lapataó lohama bintolo wohuta lei Paulus. Wolo bintolo wohuta boito tio longawade oáatio wau uluúlio lohihilao lapataó loloiya maó, "Uti-utieelo upilo tahuda mai lo Rohullah: Taa ohuuwo lobintolo botie mapunguolio debo odelo utie to Yerusalemu lotau-tauwalo Yahudi, wau wuduolio ode tau-tauwala tadiila Yahudi." **12** Tou ami loódungohe uito, ami wau ngoáamila wutato tahi biluloáwa to Kaisarea boito lohile tióotutua olei Paulus alihu tio diila monaó mola ode Yerusalemu. **13** Bo tio lolametaó, "Wolo hunalio Wutato humoyongo debo odelo utie tilinggula moó aantulu hilaa lowatia? Watia madapa-dapato diila bo umola waúpolio teto, bo penu boli mateelo maó olo watia dapadapato sababu ti Isa Eeya." **14** Tei Paulus diila lohuto lodungohe olami, yi ami diilalo lodini olio. "Huliaalo maó kahandaki lo Eeya wambaó umotoduo mai," loiya maó lami. **15** Lapataó loti biluloááo teto dengolo wakutu mola hiheolio, ami malopo dapato babaa-langiyaalo lami, tulusi lomonggata mola ode Yerusalemu. **16** Dengolo lota wutato lonto Kaisarea lonaó olo peé-peéenta wolami mota lodepita olami ode bele lei Manason, sababu to beleliolo umapo tihangata lami. (Manason yito ngotaalio lo Siprus tamalo



hiheo lowali muri li Isa.) **17** Tou ami leitungga mola ode Yerusalemu, mongo wutato mota teto lolutula olami wolo sanangi lohilao. **18** Loombulio mola tei Paulus lonaó peé-peéenta wolami mota lobiilohe wolei Yakobus; ngoáamila mongo tauwa lojamaá woluo olo mota teto. **19** Lapataó longohi maó salamu olimongolio, tei Paulus helo hungguli olimongolio totoonulalo u hitua-tuawua umaa pilohutu mai lo Allahu Taáala lotimbuludei olio towolota lotau-tauwalo tadiila Yahudi. **20** Tou loódungohe silita lei Paulus boito, timongolio ngoáamila helomuji mola Allahu Taáala. Lapataó timongolio lolojiya maó odelei Paulus, "Wutata Paulus! Wajibu otaawa maó lowutato deú mahi lihu-lihua taulo Yahudi tapalacaya li Isa. Timongolio ngoáamila yito tau-tauwalo taa tatapu wau molotolo hilao hemoduduá butoée Musa. **21** Wau botia timongolio loódungohe deú wutato helo ngaajali ngoáamila taulo Yahudi tahi biluloáwa towolota lobangusa wewo, alihu mololaa maó butoée Musa. Wutato helo naseehati olimongolio alihu timongolio diila moluuna mongo walai mongolio meaanto moduduá uúdu lo Yahudi. **22** Botia tau-tauwalo Yahudi tamalo malacaya boito tantulo maó mamooó dungohe deú Wutato mawoluo tewe. Oditolio, woloolo mola botia? **23** Opiohelio poduduólo naseehati lami. Woluo wopatota tewe tamalohutu danti ode Eeya. **24** Naa, mamusi Wutato mota mohutu upacala pomantaliya lobatanga peé-peéenta woli mongolio, wau bantailo maó oonggosi limongolio alihu huwoi mongolio mowali uluhelo. Loui odito mamoo ilaalo ode ngoáamila tau deú wolo umailo dungohe limongolio pasali lo Wutato diila otutu, sababu Wutata lohihilao bo hemo ponaó butoée Musa. **25** Bo pasali lotaa diila Yahudi, tamalo malacaya li Isa, ami malolao mola tuladu olimongolio pasali putuusani lami deú timongolio diila mowali molamelo uáalo u mapilodewo ode balaahala, diila mowali molamelo duhu, meaalo molamelo binatanggi uilate tilingoloó; wau diila mowali mohutu totoonulalo huhutu u huloto." **26** Yi tei Paulus malonaó wolo tawopa tota boito tulusi lohutu maó upacala pomantaliya lobatanga peé-peéenta woli mongolio tou loombulio mola. Lapataó timongolio maa tilumuwoto ode Bele lo Eeya u lopoótaa deú donggo ngoolo hui mola bolo upacala pomantaliya lobatanga boito mopaluto wau bake ode limongolio ngota-ngota pilodewolio. **27** Tou

hiango wakutu pitu hui mola boito bolo ngopeé mopaluto, dengolo lota taulo Yahudi lonto Asia loóonto olei Paulus todelomo Bele lo Eeya. Lapataó timongolio malo popatu totaa dadaata, tulusi lodihu maó olei Paulus **28** sambela hiwuwa-wuwaatiá, "Wuu tau-tauwalo Isirailu, bantua mai! Uti-utieelo taulio talonaó ode utoonulalo maó helo ngaajali ngoáamila tau totoonulalo pongaajali u lotehengi bangusa lo Isirailu, lotehengi butoée Musa wau lotehengi Bele lo Eeya botie. Wau botia tio tumbaó malodelo mai tau-tauwalo tadiila Yahudi tilumuwoto ode delomo Bele lo Eeya wau loónajisi tambati u mantali botie!" ( **29** Timongolio loloiya odito sababu timongolio maloóonto olei Tropimus taulo Epesus boito tokota peé-peéenta wolei Paulus; wau tolantobi mongolio deú tei Paulus malodelo mai olio ode delomo Bele lo Eeya.) **30** Ngoilanggubu kota malo tolonggalo tutu wau ngoáamila tau hitete-teteeáa loámbua daata-daatalo maó. Timongolio malo heúpa olei Paulus wau lodedeá olio yilumualo lonto Bele lo Eeya. Tou boitolo olo huhebu Bele lo Eeya hileütalio. **31** Tou tahipo tolonggaloa boito donggo hipo tolopania momate olei Paulus mate-mateelo maó, tau lopoótaa oli kamudangi pasuukani lo Roma deú ngoilanggubu Yerusalemu donggo hibuluhuta. **32** Tulusi ti kamudangi boito lotiangaó dengolo lota polowila wau pajule lapataó huáa lonaó woli mongolio ode tambati u hibuluhutawa boito. Tou taa dadaata boito loóonto oli kamudangi boito wolo pasukanilio, timongolio lohuheli hemomate olei Paulus. **33** Ti kamudangi boito lonaó mota odelei Paulus tulusi loheúpa olio, wau lopoáhu talo mungu olio. Lapataó ti kamudangi boito malohintu tomimbihu tatoonu tei Paulus boito wau wolo umaa pilohutulio. **34** Ngotayade lotaa dadaata boito lolametaó odie wau ngotayade poli lolametaó odito. Owowoluwoa boito malo odito puyoóto tilinggula ti kamudangi boito madidu motota wonu wolo tutuulio tutu umalo toduo mai. Masababu uito tio lomalentaó alihu tei Paulus deloolo ode malakasi. **35** Tou timongolio lodelo olio demota tutuádu, tahipo tolonggaloa boito malo lilalilau daá tilinggula tei Paulus bolo pilotaalio mola lomongo pajule boito. **36** Timongolio tilunuhelio lonto wulea lo woomboa tahipo tolonggaloa boito u hiwuwa-wuwaatiá, "Patea tio mate-mateelo maó!" **37** Odito matumuwoto ode delomo malakasi, tei Paulus loloiya maó odeli

kamudangi boito, "Mowali watia mobisala ngopee mola woli Tuani?"  
"Wolo yio mowali mobisala lo Yunani?" yilintu maó likamudangi boito. **38**  
"Wonu odito, yio diila taulo Masiri boito taómoómolu mai helo powoluo  
polo malakala lapataó lopoteteá wopato lihulota tamoo-tolonggaloa  
otingolo tilumuwoto ode huta datahu u luasi daá daá wau delita?" **39** Tei  
Paulus lolametaó, "Watia taulo Yahudi; watia ulipu lokota Tarsus, kota u  
polohuna daá to Kilikia. Halapuwola poluasia mai watia mobisala maó  
totau-tauwalo boito." **40** Yi lapataó tei Paulus yiluasialio lobisala, tei  
Paulus tilimihulo totuádu, tulusi longisalati mota wolo uluúlio. Ngoáamila  
tau mahi poóoyonga. Lapataó tei Paulus malo bisala ode limongolio  
todelomo bahasa lo Ibrani. Tei Paulus lolojiya maó odie.

**22:1** "Mongo dulaa wolo Mongo wutato ngoáamilalo! Watia mamooowoli  
mai poduulua lowatia ode limongoli. Nte dungohi mai!" **2** Tou timongolio  
loódungohe olei Paulus helo bisala todelomo bahasa lo Ibrani, malebe maó  
poli duóoti mongolio. Yi tei Paulus lopo tolonga mola tombangio. **3**  
"Watia taulo Yahudi," ualei Paulus, "watia pilotutulio to Tarsus tolipu lo  
Kilikia, bo watia pilo udaálio tewe to Yerusalemu wau diliidiki lou  
motombipidu loguru daá Gamaliel todelomo butoo uilohi lei Musa odeli  
nene moyaanto. Tutuuwauwa debo odelo Mongo wutato ngoáamila tewe  
todulahee botie, watia olo moólohe daá ode Allahu Taaala. **4** Watia helo  
ngalinaya tunggula yilate tahiduduá to pongaajali bohu boito. Timongolio  
ngoáamila, mopio mongo lolai meaambo mongobua, heilaupo lowatia wau  
pilopo tuwoto laatia ode tutupa. **5** Ti Iimamu daá lohihilao wau ngoáamila  
Mahakama Agama mowali sakusi u watia diila mohimbulo. Sababu  
timongolio boitolo tamaa longohi olaatia tuladee podepita u pilopo  
dulungio mola ode tau-tauwalo Yahudi to Damusiki. Wolo tuladee boito  
watia lowali loheupo mola teto totau-tauwalo tapalacaya to pongaajali  
boito, wau helodelo olimongolio ode Yerusalemu u hukuu-maniyolo." **6**  
"Tou watia donggo todelomo nonaó wau ngopee meidungga mola to  
Damusiki, tou dulahee matotai, tinela tuwau u mobaango daá debolo  
lotinelai lonto hulungo topalito lowatia. **7** Watia leumbade mola ode huta  
lapataó watia loódungohe suala tuwau lotahuda mai ode laatia, 'Saulus,

Saulus! Yilongola yio mongolinaya ola-U?' **8** Lapatao watia malohintu, 'Tatoonu Ito botie, Tuani?' 'Waulo Isa taulo Najaret boito taa ilalinayamu,' tame-Tio mai. **9** Tau-tauwala tawoluo teto pee-peenta wolaatia looonto tinelo boito, bo timongolio diila loodungohe suala u lotahuda mai ode laatia. **10** Lapatao watia lohintu poli, 'Mawolo u waajibu pohutuo maoo lowatotia yaa Eeya?' Eeya lolametai, 'Pobongulo wau tuwotolo mola ode Damusiki. Mola teto demaa pootaalio mai olemu pasali lou ngoamila u mowali pohutuwomu moduduoo otohilaa lo Allahu Taala.' **11** Watia lowali pitoo sababu tinelo u loopulau boito. Oditolio mongo sahabati lowatia lodelo olaatia tilumuwoto mola ode Damusiki. **12** Teto woluo ngotaalio tailunte Ananias. Tio ngotaalio lotaa saale wau taaati hemoponaoo butoee Musa. Ngoamila taulo Yahudi tahi biluloawa to Damusiki hipo hulumatia daa olio. **13** Tio lonaoo mai lomilohe olaatia, lapatao tilimihulaoo totili lowatia wau loloiya, 'Wutato Saulus, yio mamusi muli moonto!' Tou boitolo olo watia lomintaaa mola baya laatia, tulusi loonto olio. **14** Lapatao tio loloiya olaatia, 'Allahu Taala tinene moyaanto malo lulaotai olemu alihu yio motota maoo kahandaki-Lio wau moonto li Isa, Wato lo Allahu Taala tahemohutu kahandaki lo Allahu Taala wau modungoheoo suala li Isa lohihilao. **15** Yio mamowali sakusi u mopohabari ngoamila wolo umaa iloontongamu wau ilodungohemu. **16** Botia didu maoo pohima lebe mohiheo. Tihuloolo mola wau wuduwalo batangamu u lihuwalo. Pongibodulo mola ode Eeya alihu yio lopato-Lio mai monto totoonulalo dusamu.' " **17** "Watia luli lohualinga mola ode Yerusalemu, wau tou watia donggo hemodua to Bele lo Eeya, watia kiluwaasa mai lo Rohullah. **18** Watia loonto Eeya; Tio lotahuda mai olaatia, 'Huaa tolai maoo Yerusalemu, sababu tau-tauwalo tewe diila mololimo u silakusiyamu pasali-U.' **19** Watia lolametao, 'Yaa Eeya, tutuulio tutu mailotaawa limongolio deu watia maa tilumuwotaoo ode bebee-leyaalo potabiaalo u loheupa olimongolio wau helomate tau-tauwalo tapalacaya to Eeya. **20** Odito olo tou sakusi lo Eeya tei Stepanus pilatelio yila-yilateelo maoo, watia lohihilao woluo teto wau akolo to pilomatea yila-yilateelo maoo boito. Tumbaoo wawaa-tiyalo tahe lodaha maoo booo limongolio lo tahe lomate olio yila-yilateelo maoo.' **21** Bo Eeya luli lotahuda mai olaatia, 'Bolo

ponaóolo, sababu wau mamopoáhu olemu monaó ode tambati u molamingo ode tau-tauwala tadiila Yahudi.' " **22** Tau-tauwalo debo tulusi hidungohe olei Paulus hemo bisala, bo to lapali pulitio boito timongolio malo nguatiá wolo daá-daáalo maó, "Pateaalo mate-mateelo maó taa debo odelo uito. Diila paatuti tio tumumulo!" **23** Sambela hiwuwaatiá, timongolio helo pongoábeo jumba limongolio, wau helo polayuhe mola peaahuó ode dulente. **24** Yi tikamudangi pasuukani lo Roma boito maleidelo mota olei Paulus ode malakasi, alihu tio palakisaalo mota teto wolo diila omanusia u pongotaawalo wolo sababuulio tau-tauwalo Yahudi helo nguatiá odito olio. **25** Bo tou tei Paulus mapilungu u buboálio, tei Paulus loloiya maó ode polowila tatihu-tihula teto, "Wolo mowali momuboá ngotaalio walaga bele biluloá saaha li olongia lo Roma tou tio diipo bilutoio?" **26** Loódungohe uito polowila boito malonaó mota odeli kamudangi lo pasuukani wau loloiya, "Wolo utieelo u mapohutuo li Paaá? Tau botie walaga lipu lo Roma!" **27** Yi tikamudangi boito lonaó mota odelei Paulus wau lohintu maó, "Nte polelea mai, yio botie walaga lipu lo Roma!" "Joo," loiya maó lei Paulus, "Watia walaga lipu lo Roma." **28** Tikamudangi boito luli loloiya, "Wau lowali walaga lipu lo Roma lou helo maayali ngohuntua daá!" Tei Paulus malo lameto, "Bo watia pilotutulio mai odelo walaga lipu lo Roma." **29** Tou boitolo olo popoo-ngawaaalo suludadu taóhila momalakisa olei Paulus boito, malotouli wau tikamudangi boito olo mailoohe sababu tio malomungu olei Paulus, lebe-lebe pomaó tei Paulus walaga lipu lo Roma. **30** Tikamudangi pasuukani lo Roma boito ohilaa daá motota tutuulio tutu wolo uloo sababu totau-tauwalo Yahudi helo potala olei Paulus. Masababu uito loombulio mola tio lotiangai mongo iimamu tauwa wau Mahakama Agama alihu motiambu. Lapataó tei Paulus yilopatio lonto pungulio, tulusi dilelolio mota lotaalua woli mongolio ngoáamila.

**23:1** Tei Paulus lolontonga popoo-ngawaaalo mahakama boito tulusi loloiya maó, "Mongo wutatuú! Tunggula todulahee botie watia molaasa diila ototala to Allahu Taaala todelomo hilaa lowatia u moloótapu tinely Eeya pasali tutumulo laatia." **2** Tou tei Paulus loloiya odito, ti Iimamu Daá

Ananias lopoáhu tau u tilimikulaó totili lei Paulus lolambali tunggilee Paulus. **3** Yi tei Paulus loloiya maó odeli iimamu daá boito, "Allahu Taaála tantuulo mamó lambali mai olemu taa munapiki tadiila tióotutua mantali! Ito lotihuloáa teto lomutoá olaatia loduduá butoée Musa, lebe-lebe pomaó Ito lohihilao malo lambanga butoó boito lou lopoáhu tau lolambali olaatia!" **4** Tau-tauwala tatotili lei Paulus loloiya maó odelei Paulus, "Yio lohina li iimamu daá lo Allahu Taaála!" **5** Tei Paulus malolameto, "Oo, diila otaawa lowatia, Mongo wutato, deu tio iimamu daá. Memangi todelomo Kitabi woluo tulatulade, 'Yio diila maó pohina tauwa lo bangusamu.' " **6** Tei Paulus loónto deu ngotayadu lo popoo-ngawaáalo mahakama boito bo wambaó tau-tauwalo Saduki wau ngotayade poli bo wambaó tau-tauwalo Parisi. Sababu uito tio loloiya maó ode mahakama boito, "Mongo wutato! Watia ngotaalio lo Parisi, wali mai lo Parisi. Watia bilutoio teea, sababu watia palacaya deu tahe lopunungo mamuli tumumulai." **7** Tou tio loloiya maó odito, tau-tauwalo Parisi wau tau-tauwalo Saduki boito mahipo butola, tilunggula majalisi boito lopoo lowali dulo polemoá. ( **8** Sababu tau-tauwalo Saduki ohuhama deu taa mailate diilalo tumumulai, deu malaakati diaaluo, wau roroo-huwaalo olo diaaluo; hiambola taulo Parisi palacaya maa woluwoolio mai lou ngoáamilalo boito.) **9** Yi maa tilumodei buluhuta ulaba-labaalo. Dengolo lota taulo Parisi talowali guru lo agama tilimihula mola wau helo tehengi maó tióotutua. Timongolio loloiya, "Moduduá mota olami tau botie diila ototala penu boli ngoidi maó! Tanu memangi woluo rohu meaanto malaikati tahelo bisala maó olio!" **10** Polo butola boito lowali odito labalio tilinggula tikamudangi boito mailoohe dia bolo tei Paulus mapoluutoá limongolio. Oditolio tio malo poáhu pasukanilio mota lohama mai olei Paulus tohuungo lotau-tauwala boito wau lodelo olio ode malakasi. **11** Hui u wumbutio mola ti Isa Eeya mai tilimihulaó totili lei Paulus wau lotahuda, "Poólotola mola hilaamu! Yio malongohi u silakusiyamu pasali-U to Yerusalemu. Yio demusi olo mongohi u silakusiyamu boito mola to Roma." **12** Tou didimodupo loombulio mola, tau-tauwalo Yahudi malo woomboa. Timongolio lotadia diila tamo lamelo wau mongilu wonu timongolio diipo loópate olei Paulus mate-mateelo



maó. **13** Maito maó lou wopato pulu lota tahelo woomboa boito. **14** Timongolio lonaó mota ode mongo iimamu tauwa wau mongo tauwa lo Yahudi wau loloiya, "Ami malo tadia peé-peéntalo maó, diila tamo lamelo meaalo mongilu wolo-wolo wonu ami diipo loópate olei Paulus mate-mateelo maó. **15** Naa, botia Mongo wutato wolo popoo-ngawaáalo Mahakama Agama wajibulio molao mola tuladee odeli kamudangi pasuukani lo Roma boito u mohile olio muli modelo mai olei Paulus mai motaalua woli mongoli, pohutu debo odelo timongoli donggo ohilaa muli momalakisa palakalalio wolo lebe moulintapo. Wau ami mamoti dapato momate olio mate-mateelo maó tou tio diipo meidungga mai odia." **16** Bo walaó lowutatio taabua lei Paulus loódungohu patuju lo woomboa boito. Yi tio malonaó ode Malakasi wau lopoótaa suáli boito olei Paulus. **17** Tei Paulus tulusi malo tiangai polowila ngota wau loloiya maó olio, "Delowalo tabohulotau botie odeli kamudangi; tio ohilaa mopodulohe u hitua-tuawua olio." **18** Polowila boito malodelo tabohulotau boito odeli kamudangi wau loloiya maó, "Tei Paulus, taa u tilaahangia boito, lotianga olaatia wau leidelo mai olaatia tabohulotau botie odeli Paaa; tio ohilaa mopo dulohei u hitua-tuawua." **19** Ti kamudangi boito malodihu uluú lo tabohulotau boito, lapataó lodelo olio lotiwiwi maó ode tili wau malohintu, "Wolo u mapolelemu mai olau?" **20** Tabohulotau boito lolameto, "Tau-tauwalo Yahudi malo heeluma u moharapu li Tuani modelo olei Paulus mota motaalua wolo Mahakama Agama loombu, debo odelo timongolio ohilaa muli momalakisa palakalalio lebe moulintapo. **21** Bo diila maó dudui li Tuani hihile limongolio boito, sababu maito maó lou wopato pulu lota tadonggo hituaá tamo momontoá olio totalalo. Timongolio boito ngoáamilalo malo tadia diila tamo lamelo wau mongilu wonu timongolio diipo loópate olei Paulus mate-mateelo maó. Masaatia botie olo timongolio mahihetua; bolo hemohima totameti Tuani wambaio." **22** Tikamudangi boito malo loiya, "Diila maó polelea boli olita, deu yio malo poótaa mai utie olau." Lapataó tio malei walinga tabohulotau boito. **23** Lapataó tikamudangi boito malo tiangai polowila duulota, tulusi tio loloiya olimongolio, "Popohetua maó dulo hetuto suludadu wolo pajule pitu lopulu lota owadala wau dulo hetuto suludadu ototobuo u momonggato

jamu sambila tou huilo botie ode Kaisarea. **24** Popohetua maó olo wadala u taéya lei Paulus wau delowalo tio wolo moáahu demola li Gubolonulu Peliks." **25** Lapataó tikamudangi boito malo luladee tuladu u tingohio odie mola, **26** "Taa Lailaió Gubolonulu Peliks. Salamu lonto olei Klaudius Lisias! **27** Tau botie mailaúpo tau-tauwalo Yahudi wau bolo ngopeeé pilopaatea limongolio yila-yilateelo maó, wonu diila watia wolo pasuukani lowatia lonaó mai wau lopoáahu olio; sababu watia loódungohu deú tio walaga lipu lo Roma. **28** Sababu watia ohilaa motota maó wolo tutuulio tutu totala upilo tuludi mongolio olio, yi watia malodelo olio ode Mahakama Agama limongolio. **29** Bo malo patate deú tio diila helohutu penu boli tuwau maó upaatuti pohukuu-maniyalo wolo hukuumaní mate meaanto potutupalo olio. Timongolio helo potuludu olio bo wambaó wuwuumbuta wolo bubuu-toóowalo agama limongolio lohihilao. **30** Lapataó watia pilo leleyalio mai deú woluo patuju u moleeto lonto tauo Yahudi to olio. Oditolio watia huáa lolao mai olio odeli Tuani Gubolonulu. Wau watia malo poáhu mai tahi potulude olio mopo dudulai dudulohi mongolio odeli Tuani." **31** Yi popoo-ngawaáalo suludadu boito malo ponaó tuugasi limongolio. Timongolio lohama olei Paulus tulusi lodelo olio hui boito demola Antipatrísi. **32** Loloombulio mola hilulia maó limongolio pasuukani owadala lopo tolóngá mola lononaó wolei Paulus, wau timongolio lohihilao luli hualingai ode malakasi. **33** Tou pasuukani owadala boito leidungga mola ode Kaisarea, pilopo tunggulaó limongolio tuladee boito odeli Gubolonulu, lapataó lohudu maó olei Paulus ode olio. **34** Tou ti gubolonulu boito lapato lobaca maó tuladee boito, malohintu tio olei Paulus lonto utoonu asaliilio mai. Tou ilotaawalio deú tei Paulus asalilio mai lonto Kilikia, **35** tio lolojiya maó, "Ooó! Wau mamó malakisa palakalamu, wonu bolo tamo podulua olemu malei dungga mai." Tulusi tio malo malentaó alihu tei Paulus tahangiola todelomo bele biluloá saaha li olongia lei Herodes.

**24:1** Limo hui mola lapatio maó, ti Iimamu Daá Ananias wau mongo tauwa lo Yahudi lonaó mola ode Kaisarea pee-peeenta wolo pala kololo ngota tailunte Tertulus. Timongolio mola lotaalua woli Gubolonulu Peliks

wau lopo dudulaó dudulohi mongolio pasali olei Paulus. **2** Toui tei Tertulus tiloduwolio ode talu, tio helo potuludu olei Paulus odie mola, "Tuani Gubolonulu Taa Lailaió! To totaúwa li Tuani lipu lamiaatia aamani. Wau to otinepo li Tuani olo mangohuntua ulopiohe u pilohutu ode bangusa lamiaatia. **3** Ngoáamilalo boito hetolimoo lamiaatia laito wolo oduólo wau pasisi u molai-laióolo mola penu boli touóonu. **4** Bo alihu diila maó mopoluhi lowakutu ngohuntua li Tuani, ambunguolo bolo potala ti Tuani modungoheó dudulohu lamiaatia u limbu-limbu botie. **5** Lotapu mai lamiaatia tau botie tamoo-tolonggaloa umoo topotala. Boli toui toonulalo maó tio hemo potoodei tolonggalo towolota tau-tauwalo Yahudi wau tio lowali tauwa helo poóliyoó tau-tauwalo Najaret. **6** Tio tumbaó malo himontala loPONAJISI Bele lo Eeya, bo amiaatia malo heupa olio. Amiaatia omakusudu momutoá olio moduduá butoo lo agama lamiaatia lohihilao. **7** Bo tikamudangi Lisias malohehu olio lonto olamiaatia, **8** wau lomalenta alihu tahelo podulohu olio mai motaalua woli Tuani. Wonu ti Tuani momalakisaó tau botie, ti Tuani lohihilao mamodungohu monto olio u otutu loui ngoáamilalo upilo dulohei lamiaatia botie pasaliilio." **9** Tau-tauwalo Yahudi mota teto olo loduduá lopotulude olei Paulus wau helo poótutuwolo maó ngoáamila uiloia lei Tertulus. **10** Lapataó ti gubolonulu boito longohi maó isalati olei Paulus deú tio mowali mobisala. Yi tei Paulus malo loiya, "Otaawa lowatia ti Tuani malowali hakimu tolipu botie ota-otaunualio mola hiheolio. Uito sababuulio watia molaasa sanangi moóowoli mai podulua lowatia botie ode talu li Tuani. **11** Ti Tuani mowali motulete maó lohihilao deú lebe loui mopulaa duuhui mola uilalu maó watia lonaó ode Yerusalemu mola lotabia. **12** Wau diila peénta maó tau-tauwalo Yahudi loódungga olaatia helo buutola penu boli wolo ngotaalio meaanto helo himoáa tau u mohutu tolonggalo mopio to Bele lo Eeya meaanto to bebee-leyaalo potabiaalo meaanto penu boli touóonu todelomo kota. **13** Timongolio olo diila lowali lopo bukuti maó totoonulalo potuludi mongolio u mapilo tunggulai limongolio odeli Tuani pasali lowatia. **14** Memangi musi akuo lowatia toli Tuani deú watia hemolubo Allahu Taaala tinenemoya lamiaatia loduduá pongaajali li Isa tahe anggapuo limongolio tilala. Bo watia donggo palacaya toui

ngoáamilalo u hitulade todelomo Buku lei Musa wau Buku lo Mongo nabi.

**15** Tutuuwauwa debo odelo timongolio, watia olo ohalapani to Allahu Taáala deü ngoáamila tau mamuli tumumulai tou mailate maó -- tau-tauwalo mopiohu, meaambo tau-tauwalo moleeto! **16** Uito sababuulio watia laito hemo tolopani mopio-piohuulo maó, alihu hilaa lowatia u maloótapu tinely Eeya belesi to Allahu Taáala wau beresi tomanusia. **17** Lapataó dengolo taunu mola didu to Yerusalemu, watia luli lohualinga mola odito lodelo mola doi u pilomantu ode bangusa lowatia wau mola lopodewo bake ode Allahu Taáala. **18** Tou watia donggo hemohutu maó uito, ilodungga limongolio watia to Bele lo Eeya, tou watia mailapato wolo upacala pomantaliya lobatanga. Diaaluo taa dadaata wolaatia, wau diaaluo olo tolonggalo mola teto tou boito. **19** Bo woluo dengolo lota taulo Yahudi mola teto lonto polopinsi lo Asia. Timongoliolo tamaa wajibulio woluo tewe umopo tunggulai dudulohi mongolio odeli Tuani, wonu timongolio odudulohu u hitua-tuawua pasali lowatia. **20** Meaalo hulialo maó tau-tauwala botie moóowoli lohihilao ololeeta wolo u mailotapu mai limongolio olaatia tou watia pilopo taaluo limongolio ode Mahakama Agama. **21** Timongolio bo loótapu maó tolomodu kalima u ngotahe botie wambaó uiloia lowatia totalu limongolio, deüito-yito kalima odie: Watia bilutoio todulahee botie bo u sababu watia palacaya deü tamailate mamuli potumulo-Lio mai." **22** Lapataó tei Peliks tamalotota ngohuntua pasali lo pongaajali li Isa, lopoó lapato sidangi lo palakala boito. "Wau mamu muutusi maó palakala botie," ualio, "wonu tikamudangi Lisias malei dungga mai." **23** Lapataó tio lomalantaó polowila tatihu-tihula pasali lei Paulus boito alihu debo molahangi olei Paulus, bo wolo mongohi ngoidi obeevasi olio wau mopoluasi mongo sahabatilio mongohi olio wolo u palaluolio. **24** Dengolo hui mola lapatio maó tei Peliks lonaó mai, tilamania lodilelio tailunte Drusila; tio ngotaalio lo Yahudi. Lapataó tei Peliks lopoáhu tau mota lohama mai olei Paulus, lapataó tei Peliks malo dungoheó olei Paulus helo bisala pasali lou palacaya li Isa Almasi. **25** Bo tou tei Paulus lopo tolonga mola lo bisalaalio pasali lou juujulu wau mongotongo napusu wau pasali lo hukuumani to Dulahu Kiaama, tei Peliks mailohe tulusi loloiya maó, "Yio

mowali monaóolo botia. Wau mamuli motiangai olemu wonu ohiangio."

**26** Tou boito tei Peliks donggo hemo haalapu mamootapu mai doi monto olei Paulus. Uito sababuulio tio pipiiuwa mota helei hama mai olei Paulus u mobisala wolio. **27** Lapatao dulo taunu mola, tei Perkius Pestus lobuulota wolei Peliks lowali gubolonulu. Wau kalana tei Peliks ohilaa momiyo hilaa lotau-tauwalo Yahudi, hiluliaalio maó tei Paulus todelomo tutupa.

**25:1** Tolo hui mola lapatio maó tei Pestus leitungga mola ode madala boito, tio mola lonto Kaisarea ode Yerusalemu. **2** Mola teto mongo iimamu tauwa wau mongo tauwa lo Yahudi loóowoli maó olio pasali lo dudulohi mongolio tolei Paulus. Timongolio tulusi wambaó hemomiyo olei Pestus **3** alihu to opiohu hilaalio toli mongolio, tio ohilaa mopoahu maó tau modelo mola olei Paulus ode Yerusalemu; sababu timongolio malo heeluma u momate olio mate-mateelo maó tohuungo dalalo. **4** Bo tei Pestus lolametao, "Tei Paulus donggo tataahangi to Kaisarea; wau watia lohihilao olo diilalo mohiheo mamuli mohualinga mola odito. **5** Oditolio, hulialo maó tahimuloa lo ulipu towolota limongoli pee-peeenta wolaatia ode Kaisarea wau mopo palakala maó olio mola teto, wonu memangi tio malohutu tuwaulio lototala." **6** Lapatao lotibiluloa to Yerusalemu tanu donggo walu meaalo mopulu hui mola, tei Pestus luli lohualinga mola ode Kaesarea. Loombulio mola tio lohutu sidangi lobubutoo wau lomalentao leidelo olei Paulus mai lotaalua. **7** Tou tei Paulus leitungga mai, tau-tauwalo Yahudi tamaa lonaó mai lonto Yerusalemu tilimihulaó to tiliilio, wau maloowoli totoonulalo potuludu u hibuuheta olio. **8** Todelomo podulualio, tei Paulus loloiya, "Watia diila lohutu penu boli tuwau maó utilala tobutoee Musa meaalo ode Bele lo Eeya meaalo odeli Kaisari lo Roma." **9** Bo tei Pestus ohilaa mohama hilaa tauulo Yahudi. Yi tio malohintu olei Paulus, "Mohuto yio monao ode Yerusalemu butoolio mola teto totaluu tomimbihu totoonulalo potuludu boito?" **10** Tei Paulus lolametao, "Watia donggo tihutihula totalu lo mahakama li Kaisari lo Roma; wau totambati boitolo watia musi butoolio. Otaawa li Tuani lohihilao deu watia diila ototala totaulo Yahudi. **11** Wonu watia malo

lambanga butoó wau helohutu hitua-tuawua upaatuti pohukuu-maniyola lo hukuumani mate, yi watia iloheela lohilao mate. Bo wonu totoonulalo potuludi mongolio boito diila otutu, diaaluo penu boli ngotaa maó tamowali mohudu olaatia ode limongolio. Watia mohaalapu butoólo tobubutoó li Kaisari!" **12** Lapatio maó lodulohupa wolo tahipo naseehatia olio, tei Pestus malo loiya, "Yio mohaalapu butoólo tobubutoó li Kaisari, oditolio yio musi monaó mola motaalua woli Kaisari." **13** Diila ngoolo mola hiheolio lapatio maó, ti Olongia Agripa wolei Bernike lonaó mai ode Kaisarea mai lopali maó hinta moáahu olei Pestus. **14** Lapataó timongolio ngoolo hui mola mota teto, tei Pestus helo tombangaó palakala lei Paulus odeli Olongia Agripa. Tei Pestus loloiya, "Woluo tewe taulo tutupa ngota tatilolaa maó lei Peliks. **15** Tou watia to Yerusalemu, mongo iimamu tauwa wau mongo tauwa lo Yahudi lopo tunggulai dudulohi mongolio pasali lotau boito wau lohile alihu watia mopodehu maó hukuumani olio. **16** Bo watia lolametaó deu taulo Roma diila mowali mohudu odito wambaio ngotaalio lo tapilo tuludelio u hukuu-maniyola, wonu tapilo tuludelio boito diipo lotaalua wolo tahelo dauwa olio wau yilohia wakutu mopodulua lobatanga. **17** Oditolio, tou timongolio lonaó mai odia, watia diila lohima lebe lohiheo. Loombulio mola watia huáa lohutu sidangi lobubutoó wau lomalentaó alihu tau boito deloolio mai motaalua. **18** Tou tahelo podulohu olio tilimihula mola loóowoli lo dudulohi mongolio, timongolio diila loóowoli penu boli tuwau maó u moleeto debo odelo u helantobu lowatia uma potunggulo mai limongolio. **19** Huhama limongolio bo wambaó lohiihede wolio tomimbihu agama limongolio lohihilao wau tomimbihu lo tahingota-ngotaawa tailunte Isa. Tau boito mailate, bo tei Paulus malo buutola deu tau boito tumutumulo. **20** Sababu watia lolingu tomimbihu woloolo mola watia mowali moótapu mai totoombangowalo pasali lo palakala boito, watia malohintu olei Paulus wonu tio mohuto monaó ode Yerusalemu wau butoólio mola teto pasali lo palakala boito. **21** Bo tei Paulus lohile u mopo tolonga mola palakalalio; ode bubutoó ulebe lailaió; tio lohile alihu tio debo tataahangi totutupa tunggula palakalalio putusio maó li Kaisari. Sababu uito watia lomalentaó alihu tio debo tahangiola tulusi, tunggula watia ohiango u molao olio odeli Kaisari."



**22** Lapatao tei Agripa malo loiya odelei Pestus, "Watia lohihilao olo ohilaa modongohe tau boito." "Loombu ti Tuani mowali modungohe olio," tametao lei Pestus. **23** Loombulio mola ti Agripa wolei Bernike lona o mai wolo upacala oduda. Timongolio tilumuwota o ode huwali leida losidangi pee-peeenta wolo taduduula diti lo popaatea wau tau-tauwalo tahimuloa lo ulipu tokota boito. Topalenta lei Pestus, tei Paulus pilopo tuwotio mai. **24** Lapatao tei Pestus malo loiya, "Baginda Agripa wau mongo wutato ngoamilalo! Tau botie mapilo dulohio mai olaatia lo ngoamila bangusa lo Yahudi, mopio tato Yerusalemu boli tateea. Timongolio helohile lou moohuu wolo hiwuwa-wuwaatia deu tio diila paatuti poluli ma o tumutumulo. **25** Bo watia diila loodungga penu boli tuwau ma o u pilohutulio u mowali pohukuu-maniyola olio wolo huumani mate. Wau masababu tio lohihilao malohile palakalatio buto o la to bubuto o li Kaisari, yi watia malolantu u molao mola olio odeli Kaisari. **26** Bo watia diipo o katalangani tuwau ma o u mopatato da o tomimbihu batangalio u tuladulo todelomo tuladu lowatia odeli Kaisari. Uito sababuulio pilopo taaluo mai lowatia tio odeli Mongo tuani ngoamilalo, tidiyolo da o ode Taa Lailao Baginda Agripa! Makusudu lowatia yito alihu lapatao momalakisa olio botie, wolo u hitua-tuawua olaatia u tuladulo. **27** Sababu to pongolaasa lowatia, diila to tambatilio molao mola tau ngota lotutupa lou diila mopilaalo totoonulalo totala u pilopo tulude olio."

**26:1** Tei Agripa lolojiya ma o odelei Paulus, "Yio poluasiyou mai mobisala u mopoduulua batangamu." Yi tei Paulus malo mintaa mola uluulio tulusi lopo tunggula o podulualio odie mola, **2** "Taa Lailao Baginda Agripa! Watia molaasa opaeda da o mo o podudulai poduulua batanga laatia tumba o ode talu li Baginda pasali lou ngoamila podulohu upilopo dudulai lotau-tauwalo Yahudi pasali laatia; **3** tidiyolo da o sababu otaawa tutu li Baginda uudu wau susuu-aliyaalo taulo Yahudi. Masababu uito, ambunguolo potaala ti Baginda modungohe o tombango lowatia wolo sabari. **4** Ngoamila taulo Yahudi motota woloolo mola tutumulo watia tonggadio donggo muda mai. Otaawa limongolio deu tonggadio watia lowali taamuda mai, watia maa tilumumulo towolota bangusa laatia

lohihilao to Yerusalemu. **5** Malohiheo ilotaawa limongolio pasali laatia. Wau wonu timongolio mohuto, timongolio mowali mongohi mai sakusi deü tonggadu bohuliolo mai watia maa tilumumulo odelo taulo Parisi wau helo duduó totoonulalo wuüdulio u modetoá daá todelomo agama lamiaatia. **6** Wau botia watia tihutihula tea mabutoólio sababu watia palacaya to daantia u pilohutu lo Allahu Taáala odeli nenemoya lamiaatia. **7** Daantia boitolo olo u hehaalapuo lo mopulaa duluo suku bangusa lo Isirailu, tilinggula timongolio helo taáaluku wau hemo hulumati to Allahu Taáala hui wau dulahu. Wau tumbaó kalana watia palacaya to daantia boito, Baginda Taa Lailaió, watia pilopotala lotau-tauwalo Yahudi. **8** Yilongola mongo wutato tau-tauwalo Yahudi diila moó palacaya deü Allahu Taáala muli mopo tumulai taa mate? **9** Bohuliolo mai watia lohihilao olo ohuhama deü watia musi mohutu maó totoonulalo hitua-tuawua u motehengi li Isa lonto Najaret boito. **10** Wau memangi uitolo u mapilohutu lowatia to Yerusalemu. Wolo tuladu kawasa lonto mongo iimamu tauíwa, watia malo potuwoto ode delomo tutupa ngohuntua tau-tauwalo tadebo molotolo hilao to Allahu Taáala. Watia olo tumbaó malo duduá lo akolowa deü timongolio dehuwalo huumani mate. **11** Poó-poódaata watia helo posikisa olimongolio to bebee-leyaalo potabiaalo, alihu momakusa olimongolio momaahu wolo u pilalacaya limongolio. Odito patulio hilaa lowatia olimongolio tilinggula ode kokoo-tawaalo wewo olo henilanaó lowatia u mohilapita olimongolio mola teto." **12** "Wolo makusudu boitolo olo watia lodelo tuladu kawasa lonto mongo iimamu tauíwa wau lonaó mola ode Damusiki. **13** Tou watia tohuungo dalalo, to tomutaáa lodulahu, Baginda Taa Lailaió, watia loóonto tinelo tuwau lonto hulungo ulebe motilango wolo mato lodulahu. Tinela boito lotinelai topalito lowatia wau topalito lotau-tauwalo tahinaówa peé-peéenta wolaatia. **14** Amiaatia ngoáamila leibalata tohuta. Tulusi watia loódungohe suala tuwau lotahuda mai ode laatia todelomo bahasa lo Ibrani, "Saulus, Saulus! Yilongola yio tulusi wambaó hemo ngalinaya ola-U? Maa olaasamu lohihilao mongongoto, wonu yio tulusi wambaó moluwali to tauíwa-Lio lo tamowali tuanimu." **15** Yi watia malo loiya, 'Tatoonu Ito, Tuani?' Wau Eeya lolametai, 'Waulo Isa tahe alinayamu. **16**

Pobongulo wau tihulolo mola! Wau mopo bilohei batanga olemu wolo makusudu u momuduó olemu mowali tamoomayawa ola-U. Yio musi mopohabari ode taawewo wolo u iloontongamu to dulahee botie pasali-U wau pasali lou wolo u demaa pobilohu-U mai olemu towakutu udungga-dungga mai. **17** Wau mamopata olemu monto bangusa lo Isirailu wau monto babaa-ngusawalo tadiila Yahudi. Wau mamopoahu olemu monao ode limongolio, **18** u momuo mato limongolio alihu timongolio lumualo monto u modiolomo wau tumuwoto ode u mobaango; alihu timongolio molopato monto aangio lo Ibilisi, lapatao kiluwaasa lo Allahu Taála. Yi lou momalacaya ola-U duduu-sawaalo limongolio maa ambunguo-Lio wau timongolio mamowali pongawaá umati lo Allahu Taála tailo tulaota.' " **19** "Sababu uito, Baginda Agripa, watia laito hemo tolopani modungohe to bibilohe umaa tilolimo lowatia lonto Allahu Taála boito. **20** Wolo juujulu watia helo poótaa ode tau-tauwalo deu timongolio musi molilihu monto duduu-sawaalo limongolio wau mohudu mola batanga limongolio ode Allahu Taála wau mopo biloheo todelomo tutumuli mongolio deu timongolio malo lilihu lonto duduu-sawaalo limongolio. Watia helo poótaa suáli boito bohulio mai to Damusiki, lapatao to Yerusalemu wau to ngoilanggubu Yudea wau towolota lotau-tauwalo tadiila Yahudi. **21** Masababu uitolo tau-tauwalo Yahudi loheupa olaatia to Bele lo Eeya wau helo tolopani momate olaatia mate-mateelo maó. **22** Bo tunggula tosaati botie watia dilaaha lo Allahu Taála, tilinggula watia loótihulo teea moowoli mai u silakusia lowatia ode taa ngoáamila -- taúdaá mealo taúkikiio. Wolo uiloiya mai lowatia botie diila ngopohia lou wolo upilo nubuwati mai lomongo nabi wau lei Musa; **23** deuuto-yito Olongia Tamoo-poáahua tadilanti mai lo Allahu Taála boito musi modutolo, wau mowali taa bohulio umuli mobongu mai tou mailate; alihu woleeto Tio mowali mopohabari mai tilango -- deuuto-yito u mopoáahu -- mopio ode tau-tauwalo Yahudi boli ode tau-tauwalo tadiila Yahudi." **24** Tou tei Paulus donggo hemoowoli podulualio boito, tei Pestus malo nguatio, "Yio mabiyongo Paulus! Ilimiimu u dadaata boito maloó biyonga olemu!" **25** Bo tei Paulus lolametao, "Watia diila biyongo, Taa Lailaió. Tataa-heyaaalo uiloiya lowatia boito otutu wau yilumualai lonto pikiilangi u seehati. **26** Ti

Baginda Agripa lohihilao motota tutu susu-aliyaalo boito. Uito sababuulio watia buheli mobisala mai totalu li Baginda wolo juujulu. Watia yakini diaaluo penu boli tuwau maó susu-aliyaala boito udiipo ilotaawa li Baginda, sababu ngoáamilalo boito diila lotoduo to tataa-mbatiyalo u tutuuó. **27** Taa Lailaió Baginda Agripa, tingga ti Baginda palacaya uiloiya mai lomongo nabi? To pongolaasa lowatia ti Baginda palacaya!" **28** Lapataó tei Agripa loloiya maó odelei Paulus, "Halapumu gambangi mohutu olaú mowali Nasara todelomo wakutu u bo ngointa lomola?" **29** "Todelomo wakutu u bo ngointa lomola meaanto todelomo wakutu u mohiheo," ualei Paulus, "wattia modua mola ode Allahu Taáala alihu ti Baginda wau Mongo tuani ngoáamilalo tamo dungohe olaatia todulahee botie mowali debo odelo wattia -- ngopohia pomungu botie, tantulo maó!" **30** Pulitio tibaginda onlongia, ti gubolonulu wolei Bernike, wolo ngoáamila tawewolio tilimihulaó. **31** Tou maa to bulemengio, timongolio hipoloiyawa ngota timongota, "Tau botie diila lohutu penu boli tuwau maó upaatuti pohukuu-maniyalo wolo hukuumanu mate meaalo tutupaalo." **32** Lapataó tei Agripa loloiya odelei Pestus, "Tau botie mamowali lopatolo, wonu humayaalio tio diila mohile wolo moóohui palakalalio butoóla to bubutoó li Kaisari!"

**27:1** Lapataó tilantulio maó deu ami musu mobite mola ode Italia, tei Paulus wau dengolo lota taulo tutupa wewo yiludulio odelei Yulius, polowila pasuukani suludadu lo Roma u ilunte "Resimeni li Kaisari". **2** Ami lotitaé to kaapali u leitungga mai lonto Adramitium, lapataó lomonggato wolo kaapali boito umalei dapato mobite mola ode raraanu buwaalo to polopinsi lo Asia. Tei Aristarkus, ngotaalio lo Makedonia talei dungga mai lonto Tesalonika, lobite olo peé-peéenta wolami. **3** Loombulio mola ami leitungga mola ode Sidon. Tei Paulus pilohutulio lou mopiohe daá lei Yulius. Tio yiluasialio lobiilohe wolo mongo sahabatilio alihu timongolio mowali mongohi maó olio wolo u palaluolio. **4** Lonteeto ami lopo tolonga mola lobibiite lami. Sababu dupoto lalaawania wolo dulungo kaapali, ami malobite tulusi lotiduluhe mola to pentadu pulo Siprus u leililunga ngopeé todupoto. **5** Lapataó ami loli dehetu u tataalua wolo

Kilikia wau Pampilia tulusi leidungga mola ode Mira tolipu lo Likia. **6** Mota teto polowila boito loódungga kaapali tuwau lonto Aleksandria u mamobite mola ode Italia. Yi tio lopo limbataó olami ode kaapali boito. **7** Dengolo hui mola hiheolio ami hilayahe moopoto daá, wau wolo tióopatea pulitio maó ami demola ngoilamingo kota Knidus. Lapataó sababu dupoto debo donggo mobulilo, ami diila loówali lopo tolonga mola lobibite lami ode dulungo bohulio. Yi ami malobite mola ode hulialio lopulo Kreta, loli Wulungo Salmone alihu mola teto ami meililungo todupoto. **8** Wolo tióopatea ami hilayahe lotiduluhe mota to pentadu lopulo boito tunggula pulitio ami leidungga mola totambati tuwau u ilunte Rabua Ugaaga, diila boti molamingo monto kota Lasea. **9** Tou boito Dulahu Buka Polodaamea taulo Yahudi malo paluto. Ami mailo pulita lowakutu dadaata, tilinggula madidu wakutuulio u mobite wolo aamani. Sababu uito tei Paulus longohi naseehati odie olimongolio, **10** "Mongo wutato, moduduá mota huhama lowatia, matopotala daá wonu ito mobite tulusi. Ito mamooó toduo mai u luhi daá diila bo wambaó to dudetohunto wau kapaalinto, bo jiwanto olo mamooli." **11** Bo polowila boito lebe palacaya to julumudi wau to kapitengi lokaapali wolo loiya lei Paulus. **12** Rabua mota teto memangi diila mopiohu u potirabua lo kakaa-paliyaalo tosembo lopolo huhulo. Masababu uito odaata lo tahipo kalajawa tokaapali akolo u muli mobite mololaa maó rabua boito sababu timongolio ohilaa motolopani tunggula mola ode Peniks wau motibiluloá mola teto tunggula sembo lopolo huhulo mopaluto. Peniks yito rabua lokaapali to Kreta u talutalu ode baradaya wau barlau. **13** Tou boito dupoto hulialio hiiipa lou moopoto. Yi tolantobu lo tahipo kalajawa tokaapali timongolio mamowali poli mobite. Oditolio timongolio malo mintaaa jangga tulusi lobite lotiduluhe mola topentadu pulo lo Kreta boito. **14** Bo diila lohiheo mola lapatio maó dutala daá -- deúito-yito dupoto u ilunte dupoto Tiimuru Lau -- lohiipo moóohuu lonto tudulio, **15** wau helo lemba kaapali lami. Masababu kaapali boito diilalo mowali mobite tulusi moluwali dupoto yi ami madidu okawasa wau lopoluli lomaó kaapali leelihu dilelo dupoto. **16** Ami leililunga nogopeé, tou ami yilumaode mola toámabahu hulialio lopulo Kauda u mooyoto boito. Mota teto wolo tióopatea ami loókawasa

mao sikuci lokaapali lami. **17** Lapatao sikuci lokaapali boito bilintaáa mola ode kaapali, kaapali boito lohihilao piloo toheeto wolo lomake awadu u pilolihuto lolilito kaapali boito. Sababu moohe bolo meihuwato totudu lohungayo Sirtis u mooti, layahu mailohudu wau tulusi kaapali piloluli mota loduduá dupoto. **18** Dupoto tulusi lilalilau tilinggula loombulio mola dudetohu kapali pilomahulo ode deheto. **19** Todulahee wumbutio mola poli tahipo kalajawa tokaapali boito luli lopomahula mola totoonulalo pakaakasi lokaapali ode deheto lo uluu limongolio lohihilao. **20** To oduduulahe mola hiheolio ami diila loonto mato lodulahu wau poliyama wau dupoto debo tulusi lilalilau. Pulitio diduuluo mao halapani lami u moáahu. **21** Ngoolo wakutu mola hiheolio tau-tauwala boito diila helo lamelo. Yi tei Paulus lonaó mao ode huungi mongolio tulusi loloiya, "Mongo wutato! Wonu timongoli malo duduó naseehati lowatia wau diila lobite lonto Kreta, ito diila lootoduo mai ngoáamila poloántulu wau pololuhi botie. **22** Bo botia olo pohile lowatia tiotutua alihu timongoli mopoudaá mola lohilao. Diaaluo penu boli ngotaa mao lomongo wutato tamaa mate; ito maéenggila bo kaapali botie wambaó. **23** Sababu ohui malaikati lo Allahu Taála tahe tuboo lowatia, deüito-yito Allahu Taála taa ohuuwo tutumulo watia, dungga-dungga mai odelaatia. **24** Malaikati boito lotahuda, 'Diila mao oohe, Paulus! Sababu yio mamotaalua woli Kaisari. Wau sababu opiohu hilaa lo Allahu Taála olemu, ngoáamila tahibitea wolemu mamoaahu sababu yio.' **25** Masababu uito, Mongo wutato, wajibulio wutato mopoudaá mola lohilao! Sababu watia palacaya to Allahu Taála deu ngoáamilalo mamotoduo mai debo odelo umapilo tahuda-Lio olaatia. **26** Bo ito de mamei tapodu topentadu lopulo tuwau." **27** Tou hui opulaa patolio ami donggo hilantu-lantunga to Deheto Adria. Tanu to tomutaa lou huilio tahipo kalajawa tokaapali maloó laasa mai deu kaapali lebe hemembide mota lotudulio. **28** Oditolio timongolio malo pololoá mola awadu wolo botu u loloneáa delomio lodeheto. Malo patatai deu tambati boito delomio ngopee mola wopato pulu lomeeteri. Diila lohiheo lapatio mao timongolio luli loloneáa mola, tulusi mailotaawa limongolio deheto totambati boito delomio ngopee mola tolo pulu lomeeteri. **29** Timongolio moohe kaapali mamei huwato topatihu, oditolio



timongolio malo polaahe mola jangga mohelu wopato to ambahu huli lokaapali, lapatao hemo haalapu wonu bo mowali mahuua dumodupai. **30** Wolo poo-poooyo tahipo kalajawa tokaapali boito mohimontala molahi monto kaapali boito. Timongolio malo polaahe mola sikuci ode taluhu helohutu bo debo odelo ohilaa mopolaahe mola jangga monto kaapali. **31** Bo tei Paulus loloiya maó ode polowila wau mongo pajule tato kaapali boito, "Wonu tahipo kalajawa tokaapali botie diila motibiluloa tokaapali, Mongo wutato ngoamilalo diila opaladu moahu." **32** Masababu uito mongo pajule boito malomunto tali losikuci boito, tilinggula sikuci boito leelihu. **33** Tou diipo lobutu mai dulahu, tei Paulus helo naseehati maó alihu timongolio ngoamila molamelo. Tei Paulus loloiya maó, "Maa mopulaa pato hui hiheolio Wutato ngoamilalo bo hipo himawa wambaó todelomo owowoluwoa u papaahenga wau diila lolamelo wolo-wolo. **34** Botia naseehatia mai laatia, polamelopo penu bo ngoidi. Uito mopiohe ode limongoli, alihu timongoli muli molotolai. Sababu Wutato ngoamilalo mamoaahu wau diila okulangia lolo-loolo." **35** Lapatao loloiya maó odito tei Paulus malohama roti wau lolapali mola sukuru ode Eeya totalu limongolio ngoamila. Lapatao tio lolaya-layadeo roti boito, tulusi lolamelo. **36** Yi timongolio ngoamila luli ilo sumangati mai wau malo duduá lolamelo. **37** Ngoamila tawaluo to kaapali boito maito dulo hetuto pitu lopulaa wolomota. **38** Tou ngoamila malo lamelo lou tutuuhetalo maó, timongolio malo pomahula mola dudetohu pale ode deheto alihu kaapali mowali moheelo. **39** Tou madulahei, tahipo kalajawa tokaapali maloonto tudulio, bo diila otaawa limongolio tudu lolo uito. Timongolio loonto wulungo wolo pentadio. Oditolio timongolio omakusudu moporabua kaapali boito mola teto wonu mowali. **40** Yi aaa-wadeyaalo lojangga biluntolio tulusi jajaang-gawaalo boito piloluli limongolio yilumodua mola ode delomo deheto. Pee-peenta woleeto olo iluadeo limongolio awadu u hibuhuta to kakaa-mudiyalo. Lapatao timongolio malo mintaáa mola layahu to dulu lokaapali alihu dupoto mohiipai kaapali boito umoliyoó motidulunga ode pentadu. **41** Bo kaapali boito maleitae towamoó lohungayo. Wimbihu dululio leihuwato wau diilalo mowali umoliyoó, hiambola wimbihu huliilio loaantulu hepilo mai-mailio lobuóola

moóohuú. **42** Mongo pajule tokaapali boito oniyati momate-mateelo maó ngoáamila taulo tutupa, sababu timongolio moohe bolo woluo tamaa mololangi ode tudulio wau tumetaó. **43** Bo polowila boito longabutaó niyati limongolio boito sababu tio ohilaa mopoáahu olei Paulus. Tio malo poáhu ngoáamila tamowali mololangi lotidehu mola leimulo todeheto wau lololangi mota ode pentadu; **44** Tawewolio musi mohunuhe mota wolo motidihu to duduu-piyaalo meaalo topoó lokaapali boito. Wolo dalala odieelo mola ami ngoáamila loáahu tunggula tudulio.

**28:1** Tou matotudulio wolo loáahu, bolo ilotaawa lami deú pulo boito ilunte Malta. **2** Tuango lipu lopulo boito mopiohe daá olami. Timongolio lololimo olami ngoáamila wolo mopiohe wau helopo deita tulu olami sababu malodehu mai didi wau dulente olo mohuhulo. **3** Tei Paulus malo himoái ayu, wau helo podutu maó aaa-yuwaalo boito totulu. Tou tio donggo hemohutu uito, tulide tuwau mailumualai, sababu patulio lotulu boito, tulusi lolopango uluúlio. **4** Tou tuango lipu lopulo boito loóonto tulide boito ntaya-ntayanga to uluú lei Paulus, malo loiya timongolio ngota-timongota, "Tau botie tantulo maó tamoomatea mate-mateelo maó, sababu penu boli tio maloáahu mai lonto musiba todeheto, Dewi Uáadili diila mopoluli olio tumumulo." **5** Bo tei Paulus lopongeeé maó tulide boito ode delomo tulu lou diila loólaasa longongoto penu boli ngoidi maó. **6** To pikiilangi limongolio ngopeéepo mola uluú lei Paulus mamó matangai meaalo debolo tio mamó dehulo mola wau mate. Bo tou timongolio donggo hiwimaawa ngoolo wakutu mola hiheolio wau dia-diaalu maó hitua-hituawua upolu-polutuó u lotoduo mai to olio, yi pikiilangi limongolio malo bolió tulusi timongolio loloiya deú tei Paulus yito dewa. **7** Diila molaminga monto tambati boito woluo huta miliki lei Publius, tadihudihu pantungo lebe-lebe topulo boito. Wolo mopiohu hale tio lololimo olami debo odelo tamulio tolo hui mola hiheolio. **8** Tou boito tiyamolio donggo mongongoto, he polipitolo wau hemongili loduhu. Tei Paulus lonaó mota lomilohe oliyamolio tadonggo mongongota boito tulusi maloduá wau lomintaá uluú odeitaatio tilinggula tio loluli. **9** Sababu u lotoduo mai boito, ngoáamila tahi ngongota topulo boito helonaó mai

odelei Paulus, wau timongolio piloó lulilio maó. **10** Timongolio helongohi olami palaseni dadaata, wau tou ami mamobite, timongolio helodelo mota ode kaapali ngoáamila upalaluo lami tobibite lami. **11** Tou matolo hula mola teto, ami lomonggato lonto pulo boito lotitaé tokaapali tuwau lonto Aleksandria u ngotilonggadu sembo lopolo huhulo raburabua topulo boito. Kaapali boito pakepake tuoto "Dewa Pingi Kastor wau Poluks". **12** Ami lotirabua tokota Sirakusa wau lotibiluloá mota teto tolo hui mola. **13** Lonteeto ami luli lobite lotiduluhe mota to pentadu demola kota lo Regium. Loombulio mola dupoto malo hiipai lonto hulialio, tilinggula bo todelomo duuhui ami malei dungga mola ode kota Putioli. **14** Mota teto ami lodunggaya wolo dengolo lota tapalacaya li Isa, wau sababu tiloduo limongolio ami lotibiluloá woli mongolio ngodimingu mola hiheolio. Lapataó ami lomonggato ode Roma. **15** Mongo wutato to Roma tapalacaya li Isa loódungohe habari pasali lami, tilinggula timongolio lonaó mai leidungga ode Patali Apius wau Tambati Pohuhelia Totolu, u lololimo maó olami. Tou tei Paulus lodunggaya woli mongolio, tio lolapali mola sukuru ode Allahu Taaala wau hilaalio malowali sabari. **16** Tou malei dungga mola ode Roma, tei Paulus yiluasialio lotibiluloá tutuwau kakaawali topajule ngota. **17** Tou matolo hui mola, tei Paulus lotiangai tahimuloa lo ulipu taulo Yahudi ngotambatilo maó. Wau tou timongolio mahiámbua, tio loloiya ode limongolio, "Mongo wutato! Watia diila ototala wolo-wolo to bangusanto, meaalo lolambanga uúdu u tilolimonto mai lonto linenemoyaanto. Penu boli odito watia yilaúpio to Yerusalemu wau yiludulio ode tau-tauwalo Roma. **18** Tou palakala lowatia pilalakisaalio, timongolio ohilaa molopata olaatia, sababu malo ilaalo watia diila helohutu totala penu boli tuwau maó upaatuti pohukuumaniyalo hukuumani mate. **19** Bo sababu tau-tauwalo Yahudi helo tehengi olaatia, yi bolo pakusa watia helohile wolo moóohui palakala lowatia butoóla to bubutoó li Kaisari lo Roma. Pilohutu lowatia uito diila sababu watia odudulohu u hitua-tuawua tobangusa lowatia lohihilao. **20** Wau uitolo sababuulio watia lohile modunggaya woli mongoli u mobibii-salawa woli mongoli; sababu watia pilungulio, tumbaó sababu Tamoo-poáhua tahe halapuo bangusa lo Isirailu." **21** Lapataó timongolio loloiya maó olio,

"Amiaatia diipo lololimo tuladee ngopita maó lonto Yudea pasali lo Wutato. Wau diaaluo penu boli ngotaa maó lowutato mola lonteeto mai lodelo habari pasali lo Wutato meaalo helo bisala u mobulilo pasali lo Wutato. **22** Bo amiaatia ohilaa olo modungohe pasali loui opopalacaya lo Wutato, sababu amiaatia ngoáamila maloó dungohe tahipo soseroa pongaajali u dihudihu to Wutata boito." **23** Yi timongolio wolei Paulus lolantu maó toui dulahio tuwau u modunggaya. Todulahee boito ngohuntua tau lonaó mai ode tambati piloti biluloá lei Paulus. Tumulalo mai dimodupo tunggula lolaango tei Paulus lotombangaó wau helo pohabari olimongolio habari pasali loui woloolo mola Allahu Taaála momalenta odelo Olongia. Wolo lomake aaa-yatiyaala lonto Buku lei Musa wau Buku lo Mongo nabi, tei Paulus helo tolopani mohutu olimongolio palacaya pasali li Isa. **24** Woluo tapalacaya toui wolo uiloia lei Paulus, bo woluo olo tadiila palacaya. **25** Wolo huhaama u tinggai bubulemenga timongolio lololaa maó tambati boito, lapataó tei Paulus loloiya u odie mola botie olimongolio, "Memangi tiluhata daá wolo upilo tahuda mai lo Rohullah lotimbulude toli Nabi Yesaya odeli nenemoya limongoli! **26** Allahu Taaála lotahuda, 'Ponaólo polelea maó ode bangusa botie: Timongoli malaito modungohe, bo diila mongalati; timongoli matulusi mopoótuoto bo diila motota wolo u motoduo mai. **27** Sababu pikiilangi lobangusa botie malowali lopuntuhu, bulonga limongolio malowali bungolo wau mato limongolio malowali pitoó. Utie motoduo mai alihu mato limongolio diila maó moóonto, bulonga limongolio diila maó modungohe, pikiilangi limongolio diila maó mongalati, wau diila maó mohualingai ode Olai, lapataó Wai mamu pooluli maó olimongolio.' " **28** Mapulitio tei Paulus loloiya, "Musi otaawa maó lo Mongo wutato dei habari pasali loui moáahu umonto Allahu Taaála botia mapilopo habari ode babaa-ngusawalo wewo tadiila Yahudi. Timongolio mamu duduááo!" **29** Lapataó tei Paulus loloiya odito, tau-tauwalo Yahudi boito lololaa maó tambati boito sambela hipo bubuutolawa ngota timongota. **30** Dulo taunu mola hiheolio tei Paulus lotibiluloá to Roma, tobele u sileuwario lohihilao. Tio sanangi helo lolimo ngoáamila tahi ponaówa mai momilohe olio. **31** Wau wolo buheli tio helo pohabari olimongolio pasali woloolo mola Allahu

Taáala momalenta odelo Olongia wau pasali lo Eeya Isa Almasi. Tei Paulus helohutu uito wolo beebasi, louí hetai-taibutolio.

**1:1** Mongo wutato ngoáamila to Roma tapilonua lo Allahu Taáala wau tamaa tiliango Allahu Taáala u lowali umati-Lio. Allahu Taáala malo lulaoto wau lomuduó olaatia tolomodu u mopohabari Habari Mopiohe monto Allahu Taáala. **2** Habari mopiohe boito mapilo danti lo Allahu Taáala tojamani muloololio mai lotimbulude tomongo nabi-Lio wau malei tuladu todelomo Kitabi. **3** Habari Mopiohe boito tomimbihu walaó Allahu Taáala, Eeyanto Isa Almasi. Debo odelo watade lomanusia, Tio wali mai lei Dauda, **4** bo debo odelo watade lo Eeya, Tio yito malo ilaalo walaó Allahu Taáala. Uito ilobukuti wolo kawasa upolu-polutuó lotimbulude to obobongu-Lio mai touí mailate maó. **5** Lotimbulude o-Lio olo Allahu Taáala longohi mai olaatia ponu lowali rasulu, alihu watia -- u mohulumati maó li Isa Almasi -- modelo tau-tauwala monto totoonulalo bangusa alihu palacaya wau modungohu. **6** U milakusudu lowatia wolo totoonulalo bangusa yito timongoli olo tawoluo to Roma; timongoli olo matilia-Ngio lowali umati li Isa Almasi. **7** Uito sababuulio watia loluladei olimongoli. Pohileaala duá Allahu Taáala ti Paapanto wau ti Isa Almasi mongohi mai balakati wau salaamati olimongoli. **8** Bohu-bohulio motimbulude li Isa Almasi, watia molapali mola sukuru ode Allahu Taáala sababu Mongo wutato ngoáamilalo; sababu ngoilanggubu dunia maloó dungehe deú timongoli palacaya daá li Isa Almasi. **9** Watia laito hemoéela mola olimongoli wonu watia moduá. Allahu Taáala sakusiilio deú wolo uiloiya lowatia boito otutu. Tiolo Allahu Taáala tahe bayawa lowatia louí lealeaatu lohilao wolo helo pohabari Habari Mopiohe pasali lo Wala-Io. **10** Watia momolohone mola wolo tióotutua ode Allahu Taáala, pohileaala duá Allahu Taáala mopoluasi mai olaatia botia mola mobiilohe woli mongoli. **11** Sababu watia ohilaa daá modunggaya woli mongoli alihu watia moótayade ponu monto Rohullah u mopoó lotolo olimongoli. **12** Makusudu lowatia yito sababu ito peé-peéenta malo malacaya li Isa Almasi, yi ito mowali tinggai mopopooó lotolo. **13** Mongo wutato! Otohilaa lowatia alihu otaawa limongoli deú mapooó-poódaata watia

omakusudu mola mobiilohe woli mongoli bo laito woluo wambaó umoo tabuto. Otohilaa lowatia towolota limongoli olo kalaja lowatia otilapulio odelo woloolo mola kalaja lowatia mailo tilapulo towolota lotau-tauwala tadiila Yahudi to tataa-mbatiyalo uwewo. **14** Sababu watia owaajibu ode ngoáamila bangusa; tamaó adabu wau tadiila oádabu, tahi osikolawa meaalo tadiipo hiósikolawa. **15** Uitolo sababuulio watia ohilaa daá mopohabari Habari Mopiohe boito ode limongoli tahi biluloáwa mola to Roma olo. **16** Watia palacaya daá to Habari Mopiohe boito, sababu habari boito yito lotolo Allahu Taáala u mopoáahu mai ngoáamila taa palacaya; bohu-bohulio taulo Yahudi, wau bangusa wewo olo. **17** Sababu wolo Habari Mopiohe boito Allahu Taáala mopo bilohei woloolo mola pohuliilio wumbuta lomanusia wolo Allahu Taáala muli mowali mopiohu; pohuliilio yito palacaya to Allahu Taáala monto bohulio tunggula pulitio. Uito tutuwauwa debo odelo u leituladu todelomo Kitabi, "Taa palacaya to Allahu Taáala tilinggula wumbutalio wolo Allahu Taáala muli mowali mopiohu, tau boito matumumulo!" **18** Lonto sologa Allahu Taáala lopo bilohei muluka-Lio ode ngoáamila dusa wau ololeeto lomanusia, sababu ololeeto boito longabuto tomanusia u moóonuhe pongaajali u otutu pasali lo Allahu Taáala. **19** Wolo umowali otaawa lomanusia pasali lo Allahu Taáala malo patato todelomo hilaa u maloótapu tenelo Eeya lomanusia, sababu Allahu Taáala lohihilao malo poilaalo uito ode manusia. **20** Tumulalo mai Allahu Taáala lopowali dunia, sisii-patiyaalo Allahu Taáala udiila oontonga, deúito-yito owowoluwoa-Lio odelo Allahu Taáala wau kawasa-Lio udiila opulitio, mailo pahamua lomanusia lotimbulude to ngoáamila uma pilowali-Lio mai. Oditolio manusia sama-samaata diila o alasani umopo otutu lobatanga. **21** Manusia moóonuhe lo Allahu Taáala, bo manusia diila mohulumati o-Lio odelo Allahu Taáala wau diila olo mosukuru mola to o-Lio. Boliio maó manusia bo hemo mikiilangi udiila ota-otaa maó; hilaa limongolio malowali lodiólomo. **22** Timongolio molaasa batangalio molinepo, lebe-lebe pomaó timongolio mohulodu. **23** Diilalo Allahu Taáala taó hiheo-hiheolo maó tahe tuboo limongolio, bo tumbaó bubuiyalo udebo odelo mahaluku umowali mate; deúito-yito manusia, bulungi, binatanggi u oáatio wopato, wau binatanggi u hialapa. **24**



Sababu uito Allahu Taaala lopoluli olimongolio kiluwasa lohilaa limongolio u mohutu moólusa, tilinggula timongolio helohutu susuu-aliyaalo ukotolo ode timongotalio lohihilao. **25** Allahu Taaala taótutu, tiluloá limongolio wolo hitua-tuawua upaaluti. Diila Talopowali mai bo tumbaó tapilowali boitolo tatilubo wau tabilaya limongolio. Lebe-lebe pomaó talopowali mai boitolo tawajibulio pujiolo ohiheo-hiheolo maó! Amin. **26** Sababu manusia helohutu u odito, yi Allahu Taaala lopoluli olimongolio loduduá napusu limongolio u hina. Mongobua limongolio diilalo ohilao tomongo lolai debo odelo u biasaalio tomanusia, bo ohilao topangelio mongobua. **27** Mongo lolai olo debo odito; timongolio diilalo paatuti mohumbuta wolo mongobua, bo obilahi topangelio mongo lolai. Mongo lolai helohutu huhutu u moóolito topangelio mongo lolai, tilinggula timongolio lololimo polo tontuli u lotuuúde wolo huhutu limongolio u moleeto boito. **28** Masababu manusia diila molaasa palalu moóonuhe to Allahu Taaala, yi hiluliaalo maó lo Allahu Taaala pikiilangi limongolio lowali lolusa, tilinggula timongolio helohutu susuu-aliyaalo udiila opohutuo limongolio. **29** Hilaa limongolio ngoáamila polupolu wolo u moleeto, udiila otutu; polupolu wolo langgamu, polupolu wolo ohutodu wau laasa molonuó; polupolu wolo hilaa umomate mate-mateelo maó, moloohulua, mohimbulo wau moniyatia. Timongolio motohilaa molojiya taa wewo, **30** motohilaa mopooleeta tanggulo taa wewo; timongolio soombongi wau diila oádabu, wau molonuó to Allahu Taaala, wau motohilaa mosilita toongi. Timongolio motota mololohe totoonulalo pohuli bohu wolo mohutu u moleeto. Timongolio moluwali tomongo dulaa; **31** timongolio diila motohilaa mongalati taa wewo, timongolio diila tatapu wau molotolo hilao wau diila omanusia. **32** Otaawa limongolio, deú moduduá butoo lo Allahu Taaala, taa mohutu maó ngoáamilalo boito paatuti hukuu-maniyola mate. Penu boli odito timongolio helohutu olo susuu-aliyaalo boito; wau tumbaó akoro olo taa wewo hipohutua u odito.

**2:1** Masababu uito, mongo Wutato, tatoonu Wutato, tilunggula Wutato motohilaa mopotala taa wewo? Wutato diila owolo-wolo u mopodulua lobatanga! Sababu wonu Wutato mopotala taa wewo, lebe-lebe pomaó

Wutato lohihilao helohutu huhutu u tutuuwauwa debo odelo timongolio, yi Wutato malo podehu hukuumanu tobatanga lohihilao olo. **2** Otaawanto deũ wonu Allahu Taála mopodehu mai hukuumanu ode tau-tauwalo tahe lohutu totoonulalo huhutu udebo odelo uito, yi putuusani lo Allahu Taála boito otutu. **3** Bo timongoli, Mongo wutato, helohutu lohihilao olo susuu-aliyaalo u pilotuludi mongoli ode tau-tauwala wewo! Wau to pikiilangi limongoli u timongoli moólopato monto hukuumanu lo Allahu Taála? **4** Meaalo timongoli diila botie paduli omuula lo Allahu Taála wau otanggalo hilaa boli osabali-Lio u odito udaá? Tantu otaawa limongoli deũ Allahu Taála mopo bilohei opopiohu hilaa-Lio sababu Tio motohilaa alihu timongoli molilihu monto dusa limongoli. **5** Bo timongoli baaangiola wau diila mohuto molomelo. Masababu uito timongoli lohihilaalo talohutu hukuumanu limongoli heóduhenga mola buheetio to Dulahe Kiama, wonu Allahu Taála mopoilaalo mai mulukaa-Lio wau mopodehu hukuumanu u aadili. **6** Sababu Allahu Taála mamó lontuli mai timiidu tau motuuide wolo huhutuulio. **7** Allahu Taála mongohi mai tutumulo tutu wau ohiheo-hiheolo maó ode limongolio taa tatapu wau molotolo hilao hemohutu mopiohe u moótapu maó ulailaió, u hulu-hulumati wau u abadi. **8** Bo tau-tauwala tamopo udaá batangalio lohihilao wau diila mohuto modungohe to Allahu Taála, bo moduduá u moleeto yi tau-tauwalo boito malaba-labaalo mulukaa mai lo Allahu Taála. **9** Timiidu taa motohilaa mohutu u moleeto masakisa wau modutolo; bohu-bohulio taulo Yahudi, wau odito olo babaa-ngusawalo wewo. **10** Bo ngoáamila taa motohilaa mohutu mopiohe mawohia-Lio mai ololaió wau ohulumati wau osalaamati lo Allahu Taála; bohu-bohulio ode taulo Yahudi; odito olo ode tau-tauwalo bangusa wewo. **11** Sababu Allahu Taála mopohutu mai ngoáamila tau tutuuwauwa. **12** Tau-tauwalo bangusa wewo ilodusa lou diila motota butoó agama lo Yahudi. Oditolio timongolio hukuu-manialo to bulemengo lobutoó boito. Bo tau-tauwalo Yahudi ilodusa tou mailotaawa limongolio butoó boito; sababu uito timongolio mapohilelio wolo moóohuu olo dadaasali tobutoó boito. **13** Sababu taamuli mopiohe wolo Allahu Taála, diila bo sababu tau boito malotota butoó agama lo Yahudi, bo sababu tio helohutu wolo uwoluo todelomo butoó boito. **14**

Tau-tauwala bangusa wewo diila motota butoo agama lo Yahudi. Bo wonu timongolio to ilohilaa lohihilao mohutu wolo u pilomalanta lobutoo boito, hilaa limongolio lohihilaolo umowali butoo toli mongolio, eleponu timongolio diila motota butoo agama lo Yahudi. **15** Piili limongolio mopo bilohei deu wolo u pilomalanta lobutoo boito malei tulade tohilaa limongolio. Hilaa u malootapu tinelo Eeya limongolio olo mopo bukuti mai suali boito, sababu timongolio lohihilao tingga maito potalalio tingga maito pootutuo lo pikiilangi limongolio. **16** Odieelo mola u de mamotoduo mai todulahee u matilantu boito. Todulahee boito -- moduduá Habari Mopiohe upilo habari mai lowatia -- Allahu Taáala motimbulude li Isa Almasi, mamomutoo ngoáamila u hitua-tuawua u sangaja hetutuo lohilao wau pikiilangi lotaa ngoáamila. **17** Bo botia woloolo mola wolo Mongo wutato lohihilao? Wutato longaku lohihilao taulo Yahudi. Wutato lotiwunela tobutoo agama lo Yahudi wau Wutato leengahu wumbuta lo Wutato wolo Allahu Taáala. **18** Wutato lootapu totoonulalo potuhata lonto butoo boito, tilinggula ilotaawa lo Wutato kahandaki lo Allahu Taáala wau motota molantu toonu u mopiohe. **19** Wutato yakini deu Wutato yito tauwa lotaa pitoo wau tilango odeli mongolio tawoluo todelomo u modiolomo; **20** Wutato tamoo didikia totau-tauwalo tao adabu dupadupapa wau guru lotau-tauwalo tahi. Wutato yakini deu todelomo butoo agama lo Yahudi, Wutato o toonulalo pongotota wau o pongajali u otutu. **21** Wutato hemo ngaajali taa wewo; naa yilongola Wutato diila helo ngaajali batanga lohihilao? Wutato hemo ngaajali tau alihu diila maoo potao, lebe-lebe pomaoo Wutato lohihilao hemotao! **22** Wutato hemo ngaajali tau alihu diila maoo pojina, lebe-lebe pomaoo Wutato lohihilao hemojina! Wutato molonuo to balaahala, lebe-lebe pomaoo Wutato lohihilao hemohama babaa-langiyaalo lonto bebee-leyaalo balaahala. **23** Wutato hemo pomangga-mangga mola deu Wutato obutoo lei Musa, lebe-lebe pomaoo Wutato hemohina Allahu Taáala lou diila loduduá buto-lo. **24** Todelomo Kitabi tulatulade odie, "Sababu timongoli, tau-tauwalo Yahudi, yi tanggulo Allahu Taáala pilo najisilio towolota lo babaa-ngusawalo wewo." **25** Wonu Wutato modungohe tobutoo agama lo Yahudi, yi tuuna lo Wutato ohunalio olo. Bo wonu Wutato diila mowali

moduduó susuu-aliyaalo u pilomalenta todelomo butoó boito, yi tuuna lo Wutato diila ohunatio sama-samaata. **26** Wonu ngotaalio diila Yahudi, tadiila tiluuna, moduduááo butoó agama lo Yahudi, wolo Allahu Taáala diila mongangapu olio odelo tamaa tiluuna? **27** Wau tau-tauwala tadiila tiluuna boito mamó potala to Wutato taulo Yahudi, sababu Wutato obutoó agama lo Yahudi wau Wutato tiluuna, bo Wutato lolambanga butoó boito. Timongolio diila tiluuna, bo tumbaó timongoliolo tahemo dungohe butoó agama lo Yahudi. **28** Sababu taulo Yahudi u pulua diila bo tanggulio wambaó taulo Yahudi; wau taa u tióotutua tiluuna diila taa u tiluuna odelo lahiri wambaó. **29** Boliio maó, ngotaalio lo Yahudi u pulua yito taa u hilaalio ojiwa Yahudi; wau tuuna u tutu yito tuuna tohale u kilalaja lo Rohullah, diila u tulatulade todelomo buku. Taa debo odelo uito mamololimo poilaalo momuji monto Allahu Taáala, diila monto manusia.

**3:1** Wonu odito, wolo untungilio mowali taulo Yahudi? Wau wolo hunalio moduduááo wuúdu lotuuna? **2** Tantulo maó dadaata hunalio! Bohu-bohulio, sababu totaulo Yahudilo Allahu Taáala lopo palacaya maó tataa-hudaalo Allahu Taáala. **3** Bo woloolo mola wonu ngotaalio taulo Yahudi diila tatapu wau molotolo hilao? Wolo sababu uito Allahu Taáala mamowali diila tatapu wau molotolo hilao? **4** Tantu diila! Sababu malo patatai Allahu Taáala laito otutu, eleponu timiidu tau hipo himbuloa. Todelomo Kitabi tulatulade, "Wajibulio yió obukuti otutu todelomo wolo uiloiyamu, wau yió moóhaama tou yió butoólio." **5** Bo wonu u aadili lo Allahu Taáala malebe henaasa mai, masababu ito helohutu udiila otutu, wolo u mamusi loiyanto? Deú Allahu Taáala diila aadili wonu Tio mohukuumani mai olanto? (Memangi yiyintu botie paatuti odelo manusia.) **6** Sama-samaata diila! Sababu wonu Allahu Taáala diila aadili, woloolo mola Tio mowali momutoái dunia botie? **7** Bo wonu sababu huhutu udiila otutu, wolo u otutu pasali lo Allahu Taáala helebe oontonga daá tilunggula Tio piluji, yi yilongola taa umohutu moleeto boito donggo pilopotala odelo taa odusa? **8** Wau yilongola ito diila mowali molojiya, "Mopiohulo ito mohutu u moleeto alihu tumoodei umopiohe?" Memangi woluo tau-tauwalo tahe lohina olaatia lou hemolojiya deú watia malo loiya odito.

Tau-tauwala debo odelo uito patutilio hukumanio lo Allahu Taáala. **9** Naa, wolo huhuloánto odelo taulo Yahudi lebe mopiohu wolo huhuloio lobangusa wewo? Sama-samaata diila! Mailoiya mai lowatia deü mopio taulo Yahudi meaalo bangusa wewo, ngoáamilalo makiluwasa lodusa. **10** Debo odelo u tulatulade todelomo Kitabi, "Diaaluo penu boli ngotaa maó taótutu, **11** diaaluo penu boli ngotaa maó tamongalati wau diaaluo penu boli ngotaa maó tamolubo Allahu Taáala. **12** Ngoáamila tau malo poolamingo batanga lonto Allahu Taáala; ngoáamila mailapalo. Diaaluo penu boli ngotaa maó helohutu u otutu; penu boli ngotaa maó diaaa! **13** Bunggohi mongolio odelo kuubulu uilonganga. Wimbulo u hidala-dalaala tumolohu monto dila limongolio, wau biihu limongolio wambaó hemo pomukaó pitana, debo odelo bisa lotulidu. **14** Tunggili mongolio polupolu wolo laáanati wau didini u moóohui. **15** Didiambangi mongolio hidiyota wonu ohilaa moposikisa wau momate tau mate-mateelo maó. **16** Oáantulu wau osuusa, pilo loladi mongolio ode utoonulalo maó. **17** Diila otaawa limongolio dalalo poáahuwalo, **18** wau diila mohulumati Allahu Taáala." **19** Botia bolo ilotaawanto deü ngoáamila u tulatulade todelomo butoo' agama lo Yahudi, deüito-yito duólo tau-tauwala tawoluo towalungo pamalenta lobutoo' boito. Loui odito diaaluo penu boli ngotaa maó tamoo' wohi alaasani wolo-wolo poli wau ngoilanggubu dunia mowali pohile wolo moóohui lo Allahu Taáala. **20** Sababu diaaluo penu boli ngotaa maó mowali mopiohe wolo Allahu Taáala masababu tau boito helohutu susuu-aliyaalo uwoluo todelomo butoo' lo agama. Boliio maó butoo' boito bo mopobilohei tomanusia deü manusia odusa. **21** Bo botia Allahu Taáala malo pobilohei dalalo woloolo mola manusia mopiohe wo-Lio; wau dudelolio boito diaaluo aitalio wolo butoo' agama lo Yahudi. Bubuu-kuwaalo lei Musa wau bubuu-kuwaalo lomongo nabi tumbaó helo poilaalo mai suáli boito, **22** deü Allahu Taáala mowali mohutu manusia mopiohe wo-Lio, tumbaó wonu manusia palacaya li Isa Almasi; Allahu Taáala mohutu mai utie ode ngoáamila taa palacaya li Almasi; sababu diaaluo hiheedio: **23** Ngoáamila tau mailodusa wau lolamingo lonto Allahu Taáala taóhilaa mopoáahu olimongolio. **24** Bo sababu odehu hilaa lo Allahu Taáala wambaó uilohi mai wolo bebasi, wumbuta lomanusia wolo Allahu

Taaala luli lopiiohei; dudelolio yito: manusia yilopatai li Isa Almasi. **25** Allahu Taaala lopobake mai li Isa Almasi alihu wolo opopate-Lio boito manusia poilaalolo molopato monto totala wonu timongolio palacaya o-Lio. Allahu Taaala lohutu odito u mopo bilohei o adili-Lio. Sababu tou yilalu mola masilabalia lo Allahu Taaala duduu-sawaalo manusia, tilinggula Tio diila lohukuumani mai olimongolio. **26** Bo botia hepilohutu-Lio ode dusa boito u mopo bukuti maó o aadili-Lio. Wolo dudelo boito Tio mopo bilohei deu batanga-Lio otutu; wau timiidu taa palacaya li Isa poilaalo-Lio mai odelo taa maluli lopiiohe wolo Allahu Taaala. **27** Masababu uito ito didu o alasani umopo mangga-mangga lohilao. Yilongola odito? Wolo sababu ito helo ponaó u tulatulade todelomo butoó agama lo Yahudi? Diila. Bo sababu ito palacaya. **28** Sababu pulito lohuhamaliao yito odie: Tau poilaalolio muli mopiiohe wolo Allahu Taaala, diila bo sababu tio helo ponaó wolo u tulatulade todelomo butoó agama lo Yahudi, bo sababu tio palacaya li Isa Almasi. **29** Meaalo Allahu Taaala boito Allahu Taaala taulo Yahudi wambaó? Diila, Tio olo Allahu Taaala lobangusa wewo? Ooó, memangi Tio olo Allahu Taaala lobangusa wewo! **30** Sababu Allahu Taaala bo tuwau. Tiolo tahe lohutu tau-tauwalo Yahudi luli lopiiohe wolo Allahu Taaala sababu timongolio palacaya. Wau Tiolo olo tahe lohutu tau-tauwalo bangusa wewo luli lopiiohe wolo Allahu Taaala; uito olo sababu timongolio palacaya. **31** Wolo utie boliilio deu sababu ito palacaya li Almasi, yi ito molapi butoó agama lo Yahudi? Sama-samaata diila! Tumbaó wolo opopalacayanto boito, ito mohulumati butoó boito.

**4:1** Wonu odito, wolo umowali loiyanto pasali lei Abraham, nenemoya lo bangusanto? Woloolo mola uilo lasawalio? **2** Wonu susuu-aliyaala u hepilo hutulio loó sababu Allahu Taaala lololimo olio odelo tamo eengahe hilaa lo Allahu Taaala, yi woluo olo alaasani to olio u motiwengahe. Bo tio diila mowali motiwengahe totalu lo Allahu Taaala. **3** Todelomo Kitabi tulatulade, "Tei Abraham palacaya to Allahu Taaala, wau sababu opopalacayalio botie tio tilolimo lo Allahu Taaala odelo taa u moéengahe hilaa lo Allahu Taaala." **4** Taa u mokalaja, mololimo wuupa; wau wuupalio



diila ilanggapulio odelo tuwaulio lowowohi, sababu uito yito hakuulio. **5** Bo woluo tadiila motiwunela tokela-kelalio lohihilao; tio mopo palacaya batangalio ode Allahu Taáala tamoponasa mai taódusa molopato monto totalalio. Dadaasari to palacayalio boitolo Allahu Taáala mololimo tau boito odelo tamoo sanangi hilaa lo Allahu Taáala. **6** Odieelo mola huhama lei Dauda olo; uito sababuulio tio loloiya hinta sanangi tutu ode taa u duólo Allahu Taáala matilolimo odelo taa uloo sanangi hilaa-Lio, lou diila piloótuoto Allahu Taáala totoonulalo huhutu lotau boito. Tei Dauda loloiya odie, **7** "Potisanangilo tutu taa u totoonulalo totalaalio milaaapu wau totoonulalo dusalio ilambungu lo Allahu Taáala. **8** Potisanangilo tutu taa u totoonulalo dusalio diila pilohile wolo moóohuu lo Eeya!" **9** Wolo loiya potisanangi tutu botie bo pilopo dulungo wambaó ode tahe loduduá wuúdu lotuuna? Meaalo olo ode tau-tauwalo tadiila helo dudua wuúdu lotuuna? Mailoiya lami tou dipolulio mai, deu tei Abraham tilolimo Allahu Taáala odelo taloo sanangi hilaa-Lio, sababu tei Abraham palacaya to Allahu Taáala. **10** Naa, omolua Allahu Taáala lopoilaalo mai suáli boito? Tou dipolulio mai meaalo lapatio maó tei Abraham tiluunalio? Memangi tou tio dipo tiluuna, diila lapatio maó. **11** Tio tiluunalio lapatio maó, wau tuunalio boito bo odelo tuoto deu Allahu Taáala malo lolimo olio odelo taloo sanangi hilaa lo Allahu Taáala, sababu palacaya to Allahu Taáala. Tio tilolimo Allahu Taáala tou tio dipo loduduá wuúdu lotuuna. Wau tei Abraham lowali tiyamo delo pohuli lorohani ode ngoáamila taa palacaya to Allahu Taáala, wau u sababuulio matilolimo Allahu Taáala odelo taloo sanangi hilaa-Lio, eleponu timongolio diila loduduá wuúdu lotuuna. **12** Tei Abraham olo tiyamo delo pohuli lorohani ode tau-tauwalo talo dudua wuúdu lotuuna. Tio tiyamo delo pohuli lorohani limongolio diila bo sababu timongolio helo dudua wuúdu lotuuna, bo sababu timongolio olo hitumula wolo palacaya ode Allahu Taáala, tutuuwauwa debo odelo tei Abraham tou tio diipo loduduá wuúdu lotuuna. **13** Allahu Taáala lodanti odelei Abraham wau waliilio mola deu dunia botie mamowali miliki lei Abraham. Allahu Taáala lodanti mai odito diila sababu tei Abraham helo dungohe tobutoó agama lo Yahudi, bo sababu tio palacaya to Allahu Taáala tilinggula tio tilolimo Allahu Taáala odelo taloo sanangi hilaa-Lio. **14**

Sababu wonu bo tau-tauwalo tamo dungohe to bubuu-toóowalo agama lo Yahudi wambaó tamaa mololimo wolo u pilodanti mai lo Allahu Taáala, yi palacaya to Allahu Taáala diila ohunalio sama-samaata, wau danti lo Allahu Taáala olo toongi wambaio. **15** Butoó agama lo Yahudi mopodungga mai hukuumanu lo Allahu Taáala. Bo wonu butoo diaaluo, yi totala olo diaaluo. **16** Oditolio danti lo Allahu Taáala boito dadaasali palacayalio lotau ode Allahu Taáala. Uito mowali tuwaulio pongaku ode ngoámila wali mola lei Abraham deu danti boito yilohi-Lio mai ode limongolio odelo tuwaulio lo wowohi u beebasi monto Allahu Taáala; diila bo toli mongolio tahemo dungohe tobutoó agama lo Yahudi wambaó, bo toli mongolio olo taa palacaya to Allahu Taáala tutuuwauwa debo odelo tei Abraham palacaya to o-Lio. Sababu tei Abraham yito tiyamanto ngoámila delo pohuli lorohani. **17** Sababu Allahu Taáala lotahuda odie odelei Abraham, "Wau malo powali olemu tiyamo ode dadaata bangusa." Odieelo mola Allahu Taáala longohi mai danti boito odelei Abraham, wau tei Abraham palacaya to o-Lio. Tiolo Allahu Taáala tamopo tumulai taa mate; Tiolo olo Allahu Taáala u wolo tahuda-Lio wambaó helohutu mai wolo udipo peéenta woluo lowali woluo. **18** Tei Abraham tulusi wambaó hemo halapu mola wau palacaya eleponu tio diilalo ohalapani. Sababu uito tio malowali tiyamo lobangusa dadaata. Debo odelo ulei tuladu todelomo Kitabi, "Walimu mola mamowali mai dadaata daá." **19** Tei Abraham tou boito motota deu tio madiilalo moótapu mai wali, sababu batangalio mapanggola daá wau umululio mawimbideó ngohetuto taunu; odito olo ti Sara, dilelio boito, pulia. Bo iimani lei Abraham diila loéetu. **20** Tio debo palacaya wau yakini danti lo Allahu Taáala. Tumbaó iimanilio bo heilo duhenga mola lotolio, tilunggula tio helomuji-muji Allahu Taáala. **21** Tio palacaya daá deu Allahu Taáala mowali mohutu wolo umapilo dantia-Lio mai. **22** Uito sababuulio tei Abraham tilolimo Allahu Taáala odelo taa umoo sanangi hilaa lo Allahu Taáala. **23** Loiya u "Tilolimo odelo taa umoo sanangi hilaa lo Allahu Taáala" leituladei diila bo wambaó odelei Abraham lohihilao, **24** bo ode olanto olo. Ito olo matolimoo-Lio odelo taa umaloó sanangi hilaa lo Allahu Taáala, sababu ito palacaya to Allahu Taáala talopo tumulai li Isa, Eeyanto, lonto opopate. **25** Ti Isa boito mailudu-Lio mai u

pateelio mate-mateelo maó sababu duduu-saanto; lapataó luli pilopo tumulai lo Allahu Taáala mai lohutu olanto luli lopiiohe wolo Allahu Taáala.

**5:1** Botia ito maluli lopiiohe wolo Allahu Taáala, sababu ito palacaya. Wau masababu uito ito hitumula todelomo u dame wolo Allahu Taáala lotimbulude li Isa Almasi Eeyanto. **2** Masababu ito palacaya li Isa, yi Tio lohutu olanto loólaasa hitua-tuawua todelomo hilao wau ponu lo Allahu Taáala, wau wolo ponu boitolo ito botia hitumula. Sababu uito hilaanto meengahe sababu ito ohalapani deú ito mamooáaasa sanangi tutu uwahi mai lo Allahu Taáala! **3** Wau lebe maó leeto, ito olo meengahe todelomo polodutolo, sababu otaawanto deú polodutolo boito mohutu tau mowali moólohu, **4** wau oólohu mamohutu tau mambo tesiyolo; uti-utieelo u mopotoodei halapani. **5** Halapani udebo odelo utie diila tamoo kikiio hilaanto, sababu hilaanto matiluanga lo Allahu Taáala wolo ponu-Lio. Allahu Taáala lohutu mai uito lotimbulude to Rohu-Lio, u mailohi-Lio mai olanto. **6** Tou ito todelomo owowoluwoa didu okawasa, ti Isa Almasi mailate ode olanto towakutu u lotuhatawa lou tilantu mai lo Allahu Taáala; lebe-lebe pomaó ito tahi tau-tauwalo tahi laminga monto Allahu Taáala. **7** Duólo tahingota-ngotaawa taadili olo mototolo tau mohuto mate. Tanu duólo tahingota-ngotaawa tamopiohe, woluo olo tau buheli mate. **8** Bo Allahu Taáala lopoilaalo mai ponu-Lio olanto tou ti Isa Almasi yilate ode olanto tou ito donggo taa odusa. **9** Botia ito maluli lopiiohe wolo Allahu Taáala lotimbulude to opopate li Almasi; sababu uito tantu ito mapo aahuwolo olo monto muluka lo Allahu Taáala motimbulude li Almasi. **10** Wonu tomaasa ito mumuusua wolo Allahu Taáala, ito pilopodeme wo-Lio lotimbulude to opopate lo Wala-Io, tidiyolo maó botia tou lapatio maó wumbutanto wolo Allahu Taáala luli lopiiohe, tantu ito mapo aahuwolo olo motimbulude to tutumuli Almasi. **11** Wau lebe maó leeto, ito olo motiwengahe to opopiohu lo Allahu Taáala lotimbulude li Isa Almasi Eeyanto. Sababu lotimbulude li Almasi, ito botia loólaasa wumbutanto u mopiohe boito wolo Allahu Taáala. **12** Dusa tilumuotai ode delomo dunia lotimbulude to ngotaalio, wau lonto dusa boito tilumoodei opopate.

Akibatilio, opopate loloópolo mola ode ngoilanggubu umati lomanusia, sababu ngoáamila tau mailodusa. **13** Tou butoó agama lo Yahudi diipo yilohilio mai, dusa mawoluo todelomo dunia. Bo dusa diila yilinggilelio, sababu diaaluo butoó u mowali lambangalo. **14** Bo, lonto jamani lei Adamu demola jamani lei Musa, opopate okawasa to ngoilanggubu umati lomanusia. Tumbaó tau-tauwalo tadiila helohutu totala wolo dudelo u tutuuwauwa debo odelo u pilohutu lei Adamu, tau-tauwalo boito olo loduduá olo kiluwasa lo opopate. Tei Adamu yito bayahu monto o-Lio tamaa dungga-dungga mai lapatio maó. **15** Bo duduulotalo boito diila tutuuwauwa; sababu wowohi mai lo Allahu Taáala lebe udaá maó, wonu pobandingio mola wolo totala u mapilohutu lei Adamu. Totala lotaa ngota loósababu dadaata taa yilate. Donggo boli lebe udaá maó poli akibati lo odehu hilaa monto Allahu Taáala wau ponu osalaamati uilohi-Lio mai totaa dadaata daá, lotimbulude to opopiohu hilaa lotaa ngota, deúito-yito ti Isa Almasi. **16** Wowohi lo Allahu Taáala olo lebe udaá tutu wolo dusa lotaa ngota boito. Sababu lapatio maó taa ngota lohutu totala, mailumualai putuusani, "Ototala". Bo lapatio maó taa dadaata helohutu dusa leidunggaló mai wowohi lonto Allahu Taáala u lopoilaalo mai, "Diila ototala". **17** Sababu totala lotaa ngota, opopate loloópolo mola ode utoonulalo maó lotimbulude totaa ngota boito. Donggo boli lebe udaá maó poli akibati lou wolo u pilohutu lotaa ngota wewo, deúito-yito li Isa Almasi. Lotimbulude o-Lio, Allahu Taáala lopodaata daá odehu hilaa-Lio totaa u odito daatalio, wau wolo diila ohunalio lopowali olimongolio luli lopiiohe wolo Allahu Taáala; timongolio maa okawasa todunia botie motimbulude li Isa Almasi. **18** Oditolio, odelo woloolo mola totala lotaa ngota malo posababu ngoilanggubu umati lomanusia hilukuumani, odito olo huhutu lotaa ngota talo dudua kahandaki lo Allahu Taáala, maloó sababu ngoáamila tau yilopato lonto totala wau yilohia-Lio tutumulo. **19** Wau odelo woloolo mola dadaata tau lowali taa ilodusa sababu taa ngota diila lodungohu, odito olo dadaata tau yiluwasia luli lopiiohe wolo Allahu Taáala sababu taa ngota lodungohu to Allahu Taáala. **20** Talongohi mai butoó agama lo Yahudi yito Allahu Taáala lohihilao. Bo helebe maó manusia hemo tolopani modungohe butoó boito, helebe maó timongolio

hipohutua totala wau odusa to Allahu Taáala. Bo helebe maó manusia hipohutua dusa, Allahu Taáala helebe maó poli momonu olimongolio. **21** Naa, ito musi mate sababu ito malohutu dusa. Bo Allahu Taáala momonu olanto wau longohi mai dalalo olanto luli lopiiohe wo-Lio. Wau sababu wumbutanto wolo Allahu Taáala maluli lopiiohe, yi Tio longohi mai tutumulo tutu wau ohiheo-hiheolo maó to olanto lotimbulude li Isa Almasi, Eeyanto.

**6:1** Wonu odito, wolo u mowali loiyanto? Mamusi ito wambaó mohutu dusa alihu Allahu Taáala helebe momonu mai olanto? **2** Tantu diila! Dusa diilalo okawasa to olanto, oditolio, diila pongalo aakali ito tumumulo mololaalaaíta mohutu dusa? **3** Diila otaawo lo Mongo wutato deú tou ito yilihualio, ito pilopo tuwau woli Isa Almasi? Uito boliilio maó ito pilopo tuwau wolo opopate-Lio. **4** Wolo polihu boito, ito yilobungio woli Almasi, wau loduduá yilate peé-peéenta wo-Lio, alihu debo odelo ti Almasi pilopo tumulai lonto opopate tokawasa li Paapa talailaió, odito olo ito mowali tumumulo todelomo tutumulo u bohu. **5** Wonu ito malowali tuwau woli Almasi sababu ito loduduá yilate peé-peéenta wo-Lio, ito mamowali tuwau wo-Lio olo sababu ito loduduá luli pilopo tumulai debo odelo Tio. **6** Otaawanto deú watadento udeedelo odelo manusia mapilate yila-yilateelo maó peé-peéenta woli Almasi toáyu salipu alihu kawasa lo watadento u odusa boito antuluwolo; lou odito ito diilalo pilowato lodusa. **7** Sababu wonu tahingota-ngotaawa mate, tau boito pilopo lopato monto kawasa lodusa. **8** Wonu ito mailate peé-peéenta woli Almasi; ito palacaya deú ito olo matumumulo peé-peéenta wo-Lio. **9** Sababu otaawanto deú ti Almasi mapilopo tumulai mai lonto opopate wau Tio diilalo mate; opopate madiilalo okawasa tobatanga-Lio. **10** Opopate u ilolaasawa li Almasi yito opopate duólo dusa. Uito lotoduo bo peéenta u ohiheo-hiheolo maó, wau tutumulo u nilaó-Lio masaatia botie yito tutumulo ode Allahu Taáala. **11** Timongoli olo musi monganggapu batanga limongoli mate duólo dusa, bo tumumulo todelomo wumbuta u motoheeto wolo Allahu Taáala motimbulude li Isa Almasi. **12** Diilalo maó polulia dusa motolo kawasa to tutumulumu upanaa alihu Wutato diila moó dudua ilohilaamu u moleeto.

**13** Diila maó wudua olo pongawaá lo batangamu ode kawasa lodusa u pohunaalo ode totoonulalo makusudu u moleeto. Bo wuduwalo mola batanga limongoli ode Allahu Taáala odelo tamaa yilimbato lonto opopate ode tutumulo. Wuduwalo mola batanga limongoli lealeaatulo maó to Allahu Taáala alihu pohunaalo u mohutu kahandaki lo Allahu Taáala. **14** Dusa diila mowali motolo kawasa olimongoli, sababu timongoli diilalo tumutumulo to walungo butoo' agama lo Yahudi bo to walungo odehu hilaa lo Allahu Taáala. **15** Botia, wolo upulito lo huhamalio? Tingga mowali ito odusa, sababu ito diilalo to walungo okokawasa lobutoo' agama lo Yahudi, bo to walungo okokawasa odehu hilaa lo Allahu Taáala? Sama-samaata diila! **16** Wolo otaawa limongoli deú wonu timongoli mohudu batanga ode tahingota-ngotaawa u mohutu otohilaalio yi timongoli yito wato lotaa dilungohe limongoli boito -- diila otaawa uito wato lodusa u modelo olimongoli ode opopate, meaalo wato tamo modungohe to Allahu Taáala, wau lou' odito muli mopiiohe wolo Allahu Taáala. **17** Bo sukuru ode Allahu Taáala! Sababu muloololio mai timongoli lowali wato lodusa, bo botia timongoli wolo lealeaatu lohilao helo dungohe pongaajali u otutu u mailohilio olemu. **18** Timongoli mailopato lonto dusa, wau botia malowali wato ode kahandaki lo Allahu Taáala. **19** Sababu huhamamu odito lulupuhu, watia lomake mai luluu-maduwala lopolowato alihu lebe gambangi timongoli mongalati. Muloololio mai timongoli helohudu batangamu lealeaatulo maó odelo wato du'olo susuu-aliyaalo ukootolo wau u moleeto ode totoonulalo makusudu u moleeto. Odito olo botia, mamusi timongoli mohudu batanga lealeaatulo maó odelo wato du'olo kahandaki lo Allahu Taáala ode totoonulalo makusudu lo Allahu Taáala utolo-tolomodu. **20** Tou' timongoli pilowato lodusa, timongoli diila tokawasa kahandaki lo Allahu Taáala. **21** Tou' boito paéeda wolo u tilolimo limongoli monto susuu-aliyaalo u masaatia botie mooolito pohutuo limongoli? Huhuu-tuwaalo huhutu boito bo modelo ode opopate! **22** Bo botia timongoli mailopa-Tio lonto dusa, wau lowali wato lo Allahu Taáala. Opaéeda yito deú Wutato tumutumulo tolomodu du'olo Allahu Taáala wau suáli boito moóto duo mai tutumulo tutu wau ohiheo-hiheolo maó. **23** Sababu opopate yito wuupa lodusa; bo tutumulo tutu wau ohiheo-hiheolo maó peé-peéenta



woli Isa Almasi Eeyanto yito wowohi uiludu mai lo Allahu Taáala wolo palacuma.

**7:1** Mongo wutatuú! Wutato ngoáamilalo malotota lobutoó. Oditolio, otaawa limongoli deú okokawasa lobutoó to tahingota-ngotaawa pohupohutu ngotilonggadu tau boito donggo tumutumulo. **2** Taabua ngota odile, humayaalio, iloáwade lobutoó todilelio bo ngotilonggadu dilelio donggo tumutumulo. Wonu dilelio mate, yi dile taabua boito molopato monto butoó u mongawade olio todilelio. **3** Wonu taabua boito tumumula wolo talolai wewo tou dilelio donggo tumutumulo, yi taabua boito iluntee lojina. Bo wonu dilelio mate, yi odelo dudelo lobutoó, taabua boito malo lopato. Wau wonu tio muli monika wolo ngotaalio talolai wewo, yi tio diila lojina. **4** Odito olo suáliilio woli mongoli, Mongo wutatuú. Duólo butoó agama lo Yahudi timongoli mailate, sababu timongoli mapilopo tuwau wolo batanga li Almasi wau lowali miliki-Lio tamaa luli pilopo tumulai lonto opopate. Tio luli pilopo tumulai lonto opopate alihu todelomo tutumulonto ito mowali ohuna duólo Allahu Taáala. **5** Sababu, muloololio mai ito tumutumulo helo duduá pipii-iliyaalo lomanusia. Tou boito totoonulalo ilohilaa u odusa, u tilumodei sababu woluwolio lobutoó agama, odulude todelomo batanganto. Uito sababuulio ito helohutu susuu-aliyaalo u moópate. **6** Bo botia ito diilalo leiáawade tobutoó agama lo Yahudi. Ito mailate duólo butoó u muloololio mai motolo kawasa olanto. Ito diilalo momaya wolo dudelo udeedelo, moduduá butoó u tulatuladu. Botia ito momaya moduduá dudelo bohu upilopo tuhata mai lo Rohullah to olanto. **7** Wonu odito, wolo u mowali polelento? Deú butoó agama lo Yahudi moleeto? Tantu diila! Bo butoó boi-boitolo u longajali olaatia pasali lodusa. Diila taótaawa lowatia wolo uito tamaá, wonu butoó lo agama diila lolojiya, "Diila maó potamaá." **8** Lotimbulude tobutoó lo agama, dusa ilohiango u helo potoodei totoonulalo hilao utamaá todelomo hilaa lowatia, sababu wonu butoó lo agama diaaluo, yi dusa olo diaaluo. **9** Watia muloololio mai tumutumulo diila obutoó lo agama. Bo tou butoó lo agama yilumenetai, dusa mawoluo **10** wau watia yilate. Yi butoó lo agama boito, u muloololio mai pilomatuju u mongohi tutumulo, bo tumbaó

lopotoduo mai opopate ode laatia. **11** Sababu lotimbulude tobutoó lo agama boito, dusa ilohiangio lohimbulo wau lomate olaatia yila-yilatelo maó. **12** Butoó lo agama bungolio mai monto Allahu Taáala, wau timiidu palenta todelomo butoo boito dudunggaalio mai monto Allahu Taáala, oditolio aadili wau mopiohe. **13** Naa, wolo utie boliilio deu u mopiohe boito mopotoduo mai opopate odelaatia? Tantu diila! Dusaalo umalo potoduo mai opopate boito. Wolo lomake u mopiohe, dusa malo potoduo mai opopate ode laatia, alihu totoonulalo piili lodusa oontonga lou mopatato. Lotimbulude to papaa-lentawalo lo Allahu Taáala, mailo bukuti deu dusa odito leetio. **14** Otaawanto deu butoo agama lo Yahudi bungolio mai monto Rohullah; bo watia botie manusia diila okawasa. Watia mapilotali lowali wato lodusa. **15** Sababu watia lohihilao diila mongalati huhutu lowatia. Suáli u otohila pohutuo lowatia, uito diila pilohutu lowatia; bo susuu-aliyaalo uilonuó lowatia, uito tumbaó u hepilohutu lowatia. **16** Naa, wonu watia mohutu susuu-aliyaalo u teteehengia wolo hilaa lowatia, uito boliilio maó watia momasisi deu butoo agama lo Yahudi boito mopiohu. **17** Oditolio, tutuulio tutu diilalo watia talohutu uito, bo dusa ukawa-kawasa tobatanga lowatia. **18** Otaawa lowatia diaaluo penu boli tuwau u mopiohe todelomo batanga lowatia; deüito-yito todelomo piili lowatia odelo manusia. Sababu woluo todelomo hilaa lowatia u mohutu mopiohe, bo watia diila mambo moponaó leeto. **19** Watia diila lohutu u mopiohe u otohila pohutuo lowatia, bo boliio maó watia helohutu susuu-aliyaalo u moleeto, udiila otohila pohutuo lowatia. **20** Wonu watia mohutu susuu-aliyaalo udiila otohila pohutuo lowatia, uito boliilio maó diila watia tahelohutu susuu-aliyaala boito, bo dusa ukawa-kawasa tobatanga lowatia. **21** Oditolio, watia malohama patoo deu butoo utieelo u dulu-dulude; deüito-yito deu wonu watia ohila mohutu u mopiohe, yi bo u moleeto wambaó u tumoodei to olaatia. **22** Batini lowatia motohila tobutoó Allahu Taáala, **23** bo watia mongalati deu todelomo batanga lowatia woluo olo butoo wewo u dulu-dulude -- deüito-yito butoo u bubuu-lemenga wolo butoo u ilaku lo aakali wau pongolaasa lowatia. Uito sababuulio watia malei awade tobutoó lodusa u dulu-dulude todelomo batanga lowatia. **24** Naa, odieelo mola

owowoluwoa lobatanga laatia; watia modungohe tobutoó lo Allahu Taáala wolo aakali wau watade lowatia, bo wolo piili lomanusia wambaó, watia taaluku todusa. Donggo boli topotalalio watia botie! Tatoonu tamohuto mopoáahu olaatia monto batanga botie u modelo olaatia ode opopate? Sukuru ode Allahu Taáala! Tio mohuto mopoáahu mai olaatia lotimbulude li Isa Almasi.

**8:1** Masaatia madidui hukuumani ode limongolio tahitumula lotituwau woli Isa Almasi. **2** Sababu butoo lo Rohullah ulohutu mai olanto tilumumula lotituwau woli Isa Almasi tamalo lopatai olaatia lonto hukuumani uloo sababu dusa wau opopate. **3** Wolo udiila mowali pohutuo butoo lo agama, sababu ito manusia molulupuhu, uito mapilohutu mai lo Allahu Taáala. Allahu Taáala maloó-laaheo kawasa lodusa todelomo piili lomanusia lou lolao mai Wala-Io lohihilao, tadungga-dungga mai todelomo owowoluwoa u tutuwauwa wolo manusia taodusa, mai loluluta dusa. **4** Allahu Taáala lohutu uito alihu kahandaki-Lio u piloilaalo todelomo butoo agama lo Yahudi boito mowali ponaoolo todelomo batanganto tahitumula loduduá to Rohullah wau diila loduduá piili lomanusia. **5** Tau-tauwalo tahitumula loduduá piili lomanusia, tulusi hemo mikiilangi wolo u otohila piili lomanusia. Bo tau-tauwalo tahitumula loduduá to Rohullah, tulusi hemo mikiilangi wolo u otohila lo Rohullah. **6** Wonu pikiilangimu kiluwasa piili lomanusia yi akibatilio opopate. Bo wonu pikiilangimu kiluwasa lo Rohullah, yi akibatilio yito tutumulo wau odudame wolo Allahu Taáala. **7** Taa pikiilangilio kiluwasa piili lomanusia, tau boito mumuusua wolo Allahu Taáala; sababu tau boito diila taaluku tobutoó lo Allahu Taáala; wau memangi tio diila mowali taaluku tobutoó lo Allahu Taáala. **8** Tau-tauwalo tahitumula helo dudua piili lomanusia, diila moosanangi to Allahu Taáala. **9** Bo timongoli diila tumutumulo moduduá piili lomanusia. Timongoli tumutumulo moduduá Rohullah -- wonu, tantulio, Rohullah otu-otutuulo maó dulu-dulude todelomo batangamu. Taa diila o Rohu li Almasi, tau boito diila miliki li Almasi. **10** Bo wonu ti Almasi tumutumulo todelomo batangamu, yi eleponu wawaumu maamate sababu dusa, bo Rohullah mongohi mai tutumulo olemu, sababu

wumbutamu wolo Allahu Taáala malopiohu. **11** Wonu Rohullah, talo potumulai li Almasi lonto opopate, tumutumulo todelomo batangamu, yi Tio talo potumulai li Almasi lonto opopate boito, mamo potumulai olo wawaumu u mowali mate boito. Tio mohutu mai uito wolo Rohu-Lio u tumutumulo todelomo wawaumu. **12** Uitulo sababuulio, Mongo wutato, ito otitihula; bo diila titihula topiili lomanusia; ito diila palalu tumumulo moduduá u otohilaalio. **13** Sababu wonu timongoli tumumulo moduduá piili lomanusia, yi timongoli maamate; bo wonu wolo kawasa lo Rohullah, timongoli tulusi wambaó mopopate totoonulalo huhutuumu u odusa, yi timongoli matumumulo. **14** Tau-tauwalo tadilelo lo Rohullah, deüyito-yitomongo walaó Allahu Taáala. **15** Sababu Rohu, uilohi mai lo Allahu Taáala ode limongoli, diila mohutu olimongoli mowali wato tilinggula timongoli tumumulo wolo wohe-wohe. Boliio maó Rohullah boito mopowali olimongoli mongo walaó Allahu Taáala, wau wolo kawasa lo Rohullah boito ito mongunte Allahu Taáala boito, "Paapa, oo ti Paapai!" **16** Rohullah peé-peéenta wolo rohunto mopoilaalo mai deü ito yito mongo walaó Allahu Taáala. **17** Naa, wonu ito yito mongo wala-lo, yi ito olo ahali lowarisi-Lio u mamololimo babaa-lakatiyalo upilohetu lo Allahu Taáala ode mongo wala-lo. Ito mamololimo peé-peéenta woli Isa Almasi wolo u mapilohetu lo Allahu Taáala o-Lio; sababu wonu ito modutolo peé-peéenta woli Isa Almasi, ito mapolaió-Lio olo peé-peéenta wo-Lio. **18** Ngoáamila polodutolo u olaasanto masaatia botie, moduduá huhama lowatia, sama-samaata diila mowali pobandingiolo wolo ololaió u mapoilaalo mai olanto. **19** Ngoilanggubu aalamu malo hiwoolola hemohima wakutuulio lo Allahu Taáala mopoilaalo mai mongo wala-lo. **20** Sababu aalamu mapilo luliilio lowali lotupo, diila bo sababu hilaalio lohihilao, bo sababu Allahu Taáala malo poluli mai odito. Eleponu odito woluo olo halapani utie: **21** deü towakutu tuwau aalamu mapo lopatolo monto kawasa umoó aantulu wau mamoduduá lopato-Lio wau poudaáalo peé-peéenta wolo mongo walaó Allahu Taáala. **22** Otaawanto deü tunggula tou botie ngoilanggubu aalamu hemo poilaalo suukali sababu hidutola debo odelo ti ibu ngota hemodutola tou mopotutu mai lo taunge. **23** Wau diila bo wambaó ngoilanggubu aalamu u hemo poilaalo suukali;

ito lohihilao olo hemo poilaalo suukali todelomo hilaanto. Ito malo lolimo Rohullah odelo wowohi mai lo Allahu Taáala ubohulio, bo boli odito ito olo donggo hemohima Allahu Taáala mopo lopatai batanganto lea-leaatulo maó wau mopowali olanto mongo wala-Io. **24** Sababu wolo mohaalapu, yi ito piloáahu-Lio. Bo wonu wolo u hehalaa-puwonto boito maa iloontonganto, yi uito diilalo halapani. Sababu tatoonu tadonggo mohalapu hitua-tuawua udiipo iloontonga? **25** Bo wonu ito mohalapu hitua-tuawua udiipo iloontonganto, yi ito mohima mai o-Lio wolo sabali. **26** Odito olo Rohullah dungga-dungga mai momantu olanto wonu ito molulupuhu. Sababu diila otaawanto woloolo mola ito mamusi modua; Rohu boito lohihilao modudulaó ode Allahu Taáala u momolohone to Allahu Taáala ode olanto wolo malo odito woloolo tilinggula diilalo mowali wulitolo. **27** Yi Allahu Taáala, tamotota tuango hilaa lomanusia, mongalati u otohilaa lo Rohu boito; sababu Rohu boito momolohone to Allahu Taáala ode umati lo Allahu Taáala, wau motuuúde wolo otohilaa lo Allahu Taáala. **28** Otaawanto deú Allahu Taáala mongatulu mai totoonulalo suáli, tilinggula mongohi tilapulo umopiohe ode tau-tauwalo tamo toliango o-Lio wau tatilia-Ngio motuuúde wolo lanjana-Lio. **29** Timongolio tamaa tilulaoto Allahu Taáala, matilantu-Lio olo lonto bohulio u lowali ngolupa wolo Wala-Io, deúito-yito ti Isa Almasi. Lou odito Walaó boito lowali tabohulio towolota lomongo wutato dadaata. **30** Odieelo mola Allahu Taáala lotianga olimongolio tamaa tilantu-Lio mai leimulo; wau timongolio tatilia-Ngio boito, yiluasialio muli mopiiohe wo-Lio. Wau timongolio tailuasialio muli mopiiohe wolo Allahu Taáala, mohama tayade todelomo tutumulo Allahu Taáala lohihilao. **31** Wolo umowali loiyanto botia pasali lou ngoáamilalo boito? Wonu Allahu Taáala motiwambaó ode olanto, tatoonu tamowali moluwali olanto? **32** Wala-Io lohihilao diila piloleé-Lio mai, bo tumbaó yiludu-Lio mai u polohuna daá ode olanto ngoáamila; uwalita, Tio diila tamohudu mai de olanto totoonulalo hitua-tuawua uwewolio? **33** Tatoonu tamowali mongaibu olanto umati tatilulaoto Allahu Taáala wonu Allahu Taáala lohihilao mopoilaalo mai deú ito diila ototala? **34** Wolo woluo taóhilaa mopotala olanto? Deti Isa Almasi tamopo duulua olanto! Tiolo tamailate, wau tumbaó Tiolo tamaaluli pilopo

tumu-Lio mai lonto opopate wau maito totambati lo Allahu Taáala taókawasa. **35** Wolo woluo tamowali mongabuta li Almasi momonu mai olanto? Wolo osuusa mowali mongabuta o-Lio, meaalo oototolo, meaalo polo ngalinaya, meaalo polobiti, meaalo omosikini, meaalo baala, meaalo opopate? **36** Todelomo Kitabi tulatulade odie mola, "Ngotupa lodulahu ami tumutumulo todelomo baala lomautu sababu Eeya. Ami pilohutulio debo odelo himba umaa olotolo." **37** Diila! Tumbaó todelomo u ngoáamilalo boito ito mamoo'hama wolo wimu-wimumuto ngoáamilalo sababu Tio talomonu olanto! **38** Sababu watia palacaya daá deú to ngoilanggubu dunia, mopio opopate meaalo tutumulo, mopio malaikati meaalo takawa-kawasa, mopio aáan-jamuwalo masaatia botie meaalo aáan-jamuwalo todulahe u madungga-dungga mai meaalo ololoo-towaalo uwewolio; **39** mopio susuu-aliyaala u tohulungo, meaalo susuu-aliyaalo u todelomo dunia meaalo penu boli wolo wambaó uwewolio, ngoáamilalo diila mowali mongabuto Allahu Taáala momonu mai olanto, debo odelo u mapilo bilo-Hio mai lotimbulude li Isa Almasi, Eeyanto.

**9:1** Wolo u mapolele mai lowatia botie yito otutu sababu watia miliki li Almasi. Watia diila mohimbulo. Hilaa u maloótapu tinelo Eeya lowatia udilelo lo Rohullah helo poyakini olaatia olo deú loiya lowatia botie otutu. **2** Watia moololo daá wau hilaa lowatia dutodutolo **3** sababu mongo wutato lowatia tango bangusa wolaatia. Sababu ode limongoliolo, watia lohihilao iloheela lohilao yilanaátia lo Allahu Taáala wau biluaáala lonto li Almasi. **4** Timongolio yito umati tailo tuluoto wau Allahu Taáala lopowali olimongolio mongo wala-lo lohihilao, wau lopoilaalo kawasa-Lio olimongolio. Tio lohutu daantia woli mongolio wau longohi olimongolio butoó lo agama. Allahu Taáala lopoótaa olimongolio woloolo mola timongolio musi motabia wau timongolio olo malo lolimo totoonulalo danti-Lio. **5** Timongolio yito wali mai linenemoyanto. Ti Almasi odelo pohuli lomanusia asalii-Lio mai lonto bangusa limongolio. Tio lebe lailaió wolo ngoáamilalo. Ilopujiaalo mola Allahu Taáala u ohiheo-hiheolo maó! Amin. **6** Watia diila omakusudu molojiya deú danti lo Allahu Taáala madiilalo ohuna; bo diila ngoáamila taulo Isirailu yito umati tatilulaoto



Allahu Taáala. **7** Diila ngoáamila wali lei Abraham yito mongo walaó Allahu Taáala. Sababu Allahu Taáala lotahuda odelei Abraham, "Bo wali lei Isihaka wambaio tamaa unteelo walimu." **8** Uito boliilio maó deü wali lei Abraham tamowali mongo walaó Allahu Taáala, deüito-yito bo waliilio tapilotutu mai sababu danti lo Allahu Taáala; wau diila ngoáamila waliilio. **9** Sababu danti lo Allahu Taáala yito odie mola, "Towakutu u tilantu, Wau mamuli mohualingai, wau ti Sara mamowali owalaái talolai ngota." **10** Wau utie olo; ti Ribka helo potutu mai talolai duulota lonto tiyamo ngota, deüito-yito tei Isihaka tinenemoyanto. **11** Tou wolaó duulota boito diipo pilotutulio, Allahu Taáala malolantu tulao-Tio duolo wumbutio mola. Tulaoto Allahu Taáala boito diila lotiwunela tou wolo u mowali pohutuo lotau, bo lotiwunela to titiango Allahu Taáala lohihilao. Sababu towakutu walai Ribka mongo lolai duulota boito diipo mowali moponaó hituatuwaua umopiohe meaalo u moleeto, **12** Allahu Taáala malo tahuda odeli Ribka, "Tamohuhula mamomaya tawaliyali." **13** Todelomo Kitabi tulatulade deü Allahu Taáala lotahuda odie mola, "Tei Yako pilonu-U, bo tei Esau yilonuu-U." **14** Wolo pulito lo huhamanto botia? Deü Allahu Taáala boito diila aadili? Maatantu Allahu Taáala yito aadili. **15** Sababu Allahu Taáala lotahuda odelei Musa, "Wau mamopo bilohei odehu hilao totaa u otohila-U pobilohela lo odehu hilaa-U, wau Wau mamopo bilohei odehu hilao totaa u otohila-U pobilohela odehu hilao." **16** Oditolio, putuusani lo Allahu Taáala boito diila wunewunela to iloheela lohilao lomanusia meaalo to tolopani lomanusia, bo to opopiohe hilaa lo Allahu Taáala wambaó totaa tilulao-Tio boito. **17** Sababu todelomo Kitabi tulatulade, "Allahu Taáala lotahuda odeli onlongia lo Masiri, Wau mopowali olemu onlongia wolo makusudu bo tuwau botie wambaó, deüito-yito alihu wolemu, Wau mopo bilohei okokawasa-U wau mohutu tanggulu-U masa-masahulu to ngoilanggubu dunia." **18** Oditolio, Allahu Taáala modehu hilao ode tahingota-ngotaawa, wonu Allahu Taáala mokahandaki odito. Wau Allahu Taáala olo moósababu ode tahingota-ngotaawa mowali baangiyolo, wonu Allahu Taáala mokahandaki odito. **19** Naa, Wutato mamoloiya mai olaatia, "Wonu odito yilongola Allahu Taáala donggo ohilaa mopotala tomanusia? Tingga woluo penu boli ngotaa maó

tamowali mongabuto u otohilaa lo Allahu Taáala?" **20** Bo, Wutato! Wutato bo manusia wambaó. Wau Wutato diila mowali buheli motuwahe to Allahu Taáala! Tingga mowali poti lo bunga mohintu to talohutu maó olio, "Yilongola yio malohutu mai olaú odie?" **21** Wolo taa u mohutu poti lo bunga boito ohaku mohutu maó huta modudangia boito moduduá totoonulalo otohilaalio? Monto ngotopingo huta modudangia ngotopingo, tau boito ohaku mohutu maó dulo dalalo poti lo bunga; tuwau umopiohe wau uwewolio udiila boti mopiohe. **22** Odito olo lou wolo u pilohutu mai lo Allahu Taáala. Tio oniyati u mopomukaái oyiyingo-Lio wau mopo bilohei okokawasa-Lio. Bo Tio sabali olimongolio tamusi hukuu-maniyolo sababu heloó muluka o-Lio. **23** Allahu Taáala olo oniyati mopo bilohei olanto osanangi tutu udiila o enggadelio u bilongguwa-Tio mai olanto tapilonu-Lio. Ito mapilo dapa-Tio u mololimo osanangi tutu boito. **24** Ito-itolo tamaa tilia-Ngio, diila bo wambaó bangusa lo Yahudi, bo monto babaa-ngusawalo wewo olo. **25** Sababu todelomo buku li Nabi Hosea, Allahu Taáala lotahuda, "Tau-tauwalo tadiila umati-U, maúntee-U 'Umati-U'. Bangusa tadiila pilonu-U, maúntee-U 'Ilohilaa-U'. **26** Wau totambati toutoonu piloloiya maó totau, 'Timongoli diila umati-U,' mota teto tau-tauwala boito maúnteelo mongo walaó Allahu Taáala tatumu-tumulo." **27** Ti Nabi Yesaya loloiya wolo piduduto tomimbihu bangusa lo Isirailu, "Penu boli jumulaa bangusa lo Isirailu daatalio debo odelo hungayo topentadu, bo ngoidi wambaó tamaa moáahu; **28** Sababu Eeya mahuáa mopodehu mai hukuumani ode tuango dunia." **29** Ti Nabi Yesaya malo loiya odie olo, "Humayaalio Allahu Taáala Taa Laba-labaalo kawasa diila lololaa maó olanto wali, tantu ito ngoáamila malowali debo odelo Sodom wau Gomora." **30** Oditolio, pulito lo huhamaalio duuito-yito utie: Babaa-ngusawalo wewo tadiila Yahudi diila helo tolopani alihu wumbuta limongolio wolo Allahu Taáala muli mowali mopiohu. Bo sababu timongolio palacaya, yi Allahu Taáala lopowoluo mai wumbuta limongolio wo-Lio luli lowali lopiohu. **31** Boliio maó, tau-tauwala Yahudi laito hemo tolopani modungohe butoó alihu wumbuta limongolio wolo Allahu Taála muli mowali mopiohu. Bo timongolio tumbaó diila ilohaasili. **32** Yilongola timongolio diila ilohaasili? Sababu timongolio helohutu uito diila loli

palacaya to Allahu Taála bo loli tolopani limongolio lohihilao. Sababu uito timongolio lodehu leeteduó to "Botu Oteduó." **33** Tomimbihu botu boito todelomo Kitabi tulatulade odie, "Poótuota maó utie: To Sion mapilopo dutu-U botu tuwau u mamooó sababu tau meeteduó; deúito-yito botu leidaá tuwau u mamooó sababu tau modehu. Bo taa upalacaya to o-Lio diila taókikiioó lohilao."

**10:1** Mongo wutato! Watia mooloolo daá alihu bangusa lowatia poáahuwolo. Wau watia otu-otutuulo maó heloduá to Allahu Taála ode limongolio. **2** Watia buheli molojiya deú timongolio osumangati daá taaluku wau hulumati to Allahu Taála. Bo sumangati limongolio boito diila patopatoá to pongotota umonto Allahu Taála. **3** Diila otaawa limongolio pohuliilio lo Allahu Taála mopowoluo mai wumbuta lomanusia wo-Lio muli mowali mopiohei. Wau sababu timongolio ohilaa moduduá pohuli limongolio lohihilao, yi timongolio diila loduduá topohuli upilotunu mai lo Allahu Taála. **4** Butoó lo agama mapiloó polu mai li Almasi. Oditolio timiidu taa palacaya li Almasi, wumbutalio wolo Allahu Taála muli mowali mopiohu. **5** Tei Musa loluladei deú taa u mopiohe wolo Allahu Taála patopatoá tobutoó lo agama, tau boito matumumulo sababu lodungohe tobutoó lo agama boito. **6** Bo tomimbihu pohuli lotaa mopiohe wolo Allahu Taála patopatoá to palacaya ode Allahu Taála, Kitabi loiloiya odie, "Sambelolo yio molojiya todelomo hilaamu, 'Tatoonu tamaa mobotula mola ode sologa?' (boliilio maó modelo li Almasi motuhuto), **7** meaalo 'Tatoonu tamaa molahe mola ode dunia lotaa mate?' (boliilio maó momintaó li Almasi mobotulai monto opopate). **8** Makusudulio yito odie, "Habari monto Allahu Taála boito membide daá wolemu; to tunggilumu wau todelomo hilaamu." Uitolo habari u pololadei lami; habari deú tau musi palacaya. **9** Sababu wonu Wutato mongaku wolo tunggilumu deú "Ti Isa boito Eeya", wau Wutato palacaya todelomo hilaamu deú Allahu Taála boito malopo tumulai li Isa lonto opopate, yi Wutato mamoaáhu. **10** Sababu wolo hilaalio tau palacaya, tilunggula Allahu Taála mololimo olio odelo taa u mopiohe wolo Allahu Taála. Wau wolo tunggilio tau mongaku, tilinggula tio poáahuwolo. **11** Todelomo

Kitabi tulatulade, "Taa palacaya diila tapo kikiioilio tohilao." **12** Uito pohupohutu totaa ngoamila, sababu diaaluo hiheedio towolota tauo Yahudi wolo tau-tauwalo bangusa wewo. Allahu Taaala tatuwau boito yito Eeya ode taa ngoamila. Tio mongohi balakati u dadaata tutu ode taa ngoamila tamei tulungi o-Lio. **13** Todelomo Kitabi tulatulade, "Ngoamila taa mongibode ode Eeya, mamoaahu." **14** Bo woloolo mola tau mowali mongibode ode Allahu Taaala wonu timongolio diipo palacaya? Wau woloolo mola, timongolio mowali palacaya ode Eeya wonu timongolio diipo loodungohe pasalii-Lio? Odito olo, woloolo mola timongolio moó dungohe pasali lo Eeya, wonu diaaluo tamo pohabari? **15** Wau woloolo mola tau mowali modelo habari boito wonu timongolio diila yilaolio? Todelomo Kitabi tulatulade odie, "Donggo boli piohio podudungga mai lotau-tauwalo tamodelo Habari Mopiohe monto Allahu Taaala!" **16** Bo diila ngoamila tau lololimo Habari Mopiohe boito. Sababu tei Yesaya loloiya, "Eeya, tatoonu tapalacaya tohabari lomongo watotia?" **17** Uito sababuulio tau-tauwala lowali palacaya sababu timongolio lodungohe habari, wau habari ilodungohe sababu woluo taa u lopohabari pasali li Almasi. **18** Bo watia lohintu maó: Wolo memangi timongolio diipo loodungohe habari boito? Tantu maloó dungohu! Sababu todelomo Kitabi tulatulade odie, "Suala limongolio mailumolaó ode ngoilanggubu dunia, tataa-heyaaalo limongolio malei dungga demola huudu dunia." **19** Watia luli lohintu maó: wolo bangusa lo Isirailu diipo motota? Huliilo maó yiyintu boito bohu-bohulio tameta lei Musa. Tei Musa loloiya, "Odieelo mola tahuda lo Allahu Taaala, 'Wau mamohutu mai olimongoli mohiihia ode bangusa tuwau tadiila umati Wau Wau mamohutu mai olimongoli moingo ode bangusa tuwau tamohulodu.'" **20** Tei Yesaya lebe buheli maó poli. Tio loloiya, "Odieelo mola tahuda lo Allahu Taaala, 'Tau-tauwalo tadiila mololohe ola-U, maloó dungga ola-U; wau Wau lopobilohu batanga-U olimongolio tadiila helohintu pasali-U.'" **21** Bo tomimbihu bangusa lo Isirailu tei Yesaya loloiya, "Odieelo mola tahuda lo Allahu Taaala, 'Ngotupa lodulahu Wau helohudu uluuu-U ode bangusa tuwau tabaangiyolo wau diila modungohu.'" "

**11:1** Watia mohintu mai: Wolo Allahu Taáala malolapi umati-Lio lohihilao? Tantu diila! Watia lohihilao ngotaalio lo Isirailu wali mai lei Abraham, wau lonto suku Benyamin. **2** Diila! Allahu Taáala diila lolapi umati-Lio tamaa tilulao-Tio tumulalo mai bohulio. Otaawa lo Mongo wutato wolo u tulatulade todelomo Kitabi tomimbihu olei Elia, tou tio lopodulohu suáli lo Isirailu ode Allahu Taáala. Tei Elia loloiya, **3** "Oo Eeya, tau-tauwala malomate mongo nabi-Mu yila-yilateelo maó wau helo ngantulu tataa-mbatiyalo hepo dewowalo bake ode Eeya. Taleitolaa bolo batanga lowatotia lohihilao wau timongolio ohilaa momate olo watotia mate-mateelo maó." **4** Wolo pilolameto Allahu Taáala odelei Elia? Allahu Taáala lolameto, "Wau malo lolaa maó pitu lolihu lota ode batanga-U lohihilao. Timongolio diipo peénta maó helolubo dewa Baaal." **5** Odito olo masaatia botie; Woluo ngojumula ngoidi tau-tauwala tamaa tilulaoto Allahu Taáala sababu odehu hilaa-Lio. **6** Tio lolulaota olimongolio patopatoá to odehu hilaa-Lio wau diila patopatoá tohuhutu limongolio. Sababu wonu tulaoto Allahu Taáala boito patopatoá tohuhutu lomanusia, yi odehu hilao lo Allahu Taáala boito diilalo odehu hilao utuutu. **7** Oditolio, woloolo mola? Umati lo Isirailu diila loótapu wolo u helolohu limongolio. Taloótapu bo ngokaumu kikiió tau-tauwalo tamaa tilulaoto Allahu Taáala. Tawewo ngoáamilalo baangiyolo to titiango Allahu Taáala. **8** Sababu todelomo Kitabi tulatulade odie, "Allahu Taáala lohutu hilaa wau pikiilangi limongolio lowali abalo; wau tunggula botia mato limongolio diila moóonto wau bulonga limongolio diila moódungohu." **9** Tei Dauda loloiya olo, "Huliilo maó popoo-tihungguwalo limongolio mowali taalo ode limongolio lohihilao, wau mowali huwango, tambati odehua limongolio wau moáantulu! **10** Huliilo maó bibilohi mongolio mowali modiólomo alihu timongolio diila moóonto; wau huliilo maó timongolio mowali bunggu ohiheo-hiheolo maó." **11** Watia luli lohintu: Tou taulo Yahudi lodehu, wolo uito lotoduo mai alihu timongolio moáantulu? Sama-samaata diila! Bo sababu timongolio odusa, yi bangusa wewo tumbaó piloáahu, tilinggula loósababu taulo Yahudi lohiihia tobangusa wewo boito. **12** Sababu bangusa lo Yahudi ototala wau diila loduduá otohilaa lo Allahu Taáala, yi babaa-ngusawalo wewo bilalakatia lo Allahu

Taaala. Tidiyolo maó wonu wumbuta bangusa lo Yahudi wolo Allahu Taaala muli mowali mopiohe; tantu lebe udaá poli balakati u mawohi lo Allahu Taaala. **13** Bo botia opiohelio watia mobisala mai to Mongo wutato tadiila Yahudi! Ngotilonggadu botie, odelo rasulu duólo babaa-ngusawalo tadiila Yahudi, watia helo polaiá daá tuugasi lowatia. **14** Watia hemohalapu deú watia mowali mopotoodei hiihia tobangusa lowatia lohihilao, alihu woleeto watia mowali mopoáahu ngotayadu monto olimongolio. **15** Sababu timongolio pilotouli lo Allahu Taaala, yi wumbuta lodunia wolo Allahu Taaala luli lowali lopiohu; tidiyolo maó wonu timongolio tilolimo Allahu Taaala! Tantu uito tutuuwauwa wambaio debo odelo taamate muli tumumulai! **16** Wonu roti ngopita u bohulio mailohi ode Allahu Taaala, uito boliilio ngoáamila rotilio wohi olo ode Allahu Taaala. Wau wonu waáato ayu yito miliki lo Allahu Taaala, uito boliilio tataa-ngolio yito miliki-Lio olo. **17** Ngotayadu tataa-ngowaalo bungo loáyu jaituni -- deúito-yito tau-tauwalo Yahudi -- mailoyodio. Wau tobakasi oyodio boito piloómbitio maó tango loáyu jaitun udiila topalihala, deúito-yito Mongo wutato tadiila Yahudi. Wutato piloómbitio teto alihu Wutato moólaasa maó ngoáamila u mopiohe monto tutumulo rohu lotau-tauwalo Yahudi. **18** Masababu uito timongoli diila maó ponganggapu moheelo olimongolio tamaa iloyodio debo odelo tango boito. Musi eela maó limongoli deú timongoli bo tango wambaó. Wau diila tango u mongohi uáalo towaáato, bo waáato u mongohi uáalo ode tango. **19** Bo Wutato mamoloiya, "Ooó, bo tataa-ngowaalo boito iloyodu alihu watia mowali poómbitolo to batangio!" **20** Uito memangi otutu. Bo timongolio tilapi sababu timongolio diila palacaya. Hiambola Wutato tilolimo sababu Wutato palacaya. Oditolio Wutato diila maó potimenge kalana uito; bo boliio maó Wutato musu molaasa mohe. **21** Sababu wonu Allahu Taaala diila lodehu hilao u molapi taulo Yahudi udebo odelo tataa-ngowaalo pulua boito, diila maó lantobe Tio mamodehu hilao u molapi to Wutato! **22** Oditolio tea ito moóonto donggo boli piohio Allahu Taaala wau donggo boli toheeto olo Tio. Tio lohutu lou moóohuu olimongolio taódusa, bo hilaa-Lio mopiohe ode Wutato -- asali Wutato debo tumutumulo wolo opopio-Hio, wonu diila, yi Wutato olo matapilo-Lio. **23** Wau tomimbihu



tau-tauwalo Yahudi boito, wonu timongolio mohuheli monto piili udiila palacaya, yi timongolio mamuli tolimoo-Lio; sababu Allahu Taála okawasa u muli mololimo olimongolio. **24** Wutato tadiila asaliilio mai diila monto bangusa lo Yahudi yito debo odelo tango monto bungo lojaitun udiila topalihala. Naa, wonu Wutato, bubuu-lemenga wolo piili lo Wutato, mowali poómbitolo tobungo lojaitun pulua, tidiyolo maó tau-tauwalo Yahudi tapilo humaya wolo tataa-ngowaalo bungo lojaitun pulua boito. Tantu lebe gambangi poli ode Allahu Taála u moponguli maó olimongolio tobungo lojaitun limongolio lohihilao. **25** Mongo wutato! Halapuo lowatia timongoli diila maó molaasa mailotota totoonulalo hitua-tuawua. Sababu woluo suáli hitua-tuawua u kilahandaki lo Allahu Taála, bou diipo ilotaawa lotau. Wau otohila lowatia otaawa maó limongoli; deúito-yito odie: Ngotayadu monto taulo Yahudi baaangiyolo, bo piili limongolio boito mapohu-pohutu bo tunggula jumulaa lotau-tauwalo tadiila Yahudi tamonaó mai ode Allahu Taála malei wimumuto. **26** Odieelo mola ngoáamila taulo Yahudi mamoaáhu. Sababu todelomo Kitabi tulatulade odie, "Olongia Tamoo-poáahua mamei dungga mai monto Sion; Tio mamoluluto ngoáamila u moleeto monto wali mai lei Yako. **27** Wau mamu ngawade daantia botie woli mongolio tou Wau mongambungu duduu-sawaalo limongolio." **28** Sababu taulo Yahudi diila mohuto mololimo Habari Mopiohe monto Allahu Taála, yi timongolio malowali musu lo Allahu Taála; wau uito tumbaó maloó paéeda to Mongo wutato tadiila Yahudi. Bo sababu matilulaoto Allahu Taála, yi tau-tauwalo Yahudi boito debo pilonu lo Allahu Taála domi tinenemoya limongolio. **29** Sababu wonu Allahu Taála molulaotai tau wau mobalakati tau boito, Allahu Taála diila peéenta maó muli mohama wolo umaa pilohutu-Lio. **30** Mulooolio mai timongoli diila modungohu to Allahu Taála. Bo botia Allahu Taála malo poilaalo deu timongoli lolopato lonto totala, sababu tau-tauwalo Yahudi diila lodungohu. **31** Odito olo wolo tau-tauwalo Yahudi boito. Masaatia botie timongolio diila lodungohu to Allahu Taála, alihu timongoli poilaalolo molopata monto totala. Bo de timongolio olo mapoilaalolo molopato monto totala. **32** Sababu Allahu Taála malo poluli ngoáamila umati lomanusia kiluwasa lo odiila dungohu, alihu Tio mowali

mopo bilohei odehu hilaa-Lio ode limongolio ngoáamilalo. **33** Otutu polu-polutuó okokaya lo Allahu Taáala! Otutu udaá tinepo wau pongotota-Lio! Tatoonu tamowali motulete totoonulalo putuusani-Lio? Tatoonu tamowali mongalati dudelo-Lio tou tío mokalaja? **34** Todelomo Kitabi tulatulade odie, "Tatoonu tamotota pikiilangi lo Eeya? Tatoonu tamowali mongohi naseehati o-Lio? **35** Tatoonu tapeéenta longohi hitua-tuawua to Eeya tilinggula mowali mohile wolo moóohuú balasi-Lio?" **36** Allahu Taáala talo powali totoonulalo u hitua-tuawua. Ngoáamilalo asaliilio mai lonto Allahu Taáala wau duólo Allahu Taáala. Ilopujialo mola Allahu Taáala u ohiheo-hiheolo maó! Amin.

**12:1** Mongo wutato! Allahu Taáala mopiohe daá olanto, uito sababuulio pohile lowatia lou tíootutua alihu timongoli mopodewo batanga limongoli odelo tuwaulio lobake tutumulo utolomodu duólo Allahu Taáala wau moposanangi hilaa-Lio. Tabiyamu ode Allahu Taáala musiilio odito. **2** Diila maó poduduó totoonulalo dudelo lodunia botie. Hulii maó Allahu Taáala tamohutu mai batangamu lohihilao mowali bohu, alihu timongoli molomelo. Lou odito timongoli mambo motota maó u otohilaa lo Allahu Taáala -- deúito-yito wolo umopiohe wau umoó sanangi hilaa-Lio wau u wimu-wimumuto ngoáamilalo. **3** Allahu Taáala malongohi mai ponu olaatia. Uito sababuulio watia monaseehati mai to Mongo wutato ngoáamilalo; diila maó polaasa batanga lebe molaió lou otutuulio maó. Mamusi timongoli motiliki owowoluwoa lobatanga limongoli wolo dupadupapa lohilao; ngota-ngota motiliki maó batangalio moduduá omambowa uilohi lo Allahu Taáala olio masababu tío palacaya li Isa. **4** To batanganto o dadaata pongawaá. Timiidu pongawaá tingga o kalajaalio. **5** Odito olo wolanto. Eleponu ito ngoáamilalo dadaata, bo ito debo odelo batanga tuwau sababu ito tuwau woli Almasi. Wau ito ngota-ngota wuwumbuta ngota-timongota odelo popoo-ngawaáalo monto batanga tuwau. **6** Ito ngota-ngota o toliángo momaya u hiwewo-wewoa. Totoo-liángawalo boito yilohi lo Allahu Taáala olanto loduduá odehu hilaa-Lio. Sababu uito ito musi mopohuna totoo-liángowalo boito. Taa u otoliángo u mopohabari habari monto Allahu Taáala, musi mopohabari habari monto

Allahu Taáala boito moduduá omambowa lo batangalio lohihilao. **7** Taa u otoliángo u motulungi taawewo, musi otu-otutuulo maó motulungi taawewo. Taa u otoliángo mongajali musi otu-otutuulo maó mongajali. **8** Taa otoliángo u mongohi sumangati ode taawewo, musi otu-otutuulo maó mongohi sumangati ode taawewo. Taa okurunia u mongohi ode taawewo wolo u mililikilio, mamusi mohutu maó uito wolo muula lohilao wau paatuti. Taa otoliángo u mowali tauwa, musi otu-otutuulo maó mowali tauwa. Taa otoliángo u mopo bilohe odehu hilao ode taawewo, musi mohutu maó uito wolo hilaa sanangi. **9** Potoliángaó wolo ihilasi. Lonui maó u moleeto, wau potidihulo tou wolo u mopiohe. **10** Mamusi Mongo wutato mototoo-liáanga ngota timongota wolo tataabia lohilao debo odelo tau-tauwalo tamohutato todelomo ungaalaa, wau wajibulio timongoli tinggai mumuuloa mongohi hulumati. **11** Potiolohulo mokalaja. Diila maó poti lantingo. Pokalajaalo duólo Eeya wolo sumangati monto Rohullah. **12** Mamusi Wutato motiwunela to Eeya wolo wengahu, posabalilo todelomo usuusa, wau poti otutuulo moduá. **13** Tulungii maó mopotuheta upalaluo lotau-tauwalo Nasara wewo wau tolimoa maó mongo wutato ngoiimani tadiila otaawa lo Wutato, wolo hilaa sanangi todelomo bele limongoli. **14** Pohilea mola to Allahu Taáala alihu Allahu Taáala mobalakati mai tau-tauwalo tahi palangia to olemu. Ooo, pohilea mola to Allahu Taáala mobalakati mai olimongolio, diila maó polaánati. **15** Poti wengahulo wolo tau-tauwalo tahi wengahe, wau pohiyongolo woli mongolio tahe hiyonga. **16** Poti tumulolo wolo mopiohe wau aamani ngota timongota. Diila maó poti batingga lohilao, bo potuuúdelo batangamu wolo tadupa-dupapa huhuloálio. Diila maó ponganggapu batanga lebe motota wolo u otutuulio maó. **17** Wonu tau mohutu u moleeto olimongoli, diila maó pomalasi lou moleeto. Pohutua maó wolo uhe anggapuo mopiohe lotaa ngoáamila. **18** Monto olimongoli, potolo panilo lou tióotutua u tumumulo dame wolo taa ngoáamila. **19** Mongo wutatuú! Sama-samaata diila maó pomalasi niyati, hulii maó Allahu Taáala tamo hukuumani mai. Sababu todelomo Kitabi tulatulade, "Waulo tamolontuli. Wau tamamo hukuumani mai, tahuda lo Eeya." **20** Boliio maó, wonu musumu polaangolo, wohia maó tio uáalo; wau wonu tio mototoángo, wohia maó tio uilumolo. Sababu wolo mohutu

maó odito, Wutato mamohutu olio mowali moolito. **21** Diila maó polulia batangamu olaahe lou moleeto, bo Wutato mamusi mopo olaaheó u moleeto wolo umopiohe.

**13:1** Timiidu manusia mamusi modungohe to pomalenta, sababu diaaluo pomalenta udiila moótapu okokawasalio monto Allahu Taáala. Wau pomalenta uwoluo masaatia botie, moponaó okokawasalio to palenta lo Allahu Taáala. **2** Uito sababuulio moluwali pomalenta tutuuwauwa wambaio lou moluwali wolo u matilantu lo Allahu Taáala. Wau taa u hipohutua odito mamololimo hukuumani. **3** Sababu, taa u hipohutua umopiohe diila palalu moohe to pomalenta. Bo taa u hipohutua u moleeto wambaio tamusi moohe. Wonu Wutato motohilaa alihu Wutato diila molaasa moohe to pomalenta, Wutato mamusi mohutu umopiohe, yi wutato mapujiolio. **4** Sababu pomalenta yito wato lo Allahu Taáala tahemo kalaja duólo opopiohi mongoli. Bo wonu Wutato mohutu u moleeto, memangi Wutato musi moohe to pomalenta. Sababu diila palacuma wambaio pomalenta okawasa mohukuumani maó tau. Pomalenta yito wato lo Allahu Taáala, u mopodehu hukuumani lo Allahu Taáala ode tau-tauwalo tahipo hutua u moleeto. **5** Uito sababuulio Wutato waajibu modungohu to pomalenta -- diila bo sababu Wutato diila mohuto hukuumaniyolo, bo sababu olo suala lohilaamu u maloótapu tenelo Eeya. **6** Uitolo olo alasanilio yilongola Wutato momayali beya, sababu pomalenta yito pogawee lo Allahu Taáala tamoponaó lotuugasi u tolomodu botie. **7** Oditolio bayalia maó to pomalenta wolo u mamusi bayalia lo Wutato ode pomalenta. Pomayali maó hasili wonu Wutato musi momayali beya; wau pomayali maó beya wonu Wutato musi momayali beya. Halagai maó timongolio tamusi halagaalo wau hulumatia maó timongolio tamusi hulumatiolo. **8** Diila maó pobuli penu boli wolo toólita wambaio, ngopohia biloli toliango ode ngota-timongota. Sababu tamo toliango ngota timongotalio, malo poópolu ngoáamila butoée Musa. **9** Sababu butoó agama lo Yahudi, deúito-yito: Diila maó pojina, diila maó pomate mate-mateelo maó, diila maó potaó, diila maó potohilaa wolo u tilolo miliki lotaa wewo, u ngoáamilalo boito peé-peéenta wolo bubuu-toóowalo

uwewo, umapilo limbuio lowali butoó tuwau wambaio, deüyito-yito, "Pototoo-liángalo ngota-timongota debo odelo yio motoliángo batangamu lohihilao." **10** Taa u motoliángo taawewo, diila tamohutu u moleeto ode tau boito. Oditolio taa u motoliánga timongotalio yito taamalo poópolu ngoáamila danti butoó lo agama. **11** Ngopohia lou ngoáamilalo boito, otaawa limongoli deu masaatia botie yito saaati limongoli u mobongu monto otuluhe. Sababu wakutuulio olanto u poáahuwolo malebe lembidei masaatia botie wolo wakutunto boheli palacaya maó. **12** Hui mangopeé mopaluto; wau ngopeépo madulahu. Oditolio, opiohelio ito mohuheli mohutu totoonulalo huhutu u moleeto. Ito musi mopo wimumuto batanganto wolo sinapangi mobaango. **13** Ito musi mohutu susuu-aliyaalo uhulu-hulumati debo odelo ubiasaalio hepohutuo lotau tou dulahe; diila maó pohutu potihunggu daá u limba-limbata to omambowa meaalo motihuwoó. Diila maó potihuloto meaalo opiili udiila oádabu. Diila maó poloohulua, meaalo mohiihia. **14** Hui maó Eeya Isa Almasi tamolantu mai wolo umusi pohutuo limongoli. Wau diila maó poduduá piili lomanusia odusa u bo wambaó mopoluli hilao to napusuulio.

**14:1** Taa udiila yakini tou wolo upilala cayalio musi tolimoolo lou mopiohe towolota lo Mongo wutato. Diila maó pobuutola wolio tomimbihu totoonulalo tilihulatio. **2** Woluo taa otilihula deu tio mowali molamelo penu boli wolo wambaio. Bo woluo taawewo tadiila boti yakini; tio molaasa deu tio bo mowali molamela sasaa-yoriyaalo wambaó. **3** Taa u molamelo penu boli wolo wambaó diila maó ponganggapu dupadupapa taa u hemolamelo bo uáalo utantu-tantu wambaó; wau taa u molamelo bo uáalo utantu-tantu wambaó, diila maó olo mopotala taa u hemolamelo totoonulalo u hitua-hituawua, sababu Allahu Taála malo lolimo olio. **4** Tatoonu Wutato tilinggula Wutato musi momutoó wato lotaa wewo? Diila otaawa wato boito modehu meaalo mobongu, uito yito suáli li tuanilio. Wau memangi wato boito matimihula mola motulidu, sababu Eeya mambo mohutu olio timihulo motulidu. **5** Woluo taa u molaasa deu dulahee tuwau utantu-tantu lebe polohuna daá wolo duduu-laheyaalo uwewo, hiambola taawewo poli hipo nganggapua deu duduu-laheyaalo boito debo

tutuuwauwa. Hulii maó ngota-ngota tau mamolantu tilihulalio lohihilao. **6** Taa u mopoudaa duduu-laheyaalo utantu-tantu, tau boito mohutu odito u mohulumati Eeya. Taa u molamelo tilolahepalo maó, mohutu odito u mohulumati Eeya, sababu tio mosukuru ode Allahu Taáala to uáalo boito. Odito olo wolo taa bo molamelo uáalo utantu-tantu wambaó; tau boito olo mohulumati Eeya wau mosukuru to Allahu Taáala. **7** Diaaluo penu boli ngotaa maó monto olanto tatumumulo duólo batangalio lohihilao; wau diaaluo penu boli ngotaa maó monto olanto mate duólo batangalio lohihilao. **8** Wonu ito tumumulo, ito tumumulo duólo Eeya. Wau wonu ito mate, ito mate olo duólo Eeya. Oditolio, tumumulo meaalo mate, ito yito miliki lo Eeya. **9** Ti Isa Almasi mailate wau luli tilumumulai. Uito sababuulio Tio lowali Eeya lotau-tauwalo tahitumula wau olo ode tau-tauwalo tamailate. Oditolio, Mongo wutato! **10** Wolo hunalio mopotala to wutatumu tango iimani? Wau wolo hunalio Wutato monganggapu olio dupadupapa? Ito ngoáamila mamotaalua wolo Allahu Taáala u butoo-Lio. **11** Todelomo Kitabi tulatulade, "Tutuulio tutu," tahuda lo Eeya, "ngota-ngota tau mamolubo mosujudu totalu-U; wau timiidu tau mamosisi deu Waulo Allahu Taáala." **12** Oditolio ito ngota-ngota musi mongohi titihula tou totoonulalo huhutuunto to Allahu Taáala. **13** Masababu uito ito diila mowali tinggai mopotala ngota timongota. Boliio maó potolo panilo mola alihu timongoli diila mohutu penu boli hitua-tuawua umoó sababu ngotaalio lowutato ngoiimani oheinga wau mowali odusa. **14** Sababu watia lotituwau woli Isa Eeya, yi watia palacaya daa deu diaaluo penu boli tuwau maó u topatoio najisi; bo suáli boito najisi ode tahingota-ngotaawa, wonu tau boito monganggapu najisi. **15** Bo wonu lou wolo utamelo lo Wutato, ngotaalio lo Wutato ngoiimani piloó ngongoto hilaalio, yi Wutato diilalo mohutu patopatoá to toliango. Wonu ti Almasi mailate ode tahingota-ngotaawa, diila maó polulia tau boito polusaa lou wolo utamelo lo Wutato. **16** Uito sababuulio diila maó polulia wolo u mopiohe olimongoli, anggapuo lotaa wewo diila mopiohu. **17** Sababu wonu Allahu Taáala momalenta tutumulo lo tahingota-ngotaawa, wolo umowali tamelolio meaalo yilumolo, diilalo polohuna daa. U polohuna daa yito deu tau boito moduduá otohilaa lo Allahu Taáala, molaasa oduóoto



hilao wau mololimo wengahe uwahi lo Rohullah. **18** Taa u momaya li Almasi lou odito, tau boito moosanangi hilaa lo Allahu Taála, wau hulumatío lotau-tauwalo wewo. **19** Sababu uito patujunto mamusi laito duólo susuu-aliyalo u mopotoduo mai umopiohe wau dame boli aamani wau tinggai momongu ngota timongota. **20** Diila maó, bo sababu suáli lo uáalo, Wutato mopolusa wolo u makilalaja lo Allahu Taála. Ngoáamila uáalo memangi halale tameloolo; bo wonu utamelo lo Wutato moosababu taawewo mowali odusa, yi Wutato ototala. **21** Lebe mopiohe diila maó polamelo tapu mealo mongilu angguru mealo mohutu wolo-wolo wonu suáli boito moosababu ngotaalío lowutato ngoiimani mowali odusa. **22** Huliilo maó wolo u pilalacaya lo Wutata boito, pohutuo lo Wutato totalu lo Allahu Taála wambaó duólo Wutato lohihilao. Taa udiila o alaasani u molaasa ototala tou wolo u ilanggapulío otutu, tau boito sanangi tutu. **23** Bo taadiila molaasa molawalo u molamelo hitua-tuawua, lapataó debo molamela uáalo boito, tau boito potaala lo Allahu Taála; sababu tau boito diila lohutu loduduá uilo yakinalío pasali lou otutu wau u talatala. Wau boli wolo u pohutuwo wau diila oyakinia yito dusa.

**15:1** Ito taótu-otutuulo maó yakini tou wolo upilala cayanto, mamusi mosabali tou totoonulalo kabalatani lotaa diila motoheeto iimanilio. Diila maó potohilaa ito bo wambaó mopo sanangi batanganto lohihilao. **2** Boliio maó ito ngota-ngota musi mopo sanangi hilaa lo wutatonto ngota-timongota duólo opopiohio, alihu uilo yakinalío oduhenga mola toheetio. **3** Sababu ti Almasi olo diila bo hemo mikiilangi osanangi lobatanga-Lio lohihilo. Todelomo Kitabi tulatulade odie, "Ngoáamila aibu u pilomatuju de ole-Mu malodehu to olai." **4** Ngoáamila u tulatulade todelomo Kitabi yito mongaajali olanto. Sababu pongaajali u tolimoonto monto Kitabi mopowali olanto sabali wau molotolo tilinggula ito mowali motiwunela to Allahu Taála. **5** Pohileaala duá Allahu Taála, tamongohi mai osaabali wau polo liyango tomanusia, motulungi olimongoli tatumu-tumulo wolo tuwau lohilao, moduduó dudelo li Isa Almasi. **6** Wolo tuwau lohilao Wutato ngoáamilalo peé-peéenta mowali momuji mola Allahu Taála, ti Paapa Eeyanto Isa Almasi. **7** Sababu uito wajibulío Mongo wutato

mololimo maó ngota-timongota wolo hilaa sanangi, tutuuwauwa debo odelo ti Almasi olo lololimo olimongoli u lopolaió Allahu Taáala. **8** Sababu, eelai maó deu ti Isa Almasi malomaya tauo Yahudi u lopobilohede deu Allahu Taáala tatapu wau molotolo hilao todelomo lopoópolu totoonulalo danti-Lio odeli nenemoyanto. **9** Ti Isa olo malohutu babaa-ngusawalo wewo helo polaió Allahu Taáala sababu opopiohu hilaa-Lio olimongolio. Todelomo Kitabi tulatulade odie, "Sababu uito watotia mamomuji mola to Eeya towolota lo babaa-ngusawalo watotia mamopolahu mola poloilaalo momuji duólo tanggulo Eeya." **10** Woluo poli tulatulade odie, "Poti wengahulo wolo umati lo Allahu Taáala tatilulao-Tio, wuu babaa-ngusawalo!" **11** Wau utie olo, "Pujiaalo mola Allahu Taáala, wuu ngoáamila bangusa, mamusi ngoáamila tau momuji mola Allahu Taáala!" **12** Wau utie olo uiloia lei Yesaya, "Monto waliilio lei Isai malumenetai tahingota-ngotaawa tamaa momalenta babaa-ngusawalo; to o-Liolo babaa-ngusawalo boito mamoti wunelo." **13** Allahu Taáala yito tambati potiwunela mola limongoli. Pohileaala duá Tio mopoópolu mai hilaamu wolo ngoáamilalo wengahu wau salaamati sababu timongoli palacaya o-Lio, alihu wolo kawasa lo Rohullah timongoli lebe maó motiwunela mola to Allahu Taáala. **14** Mongo wutatuú! Watia yakini deu woluo dadaata daá suáli u mopiohe olimongoli. Otaawa limongoli olo totoonulalo u hitua-tuawua wau mowali mongaajali olo ngota-timongota. **15** Bo tomimbihu susuu-aliyaalo utantu-tantu, poéela mai lowatia olimongoli lou pintalo todelomo tulade botie, sababu Allahu Taáala malongohi mai olaatia tuugasi boito. **16** Mapiludu-lo watia tamoomayawa li Isa Almasi uilao-Lio ode babaa-ngusawalo tadiila Yahudi. Wau watia helo kalaja odelo iimamu, u lopohabari Habari Mopiohe lonto Allahu Taáala alihu tau-tauwalo tadiila Yahudi mowali dewo tuwau ode Allahu Taáala u mowali tolimoo-Lio. Pohileaala duá Rohullah mohutu olimongolio u tomodu mowali dewo tuwau ode Allahu Taáala. **17** Oditolio, sababu watia malo tituwau woli Isa Almasi, yi watia lowali leengahe tokalaja lowatia ode Allahu Taáala. **18** Watia buheli mobisala mai odito bo tomimbihu wolo u mapilohutu li Isa Almasi lotimbulude olaatia u mopowali tau-tauwala tadiila Yahudi modungohe to Allahu

Taaala. Watia helohutu uito wolo loiya boli wolo huhutu, **19** udiluduá wolo totoonulalo u moolingolabe wau susuu-aliyaalo upolu-polutuó; ngoáamilalo boito wolo kawasa lo Rohullah. Habari Mopiohe pasali li Isa Almasi mapilo habari lowatia ngoáamilalo ode tau-tauwala, tumulalo mai lonto Yerusalemu demola Ilirikum. **20** Tita-tita lowatia yito mopohabari Habari Mopiohe monto Allahu Taaala to tataa-mbatiyalo toutoonu tau diipo loódungohe pasali li Isa Almasi. Sababu watia diila mohuto momongu kalaja topandasi u mapilodutu lotaa wewo. **21** Todelomo Kitabi tulatulade, "Tau-tauwala tadiipo peénta maó lololimo habari pasalii-Lio, mamooónto; wau timongolio tadiipo peénta maó, loódungohe, mamongalati." **22** Uito sababuulio matingga maito watia ilotaibuta mola mobiilohe woli mongoli. **23** Bo botia kalaja lowatia to mamaa-dalawaalo madala boito mailapato. Otaataunuwa mola hiheolio watia ohilaa mobiilohe woli mongoli. **24** De wonu watia lumaode mola tokotamu tononaó lowatia ode Spanyol, watia mohalapu bolo modunggaya woli mongoli wau motiwengahe ngopeeé mola woli mongoli. Lapataó uito halapuo lowatia timongoli mowali momantu olaatia todelomo nonaó lowatia ode Spanyol boito. **25** Bo masaatia botie watia ohilaa ode Yerusalemu u modelo dembulo ode umati lo Allahu Taaala mola teto. **26** Sababu jajaamaáalo to Makedonia wau Akhaya maakolo u mongohi dembulo tomongo wutato tamosikini towolota umati lo Allahu Taaala mola to Yerusalemu. **27** Wolo hilaa sanangi timongolio malolantu u mohutu maó uito. Memangi otutuulio maó paatuti timongolio momantu mongo wutato tamosikini to Yerusalemu boito; sababu monto tau-tauwalo Yahudilo tau-tauwala tadiila Yahudi boito malo lolimo babaa-lakatiyalo lonto Allahu Taaala. Oditolio, tau-tauwala tadiila Yahudi boito paatuti olo motulungi tau-tauwalo Yahudi wolo babaa-lakatiyalo upango. **28** Wonu watia malo poolapato tuugasi lowatia botie, wau malohudu olimongolio tamola to Yerusalemu boito dembulo u mailimoó boito, yi watia mamomonggata mola odelipu lo Spanyol lumaode tokota limongoli. **29** Wonu watia monaó mai ode limongoli, tantulo maó watia monaó mai wolo dadaata balakati monto li Isa Almasi, ode limongoli. **30** Domi Eeyanto ti Isa Almasi, wau domi ponu uilohi mai lo Rohullah, pohile lowatia

tióotutua olimongoli, hinta timongoli olo moduá mola otu-otutuulo maó peé-peéenta lowatia to Allahu Taáala ode laatia. **31** Poduáalo mola alihu Allahu Taáala molopatai olaatia monto uluu lotau-tauwalo tadiila palacaya to Yudea, wau alihu tuugasi lowatia u modelo mola dembulo ode Yerusalemu tolimoo umati lo Allahu Taáala wolo hilaa sanangi mola teto. **32** Loui odito, wonu Allahu Taáala mokahandaki, watia moóonaó mai ode limongoli wolo sanangi lohilao. Wau watia mamolaasa liyaliyango tohuungi mongoli. **33** Pohileaala duá Allahu Taáala, tamongohi mai salaamati ode manusia, peé-peéenta wolo Wutato ngoáamilalo. Amin.

**16:1** Watia ohilaa mopoótaa mai wutatonto, ti Febe. Tio hemomantu jamaá to Kengkerea. **2** Tolimoa maó tio odelo tala ngota umati lo Eeya. Memangi odieelo mola tau-tauwalo tapalacaya ode Allahu Taáala waajibu mololimo ngota timongota. Tulungia maó tio, wonu tio mei tulungi olimongoli, sababu tio lohihilao malomantu taa dadaata -- leituoto olo watia. **3** Potunggula maó salamu lowatia odelei Priskila wolei Akwila, mongo sahabati lowatia tapeé-peéenta hemokalaja odeli Isa Almasi. **4** Timongolio bolo ngopeé yilate sababu ohilaa mopoáahu olaatia. Watia helo sukuru mola olimongolio -- wau diila bo wambaó watia, bo ngoáamila jamaá bangusa wewo tadiila Yahudi olo helo sukuru mola olimongolio. **5** Potunggula maó olo salamu lowatia ode jamaá tahiámbua tobele limongolio. Salamu odelei Epenetus taótoliángo lowatia. Tiolo tabohu-bohulio palacaya li Isa Almasi to madala lo Asia. **6** Salamu lowatia olo odeli Maria. Tio malo kalaja tióopatea ode limongoli. **7** Potunggula maó olo salamu lowatia odelei Andronikus wolei Yunias. Timongolio ngosuku ngobangusa wolaatia wau mapeéenta tilumuwoto ode tutupa peé-peéenta wolaatia. Tou watia diipo palacaya li Isa Almasi, timongolio maleimulo palacaya. Timongolio otaawa lotaa dadaata towolota lomongo rasulu. **8** Salamu odelei Ampliatus taótoliángo lowatia sababu tio peé-peéenta wolaatia malo tituwau wolo Eeya. **9** Potunggula maó hulumati lowatia odelei Urubanus, tamaninto tahemo kalaja peé-peéenta wolanto odeli Isa Almasi. Hulumati lowatia olo odelei Stakhis taótoliángo lo watia. **10** Salamu odelei Apeles. Otatapu wau olootolo hilaalio toli Isa

Almasi mailo bukuti. Salamu olo ode ngaalaa lei Aristobulus, **11** wau odele Herodion. Tio ngosuku ngobangusa wolaatia. Salamu olo ode mongo wutato ngoiimani todelomo ngaalaa lei Narkisus. **12** Salamu lowatia odelei Tripena wolei Triposa tahemo kalaja tiopate u momaya to Eeya, wau odelei Persis taotoliango lowatia. Tio olo malo kalaja tiopatea ode Eeya. **13** Salamu odelei Rupus wau tiilolio, taolaatia debo odelo tiilo lowatia lohihilao. Tei Rupus yito taa u tilulaoto lo Eeya wau tailo pujia. **14** Potunggula maó salamu lowatia odelei Asinkritus, Plegon, Hermes, Patrobas, Hermas, wau ngoamila wutato ngoiimani tapee-peenta woli mongolio. **15** Salamu odelei Pilologus woli Yulia; odelei Nereus wau wutatio taabua; odelei Olimpas wau ode ngoamila taa palacaya tapee-peenta woli mongolio. **16** Posasaa-lamuwalo wolo tataabia lohilao odelo wutato Nasara. Ngoamila jamaa li Almasi mopo tunggulai salamu limongolio ode Mongo wutato. **17** Mongo wutato! Pohile lowatia lou tiootutua: Poódaha-dahaalo maó totau-tauwalo tahemo potoodei owowoluwoa u mopobuu-buáalawa wau mopo puyoóto opopalacaya lotau ode Eeya. Suáli boito bubuu-lemenga lou wolo u mapilo ngaajali olimongoli. Walahe maó tau-tauwalo debo odelo uito. **18** Sababu tau-tauwalo tahi pohutua odito diila bo mokalaja odeli Isa Almasi Eeyanto, tumbaó bo uhemu potolu lohilao tou wolo u otohila limongolio lohihilao. Wolo pipio wau tataa-heyalo u mopiohe, timongolio hemo himbulo totau-tauwalo tadiila hitotaawa lolo-lolo. **19** Ngoamila tau malotota deu timongoli tatapu wau motolo hilao to pongaajali pasali lo Habari Mopiohe ulonto Allahu Taála. Wau watia sanangi tosuáli boito tomimbihu olimongoli. Otohila lowatia alihu timongoli molinepo tomimbihu susuu-aliyaalo umopiohe, wau mohulodu tomimbihu susuu-aliyaalo u moleeto. **20** Allahu Taála talongohi salaamati ode manusia, mahuáa mopo tambati Ibilisi towalungo lo okokawasamu wau mopo aantulu maó. Pohileaala dua Mongo wutato laito balakatia li Isa Almasi Eeyanto! **21** Tei Timotius, sahabati lowatia, mopo tunggulai salamulio ode limongoli. Odito olo tei Lukius, Yason wolei Sosipater, tangosuku ngobangusa wolaatia. **22** Talo luladei tuladee botie yito watia, tei Tertius. Watia molapali mai salamu u mohutato olimongoli. **23** Tei Gayus lolao salamu olimongoli. Watia malo

tihangata tobelelio wau jamaá lami olo taaluku wau hulumati mota teto. Tei Erastus, tauwa lo motolodihu doi lokota, lolao salamulio olimongoli. Odito olo wutatonto tei Kwartus. **24** Pohileaala duá Eeyanto Isa Almasi mobalakati to Wutato ngoámila. Amin. **25** Ilopujiaalo mola Allahu Taáala! Tio okawasa mopoo lotolai iimani lo Wutato motuúde wolo Habari Mopiohe monto Allahu Taáala upilo habari lowatia pasali li Isa Almasi. Watia lopohabari mai habari boito lotuúde lou wolo u piloilaalo mai lo Allahu Taáala; deúito-yito tomimbihu lanjana lo Allahu Taáala umahi hetu-hetuto mola lotaunu hiheolio udiila otaawa lotau. **26** Bo botia, topalenta lo Allahu Taáala u ohiheo-hiheolo maó lanjana boito mapilo ilaalo wau piloótaa mai ode ngoámila bangusa lotimbulude to tutuu-ladeyaalo lomongo nabi, alihu timongolio ngoáamilalo palacaya wau modungohe to Allahu Taáala. **27** Tiolo tatuwa-tuwaulio Allahu Taáala, Tio laba-labaalo molinepo. Pohileaala duá Tio polaiólo daá ohiheo-ohiheolo maó motimbulude li Isa Almasi! Amin. Salamu lamiaatia, Paulus, wato li Isa Almasi 1co>

**1:1** Mongo wutato jamaá lo Allahu Taáala to Korintus! Wutato matiliyango Allahu Taáala u lowali umati-Lio sababu Wutato miliki li Isa Almasi, peé-peéenta wolo ngoámila tau boli tóotoonu wambaio tahi poluboa Eeyanto Isa Almasi, deúito-yito Eeya limongolio wau Eeyanto olo. Watia Paulus, wau wutatonto tei Sostenes, mohalapu hinta Allahu Taáala ti Paapanto wau Eeya Isa Almasi mongohi mai balakati wau salaamati olimongoli. Watia loluladei tuladu botie odelo Rasulu li Isa Almasi, tapiluduó Allahu Taáala lohihilao wau to kahandaki-Lio olo. **4** Watia laito hemo sukuru ode Allahu Taáala tomimbihu olimongoli, sababu timongoli malo lolimo odehu hilao lonto Allahu Taáala lotimbulude li Isa Almasi. **5** Sababu timongoli malowali miliki li Isa Almasi, yi tutumulumu kaya todelomo tilolahepalo suáli. Pongototamu pasali lou tótoonulalo u hitua-tuawua modeloma daá, wau timongoli motota helo ngaajali maó pongotota boito. **6** Uito mopobilohé deú habari pasali li Almasi malo odito leituwoto ode delomo hilaamu, **7** tilinggula timongoli diila iloiliangia penu boli tuwau maó balakati, tou timongoli donggo hemohima Eeyanto Isa



Almasi meidungga mai wau oontonga lotaa ngoáamila. **8** Ti Isa Almasi lohihilao mamó pongaku olimongoli tunggula pulitio; alihu tou Tio muli meidungga mai, motapu-Lio timongoli diila oáibu. **9** Allahu Taáala mowali palacayalo lou leleaatulo maó. Tiolo Allahu Taáala tamalo tianga olimongoli u lowali tuwau wolo Wala-Io, deúito-yito ti Isa Almasi, Eeyanto. **10** Mongo wutato! To tanggulo Eeyanto Isa Almasi, pohile lowatia alihu timongoli ngoáamilalo tuwau lohuhama; alihu diaaluo polo hulinggila towolota limongoli. Mamusi timongoli motituwau, ngohilao wau ngopikiilangi. **11** Sababu, tau-tauwalo lonto ngaalaá lei Kloë lopo dulohei to olaatia woluo polo haamawa towolota limongoli. **12** U milakusudu lowatia yito deú towolota limongoli woluo talo loiya, "Watia moduduá olei Paulus," woluo olo talo loiya, "Watia moduduá olei Apolos," taawewo loloiya, "Watia moduduá olei Petrus," hiambola taawewo poli loloiya, "Watia moduduá li Almasi." **13** Diila pongalo aakali ti Almasi hitaya-tayade! Tei Paulus diila yilate silalipulio ode limongoli! Timongoli olo diila yilihualio u lowali muri lei Paulus, diila odito? **14** Bo sukuru watia diila lopolihu penu boli ngotaa maó to wolotamu, ngopohia tei Krispus wolei Gayus. **15** Penu boli ngotaa maó diila bolo poloiya deú watia malo polihu olio u lowali muri lowatia. ( **16** Oo joo, tei Stepanus wau ungalaálio, memangi watia talo polihu olimongolio. Bo wewolio maó leeto, toéela mola laatia, madiduu taawewo tapilolihu lowatia.) **17** Ti Almasi lolao olaatia dilla u mopolihu tau, bo u mopohabari Habari Mopiohe monto Allahu Taáala; wau uito olo musi pohutuo maó lowatia lou diila momake pongotota mobisala odelo dudelo lomanusia, alihu kawasa monto opopate li Almasi tosalipu diila mowali dia ohuna. **18** Sababu ode tau-tauawalo tahi dulunga ode obobinasa, habari pasali lo opopate li Almasi to ayu salipu debo odelo latabu wambaó. Bo, to olanto tapoáahuo lo Allahu Taáala, habari boito debo odelo dudelolio lo Allahu Taáala mopo bilohei kawasaa-Lio. **19** Sababu todelomo Kitabi, Allahu Taáala malo tahuda. "Tinepo lotau-tauwalo aaripu mapo ambulatiyo-U, wau huhama lotau-tauwalo tao ilimua mapo diaaluwo-U." **20** Naa, wolo hunalio lotau-tauwalo aaripu boito? Wolo hunalio limongolio tahi o ilimua? Wolo hunalio lotahi ahalia motolo mikiilangi dunia botie? Allahu Taáala

malo pobilohei deu tinepo lodunia botie yito bo latabu wambaó! **21** Sababu penu boli woloolo mola totaalo lomanusia, tio diila mowali moóonuhe Allahu Taáala motimbulude to pongotalio lohihilao. Bo tumbaó sababu Allahu Taáala molinepo, yi Tio lotuhatawa lopoáahu mai tau-tauwalo tapalacaya o-Lio lotimbulude tohabari upilo loladei lamiaatia u heánggapuo lodunia yimbulo. **22** Taulo Yahudi hipohilea lou moóohuu u moólinggolabu odelo bukuti, wau taulo Yunani hemo poudaa tinepo lodunia botie. **23** Bo ito botie bo hemo pohabari li Almasi tailate tosalipu. Habari boito heloo ngongoto hilaa taulo Yahudi, wau ilanggapulio yimbulo lotau-tauwalo tadiila Yahudi. Wau taa diila Yahudi helo nganggapu uito tuwaulio lo hulodu. **24** Bo ode tau-tauwala tamaa tiliango Allahu Taáala -- mopio taulo Yahudi meaalo taa diila Yahudi -- habari boito debo odelo dudelo-Lio lo Allahu Taáala mopo bilohei kawasa wau tine-Pio. **25** Sababu tabilohelio mohulodu to Allahu Taáala, deuító-yito lebe molinepo wolo otinepo lomanusia; wau tabilohelio molulupuhu to Allahu Taáala, deuító-yito lebe molotola wolo olootolo manusia. **26** Mongo wutato! nte eelai maó woloolo mola owowoluwoa limongoli tou Allahu Taáala lotianga olimongoli. Bo ngoidi wambaio towolota limongoli tamolinepo, meaalo okawasa, meaala o huhuloaa lailaió moduduá to pomilohu lomanusia. **27** Sababu memangi milakusudu Allahu Taáala molulaotai tahe anggapuo lodunia botie mohulodu, alihu tau-tauwalo tahi tootawa mowali moolito. Wau Allahu Taáala lolulaotai olo tahe anggapuo lodunia botie molulupuhu, alihu tau-tauwalo tahilotola boli buheli daa mowali moolito. **28** Allahu Taáala lolulaotai tahe anggapu dupadupapa, hina, wau tumbaó tahe anggapuo lodunia botie diila oboliilio, alihu Allahu Taáala mongantulu maó u heánga-polohuna daa lodunia. **29** Lou odito diaaluo penu boli ngotaa maó mowali motimenge lobatanga totalu lo Allahu Taáala. **30** Allahu Taáala lohihilaolo tamohutu mai tilinggula Wutato motituwau woli Isa Almasi. Lotimbulude li Isa Almasi, ito pilowali molinepo. Wau lotimbulude o-Lio olo Allahu Taáala lohutu mai olanto luli mopiiohe wolo batanga-Lio, lopowali olanto tolomodu umati-Lio, wau lolopato olanto. **31** Oditolio, debo odelo utula-tulade todelomo Kitabi, "Taa ohilaa mopo mangga-mangga, musi motimangga tou wolo u pilohutu mai lo Eeya."

**2:1** Mongo wutato! Tou watia lonaó mai ode limongoli wau lopohabari olimongoli pasali patuju lo Allahu Taáala udiipo ilotaawa lodunia, diila pilomake lowatia tinepo lodunia botie meaalo helo bisala wolo loiya ulatabu. **2** Sababu watia mailo teekati deú ngotilonggadu watia donggo woluo woli mongoli, watia diila tamopo dudulai wolo-wolo, ngopohia tomimbihu li Isa Almasi; tolomodulio deú Tio mailate tosalipu. **3** Tou watia woluo woli mongoli, watia molulupuhu wau hulu-huluhelio lou moohe. **4** Habari upilo tunggulai lowatia ode limongoli, diila pilo tunggulai lowatia wolo tataa-heyaalo u moheinga moduduá tinepo lomanusia. Watia lopo tunggulai uito wolo pohuli u lopobukuti deú Rohullah okawasa. **5** Watia lohutu odito, alihu palacayamu li Almasi diila patopatoá totinepo lomanusia, bo patopatoá tokawasa lo Allahu Taáala **6** Eleponu odito, towolota lotaa hitumula rohanilio maloontapo, watia memangi helo bisala tomimbihu lotinepo. Bo tinepo botie, diila tinepo lodunia, meaalo tinepo lo tahidihima kawasa tojamani botie, u okokawasalio mamooli. **7** Tinepo u tilooowoli lowatia boito yito tinepo lonto Allahu Taáala. Tinepo boito diila otaawa lodunia, bo Allahu Taaala mapilo dapatio ode osananginto tutu tou dunia botie diipo pilowali-Lio mai. **8** Diaaluo penu boli ngota maó monto tahidihima kawasa tojamani botie tamotota pasali lotinepo boito. Sababu humayaalio, mailotaawa limongolio, tantu timongolio diila tamopo salipu to Eeya talailaó boito. **9** Boliio maó suáli boito yito debo odelo utulatulade todelomo Kitabi, "Wolo udiila peéenta iloontonga meaalo ilodungohe lomanusia, wau diila peéenta olo tilumoodu todelomo pikilangi lomanusia, ui-uitolo u pilodapato lo Allahu Taáala ode tau-tauwalo tamotoliángo o-Lio." **10** Bo Allahu Taáala malo poilaalo mai olanto lotimbulude to Rohu-Lio. Rohullah boito motulete totoonulalo u hituatuawua, tunggula to lalaa-njanawalo Allahu Taáala u penu boli tutuuá daá wambaio. **11** Sababu tamotota tuango hilaa lo tahingota-ngotaawa yito rohu lotau boito lohihilao, diila odito? Odito olo tomimbihu Allahu Taáala. Tamotota tuango hilaa lo Allahu Taáala bo Rohu lo Allahu Taáala lohihilao! **12** Wau ito diila yilohia-Lio mai rohu lodunia botie, bo Rohu ulonto Allahu Taáala, alihu otaawanto ngoáamila u mailohi lo Allahu Taáala olanto. **13** Sababu uito, wonu amiaatia motombanga susuu-aliyaalo

tomimbihu Allahu Taáala totau-tauwalo taó Rohullah, amiaatia diila moóowoli mai tinepo lomanusia, bo moduduá pongaajali lo Rohullah. **14** Taa diila o Rohullah, diila mowali mololimo u piloilaalo mai lo Rohu boito, sababu ode tau boito susuu-aliyaala boito debo odelo tuwaulio lo ohulodu wambaio. Tau boito diila moó pahaamu o-Lio, sababu susuu-aliyaala boito bo mowali tilikiyolo wolo dudelo lorohani. **15** Taa o Rohullah mowali mongohi peni totoonulalo u hitua-tuawua, bo diaaluo penu boli ngotaa maó ohaku mongohi peni o-Lio. **16** Todelomo Kitabi tulatulade, "Tatoonu tamotota pikiilangi lo Eeya? Wau tatoonu tamowali monaseehati o-Lio?" Ito-itolo taó pikiilangi u tutuuwauwa woli Almasi!

**3:1** Mongo wutato, otutuulio maó watia diila mowali mobisala mai wolo Wutato debo odelo taa o Rohullah. Watia bo mowali mobisala woli mongoli debo odelo wolo taa u donggo tumutumulo moduduá u otohilaa loduniawi; debo odelo wolo taa u donggo unge todelomo palacayalio toli Almasi. **2** Muloololio mai watia bo mowali mongohi olimongoli uáalo lo taunge, diila uáalo lotaa leidaá; sababu timongoli diipo botie molotolo woleeto. Penu boli botia olo timongoli debo diipo boti molotolo woleeto, **3** sababu timongoli donggo tumutumulo moduduá piilimu odelo manusia. Sababu wonu timongoli donggo hemohiihia wau hemolohulua ngota timongota, wolo uito diila mopo bilohei deú timongoli donggo hitumula moduduá piili lomanusia, debo odelo tau-tauwalo tadiila hitootawa to Allahu Taáala? **4** Wonu woluo tamoloiya, "Amiaatia moduduá olei Paulus," wau taawewo moloiya, "Watia moduduá olei Apolos," wolo uito diila mopo bilohei deú Wutato opiili, debo odelo tau-tauwalo dunia? **5** Otutuulio maó tatoonu tei Apolos boito? Wau tatoonu tei Paulus? Amiaatia bo tahi pomayawa to Allahu Taáala, tamaa lodelo olimongoli u lomalacaya li Almasi. Amiaatia bo hemo ponaó lokalaja uiludu mai lo Eeya olamiaatia ngota-ngota. **6** Watia tamopomulo wau tei Apolos tamomuhuto, bo Allahu Taáala lohihilaalo tamopowali pilomulolio boito mobutu. **7** Oditolio, u polohuna daá yito Allahu Taáala, sababu Tiolo tamopobutu mai. Tamopomulo wau tamomuhuto diila polohuna daá; **8** duduuluwolo yito ngodalajati. Ngota-ngota mamololimo wuupa moduduá tolopanilio u

tioopatea. **9** Amiaatia yito tau-tauwalo tapeé-peéenta hipo kalajawa ode Allahu Taáala; wau timongoli yito debo odelo halabolu lo Allahu Taáala. Mongo wutato yito debo odelo hudungu lo Allahu Taáala olo. **10** Wolo pongotota uilohi mai lo Allahu Taáala, watia odelo ahali loui momongu malo podutu maó pandemeni ode hudungu boito, wau taawewo momongu toitaato pandemeni boito. Timiidu tau musi mopoo tuoto tiotutua woloolo mola tio momongu toitaato pandemeni boito. **11** Sababu Allahu Taáala lohihilao malopo tambati li Isa Almasi debo odelo tatuwa-tuwaulo pandemeni lohudungu boito; diaaluo pandemeni uwewo. **12** Woluo tamomongu toitaato pandemeni boito loui momake hulawa, woluo tamomake talaá, woluo tamomake botu polioto, woluo olo tamomake ayu, huoyoto mohengu meaalo laato. **13** Kalaja lotaa ngota-ngota demaa oontonga tou ti Almasi muli meidungga mai. Sababu todulahee boito tulu mamohutu maó kalaja lotaa ngota-ngota maóontonga. Tulu u motesi wau molantu mutu lokalaja boito. **14** Wonu hudungu u bilongu lotau toitaato pandemeni boito moó tahangi lotulu, tau boito mamololimo palasenilio. **15** Bo wonu kalaja lotau boito mopobu, tio maaluhi; tio lohihilao mamoaáhu, bo debo odelo taloaáhu lolibaya totulu. **16** Tingga otaawa lo Wutato deu timongoli yito Bele lo Allahu Taáala? Wau deu Rohullah bilubiluloá todelomi mongoli? **17** Wonu woluo taa u mongantulu Bele lo Allahu Taáala, Allahu Taáala olo mamo ngantulu tau boito. Sababu Bele lo Allahu Taáala yito tolomodu ode Allahu Taáala wambaó, wau timongolilo bele boito. **18** Penu boli ngota diila maó pohimbulo to batangalio lohihilao. Wonu woluo tau to wolotamu molaasa batangalio molinepo moduduá tuuúdu lodunia botie, tau boito musi mowali mohulodu, alihu tio mowali otu-otutuulo maó molinepo. **19** Sababu tahe anggapuo molinepo lodunia yito mohulodu to bibilohu Allahu Taáala. Todelomo Kitabi tulatulade, "Allahu Taáala mohentobu tau-tauwalo tahi tinepa todelomo otoota limongolio lohihilao." **20** Woluo olo tulatulade odie, "Otaawa lo Eeya deu pikiilangi lotau-tauwalo tahi tinepa yito pikilangi udiila ohuna." **21** Sababu uito, penu boli ngotaa maó diila mowali momuji-muji tomanusia, sababu totoonulalo u hitua-tuawua mailohi-Lio mai lowali miliki limongoli. **22** Tei Paulus, tei Apolos, tei Petrus, dunia botie, tutumulo wau opopate, jamani

botie, meaalo jamani umamei dungga mai, totoonulalo u hitua-tuawua yito milikimu. **23** Wau timongoli yito miliki li Almasi, wau ti Almasi miliki lo Allahu Taáala.

**4:1** Anggapualo maó amiaatia tahi pomayawa li Almasi, tatihi-tihula mopohabari lalaa-njanawalo Allahu Taáala udiipo otaawa lodunia. **2** Ubohu-bohulio pohileelo wolo moóhuu monto tamoomayawa u odito yito deú tio musi tatapu wau molotolo hilao toli tuanilio. **3** Olaatia, diila mowali suáli wolo u timongoli -- meaalo penu boli tatoonu -- olo pikiilangia maó pasali lobatanga laatia. Tumbaó wolo u pilikilangi laatia tomimbihu batanga laatia lohihilao olo diila mowali suáli. **4** Watia diila molaasa ototala penu boli todelomo suáli wolo wambaio, bo uito diila mopo bukuti deú watia memangi diila ototala. Eeya lohihilaolo tamolantu mai deú watia ototala meaalo diila. **5** Sababu uito, sababu diipo wakutuulio, timongoli diila maó polamemeto molantu deú tahingota-ngotaawa yito ototala meaalo diila. Wimailo tunggula Eeya de meidungga mai. Eeyaalo tamamomuó ngoáamila hitua-tuawua u malakusudu hetuuólo u tuutuó todelomo u modiólomo. Eeyaalo tamamo monggali ngoáamila niyati uleitahu todelomo hilaa lomanusia. Tou boito timiidu tau bolo mololimo monto Allahu Taáala poloilaalo momuji upaatuti tolimoolio. **6** Mongo wutato! Duólo polohuna daá batanga limongoli, watia malomake ngoáamilalo boito tolei Apolos wau tobatanga laatia lohihilao. Makusudu laatia alihu monto obaaya lamiaatia boito timongoli mowali mopoólaato wolo boli loloiya, "Potidihulo towuúdu uwoluo." Lou odito diaaluo penu boli ngotaa maó limongoli tamopo mangga-mangga lo tahingota-ngotaawa, lapataó mohina taawewo. **7** Tatoonu talo powali to Wutato lebe lou taawewo? Wolo totoonulalo hitua-tuawua u tilolimo lo Wutato diila lonto Allahu Taáala? Oditolio, yilongola ohilaa motimenge lobatanga, debo odelo wolo uwoluo to Wutato boito diila tuwaulio uilohi? **8** Memangi timongoli diilalo momalalu wolo-wolo! Timongoli makilaya! Timongoli malowali onlongia! Wau amiaatia diila. Donggo boli piohio wonu timongoli otu-otutuulo maó malowali onlongia, alihu amiaatia mowali momalenta woli mongoli. **9** Sababu moduduá huhaama laatia, amiaatia mongo rasulu,



mapilowali mai lo Allahu Taáala odelo hepobiilohe lotau totalu lomanusia wau mamaa-laikatiyalo. Amiaatia debo odelo tahe hinawa u dilehuwa hukumani mate totalu lotaa dadaata wau hehila-hilantiá lodunia. **10** Sababu ti Almasi, amiaatia yito taa u mohulodu, wau timongoli taulo Nasara tahi tootawa! Amiaatia hilupuhe wau timongoli hiloootola! Amiaatia hilenteio, wau timongoli hepui-puiyolio! **11** Tunggula saaáti botie amiaatia heódungga lopolobiti wau totoángo; boó lamiaatia bolo towawaó wambaio; tau hemo posikisa olamiaatia; amiaatia diila otambati upoti tatapuwaló; **12** amiaatia malo tióopatea helo tolopani. Wonu amiaatia laánatialio, amiaatia hemomalasi wolo balakati; wonu amiaatia alinayaalio, hesabalia lamiaatia; **13** wonu tau hemo poóleeta olamiaatia, amiaatia momalasi wolo tataa-heyaalo u molumbooyoto. Amiaatia diila lebe lou puputo lodunia botie; tunggula saaáti botie amiaatia donggo he anggapuolio debo odelo bountu lohuta. **14** Watia loluladei utie olimongoli diila u mopoóolito olimongoli, bo u monaseehati olimongoli debo odelo mongo walaó laatia lohihilao. **15** Sababu watiaalo talowali tiyamo limongoli, eleponu otanu odelo taulo Nasara, timongoli maógulu mopulu lihu lota. Todelomo tutumulumu odelo tau-tauwalo tamo tituwau woli Almasi, watia talowali tiyamo limongoli, sababu watia talodelo mai Habari Mopiohe pasali li Almasi ode limongoli. **16** Sababu uito pohile lowatia tióotutua moduduá obaaya laatia. **17** Woleeto boito watia malolao mai olei Timotius ode limongoli. Odelo muri li Almasi, tio tutuwauwa debo odelo walaó laatia lohihilao taa otoliángo laatia. Tio walaó tamowali palacayalo. De tio tamamo poéelaó olimongoli tomimbihu dudelo u hediluduá laatia lapatio maó watia palacaya li Almasi, deúito-yito dudelo lotutumulo u pilo ngaajali maó laatia ode timiidu jamaá penu boli touóonu wambaio. **18** Dengolo lota towolota limongoli malowali sombongi, sababu timongoli hemo lantobu olaatia diila tamonaó mai ode limongoli. **19** Bo wonu Eeya mopoluasi olaatia, watia mamonaó mai olo ode limongoli diilalo mohiheo. De tou boito watia mamooónto olo wolo u mowali pohutuo lotau-tauwalo tahi sombongia boito; diila bo loiya limongolio wambaio. **20** Sababu wonu Allahu Taáala momalenta tutumulo lo tahingota-ngotaawa, suáli boito pobukutiola lo olootoo tutumulo lotau boito, diila bo wolo loiya. **21**

Oditolio tulaotilo maó wolo ulebe otohila limongoli! Wolo timongoli motohila watia monaó mai mongaajali olimongoli wolo pakusa meaambo wolo molumboyoto wau toliango?

**5:1** Watia otutuulio maó malo lolimo dudulohu deü towolota limongoli woluo totoonulalo huhutu huloto ulaba-labaalo: Woluo towolota lo Wutato tahe lojina wolo tiilolio watoó. Penu boli tau-tauwalo tadiila hitootawa to Allahu Taáala olo diila hipohutua debo odelo uito! **2** Eleponu odito, Wutato debo donggo ohilao batingga. Boliio maó Wutato wajibulio suukali lohilao, wau mopo hinggi maó towolota lo Wutato taa u hipohutua suáli boito. **3** Debo odelo lahiri watia molaminga monto olimongoli, bo debo odelo batini watia woluo tohuungi mongoli. Oditolio, watia ohilaa mohutu debo odelo watia woluo towolota limongoli, "To tanggulo Eeya Isa Almasi, watia mopoilaalo mai deü taa u malohutu huhutu umalo odito kotololio, musi hukuu-maniyolo!" Wonu timongoli motiambu anggapuwalo deü watia woluo towolota limongoli, wau wolo kawasa li Isa Eeyanto, **5** timongoli musi mohudu maó tau boito ode Ibilisi alihu batanga lotau boito binasa wau lou odito rohulio poáahuwolo tou Eeya muli meidungga mai. **6** Diila paatuti timongoli molaasa sombongi. Otanu timongoli malotota pohumaya botie, "Ragi ungoidi moóhutu ngoáamila ulaulio momatango!" **7** Tapilapo ragi udeedelo boito, deüito-yito ragi lodusa, alihu timongoli mowali debo odelo uuulau ubohu, belesi monto ragi lodusa udeedelo, wau otaawa maó laatia deü timongoli memangi odito. Sababu, lameyangi lo Paskanto mapilo dapato, sababu ti Almasi talowali odelo himba lo Paskanto, mapilopo bakelio. **8** Oditolio, dulo ito mopolame potihunggunto boito wolo roti udiila oragi, deüito-yito roti u motomaya mai omuluni wau ngoáamila u motuhatawa to hilaa lo Allahu Taáala. Diila maó polameyanto potihunggu lo Paska boito wolo roti uwanto-wantohe ragi udeedelo, deüito-yito ragi lodusa wau ololeeto. **9** Todelomo tuladu lowatia uilalu maó, watia lopoótaa mai olimongoli alihu diila maó poáawota wolo taa huloto. **10** U milakusudu lowatia diila taa huloto meaalo tamaá, meaalo tamoo-himbuloa meaalo tamooluboa balaahala u sama-samaata diila motota Allahu Taáala. Diila! Diila milakusudu lowatia timongolio; sababu

wonu timongoli musi mopoo lamingao olimongolio, yi tantulo maó timongoli palalu lumualao sama-samaata monto dunia botie. **11** Makusudu lowatia yito, deu timongoli diila maó poaawota wolo taa u hemongaku batangalio taulo Nasara, bo tau boito huloto, meaalo tamaa, meaalo tamooluboa balaahala, meaalo taohilaa mopoo leeto taawewo, meaalo tahi huwoaalo, tamootaowa. Boli motihuloaa molamela wolo tau boito olo diila mowali! **12** Memangi momutoo tau-tauwalo tadiila Nasara diila suali lowatia. Allahu Taála lohihilaolo tamaa momutoo olimongolio. Bo tomimbihu popoo-ngawaalo jamaa limongoli, diila maa timongoli lohihilao tamusi momutoo olimongolio? Todelomo kitabi tulatulade, "Polahia maó taa moleeto towolota limongoli."

**6:1** Yilongola woluo towolota limongoli tabuheli monao odeli hakimu tadiila motota lo Allahu Taála, u mopo dulohu wutato ngoimani, wonu tio mohahaamawa wolo wutatio boito? Yilongola tio diila lohile umati lo Allahu Taála tamo poolapato palakala boito? **2** Yilongola diila otaawa limongoli deu umati lo Allahu Taála tamaa momutoo dunia botie? Oditolio, wonu memangi timongoli mabutoo lodunia botie, wolo timongoli diila mambo mopoo lapato totoonulalo palakala lo bubutoo udiila oboliilio? **3** Wolo diila otaawa limongoli deu ito mamomutoo mamaa-laikatiyalo? Lebe-lebe maó poli totoonulalo palakala lo tutumulo ungohui-ngohei! **4** Yi wonu tumoodei totoonulalo palakala debo odelo uito, wolo timongoli mohudu maó totau-tauwalo tadiila o huhuloaa sama-samaata todelomo jamaa? **5** Otutu mooolito! Tantu to wolotamu woluo tahingotangotawa taodito molinepo u mopoo lapato hulinggila towolota lomongo wutato tasama-sama Nasara! **6** Bo boliio maó ngotaalio lo Nasara lonaó ode taa diila Nasara u lopodulohe palakalalio to wutatio taa Nasara. **7** Oditopo monao mota mohutu palakala ode taa diila Nasara; woluolio totoonulalo hulinggila towolota limongoli olo madebo odelo tuwaulio lo ololuhi limongoli. Lebe mopioheo timongoli pohutuwole diila aadili; meaalo poluhiyolo! **8** Bo timongoli lohihilao tumbaó tahemohutu taawewo diila aadili. Timongoli lohihilao olo talo pooluhi taawewo. Wau uito tumbaó hepilohutu limongoli ode mongo wutato ngoimani! **9** Wolo diila

otaawa limongoli deü tau-tauwalo tadiila hipoduduá u otohilaa lo Allahu Taáala diila tamowali pongawaá umati lo Allahu Taáala? Diila bolo oimbuloalio! Tau-tauwalo tahi pohutua huloto, tau-tauwalo tahi poluboa balaahala, tahi pojinawa, mongolo lai hisuntalia tahi pohutua huhutu umoóolito ode timongota pangelio, **10** tahi potaówa, tahi tamaáawa, tahi huwoáalo, tahi ohilaowa mopoóleeto taawewo, wau tahi pohamawa paéeda ulaba-labaalo ode taawewo -- ngoáamila taa debo odelo uito diila mowali pongawaá umati lo Allahu Taáala. **11** Dengolo lota towolota limongoli muloololio mai opiili debo odelo uito. Bo botia timongoli piloilaalo belesi lonto dusa. Timongoli malowali tolomodu haku lo Allahu Taáalanto. Timongoli maluli mopiiohe wolo Allahu Taáala, sababu timongoli palacaya to Eeya Isa Almasi wau sababu kawasa lo Rohu lonto Allahu Taáala. **12** Woluo talo loiya deü timiidu tau mowali mohutu totoonulalo u hitua-tuawua. Bo olaatia diila ngoáamilalo ohuna. Oditolio eleponu watia mowali mohutu penu boli wolo, bo watia diila mohuto mopoluli batanga lowatia kawasaalio penu boli loolo. **13** Woluo olo talo loiya deü uáalo yito duólo ombongo, wau ombongo yito duólo uáalo. Bo duduuluwolo mapo diaaluo lo Allahu Taáala. Batanga lomanusia diila mowali pomake u mopowoluo mai wumbuta u huloto, bo duólo momaya to Eeya wambaó. Wau Eeya mamolaala batanga boito. **14** Allahu Taáala malo potumulai li Isa Eeya lonto opopate, odito olo Allahu Taáala mamopo tumulai olanto wolo kawasaa-Lio. **15** Otaawa lo Mongo wutato deü batanga limongoli yito pongawaá batanga li Almasi. Oditolio, wolo watia mowali mohama maó tuwau pongawaá batanga li Almasi lapataó powaliyolo pongawaá batanga lo tasuuntali ngota? Sama-samaata diila! **16** Meaalo tanu diipo otaawa limongoli deü taa moulawota wolo tasuuntali ngota, mowali tuwau wolo tasuuntali boito! Sababu todelomo Kitabi tulatulade, "Duduulotalo mowali tuwau." **17** Bo taa mopotuwau batangalio wolo Eeya, Rohu lo Eeya wolo Rohu lotau boito mowali tuwau. **18** Pohalaheó monto totoonulalo huhutu u huloto. Sababu ngoáamila dusa wewo u pilohutu lotau, lotoduo to bulemengo batanga lotau boito. Bo taa mohutu u huloto, boliilio maó mohutu dusa ode batangalio lohihilao. **19** Musi otaawa maó limongoli deü batangamu yito tambati potibiluloá lo

Rohullah. Rohu boito bilubiluloá todelomi mongoli. Wau Allahu Taáala lohihilaolo talongohi mai Rohu boito olimongoli. Batanga lo Wutato diila haku limongoli. Uito yito haku lo Allahu Taáala. **20** Allahu Taáala malotali olimongoli wau malo wimumuto bilayali. Sababu uito, pomakea maó batangamu odito lakulio tilinggula Allahu Taáala polaióolo.

**7:1** Botia watia ohilaa mobisala mai tomimbihu suáli u ilunte limongoli todelomo tuladu limongoli. Wonu talolai ngota diila monika, uito mopiohu. **2** Bo alihu diila o aangalio u mohutu susuu-aliyaalo udiila paatuti, lebe mopiohe timiidu talolai odilelio lohihilao wau timiidu taabua odilelio lohihilao olo. **3** Dile talolai musi mopoópolu uwajibu olio odelo dile todilelio, wau dilelio taabua musi mopoópolu uwajibu olio odelo dile todilelio; ngota-ngota musi mopoópolu maó uwajibu olio ode tawewo. **4** Dile taabua diila okawasa to batangalio lohihilao; taókawasa to batangalio yito dilelio. Odito olo dile talolai diila okawasa to batangalio lohihilao; taókawasa to batangalio yito dilelio. **5** Diila maó pahalahu ngota timongota odelo motolodile. Mowali bo u ngopeeé mola, asali duduulotalo malo akoloa. Louí odito ngota-ngota mowali modua mola louí diila otaibuto. Bo lapatio maó, timongoli mamusi tinggai muli moduudula odelo motolodile. Wonu diila odito, de timongoli maó piyowa lorohu u moleeto, sababu timongoli diila molotolo mongotongo napusu. **6** Watia molojiya mai utie diila odelo palenta, bo odelo naseehati. **7** Otutuulio maó watia lebe motohilaa wonu ngoáamila tau mowali debo odelo watia. Bo ngota-ngota malo lolimo tolomodu ponu lonto Allahu Taáala. Ngotaalio oponu utie, wau taawewo oponu uito. **8** Totau-tauwalo tadiipo helonika wau tomongobua tamahi jaandawa, utieelo naseehati lowatia: Lebe mopiohe Wutato tumutumulo debo odelo watia. **9** Bo wonu Wutato diila moó otongo napusu, Wutato mamusi monika. Lebe mopiohe Wutato monika louí napusu lobilahimu wali-walihuhu. **10** To limongolio tamalonika, utieelo palenta lowatia: (Otutuulio maó diila watia tamongohi mai palenta botie, bo Eeya.) Taabua ngota tamalonika diila mowali mololaa maó dilelio. **11** Bo wonu tio malo lolaa maó olio, tio musi debo diila odile, meaalo muli mohualinga ode dilelio. Wau ngotaalio lodile talolai diila mowali motalaki

dilelio. **12** To uwewo-wewolio, naseehati lowatia yito: -- utie naseehati laatia lohihilao, diila Eeya -- wonu ngotaalio lo Nasara odile ngotaalio taabua tadiila palacaya li Almasi, wau dilelio taabua akolo u tumumula peé-peéenta wolio, yi tau boito diila mowali motalaki dilelio taabua. **13** Wau wonu ngotaalio taabua Nasara odile ngotaalio tadiila palacaya li Almasi, wau dilelio taabua akolo u tumumula peé-peéenta wolio, yi dile talola boito diila mowali motalaki dilelio. **14** Sababu dile talolai tadiila palacaya poluasialio u mowali pongawaá umati lo Allahu Taáala sababu nikalio wolo dile tamalowali miliki lo Allahu Taáala. Odito olo dile taabua tadiila palacaya poluasialio u mowali pongawaá umati lo Allahu Taáala, sababu nikalio wolo dile talolai tamalowali miliki lo Allahu Taáala. Wonu diila odito, mongo walai mongolio tantulo maó debo odelo mongo walaó kaapiru, lebe-lebe pomaó mongo walaó boito ilanggapu odelo pongawaá umati lo Allahu Taáala. **15** Bowonu taa diila palacaya boito mololaa maó dilelio taabua meaalo dilelio talolai taulo Nasara, diila maó pongotongo olio. Todelomo suáli botie dile taabua meaalo dile talolai boito molopato, sababu Allahu Taáala motohilaa alihu Wutato tumumula wolo mopiohe wau dame. **16** Sababu Wutato odelo dile taabua -- tamalo malocaya to Eeya -- woloolo mola mowali otaawa lo Wutato lou tantu deú Wutato diila mowali mopoáahu dilemu taabua? Odito olo Wutato odelo dile talolai Nasara, woloolo mola mowali otaawa lo Wutato lou tantu deú Wutato diila mowali mopoáahu dilemu taabua? **17** Mamusi ngota-ngota mongatulu tutumulio moduduá potuhata lo Eeya debo odelo u matilantu mai lo Allahu Taáala olio tou Allahu Taáala lotianga olio u palacaya to o-Lio. Ui-uitolo wuúdu u hepilo ngaajali lowatia totimiidu jamaá. **18** Humayaalio, wonu tahingota-ngotaawa matilunalio tou lololimo titiango Allahu Taáala, yi tau boito diila maó potolopani moluluta tutuuotalo lotuuna boito. Odito olo wonu tahingota-ngotaawa diipo tiluuna tou tio lololimo titiango Allahu Taáala, tau boito diila maó peituuna. **19** Sababu moduduá wuúdu lotuuna meaalo diila moduduó, duduuluwolo tutuuwauwa diila oboli wolo-wolo. U polohuna daá yito moduduá totoonulalo palenta lo Allahu Taáala. **20** Mamusi timiidu tau debo tumutumulo todelomo owowoluwoa debo odelo tou tio lololimo titiango Allahu Taáala. **21** Wonu towakutu Wutato



tiliyango, Wutato yito ngotaalio lowato, sambelolo Wutato suusa-suusa momikiilangi suáli boito. Bo dewonu Wutato ohiyango u mowali molopato, pohunawa maó hiyangio boito. **22** Sababu ngotaalio lowato tamalo malacaya to Eeya, deüito-yito taulo Eeya talo lopato. Wau tamo lopata ngota tamalo malacaya to Eeya, deüito-yito wato li Almasi. **23** Allahu Taaála malotali to Wutato wau malo wimumuto bilayalia-Lio. Sababu uito, Wutato diila maó pohudu batanga u mowali wato lomanusia. **24** Oditolio, Mongo wutato, penu boli woloolo mola owowoluwoa limongoli tou tiliyango, mamusi Wutato debo tumutumulo debo odelo uito peé-peéenta wolo Allahu Taaála. **25** Botia tomimbihu tau-tauwalo tadiipo helonika. Tomimbihu suáli boito, watia diila lololimo palenta wolo-wolo lonto Eeya. Bo odelo taa u sababu odehu hilao lo Eeya paatuti palacayalo, watia ohilaa mongohi mai naseehati lowatia. **26** Moéela mola totoonulalo osuusa u monganjamu masaatia botie, to pongolaasa laatia lebe mopiohe wonu tau debo moponaó lo tutumulo debo odelo owowoluwoalio u masaatia. **27** Wonu Wutato maódile taabua diila maó potolopani molopato monto dile boito. Wonu Wutato diipo odile diilalo pololohe dile. **28** Bo wonu Wutato monika, uito diila odusa. Odito olo wonu tadulahu ngota monika, diila oboliilio deü tio odusa. Bo, timongolio talonika boito mamotaalua lou suusa dadaata. Wau watia ohilaa Wutato moóohei monto totoonulalo usuusa boito. **29** Makusudu lowatia odie, Mongo wutato: Ito diilalo owakutu dadaata. Tumulalo mai botia, timiidu tamaó dile taabua mamusi tumumula debo odelo diila odile; **30** taa u humoyongo, tio tumutumula debo odelo diila ilosuusawa lohilao; taa u moiii, tio debo odelo diila meengahe; taa u malotali, tio debo odelo diila motolo miliki wolo-wolo; **31** wau taa u umoliyoó todelomo susuu-aliyaala lodunia, tio mamusi tumumula debo odelo diila pilo puusingi lo susuu-aliyaalo boito. Sababu diilalo mohiheo dunia botie, todelomo owowoluwoalio u botia, mamooli! **32** Otohilaa lowatia alihu Wutato molopato monto usuusa. Taa diila odile taabua mamopo dulunga pikiilangilio to susuu-aliyaalo tomimbihu Eeya, sababu tio ohilaa mopo sanangi hilaa lo Eeya. **33** Bo tamaa ilodile taabua mamoo mikiilangi dadaata susuu-aliyaala lodunia botie, sababu tio ohilaa mopo sanangi hilaa lodilelio; **34** akibatilio polotuotio

hitaya-tayade. Taabua ngota tadiila odile, meaalo tadulahu ngota, mamomikiilangi dadaata susuu-aliyalo tomimbihu Eeya, sababu tio ohilaa alihu batanga wau nyawalio mowali miliki lo Allahu Taála. Bo taabua ngota tamaa odile, mopo dulungo pikiilangilio ode susuu-aliyaala lodunia botie, sababu tio ohilaa mopo sanangi hilaa lodilelio. **35** Watia loluladei ngoáamilalo boito ode opopiohumu lohihilao, diila wolo makusudu modini utie wau modini uito. U otohilaa lowatia bo wambaó alihu Wutato mohutu u otutu wau paatuti, wau alihu Wutato mowali mopo dulungo pikiilangimu ode Eeya. **36** Wonu tahingota-ngotaawa molaasa diila hemo ponaó u patutilio ode tilantahio, wonu tio diila moó otongo napusulio, wau tio molaasa palalu monika wolo tadulahu boito, huliilo maó tio mohutu wolo u to pongolasalio mopiohu. Tio diila odusa, wonu timongolio monika. **37** Bo wonu tahingota-ngotaawa malolantu maó todelomo hilaalio udiila monika wolo tilantahio wau u tilantulio boito diila pakusa, yi upilo hutulio boito mopiohu, asali tio molotolo hilao mopohutu maó. **38** Ilaalolio taa u monika mopiohe huhutuulio, wau taa u diila monika lebe mopiohe poli huhutuulio. **39** Taabua ngota tamalo nika leitihuto todilelio bo ngotilonggadu dilelio tumutumulo. Wonu dilelio mailate, taabua boito molopato muli monika wolo taa otohilaalio; asali nika boito nika lo Nasara. **40** Bo tio malebe opaéeda wonu tio diilalo monika. Uito huhaama lowatia lohihilao, bo to pongolaasa lowatia deú uiloiya mai lowatia boito yito wolo kawasa lo Rohullah.

**8:1** Botia tomimbihu uáalo uwahi odelo dewo ode balaahala. Memangi otutu debo odelo loiya lotau, "Ito ngoáamilalo malotota." Bo pongotota moóhutu totau sombongi, hiambola toliango momongu batanga lotau. **2** Taa u molantobe deú dadaata u otaawalio, otutuulio maó diipo motota u mode-modelomolo maó. **3** Bo taa u otu-otutuulo maó motoliango to Allahu Taála, tio otaawa lo Allahu Taála. **4** Pasali suáli lou molamelo uáalo umapilo dewo ode balaahala, otaawanto deú balaahala mopobayahei hitua-tuawua u otutuulio maó diaaluo. Wau otaawanto olo deú Allahu Taála bo tuwau; diaaluo tawewo. **5** Memang dadaata olo wolo u iluntelio ila wau eeya; mopio uwoluo tohulungo boli uwoluo toitaato dunia. **6** Bo

olanto, Allahu Taáala bo tuwau. Tio Allahu Taáala talo powali mai totoonulalo u hitua-tuawua. Ode o-Liolo ito tumumulo. Wau Eeya bo tuwau olo, deüito-yito ti Isa Almasi. Lotimbulude o-Lio totoonulalo u hitua-tuawua pilopowali, wau sababu Tiolo yi ito tumutumulo. **7** Penu boli odito, diila ngoáamila taa motota losuáli boito. Woluo taa muloololio mai biasaalio hemolubo balaahala. Oditolio, sababu uito tunggula botia olo timingolio donggo molaasa deü uáalo, u mapilo dewo ode balaahala, deüito-yito uáalo lo balaahala. Yi wonu timongolio molamela uáalo boito, timongolio molaasa odusa; sababu iimani limongolio diipo molotolo. **8** Otutuulio maó uáalo lohihilao diila moóhutu wumbutanto wolo Allahu Taáala mowali lebe mohulango daá. Wonu ito molamela uáalo boito, ito diila moótapu paéeda wolo-wolo. Boliio maó wonu ito diila molamela uáalo boito, ito olo diila luhi wolo-wolo. **9** Bo, poódaha-dahaalo maó! Diila bolo motoduo mai ode taawewo mowali odusa -- sababu iimanilio diipo molotolo -- masababu Wutato molopato penu boli mohutu wolo wambaio. **10** Makusudu laatia odie: Humayaalio Wutato, taó iimani molotolo, donggo hulohuloáa hemo lamela tokuili lo balaahala. Lapataó tahingota-ngotaawa moóonto to Wutato hulohuloáa hemo lamela teto. Wonu iimani lotau boito diila molotolo, diila maüito u mamohutu tau boito buheli molamela uáalo u mapilodewo ode balaahala boito? **11** Wau sababu uito, yi iimani lo Wutato mamóhutu taa u diila molotolo iimanilio boito mowali lapalolo. Lebe-lebe pomaó ti Almasi yilate ode tau boito olo. **12** Wau wonu Wutato mohutu totala debo odelo uito ode mongo wutato Nasara -- deüito-yito Wutato moluusa iimani limongolio u molulupuhu -- yi Wutato odusa toli Almasi. **13** Uito sababuulio, wonu uáalo moósababu wutato lowatia ilodusa, yi watia sama-samaata diilalo molamela tapu. Sababu diila bolo wutato lowatia odusa sababu watia.

**9:1** Diila mawatia tau bebasi? Diila mawatia rasulu? Wolo watia diipo peéenta maó loóonto li Isa Eeyanto? Wolo timongoli diila tilapulo kalaja lowatia duólo Eeya? **2** Eleponu tau-tauwala wewo diila mohuto momasisi olaatia odelo rasulu, pulito ngoidilio tolo akuwo limongoli uito! Sababu tutumuli mongoli odelo taulo Nasara yito tuotio deü watia ngotaalio lo

Rasulu. **3** Wonu tau mongaibu olaatia, watia mamolametao odie: **4** Wolo diila ohaku watia mololimo uáalo wau uilumolo sababu kalaja lowatia? **5** Wolo watia diila ohaku modelo ngotaalio dile taabua lo Nasara peé-peéenta wolaatia tononaó lowatia, debo odelo u pilohutu lomongo wutati Isa Eeya wau lomongo rasulu wewolio, leiwaito tei Petrus? **6** Meaalo bo tei Barnabas wau watia wambaó tapilo wajibu mopeehu rijiki lohihilao? **7** Diaaluo pongawaá lo suludadu tamusi mongonggosi batangalio lohihilao todelomo diti lopopaatea! Diaaluo tamoomengia tamo pomulo angguru to ilengilio tulusi diila molamelo tilapulo angguru monto ilengi boito! Diaaluo diiti tamolaala himba, lapatao diila mongilu susu monto himbalio boito! **8** Tiloóowoli mai lowatia uito diila bo patopatoá tou biasa todelomo u helaasalo ngohui-ngohui, bo sababu Kitabi loóowoli mai suáli boito olo. **9** Todelomo Buku lei Musa tulatulade, "Sapi udonggo hemo lumbe-lumbetaáa pale u mohinggi bili lopale monto panggeangio, diila maó tongguúma tunggilio." Wolo sapi u poótuoto lo Allahu Taaala? **10** Meaalo uito pilo dulungio mai olanto? Memangi uito leituladei ode olanto. Sababu tamokalaja halabolu wau tamopo belesi palelio mapatutilio mokalaja wolo halapani u mololimo ngobutaó monto tilapulo kalajaalio. **11** Amiaatia malo muáyade bili lorohani todelomo tutumuli mongoli. Yi wonu amiaatia molipu babaa-lakatiyalo upango monto olimongoli, wolo uito boliilio amiaatia mohile wolo moóohuu lebe dadaata monto olimongoli? **12** Wonu tau-tauwalo wewo ohaku mohalapu maó utie monto olimongoli, wolo amiaatia diila lebe ohaku poli woli mongolio? Bo watia diipo lopohuna maó haku boito. Boliio maó watia lebe motohilaa momanta totoonulalo u hitua-tuawua lou mopotoodei suáli tuwau u mongabuto polo loladu Habari Mopiohe pasali li Almasi. **13** Tantu otaawa lo Wutato deu taa u mokalaja todelomo Bele lo Allahu Taaala mololimo uáalo limongolio monto bele lo Allahu Taaala. Wau tau-tauwalo tahi pongulusia tambati podewowalo bake, moótapu ngobutaio lo bake upilo dewolio teto. **14** Odito olo Eeya mamolantu mai deu tamo pohabari Habari Mopiohe boito musi moótapu lijikilio monto polo habari boito. **15** Bo diipo peéenta watia lomake penu boli tuwau maó monto hahaa-kuwaalo boito. Wau watia loluladei tulade botie diila olo wolo makusudu alihu susuu-aliyaalo boito

pohutuwola botia to olaatia. Lebe mopiohe watia mate lou oolia losuali u hepomangga lowatia boito. **16** Sababu, wonu uito bo suali mopohabari Habari Mopiohe monto Allahu Taála, yi watia diila ohaku mopo mangga-mangga lohilao, sababu Allahu Taála malo malentai olaatia u lohutu uito. Matopotala watia, wonu watia diila mopohabari Habari Mopiohe boito! **17** Wonu humayaalio watia moponao lokalaja boito moduduá tou otohilaa lowatia lohihilao, yi watia mowali mohalapu u mootapu wuupa. Bo watia mopohabari Habari Mopiohe boito tumbaó sababu pilowajibu. Watia pilalentai lo Allahu Taála u mohutu uito. **18** Wonu odito, wolo wuupa lowatia? Utie wuupalio: deu watia mowali mopololadu Habari Mopiohe boito lou diila mopobuheto penu boli ngotaa maó u mongonggosi olaatia, sababu watia diila mohile wolo moóhuu haku lowatia odelo tamopo habaria Habari Mopiohe boito. **19** Watia botie diila wato penu boli lita; watia lolopato. Eleponu odito, watia malo powali batanga lowatia botie wato ode taa ngoáamila. Pilohutu lowatia uito alihu watia moóhaama lebe dadaata maó tau odeli Almasi. **20** To taulo Yahudi, watia lotihutu debo odelo taulo Yahudi alihu watia mowali moóhaama taulo Yahudi odeli Almasi. To tau-tauwalo tahitumula hipo duduáawa butoée Musa, watia lotihutu debo odelo watia leitihuto tobutoó boito, eleponu watia otutuulio maó diila leitihuto woleeto. Pilohutu lowatia uito alihu watia mowali momantango olimongolio mowali muri li Almasi. **21** To taa diila Yahudi, watia lotihutu debo odelo ngotaalio tadiila Yahudi, tatumu-tumulo to bulemengo butoée Musa. Pilohutu lowatia uito alihu watia mowali momantango olimongolio mowali muri li Almasi. Bo uito diila oboliilio deu watia diila modungohe totoonulalo palenta lo Allahu Taála; watia tumbaó kiluwasa mai lo totoonulalo palenta li Almasi. **22** Tohuungo lotau-tauwala tadiila boti yakini, watia olo lotihutu debo odelo ngotaalio tadiila boti yakini alihu watia mowali momantango olimongolio mowali muri li Almasi. Limbuio maó, watia mowali totoonulalo u hitua-tuawua ode ngoáamila tau alihu wolo dalalo u penu boli woloolo mola olo watia mowali mopoáahu ngotayadi mongolio. **23** Ngoáamila boito pilohutu lowatia duólo Habari Mopiohe monto Allahu Taála boito, alihu watia olo pee-peeenta balakatia-Lio. **24** Tantu otaawa lo Wutato deu todelomo u

mobaalia ngoáamila tahiduduá moduduá tumeteá olo, bo wambaó ngota tamololimo palaseni. Masababu uito teteóolo odito lupalio tilinggula Wutato mololimo palasenilio. **25** Timiidu tau tadonggo todelomo teleeneni musi mongotongo batanga todelomo toonulaalo suáli. Tio mohutu uito sababu tio motohilaa pobuóhelo bunga ujuuwala, deuito-yito bunga u mahuáa mololante. Bo ito botie mongotongo batanga todelomo totoonulalo suáli sababu ito motohilaa pobuóhelo lobunga udiila tamololante. **26** Uito sababuulio watia tumeteá wolo dulunga u tantutantu. Debo odelo todelomo baalia lou mobuntunga, watia diila momate wolo majanunu. **27** Poluli maó laatia wawaó laatia latiolio wolo moóohuí tunggula watia moó kawasa maó. Watia mohutu odito, sababu watia diila mohuto tunggula motoduo mai deú lapataó watia moheinga taawewo moduduá todelomo baalia boito, watia lohihilao diila tolimoolio.

**10:1** Mongo wutato! Wutato patutilio moéela mola wolo u mailowali toli nenemoyanto tou timongolio loduduá olei Musa. Timongolio ngoáamila yililunga loheengo, wau wolo loáahu llobalango Deheta Meela. **2** U mowali muri lei Musa, timongolio ngoáamilalo yilihualio todelomo heengo wau todelomo deheta boito. **3** Timongolio ngoáamilalo helo lamela uáalo rohu u tutuuwauwa, **4** wau longilu minumani rohu u tutuuwauwa. Timongolio ngoáamilalo longilu lonto huidee botu lorohani upeé-peéenta woli mongolio; huidee botu boito yito ti Almasi lohihilao. **5** Eleponu odito, Allahu Taáala diila sanangi ode ododaata limongolio, wau uitolo sababuulio mimii-lateyaalo limongolio bolo hipule-pulepeyalo maó tohuta luasi u delita. **6** Ngoáamilalo boito mowali obaaya olanto, u mopoéela olanto alihu diila motohilaa susuu-aliyaalo u moleeto debo odelo timongolio. **7** Odito olo alihu ito diila maó molubo balaahala debo odelo u hepilohutu lou ngotayadi mongolio. Todelomo Kitabi tulatulade, "Yi bangusa boito lolumulo lolamela longilu wau longelungo u lolubo balaahala." **8** Ito diila mowali mohutu susuu-aliyaalo u huloto debo odelo u hepilohutu lou ngotayadi mongolio. Sababu, dulo pulaa tololihi lota lonto olimongolio yilate tou ngohui sababu helohutu uito. **9** Ito diila mowali mohimontala to Eeya debo odelo u hepilohutu lou ngotayadi



mongolio muloololio mai, tilinggula timongolio yilate tilopango tulidee obisa. **10** Ito olo diila mowali motihungoto; debo odelo u hepilohutu lou ngotayadi mongolio muloololio mai, tilinggula timongolio pilate yila-yilateelo maó lo Malaikati Opopate. **11** Ngoáamila suáli boito lotoduo to limongolio u mowali obaaya ode tau-tauwalo wewo. Wau ngoáamilalo boito tulatulade olo u mowali poéela olanto. Sababu ito botia tumutumula topulito lojamani. **12** Taa u molantobe batangalio tihutihula motoheeto, mamusi mopoódaha-dahaalo maó; tio diila bolo modehu. **13** Timiidu yimontala uilolaasa lo Wutato yito yimontala ubiasa heólaasawa lomanusia. Bo Allahu Taáala tatapu wau molotolo hilao todanti-Lio. Tio diila tamopoluli to Wutato yimontalalio lebe lou omambowamu. Tou Wutato odungga loimontala, Tio mamongohi mai dalalo olemu alihu Wutato mowali molotolo wau moó tahangi. **14** Masababu uito, Mongo wutato taa otoliángo lowatia, mamusi timongoli molonuó molubo balaahala. **15** Watia mobisala mai olimongoli debo odelo ode tau-tauwalo tamolinepo. Mamusi timongoli moluuúde mola lohihilao loiya lowatia botie. **16** Tou ito mongilu angguru lou molapali mola sukuru ode Allahu Taáala, wolo uito diila mopotuhata mai deú ito motituwau woli Almasi to opopate-Lio? Wau tou ito molaya-layade roti u tamelola peé-peéenta, wolo uito diila mopotuhata mai deú ito motituwau todelomo batanga li Almasi? **17** Masababu bo woluo roti ngobotu, wau ito ngoáamila molamela monto roti u ngobotu boito olo, yi ito taa dadaata botie debo odelo ngobatanga. **18** Nte poótuota maó tau-tauwalo Yahudi. Timongolio tahe lolamelo uáalo u pilodewo toitaato tambati podewowala lobake, deúito-yito tahe lotituwau wolo tambati boito. **19** Wolo makusudu lowatia woleeto? Balaahala meaalo uáalo u pilodewo ode balaahala boito diila oboliilio sama-samaata. **20** Wolo u podewolo totambati lobake ode balaahala diila podewolo ode Allahu Taáala, bo ode roroo-huwaalo u moleeto. Wau watia diila mohuto timongoli motituwau wolo rohu u moleeto. **21** Timongoli diila mowali mongilu monto hakati angguru lo Eeya, wau peéntalo maó monto hakati angguru lorohu u moleeta olo. Timongoli diila mowali molamela tomeja lo Eeya, wau tomeja lorohu umoleeta olo. **22** Meaalo ito ohilaa mohutu to Eeya mohiihia? Wolo ito

lebe molotolo wolo Eeya? **23** Loiya lotau, "Ito mowali mohutu boli wolo u otohilaanto." Otutu! Bo diila ngoáamila u otohilaanto boito ohuna. "Ito mowali mohutu boli wolo u otohilaanto" -- bo diila ngoáamila u otohilaanto boito momongu tutumulonto. **24** Boli ngotaa diila maó pohipate u polohuna daá lo batangalio lohihilao wambaó. Timiidu tau musi mohipate u polohuna daá lo taawewo. **25** Timongoli mowali molamela penu boli wolo u hepo taliilio topaatali lotapu. Diilalo maó tuletea meimulo, eleponu woluo tadiila akolo todelomo hilao u maloótapu tinelo Eeya de olemu. **26** Sababu todelomo Kitabi tulatulade, "Dunia botie wolo tuangio ngoáamila yito miliki lo Eeya." **27** Wonu timongoli toduwoolio molamela lo ngotaalio tadiila Nasara, wau tilolimo limongoli totoduo boito, tamela maó wolo upilo hintalio olimongoli. Diilalo maó tuletea monto utoonu asaliilio mai lou aalo boito, alihu diaaluo tadiila akolo todelomo hilaa u maloótapu tinelo Eeya de olemu. **28** Bo wonu woluo tamoloiya olimongoli, "Uáalo botie mapilodewo ode balahala," diila maó tamela uáalo boito, sababu mopoó tuotaó polohuna daá lotau boito, wau sababu suala lohilaa u maloótapu tinelo Eeya. **29** Makusudu lowatia diila suala lohilaa u maloótapu tinelo Eeya limongoli, bo suala lohilaa u maloótapu tinelo Eeya lotau boito. Tanu woluo tamohintu, "Wei yilongola obebasi lowatia musi enggadelo losuala hilaa u maloótapu tinelo Eeya lotaa wewo?" **30** Wonu watia molamela uáalo wolo mosukuru mola ode Allahu Taáala, yilongola tau musi mohenteá olaatia tou aalo boito, hiambola watia malo sukulu mola to Allahu Taáala woleeto?" **31** Penu boli wolo upohutuo lo Wutato -- Wutato molamela meaalo mongilu -- pohutua maó ngoáamilalo boito u mopolaió Allahu Taáala. **32** Potitumulolo odito rupalio tilinggula Wutato diila moósababu taawewo mohutu dusa; wolo timongolio taulo Yahudi meaalo tadiila Yahudi, meaalo jamaá lo Allahu Taáala. **33** Potitumulolo debo odelo watia. Watia helo tolopani mopo sanangi hilaa lotaa ngoáamila todelomo totoonulalo u hitua-tuawua, lou diila omakusudu u polohuna daá batanga lohihilao. Patuju lowatia yito bo alihu timongolio ngoáamilalo mowali poáahuwolo.

**11:1** Dudui maó obaaya lowatia, debo odelo watia olo heloduduá obaaya

li Almasi. **2** Watia momuji olimongoli sababu timongoli laito hemoëela olaatia wau helodudua pongaajali uilohi laatia olimongoli. **3** Bo watia motohilaa timongoli motota maó suáli tuwau poli, deüito-yito deü tamowali tauwa totimiidu mongo lolai yito ti Almasi; Tamowali tauwa todile taabua yito dile talolai, wau Tamowali tauwa toli Almasi yito Allahu Taáala. **4** Wonu talolai ngota tou modua mealo tou mopo tunggulo habari monto Allahu Taáala totalu lotaa dadaata, momake taubu lunggongo, yi tau boito mohina li Almasi. **5** Wau wonu taabua ngota tou modua mealo tou mopo tunggulo habari monto Allahu Taáala totalu lotaa dadaata, diila momake taubu lunggongo, yi taabua boito mohina dilelio talowali tauwa to batangalio. Uito tutuwauwa wambaó debo odelo lunggongo taabua boito maa iluluhelio. **6** Sababu wonu taabua ngota diila mohuto momake taubu lunggongo lebe mopiohe huwoio huntingalo. Bo wonu taabua ngota uluhelo lunggongio mealo huntingalo huwoio, yi uito tuwaulio polohina de olio. Masababu uito lebe mopiohe tio momake taubu lunggongo. **7** Talolai diila palalu momake taubu lunggongo, sababu tio mopobayahu watade hihilao wau odudaá lo Allahu Taáala. Bo taabua mopobayahu odudaá lo talolai, **8** sababu talolai diila pilowali mai monto taabua, taabualo tapilowali mai monto talolai. **9** Talolai olo diila pilowali mai u polohuna daá lotaabua, bo taabua pilowali mai u polohuna daá lotalolai. **10** Sababu uito, u mopo sanangi to mamaa-laikatiyalo, yi taabua ngota musi momake taubu lunggongo odelo tuoto deü tio to walungo okokawasa lodilelio. **11** Eleponu odito todelomo tutumulonto odelo taulo Nasara, taabua diila tihutihula tutuwau, molopato monto talolai, wau talolai olo diila tihutihula tutuwau molopato monto taabua. **12** Sababu eleponu taabua bohulo pilowali mai monto talolai, bo lapataó uito talolai pilotutulio mai lotaabua; wau totoonulalo u hitua-tuawua asaliilio mai monto Allahu Taáala. **13** Nte toneaa mola lo Mongo wutato lohihilao suáli botie: Wolo mopiohu taabua ngota modua ode Allahu Taáala totalu lotaa dadaata, lou diila momake taubu lunggongo? **14** Monto u ilolaasawa lotaa dadaata, timongoli maa ilajalilio deü wonu talolai ohuwoó tale-talenga, uito tuwaulio udiila paatuti. **15** Bo ode taabua, huwoó yilohi olio u molaúbe lunggongio wau huwoó u hayahaya yito moóbangga olio. **16** Naa, wonu

woluo taohilaa mobuutola pasali losuali botie, tuwa-tuwaulo umowali loiya mai lowatia yito deu mopio ito meaalo jajaa-maalo lo Allahu Taála wewolio, odaalio bo woluo tuwaulio obobiasa boito todelomo jamaa; wewolio maó leeto diaaluo. **17** Tomimbihu u wumbutio mola botie, watia diila momuji olimongoli. Dudungaya lo potabia limongoli diila pootapulalo u mopiohu, bo udiila mopiohu. **18** Bohu-bohulio watia loodungohu, deu todelomo totoonulalo dudungaya limongoli woluo popoo-lemboawalo tau tinggai bubuu-lemenga. Wau tolantobu laatia ngoidilio habari boito otutu. **19** Memangi mapatutilio tumodei suali mobubuuála towolota limongoli, alihu de oontonga tatoonu-toonu taulo Nasara pulua. **20** Bo tou timongoli helo tiambu, upilohutu limongoli boito diila Totamelo Eeya. **21** Sababu tou hipolamela, timongoli ngota-ngota wawaahua mohama uaalolio lohihilao, dilumutu woluo tadiila lootapu wolo-wolo, hiambola tawewolio bolo hehuwoáalo. **22** Yilongola odito? Wolo Wutato maóbele? Wutato mowali molamela wau mongilu teto! Meaalo Wutato ohilaa mohina jamaa lo Allahu Taála wau mopoólito tahi mosikinia? Wolo umusi loiya mai laatia olimongoli? Wolo mapatutilio watia momuji olimongoli? Diila! Sama-samaata watia diila tamomuji olimongoli. **23** Sababu u pilo ngaajali mai lowatia olimongoli, uito tilolimo lowatia lonto Eeya lohihilao: deu tou hui boito tou ti Isa, Eeyanto hiliyanatilio, Tio lohama maó roti, **24** wau lapataó Tio lolapali mola sukuru ode Allahu Taála to roti boito, Tio lomita-mitangaó roti boito wolo uluu-Lio, tulusi lotahuda, "Utieelo batanga-U u yiludu ode limongoli. Pohutua maó utie u mopoéela ola-U." **25** Odito olo lapataó lolamela, Tio lohama maó hakati lo angguru tulusi lotahuda, "Angguru botie yito daantia bohu lo Allahu Taála, u silaaha wolo duhu-U. Timiidu timongoli mongilu utie, pohutua maó utie u mopoéela ola-U." **26** Memangi timiidu timongoli molamela roti wau mongilu angguru botie, timongoli mopohabari opopate lo Eeya, dilumutu Tio meidungga mai. **27** Masababu uito, tamo lamela roti lo Eeya meaalo mongilu angguru lo Eeya wolo dudelo udiila paatuti, tau boito odusa to Eeya tamalo pobake batanga wau duhu-Lio. **28** Oditolio, timiidu tau musi motuletepo batangalio meimulo, bolo tio mowali molamela roti wau mongilu angguru boito. **29** Sababu wonu taa molamela

roti wau mongilu angguru diila momandungi deu totamelo boito motuhatawa wolo batanga lo Eeya, yi tau boito molamelo wau mongilu u mololimo hukuumani lo Allahu Taála to batangalio lohihilao. **30** Uitolo sababuulio dadaata monto olimongoli tamo ngongoto wau molulupuhu, wau woluo olo tailate. **31** Bo wonu ito motuletepo batanganto meimulo, ito diila tahukuumanio lo Allahu Taála. **32** Bo wonu ito hukuumanio lo Allahu Taála, Tio mamu muboaa olanto, alihu ito diila maó otuhata lo hukuumani peé-peéenta wolo dunia botie. **33** Masababu uito, Mongo wutatuú, wonu timongoli motiambu u molamela totamelo Eeya, timongoli musi mohihiimawa. **34** Wonu woluo tapola-polango, tio musi molamelopo tobele. Wonu timongoli momandungi suáli botie, totoonulalo dudungaya lo potabia limongoli diila tamopo dungga mai hukuumani monto Allahu Taála tobatanga limongoli lohihilao. Tomimbihu susuu-aliyaalo uwewo, matombanga lowatia ode limongoli, de wonu watia muli monaó mai.

**12:1** Botia tomimbihu popoo-nuwaalo uilohi mai lo Rohullah. Tomimbihu uito, otohila lowatia otaawa maó lo Mongo wutato u otutuulio maó. **2** Eelai mola deu tou timongoli diipo motota lo Allahu Taála, timongoli iloáanga u moduduá to balaahala u madodo. **3** Musi otaawa maó limongoli deu tatilauwa lo Rohullah diila mowali molojiya, "Malaá-laánatilo ti Isa!" Odito olo penu boli ngotaa maó diila mowali molojiya, "Ti Isaalo Eeya!" wonu tau boito diila tilauwa lo Rohullah. **4** Woluo hidala-dalaala ponu monto Rohullah, bo ngoáamilalo yilohi mai lo Rohu u tuwau. **5** Woluo hidala-dalaala kalaja u momaya to Eeya, bo Eeya tabayaalo boito, Eeya tatuwau olo! **6** Woluo hidala-dalaala dudelo u mokalaja kalaja lo Eeya, bo tamongohi mai lotolo boito ode timiidu tau yito Allahu Taála tatuwau olo. **7** Ode opopiohunto ngaáaamila, Rohullah mokalaja mai totimiidu tau wolo dudelo lotaa ngota-ngota. **8** To tangotaalio, Rohu boito mopomambo mai olanto u mobisala wolo tilihula. Ode tawewo Rohu u tutuwauwa boito mopomambo mai olanto u mopoópatato pasali lo Allahu Taála. **9** Rohu u tuwau boito olo mongohi ode taa u ngota, mopomambo olio u palacaya upolu-polutuó toli Almasi; hiambola ode tawewo Rohu boito mongohi kawasa u mopoóluli tau. **10** To ngotaalio yilohia kawasa u mohutu

moólinggolabe wau ode tawewo yilohi ponu u mopoótaa totoonulalo lanjana lo Allahu Taáala. Ode tawewo poli Rohu boito yilohi mopomambo olio u mopo hiihede toonu ponulo Rohullah wau toonu udiila. Woluo tailohia u mambo mobisala wolo bahasa hidala-dalaala u moólinggolabe, wau woluo olo tailohia u mambo motombango boliilo babaa-hasaawalo boito. **11** Ngoáamilalo boito kilalaja lo Rohu u tuwau boito olo; ngota-ngota, tau yilohia ponu uwiwi-wiwi moduduá otohilaa lo Rohu boito lohihilao. **12** Ti Almasi yito debo odelo batanga lomanusia; batanga boito tuwau, bo tilitangoa lou pongawaá dadaata. Ngoáamila pongawaá boito, penu boli dadaata, bo ngobatanga wambaio. **13** Odito olo ito ngoáamila, mopio taulo Yahudi meaalo taa diila Yahudi. Mongo wato meaalo taa molopato; ito ngoáamila mailihua lo Rohu u tutuwauwa boito, alihu ito powaliyolo tuwau tobatanga li Almasi boito. Ito ngoáamila olo moólaasa Rohu u tuwau boito lealeaatulo maó. **14** Sababu batanga boito lohihilao diila bo o pongawaá tuwau wambaio bo dadaata pongawaálio. **15** Wonu oáato molojiya, "Wau diila uluu, sababu uito wau diila waito lobatanga," uito diila oboliilio deu oáato boito diila waito lobatanga. **16** Wau wonu bulonga molojiya, "Sababu wau diila mato, yi wau diila waito lobatanga," uito olo diila oboliilio deu bulonga boito diila waito lobatanga. **17** Humayaalio ngangaawaálo boito mowali mato wambaio, woloolo mola batanga boito mowali modungohu? Meaalo wonu ngangaawaálo boito mowali bulonga wambaio, woloolo mola batanga boito moóobo? **18** Oontonganto deu Allahu Taáala talopo tambati popoo-ngawaáalo boito tobatanga. Tinggai pilo tambati to tambatilio lo Allahu Taáala loduduá kahandaki-Lio. **19** Wonu ngoáamilalo bo ngopo ngaawaá wambaio, toonu u iluntelio batanga? **20** Oditolio memangi woluo dadaata pongawaá, bo batanga tuwau wambaio. **21** Masababu uito, mato diila mowali molojiya ode uluu, "Wau diila momalalu olemu!" Meaalo lunggongo molojiya ode oáato, "Wau diila momalalu olemu!" **22** Boliio maó popoo-ngawaáalo batanga u helantobulo molulupuhu boito, palaluwonto daá; **23** wau popoo-ngawaáalo u helantobunto diila botie ohalaga, tumbaó uito yito popoo-ngawaáalo u hehalaganto lebe dadaata maó. Popoo-ngawaáalo batanga udiila oontonga gaga, tumbaó lebe poótuotonto. **24** Popoo-ngawaáalo



batanga umaa iloontonga mopiohu, diila palalu poótuotonto. Allahu Taáala malo huludu mai batangaanto odito rupalio tilinggula popoo-ngawaáalo udiila boti ohalaga yilohia halaga lebe dadaata maó. **25** Loui odito batanga boito diila hitaya-tayade; timiidu pongawaá tinggai mopoótuoto tuwau wau uwewolio. **26** Wonu pongawaá tuwau modutolo, ngoáamila pongawaá uwewolio modutola olo; wonu pongawaá tuwau pujiolio, ngoáamila pongawaá uwewolio moduduá motiwengahe. **27** Wutato ngoáamilalo peé-peéenta yito batanga li Almasi wau timongoli olo ngota-ngota yito pongawaá monto batanga boito. **28** Odito olo todelomo jamaá, Allahu Taáala malolantu mai tambati lotau tahidala-dalaala: Bohu-bohulio mongo rasulu; oluolio, mongo nabi, otolulio guguu-ruwaalo, lapataó timongolio tamohutu totoonulalo u moólinggolabu, lapataó timongolio tailohia ponu u mopoóluli tau, meaalo u motulungi taawewo, meaalo u motitauwa, meaalo u mobisala wolo bahasa hidala-dalaala u moólinggolabe. **29** Timongolio diila ngoáamilalo rasulu, meaalo nabi, meaalo guru. Diila ngoáamilalo okawasa u mohutu u moólinggolabe, **30** meaalo u mopoóluli tau, meaalo u mobisala wolo bahasa hidala-dalaala u moólinggolabe, meaalo motohuwale babaa-hasawaalo boito. **31** Sababu uito, mamusi timongoli motolopani otu-otutuulo maó u moótoduo mai popoo-nuwaalo ulebe polohuna daá. Bo wumbutio mola botie watia mopo tuhata mai ode limongoli dalalo ulaba-labaalo mopiohu.

**13:1** Eleponu watia mowali mobisala wolo bahasa lomanusia u hidala-dalaala, tumbaó wolo bahasa lo malaikati wambaio, bo watia diila motoliángo taawewo, yi loiya lowatia boito bo tingohe u moóohuí diila oboliilio. **2** Eleponu watia motota mopo tunggulo habari monto Allahu Taáala, wau mongalati ngoáamila suáli u modelo-delomolo maó, wau motota totoonulalo u hitua-tuawua wau palacaya daá to Allahu Taáala tilinggula mowali mohutu huide molimbata, bo watia diila motoliángo tau-tauwalo wewo, yi watia diila oboliilio wolo-wolo! **3** Eleponu ngoáamila u mililiki lowatia, posadakalo ode tamosikini, wau watia mohudu maó batanga u pobuolio, bo watia diila motoliángo tau-tauwalo wewo, yi ngoáamilalo boito diila ohunalio sama-samaata. **4** Taa u

motoliángo tau-tauwalo wewo, sabali wau mopiohe hale. Tio diila lepalepata lou mohiihia, diila molojiya ulatabu, diila sombongi. **5** Tio diila batingga, diila bangganga, tio diila momakusa taawewo moduduá u otohilaalio lohihilao, diila olo huáa mopalato hilao, wau diila moniyati. **6** Taa u motoliángo tau-tauwalo wewo, diila sanangi lou moleeto, tio bo sanangi lou mopiohu. **7** Tio tatapu owowoluwoalio motaalua wolo totoonulalo u hitua-tuawua wau motohilaa palacaya tou wolo ulebe mopiohe daá uwoluo totimiidu tau; todelomo owowoluwoa u penu boli woloolo mola olo taa u motoliángo boito diila peéenta maó oolia lo halapanilio wau sabali mohima totoonulalo u hitua-tuawua. **8** Diila peéenta maó mawoluo saaáti toutoonuu tau diila palalu mototoo-liángo. Masaatia botie woluo taa u motota mopo tunggulo habari monto Allahu Taáala, bo tio de mamó huheli mopo tunggulo habari boito. Masaatia woluo tamotota mobisala todelomo bahasa hidala-dalaala u moólinggolabe, bo de tio mamó huheli mobisala todelomo babaa-hasawaalo boito. Masaatia woluo taa u motota lou dadaata suáli, bo de wolo u otaawa limongolio boito malipatolio. **9** Sababu, pongototanto wau omambowanto u mopo tunggulo habari monto Allahu Taáala, debo diipo boti molimomoto ngoáamilalo. **10** De mamei dungga wakutuulio Allahu Taáala mohutu mai ngoáamilalo molimomoto ngoáamilalo, wau udiila molimomoto boito mamooli. **11** Tou watia donggo taúkikiiái, watia mobisala debo odelo taúkikiió, watia opongolaasa debo odelo taúkikiió wau watia opikiilangi debo odelo taúkikiió. Bo botia watia mailudaá, piili lowatia udonggo kikiiái matilapi lowatia. **12** Wolo u oontonganto masaatia botie yito debo odelo wolilu u modiólomo toinggilua. Bo ito de mahuáa moóonto lou mopatato. Botia diipo otaawa lowatia totoonulalo u hitua-tuawua, bo de maótaawa maó lowatia totoonulalo u hitua-tuawua tutuuwauwa debo odelo Allahu Taáala motota totoonulalo u hitua-tuawua tomimbihu batanga lowatia. **13** Oditolio, tosaaáti botie woluo tolo suáli u debo musi pohutuwonto; palacaya, mohalapu wau mototoo-liángo. Ulebe polohuna daá lou toto-totolulo boito yito motoliángo tau-tauwalo wewo.

**14:1** Mamusi timongoli motolopani u motoliángo tau-tauwalo wewo. Wau

potolo panilo olo u mololimo popoo-nuwaalo uilohi mai lo Rohullah, lebe-lebe maó tutu omambo u mopo tunggulo lalaa-njanawalo Allahu Taáala tomanusia. **2** Taa u mobisala todelomo bahasa u moólinggolabe, tau boito diila mobisala tomanusia; tio mobisala to Allahu Taáala. Diaaluo taa mongalati wolo u yiloiyaalio, sababu Rohullah tamooó sababu olio molojiya susuu-aliyaalo u bo otaawa lo Allahu Taáala. **3** Boliio maó taa umopo tunggulo habari monto Allahu Taáala, mopo tunggulaó ode manusia; u mopoó lotolo olimongolio, u mongohi sumangati olimongolio wau u moliyango olimongolio. **4** Taa u mobisala todelomo bahasa u moólinggolabe bo mopoó lotolo batangalio lohihilao wambaó, hiambola taa umopo tunggulo habari monto Allahu Taáala momantu jamaá mowali molaió. **5** Donggo boli piohio wonu Wutato ngoáamila mowali mobisala wolo bahasa hidala-dalaala u moólinggolabe. Bo ulebe mopiohe daá yito wonu Wutato mowali mopohabari lalaa-njanawalo Allahu Taáala. Sababu taa umopo tunggulo habari monto Allahu Taáala, lebe udaá maó wolo taa u mobisala todelomo bahasa hidala-dalaala u moólinggolabe; wewo suáliilio wonu taa mobisala todelomo bahasa hidala-dalaala u moólinggolabe boito moó tombangaó wolo u yiloiyaalio boito, alihu ngoáamila jamaá moótapu hunalio. **6** Wonu watia humayaalio monaó mai ode limongoli wau watia mobisala todelomo bahasa hidala-dalaala u moólinggolabe, wolo hunalio uito ode limongoli? Diaalo hunalio penu boli ngoidi maó! Wewo suáliilio, wonu watia mopoilaalo mai tuwaulio lo poloiya monto Allahu Taáala, meaalo watia motombanga hitua-tuawua pasali lo Allahu Taáala, meaalo watia mopo tunggulo habari monto Allahu Taáala, meaalo watia mongaajali. **7** Pakaa-kasiyaalo musiki udiila onyawa penu boli ngoidi maó, debo odelo humayaalio tulali wau kocapi, wonu nada-nadalio diila poitohulo loui mopatato, woloolo mola otaawa lotau lahu wolo u piloitohio? **8** Tuwaulio lo obaaya uwewo poli; wonu torompeti potingohulo wolo majanunu, tatoonu tamamo tidapato u mopaatea? **9** Odito olo loui omambowa limongoli u mobisala wolo bahasa hidala-dalaala u moólinggolabe. Wonu wutato loui omambowa boito molapali tataa-heyaalo udiila mopatato, diaaluo penu boli ngotaa maó tamowali mongalati wolo uiloiya lo Wutato. Totoonulalo loiyamu boito mamooli

diila ota-otaa maó. **10** Todunia botie woluo odito daatalio lobahasa, bo diaaluo maó penu boli tuwau monto babaa-hasawaalo boito udiila oboliilio. **11** Bo wonu watia diila mongalati bahasa uiloiya lotaa hingotangotaawa, yi taa u lomake bahasa boito debo odelo tau deli to olaatia; odito olo watia to olio. **12** Tomimbihu olimongoli lohihilao, otaawa lowatia timongoli motohilaa daá moótoduo mai popoo-nuwaalo monto Rohullah. Bo lebe polohuna daá, mamusi timongoli motolopani u momake omambowa boito momantu jamaá mowali molaió. **13** Uito sababuulio taa umobisala todelomo bahasa u moólinggolabe, mamusi momolohone monto Allahu Taáala alihu Tio pomambo-Lio mai olo u motombangaó wolo u yiloiyaalio boito. **14** Sababu wonu watia modua wolo bahasa u moólinggolabe, roroo-huwaalo memangi modua, bo pikiilangi lowatia diila mokalaja. **15** Oditolio, wolo umusi pohutuo lowatia? Utie u mapohutuo lowatia: Watia mamodua wolo rohu lowatia, bo watia mamodua olo wolo pikiilangi lowatia. Watia mamopolahu mola wolo rohu lowatia, bo watia olo ohilaa mopolahu mola wolo pikiilangi lowatia. **16** Sababu wonu Wutato molapali mola oduólo ode Allahu Taáala wolo rohumu wambaó, wau woluo taawewo tadiila mongalati lo bahasa moólinggolabe u monto Rohullah boito, yi tau boito diila mowali molojiya, "Watia akolo" todua lo sukurumu boito; sababu diila otaawalio wolo uiloiya lo Wutato. **17** Eleponu dua sukuru lo Wutato ode Eeya boito mopiohe daá, bo dua boito diila ohunalio sama-samaata ode taawewo. **18** Watia mosukuru mola ode Allahu Taáala sababu watia lohihilao mowali mobisala todelomo bahasa hidala-dalaala u moólinggolabe mongilaboto lo Wutato ngoáamila. **19** Bo, todelomo totoonulalo dudunggayu u molubo to Eeya, watia lebe motohilaa momake limo lotahe umowali pahamua lotau loui momake hilihu-lihua tahe todelomo bahasa u moólinggolabe. Watia lebe motohilaa odito alihu watia mowali mongaajali tau. **20** Mongo wutato! Diila maó pomikiilangi odelo taukekei. Todelomo suáli u moleeto, mamusi timongoli tatapu debo odelo taukikiio. Bo todelomo pikiilangi, mamusi timongoli debo odelo taa u maleidaa. **21** Todelomo Kitabi tulatulade odie, "Eeya lotahuda, 'Loui motimbuludei totau-tauwala tahipo bisalawa wolo bahasa wewo wolo uwewolio, Wau mamotahuda mai to umati botie. Tumbaó wolo

motimbulude totau-tauwalo tahi deelia, Wau mamotahuda mai to umati-U; boli odito, timongolio diila mohuto modungohe tahuda-U.' " **22** Oditolio ponu u mobisala wolo bahasa hidala-dalaala u moolinggolabe yito odelo tuoto ode taa u diila palacaya, diila ode taa u palacaya. Wau ponu u mopoótaa lanjana lo Allahu Taáala tomanusia yito tuoto ode taa palacaya, diila ode taa diila palacaya. **23** Sababu uito, wonu humayaalio todelomo dudunggaya lojamaá, ngoáamila jamaá mobisala todelomo bahasa hidala-dalaala u moolinggolabe, lapataó monaó mai dengolo lota tauulo bulemengio, meaalo tau-tauwalo tadiila Nasara, tantu tau-tauwalo boito mamó lantobu olimongoli mabiliyongo ngoáamilalo! **24** Bo wonu Wutato ngoáamilalo mopo tunggulo habari monto Allahu Taáala, lapataó monaó mai ngotaalio tadiila Nasara meaalo ngotaalio lo bulemengio, yi susuu-aliyaalo u pohabario lo Wutato ngoáamilalo mamó potuhata duduu-sawaalo tau boito wau mohutu olio mamongalati to duduu-saalio. **25** Susuu-aliyaalo u tuutuó todelomo hilaalio mapo ilaalolo, tilinggula tio mamó tidupapa batanga lapataó molubo Allahu Taáala. Tio mamongaku deu Allahu Taáala otu-otutuulo maó woluo tohuungi mongoli. **26** Oditolio, Mongo wutato, wolo boliilio u ngoáamilalo boito? Wonu timongoli moámbuwa u molubo Eeya, woluo tamo polahu, woluo tamo ngaajali, woluo tamo poótaa hitua-tuawua monto Allahu Taáala, woluo tamo bisala todelomo bahasa u moolinggolabe, wau woluo tamo tombango wolo u yiloiyaalio boito. Bo ngoáamilalo boito mamusi pohutuwola u mongaajali wau u opopiohu ngoáamilalo. **27** Wonu woluo taóhilaa mobisala todelomo bahasa u moolinggolabe, mamusi duulota meaalo odaatalio toulota wambaó u bubuulota mobisala. Wau musi woluo tamopoó patataó wolo uiloiya lotaa hemo bisala boito. **28** Wonu diaaluo tamowali mopoó patataó, yi tau-tauwalo tahipo bisalawa todelomo bahasa u moolinggolabe boito musi motipoóyo todelomo dudunggaya boito. Huliilo maó timongolio mobisala bo todelomo hilaa wambaó ode Allahu Taáala. **29** Duulota meaalo toulota taóhabari monto Allahu Taáala mamusi mopo tunggulo habari boito tou taawewo donggo hemo mikiilangi mola mopio-mopiohulo maó u molanto wolo uiloiya boito. **30** Bo wonu humayaalio habari monto Allahu Taáala meidungga to ngotaalio wewo tahulo-huloáa

to dudungaya boito, yi taa donggo hemobisala, musi mohuheli. **31** Wolo dudelo u odito, Mongo wutato ngoáamilalo, ngota-ngota, mowali mopo tunggulo habari monto Allahu Taáala; alihu ngoáamilalo mowali mololimo pongaajali wau mowali helebe palacaya maó. **32** Ponu monto Rohu u mopo tunggulo habari monto Allahu Taáala mowali podulungo lotaa mopo tunggulo habari boito. **33** Allahu Taáala yito Allahu Taáala tamo tohilaa lou talatibu; Tio diila Allahu Taáala tamo tohilaa u mopuyoóto. Debo odelo upohu-pohutu todelomo ngoáamila jamaá lo Allahu Taáala, **34** mongobua musi motipoóyo to dudungaya lojamaá. Timongolio diila luasialio mobisala. Timongolio diila mowali modihu tauwa; uito motuuide wolo butoó lo agama. **35** Wonu timongolio ohilaa motota maó hitua-tuawua, timongolio musi mohintu uito todile limongolio tobele. Moóolito daá wonu taabua ngota mobisala todelomo dudungaya lojamaá. **36** Wolo tahuda lo Allahu Taáala meidungga mai monto olimongoli? Meaalo bo de olemu wambaó tahuda boito pilopo tunggulo? **37** Wonu woluo tamolaasa oponu umopo tunggulo habari monto Allahu Taáala, meaalo tio oponu uwewolio monto Rohullah, tau boito musi mongalati deú wolo u tiluladei lowatia botie yito palenta lonto Eeya. **38** Bo wonu woluo tadiila mololimo utie, diila maó poótuota tio. **39** Masababu uito, Mongo wutato, potolo panilo u mopo tunggulo habari monto Allahu Taáala, bo diila maó podini taa motohilaa mobisala todelomo bahasa hidala-dalaala u moólinggolabe. **40** Bo ngoáamilalo musi pohutuwola wolo mopiohu wau aátulu.

**15:1** Wau botia, Mongo wutato, otohilaa lowatia timongoli mamuli moéela mola Habari Mopiohe monto Allahu Taáala upilo habari lowatia muloololio mai olimongoli. Timongoli lololimo uito, wau palacaya li Almasi sababu Habari Mopiohe boito. **2** Wonu timongoli motidihima tutu tou wolo upilo habari mai lowatia boito, yi Habari Mopiohe boito mopoáahu olimongoli; ngopohia wonu Wutato palacaya bo diila ohuhama. **3** Wolo upilo tunggulai lowatia ode Mongo wutato yito u matilolimo mai lowatia olo. U lebe polohuna daá, debo odelo u tulatulade todelomo Kitabi, watia mopo tunggulai ode limongoli deú ti Almasi yilate sababu totoonulalo dusanto; **4** deú Tio yilobungio, bo lapataó luli pilopo tumu-Lio



mai todulahee otolulio. Uito olo tulatulade todelomo Kitabi. **5** Watia mopooṭaa mai olo olimongoli deū ti Almasi taluli pilopo tumu-Lio mai boito lopobilohe batanga-Lio olo odelei Petrus, wau lapatao to tamopulaa duulota rasulu. **6** Lapatao uito Tio lopobilohe batanga poli totaa lebe lou limo lohetuto lota tahiduduā o-Lio peéntalo maó. Odaata limongolio boito masaatia donggo hitumula, bo dengolo lota mailate. **7** Lapatao uito ti Almasi lopobilohe batanga-Lio olo odelei Yakobus lapatao to ngoámila rasulu. **8** Pulitio daá Tio lopobilohei batanga-Lio to olaatia olo -- watia tadebo odelo taunge u pilotutulio diila to wakutuulio! **9** Watia yito rasulu lo Eeya tadupa-dupapa daá. Watia diila paatuti unteelo rasulu, sababu watia malo ngalinaya jamaá lo Allahu Taáala. **10** Bo sababu odehu hilao lo Allahu Taáala watia lowali debo odelo owowoluwoa lowatia botia. Wau diila paracuma Allahu Taáala longambungu mai olaatia. Boli tumbao wawaa-tiyalo tahelo kalaja lebe tiópatea wolo ngoámila rasulu wewolio. Bo uito otutuulio maó diila tolopani lowatia; uito tolopani lo Allahu Taáala talomonu mai olaatia wau talo kalaja pee-peénta wolaatia. **11** Oditolio, penu boli monto olita timongoli mololimo Habari Mopiohe boito -- wolo uito monto olaatia meaalo monto mongo rasulu wewo -- uito diila mowali suáli. U polohuna daá yito amiaatia mopohabari Habari Mopiohe boito wau Wutato palacaya. **12** Wonu upilo habari mai lamiaatia boito yito ti Almasi maluli pilopo tumu-Lio mai lonto opopate, yilongola woluo to wolotamu tahi poloiyawa deū taamate diilalo potumulo-Lio mai? **13** Wonu otutu taamate diilalo potumulo-Lio, uito boliilio ti Almasi olo diilalo pilopo tumu-Lio mai lonto opopate. **14** Wau wonu humayaalio ti Almasi diilalo pilopo tumu-Lio lonto opopate, yi diaaluo hunalio amiaatia mopohabari lolo-loolo wau diaaluo hunalio olo timongoli palacaya, sababu opopalacaya limongoli boito diila opatoáa wolo-wolo. **15** Lebe maó leeto, malo ilaalo deū amiaatia lohimbulo tomimbihu Allahu Taáala, sababu amiaatia helo pohabari deū Allahu Taáala maluli lopo tumulai li Almasi lonto opopate, lebe-lebe pomaó Allahu Taáala diilalo lopo tumulai o-Lio wonu memangi otutu tamailate diilalo pilopo tumu-Lio mai. **16** Sababu wonu taamate diilalo pilopo tumu-Lio mai, yi ti Almasi olo diilalo pilopo tumu-Lio mai lonto opopate. **17** Wau wonu ti Almasi diilalo pilopo

tumu-Lio mai yi opopalacaya limongoli bo wambaó tohiilopo; uito boliilio timongoli donggo todelomo owowoluwoa lodusa wau diila ohalaapani sama-samaata. **18** Uito boliilio olo deú tau-tauwalo Nasara tamailate, olo diila ohalaapani. **19** Wonu halaapaninto toli Almasi ponto-pontolo to tutumulonto todelomo dunia botie wambaó, yi to ngoilanggubu umati lomanusia todelomo dunia botie, ito-itolo talaba-labaalo nahati! **20** Bo malo papatai ti Almasi maluli pilopo tumu-Lio mai lonto opopate. Utieelo batululio deú tau-tauwalo tamailate mamuli potumulo-Lio mai. **21** Sababu opopate tilumuwoto ode delomo dunia lotimbulude totaa ngota, odito olo muli tumumulai monto opopate yilohi-Lio mai tomanusia lotimbulude totaa ngota olo. **22** Debo odelo ngoáamila manusia mate sababu leituwoto tuwau wolei Adamu, odito olo ngoáamila mapo tumulo-Lio mai sababu leituwoto tuwau woli Almasi. **23** Bo ngota-ngota mapo tumulo-Lio mai moduduá tayadio; bohu-bohulio ti Almasi; lapataó de tou Tio muli meidungga mai, tayadio lotau-tauwalo tahi tuwota miliki li Almasi. **24** Lapataó uito mamotoduo mai kiama. Tou boito ti Almasi mamopo taaluku ngoáamila pamalenta, ngoáamila okokawasa wau ngoáamila olootolo; lapataó Tio mamohudu okokawasa-Lio odelo Olongia, to Allahu Taáala, ti Paapanto. **25** Ti Almasi musi tulusi momalenta dilumutu Allahu Taáala mohutu mai ngoáamila musu li Almasi taaluku toli Almasi. **26** Musu u pulitio umapo taalukuo-Lio yito opopate. **27** Todelomo Kitabi tulatulade odie, "Allahu Taáala malohutu mai totoonulalo u hitua-tuawua taaluku to o-Lio." Malo patatai deú u pilatuju lou "totoonulalo u hitua-tuawua" uito diila leituwoto Allahu Taáala lohihilao, tamohutu totoonulalo u hitua-tuawua boito taaluku toli Almasi. **28** Bo lapataó ngoáamilalo pilo taaluku-Lio to walungo palenta li Almasi, yi Tio lohihilao, deúito-yito Walaó Allahu Taáala, mamopo taaluku batanga-Lio to Allahu Taáala tamalo powali mai totoonulalo hitua-tuawua taaluku to o-Lio. Yi Allahu Taáala lohihilao olo mamomalenta ngoáamilalo. **29** Wonu taamate diilalo pilopo tumu-Lio mai, yilongola woluo tailihua duólo taamate? Pongoola timongolio mohutu maó suáli boito? Wonu memangi taamate sama-samaata diilalo pilopo tumu-Lio mai, pongoola timongolio mohutu maó suáli boito? **30** Wau pongoola olo amiaatia ohilaa motaalua wolo

umoó topotala timiidu saaáti? **31** Mongo wutato! Timiidu dulahu watia sabali hemo dutolo sababu watia meengahe to tutumuli mongoli sababu timongoli mailo iimani toli Almasi, Eeyanto. **32** Wonu uito bo monto bibilohu lomanusia wambaó, wolo paéedatio olaatia u mohipate debo odelo moluwali bibii-natangiyalo mongantau tokota botie, to Epesus? Wonu memangi taamate diilalo pilopo tumu-Lio mai, lebe mopiohe ito moduduá pohumaya botie: "Dulo ito molamela mongilu wau motisana-sanangi, sababu loombu ito debo maamate." **33** Diila bolo o wimbuloalio! Oáawota u mobulilo mopolusa piili u mopiohe. **34** Pongalatilo botia, wau diilalo pohutu dusa. Patutilio timongoli musi moolito, deú towolota limongoli woluo tadiipo motota lo Allahu Taaála. **35** Tanu woluo tamohintu, "Woloolo mola taamate muli potumulo-Lio mai? Batanga u woloolo mola uwahi ode limongolio, tou timongolio muli potumulo-Lio mai?" **36** Mohulode daá! Wonu Wutato mopomulo bili todelomo huta, bili boito diila tamobutu, wonu bili boito diipo mateepo. **37** Wau bili upomulo lo Wutato todelomo huta boito -- tanu bili lopale meaalo bili wewolio -- deúito-yito botu lobili boito wambaó, diila ngoáamila pilomulolio u de mamobutu mai. **38** Allahu Taaála lohihilao tamamongohi mai tobili boito moodeli u moduduá to pomilo-Hio mopiohu ode pilomulo boito. Ode timiidu bili ngodalaala, Allahu Taaála mongohi mai moodeli to pilomulo-Lio wiwi-wiwi. **39** Batanga lo mamaa-halukuwalo u onyawa diila ngoáamilalo tutuuwauwa. Manusia obatanga ngodalaala, bibinaa-tangiyalo obatanga ngodalaala uwewo; bubuu-lungiyalo obatanga ngodalaala uwewo, wau totoolawalo olo tingga ngodalaala poli batangalio. **40** Odito olo wolo totoonulalo upango u tohulungo wau totoonulalo upango todunia. Timiidu upango u tohulungo tinggai woluo ogaagalio lohihilao, wau totoonulalo upango utodunia odito olo. **41** Ogaaga lodulahu wewo wolo ogaga lohulalo. Popoo-liyamalo olo tinggai woluo ogaagalio. Tumbaó timiidu Popoo-liyamalo boito tinggai hiwewo-wewoa olo ogaagalio. **42** Odito olo de suáliilio wolo tau-tauwalo tamaate u muli potumulo-Lio mai. Batanga u yilobungo boito yito batanga u mowali mohutodu, bo batanga umuli potumulo-Lio mai yito batanga udiila mowali moluusa. **43** Tou batanga boito yilobungo, batanga boito mobulilo wau

molulupuhu; bo tou tío muli potumulo-Lio mai, tío yito batanga u mopiohu wau molotolo. **44** Tou lobungolo, batanga boito batanga monto dunia; bo tou muli potumulo-Lio mai, yi batanga boito batanga uilohi lo Rohullah. Woluo botanga u monto dunia, woluo olo batanga u monto Allahu Taála. **45** Todelomo Kitabi tulatulade odie, "Manusia tabohulio, yito tei Adamu, lowali mahaluku tatumu-tumulo," bo tei Adamu tapulitio yito Rohu u mongohi tutumulo. **46** U meidungga mai meimulo yito upanaa, diila u rohu. U rohu meidungga meiwooli. **47** Tei Adamu tabohulio pilowali mai monto huta, bo tei Adamu oluolio asaliilio mai monto sologa. **48** Tau-tauwalo dunia botie yito debo odelo tei Adamu bohulio, pilowali mai monto huta, bo tau-tauwalo sologa yito debo odelo Tío tamei dungga mai monto sologa. **49** Odelo woloolo mola ito botia yito debo odelo tei Adamu tapilowali mai monto huta, yi de ito mamowali odelo Tío tamonto sologa boito. **50** Makusudu lowatia, Mongo wutato, deüito-yito: batanga upilowali mai monto duhu wau tapu, diila mowali tumuwoto ode Dunia Bohu lo Allahu Taála; wau batanga umowali mate diila mowali bakaa. **51** Poótuota maó hitua-hituwua u milakusudu botie: Diila ngoáamilalo ito mate, bo ito ngoáamilalo mamobolió. **52** Suáli boito debolo mamotoduwolo mola lou ngointalo mato, tou torompeti potingohulo u mapulitio. Sababu tou moó dungohe tingohu torompeti boito, tau-tauwalo tahe lopunungo mamuli potumulo-Lio mai wolo batanga ubakaa, wau ito ngoáamilalo mabolió-Lio. **53** Batanganto u mowali mate botie musi tuloáalo wolo batanga udiilalo mate, wau batanga u monto dunia musi tuloáalo wolo batanga u monto sologa. **54** Wonu batanga u mowali mate matiluloá wolo batanga udiilalo mate, wau batanga u monto dunia matiluloá wolo batanga ulonto sologa, tou boito bolo motoduwolo mai wolo u tulatulade todelomo Kitabi, "Opopate mapilopo diaaluo; ohohaama mailo dungga!" **55** "Wuu mautu, toutoonou ohohaamamu? Wuu mautu, toutoonou bisaamu?" **56** Bisa lomautu yito dusa, wau dusa loponao duludelio lotimbulude tobutoo lo agama. **57** Bo sukuru to Allahu Taála; Tío longohi mai olanto ohohaama lotimbulude li Isa Almasi Eeyanto! **58** Masababu uito, Mongo wutato taa otolianguu, mamusi timongoli molotolo wau diila moetu. Pokalajalo tulusi ode Eeya lou otu-otutuulo maó, sababu

otaawa limongoli deu ngoáamila u kalajaa limongoli ode Eeya, ohunalio.

**16:1** Botia tomimbihu doi u otohilaa posadaka limongoli ode timongota taulo Nasara, poáhu mai lowatia alihu pohutua maó limongoli motuuúde wolo potuhata uilohi mai laatia to jajaamaáalo to Galatia. **2** Todulahee bohulio timiidu ahadi, mamusi Wutato ngoáamilalo mopohetu maó doi, ngota-ngota motuuúde wolo tilapulio. Tahua maó doi boito dilumutu watia monaó mai, alihu towakutu boito diilalo palalu yimoóolo. **3** De wonu watia meidungga mai, watia mamolao tau-tauwalo tamaa ilakoloa limongoli. Watia mamongohi olimongolio tulade podepito, alihu timongolio modelo mola doi losadaka boito ode Yerusalemu. **4** Wau wonu to pomilohio mopiohe deu watia monaó olo woli mongolio, yi watia mamonaó peé-peéenta woli mongolio. **5** Watia mamomilohe olimongoli lapataó mohepito to Makedonia, sababu watia oniyati u molinto mola. **6** Mowaliilio watia mamomilohe olimongoli ngopeé mola woli mongoli, tanu ngotilonggadu sembo lopolo huhulo. Lapataó uito timongoli mowali momantu olaatia mopo tolonga mola lononaó lowatia ode tambati u wumbutio mola. **7** Watia diila mohuto mai momilohe olimongoli bo mohepito wambaó. Wonu poluasialo Eeya, watia ohilaa motibiluloá mohiheo ngopeé woli mongoli. **8** Tou odito watia mamomilohe olimongoli tokota botie, to Epesus, dilumutu dulahe Pentakosta. **9** Ohiyangio dadaata tewe ode totoonulalo kalaja u ohuna, eleponu dadaata olo taa u motehengi. **10** Wonu tei Timotius monaó mai, tolimoa maó tio lou mopiohu alihu tio molaasa sanangi towolota limongoli, sababu tio olo debo odelo watia hemokalaja ode Eeya. **11** Diila bolo woluo tadiila momandungi olio. Bantui maó tio alihu tio mowali mopo tolonga mola lononaólio muli mohualingai ode laatia wolo moáahu, sababu watia mohima nonaólio mai peé-peéenta wolo mongo wutato wewolio. **12** Pasali lo wutatonto tei Apolos, mapoo-poongoolo watia helo poáhu olio alihu tio peé-peéenta wolo wutato tawewolio monaó mola momilohe olimongoli. Bo tio diipo molaasa yakini deu tio musu monaó botia. Bo wonu de ohiyangio, tantu tio mamonaó mai. **13** Mamusi timongoli mopoódaha wau sabali todelomo tutumuli mongoli odelo taulo Nasara. Pokalajalo wolo buheli wau

powalilo molotolo. **14** Ngoáamila u pohutuo limongoli, pohutua maó wolo toliángo. **15** Tantulo maó otaawa lo Wutato tei Stepanus wau ngaalaálio; timongolio tabohu-bohulio lowali Nasara to Akhaya. Timongolio lou lealeaatu lohilao hemo kalaja tolomodu momaya umati lo Allahu Taáala. **16** Watia mopoáhu mai lou otu-otutuulo maó alihu timongoli moduduá tauwa lotau-tauwalo tadebo odelo uito, wau tau-tauwalo wewo tamo kalaja huhuuyula wau momaya peé-peéenta woli mongolio. **17** Watia sanangi to podudungga mai lei Stepanus, lei Portunatus wolei Akhaikus. Timongolio debo odelo poluloá olimongoli odelaatia. **18** Timongolio malohutu hilaa lowatia lowali leengahe, debo odelo timongolio helo poéengahe hilaa limongoli. Tau-tauwalo debo odelo uito wajibu halagaalo. **19** Jajaa-maáalo to Asia lopo tunggulai salamu limongolio toli mongoli. Tei Akwila wolei Priskila wau jamaá tahiámbua tobele limongolio olo lolao salamu Nasara wolo wengahu lohilao. **20** Ngoáamila wutato tea mopo tunggulai salamu ode limongoli. Posasaa-lamuwalo wolo tataabia daá lohilao odelo wutato Nasara. **21** Watia moduhengai tea salamu u tiluladu lowatia lohihilao: Salamu lonto olaatia, Paulus. **22** Taa udiila motoliángo to Eeya, huliilo maó tio laálaánati! Maranatha -- Eeya lomongo watotia, podunggalo mai! **23** Pohileaala duá Eeya Isa mobalakati to Wutato. **24** Salamu toliángo to Wutato ngoáamilalo talo tituwau woli Isa Almasi. Hulumati lamiaatia, Paulus 2co>

**1:1** Mongo wutato jamaá lo Allahu Taáala to Korintus wau ngoáamila umati lo Allahu Taáala to ngoilanggubu Akhaya. Watia, Paulus, rasulu li Almasi, tapiludu-lo to kahandaki lo Allahu Taáala peé-peéenta wolo wutatonto Timotius, **2** mohalapu hinta Allahu Taáala ti Paapanto wau Eeya Isa Almasi mongohi mai balakati wau salaamati ode limongoli. **3** Ilopujiaalo mola Allahu Taáala, ti Paapa lo Eeyanto Isa Almasi. Tio ti Paapa talaba-labaalo ohilaa mopiohu, wau Tio Allahu Taáala talongohi olootolo hilaa tomanusia. **4** Tio helo poolotolo hilaa lamiaatia totimiidu odungga lou suukali, u ilolaasawa lamiaatia alihu wolo olootolo u tilolimo lamiaatia lonto Allahu Taáala boito, amiaatia olo mowali mopoó lotolo hilaa lotaa ngoáamila todelomo suukali. **5** Totoonulalo polodutolo u



ilolaasawa li Almasi madilaata ilolaasawa lamiaatia olo. Wau lotimbulude li Almasi olo, hilaa lamiaatia piloooloto-Lio daa. **6** Wonu amiaatia mootoduo usuukali, uito yito u mopoó lotolo hilaa limongoli, domi opoáahu limongoli. Wonu hilaa lamiaatia poó-lotoloolo, yi timongoli olo moduduá poó-lotoloolo tilinggula timongoli moótahangi todelomo susuu-kaliyaalo debo odelo u hedilutola lamiaatia olo. **7** Amiaatia laito yakini wau diila peéenta maó molingu tomimbihu Wutato, sababu otaawa lamiaatia deú timongoli moduduá modutolo wolamiaatia. Wau sababu uito timongoli olo moduduá poó-lotoloolo peé-peéenta wolamiaatia. **8** Mongo wutato! Otohilaa lamiaatia otaawa limongoli pasali lou suukali u ilolaasawa lamiaatia tomadala lo Asia. polodutolo u bilanta lamiaatia boito malo odito buhetio helodeeche olamiaatia, tilinggula amiaatia diilalo ohalapani tumumulo; **9** lasaalio debo odelo madilehua hukumani mate wambaio. Bo suáli boito lotoduo alihu amiaatia diila tamo tiwunela to olootolo batanga lohihilao, boto Allahu Taáala tamopo tumulai taamate. **10** Tiolo tamalo poáahu mai olamiaatia lonto baala opopate u moótihela hapato boito. Wau Tiolo olo tamamo poáahu mai olamiaatia de todulahee momooli, sababu to Oliolo amiaatia hemo tiwunelo. **11** Amiaatia yakini deú wolo duduu-aawalo limongoli olamiaatia, Allahu Taáala mamuli mopoáahu mai olamiaatia monto baala. Allahu Taáala lotuhatawa lobalakati mai olamiaatia odelo totameta tou dadaata duá ode lamiaatia, wau sababu uito dadaata tamamo lapali mola sukuru ode Allahu Taáala. **12** Amiaatia meengahe, sababu hilaa lamiaatia helo poyakini olamiaatia deú tutumulo lamiaatia todunia botie -- lebe-lebe maó wumbuta lamiaatia wolo Wutato -- mapilo ponaó lamiaatia wolo ihilasi wau hilaa belesi. Hepilohutu lamiaatia uito, diila wolo tinepo lomanusia, bo wolo omambo uilohi mai lo Allahu Taáala. **13** U tiluladei lamiaatia olimongoli yito bo tomimbihu susuu-aliyaalo u mowali pobaca wau opahaamua limongoli. Botia timongoli diila mongalati olamiaatia wolo lea-leaatulo maó, bo watia mohalapu de timongoli mamongalati otu-otutuulo maó olamiaatia. Lou odito, tou ti Isa Eeya demei dungga mai, timongoli mameengahu to olamiaatia, odelo woloolo mola olo amiaatia meengahe toli mongoli. **15** Sababu oyaakini boitolo yi watia tou bohulio olanjana u mobiilohe woli

mongoli alihu timongoli moótoduo mai balakati pooluo piúwa. **16** Watia omakusudu mobiilohe woli mongoli todelomo nonaó lowatia ode Mekedonia wau muli mohepitaó olimongoli todelomo wuwalingai lowatia, alihu timongoli mowali momantu olaatia mopo tolonga mola lononaó ode Yudea. **17** Bo watia malomolió niyati lowatia boito; naa, wolo uito mopobilohe deú huhama lowatia diila motoheeto? Tou mohutu lanjana, wolo watia mohutu lanjana moduduá u otohilaa lowatia lohihilao, u ngopeeé mola molojiya, "Joo" wau ngopeeé mola, "Diila"? **18** Domi Allahu Taáala tamowali palacayalo, danti lowatia to Wutato diila "Joo" wau "Diila". **19** Sababu ti Isa Almasi, Walaó Allahu Taáala, Tapilo habari mai olimongoli lei Silas, Timotius, wau laatia lohihilao diila tau "Joo" wau "Diila". Boliio maó Tio debo odelo totametai, "Ooo" monto Allahu Taáala. **20** Sababu lotimbuludei o-Lio Allahu Taáala malo tahuda mai "Ooo" ode ngoáamila danti-Lio. Patopatoá leeto boitolo ito molojiya "Amin" to Allahu Taáala sababu ti Isa Almasi. Amiaatia lohutu odito alihu Allahu Taáala polaióolo. **21** Allahu Taáala lohihilaolo talo powali mai olamiaatia wau Wutato molotolo motituwau woli Isa Almasi; Tiolo olo talo lulaota olanto tolomodu ode batanga-Lio. **22** Woleeto Allahu Taáala malo posaaha mai olanto lowali hakuu-Lio wau Rohu-Lio todelomo hilaanto odelo pongaku deú Tio mamongohi mai olanto ngoáamila upilo danti-Lio. **23** Allahu Taáala sakusi lowatia -- sababu otaawa-Lio tuango hilaa lowatia -- deú watia diila lomata lonaó ode Korintus, sababu watia diila mohuto mopo suukali hilaa limongoli. **24** Watia diila momakusa olimongoli tomimbihu wolo u musi palacaya limongoli, sababu timongoli malo malacaya tióotutua toli Almasi. Watia bo mohuuyula woli mongoli alihu timongoli helebe sanangi tutu.

**2:1** Masababu uito watia malohutu putuusani u diilalo monaó mai ode limongoli wolo mobiilohe u bo moósuukali hilaa limongoli. **2** Sababu wonu watia moósuukali hilaa limongoli, yi tatoonu poli tamowali moliyanga olaatia, wonu diila tau-tauwala boito olo tamaa pilosuukali lowatia hilaalio? **3** Uito sababuulio watia loluladei tulade boito ode limongoli. Watia diila mohuto mai mobiilohe woli mongoli, lapataó

posuukalia limongoli hilaa laatia lebe-lebe pomaó timongolilo tawajibulio mopo wengahe olaatia. Sababu watia yakini deú wonu watia meengahe, yi Wutato ngoáamilalo meengahe olo. **4** Watia loluladei olimongoli wolo hilaa u suukali wau mobuheeto wau wolo buyu-buyuhuto ponu dadaata. Makusudu lowatia diila alihu timongoli mowali suukali lohilao, bo alihu timongoli mongalati deú watia laba-labaalo motoliáangi mongoli. **5** Wonu woluo taa umoó sababu mowali suukali lohilao, yi suáli boito pilohutulio diila ode laatia, bo ode Wutato ngoáamilalo meaalo ngódilio ode ngotayadio lo Wutato. Watia diila mohuto mohama louí pakusa to olio. **6** Ode taa udebo odelo uito, hukuumaní u podehuwolo to olio louí odaata towolota lo Wutato, malo tuuheta. **7** Botia timongoli musi mongambungu olio wau muli mohuntula olio alihu tio diila botie suukali daá lohilao tunggula yilooli halapani. **8** Sababu uito pohile lowatia, alihu timongoli muli mopo biloheó olio deú timongoli tióotutua motoliáanga olio. **9** Watia loluladei tulade boito ode limongoli wolo makusudu u motesi olimongoli, wolo timongoli laito mohuto moduduá totoonulalo potuhata monto olaatia. **10** Wonu timongoli mongambungu tamaa ilotala olimongoli yi watia olo mamó ngambungu tau boito. Sababu wolo umaá ilambungu lowatia -- wonu memangi woluo tapalalu ambunguwolo, uito ambunguo maó lowatia totalu li Almasi ode opopiohi mongoli. **11** Pilohutu lowatia uito alihu Ibilisi diila ohiyangio u motolo kawasa olanto; sababu otaawanto totoonulalo lanjanalio. **12** Tou watia leidungga mola to Troas wolo makusudu mola mopohabari Habari Mopiohe pasali li Almasi, Eeya malomuó dalalo olaatia u lokalaja totambati boito. **13** Bo watia diila sanangi sababu diila lodunggayá wolo wutatonto tei Titus mola teto. Yi watia malohintu lohualingo totau-tauwalo totambati boito tulusi lonaó ode Makedonia. **14** Bo sukuru ode Allahu Taáala! Tio laito hemodelo olamiaatia u loduduá ngopoámbua tau ohohaama li Almasi sababu amiaatia tumutumula lotituwau wo-Lio. Allahu Taáala lomake olamiaatia alihu habari tomimbihu li Almasi mololadu debo odelo boolo monu u moloópolo mola ode utoonulalo maó. **15** Sababu amiaatia yito debo odelo boolo alama u monu, u tilumbila li Almasi ode Allahu Taáala. Ode tau-tauwalo tadonggo hidulunga ode obobinasa, amiaatia botie debo odelo boolo opopate u

momate mateelo maó; bo ode tau-tauwala tadonggo hepo aahuwolo, amiaatia debo odelo boolo monu u modelo ode tutumulo. Naa, tatoonu tamowali mopoópolu tuugasi botie? **17** Amiaatia diila debo odelo taa dadaata u hemohutu habari monto Allahu Taáala debo odelo balangi lo daahangi wambaó. Papaa-tujuwalo lamiaatia yito moolango, sababu amiaatia tilugasia mai lo Allahu Taáala. Wau Allahu Taáala lohihilao loóonto deu amiaatia lopo tunggula habari boito odelo mongo wato li Almasi.

**3:1** Wolo utie oontonga maó deu amiaatia debo odelo hemomuji-muji batanga lamiaatia poli? Meaalo mowaliilio amiaatia momalalu tulade poloilaalo momuji ode limongoli, meaalo monto olimongoli, debo odelo upalaluo lotau-tauwalo wewo? **2** Wutato lohihilaolo tulade poloilaalo momuji lamiaatia, u leitulade todelomo hilaa lamiaatia wau u mowali otaawa wau pobaca lotimiidu tau. **3** Timongolio lohihilao mowali moóonto deu Wutato debo odelo tulade u tiluladu li Almasi, uilao lotimbulude olamiaatia. Tulade boito tiluladu diila wolo mangiti, bo wolo Rohullah tatumu-tumulo; diila olo toitaato botulei, bo todelomo hilaa lomanusia. **4** Amiaatia lolojiya odito sababu iimani lamiaatia ode Allahu Taáala lotimbulude li Almasi. **5** Amiaatia diila o alasan boli bo tuwau maó u mopobilohe deu amiaatia mambo mohutu kalaja botie, bo Allahu Taáala talo pomambo olamiaatia. **6** Tiolo talo pomambo olamiaatia lowali tamomayawa ode tuwaulio lo daantia u bohu; daantia u motiwunela to Rohullah, diila tobutoó u tulatulade. Sababu u tulatulade boito modelo ode mautu, hiambola Rohullah boito mongohi tutumulo. **7** Tou daantia u modelo ode mautu boito pilohutu wau iluukili tobotu, tino Allahu Taáala lotinela lou motilango tutu tobaya lei Musa. Tine-Lio malo odito tilangio tilinggula bangusa lo Isirailu diila mambo momilohe baya lei Musa, eleponu tino tobayalio boito mahelo tambutió tou boito. Naa, wonu pilohutua daantia u modelo ode mautu boito pilosaaha wolo tino motilango tutu u odito udaálio, **8** tantu pilohutua daantia uilohi mai lo Rohullah, pilosaaha lebe lou tino motilango tutu poli. **9** Wonu daantia u mohukuumani mai manusia boito motinelo laba-labaalo mobaango, tantu

lebe maó motinelo mobaango tutu poli daantia u mopoówali manusia mopiiohe wolo Allahu Taáala. **10** Mowali loiyalo deú wolo u muloololio mai motinelo mobaango tutu, madiilalo motinelo mobaango tutu poli sababu otinelo mobaango tutu u masaatia botie. **11** Wonu hitua-tuawua u moó tahangi bo ngopee mola, odito motinelo mobaango tutu, tantu hitua-tuawua ubakaa lebe maó motinelo mobaango tutu poli. **12** Masababu amiaatia o halapani debo odelo uito, yi amiaatia buheli mobisala odito. **13** Amiaatia diila debo odelo tei Musa talo meleúto bayalio wolo beleúto alihu bangusa lo Isirailu diila moóntonu tinelo Eeya udonggo patepate wau yilooli to bayalio. **14** Pikiilangi limongolio maloheúto. Wau dilumutu todulahe botie olo pikiilangi limongolio donggo heúheúta wolo beleúto tou timongolio mobaca bubuu-kuwaalo pasali lou daantia u muloolo boito. Beleúto boito bo mowali mohuo wonu tau motituwau woli Almasi. **15** Penu boli botia olo, wonu timongolio mobaca bubuu-kuwaalo lei Musa, beleúto boito donggo tanggu-tanggu to pikiilangi limongolio. **16** Bo wonu tahingota-ngotaawa monao mai motaalua lo Eeya, beleúto boito olo bintaó-Lio mola monto baya lotau boito. **17** Naa, Eeya tamila-kusudu tewe yito Rohu. Wau toutoonu Rohu lo Eeya woluo, teto olo woluo oloolopato. **18** Masaatia bayanto ngoáamila diila tilaúbe lo beleúto, wau ito mopo bulilangaó otinelo mobaango tutu li Isa Eeya. Wau masababu uito ito mololaalaita boliolo mowali debo odelo Tio; lebe hihiiheo maó ito mowali helebe motinelo mobaango tutu. Otinelo mobaango tutu boito monto Rohu, wau Rohu boito yito Eeya.

**4:1** Amiaatia helo ponaó kalaja botie sababu omuura hilaa lo Allahu Taáala. Uito sababuulio amiaatia diila yooli halapani. **2** Amiaatia diila lomake totoonulalo dudelo modiólomo u moóolito. Amiaatia diila mohuto mokalaja wolo dadaata aakali u moleeto meaalo mopo bobooliá tahuda lo Allahu Taáala. Amiaatia hemomaya Allahu Taáala wolo hilaa u maloótapu tinelo Eeya kahandaki-Lio. Sababu uito, amiaatia mohalapu ngoáamila tau motiliki olamiaatia lou mopiohe todelomo hilaalio u maloótapu tinelo Eeya. **3** Wonu Habari Mopiohe u pohabario lamiaatia boito debo donggo woluo olo diipo ilopahamua, yi bo tau-tauwalo tadonggo hiludunga ode

obobinasa wambaio tadiila moó pahamu maó. **4** Ila moleeto umotolo kawasa dunia botie moheúta pikiilangi lotau-tauwalo tadiila palacaya boito. Tiolo tamo monto-montola olimongolio alihu timongolio diila moóonto tilango monto Habari Mopiohe boito tomimbihu odudaá li Almasi, tadebo odelo bayahu lo Allahu Taáala. **5** Habari upilo tunggulai lamiaatia boito diila habari pasali lamiaatia lohihilao. Habari boito yito habari pasali li Isa Almasi; deú Tio yito Eeya; wau amiaatia yito mongo wato limongoli sababu Tio. **6** Allahu Taáala talo tahuda, "Mamusi monto delomo diólomo mobutu mai tilango," Allahu Taáala boitolo olo tamo pobutu mai tilango boito todelomo hilaanto, alihu pikiilanginto, mowali mobaangai u momaahamu otinelo mobaango tutu lo Allahu Taáala u tinetinelo tobaya li Almasi. **7** Bo halata rohu u gaaga daá boito dilelo lamiaatia tobatanga lamiaatia udiila ohalaga botie upilohutu lonto huta. Louí odito loilaalo mai deú odudaá lokawasa boito dudutuulio to Allahu Taáala wau diila to lamiaatia. **8** Amiaatia tiluhulio lonto totoonulalo tutulio, bo amiaatia diila leihupeto. Amiaatia lolingu, bo diila tunggula luwali. **9** Dadaata talo luwali olamiaatia, bo diipo peéenta maó amiaatia lotibiluloá tutuwau. Wau eleponu amiaatia tingga maito pateelio tunggula modehu, bo amiaatia diila yilate. **10** Laito amiaatia moólaasa opopate li Isa tobatanga lamiaatia, alihu tutumu-Lio olo mowali moilaalo tobatanga lamiaatia. **11** Ngotilonggadu amiaatia tumutumulo, amiaatia laito heáanjamuo lo opopate sababu ti Isa, alihu louí odito tutumuli Isa olo mowali poilaaloolo tobatanga lamiaatia upanaa botie. **12** Utie boliilio deú todelomo batanga lamiaatia opopate donggo moóolohu moponaó lo duludelio, bo amiaatia meengahe deú tutumuloolo udonggo moóolohu todelomo batanga limongoli. **13** Todelomo Kitabi woluo loiya utie, "Watia palacaya, uito sababuulio watia lobisala," Naa, wolo sumangati palacaya udebo odelo uito olo, amiaatia helo bisala sababu amiaatia palacaya. **14** Amiaatia yakini deú Allahu Taáala tamaaluli lopotumulai li Isa Eeya, mamopo tumulai olamiaatia olo woli Isa, wau modelo olimongoli wau olamiaatia ode talu-Lio. **15** Ngoáamilalo boito yito ode polohuna daá olimongoli. Sababu helebe dadaata mola tamoólaasa ponu lo Allahu Taáala, helebe dadaata mola olo duá sukuru u potunggulolo ode Allahu



Taaala; lou odito Allahu Taaala polaióolo. **16** Uitolo sababuulio amiaatia diila lotombodu. Eleponu amiaatia debo odelo sipati lobatanga he oduhenga mola lusaalio, bo debo odelo sipati lorohu amiaatia pilowali mai bohu timiidu dulahu. **17** Wau osuusa udiila de mangolo botie, u ilolaasawa lamiaatia u donggo pohanu-pohutu, mamongohi mai tilapulo olamiaatia tuwaulio osanangi tutu upolu-polutuó wau bakaa. Osanangi tutu boito lebe udaá maó wonu pobandingio mola wolo osuusa boito lohihilao. **18** Sababu amiaatia diila mopoótuoto suáli u oóonto, bo tumbaó udiila oóonto. U oóonto bo moó tahangi ngopeeé mola, bo udiila oóonto boito ohiheo-hiheolo maó ohiheo-hiheolo maó.

**5:1** Sababu otaawa lamiaatia deu wonu bele -- deuuto-yito batanga -- u biluloáanto todunia botie onggalolio, Allahu Taaala mamopohetu olanto bele ngowale tosologa, upilohutu lo Allahu Taaala lohihilao wau moó tahangi ohiheo-hiheolo maó. **2** Todelomo bele u masaatia botie, ito mopoilaali suusa sababu ito moloolo daá motibiluloá todelomo belento u tosologa boito. **3** Bele boitolo batanganto u bohu. **4** Ngotilonggadu ito donggo bilubiluloá todelomo bele u monto dunia botie, ito mopoilaalo suusa sababu bantaanto mobuheeto. Diila kalana ito ohilaa molopato monto batanganto u monto dunia botie, bo sababu ito ohilaa momake batanga u monto sologa boito, alihu batanganto u mowali mate botie kawasaalio lou tutumulo. **5** Tamopo dapato olanto boito yito Allahu Taaala lohihilao, wau Eeya lohihilao mongohi mai Rohu-Lio ode olanto odelo pongaku. **6** Sababu uito hilaa lamiaatia laito molaasa molotolo. Otaawa lamiaatia deu ngotilonggadu amiaatia donggo bilubiluloá todelomo batanga lamiaatia botie, amiaatia molaminga monto bele uma potibiluloá lamiaatia wolo Eeya. **7** Sababu amiaatia tumutumulo patopatoá to palacaya li Almasi, diila patopatoá tou wolo u oontonga, **8** uito sababuulio hilaa lamiaatia sabali. Lebe otohilaa lamiaatia molopato monto batanga lamiaatia botie, alihu mowali motibiluloá wolo Eeya. **9** Sababu uito amiaatia motolopani tióotutua u mopo sanangi hilaa-Lio, mopio tou amiaatia donggo tobele lamiaatia teea, meaalo mola teto. **10** Sababu tantuulo maó ito ngoáamila mawuduwolio ode talu lo bubutoó li Almasi,

wau ngota-ngota mamootapu balasiilio motuuude wolo huhutuulio todunia botie -- huhutu mopiohe meaalo u moleeto. **11** Otaawa lamiaatia wolo boliilio moohe to Eeya; uito sababuulio amiaatia hipo tolopania mopoyakini totau tomimbihu batanga lamiaatia. Allahu Taála motota olamiaatia lou tiootutua, wau halapuo lowatia timongoli olo motota olamiaatia todelomo hilaa limongoli. **12** Woleewe botie amiaatia diila mohile alihu timongoli momuji batanga lamiaatia. Amiaatia bo ohilaa mongohi alaasani tuwau u mopiohe ode limongoli u mowali moéengahe to olamiaatia, alihu otaawa limongoli woloolo mola timongoli musi molameta tau-tauwalo tahemo pomangga daa laku lotau wau diila piiliilio. **13** Wonu amiaatia memangi oontonga maó mabiliyongo, uito yito domi polohuna daa Allahu Taála. Wau wonu amiaatia oontonga maó oákali mopiohe, uito domi polohuna daa olimongoli. **14** Ponu li Almasilo u motolo kawasa olamiaatia; wau amiaatia mongalati deu wonu ngotaalio mailate ode taa ngoáamila, yi uito boliilio deu ngoáamila tau mailate. **15** Ti Almasi yilate ode taa ngoáamila, alihu tau-tauwalo tahitumula, diilalo tumumulo ode batangalio lohihilao, bo tumbaó odeli Almasi tamailate wau luli pilotumu-Lio mai domi polohuna daa olimongolio. **16** Masababu uito, amiaatia diilalo motiliki tau moduduá tuude lomanusia. Memangi amiaatia mapeéenta lotiliki li Almasi lonto bibilohio lomanusia, bo botia diilalo. **17** Taa umalo tituwau woli Almasi, mowali manusia bohu sama-samaata. U deedelo madiduu -- ngoáamilalo malowali bohu. **18** Ngoáamilalo boito kilalaja lo Allahu Taála. Lotimbulude li Almasi Allahu Taála lopowali olanto luli lopiiohe wo-Lio, lapataó longohi tuugasi olanto alihu tau-tauwalo wewo powaliyola mopiiiohe olo wolo Allahu Taála. **19** Amiaatia helo pohabari deu lotimbulude li Almasi, Allahu Taála lohutu mai manusia luli lopiiohe wolo batanga-Lio. Allahu Taála lohutu mai lou diila lopoilaalo suusa totoonulalo totala u mapilohutu lomanusia ode batanga-Lio. Wau amiaatia maa tilugasia lo Allahu Taála u lopohabari habari boito. **20** Oditolio amiaatia yito mongo utolia li Almasi. Lotimbulude olamiaatia Allahu Taála lohihilao talopo tunggulai tahuli-Lio. To tangguli Almasi, amiaatia wolo tiootutua mohalapu, tolimowalo wuwudu uluu lo Allahu Taála talo poowali mai olimongoli

luli lopiiohe wo-Lio. **21** Ti Almasi diila odusa, bo Allahu Taáala lohutu mai o-Lio lomanta dusanto, alihu ito muli mopiiohe wolo Allahu Taáala sababu lotituwau woli Almasi.

**6:1** Sababu amiaatia hemo kalaja peé-peéenta wolo Allahu Taáala, yi halapuo lamiaatia lou tióotutua diila maó polemea limongoli opopiohu hilaa lo Allahu Taáala boito. **2** Todelomo Kitabi, Allahu Taáala lotahuda, "Towakutu upilopo tuhata, Wau malo dungohei olemu, wau todulahe oáahu, Wau malo tulungi mai olemu." Eelai maó tióotutua, masaatia botieelo wakutu upilopo tuhata boito. Masatia botieelo dulahee u poáahuwalo boito! **3** Amiaatia diila mohuto bubaya lamiaatia potalaalio. Sababu uito amiaatia motolopani diila mongohi alaasani penu boli to ngotaalio u mohutu maó suáli boito. **4** Boliio maó, todelomo ngoáamila suáli, amiaatia helo pobilohe deú amiaatia yito mongo wato lo Allahu Taáala. Sababu totoonulalo osuukali u hidala-dalaala madilutola lamiaatia lou sabali; **5** amiaatia silikisalio, tilutupalio, wau pilo patealio; amiaatia helo kalaja tióopatea; tingga maito diila motuluhu wau tingga maito didu o uáalo. **6** Wolo huhutu motulidu wau molinepo, sabali wau mopiohe hale, amiaatia helo pobiloheó deú amiaatia yito wato lo Allahu Taáala. Wau olo lou helo tiwunela toponu lo Rohullah, wau wolo toliángo u ihilasi, **7** wau lou helo pohabari habari ulonto Allahu Taáala wau wolo kawasa lo Allahu Taáala, amiaatia helo pobiloheó deú amiaatia botie yito mongo wato lo Allahu Taáala. Amiaatia helo tidihu to kahandaki lo Allahu Taáala odelo sinapangi lamiaatia umoluhu meaalo mopoduulua batanga. **8** Amiaatia hilurumatilio, bo hilinalio olo; pilujilio, wau pilitanalio olo. Eleponu hilaa lamiaatia motulidu amiaatia pilo tuludelio mohimbuloa. **9** Amiaatia ilanggapulio diila masa-masahulu, bo amiaatia otaawa lotaa ngoáamila. Amiaatia yilantobio yilate, bo loilaalo amiaatia donggo tumutumulo. Eleponu amiaatia ilalinayalio amiaatia diila yilate. **10** Eleponu hilaa lamiaatia pilopo suukalilio, bo amiaatia laito motiwengahu olo. Oontonga maó amiaatia mosikini, bo amiaatia maloó kaya totaa dadaata. Oontonga maó amiaatia diila owolo-wolo, bo tutuulio tutu amiaatia motolo miliki totoonulalo u hitua-tuawua. **11** Mongo wutato taóoliángo to Korintus!

Amiaatia mawolo juujuru olimongoli. Ngoáamila tuango hilaa lamiaatia matiloóowoli mai lamiaatia. **12** Amiaatia diila moheuto hilaa lamiaatia ode limongoli, bo timongolilo talo heuto hilao ode lamiaatia. **13** Botia, poluliyalo mai watia mobisala debo odelo tomongo walaó lowatia lohihilao. Huóoilo mola olo hilaamu ode lamiaatia. **14** Diila maó pohuto mowali waito lotau-tauwala tadiila palacaya li Isa; uito diila motuhatawa. Diila pongalo aakali u mopiohe mowali tuwau wolo u moleeto! Diila pongalo akali u mobaango mowali tuwau wolo u modiólomo. **15** Diila pongalo aakali ti Almasi moheeluma wolo Ibilisi. Wolo otutuu-wauwalio towolota taulo Nasara wolo taa diila Nasara? **16** Wolo wumbutalio towolota Bele lo Eeya wolo bele lo balaahala? Ito botie Bele lo Eeya, deüito-yito Allahu Taáala tatumu-tumulo. Allahu Taáala lohihilao lotahuda, "Wau mamó tibiluloá tohuungi mongolio, wau tumumulo peé-peéenta woli mongolio. Wau mamowali Allahu Taáala limongolio, wau timongolio mamowali umati-U. **17** Sababu uito, tolailo maó tau-tauwalo tadiila hitootawa to Allahu Taáala boito, wau buáala maó batangamu monto olimongolio. Diila maó pohumbuta sama-samaata wolo tanajisi, yi Wau mamololimo olimongoli. **18** Wau mamowali ti Paapamu, wau timongoli mamowali mongo walauu-U, odieelo mola tahuda lo Eeya Taa Laba-labaalo kawasa."

**7:1** Mongo wutato taótoliángo! Ngoáamila danti boito pilodulungo ode olanto. Masababu uito wajibulio ito mopo belesi batanga monto totoonulalo umóó kootolo jiwa wau batanganto. Mamusi ito mohe to Allahu Taáala, alihu ito mowali tumumulo tolomodu ode o-Lio lou molimomoto ngoáamilalo. **2** Yimai maó amiaatia todelomo hilaamu. Amiaatia diila ototala penu boli to ngotaalio, wau diila peéenta maó woluo tau tapiloluhi lamiaatia. Amiaatia sama-samaata diila helopeehu paéeda penu boli lonto olita. **3** Watia loloiya odito, diila u mopotala olimongoli. Sababu, debo odelo u mailoiya mai lowatia omoóomolu, amiaatia motoliángo tutu olimongoli, wau ito yito mongo sahabatilo maó ngotupa lo tutumulo tunggula mate. **4** Watia mopowunela opopalacaya lea-leaatulo maó olimongoli. Tumbaó watia meengahe daá olimongoli! Eleponu

amiaatia hemoó toduo dadaata usuusa, hilaa lowatia iloliyango daá sababu timongoli. Hilaa lowatia otutu meengahu! **5** Tou amiaatia penu boli leidungga mola to Makedonia, amiaatia sama-samaata diila ilohiangio lohuheli. Lonto totoonulalo tutulio amiaatia heloótapu totolo: lonto wimbihu uwewo polo hahaamawa, lonto delomo hilaa lohihilao owowohe. **6** Bo sukurululo mola, Allahu Taaála laito hemo poudaá hilaa lotaa didu ohalapani; Tio lopoóluli hilaa lamiaatia wolo nonaó mai lei Titus. **7** Hilaa lamiaatia leipalongo diila bo sababu tei Titus malonaó mai, bo sababu tio olo malo podulohu woloolo mola hilaalio ilopalonga limongoli. Tio lopoótaa mai olamiaatia deu timongoli moololo daá modunggaya wolaatia; deu timongoli hileéya to huhutuumu omoóomolu wau botia iloheela lohilao mopodulua olaatia. Suáli boito lebe loéengaheó olaatia. **8** Eleponu tuladu lowatia loóhutu hilaa limongoli lowali siluukali, watia diila loleée loluladei tulade boito. Memangi tou watia loóonto maó deu tuladu lowatia boito bo moó suukali olimongoli -- eleponu osuukali limongoli boito bo ngopeé mola -- watia odito leéleée olo. **9** Bo watia sanangi masaatia -- diila bo sababu hilaa limongoli lowali siluukali, bo sababu osuukali limongoli boito loóo bolió piilimu. Memangi osuukali limongoli boito ngopo naówa wolo kahandaki lo Allahu Taaála. Oditolio, amiaatia diila mopoluhi olimongoli. **10** Sababu osuukali debo odelo uito moóto duo mai hilaa mowali mobolió wau mopodungga mai oáahu. Wau taa u diila tamoleée tosuáli boito. Boliio maó, osuukali u bo ngopo naówa wolo kahandaki lomanusia moóto duo opopate. **11** Nte poótuota maó limongoli wolo tilapulio olimongoli lou osuukali ungopo naówa wolo kahandaki lo Allahu Taaála! Tilapulio yito timongoli tióotutua motolopani u mopo wolangaó u moliliúlo! Timongoli mamolonuó todusa, timongoli moohe, timongoli moololo, timongoli mamowali osumangati, timongoli iloheela lohilao mohukuumani taótotala! Todelomo ngoáamila suáli botie timongoli malo pobiloheó deu timongoli diila ototala. **12** Oditolio, eleponu watia malo luladei tulade boito, watia lolulade diila sababu taa ototala boito. Diila olo sababu taa hidutola masababu totala boito. Watia loluladei tulade boito alihu totalu lo Allahu Taaála, timongoli lohihilao mongalati deu odito udaalio pikiilangi mongoli to lamiaatia. **13** Uitolo sababuulio

hilaa lamiaatia ilopalonga. Ngopohia ilopalonga, amiaatia tidiyolo maó poli pilopo wengahio sababu loóonto owengahee Titus; hilaalio lopalongo sababu mongo wutato ngoáamila. **14** Memangi watia mahelo pomangga-mangga olimongoli to olio. Sukurululo mola, timongoli diila lopoóolito olaatia. Ngoáamila u mapeéenta pilolele mai lamiaatia olimongoli yito otutu. Odito olo wolo u hepo mangga-mangga lamiaatia pasali limongoli odelei Titus malo ilaalo otutu olo. **15** Masaatia tio helebe motoliango olimongoli, sababu ileelalio woloolo mola Wutato ngoáamilalo lohuto loduduá to tauwalio wau woloolo mola timongoli lololimo olio wolo hulumati wau modungohu. **16** Watia sanangi daá sababu timongoli mowali palacayalo todelomo toonulalo suáli.

**8:1** Mongo wutato, otohila lamiaatia otaawa maó limongoli olo pasali woloolo mola piohio lo Allahu Taáala to jajaa-maáalo to Makedonia. **2** Timongolio matilesi wolo osusuu-kaliyaalo u hibuuhera. Bo tohuungo lo osusuu-kaliyaalo boito, timongolio hiwengahe wau muura daá lohilao todelomo hemongohi sadaka u motulungi taa wewo, eleponu timongolio mosikini daá. **3** Watia lowali lolantu maó deú timongolio longohi u omamboa limongolio, tumbaó bo lebe maó. Diaaluo tahe lopoáhu, **4** timongolio lohile tióotutua to lamiaatia wonu mowali timongolio moduduá momantu mongohi sadaka to umati lo Allahu Taáala to Yudea. **5** Timongolio longohi lebe maó lou hehalapuo lamiaatia. Timongolio bohu-bohulio lohudu batanga ode Eeya, lapataó to lamiaatia olo, lotuuúde wolo kahandaki lo Allahu Taáala. **6** Uito sababuulio amiaatia lopoáhu tióotutua olei Titus -- tamo lumulaó tolopani botie -- alihu tio mopo tolonga mola tolopani u mopiohe botie towolota limongoli olo. **7** Timongoli lebe lailaió todelomo totoonulalo u hitua-tuawua: Timongoli lebe lailaió todelomo suáli palacaya, todelomo suáli mopoilaalo lohuhama, todelomo suáli lopongota, todelomo totoonulalo tolopani u hidala-dalaala, wau todelomo toliángumu to lamiaatia. Sababu uito, mopiohe olo wonu timongoli lebe lailaió todelomo tolopani u mopiohe botie. **8** Watia diila mopoáhu mai uito odelo tuwaulio lopalenta. Bo lou mopo bilohei deú malo odito oloohio taawewo motulungi timongotalio, watia olo ohilaa



motota deü demola utoonu toliangumu. **9** Sababu otaawa limongoli tutu deü ito otoliango daá li Isa Almasi Eeyanto. Tio kaya bo Tio lohutu batanga-Lio lowali mosikini ode polohuna daá limongoli, alihu wolo omosikini-Lio boito, timongoli mowali kaya. **10** Moduduá huhaama lowatia, to tambatiliolo timongoli mopoó lapato wolo u matilumula limongoli totaunu uilalu maó. Sababu timongolilo tabohu-bohulio helo mikiilangi wau lolumulaó tolopani botie. **11** Naa, botia timongoli mamusi mopo tolonga mola moduduá omamboia limongoli. Mamusi timongoli osumangati u mopoó lapato tolopani boito, debo odelo timongoli omoóomolu olo osumangati helo lanjana maó. **12** Wonu timongoli iloheela lohilao mongohi, yi Allahu Taáala mamololimo uilohi limongoli boito patopatoá tou wolo udiaaluo toli mongoli. **13** Watia sama-samaata diila omakusudu mopobebasi taa wewo monto u tihutihula olio, wau mopobuheta olimongoli. Bo sababu timongoli masaatia botie todelomo owowoluwoa ngoáamilalo tutuuheta, yi mapatutilio timongoli mopotuheta u odiaaluo limongolio. De wonu timongoli odiaaluwoa, wau timongolio todelomo owowoluwoa ngoáamilalo tutuuheta, yi timongolio mamomantu olimongoli. Lou odito duduuluwolo peé-peéenta yintaalio. **15** Todelomo Kitabi tulatulade, "Taa otilapulo dadaata, diila olebelio, wau taa otilapulo ngoidi, diila odiaaluwoa." **16** Donggo boli sukurulio amiaatia to Allahu Taáala sababu Tio malohutu olei Titus debo odelo olohu lamiaatia u motulungi olimongoli! **17** Sababu tei Titusi diila bo iloheela lohilao mopoópolu hihile lamiaatia, bo tio olo odito oloho ohilaa motulungi olimongoli tunggula to ilohilaalio lohihilao olo tio lolantu u lonaó mola ode limongoli. **18** Peé-peéenta wolio amiaatia lolao mola olo wutato ngota tahe hulumatío daá lo ngoáamila jamaá sababu kalajaalio helo pohabari Habari Mopiohe lonto Allahu Taáala. **19** Ngopohia maó leeto, tau boito maa tilulaotio olo wau tilantu maó lo jajaa-maáalo u motamania wolamiaatia todelomo nonaó lamiaatia. Sababu amiaatia mamohuwato u mopo tunggulo sadaka boito, alihu Eeya polaiuolo wau alihu timongoli moóonto deü amiaatia iloheela lohilao motulungi. **20** Amiaatia malo hemo poódaha-dahaalo maó alihu diaaluo tamo potala olamiaatia tosuáli mopo tunggulo sadaka u hulinta botie. **21** Amiaatia ohilaa mokalaja lou juujulu

diila bo totalu lo Eeya, bo totalu lomanusia olo. **22** Peé-peéenta wolei Titus wau wutato boito, amiaatia olo lolao ngotaalio lowutato tawewo. Amiaatia malotesi olio poó-poódaata wau malo ilaalo tio laito ohilaa motulungi. Wau botia, tio lebe maó ohilaa motulungi olimongoli sababu tio lopo wunela halapani u udaá toli mongoli. **23** Tomimbihu olei Titus, tio yito tamani lowatia, tahemo kalaja wolaatia u motulungi olimongoli. Wau pasali lowutato duulota boito, talonaó peé-peéenta wolio, timongolio yito tailao lo jajaa-maáalo wau lowali owengahi Almasi. **24** Halapuo lamiaatia timongoli mopobilohe toliangi mongoli ode limongolio, alihu ngoáamila jamaá motota deú timongoli motoliangi mongolio wau deú wolo u hepomangga lamiaatia tomimbihu olimongoli yito otutu.

**9:1** Otutuulio maó diilalo palalu watia moluladei ode limongoli pasali lodembulo udonggo uilao ode umati lo Allahu Taáala to Yudea. **2** Otaawa lowatia timongoli ohilaa motulungi, wau watia malo pomangga olimongoli ode tau-tauwalo to Makedonia. Watia loloiya maó olimongolio deú anggadu taunu uilalu maó mongo wutata to Akhaya malo tidapato u mongohi dembulo. Wau sumangati limongoli malo powalihuhu olo sumangati ngotayadio daá limongolio. **3** Botia watia lolao mai olei Titus wau towutato duulota boito ode limongoli alihu wolo u hepo mangga-mangga lamiaatia tomimbihu olimongoli diila debo odelo toongi wambaio. Oditolio, timongoli wajibulio malo tidapato, sababu watia loloiya ode limongolio deú timongoli malo tidapato woleeto. **4** Watia molawalo wonu bolo woluo tau-tauwalo Makedonia tamoduduá peé-peéenta wolaatia de toú watia monaó mai ode limongoli. Wau wonu odungga limongolio deú timongoli diipo lotidapato, wei donggo boli de wolitio lamiaatia, sababu maloloiya deú amiaatia palacaya daá olimongoli. Wau penu boli timongoli lohihilao olo mamoolito. **5** Uitolo sababuulio watia molaasa palalu molao mai olimongolio boito ode limongoli meimulo u mongulusipo dembulo u pilodanti limongoli boito. Watia lohutu maó uito alihu de wonu watia monaó mai, u wohi limongoli boito mapilo dapato. Lou odito, malo ilaalo deú uwohi limongoli boito yilohi wolo hilaa sanangi, wau diila kalana pakusa. **6** Poótoloma maó! Taa u momuáyade bili ngoidi-ngoidi

mamohimoáa tilapulo bo ngoidi olo. Bo taa u momuáyade bili laba-labaalo dadaata mamohimoáa tilapulo dadaata olo. **7** Timiidu tau musi mongohi moduduá oleela hilaalio. Tio diila mowali mongohi lou panggu-panggu meaalo kalana pakusa, sababu Allahu Taáala momonu taa u mongohi wolo hilaa sanangi. **8** Allahu Taáala okawasa mongohi mai olimongoli balakati ulaba-labaalo daatalio, alihu timongoli laito o woluwowa lou wolo upalaluo limongoli; tumbaó timongoli maa olebealio u mohutu mopiohe wau o amaali. **9** Todelomo Kitabi tulatulade odie pasali lo Allahu Taáala. "Tio momuá-muáyade mopoloópo ode taa mosikini; opopiohe hilaa-Lio ohiheo-hiheolo maó ohiheo-hiheolo maó." **10** Allahu Taáala tamopo dapato bili ode tamoo-muáyadea wau uáalo olanto. Tio olo mamopo dapato wau mopoo daata wolo u huáyadu limongoli, alihu tilapulo lou omuura hilaa limongoli oduhenga mola olo. **11** Lou odito timongoli mamotuheta ngoáamilalo todelomo totoonulalo suáli tilinggula timongoli laito mowali mongohi wolo muura lohilao. Wau totoonulalo wowohi limongoli utaya-tayadu maó lamiaatia, moó sababu dadaata tamolapali mola oduóolo ode Allahu Taáala. **12** Sababu huhutu mopiohe u pohutuo limongoli botie diila bo wambaó mopotuheta odiaaluo umati lo Allahu Taáala, bo olo mamoo sababu dadaata tau molapali mola oduóolo ode Allahu Taáala. **13** Wau monto hitua-tuawua umopodungga mai opopiohu u pobiloheó limongoli boito, dadaata taulo Nasara to Yudea mamomuji mola Allahu Taáala sababu timongolio moóonto otatapu wau olootolo hilaamu to Habari Mopiohe pasali li Almasi tahe duduá limongoli boito. Wau olo, timongolio momuji mola Allahu Taáala, sababu timongoli muura daá lohilao u molaya-layadeó olimongolio wau ode ngoáamila taawewo wolo uwoluo tolimongoli. **14** Yi timongolio mamoduá mola olimongoli wolo laasa toliango sababu Allahu Taáala mopiohe daá hilaa-Lio tolimongoli. **15** Mamusi ito mosukuru mola ode Allahu Taáala to wowohi-Lio upolupolutuó boito!

**10:1** Botia watia, Paulus, ohilaa moóowoli mai hitua-tuawua olimongoli. Watia botie, moduduá heloiya lotau, molumboyoto hale wonu motaalua woli mongoli, bo buheli wonu lalaaminga. Naa, sababu olumboyoto hale

wau opopiohe hilaa li Almasi, **2** halapuo daa lowatia, diila maó pakusai watia mohutu u bangganga olimongoli de wonu watia monaó mai. Sababu watia oniyaati u mohutu wolo pintalo ode tau-tauwalo tahipo loiyawa deu amiaatia hipo kalajawa wolo papaa-tujuwaalo tomimbihu dunia. **3** Amiaatia memangi donggo tumutumula todelomo dunia, bo amiaatia diila mohipate patopatoá topatuju tomimbihu dunia. **4** Titii-ngolowalo u pilohuna lamiaatia todelomo polohipate lamiaatia diila tingolo dunia botie, bo titii-ngolowalo Allahu Táala taókawasa. Wolo titii-ngolowalo boito amiaatia helo ngantulu totoonulalo bintengi; amiaatia lolame polo hahaa-mawaalo. **5** wau helo ngantulu totoonulalo bintengi lo osombongi u bilongu motehengi pongotota pasali lo Allahu Taaála. Amiaatia helo tawalo pikiilangi lotau-tauwalo wau lohutu olimongolio taaluku toli Almasi. **6** Wau wonu timongoli malo dungohe wolo lea-leaatulo maó, amiaatia dapadapato u mohukuumani ngoáamila taa u diila modungohu. **7** Mamusi timongoli mongalati to owowoluwoa u otutuulio maó. Wonu tahingota-ngotawa yakini deu tio miliki li Almasi, mamusi tio mopoéelaó batangalio lohihilao wau mongalati deu amiaatia olo miliki li Almasi debo odelo tio. **8** Watia diila moolito wonu watia musi lebe dadaata mopomangga-mangga okokawasa umailohi mai lo Eeya ode lamiaatia, sababu okokawasa boito yilohi-Lio mai u momongu olimongoli, diila u mopo aantulu. **9** Watia diila mohuto u timongoli molaasa deu watia hemo powoohe-woohe olimongoli wolo tutuu-ladeyaalo laatia. **10** Tau hipoloyawa, "Tutuu-ladeyaalo lei Paulus boito pintalo wau otilihula, bo wonu tio lohihilao woluo to huungonto, batangalio lohihilao molulupuhu wau ngoáamila loiyalio diila oboliilio wolo-wolo!" **11** Mamusi taa debo odelo uito mongalati deu wonu amiaatia woluo tohuungi mongoli, huhutu lamiaatia tuhata debo odelo wolo u tiluladei lamiaatia todelomo tutuu-ladeyaalo lamiaatia. **12** Tantulo maó amiaatia diila buheli mopo bandingi mola meaalo mopo tambati batanga lamiaatia ngodalajati wolo tau-tauwala tahipo nganggapua batangalio lailaió. Donggo boli hulodi mongolio! Timongolio mohutu tuuúdu hihilao wau motiliki batanga hihilao wolo tuuúdu boito. **13** Amiaatia diila odito. Wonu amiaatia mopo mangga-mangga, amiaatia diila lebe lou enggadelio. Amiaatia debo todelomo

enggade lomadala pokalajalo u matilantu mai lo Allahu Taáala olamiaatia. Wau timongoli tuwotuwoto todelomo madala boito. **14** Oditolio, tou amiaatia mobiilohe woli mongoli wau modelo Habari Mopiohe pasali li Almasi ode limongoli, otutuulio maó amiaatia diila lumuala monto eenggade lomadala pokalajawa lamiaatia. **15** Amiaatia diila momuji batanga tokalaja lotaa wewo tawoluo to bulemengo lo enggadelio u matilantu mai lo Allahu Taáala olamiaatia. Boliio maó amiaatia debo todelomo enggade u matilantu mai lo Allahu Taáala olamiaatia wau moharapu deu timongoli helebe maó palacaya li Almasi, alihu amiaatia mowali moponaó lokalaja ulebe udaá towolota limongoli. **16** Loui odito amiaatia mowali mopohabari olo Habari Mopiohe boito to lili-puwaalo wewo loui diila wajibu mopouda-udaá lobatanga tokalaja u mapilohutu tomadala lobubaya lotaa wewo. **17** Todelomo Kitabi tulatulade, "Taa u motohilaa mopomangga u hitua-tuawua, mamusi mopomangga maó wolo u mapilohutu mai lo Eeya." **18** Sababu taa u ilopujia yito taa u piluji lo Eeya, diila taa u momuji batangalio lohihilao.

**11:1** Popoluasia mai watia motihutu debo odelo taa mohulode ngopeeé. Wolo mowali odito? **2** Watia moololo olimongoli, debo odelo Allahu Taáala lohihilao olo moololo olimongoli. Timongoli yito debo odelo tadulahu ngota tadonggo mantali u mapilo danti mai lowatia u ponikaalo wolo dile ngota, deuito-yito ti Almasi. **3** Bo watia molawalo pikiilangi limongoli maa owaingalio udiilalo tatapu wau molotolo hilao toli Almasi, debo odelo ti Hawa omoóomolu olo ilowainga lo aakali moleeto lo tulidu. **4** Sababu oontonga maó timongoli sanangi wambaio mololimo taa monaó mai ode limongoli wau mongaajali pasali li Isa uwewo -- diila ti Isa tapilo ngotaawa mai lamiaatia toli mongoli. Wau timongoli olo ohilaa mololimo rohu wau "habari mopiohe" u sama-samaata wiwiihede wolo Rohullah wau Habari Mopiohe u peéenta tilolimo limongoli lonto olaamiatia. **5** Watia sama-samaata diila molaasa lebe dupadupapa wolo "mongo rasulu" tapolu-polutuó boito! **6** Tanu watia diila botie motota mobisala, bo tomimbihu pongotota, watia diila taa mohulodu. Uito mapilo bukuti mai lamiaatia olimongoli todelomo totoonulalo suáli. **7** Tou watia helo

pohabari Habari Mopiohe lonto Allahu Taáala olimongoli, diila pilohile lowatia deu timongoli tamo ngonggosi olaatia penu boli ngoidi maó; wau lou odito watia lohutu batanga lowatia lowali dupadupapa. Pilohutu lowatia uito u mopolaio olimongoli. Wolo uito tuwaulio lototala laatia olimongoli? **8** Tou watia lomaya olimongoli, watia ilonggosia lo jajaa-maáalo wewo. Mowali loiyalo watia helo poluhi jajaa-maáalo boito alihu moó tulungi olimongoli. **9** Wonu tou boito watia ilokulangia, watia diila peéenta maó helo poósuusa penu boli ngotaalio limongoli. Ngoáamila upalaluo lowatia hepilopo dapato lomongo wutato talei dungga mai lonto Makedonia. Watia modaha mopio-piohuulo maó alihu watia diila moposuusa olimongoli penu boli todelomo suáli wolo wambaio, wau watia mamodaha tulusi alihu uito debo odito. **10** Owengahu lowatia botie diila mowali lulutolo penu boli toutoonu olo to ngoilanggubu lipu lo Akhaya, sababu pongaajali li Almasi u otutu woluo tolaatia. **11** Yilongola watia molojiya odito? Wolo masababu watia diila motoliangi mongoli? Otaawa lo Allahu Taáala watia motoliangi mongoli! **12** Wolo upilohutu lowatia botia matulusi pohutuo lowatia alihu "mongo rasulu" uwewo boito diila o alaasani mopouða-udaá lobatanga wau molojiya deu timongolio hemokalaja debo odelo amiaatia. **13** Tau-tauwalo tadebo odelo uito yito mongo rasulu paaluti. Timongolio tahi pokalajawa umopo lapalo tau wolo molomelo baya odelo mongo rasulu li Almasi. **14** Diila moólinggolabe wonu timongolio mohutu odito, sababu Ibilisi lohihilao olo hemo lomelo baya debo odelo malaikati mobaango! **15** Oditolio diila moólinggolabe olo wonu tahi pomayawa to Ibilisi molomelo baya odelo tahi pomayawa tamohutu kahandaki lo Allahu Taáala. Pulitio maó timongolio olo mamololimo tontuli u motuuúde wolo totoonulalo huhutu limongolio. **16** Peéentapo wulia mai lowatia: Diila bolo woluo tamo nganggapu olaatia mohulodu. Bo wonu timongoli debo monganggapu olaatia odito, poluasia mai watia tamo hulode botie motiwengahe penu bo ngoidi. **17** Wumbutio mola botie matanggulo mai lowatia obobangga laatia, bo diila Eeya talo poáhu olaatia molojiya uito. Todelomo suáli botie watia tióotutua mobisala mai debo odelo taa mohulodu. **18** Memangi woluo dadaata taa umopo mangga susuu-aliyaalo tomimbihu dunia, oditolio watia ohilaa mopo



mangga-mangga olo. **19** Timongoli wolo hilaa sanangi mosabali totaa u hihuulode, sababu timongoli molaasa batanga limongoli mototaa daa! **20** Timongoli hemo poluli wambaó wonu tau mopowato olimongoli, meaalo tahi pohamawa paéda daata daatalo maó monto olimongoli, wau molaasa batanga lebe molaió woli mongoli wau buheli molambali olimongoli. **21** Watia moolito momasisi deú amiaatia laba-labaalo molulupuhu u mohutu debo odelo uito. Bo wolo u buheli hepo mangga lotaa wewo, watia buheli olo! (Watia mobisala debo odelo taa mohulodu.) **22** Taulo Ibrani timongolio? Watia olo taulo Ibrani. Taulo Isirailu timongolio? Watia olo taulo Isirailu. Wali mai lei Abraham timongolio? Watia olo odito! **23** Tahi pomayawa li Almasi timongolio? Odungohe maó watia debo odelo tamaa iloolia lo aakali, bo watia memangi tamoomayawa talebe mopiohe woli mongolio ngoáamilalo! Watia helo kalaja lebe loóohuú, tingga maito watia hetuwotolio ode tutupa, watia poó-poódaata hesilikisa wau laito bolo ngopeeé mate. **24** Mapoóolimo watia hesikisaa taulo Yahudi wolo biluboálio poóotolo pulaa tio. **25** Poóotolu watia biluboá tau-tauwalo Roma; maito olo watia paiyolio lobotu. Poóotolu watia heloó laasa kapali loáhumo todeheto, wau peéenta watia lantungaó-lantungaó todeheto dulo pulaa pato jamu hiheolio. **26** Poó-poódaata watia helo potolonga mola lononaó umoo topotala, heáanjamuo lobaala taluhe daa daa, baala lo tamoo-lambatawa, baala lonto taulo Yahudi meaalo tadiila Yahudi, baala todelomo kota, baala to bulemengo kota, baala todeheto, wau baala lonto tau-tauwala tahemo podudulai lobatanga odelo wutato Nasara lebe-lebe pomaó diila. **27** Watia helo kalaja loóohuú wau helo hipate tióopatea; maito diila motuluhu, diila molamelo, diila mongilu, poó-poódaata bolo iloloihia todelomo upola-polaango, mohuhulo sababu diila oboó wau diila obiluloá. **28** Uwewolio leeto ngoáamilalo boito, timiidu dulahu watia duiduito olo to owowoluwoa lo ngoáamila jamaa. **29** Wonu woluo tamo lulupuhu watia olo molaasa molulupuhu. Wonu woluo tamodehu ode delomo dusa, hilaa lowatia olo moduduá moáantulu. **30** Naa, wonu watia musi mopomangga u hitua-tuawua, yi watia mopomangga susuu-aliyaalo u mopobilohe olulupuhu lowatia. **31** Allahu Taáala, ti Paapa li Isa Eeya motota deú watia diila mohimbulo. Ilopujiaalo mola tanggu-Lio ohiheo-

hiheolo maó. **32** Tou watia mola to Damusiki, ti gubolonulu taókawasa mota teto to walungo lo pamalenta li Olongia Aretas, helo poáhu suludadu lodaha huhebu lokota boito u moheúpa olaatia. **33** Bo wolo kalanji tuwau watia yilaahio mola ode walungo loli tala tuwau lohuango to dingingo meeseli. Odieelo mola watia loólahi lonto uluú li gubolonulu boito.

**12:1** Memangi diaaluo paéedalio u motimangga. Bo watia ohilaa mopomangga susuu-aliyaalo upilopo bilohei lo Allahu Taaala olaatia todelomo wahi meaalo todelomo bibilohu. **2** Otaawa lowatia taulo Nasara ngota tou mopulaa pato lotaunu yilalu maó bilinta-Io ode tambati pulito langgatio tosologa. (Diila otaawa lowatia wolo batangalio otu-otutuulo maó leibintaá mola meaalo uito bo tuwaulio lobibilohu -- Allahu Taaala wambaó tamotota.) **3** Peéentapo wulio mai lowatia: Otaawa lowatia deu tau boito bilinta-Io mola tilumuwoto ode Pirdaus. (Diila otaawa lowatia wolo otu-otutulo maó batangalio leibintaá mola meaalo uito bo tuwaulio lobibilohu -- Allahu Taaala wambaó tamotota.) Mola teto tau boito lodungohe susuu-aliyaalo udiila mowali loiya lomanusia wau diila olo poluasialio manusia u molojiya maó. **5** Tomimbihu tau boitolo taóhilaa pomangga lowatia, diila tomimbihu batanga laatia lohihilao. Tomimbihu batanga laatia, bo susuu-aliyaalo umopo bilohe olulupuhu lowatia boitolo, u otohilaa pomangga lowatia. **6** Humayaalio watia motohilaa olo mopo mangga u hitua-tuawua, watia diila mohuto mowali tamoo-tabibowa u toongi; watia mamolojiya u otutu. Bo watia mongotongo batanga lowatia, alihu diaaluo tamo nganggapu olaatia lebe lou wolo umaa iloontongalio pilohutu lowatia meaalo mailo dunghelio yiloiya lowatia. **7** Bo alihu watia diila botie sombongi sababu totoonulalo bibilohu upolu-polutuó boito, watia yilohia-Lio mai odelo tuwaulio longongoto tobatanga lowatia udebo odelo pakaakasi lo Ibilisi. Ngongoto boito yilohi-Lio mai momate olaatia alihu watia diila mowali sombongi. **8** Poóotolu watia heloduá mola ode Eeya alihu ngongoto boito bintaó-Lio monto olaatia. **9** Bo Eeya lotahuda mai, "Wau momonu olemu wau uito malo tuuúde olemu; sababu kawasaa-U tumbaó laba-labaalo lotolo wonu yio molulupuhu." Uito sababuulio watia lebe sanangi mopomangga totoonulalo olulupuhu

lowatia, sababu wonu watia molulupuhu, yi tumbaó tou boitolo watia molaasa ti Almasi moduólai olaatia wolo olotoo-Lio. **10** Oditolio watia leengahe wolo totoonulalo olulupuhu lowatia. Watia olo leengahe wonu masababu ti Almasi watia pilitanalia, watia heloo laasa ileepita heilayilapitalio wau watia heloo laasa usuukali. Sababu wonu watia molulupuhu, yi tou boitolo tumbaó watia molotolo. **11** Otutu watia malo tihutu debo odelo taa mohulodu -- bo timongolilo tahelohutu olaatia lowali odito. Otutuulio maó timongolilo tamusi momuji olaatia. Sababu eleponu watia diila oboliilio wolo-wolo, watia sama-samaata diila mowali olaahe lo "mongo rasulu" tapolu-polutuó boito! **12** Ngoáamila moólinggolabu wau susuu-aliyaalo upolu- polutuó boito wau ngoáamila kalaja u duduulaa mapilo pobilohei wolo sabali toli mongoli u lopobukuti maó deu watia ngotaalio lo rasulu. **13** Todelomo suáli wolo timongoli diila boti piloótuoto, wonu pobandingio mola wolo jajaa-maáalo wewolio? Mowali loiyalo deu mailaba bo todelomo suáli utie; deu watia diila helo poósuusa olimongoli u longonggosi olaatia. Bolo maáapu tou totala lowatia boito! **14** Masaatia botie maa u otolulio watia dapadapato u mola mobiilohe woli mongoli. Wau watia diila mopoósuusa olimongoli, sababu u otohilaa laatia diila wolo u mililiki limongoli, bo batanga limongoli. Sababu diila taukekei tamusi mopeehe rijiki tomongo dulaálio, bo mongo dulaálio tamusi mopeehe rijiki tomongo walaio. **15** Sababu uito, wolo hilaa sanangi watia iloheela lohilao mopobake totoonulalo u hitua-tuawua olimongoli, tumbaó batanga lowatia lohihilao olo. Wonu watia odito motolianga olimongoli, wolo timongoli paatuti diila boti motolianga olaatia? **16** Naa, timongoli akolo deu watia diila peéenta maó lopoósuusa olimongoli. Bo boli odito woluo talo loiya deu watia botie oáakali dadaata u moleeto; deu watia hemohama paéeda monto olimongoli sababu wimbulo u hidala-dalaala lowatia. **17** Diila pongalo aakali! Wolo motimbulude totau-tauwalo taheilao lowatia ode limongoli boito watia helohama u paéeda toli mongoli? **18** Watia malo poáhu olei Titus lonaó mola lobiilohe woli mongoli, wau watia lopoáhu wutato Nasara tawewo boito lonaó peé-peéenta wolio. Wolo tei Titus malohama paéeda toli mongoli? Bo amiaatia duulota tahemo kalaja wolo makusudu u tutuuwauwa wau

hemohutu wolo dudelo u tutuuwauwa! **19** Mowaliilio timongoli hemo lantobe olamiaatia ngotilonggadu botie donggo hemo tolopani mopodulua batanga toli mongoli? Matilala daa timongoli! Otaawa lo Allahu Taála deü ngoáamila uiloia lamiaatia boito yito loduduá kahandaki li Almasi. Wau ngoáamila u pilohutu lamiaatia yito u momongu tutumulo rohu limongoli. **20** Watia molawalo deü tou watia de mola mobiilohe woli mongoli, odungga lowatia diila debo odelo wolo u hehalapuo lowatia, wau timongoli olo mamoo dungga olaatia diila debo odelo u hehalapuo limongoli. Diila bolo de woluo tamolohulua, mohiihia, hilaa mopatu, polohuna daa batanga lohihilao, mopipii-tanawa, mopo totoodei hilao lotau alihu moingo, sombongi wau motolonggalo. **21** Watia moohe diila bolo tou watia de monao mai Allahu Taála mamopo dupapa olaatia totalu limongoli wau watia mahumoyongo sababu dadaata towolota limongoli taodusa muloololio mai, diila helo bolió wau diila lohuheli hemohutu totoonulalo huhutu limongolio u huloto, kootolo wau diila paatuti.

**13:1** Utie yito u otolulio watia monao mai mobiilohe woli mongoli. Todelomo Kitabi tulatulade, "Timiidu palakala musi osakusi duulota meaalo toulota, bolo palakala boito saaha." **2** Tau-tauwala utou yilalu maó malohutu dusa wau ngoáamila taa wewolio, maleimulo piloéela lowatia tou watia mola lobiilohe woli mongoli u oluolio. Botia, tou watia donggo malaminga woli mongoli, watia muli mopoéelai olimongoli deü wonu watia muli monao mai, diaaluo penu boli ngotaa maó limongolio tamaa moólahi monto hukuumani. **3** Yi timongoli mamooótapu maó ngoáamila bukuti u otohila limongoli deü ti Almasi otu-otutuulo maó helo tahuda lotimbuludei olaatia. Wonu ti Almasi mohutu ode limongoli, Tio diila mohutu moti lumboyoto, boliio maó Tio mopo biloheó kawasaa-Lio towolota limongoli. **4** Memangi tou Tio silalipulio, Tio molulupuhu, bo botia Tio tumutumulo sababu kawasa lo Allahu Taála. Amiaatia olo molulupuhu todelomo tutumulo lamiaatia u motituwau woli Almasi, bo wonu motaalua woli mongoli, amiaatia olo mamolotolai peé-peéenta woli Almasi sababu kawasa lo Allahu Taála. **5** Nte, tesia maó limongoli batanga limongoli lohihilao wonu timongoli tióotutua tumutumulo

patopatoá to palacaya li Almasi! Tantu timongoli mongalati deú ti Isa Almasi woluo todelomo mongoli! -- wewo suáliilio wonu memangi timongoli diila tióotutua palacaya. **6** Halapuo lowatia timongoli mongalati deú amiaatia diila bo odelo taa u diila moó tahangi to tesi. **7** Amiaatia modua mola ode Allahu Taáala bolo pataala Eeya ohilaa motulungi mai olimongoli alihu diila mohutu totala. Diila u mopo biloheó deú amiaatia botie memangi motota moponao lotuugasi, bo alihu timongoli mohutu maó wolo u otohilaa lo Allahu Taáala -- penu boli oontonga maó amiaatia diila ilotilapulo, diila mongola! **8** Sababu amiaatia diila mowali mohutu penu boli wolo u bubuu-lemenga lou otutu; amiaatia musi modudua u otutu. **9** Amiaatia sanangi wonu amiaatia molulupuhu, wau timongoli molotolo. Amiaatia modua mola olo alihu timongoli mowali wimu-wimumuto ngoáamilalo. **10** Uitolo sababuulio watia loluladei tuladee botie tou watia dipooluo tohuungi mongoli. Lou odito, wonu watia de monao mai, sambelolo watia mohutu wolo mooohuu olimongoli wolo mopohuna okokawasa uilohi mai lo Eeya olaatia. Okokawasa boito yilohi-Lio mai u momongu olimongoli, bo diila u mopo aantulu. **11** Pulitio maó, Mongo wutato, mamusi timongoli motiwengahe, wau potolo panilo mowali wimu-wimumuto ngoáamilalo. Tolimowalo ngoáamila naseehati lowatia. Mamusi timongoli ngohilao wau tumumula mopiohe wau dame. Allahu Taáala Taa Laba-labaalo ponu wau tamoo-podamea boito mapeé-peéenta woli mongoli. **12** Posasaa-lamuwalo ngota timongota wolo tataabia lohilao odelo wutata Nasara. Ngoáamila umati lo Allahu Taáala lolao salamu olimongoli. **13** Eeya Isa Almasi mobalakati mai olimongoli, Allahu Taáala momonu olimongoli, wau Rohullah peé-peéenta woli mongoli ngoáamilalo! Hulumati lamiaatia, Paulus

**1:1** Mongo wutato jajaa-maáalo tomadala lo Galatia, watia, Paulus, wau ngoáamila wutato Nasara tawolaatia, mohalapu pohileaala dua Allahu Taáala ti Paapanto wau Eeya Isa Almasi mongohi mai balakati wau salaamati olimongoli. Watia lowali rasulu diila lotimbulude loli manusia meaalo sababu piluduó lomanusia, bo sababu ti Isa Almasi wau Allahu Taáala ti Paapanto tamaaluli lopotumulai o-Lio lonto opopate. **4**

Modungoheó u otohílaa lo Allahu Taáala ti Paapanto, ti Almasi lohudu mai batanga-Lio lowali bake ode duduu-saanto, alihu ito poáahuwolo monto jamani u moleeto botie. **5** Ilopujiaalo mola Allahu Taáala ohiheo-hiheolo maó! Amin. **6** Watia lolinggolabe pasali lo Mongo wutato! Timongoli tiliyango Allahu Taáala masababu odehu hilaa li Almasi, bo botia timongoli odito lolamemeto lobulemenga to Allahu Taáala wau loduduá "habari mopiohe" uwewo wolo Habari Mopiohe ulonto Allahu Taáala. **7** Otutuulio maó diaaluo "habari mopiohe uwewo". Bo woluo tau-tauwalo talo pohabari olimongoli "habari mopiohe" pasali li Almasi upilopo boboolió limongolio, tilinggula loó puyoóto olimongoli. **8** Taa u mopohabari "habari mopiohe" uwewo wolo Habari Mopiohe u mapilo habari lamiaatia, huliilo maó tio hukuumanio mai lo Allahu Taáala -- eleponu tau boito amiaatia lohíhilao meaalo malaikati monto sologa! **9** Amiaatia malo loiya mai omoóomolu, masaatia watia muli molojiya mai peéentapo; Taa u mopohabari olimongoli "habari mopiohe" uwewo wolo Habari Mopiohe u matilolimo limongoli lonto olamiaatia, tau boito wajibulio hukuumanio lo Allahu Taáala! **10** Wolo tingga woleeto boito watia oontonga maó debo odelo mei pasisi tomanusia? Sama-samaata diila! Watia bo motiwunelo pasisio mai lo Allahu Taáala. Wolo watia donggo hemo tolopani mohama hilaa lomanusia alihu aahudu lotau? Wonu watia donggo hemohutu odito, watia diila wato li Almasi. **11** Mongo wutato musi motota maó deú Habari Mopiohe upilopo habari lowatia boito asaliilio mai diila lonto manusia. **12** Watia diila lololimo habari boito lonto manusia, wau diaaluo penu boli ngotaa maó tahe longaajali olaatia. Ti Isa Almasi lohíhílaalo talo tombangai tuangio lo Habari Mopiohe boito olaatia. **13** Tantu timongoli maloó dungohe pasali tutumulo lowatia omoóomolu odelo ngotaalio tahelo dududuá agama lo Yahudi. Otaawa limongoli woloolo mola palangilio watia helo pohutu jamaá lo Allahu Taáala wau woloolo mola ohuúlio watia helo tolopani u mopo aantulu maó. **14** Todelomo suáli moponaó agama lo Yahudi, watia mongilaboto wolo odaata taulo Yahudi tango-hílaide lowatia. Watia osumangati daá todelomo susuu-aliyaalo tomimbihu uúdu linenemoya lamiaatia. **15** Bo sababu opopiohu hilaa lo Allahu Taáala, Tio lolulaotai olaatia tou watia



diipo pilotutulio mai wau lotianga olaatia u lomaya o-Lio. **16** Allahu Taáala lopoilaalo mai lo Wala-Io olaatia alihu Habari Mopiohe pasali lo Wala-Io mowali pohabario lowatia totaa diila Yahudi. Tou boito watia diila lonaó penu boli ode olita u lohile naseehati. **17** Watia olo diila lonaó ode tau-tauwalo to Yerusalemu tamalei mulo wolaatia lowali rasulu. Bo watia malonaó ode lipu lo Arabi, tulusi lonteeto luli lohualinga ode Damusiki. **18** Tolo taunu mola lapatio maó, watia lonaó ode Yerusalemu mola loótaawa wolei Petrus. Watia lotibiluloá wolio bo mopulaa limohui mola hiheolio. **19** Watia diila lodunggaya wolo mongo rasulu wewo, ngopohia tei Yakobus, wutato Eeya. **20** Wolo u tiluladei lowatia botie otutu. Otaawa lo Allahu Taáala deú watia diila lohimbulo. **21** Lapataó uito watia ode mamaa-lawaaloo to Siria wau Kilikia. **22** Dilumutu tosaaáti boito jajaa-maáalo Nasara to Yudea debo diipo huáa lotota olaatia. **23** Timongolio bo lodungohu tau hipoloiyawa, "Taa u muloololio mai helo ngalinaya olamiaatia, masaatia hemo pohabari opopalacaya u muloololio mai ohilaa pobinasalo." **24** Yi timongolio malomuji Allahu Taáala sababu watia.

**2:1** Mopulaa pato lotaunu mola lapatio maó, watia luli lohualinga mola ode Yerusalemu peé-peéenta wolei Barnabas, wau lodelo olei Titus olo. **2** Watia lonaó mola ode Yerusalemu sababu Allahu Taáala malo poilaalo mai olaatia deú watia musi monaó mola. Wau todelomo dudunggaya tuwau u tolomodu wolo mongo tauwa mola teto, watia helopoó papataó Habari Mopiohe upilo habari lowatia ode tau-tauwalo tadiila Yahudi. Sababu watia diila mohuto deú tolopani lowatia u muloololio mai, meaalo u masaatia, diila ohuna wambaio. **3** Tei Titus, talo tamania wolaatia, deúito-yito ngotaalio lo Yunani, bo tio diila pilakusa loduduá wuúdu lotuna, **4** eleponu woluo tau-tauwalo tahipo huntulawa suáli boito. Timongolio yito tau-tauwalo tahelo tiwantoá todelomo kaumunto wau lotihutu debo odelo wutato. Timongolio tilumuwota lou poó-poóoyo u motulete ololopato uwoluo to olanto sababu ito lotituwau woli Isa Almasi. Timongolio ohilaa mopo walingaó olanto ode delomo owowoluwoa u muloololio mai odelo wato, **5** bo amiaatia diila lotaaluku penu boli ngoidi maó toli mongolio, sababu amiaatia ohilaa modaha alihu Habari Mopiohe

boito debo mantali ode limongoli. **6** Bo boli odito, diaaluo susuu-aliyaalo bohu u pilohile laatia wolo moóohuu lonto tau-tauwalo tahe anggapuolio hulu-hulumati -- to olaatia diaaluo hiheedio wonu timongolio hulu-hulumati meaalo diila, sababu Allahu Taáala diila momilohe baya. **7** Boliio maó, tau-tauwalo tahe anggapuola hulu-hulumati boito lo tolongaku deú Allahu Taáala malongohi mai tuugasi olaatia u lopohabari Habari Mopiohe boito totaa diila Yahudi, tutuuwauwa debo odelo Tio malongohi tuugasi olei Petrus u lopohabari Habari Mopiohe boito to taulo Yahudi. **8** Sababu Allahu Taáala talopo mambo olei Petrus lowali rasulu taulo Yahudi, lopomambo mai olaatia olo lowali rasulu totaa diila Yahudi. **9** Tei Yakobus, tei Petrus wolei Yahya, taóontonga maó mowali mongo tauwa lojamaá, helo masisi deú Allahu Taáala malongohi mai olaatia tolomodu tuugasi botie. Yi timongolio malodaatia wolei Barnabas wau watia odelo tuoto lopolo sahabati. Tulusi timongolio wau amiaatia loákoloa maó deú amiaatia mamokalaja towolota lo babaa-ngusawalo tadiila Yahudi, wau timongolio towolota taulo Yahudi. **10** Tuwa-tuwaulo hihile limongolio yito alihu amiaatia mopoo tuotaó taa mosikini. Wau watia tumbaó sanangi helohutu suáli boito. **11** Tou tei Petrus lonaó mai ode Antiokhia, watia lotehengi olio wolo mopatato wau moilaalo tutu, sababu huhutuulio tilala. **12** Bohu-bohulio tio lotihuloá lolamela peé-peéenta wolo mongo wutato tadiila Yahudi. Bo tou mongo utolia lei Yakobus leidungga mai, tio lopo walaheó batangalio lonto mongo wutato tadiila Yahudi wau diilalo lohuto lolamela woli mongolio, sababu moohe totau-tauwalo taóhilaa alihu ngoáamila tau tunaalo. **13** Mongo wutato lo Yahudi wewo olo helo dudua osikapu munapiki debo odelo tei Petrus, tilinggula tei Barnabas olo iloángalio u opiili debo odelo timongolio. **14** Odito iloontonga maó lowatia deú timongolio diila opiili tutuuúde wolo obobanali lo Habari Mopiohe boito, watia malo loiya odelei Petrus totalu lotaa ngoáamila tawoluo teto, "Wonu Wutato odelo taulo Yahudi maa tilumumulo debo odelo taa diila Yahudi, yilongola Wutato botia ohilaa momakusa tau-tauwalo wewo tumumulo debo odelo taulo Yahudi?" **15** Memangi moduduá ilowali mai lamiaatia, amiaatia yito taulo Yahudi wau diila "taa diila Yahudi u odusa". **16** Eleponu odito otaawa lamiaatia deú tau muli

mopiiiohe wolo Allahu Taáala bo sababu palacaya li Isa Almasi, wau diila kalana moponaó butoó lo agama. Amiaatia lohihilao olo palacaya li Isa Almasi, alihu amiaatia mopiiiohe wolo Allahu Taáala motimbulude to iimani lamiaatia boito, diila kalana amiaatia moponaó butoó lo agama. Sababu wolo moponaó butoó lo agama, diaaluo penu boli ngota maó muli mopiiiohe wolo Allahu Taáala. **17** Amiaatia hemo tolopani muli mopiiiohe wolo Allahu Taáala moli tutumulo motituwau woli Almasi. Bo wonu lapatio maó mohutu u odito, mamopatato amiaatia donggo, "tau-tauwalo odusa", olo debo odelo tau-tauwalo diila Yahudi, wolo utie boliilio deú ti Almasilo taloó sababu olamiaatia odusa? Tantulo maó diila! **18** Wonu watia muli molumula mopotihulaó pola butoó lo agama umaa ilaantulu lowatia, yi watia mopobiloheó deú watia malowali tamoo-lambangawa tobutoó. **19** Bo watia mailate tobutoó lo agama -- pilopatelio lobutoó boito lohihilao -- alihu watia mowali tumumulo ode Allahu Taáala. Watia maa silalipulio peé-peéenta woli Almasi. **20** Botia diilalo watia tatumu-tumulo, boti Almasi tatumu-tumulo todelomo batanga lowatia lohihilao. Tutumulo botie u tomimbihu tutumulo laatia botia yito tutumula lo iimani ode Walaó Allahu Taáala talomonu mai olaatia wau tamalo pobake batanga-Lio ode laatia. **21** Watia diila lopoleme odehu hilaa lo Allahu Taáala. Wonu wumbuta lotau wolo Allahu Taáala mowali muli mopiohe sababu moponaó butoó lo agama, uito boliilio opopate li Almasi diila ohunalió!

**3:1** Mongo wutato tau-tauwalo Galatia! Timongoli otutu mohulodu! Diila otaawa wonu timongoli mailo tuhata heingo lotatoonu? Opopate li Almasi tosalipu matilo-mbangai laatia lopata-patatolo maó olimongoli! **2** Nte pooótaa mai olaatia suáli tuwau botie: Wolo timongoli malo lolimo Rohullah sababu loponaó butoó lo agama, meaalo sababu timongoli lodungohe Habari Mopiohe lonto Allahu Taáala wau palacaya li Almasi? **3** Yilongola odito hulodi mongoli? Timongoli malo lumulaó tutumulo bohu wolo Rohullah, diila pongalo aakali timongoli botia ohilaa mongaato owowoluwoa u wimu-wimumuto ngoáamilalo wolo lotolumu lohihilao? **4** Wolo diila ohuna wambaio ngoáamila umaa ilolaasawa limongoli boito? Diila pongalo aakali diila ohuna! **5** Allahu Taáala longohi mai Rohu-Lio

olimongoli wau lopowoluo totoonulalo moolingolabe towolota limongoli. Wolo Allahu Taáala lohutu mai uito sababu timongoli loponao butoo lo agama meaalo sababu timongoli lodungohe Habari Mopiohe boito wau palacaya li Almasi? **6** Uito tutuwauwa debo odelo u tulatulade todelomo Kitabi tomimbihu olei Abraham -- odie, "Tei Abraham palacaya to Allahu Taáala, wau sababu opo-palacayalio boito tio tilolimo lo Allahu Taáala odelo taa mopo sanangi hilaa lo Allahu Taáala." **7** Oditolio mamusi timongoli mongalati deu taa u otu-otutuulo maó wali lei Abraham yito taa u palacaya, to Allahu Taáala. **8** Kitabi maleimulo loonto deu Allahu Taáala mopoluasi tau-tauwalo diila Yahudi muli mopiohe wolo Allahu Taáala, wonu timongolio palacaya o-Lio. Habari Mopiohe boito piloótaa-Lio leimulo odelei Abraham todelomo danti botie, "Motimbuludei olemu, Allahu Taáala mamó balakati mai ngoáamila umati lomanusia todunia." **9** Tei Abraham palacaya, yi tio bilarakati-Lio. Odito olo ngoáamila taa palacaya mabalakatia-Lio peé-peénta wolei Abraham. **10** Tau-tauwalo tahemo tiwunela tobutoó lo agama, ngoáamilalo hitumula towalungo laánati. Sababu todelomo Kitabi tulatulade, "Taa diila tióotutua moponaó ngoáamila u hitulade todelomo Buku Butoó lo Agama, laánatia lo Allahu Taáala!" **11** Diaaluo penu boli ngotaa maó tamopiohe wolo Allahu Taáala makalana moponaó butoo lo Agama. Suáli boito mapilo patatio mai todelomo Kitabi, "Bo taa palacaya to Allahu Taáala tilinggula wumbutalio wolo Allahu Taáala muli mowali mopiohe, matumumulo!" **12** Bo butoo lo agama diila patopatoá to iimani. Todelomo Kitabi tulatulade deu tamoponaó butoo lo agama, matumumulo sababu butoo boito. **13** Boti Almasi lopo lopato mai olanto lonto laánati butoo lo agama. Tio lohutu uito lou lopoluli mai batanga-Lio laálaánati sababu ito. Sababu todelomo Kitabi tulatulade, "Malaá-laánatilo tailate ntilayango towolihi lo ayu." **14** Ti Almasi lohutu odito alihu balakati u pilodanti mai lo Allahu Taáala odelei Abraham wohi olo ode taa diila Yahudi. Lou odito ito olo tapalacaya to Allahu Taáala mowali mololimo Rohu upilo danti mai lo Allahu Taáala boito. **15** Mongo wutato! Lebe mopiohu watia momake obaaya monto he olaasawa ngohui-ngohui. Wonu taa mohutu tala tuwau danti wau danti boito masilaaha, yi diaaluo penu boli ngotaa maó tadiila

mopomata daantia boito, meaalo moduhenga penu boli tuwau maó. **16** Dadaa-ntiyaalo Allahu Taáala pilohutu lo Allahu Taáala odelei Abraham wau ode wali mai lei Abraham. Todelomo Kitabi diila tulatulade "wau ode tau-tauwala wali mai lei Abraham", u boliilio maó dadaata tau. U tulatulade teto yito "wau ode tau walimu mola", u bolilio maó bo ngota wambaó, deúito-yito ti Almasi. **17** U ohilaa toóowali mai lowatia teea yito utie: danti lo Allahu Taáala mapilohutu wau silaaha mai leimulo. Butoó lo agama uilohi mai wopato hetuto tolo pulu lotaunu lapatio maó diila moólomelo saahelio wau moluluto danti lo Allahu Taáala boito. **18** Sababu wonu wowohi lo Allahu Taáala bo wunewunela tobutoó lo agama, yi uito diilalo wowohi upilo danti mai. Tumbaó sababu Allahu Taáala malodanti mai tolei Abraham, yi Allahu Taáala longohi mai uito to olio. **19** Wonu odito, pongola butoó lo agama yilohi mai? Totametio yito deú butoó boito pilo duhengo u mopoilaalo totala lomanusia. Butoó lo agama boito pohupohutu bo dilumutu podunggalio mai lo ngotaalio wali mola lei Abraham, tailunte todelomo danti lo Allahu Taáala tolei Abraham. Butoó lo agama boito pilopo tunggulai lo mamaa-laikatiyalo lotimbulude tomanusia ngota. **20** Naa, musi woluo mohu-mohuwalia, bolo palalu ngotaalio potimbuludelo. Bo Allahu Taáala diila momaralu potimbuludelo, sababu Tio lohihilao tamohutu maó. **21** Wolo uito boliilio deú butoó lo agama bubuu-lemenga wolo danti lo Allahu Taáala? Tantulo maó diila! Sababu wonu butoó lo agama yilohi u mongohi tutumulo to manusia, yi manusia mowali mopiiohe wolo Allahu Taáala motimbulude tobutoó lo agama. **22** Bo todelomo Kitabi tulatulade deú ngoáamila umati lomanusia to walungo kawasa lodusa. Sababu uito, wowohi u dilanti patopatoá topalacaya li Isa Almasi yilohi toli mongolio tapalacaya. **23** Tou diipo meidungga wakutuulio u palacaya li Almasi, ito dilaha modetoó lobutoó agama; ito debo odelo ilulungio dilumutu iimani boito poilaalolo. **24** Loui odito, butoó lo agama mowali odelo pongimato olanto dilumutu ti Almasi meidungga u mohutu olanto muli mopiiohe wolo Allahu Taáala sababu ito palacaya li Almasi. **25** Masaatia, sababu mawakutuulio manusia moó palacaya li Almasi, yi ito diilalo ilimatoa butoó lo agama. **26** Sababu timongoli palacaya li Isa Almasi, yi timongoli lotituwau wo-Lio; wau

masababu uito timongoli mowali mongo walaó Allahu Taáala. **27** Timongoli ngoáamilalo mapilo lihulio to tangguli Almasi, oditolio timongoli malo lolimo tobatanga limongoli pipii-iliyaalo li Almasi lohihilao. **28** Todelomo suáli botie diilalo pilopo woluo polohiheede towolota taulo Yahudi wau taa diila Yahudi, towolota lowato wau taa lolopato, towolota talolai wau taabua. Wutato ngoáamilalo tuwau sababu ti Isa Almasi. **29** Wonu timongoli miliki li Almasi, yi timongoli yito wali lei Abraham. Wau timongoli mamololimo wolo upilo danti mai lo Allahu Taáala.

**4:1** Bo palalu pintalo mai lowatia: notilonggadu ngotaalio lo ahali warisi donggo to walungo lo umulu, woluo taa u mongimato olio wau mongulusi totoonulalo polohuna daá olio dilumutu tio moóoma umulu utilantu liyamolio. Tio pohutulio tutuuwauwa debo odelo wato ngota, eleponu tutuulio tutu tio taa ohuúwo louí ngoáamilalo halata boito. **3** Oditio olo wolanto; ngotilonggadu ito diipo leidaá, ito pohutulio wato lo roroo-huwaalo motolo kawasa todunia botie. **4** Bo tosaaátilio utuhata, Allahu Taáala molao mai Wala-Io ode dunia. Wala-Io boito potutulio mai lotaabua ngota wau tumumula to walungo okokawasa butoó lo agama. **5** Louí oditio Tio mopo lopato tau-tauwalo tahitumula to walungo lo okokawasa butoó lo agama; alihu ito olo mowali mongo walaó Allahu Taáala. **6** Sababu timongoli yito mongo walaó Allahu Taáala, Allahu Taáala lopoáhu mai Rohu lo Wala-Io tilumuwoto ode delomo hilaa lo Wutato wau hilaa lowatia, deuító-yito Rohu u mongibode, "Paapa, oo Paapau." **7** Oditolio, timongoli diilalo wato, bo walaó. Wau sababu timongoli walaó Allahu Taáala, yi Allahu Taáala mamongohi mai olimongoli totoonulalo u hituatuawua upilo dapato-Lio ode mongo wala-Io. **8** Muloololio mai timongoli diila motota lo Allahu Taáala, uito sababuulio timongoli lowali wato lo kakaa-wasaalo u ilanggapu odelo ila bo otutuulio maó diila Allahu Taáala sama-samaata. **9** Bo botia timongoli motota lo Allahu Taáala, meaalo lebe tuhata maó, Allahu Taáala motota olimongoli. Naa, yilongola timongoli mohuto muli mohualinga ode roroo-huwaala lodunia botie, u molulupuhu wau mosikini? Yilongola timongoli mohuto muli pohutulio wato lo roroo-



huwaalo boito? **10** Timongoli hemo polame duduu-laheyaalo tantutantu huhuu-lalowaalo u tantutantu, tataa-wunuwaalo u tantutantu. **11** Watia molawalo, diila bolo tolopani wolo kalaja tiopatea lowatia olimongoli diila ohunatio wambaó. **12** Mongo wutato! watia mohalapu lou tiotutua alihu timongoli mowali debo odelo watia. Sababu watia olo malowali debo odelo timongoli. Timongoli diila helohutu penu boli tuwau maó utilala olaatia. **13** Tantu donggo oéela mola limongoli wolo uloo sababu tou bohulio mai watia helo pohabari Habari Mopiohe boito olimongoli. Sababuulio yito kalana watia ilodungga longongoto. **14** Tou boito timongoli diila molaasa molonuo olaatia, eleponu owowoluwoa batanga lowatia debo odelo yimontala uleidaa olimongoli. Timongoli tumbaó lololimo olaatia debo odelo malaikati lo Allahu Taála meaalo debo odelo lololimo li Isa Almasi lohihilao. **15** Timongoli sanangi tutu tou boito. Bo botia, toutoonu osanangi tutu boito? Otaawa lowatia deu tou boito timongoli iloheela lohilao moluohe mato limongoli lohihilao u wohi limongoli olaatia, wonu uito mowali pohutuwo. **16** Wolo timongoli botia malo nganggapu olaatia debo odelo musu, sababu watia helo poilaalo mai u otutu olimongoli? **17** Tau-tauwala wewo boito wolo lealeaatu lo sumangati hemo lolohe olimongoli, bo mamaa-kusuduwalu limongolio boito diila mopiohe. Timongolio bo motohilaa mopowalahu wumbuta limongoli wolamiaatia, alihu timongoli moduduá olimongolio wolo sumangati ulealeaatu. **18** Memangi mopiohe u osumangati todelomo susuu-aliyaalo umopiohe, asali laito odito wau diila bo wonu watia woluo peé-peéenta woli mongoli. **19** Mongo walauuu taa otolianguu! Watia masaatia botie luli lodutolo sababu timongoli. Watia helo dutolo debo odelo tiilo ngota lodutolo tou mamu potutu mai. Watia mamu dutolo tulusi wonu piili li Almasi diipo meilodungo tobatanga limongoli! **20** Watia moololo daa woluo tohungi mongoli masaatia, alihu watia mowali mobisala toli mongoli wolo suala uwewo, sababu madiilalo otaawa lowatia wolo umuli pohutuo lowatia, woli mongoli! **21** Mongo wutato tamo tohilaa tumumulo to walungo okokawasa bubuu-toowaalo agama, ntali dungohi mai watia! Mapootaa mai lowatia olimongoli wolo ututuulio-tutu u tulatulade todelomo Kitabi Butoée Musa. **22** Teto

tulatulade deú tei Abraham owalaó duulota: Tiilo lowalaó tangota yito ngotaalio lowato, wau tiilo lowalaó wewolio boito yito tangota bebasi. **23** Walaó lo taabua talowali wato pilotutu biasa sababu loduduá u otohilaa lomanusia. Bo walaó lo taabua lolopato, pilotutu sababu pilodanti mai lo Allahu Taáala. **24** Utie mowali pomake odelo bayalo. Mongobua duulota boito yito debo odelo dulo daantia: u tuwaulio asaliilio lonto Huidee Sinai ui-uitolo ti Hagar; mongo walaio pilotutu mai odelo wato. **25** Oditolio ti Hagar boitolo Huidee Sinai, tolipu lo Arabi. Tio mopo bayahei kota lo Yerusalemu wolo ngoáamila tuango lipu u masaatia botie malowali wato. **26** Bo Yerusalemu u tosologa boito yito Yerusalemu ubebasi, wau tiolo tiilanto. **27** Sababu todelomo Kitabi tulatulade, "Potiwengahulo yio wuu taabua hunusa, tadiila peéenta maó lopotutu mai! Potiwengahulo wau potingala-ngalaóolo mola wolo meengahu wuu yio tadiila peéenta maó loólaasa ngongotio lou motutu! Sababu taabua tatilolaa maó lodilelio mamootapu walaó lebe dadaata wolo taabua tatumu-tumuulo wolo dilelio." **28** Mongo wutato! Timongoli lohihilao yito mongo walaó Allahu Taáala tapilotutu sababu danti lo Allahu Taáala; timongoli tutuuwauwa debo odelo tei Isihaka. **29** Tou boito walaó tapilotutu loduduá u otohilaa lomanusia, longalinaya walaó tapilotutu mai sababu loduduá u otohilaa lo Rohullah. Odito olo botia. **30** Bo wolo u tulatulade todelomo Kitabi? Teto tulatulade odie: "Popolahia maó wato taabua boito peé-peéenta wolo walaio, sababu walaó lowato taabua boito diila tamowali ahali warisi peé-peéenta wolo walaó lotaabua bebasi boito." **31** Oditolio, mongo wutato, ito botie diila mongo walaó lowato taabua ngota boito, ito yito mongo walaó lotaabua bebasi.

**5:1** Ito botia lolopato, sababu ti Almasi malo polopato mai olanto! Sababu uito polo bintengiyalo ololopato limongoli, diila maó potohilaa muli pohutuolio wato. **2** Eelai maó, wonu timongoli meituuna, uito boliilio ti Almasi diila ohunatio olimongoli. Talo loiya mai utie yito watia lohihilao, Paulus. **3** Peéentapo watia mopoéelai Totaa u meituuna, deú tio wajibu moponaó ngoáamila butoo lo agama! **4** Wonu timongoli motolopani mopiiohe wolo Allahu Taáala motimbulude tobutoó lo agama, uito boliilio

wumbuta limongoli woli Almasi malobunto. Lou odito timongoli tumutumulo to bulemengo odehu hilaa lo Allahu Taála. **5** Bo olamiaatia, amiaatia motiwunela deu wolo polo tulungi lo Rohullah wau patopatoá topalacaya lamiaatia li Almasi, Allahu Taála lopoluasi mai olamiaatia lopiiohe wo-Lio. **6** Sababu wonu ito malo tituwau woli Isa Almasi, suáli moduduá mealo diila moduduá wuúdu lotuuna diilalo mowali suáli. U polohuna daá bo palacaya wambaó li Almasi, wau uito oontonga todelomo toliángonto ode taawewo. **7** Mulooolio mai timongoli helo hipate lou mopiohe! Botia yilongola timongoli diilalo modungohe tou otohilaa lo Allahu Taála? Tatoonu tamalomiyo olimongoli? **8** Tantu talohutu uito diila Allahu Taála tamalo tianga olimongoli! **9** "Ragi ungoidi mamoo matango ngoáamila labu popoólo," loiya lotau. **10** Eleponu odito watia donggo palacaya deu timongoli diila tamoduduá huhama wewo, sababu ito malo tituwau woli Almasi. Wau watia yakini deu penu boli tatoonu tamopo ambulati pikiilangi limongoli, mahukuu-manio lo Allahu Taála. **11** Tomimbihu olaatia, Mongo wutato, yilongola watia tulusi wambaio milusulio wonu watia donggo hemo pohabari deu wuúdu lotuuna boito palalu? Wonu watia memangi helo pohabari odito, yi upilo pohabari laatia tomimbihu salipu li Almasi diila mopotoodei suáli. **12** Lebe mopioheó tau-tauwalo tamopo ambulati pikiilangi limongoli boito huáa lumualo wambaio peéntalo monto jamaá! **13** Wutato matilia-Ngio u lowali talo lopato. Bo diila maó pomakea ololopato limongoli boito u mololaalaita mohutu wolo wambaio u otohilaa pohutuo limongoli. Boliio maó, timongoli musi mototooliánga wau momamaayawa. **14** Ngoáamila butoo lo agama malei tuwoto todelomo palenta u tuwau botie, "Mamusi yio motoliángo timongotamu manusia debo odelo yio motoliángo batangamu lohihilao." **15** Bo wonu timongoli tinggai aawuta, poódahai, de timongoli peé-peénta moántulu. **16** Makusudu lowatia odie: Huliilo maó Rohu modelo olimongoli wau diila maó potitumulo moduduá u otohilaa piili lomanusia. **17** Sababu u otohilaa lomanusia bubuu-lemenga lou otohilaa lo Rohullah, wau u otohilaa lo Rohullah bubuu-lemenga lou otohilaa lomanusia. Duduuluwolo tinggai bubuu-lemenga, tilinggula timongoli diila moóhutu wolo u otohilaa limongoli. **18** Bo wonu Rohullah modelo

olimongoli, yi timongoli diila kiluwaso lobutoo agama. **19** U otohila watade lomanusia oontonga todelomo huhuu-lotowaalo, kootolo, wau diila paatuti; **20** todelomo polubowa balaahala wau ilimi mongisimu; todelomo mumuusua, molohulua, mohiihia, ngointa moingo, wau polohuna daa batanga lohihilao; owowoluwoa hipoo-pooowa wau hemo tiwa-tiwambaoo, **21** wau hilaa mongiri, hemo tihu-tihuwoo, hemo poti-potihungua wau wewolio maoo. Ode ngoaamilalo boito poeela mai lowatia botia debo odelo u piloeeela laatia olimongoli omooomolu olo, deu tau-tauwalo tamohutu susuu-aliyaalo debo odelo uito diila tamowali pongawaai umati lo Allahu Taala. **22** Boliio maoo, wonu tau-tauwalo dilelo lo Rohullah, tilapulio yito: Timongolio mototoo-lianga, timongolio meengahe, timongolio oduoota lohila, timongolio sabali wau obudi, timongolio mopiohe ode taa wewo, timongolio tatapu wau molotolo hilao, **23** timongolio dupadupapa lohila, wau laito mambo motolo kawasa batanga. Diaaluo butoo lo agama u modini susuu-aliyaalo debo odelo uito. **24** Tau-tauwalo tamalowali miliki li Isa Almasi, tau-tauwala boito malo popate piili lo manusialio wolo totoonulalo napusu wau u otohilaalio. **25** Rohullah malongohi mai olanto tutumulo u bohu; masababu uito Tiolo olo tamusi motolo kawasa mai tutumulonto. **26** Ito diila mowali batingga, wau mopo papaalata tohilao, wau ohila mohiihia ngota timongota.

**6:1** Mongo wutato! Wonu hingota-ngotaawa odungga hemohutu dusa, mamusi timongoli tatumu-tumulo hidudua to Rohullah, modelo tau boito mohualingaoo ode dalalo u otutu. Bo timongoli mohutu uito wolo hilaa molumboyoto, wau dahai maoo diila bolo timongoli lohihilao olo oheingalio. **2** Mamusi mobabaantua momanta banta lotau, alihu loui odito timongoli modungohe palenta li Almasi. **3** Wonu hingota-ngotaawa molantobe batangalio polohuna daa lebe-lebe pomaoo diila, yi tau boito mohimbulo batangalio lohihilao. **4** Timiidu tau musi momalakisao lohihilao wolo watadelio boito mopiohe meaalo diila. Wonu mopiohe, tio mowali molaasa meengahe tosuai boito. Bo diila mowali tio mopo bandingi maoo loui wolo u pilohutu lotaa wewo. **5** Sababu ngota-ngota musi momanta titihulalio lohihilao. **6** Taa u mololimo pongaajali li Almasi,

wajibulio molayade wolo gurulio ngoáamila u mopiohe uwoluo to olio. **7** Diila bolo o aakalialio. Allahu Taáala diila mowali poitohu! Wolo u pomulo, ui-uitolo u tipuwolo. **8** Wonu tau mopomulo moduduá piili lo manusialio, tio mamongotolo opopate monto piiliilio boito. Bo wonu tio mopomulo moduduá tilauwa lo Rohullah, tio mamongotolo tutumulo tutu wau ohiheo-hiheolo maó monto Rohullah. **9** Sababu uito, ito diila maó potolu mohutu susuu-aliyaalo u mopiohe; sababu wonu ito diila mohuheli mohutu susuu-aliyaalo boito peéenta mai ito mamongo ngotolo tilapulio. **10** Oditolio, ngotilonggadu ito ohiyangio, mamusi ito mohutu u mopiohe ode ngoáamila tau, laba-labaalo mopiohu ode mongo wutatonto tangoiimani. **11** Poótuota maó tióotutua suáli botie u tiluladei lowatia lohihilao wolo hurupu u duduulaa. **12** Tau-tauwalo taóhilaa mopolebe lobatanga wolo susuu-aliyaalo ulahiri, timongoliolo tahipo tolopania momakusa olimongoli moduduá wuúdu lotuuna. Bo timongolio mohutu uito bo alihu timongolio diila alinaya taulo Yahudi masababu salipu li Almasi. **13** Tau-tauwalo tahemo duduó wuúdu lotuuna olo diila helo ponaó wuúdu lo agama. Bo otohilaa limongolio timongoli tuunaalo, alihu timongolio mowali mopomangga deu timongoli helo duduá wuúdu boito. **14** Watia sama-samaata diila mohuto mopomangga penu boli wolo wambaio, ngopohia Eeyanto Isa Almasi tamailate tosalipu. Sababu tumbaó karana Tio mailate tosalipu, yi dunia diilalo oboliilio wolo-wolo olaatia. Wau duólo dunia botie, watia olo debo odelo tamailate. **15** Tiluuna meaalo diila tiluuna, uito diila polohuna daá. U polohuna daá yito mowali manusia bohu. **16** Duólo tau-tauwalo tahitumula wolo huhaama boito, wau odito olo duólo ngoáamila umati lo Allahu Taáala, watia motiwunela ode Allahu Taáala tamaa mongohi mai salaamati wau odehu hilaa-Lio. **17** Wumbutio mola, penu boli ngotaa maó diilalo poósuusawa watia, sababu tobatanga lowatia woluo bubuu-kutiyaalo deu watia muri li Isa. **18** Pohileaala dua Eeyanto Isa Almasi laito mobalakati mai Mongo wutato. Amin. Hulumati lamiaatia, Paulus

**1:1** Umati lo Allahu Taáala to Epesus, taa tatapu wau molotolo hilao toli Isa Almasi! **2** Watia, Paulus, rasulu li Isa Almasi to kahandaki lo Allahu

Taaala, motiwunela hinta Allahu Taaala ti Paapanto wau Eeya Isa Almasi mongohi mai balakati wau salaamati olimongoli. **3** Ilopujialo mola Allahu Taaala, ti Paapa Eeyanto Isa Almasi! Tio labalakati mai olanto wolo totoonulalo balakati rohu todelomo sologa, sababu ito lotituwau woli Almasi. **4** Tou diipo dunia botie pilowali-Lio mai, Allahu Taaala malo lulaota olanto lotimbulude li Almasi wolo makusudu alihu ito mowali tolomodu miliki-Lio tadiila oaibu totalu-Lio. Sababu ponu lo Allahu Taaala, **5** yi Tio malolantu leimulo deu lotimbulude li Isa Almasi, Tio mamomuduó olanto mowali mongo wala-Io lohihilao. Wau memangi ui-uitolo u otohila pohutuo-Lio. **6** Ilopujialo mola Allahu Taaala tamolaio, sababu lotimbulude to Wala-Io tapilonu-Lio Tio lomonu tutu olanto. **7** Sababu, lo opopate li Almasi, ito yilopatio lo Allahu Taaala, bolilio maó Tio malo ngambungu olanto lonto duduu-saanto. **8** Tio lohutu mai uito sababu laba-labaalo ponu-Lio olanto, wau ponu boito bilanguwa-Tio mai olanto wolo otinepo lealeaatulo maó wau huhaama mopio. **9** Loduduá otohila-Lio lohihilao, Allahu Taaala lopoótaa mai olanto hitua-tuawua u milakusudu hetuuó lanjana-Lio; Tio malolantu deu lanjana-Lio boito mapoo lapato-Lio motimbulude li Almasi. **10** Lanjana boito yito alihu totoonulalo u hitua-tuawua, mopio u tosologa meaalo u todunia, mowali tuwau woli Almasi odelo tauwa. Wau suali boito mapoo lapato lo Allahu Taaala wonu malei dungga wakutuulio. **11** Allahu Taaala helo kalaja mai totoonulalo u hitua-tuawua loduduá otohila-Lio, wau putuusani-Lio lohihilao. Tumulalo mai bohulio Tio malo lulaota olanto sababu Tio motohila alihu ito mowali umati-Lio sababu motituwau woli Almasi. **12** Huliilo maó ito, tabohu-bohulio motiwunela toli Almasi, momuji mola Allahu Taaala sababu ololai-Io! **13** Timongoli olo malowali umati lo Allahu Taaala tou timongoli lodungoheo tahuli lo Allahu Taaala, deuito-yito Habari Mopiohe umoóaahu olimongoli. Timongoli palacaya li Isa Almasi, sababu uito Allahu Taaala longohi mai tuoto miliki-Lio toli mongoli, deuito-yito Rohu-Lio upilo danti-Lio mai. **14** Rohu boi-boitolo u pongaku deu ito mamololimo wolo u mapilo danti mai lo Allahu Taaala to umati-Lio. Utie moó yakini olanto deu Allahu Taaala mamopo lopato umati-Lio. Ilopujialo mola Allahu Taaala sababu ololai-Io! **15** Sababu uito,



anggađu watia loóđungohe deü timongoli palacaya li Isa Eeya, wau timongoli motoliango ngoáamila umati lo Allahu Taáala, **16** watia diila obunto-buntolio helo sukuru mola ode Allahu Taáala tomimbihu olimongoli. Laito watia hemo langgulo tangguli mongoli tou watia modua. **17** Watia lomolohone mola alihu Allahu Taáala Eeyanto Isa Almasi, ti Paapa tamolaió, mongohi Rohu-Lio olimongoli. Rohu boito mamopowali olimongoli molinepo, wau mamopo ilaalo mai Allahu Taáala olimongoli tilinggula timongoli mototaa-Lio. **18** Watia lomolohone mola alihu Allahu Taáala momuó pikiilangi limongoli tilinggula mowali mobango; alihu timongoli mongalati wolo u mowali halapuo limongoli monto Allahu Taáala tamotianga olimongoli. Olo alihu otaawa maó limongoli donggo boli daatalio babaa-lakatiyalo u mopiohe upilo dapato Allahu Taáala ode umati-Lio; **19** wau donggo boli polutuio Allahu Taáala helo kalaja wolo polupolu kawasa todelomo olanto tapalacaya. Kawasa lo Allahu Taáala boito tutuuwauwa debo odelo kawasa upolu-polutuó, **20** u pilomake-Lio tou luli lopo tumulai li Almasi lonto opopate wau longohi o-Lio huhuloáa lebe lolaió daá peé-peéenta wolo Allahu Taáala tosologa. **21** Huhuloáa li Almasi boito lebe lolaiá daá wolo huhuloáa lou ngoáamila pomalenta, ngoáamila takawasa, ngoáamila tauwa, ngoáamila mongo tuani wau boli tatoonu tamai lohia-Lio huhuloáa u lailaiá; mopio tatumu-tumulo tojamani botie meaalo tatumu-tumulo tojamani umamei dungga mai, **22** Allahu Taáala lopo taaluku maó ngoáamilalo to walungo okokawasa li Almasi, wau lohudu li Almasi ode jamaá odelo tauwa lo totoonulalo u hitua-tuawua. **23** Jamaá yito batanga li Almasi, ngoáamilalo pilo wimumuto lo Allahu Taáala ngoáamilalo tamopo wimumuto totoonulalo u hitua-tuawua penu boli toutoonu olo.

**2:1** Muloololio mai timongoli yilate odelo dudelo lorohu sababu timongoli odusa wau lolambanga papaa-lentawalo Allahu Taáala. **2** Tou boito timongoli loduduá wuwuu-uduwaalo dunia botie; boliilio maó timongoli lodungohe takawa-kawasa tobangio daá, deüito-yito rohu u botia motolo kawasa hilaa lotau-tauwalo tadiila modungohe to Allahu Taáala. **3** Muloololio mai ito ngoáamila tutuuwauwa olo woli mongolio; ito

tumutumulo loduduá piili lo manusiaanto wau helohutu wolo uloo sanangi batanga wau pikiilanginto. Tou boito ito yito tahe ilotuhata muluka lo Allahu Taáala olo, tutuuwauwa debo odelo tau-tauwalo wewo. **4** Bo donggo boli udaáalio omuura hilaa lo Allahu Taáala! Tio odito momonu mai olanto, **5** tilinggula tou ito donggo hipatea delo dudelo lorohu sababu totoonulalo totalanto, Tio luli lopotumulai olanto peé-peéenta woli Almasi. Oditolio, bo sababu opopiohu hilaa lo Allahu Taáala wambaio, timongoli piloáahu-Lio. **6** Sababu ito lotituwau woli Isa Almasi, Allahu Taáala muli mopo-tumulai olanto peé-peéenta wo-Lio, alihu ito momalenta olo peé-peéenta wo-Lio todelomo sologa. **7** Allahu Taáala mohutu uito alihu tojamani u mamei dungga, manusia mowali moóonto donggo boli udaáalio ponu lo Allahu Taáala. Ponu boito pilo ilaalo lo Allahu Taáala loli opopiohu hilaa-Lio olanto lotimbulude li Isa Almasi. **8** Allahu Taáala momonu olimongoli, uito sababuulio Tio mopoáahu olimongoli sababu timongoli palacaya li Isa. Oáahu limongoli boito diila tilapulo tolopani limongoli lohihilao. Uito yito wowohi lo Allahu Taáala. Oditolio, diaaluo penu boli ngota maó tamowali moti sombongi lo batangalio tomimbihu suáli boito. **10** Ito yito pilowali lo Allahu Taáala, wau lotimbulude li Isa Almasi, Allahu Taáala lopoópiohu mai olanto alihu ito mohutu maó susuu-aliyaalo u mopiohe umaa pilohetu-Lio olanto. **11** Mongo wutato tadiila taulo Yahudi! Eelai mola owowoluwoa limongoli tou muloololio mai: Timongoli iluntelio "taa diila otuuna", lo taulo Yahudi talongaku batangalio matiluuna (makusudulio tamaa loótapu maó tuoto upilohutu lomanusia tobatanga limongolio). **12** Tou boito timongoli diila lotituwau woli Almasi, timongoli yito tau deli tadiila leituwoto umati tilulaoto Allahu Taáala. Timongoli diila leituwoto tobuuhuta lo daantia upilohutu lo Allahu Taáala wolo umati-Lio. Timongoli tumutumulo todelomo dunia botie lou dia halapani wau lou dia Allahu Taáala. **13** Bo botia, sababu timongoli malo tituwau woli Isa Almasi, timongoli tou muloololio mai walawalahu, mapilopo dudulo lo opopate li Almasi. **14** Sababu ti Almasi lohihilao yito talo podame olanto. Tio helo potuwau tau-tauwalo Yahudi wau tau-tauwalo diila Yahudi lowali bangusa tuwau. Dingingo uloo walahe towolota limongolio, deuuto-yito polomuusua, maa ilantulu li Almasi lou

lopo bake batanga-Lio lohihilao. **15** Butoó agama lo Yahudi wolo papaa-lentawalo wau wuwuu-udulio mailuluto li Almasi alihu dulo bangusa boito mowali ngobangusa manusia bohu, talo tituwau wo-Lio. Wolo pohuli boitolo ti Almasi lopowoluo mai polodame. **16** Wolo opopate-Lio tosalipu, ti Almasi lopotuwau dulo bangusa boito, wau lopodame olimongolio wolo Allahu Taáala, tilinggula yiloolilo polomuusua boito. **17** Uito sababuulio ti Almasi dungga-dungga mai u lopohabari Habari Mopiohe pasali lo polodame boito olimongoli; mopio toli mongoli tadiila taulo Yahudi tamuloololio mai wala-walahe monto Allahu Taáala, meaalo taulo Yahudi tamodudulo to Allahu Taáala. **18** Wolo lotimbulude li Almasi, ito ngoáamila -- mopio taulo Yahudi meaalo tadiila Yahudi -- wolo Rohullah u tuwau mowali modudulo odeli Paapa. **19** Sababu uito, timongoli diilalo leituwoto tau deli meaalo taulo bulemengio. Timongoli botia yito peé-peéenta waito umati lo Allahu Taáala. Timongoli yito popoo-ngawaaalo ngaalaa lo Allahu Taáala. **20** Timongoli olo bilongulio toitaato wumbato u pilodutu lomongo rasulu wau mongo nabi woli Isa Almasi odelo botu ulaba-labaalo mopiohu. **21** Tiolo tamopo woludu ngoáamila hudungu boito mowali Bele lo Allahu Taáala u tolomodu duólo Eeya. **22** Sababu tumutumulo motituwau woli Almasi, timongoli olo donggo hebongulolo peé-peéenta wolo tau-tauwalo wewo mowali bele ngowale duólo Allahu Taáala; teto Allahu Taáala motibiluloá wolo Rohu-Lio.

**3:1** Uito sababuulio watia, Paulus, tilutupalio sababu ti Isa Almasi ode polohuna daá limongoli tadiila taulo Yahudi. **2** Tantu timongoli maloó dungohe deú Allahu Taáala, sababu opopiohu hilaa-Lio, malongohi mai olaatia tuugasi botie domi polohuna daá limongoli. **3** Allahu Taáala lomuo hitua-tuawua u milakusudu hetuuólo lanjana-Lio wau piloótaa-Lio mai olaatia. (Tomimbihu suáli botie matiluladei lowatia toitaato wolo limbu-limbuó, **4** wau wonu timongoli mopobaca maó, timongoli mamongalati hitua-tuawua u milakusudu hetuuólo tomimbihu li Almasi debo odelo watia longalati maó). **5** Muloololio mai hitua-tuawua u milakusudu hetuuólo boito diila peéenta maó piloótaa tomanusia, bo botia Rohullah

malopo ilaalo mai tomongo rasulu wau mongo nabi-Lio. **6** Hitua-tuawua u milakusudu hetuuólo boito yito utie: motimbulude to Habari Mopiohe boito, tadiila taulo Yahudi moduduá moólaasa totoonulalo balakati lo Allahu Taáala u muloololio mai pilohetu bo ode taulo Yahudi. Tau-tauwalo diila taulo Yahudi malowali pongawaá lobatanga u tutuuwauwa, wau loduduá lololimo wolo upilo danti mai lo Allahu Taáala lotimbulude li Isa Almasi. **7** Allahu Taáala longohi mai olaatia ponu -- deúito-yito tuugasi -- u mopololadu Habari Mopiohe boito. Tilolimo lowatia ponu boito lotimbulude tokawasa lo Allahu Taáala u kalakalaja todelomo batanga lowatia. **8** Towolota lou ngoáamila umati lo Allahu Taáala, wawaatiyalo talaba-labaalo hina. Bo penu odito Allahu Taáala longohi mai olaatia ponu botie: tuugasi u mopohabari totau-tauwalo tadiila taulo Yahudi Habari Mopiohe tomimbihu okokaya li Almasi udiila opulitio; **9** wau olo alihu motimbuludei olaatia ngoáamila tau motota maó woloolo mola Allahu Taáala, Talopowali ngoilanggubu aalamu botie, moponaó lanjana-Lio u anggadu muloololio mai daá hitua-tuawua u milakusudu hetuuólo duólo dunia. **10** Makusudu lo Allahu Taáala yito alihu botia, motimbuludei tojamaá, ngoáamila tahidihima kawasa todulente motota otinepo Allahu Taáala todelomo tilolahepe modeliilio. **11** Allahu Taáala lohutu mai uito lotuuúde wolo lanjana-Lio u ohiheo-hiheolo maó, upilo ponaó-Lio lotimbulude li Isa Almasi Eeyanto. **12** Lou palacaya li Almasi wau sababu lotituwau wo-Lio ito loótapu ololopato u motahude Allahu Taáala wolo opopalacaya lealeaatulo maó. **13** Sababu uito, hihile lowatia yito: diila maó polawalo tomimbihu wolo u dilutola lowatia sababu timongoli, sababu ngoáamilalo boito yito duólo opopiohu limongoli. **14** Masababu uitolo watia loti bonggohuu mola totalu li Paapa. **15** Monto o-Lioolo timiidu ngaalaá tosologa wau todunia mololimo tolomodu piilii-Lio. **16** Watia modua mola bolo potala Allahu Taáala talaba-labaalo lailaió motuhatawa u mopoó lotolo hilaa limongoli wolo Rohu-Lio. **17** Pohileaalo dua sababu timongoli palacaya li Almasi, ti Almasi motibiluloá todelomo hilaa limongoli, wau tutumuli mongoli pilopo daasali wau kiluwasa lo toliángo. **18** Watia mohile dua bolo potala peé-peéenta wolo ngoáamila umati lo Allahu Taáala, timongoli moó toneaa deú donggo boli luasilio

wau hayaio wau langgatio wau delomio ponu li Almasi, u wolo aakali lomanusia diila opahamua modelo-delomolo maó. **19** Pohileaala dua timongoli motota ponu li Almasi boito, tilinggula timongoli mopolu lopiili lo Allahu Taáala u ngoáamilalo wimu-wimumuto. **20** Wolo kawasa lo Allahu Taáala u moólohe mokalaja todelomo batanganto, Allahu Taáala mowali mohutu mai lebe dadaata daá lou wolo umowali pohilento mola meaalo pikiiliyolo. **21** Wajibulio Allahu Taáala polaióolo wawaalia mola todelomo jamaá, motimbulude li Isa Almasi. Ilopujialo mola Allahu Taáala ohiheo-hiheolo maó! Amin.

**4:1** Uito sababuulio watia -- tau ngota lotutupa, tau tataahangi sababu hemomaya to Eeya -- mohile lou tióotutua olimongoli: poti tumulolo motuuide wolo huhuloáa limongoli debo odelo taamaa tiliyango Allahu Taáala. **2** Mamusi timongoli laito motidupapa lohilao, molumboyoto, wau sabali. Pobilohe maó toliangi mongoli lou momantu ngota timongota. **3** Potolo panilo tióotutua tumumula wolo dame alihu otuuwau u pilowali mai lo Rohullah debo taataalo. **4** Bo woluo batanga tuwau, wau Rohu tuwau. Odito olo timongoli tiliyango duólo tuwau halapani u tutuuwauwa. **5** Bo woluo tuwau Eeya, tuwau iimani, tuwau popolihua, **6** wau tuwau Allahu Taáala, talowali ti Paapa lotaa ngoáamila. Tiolo Eeya ngoilanggubu aalamu, tahelo kalaja lotimbulude tou ngoáamilalo, wau okawasa todelomo ngoáamilalo. **7** Ito ngota-ngota lololimo tuwaulio lo wowohi loduduá wolo uilohi mai li Almasi. **8** To delomo Kitabi tulatulade, "Tou Tio mobotula mola ode tambati u molanggato daá, Tio modelo dadaata tawalo; wau Tio mongohi totoonulalo wowohi tomanusia." **9** Naa, wonu loiloiya "Tio lobotulo" boliilio maó tou bohu-bohulio Tio malo tuhutai demola tambati u wopa-wopaalo maó todunia botie. **10** Wau Tio tamalo tuhutai boito, Tiolo olo talo botula demola tambati ulebe molanggato daá monto ngoáamila hulungo tilinggula ngoilanggubu aalamu ilotuanga lo ilowoluwoa-Lio. **11** Tiolo "talongohi mai totoonulalo wowohi tomanusia"; ngotayadu piludu-lo lowali rasulu, tawewo lowali nabi; tawewolio poli lowali Tamo pohabaria Habari Mopiohe boito, wau tawewo poli piludu-lo lowali guguu-ruwaalo wau tamolaalawa jamaá. **12** Utie pilohutu-Lio alihu

umati lo Allahu Taáala powimumutola lou lealeaatulo maó alihu mowali momaya to Eeya wau momongu batanga li Almasi. **13** Lou odito ito ngoámila mowali tuwau sababu iimani u tutuuwauwa wau huhaama u tutuuwauwa tomimbihu Walaó Allahu Taáala. Wau ito mowali tau-tauwalo tamoontapo u hihii-heolio maó helebe oduhenga mola ngoáamilalo wimu-wimumuto debo odelo ti Almasi. **14** Yi ito diilalo mowali mongo walaó tahepo bale-baleangio wau heó delo-delowalio odito mota odia mai lo pongaajali u hidala-dalaala lotahi o aakalia dadaata u moleeto. Timongolio hemopoó lapala tau wolo yimbulo u hidala-dalaala limongolio. **15** Diila! Boliio maó ito musi mopo biloheó susuu-aliyaalo u otutu wolo hilaa ulealeaatu motoliángo, tilinggula todelomo totoonulalo suáli ito hihii-heolio maó helebe mowali mola wimu-wimumuto ngoáamilalo debo odelo ti Almasi talowali tauwanto. **16** To walungo lo totaúwa-Lio, ngoámila pongawaá lobatanga boito leisusungi mopiohe, wau tinggai pilopo wumbutio lotimiidu leleetualio. Wau wonu timiidu pongawaá boito mokalaja debo odelo u patutilio, yi ngoilanggubu batanga boito mamobutu mowali leidaá wau molotolo moli toliángo. **17** Sababu uito domi tanggulo Eeya, uti-utieelo u mapolele wau popidudutai lowatia: diilalo potitumulo debo odelo tau-tauwalo tadiila hitootawa to Allahu Taáala, wau momikiilangi udia-diaaluo maó. **18** Pikiilangi limongolio malo diólomo. Timongolio diila motota lo tutumulo uilohi mai lo Allahu Taáala, sababu timongolio sama-samaata diila o pongotota wolo-wolo pasali lo Allahu Taáala. Timongolio odito, sababu baángiyolo. **19** Timongolio madiilalo owoolito, tilinggula timongolio helo duduá totoonulalo ilohilao moóohuu limongolio, wau tumutumulo huloto loduduá totoonulalo otohilaa lohilao. **20** Boti Isa Almasi taótaawa limongoli diila odito! **21** Timongoli malo dungohe tomimbihu o-Lio! Wau odelo tahiduduá o-Lio, timongoli mailaajali olo pasali piili lo Allahu Taáala u woluo to o-Lio! **22** Sababu uito yinggila maó manusia deedelo wolo pohuli tutumulo deedelo udonggo herusaalio lou totoonulalo ilohilaalio umopo lapalo. **23** Pikiilangi wau hilaa limongoli mamusi pobohuwalo ngoáamilalo. **24** Mamusi timongoli tumumulo odelo manusia bohu u pilowali moduduá gambali lo Allahu Taáala; deuito-yito wolo piili u otutu, motulidu wau mantali. **25** Sababu



uito Mongo wutato ngoáamilalo, diilalo pohimbulo. Potiwalilo juujulu ode ngota timongotalio, sababu ito ngoáamila yito tutuuwauwa pongawaa lobatanga li Almasi. **26** Wonu timongoli moingo, diila maó polulia oyiyingo boito moósababu olimongoli odusa. Diila maó poingo ngotupa lodulahu. **27** Alihu Ibilisi diila ohiyango. **28** Taa u biaasa motaó musí mohuheli motaó. Boliio maó tio musí mokalaja alihu moótapu rijiki wolo hilaa motulidu wau moó tulungi tahi odiaaluwoa. **29** Wonu timongoli mobisala, diila maó pomake tataa-heyaalo u kootolo. Pomakea maó wambaio tataa-heyaalo umopo dulungo wau u motulungi taa wewo. Tataa-heyaalo debo odelo uito mamooó toduo mai u mopiohu titau-tauwalo tamodungoheó. **30** Diila maó posuukalia hilaa lo Rohullah. Timongoli masilaaha-Lio wolo Rohu, lowali miliki lo Allahu Taáala. Rohu boito olo debo odelo pongaku deú Dulahu Polobebasi mamei dungga mai ode limongoli. **31** Yinggila maó totoonulalo umoó ngongoto hilao; niyati wau moingo. Diilalo potiwati-watio wau momua-muayo. Diilalo powoluwoa pongolaasa umolonuoó meaalo pongolaasa wewolio debo odelo uito. **32** Boliio maó, mamusi timongoli o hilao u mopiohe wau modehu hilao ode ngota-timongota, wau mongaa-ngambungua tutuuwauwa debo odelo Allahu Taáala olo longambungu mai olimongoli lotimbulude li Almasi.

**5:1** Timongoli yito mongo walaó Allahu Taáala tapilonu-Lio, sababu uito timongoli musí motolopani moduduá obaaya lo Allahu Taáala. **2** Tutumuli mongoli mamusi napasiyalo wolo toliángo, debo odelo ti Almasi olo lomonu olanto. Tio lopo bake batanga-Lio olanto, odelo tuwaulio lodewo umoonu wau moósanangi hilaa lo Allahu Taáala. **3** Timongoli yito umati lo Allahu Taáala. Sababu uito totoonulalo huhutu u huloto wau diila paatuti, meaalo olanggamu diila paatutilio woluo tohungi mongoli. Diila bolo taa wewo o alaasani u molojiya deú timongoli helohutu susuu-aliyaalo odelo uito. **4** Diila paatuti olo olimongoli molojiya tataa-heyaalo u kootolo, u huloto wau udiila paatuti. Boliio maó mamusi timongoli molapali mola sukuru ode Allahu Taáala. **5** Poótuota maó tióotutua: taa u opiili huloto, meaalo diila paatuti, meaalo langgamu (piili debo odelo uito tutuuwauwa wambaio lou molubo balaahala), tau boito diila mowali pongawaa umati

tapilalenta li Almasi wau Allahu Taáala. **6** Diila maó timongoli o aakalia lo loloo-iyaaalo utoongi. Sababu susuu-aliyaalo botieelo u mopotoodei muluka lo Allahu Taáala totau-tauwalo tadiila hidungohe o-Lio. **7** Oditolio, diila maó pohumbuta sama-samaata wolo tau-tauwalo debo odelo uito. **8** Timongoli lohihilao mulooloalio todelomo diólomo. Botia timongoli malowali umati lo Eeya, oditolio timongoli woluo todelomo mobaango. Masababu uito timongoli musi tumumulo todelomo mobaango. **9** Sababu monto mobaango boitolo mobutu mai totoonulalo huhutu umopiohe hidala-dalaala, aadili wau tuulusi to bibilohu Allahu Taáala. **10** Potolo panilo u motota maó wolo umooó sanangi hilaa lo Eeya. **11** Diila maó pohutua totoonulalo huhutu udiila ohuna u hepohutuo lotau-tauwalo tahitumula todelomo diólomo. Boliio maó mamusi tióotutua yinggila maó limongoli susuu-aliyaalo debo odelo uito. ( **12** Sababu susuu-aliyaalo u pohutuo limongolio wolo tuuáaó-tuuáaó boito, u bisalaalo olo maloóolito.) **13** Totoonulalo hitua-tuawua u tinelalo todelomo mobaango, maóontonga wolo mopatato. **14** Sababu ngoámila u mowali oontonga wolo mopatato, deúito-yito mobaango. Uitolo sababuulio loiloiya "Pobongulo, wuu yio tatuutuluhu, wau pobongulo monto opopate! Ti Almasi mamotinelai toitaatumu." **15** Sababu uito, poótuota maó tióotutua dudelo tutumuli mongoli. Diila maó potitumulo debo odelo tau-tauwalo tahi hulode, poti tumuloolo debo odelo tau-tauwalo molinepo. **16** Pohunawa maó lou tióotutua timiidu hiango uwoluo toli mongoli, sababu maasa botie yito maasa u moleeto. **17** Diila maó potihulodu, bo tuletea maó wolo u otohilaa lo Eeya. **18** Diila maó potihuwoó lo angguru timongoli, sababu uito mamooluusa olimongoli. Boliio maó, mamusi timongoli kiluwaasa lo Rohullah. **19** Pomakea maó tataa-heyaaalo monto Jaburu, lahu puji poloilaalo momuji wau lahu lorohu, todelomo bibii-salawaalo limongoli. Mamusi timongoli wolo hilaa meengahe mopolahu mola puji poloilaalo momuji ode Eeya. **20** Mololaita wau tomimbihu penu boli wolo olo, mamusi timongoli molapali mola oduólo ode Allahu Taáala ti Paapa, to tangguli Isa Almasi Eeyaanto. **21** U mohulumati li Almasi, paatutilio timongoli taaluku ngota timongota. **22** Dile taabua, tuúdio motaáluku todile talolai limongoli, tutuuwauwa debo odelo to Eeya. **23** Sababu dile

talolai yito tauwa todilelio, tutuuwauwa debo odelo toli Almasi olo talowali tauwa tojamaa wau Tio lohihilaolo olo Olongia Tamoo-poahua duolo jamaa talowali batanga-Lio. **24** Tutuuwauwa debo odelo jamaa olo taaluku toli Almasi, odito olo todelomo ngoaamila suali dile taabua musi taaluku todilelio. **25** Wuu dile talolai, toliangi maó dilemu, tutuuwauwa debo odelo ti Almasi momonu jamaa wau lopo bake batanga-Lio ode jamaa boito. **26** Ti Almasi lohutu mai uito alihu Tio moó pobelesi jamaa boito wolo pongaajali-Lio wau moli taluhu popolihu, alihu lapatao uito Tio mowali wuduo-Lio ode Allahu Taála. **27** Lou odito ti Almasi mohutu jamaa boito tihutihula wolo lailaió wau belesi totalu-Lio, diila oaaibu meaalo wentea penu boli loolo. **28** Odito olo dile talolai musi motoliango dilelio debo odelo tio motoliango batangalio lohihilao. ( **29** Diila peenta maó woluo taa u molonuó batangalio lohihilao. Boliio maó, tio molaala wau modaha olio debo odelo ti Almasi olo molaala jamaa-Lio. **30** Otaawanto uito, sababu ito yito popoo-ngawaáalo batanga li Almasi.) **31** Todelomo Kitabi tulatulade, "Sababu uito talolai ngota mamololaa maó tiilo wau tiyamolio u motituwau wolo dilelio, wau duduulotalo mamowali tuwau." **32** Ayati boito wanto-wantohé boliilio u modelomo. Wau poayito maó lowatia uito wolo wumbuta wolota li Almasi wau jamaa. **33** Bo ayati boito o wumbutio olo woli mongoli: Mamusi timiidu dile talolai motoliango dilelio debo odelo tio motoliango batangalio lohihilao wau mamusi timiidu dile taabua motolopani u mohulumati dilelio.

**6:1** Taukekeei! Odelo muri li Almasi, dungohi maó mongo dulaáamu, sababu uitolo upaatuti pohutuwo. **2** "Hulumatia maó tiyamamu wau tiilamu" uito yito palenta bohulio monto Allahu Taála wolo danti, **3** deuito-yito: "Alihu yio sanangi tutu wau hayahaya tutumulumu todunia." **4** Mongo wutato tamowali tiyamo! Diila maó pohutuo mongo walaumu odito rupalio tilinggula timongolio mowali moingo. Boliio maó, poudaaawa mola timongolio wolo taratibu wau pongaajali lo Eeya. **5** Mongo wutato tamowali wato! Dudui maó palenta lituanimu todunia botie. Pohutua maó uito wolo laasa hulumati boli modungohe wau lou tiotutua debo odelo pohutuo maó limongoli toli Almasi lohihilao. **6** Diila maó

potihutu odito bo tou timongoli he imatowalo, bo u mootapu poloilaalo pujio lomanusia. Bo timongoli mamusi mopohutu maó odelo wato li Almasi tadonggo hemodudua otohilaa lo Allahu Taála wolo lealeaatu lohilao. **7** Kalaja u pohutuo limongoli odelo wato boito, mamusi kalajaa maó limongoli wolo hilaa u meengahe debo odelo Eeyaalo tahe bayawa limongoli, wau diila bo manusia. **8** Poótoloma maó deú timiidu tau, mopio wato meaalo taa molopato, mamololimo pahala monto Eeya to susuu-aliyaalo u mopiohe upilo hutulio. **9** Mongo wutato tamowali tuani! Mamusi timongoli ohuhaama odito olo ode mongo watomu. Diilalo maó pomakea aáan-jamuwaalo. Eelai deú timongoli wau mongo watomu boito, tutuuwauwa otuani ngota, deúito-yito Eeya tatosologa. Tio diila momilohe baya. **10** Pulitio maó, mamusi timongoli mowali molotolo wolo olootolo u lotapu limongoli lonto kawasa lo Eeya, sababu timongoli lotituwau wo-Lio. **11** Pomakea maó ngoilanggubu pahi wumumuto lo popaatea uilohi mai lo Allahu Taála olimongoli, alihu timongoli moó tahangi moluwali aáa-kaliyaalo u moleeto monto Ibilisi. **12** Sababu ito mohipate diila moluwali manusia, bo moluwali ngoáamila olootolo lo lalaa-tiyaalo u motolo kawasa jamani u moleeto botie. Ito moluwali olootolo roroo-huwaalo moleeta u motolo kawasa dulente daá. **13** Sababu uito, botia, pomakea maó ngoáamila pahi wumumuto popaatea lo Allahu Taála, alihu todulahe u moleeto timongoli mambo moluwali tutuu-huwaalo musu. Wau alihu lapataó timongoli mohipate demola pulitio, timongoli donggo molotolo wau buheli. **14** Mamusi timongoli mopoó daha-dahaalo maó. Pomakea maó otatapu wau molotolo hilao duólo Allahu Taála odelo bintolo wohuta, wau otuulusi odelo boó watemu. **15** Mamusi oleela u mopohabari Habari Mopiohe umodelo ode salaamati mowali sapatumu. **16** Timiidu wakutu pomakea maó palacayamu to Eeya odelo tingolo polame; wolo iimani boito timongoli mowali momate ngoáamila walaó pana otulu monto Ibilisi. **17** Hamawa maó oáahu odelo helemu waja, wau tahuda lo Allahu Taála odelo wamilo lo Rohullah. **18** Pohutuwalalo maó ngoáamilalo boito sambela modua mola u mei tulungi mai monto Allahu Taála. To timiidu ohiyango, poduaalo odelo woloolo mola Rohullah helodelo olimongoli. Mamusi timongoli laito dapadapato wau diila maó

potaaluku. Poduaalo laito duolo umati lo Allahu Taála. **19** Wau duai mola watia olo, alihu towakutu watia mobisala, Allahu Taála mongohi mai olaatia loiya u tuhata. Wau alihu watia lou buheli mowali mopoótaa hitua-tuawua u milakusudu hetuuolo Habari Mopiohe boito. **20** Sababu Habari Mopiohe boitolo, watia lowali ngotaalio lo utolia, wau botia woluo todelomo tutupa. Poduaalo mola alihu watia buheli mobisala pasali lo Habari Moiohe boito, odelo woloolo mola watia musi mobisala. **21** Tei Tikhikus, wutatonto wau tamoomayawa taa tatapu wau molotolo hilao todelomo kalaja lo Eeya, mamopoótaa mai olimongoli totoonulalo u hitua-tuawua pasali lowatia, alihu otaawa limongoli owowoluwoa lowatia wau kalaja lowatia. **22** Uitolo sababuulio watia lolao mai olio odeli mongoli u mopoótaa owowoluwoa lamiaatia olimongoli ngoáamilalo, alihu moó udaá hilaa limongoli. **23** Pohileaala duá Allahu Taála, wau Eeya Isa Almasi mopoluasi mai ngoáamila jamaá u motituwau wau mototoo-lianga wau debo palacaya li Almasi. **24** Pohileaala duá Allahu Taála mobalakati Wutato ngoáamila tamo toliango Eeyanto Isa Almasi wolo toliango udiila mowali mooli. Hulumati lamiaatia, Paulus

**1:1** Mongo wutato umati lo Allahu Taála ngoáamilalo tahi biluloáawa to Pilipi, wau tamalowali tuwau woli Isa Almasi. Olo mongo wutato tauwa wau tamoo-mantua jamaá! Watia, Paulus, wolei Timotius, mongo wato li Isa Almasi, **2** mohalapu pohileaala duá Allahu Taála ti Paapanto wau Eeya Isa Almasi mongohi mai balakati wau salaamati olimongoli. **3** Timiidu watia moó eela mola olimongoli, watia hemo lapali mola oduolo ode Allahu Taála. **4** Wau timiidu watia modua mola to Wutato ngoáamilalo, watia hemodua wolo sanangi lohilao. **5** Watia helo lapali mola oduolo ode Allahu Taála sababu anggaduhulo dula dilumutu botia, timongoli malomantu olaatia lopo-loladu Habari Mopiohe lonto Allahu Taála. **6** Allahu Taála lohihilao talo lumula kalaja u mopiohe boito olimongoli, wau watia yakini Tio mamopo tolonga mola kalaja boito dilumutu aahua todulahee ti Isa Almasi muli meidungga mai. **7** Memangi to tambatilio watia o pongolaasa debo odelo uito olimongoli, sababu Wutato ngoáamilalo laito modudula to hilaa lowatia. Wau olo sababu

timongoli moduduá mololimo peé-peéenta wolaatia, ponu uilohi mai lo Allahu Taáala olaatia; mopio masaatia botie tou donggo watia todelomo tutupa boli tou watia woluo to bulemengio u mopodulua wau momintengi Habari Mopiohe boito. **8** Otaawa lo Allahu Taáala deu watia otutu mooloolo daá olimongoli wolo laasa toliángo tataabia lohilao monto li Isa Almasi lohihilao. **9** Utieelo duá lowatia olimongoli: pohileaala duá timongoli lebe motoliángo Allahu Taáala wau timongotalio wau he oduhenga mola laito pongotota u otutu wau huhaama u molinepo. **10** Lou odito otaawa limongoli molulaota wolo ulebe mopiohe daá, wau tutumuli mongoli mamobelesi monto aibu meaalo potulude penu boli wolo wambaio todulahee muli podungga mai li Almasi. **11** Tutumuli mongoli mamolepata wolo huhutu u otu-otutuulo maó mopiohe u bo mowali pohutuo maó otilapulo li Isa Almasi lohihilao; yi Allahu Taáala mapolaiólo wau piluji boli puji. **12** Otohilaa lowatia timongoli motota maó, deu susuu-aliyaalo umalo toduo mai olaatia tumbaó loósababu lebe dadaata maó tau lodungohe wau palacaya to Habari Mopiohe boito. **13** Akibatilio, ngoáamila tamoo-kawalia bele biluloá saaha li olongia wau tau-tauwalo wewolio tokota botie motota deu watia tilutupalio sababu watia hemomaya li Almasi. **14** Wau pilo tutupawa olaatia maloó sababu odaata lonto tau-tauwalo Nasara tokota botie lowali lebe yakini poli to Eeya, tilinggula timongolio lebe buheli helo pohabari tahuli lo Allahu Taáala lou diila wohe-wohe. **15** Memangi woluo dengolo lota towolota limongolio tahelo pohabari li Almasi sababu mohiihia wau mohuto mohahaamawa, bo tawewolio helo pohabari li Almasi o makusudu u mantali. **16** Tau-tauwala botie helohutu uito sababu timongolio motoliángo Allahu Taáala wau olaatia, sababu otaawa limongolio deu Allahu Taáala malo poáhu mai olaatia u mopo biloheó deu Habari Mopiohe boito otutu. **17** Bo taawewo helo pohabari li Almasi wolo makusudu u diila mopiohe; timongolio helo pohabari li Almasi wolo makusudu u polohuna daá batanga hihilao. Woleeto boito timongolio hemo halapu u lebe mopooó suusa olaatia todelomo tutupa. **18** Bo diila mongola! Sababu penu boli woloolo mola olo, mopio uito pilohutu wolo makusudu u mantali meaalo wolo makusudu u talatala, bo debo ti Almasi tapilo habarilio olo; oditolio watia sanangi.



Wau watia madebo molaasa odito, **19** sababu otaawa lowatia deü wolo duduu-aawaalo limongoli wau lou bilantua mai lo Rohu li Isa Almasi, watia malopatolio. **20** U tióotutua otohila wau halapuo lowatia yito alihu watia sama-samaata diila bolo dia ohuna todelomo tuugasi lowatia. Boliio maó watia hemo halapu timiidu saaati, laba-labaalo mopiohe daá masaatia, watia mowali opiili buheli tilinggula wolo jiwa wau batanga lealeaatulo maó lowatia -- mopio watia tumutumulo meaalo watia mate maó -- ti Almasi polaiólo. **21** Sababu olaatia, dulungo lo tutumulo laatia boti Almasi wambaó! Wau mate boliilio maó untungi. **22** Bo wonu wolo tutumulo todunia botie, watia mowali mohutu maó kalaja ulebe ohuna, yi diila otaawa lowatia toonu umusi tulaoto lowatia. **23** Watia bilantangalio monto mohu-mohuwalia. Otohila daá lowatia mololaa maó dunia botie wau mola motibiluloá woli Almasi, sababu uitolo ulaba-labaalo mopiohu; **24** bo, ode polohuna daá limongoli, deüito-yito lebe mopioheó wonu watia debo bilu-biluloá todunia. **25** Watia yakini tosuáli boito. Uito sababuulio otaawa lowatia deü watia madebo motibiluloá wolo Wutato ngoáamilalo, alihu moó tulungi olimongoli mowali helebe molotolo wau helebe sanangi todelomo palacaya to Eeya. **26** Sababu uito, wonu watia de mohualingai ode limongoli, timongoli tamalo tituwau woli Isa Almasi maa oáalasan lebe dadaata maó poli u molaasa meengahu tobatanga laatia. **27** Naa, u polohuna daá botia yito deü timongoli tumumulo motuuúde lou wolo u pohile wolo moóohuú lo Habari Mopiohe pasali li Isa Almasi boito. Lou odito, diila otaawa laatia donggo moó dunggaya woli mongoli meaalo diila, watia mamó dungoheó deü timongoli molotolo motituwau wau mohipate peé-peéenta bo u makusudu tuwau wau tuwau ilohila; deüito-yito to opopalacaya u motuuúde wolo Habari Mopiohe monto Allahu Taáala boito. **28** Mamusi timongoli laito buheli; diila maó oohe to tahi potuwalia olimongoli. Lou odito timongoli mopo biloheó deü timongolio tantu maólaahe, wau timongoli mamóohaama, sababu Allahu Taáala lohihilaolo talo poóhaama olimongoli. **29** Sababu Allahu Taáala malongohi mai ponu olimongoli diila bo u palacaya li Almasi wambaó, bo u modutolo olo odeli Almasi. **30** Masaatia timongoli olo moduduá wolaatia todelomo polohipate u tutuuwauwa; deüito-yito u peéenta

iloontonga limongoli hipo hipatea laatia muloololio mai, wau udebo donggo hipo hipatea laatia dilumutu botia, debo odelo umaa ilodungohe limongoli botia.

**2:1** Timongoli molotolo, sababu timongoli lotituwau woli Almasi. Wau timongoli iloliyango sababu ti Almasi lomonu olimongoli! Timongoli dilelo lo Rohullah, wau timongoli olo totoolianga wau lodehu hilao ngota timongota. **2** Naa, ntali timongoli tiotutua moposanangi mai hilaa lowatia wolo susuu-aliyaalo botie: Poti tumulolo ngohilao wolo toliango u tutuuwauwa, wolo pikiilangi u tutuuwauwa wau patuju u tutuuwauwa. **3** Diila maó pohutu hitua-tuawua sababu yiluntula lo polohuna daá batanga lohihilao, meaalo u mopo sombongi lobatanga. Boliio maó mamusi timongoli ngota-ngota wolo dupadupapa lohilao monganggapu taawewo lebe mopiohe wolo batanga lohihilao. **4** Poótuota maó polohuna daá lotaa wewo; diila bo polohuna daá batanga lohihilao. **5** Mamusi timongoli o himuudu debo odelo ti Isa Almasi. **6** To dasalilio Tio tutuuwauwa wolo Allahu Taáala, bo Tio diila molaasa deú owowoluwoa-Lio u ilahi boito musi poti bintengia-Lio. **7** Boliio maó, yilopa-Tio ngoáamilalo lapataó lowali tutuuwauwa debo odelo ngotaalio lowato. Tio lowali debo odelo manusia, wau oontonga tumutumulo debo odelo manusia. **8** Tio lotidupapa lobatanga, wau tumutumulo wolo lodungohu to Allahu Taáala dilumutu yilate -- deúito-yito yilate tosalipu. **9** Sababu uitolo Allahu Taáala lomuduá o-Lio lolai-laióolo maó, wau longohi o-Lio okokawasa ulebe udaá maó wolo ngoáamila okokawasa uwewo. **10** Yi u mohulumati li Isa, ngoáamila mahaluku u tosologa, wau u todunia, wau u to walungo dunia mamolubo o-Lio. **11** Timongolio ngoáamilalo mamomasisi deú ti Isa Almasilo Eeya; lou odito Allahu Taáala ti Paapa polaiólo. **12** Sababu uito, Mongo wutato taa otoliango, odelo woloolo mola timongoli laito modungohe olaatia tou watia donggo tohuungi mongoli, yi lebe-lebelo maó botia tou lalaaminga, mamusi timongoli debo modungohe olaatia. Timongoli mapilo aahu mai lo Allahu Taáala, yi potolo panilo tulusi alihu osalaamati limongoli mowali wimu-wimumuto ngoáamilalo. Pohutua maó uito wolo hulumati wau paatuti ode Allahu Taáala, **13** sababu Allahu Taáala lohihilao tamokalaja

mai todelomo batanga limongoli u mohutu olimongoli iloheela lohilao mowali mopo sanangi hilaa lo Allahu Taaala. **14** Kalajai maó totoonulalo u hitua-tuawua lou diila hili-hilimuta meaalo mohaamawa. **15** Lou odito timongoli mopo biloheo deu timongoli yito mongo walaó Allahu Taaala tadiila oaaibu, tatumu-tumula wolo hilaa tuulusi wau otutu tohuungo lotaa moleeto wau odusa. Wau tou timongoli mopo tunggulaó olimongolio habari u mongohi tutumulo, mamusi timongoli mowali ode limongolio debo odelo tinelo u molinelai mopobaango dunia. Wonu timongoli tumumulo debo odelo uito, de woluo alaasani olaatia u molaasa meengahe tomimbihu olimongoli tou ti Isa Almasi muli meidungga mai. Uito bukutilio deu pilo tipaatea lowatia ilohuna wau tolopani lowatia otilapulio. **17** Tanu watia mapateelio mate-mateelo maó wau duhu laatia mowali debo odelo bake pilopaó toitaato lou wolo u pilodewo limongoli ode Allahu Taaala odelo tuoto deu timongoli palacaya to o-Lio. Wonu memangi uito musu odito, watia mosukuru mola tosuáli boito wau moduduá motiwengahe woli mongoli. **18** Odito olo patutilio timongoli olo molaasa sanangi wau moduduá motiwengahe wolaatia. **19** Watia palacaya deu wolo polo tulungi li Isa Eeya, watia huáa loólao mai olei Timotius ode limongoli, alihu watia oliyanga lohabari tomimbihu olimongoli. **20** Bo tei Timotiusilo tatuwa-tuwaulo taa u ngohilao wolaatia, wau tióotutua momikiilangi osanangi tutu limongoli. **21** Noááamila tawewolio bo hemo ngulusi polohuna daá batanga lohihilao wambaio, diila polohuna daá li Isa Almasi. **22** Timongoli lohihilao maloóonto bukutilio deu tei Timotius ohuna. Tio malo kalaja tióopatea wolaatia u lopololadu Habari Mopiohe lonto Allahu Taaala. Amiaatia duulota debo odelo walaó wolo tiyamo wambaó. **23** Masababu uito, lolamemeta tou ilotaawa lowatia woloolo mola palakala lowatia de mopulitaó, watia mamolao olio ode limongoli. **24** Watia palacaya deu wolo polo tulungi lo Eeya, watia lohihilao olo diilalo mohiheo mamola mobiilohe woli mongoli olo. **25** Tomimbihu wutatonto tei Epaproditus tailao mai limongoli lomantu olaatia, watia molaasa palalu u muli mei walinga mola olio ode limongoli. Tio malohiyo olaatia tokalaja wau polohipate lowatia. **26** Tio mooloolo daá to Wutato ngoáamilalo, wau tio balisa sababu timongoli maloótapu habari deu tio

mongongoto. **27** Memangi otutu tio mongongoto tunggula ngopee yilate. Bo Allahu Taála lomonu olio; wau diila bo to olio wambaó, bo to olaatia olo, alihu watia diilalo lebe suukali maó. **28** Uito sababuulio lebe heüdaá mola olo hilaa lowatia u muli mopoáhu olio ode limongoli, alihu timongoli muli meengahe wonu timongoli modunggaya wolio, wau hilaa lowatia olo mowali moduóto. **29** Oditolio, yimai maó tio wolo hilaa lealeaatu sanangi odelo ngotaalio lowutato ngoiimani. Halagai maó ngoáamila taa udebo odelo tio. **30** Duólo polohuna daá tokalaja li Almasi, tio bolo ngopee yilate; tio helo podutu nyawalio u longohi tulungi olaatia to tangguli mongoli.

**3:1** Pulitio maó, Mongo wutatatuui, mamusi timongoli motiwengahu sababu timongoli malo tituwau wolo Eeya. Watia diila molaasa mobuheto u monguli mai wolo umaa tiluladei lowatia olimongoli tou dipolulio mai; sababu suáli boito mopiohe duólo oáahu limongoli. **2** Poódaha-dahaalo maó totau-tauwalo tahi pohutua susuu-aliyaalo u moleeto, tau-tauwalo tapaatuti unteelo 'apula'. Timongolio hipo huntulawa alihu tau-tauwala tunaalo. **3** Lebe-lebe pomaó itolo tau-tauwalo tamaa lololimo tuuna u tutuulio-tutu, diila timongolio. Ito lolubo Allahu Taála lou dilelo lo Rohullah lohihilao, wau ito losukuru sababu ito tumutumulo lotituwau woli Almasi Isa. Ito diila lotiwunela tou uuupaa-calawalo u osipati lahiri. **4** Tutuulio tutu watia mowali motiwunela wambaó tou uuupaa-calawalo boito. Sababu wonu woluo tahingota-ngotaawa tamolaasa tio o alaasani u motiwunela to upacala u osiipati lahiri, yi watia lebe maó leeto. **5** Watia tiluuna tou oúmulu walu hui. Watia pilotutulio mai odelo ngotaalio lo Isirailu, lonto suku bangusa Benyamin; watia taulo Ibrani pulua. Todelomo suáli ototaaáti todelomo bubuu-toóowalo agama lo Yahudi, watia yito pongawaá kaumu lo Parisi. **6** Watia tumbaó odito osumangati tilunggula watia helo ngalinaya jamaá. Wonu bilohela monto wimbihu Butoó agama lo Yahudi, watia tamopiohe ngota tadiila oáaibu. **7** Bo sababu ti Almasi, yi ngoáamilalo u omoóomolu he ilanggapu lowatia odelo tuwaulio umoó paéeda, botia lowali tuwaulio umoóluhi. **8** Diila bo wambaó susuu-aliyaalo boito; bo tumbaó totoonulalo u hitua-tuawua he ilanggapu lowatia odelo

susuu-aliyaalo u bo moóluhi wambaio. U mililiki lowatia masaatia botie yito lebe ohalaga: deüito-yito motota li Isa Almasi, Eeyaaü. Sababu ti Almasi, yi mailopato lowatia totoonulalo u hitua-tuawua. Ilanggapu lowatia ngoáamilalo boito odelo puputo wambaó, alihu watia mowali moótapu li Almasi, **9** wau otu-otutuulo maó motituwau wo-Lio. Wumbuta u mopiohe wolo Allahu Taáala diilalo tilolopani laatia lohihilao lou modungohe tobutoó lo agama. Masaatia watia owumbuta u mopiohe wolo Allahu Taáala, sababu watia palacaya li Almasi. Oditolio, wumbuta u mopiohe boito dungga-dungga mai monto Allahu Taáala, patopatoá to palacaya li Isa Almasi. **10** Tuwa-tuwaulo u otohilaa lowatia yito alihu watia motota li Almasi, wau moótoduo kawasa u mopotumula o-Lio monto opopate. Otohilaa lowatia moduduá modutolo wo-Lio wau mowali tutuuwauwa debo odelo Tio todelomo suáli lo opopate-Lio. **11** Wau watia mohalapu deü watia lohihilao mamuli potumulo-Lio mai monto opopate. **12** Watia diila molojiya mai deü watia mailo tilapulo, meaalo malowali loiwimumuto ngoáamilalo. Bo watia tulusi wambaó hemo tolopani mohama palaseni u pilopo dapato li Isa Almasi. Woleeto boitolo Tio malohama olaatia wau lopowali olaatia miliki-Lio. **13** Tantuulo maó, Mongo wutato, watia tutuulio maó diila molaasa deü watia mailo tilapulo loóhama palaseni boito. Bo woluo suáli tuwau u pohutuo lowatia, deüito-yito watia molipataó wolo uwoluo to wulea laatia wau motolopani tióotutua moóoma wolo uwoluo totalu. **14** Uito sababuulio watia tumeteó tulusi motidulunga ode patuju pulitio umoó toduo ohohaama, deüito-yito tutumulo tosologa; woleeto boitolo Allahu Taáala lotianga olanto lotimbulude li Isa Almasi. **15** Ito ngoáamila tamaa loontapo odelo dudelo lorohu, mamusi opiili odito. Bo wonu towolota limongoli woluo taa ohuhama wewo, yi Allahu Taáala mamu poópatatai olo olimongoli. **16** Bo suáli botie wajibulio poótuotolo: Ito musi debo tumumulo moduduá wuüdu uma diluduáanto dilumutu botia. **17** Mongo wutato ngoáamilalo! Dudui maó obaaya lowatia. Amiaatia malongohi mai obaaya u otutu, sababu uito poótuota maó tióotutua tahipo duduaáawa obaaya lamiaatia boito. **18** Watia matingga maito helo poótaa mai olimongoli, wau botia muli wulio mai lowatia olimongoli wolo hiyo-hiyongo, deü woluo dadaata taa u tutumulio

mopoluusa boli lo opopate li Almasi tosalipu. **19** Tutumulo lotau-tauwala debo odelo uito pulitio maó mabinasa, sababu ila limongolio yito loduduó ilohilaa lobatanga limongolio lohihilao. Susuu-aliyaalo u moóolito tumbaó ui-uitolo u hepomangga limongolio; sababu timongolio bo hemo mikiilangi susuu-aliyaalo u motuhatawa wolo dunia botie wambaio. **20** Bo ito yito walaga lipu losologa. Montetolo olo Olongia Tamoo-poáahua olanto, Eeya Isa Alamasí, mamei dungga mai. Tiolo taheimaanto lou mooloolo. **21** Batanganto u molulupuhu wau mowali moáantulu botie, mamowali debo odelo batanga-Lio lohihilao u molaió. Tio mowali mohutu mai uito sababu Tio motolo miliki kawasa umopo taaluku totoonulalo u hitua-tuawaua.

**4:1** Sababu uito, Mongo wutatuú tatoliángo, odi-odieelo mola wajibulio timongoli tumumulo wolo tióotutua palacaya ode Eeya. Hilaa lowatia mooloolo olimongoli! Timongolilo tamooó bangga olaatia wau talo eengahe olaatia. **2** Wutato ti Euodia wau Wutato ti Sintike! Pohile lowatia tióotutua alihu Wutato ngohilao odelo tau-tauwalo tango iimani. **3** Duólo sahabati lowatia taa tatapu wau molotolo hilao, pohile lowatia olo alihu Wutato momantu taabua duulota boito. Timongolio malo kalaja tióotutua wolaatia helo pohabari Habari Mopiohe lonto Allahu Taáala; tutuuwauwa debo odelo tei Klemen wau ngoáamila taa wewolio tahemo kalaja peé-peéenta wolaatia. Tataa-nggulalo limongolio woluo todelomo Kitabi Taa Tumutumulo. **4** Pohileaala duá timongoli laito meengahu sababu timongoli matilu mumulo lotituwau wolo Eeya. Peéentapo watia molojiya mai: poti wengahulo! **5** Mamusi ngoáamila tau mowali moóonto piilimu ohale mopiohu. Sababu diilalo mohiheo Eeya mamei dungga mai. **6** Diila polawalo tomimbihu penu boli wolo. Todelomo totoonulalo suáli, poduáalo wau wudua mola hihilemu ode Allahu Taáala. Wolo palaluo limongoli, poótaa maó uito laito ode Allahu Taáala wolo molapali mola oduólo. **7** Yi salaamati monto Allahu Taáala udiila pongalo aakali opahamua lomanusia, mamodaha hilaa wau pikiilangi limongoli umalo tituwau woli Isa Almasi. **8** Pulitio maó, Mongo wutato, tuangi mola pikiilangi limongoli wolo susuu-aliyaalo u oboliilio, u paatuti pujiolo, deuító-yito susuu-aliyaalo u otutu, uhulu-hulumati, u aadili, mantali,



molamahu, wau mopiohe. **9** Ponaówa maó wolo upilo balajali wau tilolimo limongoli lonto olaatia; mopio lonto tataa-heyaalo boli lonto totoonulalo huhutu lowatia. Allahu Taáala tapilo butua mai lou salaamati, mawoli mongoli. **10** Todelomo tutumulo laatia u lotituwau wolo Eeya, watia molaasa donggo boli sanangi tutu, sababu lapataó odito hiheolio, botia timongoli luli ilohiyango lotolo mikiilangi mola owowoluwoa lowatia. Makusudu lowatia deú diila pitualio timongoli malo lipata olaatia; timongoli memangi hemo poótuoto olaatia, bo timongoli diila ilohiyango u lopo biloheó. **11** Tiloóowoli mai lowatia utie diila kalana watia ilodiaá, sababu watia malo balajali lolaasa sanangi lou wolo uwoluo. **12** Watia maloólaasa tilumumulo ilodiaá sama-samaata, wau olo tilumumulo lou lebe-lebe. Mailotaawa lowatia lahasialio u motaalua lo owowoluwoa u penu boli odelo woloolo mola olo; mopio owowoluwoa maámulu meaalo owowoluwoa mosikini, mopio owowoluwoa dadaata ngoáamilalo meaalo owowoluwoa ilodiaá. **13** Wolo kawasa uilohi mai li Almasi odelaatia, watia loótoduo mai lotolo u lotaalua wolo totoonulalo owowoluwoa u hidala-dalaala. **14** Bo timongoli malo tulungi olaatia todelomo watia usuusa; wau wolo upilohutu limongoli boito memangi mopiohu. **15** Mongo wutato taulo Pilipi! Otutu otaawa limongoli lohihilao deú tou watia omoóomolu lololaa maó Makedonia, tou Habari Mopiohe boito pilo pololadu lowatia ubohulio, timongolilo tuwa-tuwaulo jamaá tahelo mantu olaatia; timongoli tuwa-tuwaulo taloduduá loólaasa paéeda wau luhilio peé-peéenta wolaatia. **16** Tou watia to Tesalonika wau leibantu, malebe lou peéenta timongoli helolao dembulo odelaatia. **17** Uito diila oboliilio deú watia bo wambaó ohilaa mololimo wowohi. U otohilaa lowatia yito alihu watia mowali moóonto titii-lapuwaalo u moduhengo paéeda olimongoli. **18** Watia malo lolimo ngoáamilalo -- tumbaó lebe lou motuuheta! Ngoáamila wowohi uilao mai limongoli olaatia, matilolimo lowatia lonto olei Epaproditus. Botia watia mailo woluwoa lo ngoáamila upalaluo lowatia. Ngoáamila wowohi lonto olimongoli boito yito debo odelo boolo moonu lo bake u pilodewo ode Allahu Taáala wau u tilolimo lo Allahu Taáala wolo hilaa sanangi. **19** Allahu Taáala tahe tuboo lowatia, taleta-letaó wolo okokaya todelomo li Isa Almasi, mamó poópolu mai

totoonulalo upalaluo limongoli. **20** Ilopujialo mola Allahu Taáala ti Paapanto ohiheo-hiheolo maó! Amin. **21** Potunggula maó salamu lowatia ode ngoilanggubu umati lo Allahu Taáala talo tituwau woli Isa Almasi. Wau tolimoa maó olo salamu lonto mongo wutato tawoluo peé-peéenta wolaatia teea. **22** Ngoáamila umati lo Allahu Taáala tokota botie, laba-labaalo mopiohu timongolio talonto bele biluloá li Kaisari, lolao salamu olimongoli. **23** Pohileaala duá Eeya Isa Almasi mobalakati mai Wutato ngoáamilalo. Hulumati lamiaatia, Paulus wolei Timotius

**1:1** Mongo wutato umati lo Allahu Taáala to Kolose, taa tatapu wau molotolo hilao motituwau woli Almasi! **2** Odelo rasulu li Isa Almasi, -- to pilomuduá lo Allahu Taáala -- watia, Paulus, peé-peéenta wolo wutatonto Timotius, momolohone pohileaala duá Allahu Taáala ti Paapanto mongohi mai balakati wau salaamati olimongoli. **3** Amiaatia maloó dungohu deú timongoli palacaya li Isa Almasi wau timongoli motoliánga ngoáamila umati lo Allahu Taáala. Uitolo sababuulio tou amiaatia heloduá mola olimongoli, amiaatia laito molapali oduólo ode Allahu Taáala, ti Paapa Eeyanto Isa Almasi. **5** Timongoli palacaya wau timongoli motoliángo, sababu timongoli hemo tiwunela tou wolo umaa podapato lo Allahu Taáala tosologa olimongoli. Timongoli maloó dungohu pasali losuáli boito, tou Habari Mopiohe u otutu pilo tunggulai ode limongoli. **6** Habari lonto Allahu Taáala lololadulo mola ode ngoilanggubu dunia, wau tutumulo tau tulusi bilalakatia lohabari boito, tutuuwauwa debo odelo tutumuli mongoli bala-balakati tumulalo mai tosaaáti timongoli loódungohe pasali odehu hilaa lo Allahu Taáala wau tióotutua lo toloéelaó. **7** Suáli boito pilo tunggulai ode Wutato lei Epapras, sahabati taa otoliángo lamiaatia. Tio yito tahemo kalaja duóli Isa wau tahemo kalaja ode polohuna daá olanto. **8** Lonto o-Liolo amiaatia lodungohe deú wolo kawasa lo Rohullah timongoli lowali lo totooliánga. **9** Uitolo sababuulio amiaatia laito heloduá mola olimongoli anggadu amiaatia loódungohe tomimbihu olimongoli. Pilolohone lamiaatia ode Allahu Taáala alihu Rohullah mongohi mai tinepo wau huhama tilinggula timongoli motota maó lou wimu-wimumuto ngoáamilalo wolo u otohilaa lo Allahu Taáala. **10** Lou odito timongoli

mowali tumumulo moduduá otohilaa lo Allahu Taáala, wau laito moposanangi hilaa-Lio, tilinggula todelomo totoonulalo u hitua-tuawua timongoli moówohi tilapulo to susuu-aliyaalo u mopiohe. Wau pongotota limongoli pasali lo Allahu Taáala olo maa oduhenga mola olo. **11** Pohileaala duá wolo kawasa lo Allahu Taáala u udaá, timongoli polootolo-Lio mai tilinggula timongoli mambo modutolo totoonulalo u hitua-tuawua wolo sabali wau sanangi lohilao **12** wau wolo lapali oduólo odeli Paapa. Sababu ti Paapa boitolo talohutu mai olimongoli paatuti mololimo wolo upilo dapato lo Allahu Taáala ode umati-Lio todelomo yilaidia-Lio u mobaango. **13** Tio malo lopata olanto lonto kawasa u modiólomo wau lopo limbata olanto ode delomo bele biluloá saaha li olongia lo Wala-Io tapilonu-Lio. **14** Lo Wala-Io boito ito yilopa-Tio; boliilio maó duduusaanto maa ilambungu-Lio. **15** Ti Almasi yito bayahu u moilaalo monto batanga lo Allahu Taáala udiila oontonga; Ti Almasi yito Walaó tamohuhula daá, lebe polohuna daá lotoonula u pilowali mai. **16** Sababu lotimbulude o-Liolo Allahu Taáala lopowali totoonulalo u hitua-tuawua tosologa wau toitaato dunia, totoonulalo u hitua-tuawua u oontonga wau udiila oontonga, leituwoto olo ngoáamila rohu u okawasa wau u hemo malenta. Ngoilanggubu aalamu botie pilowali-Lio mai lotimbulude li Almasi wau odeli Almasi. **17** Tou totoonulalo u hitua-tuawua dipoluo, ti Almasi maleimulo mai woluo. Wau sababu Tiolo olo yi totoonulalo u hitua-tuawua tinggai woluo to tambatilio. **18** Tiolo tauwa lo batanga-Lio, deúito-yito jamaá, sababu Tiolo pilobutua mai lo tutumulo jamaá boito. Tiolo Walaó tamohuhula daá, tabohu-bohulio luli pilotumulai lonto opopate, alihu Tio lohihilao wambaó tamowali laba-labaalo polohuna daá loui totoonulalo u hitua-tuawua. **19** Allahu Taáala lohihilaalo talo kahandaki alihu totoonulalo hitua-tuawua uwoluo tobatanga lo Allahu Taáala, woluo olo wolo wimu-wimumuto tobatanga lo Wala-Io. **20** Wau lotimbulude to Walaó boito olo Allahu Taáala lolantu mai u lohutu totoonulalo u hitua-tuawua muli mopiohe wo-Lio -- mopio totoonulalo hitua-tuawua u todunia, boli u tosologa. Allahu Taáala lohutu mai uito lotimbulude to opopate lo Wala-Io to ayu salipu. **21** Mulooolio mai timongoli walawalahe monto Allahu Taáala. Timongoli helo muusu o-Lio

sababu piili wau pikiilangi limongoli u moleeto. **22** Bo botia, wolo opopate lo Wala-Io, Allahu Taáala lohutu mai wumbuta limongoli wo-Lio lowali luli lopiohe. Wolo dudelo boito timongoli lowali dilelo-Lio lotaalua Allahu Taáala todelomo owowoluwoa u mantali, belesi wau diila oáabu. **23** Bo tantu timongoli debo musi tatapu wau molotolo hilao palacaya wau tihutihula motoheto to opopalacaya limongoli. Diila bolo timongoli mopo lopato harapani u mailohi-Lio mai olimongoli tou timongoli mololimo Habari Mopiohe monto Allahu Taáala. Habari boito mapilo habarilio ode timiidu tau to ngoilanggubu dunia. Wau woleeto boito olo watia, Paulus, malowali tamoomayawa. **24** Botia watia sanangi modutolo ode polohuna daá limongoli. Sababu wolo dudutolo lowawaó laatia, watia mopo wimumuto wolo udonggo musi dutola li Almasi ode jamaá-Lio, deúito-yito batanga-Lio. **25** Allahu Taáala lopoáhu olaatia lowali tamoomayawa jamaá-Lio u polohuna daá limongoli. Watia musi mopo tunggulo habari lo Allahu Taáala, ngoáamilalo; **26** deúito-yito habari u ngotilonggadu hehetu-hetuto lotaunu yilalu mola hetiluó lo Allahu Taáala ode taa ngoáamila, bo botia piloilaalo mai ode umati-Lio. **27** To umati-Lio boito Allahu Taáala ohilaa mopoilaalo donggo boli piohio wau udaáalio hitua-tuawua u milakusudu tiluu-Io boito ode ngoáamila umati lomanusia. Hitua-tuawua u milakusudu tiluuó boito yito: ti Almasi woluo todelomo batanga limongoli, ubolilio maó timongoli mamoduduá moólaasa odudaá lo Allahu Taáala. **28** Ti Almasi boitolo tahe pohabario lamiaatia ode timiidu tau. Amiaatia helo poéela wau longajali olimongolio ngoáamilalo wolo totoonulalo tinepo. Patuju lamiaatia yito alihu timiidu tau mowali deloolo ode Allahu Taáala, odelo taa u moontapo todelomo susuu-aliyaalo rohu, sababu malo tituwau woli Almasi. **29** U mongaato suáli boito watia helo kalaja tiópatea. Watia helo hipate wolo ngoáamila lotolo uilohi mai li Almasi olaatia wau ukala-kalaja todelomo batanga laatia wolo polupolu lokawasa.

**2:1** Otohilaa lowatia timongoli motota maó woloolo mola polutuio watia helo hipate ode limongoli wau ode limongolio tato Laodikia wau ngoáamila tadiila motota olaatia delo dudelo hihilao. **2** Ngoáamilalo botie

hepilohutu lowatia alihu hilaa limongolio mowali molotolo wau timongolio mototoolianga tilinggula timongolio moaita tutu mowali tuwau. Loui odito timongolio tiototua mongalati boli yakini wau motota hitua-tuawua u milakusudu tiluuó Allahu Taáala, deüito-yito ti Almasi lohihilao.

**3** Ti Almasilo talomuó totoonulalo tinepo wau pongotota lo Allahu Taáala u muloololio mai tutuuó. **4** Poótaa mai lowatia utie alihu timongoli diila bolo o aakalia penu boli lotatoonu olo lotaa bo mopiohu totunggilo toli mongoli. **5** Sababu eleponu watia molaminga woli mongoli, anggapuwalo deü watia woluo towolota limongoli. Wau watia meengahu moóonto olimongoli tuwau lohilao wau palacaya tutu li Almasi. **6** Mongo wutato malo lolimo li Isa Almasi odelo Eeya. Sababu uito mamusi timongoli tumumulo motituwau wo-Lio, **7** wau monguwaata to o-Lio. Mamusi timongoli momongu tutumuli mongoli woli Almasi odelo patoio. Mamusi timongoli lebe palacaya maó li Almasi, moduduá wolo u mapilo ngaajali olimongoli. Wau mamusi hilaa limongoli daata-daatalo maó wolo lapali oduólo. **8** Mamusi timongoli mopooó daha-dahaalo maó, diila bolo woluo tamoheinga olimongoli wolo totoonulalo palasapa lomanusia udiila ohuna, bo moó lapalo wambaio. Tootoonulalo palasapa boito diila lonto li Almasi, bo lonto pongotota lomanusia wambaó wau lonto roroo-huwaalo ukawa-kawasa todunia. **9** Sababu ngoáamila watade lo Allahu Taáala bilu-biluloá toli Almasi, deüito-yito to omanusia-Lio. **10** Wau kalana tumutumulo lotituwau woli Almasi, timongoli olo yilohia-Lio tutumulo lealeaatulo maó. Sababu ti Almasi yito tauwa lo timiidu rohu u okawasa wau u hemomalenta. **11** Sababu lotituwau woli Almasi, timongoli matiluuna, diila wolo tuuna upilohutu lomanusia, bo wolo tuuna u pilohutu li Almasi, talopo lopato olimongoli lonto kawasa lo watade u odusa. **12** Sababu tou timongoli yilihualio, timongoli yilobungio peé-peéenta woli Almasi; wau wolo popolihu boito olo, timongoli loduduá luli pilotumu-Lio mai peé-peéenta woli Almasi karena timongoli palacaya tokawasa lo Allahu Taáala tamalo potumulai li Almasi lonto opopate. **13** Muloololio mai, timongoli mailate delo dudelo lorohu kalana timongoli odusa, wau kalana timongoli diila tiluuna delo dudelo lahiri. Bo botia Allahu Taáala lopotumulai olimongoli peé-peéenta woli Almasi. Allahu Taáala malo

ngambungu mai totoonulalo dusaanto, **14** wau diila lopomata tuladu lo bilolinto, u longanjamu olanto wolo dadaa-ntiyaalo u mobuheeto. Wolo lopo salipu maó tulade boito to ayu salipu, Allahu Taaála lolulutaó ngoámila dauwa ode olanto. **15** Tosalipu boito ti Almasi helohutu ngoámila roroo-huwaalo u hemomalenta wau okawasa lowali diilalo okawasa. Timongolio pilowali hepo bibiilohe lotaa dadaata tou ti Almasi lodelo olimongolio debo odelo tawalo todelomo nonaó lo polemboá tutuuyuta lo ohahama-Lio. **16** Sababu uito diila maó polulia tau mopotala olimongoli tomimbihu uáalo wau minuumani, meaalo tomimbihu duduu-laheyaalo buka lo agama, meaalo totoonulalo lameyangi hulala bohu, meaalo tomimbihu dulahu Saabati. **17** Ngoámilalo boito bo wolilu wambaó monto susuu-aliyaalo u mamei dungga mai, bo loilaalo lo susuu-aliyaalo boito yito ti Almasi! **18** Diila maó polulia batanga limongoli popoluhio lotaa u diila tióotutua motidupapa lobatanga wau tamolubo maaaa-laikatiyalo. Tau boito batingga wolo pipii-kilangilio tomimbihu dunia wau u tolomodu hemo pomangga-mangga bibii-bibiilohio, **19** tilinggula diilalo motidihu toli Almasi talowali tauwa. To walungo tauwa li Almasi, ngangaawaalo maó tataalo wau pilo potuwau lotoonula leleetualio, wau mobutu moduduá otohila lo Allahu Taaála. **20** Timongoli mailate peé-peéenta woli Almasi, wau mailopato lonto roroo-huwaalo ukawa-kawasa aalamu botie. Naa, yilongola timongoli hitumula debo odelo taa donggo kiluwaasa lodunia botie? Yilongola timongoli taaluku tou wuwuu-uduwaalo debo odelo utie, **21** "Diila maó podedeta utie", "Diila maó polamita uito", "Diila maó polenggula utie"? **22** Ngoámila wuudu boito yito tomimbihu susuu-aliyaalo u odito pomake diilalo ohuna. Uito bo wuudu wau totoonulalo pongaajali u pilohutu lomanusia. **23** Memangi oontonga maó suáli boito molinepo, wolo nasehatilio alihu tau molubo malaikati, mopodupapa batanga, wau moposikisa batanga; bo ngoámilalo boito diila ohuna u mongotongo napusu lomanusia.

**3:1** Timongoli maluli pilotumu-lai peé-peéenta woli Almasi. Sababu uito mamusi timongoli motolopani u moótapu susuu-aliyaalo u tosologa, toutoonuu ti Isa hemo malenta peé-peéenta wolo Allahu Taaála. **2**



Podulunga maó pikiilangi limongoli to susuu-aliyaalo uteto, diila to susuu-aliyaalo u todunia. **3** Sababu timongoli mailate, wau tutumuli mongoli tutuuó peé-peéenta woli Almasi todelomo Allahu Taaála. **4** Naa, pobutua mai lo tutumulo tutu limongoli yito ti Almasi wau de wonu Tio oontonga, timongoli olo mamó tibilohé peé-peéenta wo-Lio todelomo odudaá-Lio! **5** Sababu uito, pateilo maó totoonulalo otohílaa lodunia u laito mopoósuusa batanga limongoli, debo odelo polohuloto, susuu-aliyaalo udiila paatuti, ohílaa moóhuu, ohílaa u moleeto, wau lolanggamu (sababu lolanggamu yito tutuuwauwa wolo molubo balaahala). **6** Susuu-aliyaalo debo odelo uitolo u mopotoodei muluka lo Allahu Taaála totau-tauwalo tadiila hipo dungohe o-Lio. **7** Mulooolio mai timongoli lohíhilao olo hipoduduá totoonulalo ilohílaa boito, tou timongoli kiluwasalio. **8** Bo botia mamusi timongoli molapi maó susuu-aliyaalo u moleeto monto batanga limongoli: diilalo poingo, meaalo molilau meaalo o pongolaasa molonuó ode taa wewo. Diila maó poluwala sama-samaata monto tunggíli mongoli loiya u momuayo meaalo loiya u kootolo. **9** Diila maó pohimbulo ngota timongota, sababu tutumulo udeedelo wolo ngoáamila watadelio mailinggi limongoli. **10** Timongoli botia mailohia-Lio mai tutumula bohu. Timongoli yito manusia bohu, tadonggo hepo bohua-Lio mololaalaaita lo Talopowali mai olio, deúito-yito Allahu Taaála, loduduá rupa-Lio lohíhilao. Makusudulio yito alihu timongoli motota lo Allahu Taaála wolo wimu-wimumuto ngoáamilalo. **11** Odélo akibati leeto boito madiduu ngoáamila polo híihede towolota taulo Yahudi wau diila Yahudi, taa tiluuna wau taa diila tiluuna, diduu polo híihede towolota lotaa deli wau taa diila oádabu, towolota lowato wau taa lolopato, sababu ti Almasi yito ngoáamilalo sama-samaata wau Tio lotituwau woli mongolio ngoáamilalo! **12** Wutato yito umati lo Allahu Taaála. Allahu Taaála lomonu olimongoli wau lolulaota olimongoli u tolomodu lowali miliki-Lio. Uitolo sababuulio timongoli musí mopo bilohéó modehu hílao, timongoli musí ohílaa mopiohe, motidupapa lohílaa, molumboyoto lohílaa, wau tahangi modutolo. **13** Timongoli musí sabali ngota timongota, wau moáaámbungua wonu woluo taa oniyati ode taawewo. Eeya wolo hílaa sanangi longambungu olimongoli, oditolio timongoli olo musí mohuto

mongambungu ngota timongota. **14** Wau ulebe polohuna daá, deüito-yito: Timongoli musi mototoolianga sababu toliango boitolo u mopotuwau tutu to Mongo wutato ngoáamilalo tilinggula mowali wimu-wimumuto ngoáamilalo. **15** Mamusi totoonulalo putusani limongoli tantuo maó lo odudame uilohi mai li Almasi todelomo hilaa limongoli. Sababu Allahu Taáala lotianga olimongoli u lowali pongawaá lou ngobatanga, alihu timongoli tumumulo todelomo odudame monto li Almasi boito. Mamusi timongoli mosukuru mola. **16** Mamusi totoonulalo pongaajali li Almasi u polupolu lobalakati meitahu ode delomo hilaa limongoli. Mamusi timongoli moáaájalia wau tinggai mongohi nasehati wolo molinepo daá. Popolahua mola Jaburu wau puji poloilaalo momuji wau lalaahuwala lorohu; Popolahua mola ode Allahu Taáala wolo pongo laasa sukuru to delomo hilaa limongoli. **17** Ngoáamila wolo upohutuo meaalo loiya limongoli, mamusi uito pohutuwola wau loiyaalo to tangguli Isa Eeya. Posukurulo mola ode Allahu Taáala ti Paapa tou wolo u pilohutu li Isa olimongoli. **18** Mongo wutato tamowali dile taabua! Podungohulo to dilemu, sababu odi-odieelo mola patutilio piilimu odelo taulo Nasara. **19** Mongo wutato tamowali dile talolai! Toliangi maó dilemu. Diila maó banggangai timongolio. **20** Mongo walaó! Deüito-yito uwajibu olimongoli odelo taulo Nasara u laito modungohe tomongo dulaámu, sababu ui-uitolo umoó sanangi hilaa lo Allahu Taáala. **21** Mongo wutato tamowali tiyamo! Diila maó pongongoto hilaa lomongo walaámu tilinggula timongolio mowali oolia lo halapani. **22** Mongo wutato tamowali wato! Todelomo toonulalo suáli, mamusi timongoli modungohe toli tuanimu u todunia botie. Diila maó podungohe to limongolio bo tou timongolio donggo hemongimato olimongoli, sababu timongoli ohilaa pujiolo. Dungohi maó timongolio wolo hilaa u ihilasi, sababu timongoli mohulumati Eeya. **23** Penu boli kalaja wolo u wohilio olemu, mamusi kalajai maó limongoli wolo hilaa u lealeaatu, debo odelo Eeyaalo tahe bayawa limongoli, wau diila bo manusia. **24** Poótoloma maó deü timongoli mamololimo wuupa monto Eeya. Wolo upilopo dapato lo Eeya ode umati-Lio, uitolo u mawohi-Lio mai olemu. Sababu tuani taótutuulio maó donggo hebayawa limongoli yito ti Almasi lohihilao. **25** Wau penu boli tatoonu tamohutu

totala, mamomanta totoonulalo totalalio boito; sababu Eeya diila momilohe baya.

**4:1** Mongo wutato tamowali tuani! Mamusi timongoli mopohutu maó mongo wato limongoli lou otutu wau aadili. Poótoloma maó deu timongoli olo otuani ngota tosologa. **2** Mamusi timongoli modua mola wolo moólohu wau motidapa-dapatolo maó, sambela molapali oduolo ode Allahu Taála. **3** Poduaalo mola olo ode lamiaatia alihu Allahu Taála mongohi hiyango u mopiohe olamiaatia umopo loladu habari hitua-hituawua u milakusudu hetuuolo pasali li Almasi. Sababu suali boitolo yi watia masaatia botie woluo todelomo tutupa. **4** Poduaalo mola alihu watia mowali motombangai hitua-tuawua u milakusudu hetuuolo boito lou mopata-patatolo maó odelo woloolo mola patutilio. **5** Todelomo wumbuta limongoli wolo tau-tauwalo tadiila palacaya, mamusi timongoli tumumula molinepo wau momake timiidu hiyango lou mopio-piohulo maó. **6** Mamusi susuu-aliyaalo uiloia limongoli laito moósanangi wau moóheinga. Mamusi otaawa maó limongoli woloolo mola patutilio molameta totoonulalo yiyintu lotau. **7** Tei Tikhikus, wutatonto taa otoliango, mamu poótaa mai olimongoli totoonulalo u hitua-tuawua pasali lowatia. Tio tatapu wau molotolo hilao mokalaja peé-peéenta wolamiaatia duolo Eeya. **8** Watia molao mai olio ode limongoli wolo alaasani alihu otaawa limongoli owowoluwoa lamiaatia wau timongoli oliyanga. **9** Tei Onesimus mamonaó peé-peéenta wolei Tikhikus; tio ngotaalio lowaiti mongoli. Tio taa utatapu wau molotolo hilao, wau amiaatia motoliango. Tio wolei Tikhikus mamu poótaa mai olimongoli totoonulalo u hitua-tuawua uilowali totambati lowatia botie. **10** Tei Aristarkus, tawoluo todelomo tutupa peé-peéentaa wolaatia, lolao salamu ode limongoli. Odito olo tei Markusi, walaó mohutato wolei Barnabas. (Timongoli mailaola habari u molutulaó olio wonu tio monaó mai ode limongoli). **11** Salamu olo lonto olei Isa tailunte Yustus olo. Lonto tau-tauwalo Yahudi tamalo malacaya li Isa Eeya, bo timongolio toulota wambaio tabotia hemokalaja peé-peéenta wolaatia u hemoponaó tuugasi lonto Allahu Taála. Timongolio tióotutua loótulungi daá olaatia. **12** Salamu lonto olei Epapras.

Tio olo lonto waiti mongoli. Tio wato li Isa Almasi, talaito hemoduá mola lou tatapu wau molotolo hilao ode limongoli. Hepilo hilelio wolo tióotutua to Allahu Taáala alihu iimani limongoli mowali molotolo wau timongoli tióotutua mowali moontapo, alihu timongoli lou wimu-wimumuto ngoáamilalo modungohe tou otohila lo Allahu Taáala. **13** Hesilakusia lowatia lohihilao deú tio malo kalaja tióotutua ode limongoli wau ode tau-tauwalo to Laodikia wau Hierapolis. **14** Ti Dokuteri Lukasi, taa otoliangonto, wau tei Demas lolao salamu olimongoli. **15** Potunggula maó salamu lamiaatia ode mongo wutato Nasara to Laodikia; olo odelei Nimpa, wau tojamaá tahe motabia tobelelio. **16** Lapataó tulade botie pobacalio maó olimongoli, tolo paniyalo alihu uito pobacaalo olo tojamaá u to Laodikia. Odito olo timongoli lohihilao musi mobaca maó tulade umaa laololio mai monto Laodikia ode limongoli. **17** Wau polelea maó olei Arkhipus, "Poolapata maó tuugasi uilohi mai olemu huna momaya to Eeya." **18** Salamu lonto olaatia, Paulus. Watia lohihilao talo luladei tulade botie. Diila maó lipata deú watia donggo todelomo tutupa! Pohileaala duá Eeya mobalakati mai olimongoli. Hulumati lamiaatia, Paulus 1th>

**1:1** Mongo wutato jamaá to Tesalonika, talowali umati lo Allahu Taáala wau Eeya Isa Almasi: Amiaatia, deúito-yito Paulus, Silas wolei Timotius momolohone bolo potala Allahu Taáala ti Paapanto wau Eeya Isa Almasi mongohi mai balakati wau salaamati olimongoli. **2** Amiaatia laito hemo sukuru mola ode Allahu Taáala sababu Wutato ngoáamilalo. Timiidu amiaatia moduá mola ode Allahu Taáala wau ti Paapanto, amiaatia laito hemoéela olimongoli. Amiaatia laito hemoduá mola olimongoli. Ileela lamiaatia woloolo mola timongoli helo pobiloheó todelomo huhutu deú timongoli palacaya li Almasi, woloolo mola timongoli helo toliango taa wewo tilinggula lomaya olimongolio, wau woloolo mola timongoli helo tiwunela lou motoheeto to Eeyanto Isa Almasi. **4** Otaawa lamiaatia, Mongo wutato, deú Allahu Taáala lomonu olimongoli wau malo lulaota olimongoli lowali u tolomodu miliki-Lio. **5** Sababu amiaatia mopo tunggulai Habari Mopiohe tolimongoli diila wolo loiya wambaó, bo olo wolo kawasa wau wolo Rohullah. Wau amiaatia mayakini daá lou u

obobanari lo Habari Mopiohe boito. Otaawa limongoli woloolo mola amiaatia tumutumulo ode polohuna daa limongoli tou amiaatia woluo tohuungi mongoli. **6** Timongoli loduduá obaaya lamiaatia wau obaaya lo Eeya. Eleponu timongoli lodutolo daa, timongoli lololimo maó wolo wengahe habari upilo habari lamiaatia olimongoli. Owengahe boito yilohi mai lo Rohullah. **7** Woleeto timongoli lowali obaaya ode ngoáamila taulo Nasara u to Makedonia wau Akhaya. **8** Sababu tumulalo maó monto olimongoli, habari pasali lo Eeya malo loladu demola Makedonia wau Akhaya. Wau diila bo uito wambaio; tumbaó habari pasali woloolo mola timongoli palacaya to Allahu Taáala malei dungga ode utoonulalo maó, tilinggula amiaatia diilalo palalu molojiya wolo-wolo. **9** Ngoáamila tau boito hemobisala pasali woloolo mola timongoli lololimo olamiaatia tou amiaatia omoóomolu lonaó mai ode limongoli. Timongolio helo bisala tomimbihu woloolo mola timongoli lololaa maó totoonulalo balaahala wau lonaó mai ode Allahu Taáala tuwa-tuwaulo tatumu-tumulo u motiwato to o-Lio. **10** Timongolio helo bisala olo pasali woloolo mola timongoli motiwunela to podungga mai lo Walaó Allahu Taáala monto Sologa, deúito-yito ti Isa Almasi, tamaa pilotumulai lo Allahu Taáala lonto opopate. Ti Isa boitolo olo tamopo aahu olanto monto muluka lo Allahu Taáala u mamei dungga mai.

**2:1** Mongo wutato! Otaawa limongoli lohihilao deú nonaó mai lamiaatia ode limongoli ohunalio. **2** Otaawa limongoli deú tou amiaatia diipo lonaó mai ode limongoli to Tesalonika, amiaatia maa ilalinaya wau hilinalio to Pilipi. Bo eleponu dadaata tahelo tehengi olamiaatia, Allahu Taáalanto malongohi mai olamiaatia obobuheli u lopohabari olimongoli Habari Mopiohe u asaliilio mai lonto o-Lio. **3** Titiango lamiaatia olimongoli diila tuwaulio lototala; diila olo wolo makusudu udiila mantali meaalo u mohimbulo. **4** Diila! Amiaatia diila mobisala u mopo sanangi hilaa lotau, bo u mopo sanangi hilaa lo Allahu Taáala, talotesi hilaa lamiaatia. Sababu amiaatia ilanggapu paatuti lo Allahu Taáala u mopo loladu Habari Mopiohe boito. **5** Otaawa limongoli lohihilao deú diila peéenta maó amiaatia oloiya mopio meaalo mopolapalo olimongoli u moluuó

totoonulalo makusudu u langgamu. Allahu Taáala sakusi-Lio! **6** Amiaatia diila olo hipo tolopania u moótapu poloilaalo momuji monto tau -- mopio monto olimongoli meaalo monto taa wewo. Otutuulio maó odelo rasulu li Almasi, amiaatia mowali wambaó mohile wolo moóohuu u hitua-tuawua monto olimongoli. **7** Bo amiaatia lotihutu osikapu molumboyoto lohilao tou woluo tohuungi mongoli debo odelo tiilo ngota hemolaala mongo walaio. **8** Sababu toliángo lamiaatia, amiaatia dapadapato mongohi mai olimongoli diila bo wambaó Habari Mopiohe u monto Allahu Taáala boito, bo tutumulo lamiaatia olo. Sababu amiaatia motoliángo daá olimongoli! **9** Tantu donggo oéela limongoli woloolo mola sikisaalio amiaatia helo tolopani wau lohípate. Hui wau dulahu amiaatia hipo kalajawa alihu amiaatia diila mopoósuusa penu boli ngotaa maó limongoli tou amiaatia mopo lolade Habari Mopiohe monto Allahu Taáala boito olimongoli. **10** Amiaatia tumutumula louí mantali, otutu wau diila oáaibu toli mongoli tamalo malacaya li Almasi. Timongolilo mongo sakusi lamiaatia, odito olo Allahu Taáala. **11** Otaawa limongoli deu amiaatia lopohutu olimongoli ngota-ngota debo odelo tiyamo ngota helo pohutu maó tomongo walaio. **12** Amiaatia monaseehati mai olimongoli, amiaatia mongohi mai sumangati olimongoli wau amiaatia mohuntulai alihu timongoli tumumulo odito rupalio tunggula moó sanangi hilaa lo Allahu Taáala. Sababu Allahu Taáala malo tianga olimongoli u lowali walaga Dunia Bohu lo Allahu Taáala wau moólaasa oduduá-Lio. **13** Donggo Woluo poli suáli tuwau uwewo ulohutu olamiaatia lolapali oduólo ode Allahu Taáala. Suáli boito yito, deu tou amiaatia lopo tunggulai habari lonto Allahu Taáala olimongoli, timongoli lodungohe wau lololimo habari boito diila odelo habari lonto manusia, bo odelo habari u tutuulio tutu lonto Allahu Taáala. Tiolo tadonggo kalakalaja todelomo batanga limongoli tapalacaya li Almasi. **14** Mongo wutato, suáli uilaasa limongoli mailo laasawa olo lo jajaa-maáalo Allahu Taáala to Yudea talowali miliki li Almasi. Timongoli loólaasa polodutolo lonto wimbihu bangusa limongoli lohihilao, tutuuwauwa debo odelo ilolaasawa lo jajaa-maáalo Allahu Taáala to Yudea boito towimbihu tau-tauwalo Yahudi. **15** Tau-tauwala boito talomate li Isa Eeya wau mongo nabi yila-yilateelo maó, wau helo



ngalinaya olamiaatia. Miluusu limongolio ngoáamila tau, wau Allahu Taaála sama-samaata diila sanangi olimongolio. **16** Tumbaó timongolio helo monto-montolo olamiaatia u mopohabari to babaa-ngusawalo diila Yahudi habari umoo aahu babaa-ngusawalo boito. Lou odito tau-tauwalo Yahudi boito he iloduhenga mola tulusi duduu-sawaalo limongolio dilumutu jumulaalio wimu-wimumuto. Wau botia timongolio pulitio ilodungga muluka lo Allahu Taaála! **17** Bo mongo wutato, tumulalo mai amiaatia lobuaála ngopeé mola woli mongoli -- lobuaála tomato bo diila tohilao -- amiaatia bo lebe mooloolo olimongoli wau helo tolopani tióotutua u muli modunggaya woli mongoli! **18** Amiaatia oniyati u mobiilohe wolimongoli; wau watia, malo himontala peéenta poóluo, bo Ibilisi helo montolo olamiaatia. **19** Otutu timongolilo halapani wau oweengahe lamiaatia. Sababu de wonu ti Isa Eeya meidungga mai, wau ito motaalua wo-Lio, yi timongolilo tamamowali obobangga lamiaatia! **20** Memangi timongolilo obobangga wau oweengahe lamiaatia!

**3:1** Pulitio maó owoooloolo lamiaatia diilalo iloótonga. Sababu uito amiaatia lomikiilangi mola lebe mopiohe amiaatia tolaalio tutuwau to Atena, **2** tou amiaatia donggo molao mota wutatonto tei Timotius. Tio ngotaalio tamoomayawa Allahu Taaála tahemo kalaja peé-peéenta wolamiaatia u hemo pohabari Habari Mopiohe pasali li Almasi. Amiaatia molao mai olei Timotius ode limongoli alihu tio mopolotolo olimongoli wau mohuntula olimongoli u lebe palacaya li Almasi. **3** Lou odito diaaluo penu boli ngotaa maó monto olimongoli tatumouli sababu totoonulalo polo dutolonto botie. Otaawa limongoli lohihilao deu totoonulalo polodutolo boito leituwoto tolanjana lo Allahu Taaála ode olanto. **4** Tou amiaatia donggo peé-peéenta woli mongoli, amiaatia malo poótaa mai olimongoli leimulo deu ito mamodutolo. Wau uito memangi tutuulio tutu malotoduo; otaawa limongoli lohihilao uito. **5** Uitolo sababuulio watia molao mai olei Timotius, sababu watia ohilaa daá motota woloolo mola ololaii mongoli todelomo suáli palacaya li Almasi. Watia molawalo bolo Ibilisi moó heinga olimongoli tilinggula ngoáamila tolopani tioopate daá lamiaatia mowali dia ohuna. **6** Botia tei Timotius malo hualingai wau malo

potunggulai olamiaatia habari moéengahe pasali woloolo mola timongoli palacaya li Almasi wau totoolianga. Tio lopoótaa mai olamiaatia deu timongoli laito hemoéela u mopiohe olamiaatia todelomo hilaa limongoli. Wau timongoli ohilaa modunggaya wolamiaatia, debo odelo amiaatia olo ohilaa modunggaya woli mongoli. **7** Uitolo sababuulio, Mongo wutato, todelomo totoonulalo u mototolo wau polodutolo lamiaatia, amiaatia iloliyanga lohabari pasali limongoli. Palacaya limongoli toli Almasi mopoudaá hilaa lamiaatia, **8** tilinggula botia amiaatia molaasa otu-otutuulo maó tumutumulo, asali timongoli debo tihutihula molotolo, motituwau wolo Eeya. **9** Donggo boli udaálio pongolaasa sukuru lamiaatia ode Allahu Taáala tou ngoáamila oweengahe u ilolaasawa lamiaatia totalu-Lio sababu timongoli. **10** Hui dulahu amiaatia helo molohone mola to Eeya wolo lealeaatu lohilao, alihu amiaatia mowali modunggaya lohihilao woli mongoli u mopo wimumuto wolo upalaluo limongoli ode palacaya toli Almasi odelo woloolo mola patutilio. **11** Pohileaala dua Allahu Taáala ti Paapanto lohihilao, wau Eeyanto Isa mopo payadu mai dalalo olamiaatia u modunggaya woli mongoli! **12** Pohileaala dua Eeya mohutu mai olimongoli lebe motolianga ngota timongota wau lebe motoliango ngoáamila tau, tilinggula toliangi mongoli boito hemo duduuhenga mola tutuuwauwa debo odelo toliango lamiaatia olimongoli. **13** Lou odito Eeya mamu poolotolai hilaa limongoli, tilinggula timongoli mantali wau diila oáaibu totalu lo Allahu Taáala ti Paapanto, tou Eeyanto Isa meidungga mai peé-peéenta wolo ngoáamila taa lowali miliki-Lio.

**4:1** Pulitio maó Mongo wutato, amiaatia malongohi mai obaaya olimongoli tomimbihu woloolo mola timongoli musi tumumulo u moposanangi hilaa lo Allahu Taáala. Memangi timongoli maa tilumumulo debo odelo uito. Bo botia tokawasa li Isa Eeya, amiaatia mohile lou tióotutua olimongoli wau mohuntulai alihu timongoli lebe motolopani maó todelomo suáli boito! **2** Sababu mailotaawa limongoli popoo-tuhatawalo u mailohi mai lamiaatia olimongoli tokawasa li Isa Eeya. **3** Uti-utieelo kahandaki lo Allahu Taáala: Alihu timongoli tumumulo tomodu ode o-Lio, mantali, mopo walaheó totoonulalo huhutu u huloto. **4** Timiidu

mongo lolai towolota limongoli musu motota woloolo mola tumumulo wolo dilelio, wolo dudelo umoó sanangi hilaa lo Allahu Taáala wau manusia. **5** Diila maó potitumulo moduduá u otohilaa lonapusu ode dilemu, debo odelo u hepilohutu lotaa diila hitootawa lo Allahu Taáala. **6** Todelomo suáli debo odelo uito, diila maó pohutu totala penu boli ngotaa towutatio, meaalo mohimbulo olio. Omoóomolu amiaatia malo poéelai lou moóohuu olimongoli, deu Eeya mamu hukuumani mai tahipo hutua totala debo odelo uito. **7** Allahu Taáala motianga olanto, diila alihu ito tumumulo huloto, bo alihu ito tumumula wolo dudelo u moéengahe hilaa-Lio. **8** Taa diila mololimo pongaajali botie, diila bo potouli lomanusia, bo olo diila mololimo Allahu Taáala talongohi mai Rohu-Lio u mantali olimongoli. **9** Diilalo palalu olamiaatia moluladei olimongoli pasali woloolo mola timongoli musu motolianga mongo wutato tango iimani. Timongoli lohihilao mailaajali lo Allahu Taáala u mototooliango. **10** Wau suáli botie mapilo biloheó limongoli ode ngoáamila wutato ngoiimani to ngoilanggubu Makedonia. Bo, Mongo wutato, amiaatia mohile lou tióotutua, alihu tutumuli mongoli mowali lebe mopioheó. **11** Potolo panilo mola tumumulo lou duoduóoto wau diila motutuu-wanga wolo suáli lotaa wewo. Mamusi timongoli mokalaja mopeehu lijiki lohihilao, odelo woloolo mola u mapilo malentai lamiaatia omoóomolu olimongoli. **12** Wonu timongoli tumumulo odito, timongoli diila motiwunela penu boli olo tatoonu, wau tau-tauwalo tadiila palacaya li Almasi, mamu hulumati olimongoli. **13** Mongo wutato, amiaatia motohilaa alihu timongoli motota maó u otutulio tomimbihu tau-tauwalo tamailate; alihu timongoli diila motisukari lohilao debo odelo tau-tauwala wewo tadiila oharapani. **14** Ito palacaya deu ti Isa mailate wau luli tilumumulai. Uito sababuulio ito palacaya olo deu Allahu Taáala mamuli mopo tumulai ngoáamila taa palacaya li Isa wau tamailate, alihu timongolio tumumulo peé-peéenta wo-Lio. **15** Tomimbihu suáli boito, uti-utieelo pongaajali lo Eeya u ohilaa potunggulo mai lamiaatia olimongoli: Tou ti Isa Eeya meidungga mai, ito tadonggo hitumula diila tameimulo wolo tau-tauwalo tamailate leimulo. **16** De malaikati udaá mamu ngibode mola wolo suala u moóohuu wau torompeti lo Allahu Taáala potingohulo odelo tuoto lopalenta. Lapataó ti Isa Eeya lohihilao

mamo tuhutai monto sologa, wau tau-tauwalo Nasara tamailate mapo tumulo-Lio mai meimulo. **17** Lapatao uito, ito tadonggo tumutumulo tou boito mapee-peenta binta-o-Lio woli mongolio ode delomo heengo mola modungaya wolo Eeya todulente. Lapatao ito mamo tibiluloa wolo Eeya ohiheo-hiheolo ma'o. **18** Sababu uito, mamusi timongoli mopopo'o lotolao lohilao, lou momake tataa-heyaalo botie.

**5:1** Mongo wutato, diila palalu amiaatia moluladei olimongoli omolua wakutuulio utuhata susu-aliaala boito mamotoduo mai. **2** Sababu otaawa limongoli lohihilao lou mopatato deu Dulahu podudungga mai lo Eeya boito mamei dungga debo odelo tamootaowa meidungga tou hui. **3** Wonu bolo tau molojiya, "Ngoamilalo aamani wau moduoto," yi tou boitolo debolo timongolio maodungga lou obobinasa, wau diaaluo penu boli ngotaa ma'o tamolahi. Suali boito debolo motoduwolo mola, debo odelo laasa mongongoto u meidungga ode taabua ngota tamamo potutu mai. **4** Bo timongoli diila taa hitumula todelomo u modiolomo, tilinggula dulahe boito mo'o salabangu olimongoli debo odelo podudungga mai lo tamootaowa. **5** Wutato ngoamilalo yito taa hitumula todelomo u mobaango; timongoli leituwoto todulahe u mobaango. Ito diila taa hitumula todelomo u modiolomo, meaalo tatuwo-tuwoto tou hui u modiolomo. **6** Sababu uito ito diila mowali bo hituluhe wamba'o debo odelo taawewo. Ito musi mopo'odaha wau pikiilanginto musi mobaango. **7** Tou hui tau motuluhi, wau tou hui olo tau mowali huwo'alo. **8** Bo ito botie tau-tauwalo tahituwota todulahe u mobaango; sababu uito pikiilanginto musi mobaango. Ito musi debo palacaya to Eeya wau motoliango tau-tauwalo wewo wau motiwunela lou yakini deu Allahu Ta'ala aahu mai olanto. Uitolo tingolo u moduolai olanto todelomo mohipate moluwali u modiolomo. **9** Allahu Ta'ala lolulaotai olanto diila u hukuu-maniyolo, bo u po'ahuwolo, motimbulude to Eeyanto Isa Almasi. **10** Tio yilate ode olanto alihu tou Tio demei dungga mai -- diila otaawa ito donggo hitumula, diila otaawa ito mailate -- ito mowali tumumulo pee-peenta wo-Lio. **11** Sababu uito, mamusi timongoli debo mohu huuntula wau mopopo'o lotolao, tutuuwauwa debo odelo udonggo

hepohutuo limongoli masaatia botie. **12** Mongo wutato, pohile lamiaatia lou tiootutua alihu halagai maó limongoli tau-tauwalo tahipo kalajawa tohuungi mongoli; deuito-yito timongolio tamaa tilulaoto Eeya u motitauwa wau monaseehati olimongoli. **13** Pohutua maó timongolio lou ohulu-hulumatilo maó wau wolo laasa toliango sababu moéela mola wolo u hepilohutu limongolio. Poti tumulolo laito lou mopiohe wau dame. **14** Pohile lamiaatia olo, Mongo wutato, poéela maó lou mopiohe wau dame taa diila mohuto mokalaja; potatapua wau poolotola maó hilaa lotaa hiwoohea; tulungia maó taa palalu tulungialo wau posabalilo totaa ngoáamila. **15** Poódahai maó alihu diila bolo woluo tamomalasi u moleeto wolo u moleeto. Potolo panilo laito mohutu umopiohe, ngota timongotalio wau ode taa ngoáamila. **16** Mamusi timongoli laito motiwengahu, **17** wau poduaalo mola laito. **18** Todelomo totoonulalo owowoluwoa mamusi timongoli mosukuru, sababu uitolo u otohilaa lo Allahu Taáala monto olimongoli odelo taa tumu-tumulo motituwau woli Isa Almasi. **19** Diila maó enggadea Rohullah. **20** Diila maó anggapua gambangi hahaa-baliyaalo uilohi mai lo Rohullah. **21** Tootoonulalo u hitua-tuawua musi tesiyolo, wau umopiohe musi duduálo. **22** Tolai maó totoonulalo u moleeto. **23** Pohileaala duá Allahu Taáala lohihilao talongohi olanto salaamati, mopowali mai olimongoli taa u tiootutua tumumulo tolomodu ode Allahu Taáala. Pohileaala duá Allahu Taáala modaha mai batanga limongoli ngoilanggubulo maó, mopio rohu, nyawa meaalo wawai mongoli, tilinggula diila o aibulio tou Eeyanto Isa Almasi muli meidungga mai. **24** Allahu Taáala, tamalo tianga olimongoli, mamohutu mai suáli boito sababu Tio tatapu wau molotolo hilao. **25** Duái mola amiaatia, Mongo wutato! **26** Posasaa-lamuwalo ngoáamila wolo tataabia lohilao odelo wutato Nasara. **27** Tokawasa lo Eeya, pohile laatia lou tiootutua alihu timongoli mopobaca maó tulade botie ode ngoáamila wutato tango-iimani. **28** Pohileaala duá Eeyanto Isa Almasi mobalakati mai olimongoli. Hulumati lamiaatia, Paulus 2th>

**1:1** Mongo wutato jamaá to Tesalonika, talowali umati lo Allahu Taáala ti Paapanto wau Eeya Isa Almasi! Amiaatia, deuito-yito Paulus, Silas wolei

Timotius. **2** Motiwunela pilopodehu duá Allahu Taáala ti Paapanto wau Eeya Isa Almasi mongohi mai balakati wau salaamati olimongoli. **3** Mongo wutato, amiaatia laito musi molapali mola oduólo ode Allahu Taáala sababu timongoli. Wau memangi patutilio amiaatia mohutu maó odito, sababu timongoli helebe palacaya li Almasi, wau timongoli helebe motolianga ngota timongota. **4** Uitolo sababuulio yilongola amiaatia hemobisala pasali limongoli timiidu amiaatia mobiilohe wolo jajaa-maáalo Allahu Taáala. Wolo weengahe amiaatia helo hungguli maó woloolo mola timongoli debo tióotutua palacaya li Almasi todelomo polo ngalinaya wau polodutolo u ilolaasawa limongoli. **5** Wau teteeyelo loilaalo donggo boli aadiliilio pomutoó Allahu Taáala: Timongoli malo dutolo sikisa sababu Dunia Bohu lo Allahu Taáala, wau sababu uito timongoli maa aaanggapu paatuti u tumuwoto ode delomio. **6** Tio mamohutu mai wolo u aadili, wau mamolontuli polodutolo totaa helohutu olimongoli lodutolo. **7** Wau toli mongoli u masaatia botie dutodutolo -- odito olo to lamiaatia -- Allahu Taáala mamongohi mai olulia todulahu Eeya Isa motuhutai monto sologa wau mopobilohei batanga-Lio wolo mamaa-laikati-Lio tamolotolo boli buheli daá **8** wau wolo tulu ulei-leiita. Tio motuhutai u mohukuumani tau-tauwalo tadiili hipo mandungia Allahu Taáala wau tadiila motohilaa tumumulo motuuúde wolo Habari Mopiohe pasali li Isa Eeyanto. **9** Tau-tauwala boito mamololimo hukuumani obobinasa ohiheo-hiheolo maó, tapilo-Lio ode bulemengio monto ulawota lo Eeya wau monto kawasa-Lio udaá; **10** ngoáamilalo boito mamotoduo todulahe de Tio meidungga mai u poudaáalo lo umati-Lio wau u hulumatío lo ngoáamila taa palacaya. Boli timongoli olo maamaito towolota umati lo Allahu Taáala boito, sababu timongoli malo malacaya tohabari upilopo tunggulai lamiaatia ode limongoli. **11** Uitolo sababuulio amiaatia laito hipo duáawa mola olimongoli. Amiaatia heloduá mola alihu Allahu Taáala mopowali olimongoli paatuti u tumumulo moduduá kahandaki-Lio; ode ui-uitolo Tio motianga olimongoli. Pohileaala duá Allahu Taáala, wolo kawasaa-Lio mopoópolu mai u otohilaa limongoli u mohutu mopiohe wau mopo wimumuto ngoáamila kalaja u hepohutuo limongoli sababu palacaya li Almasi. **12** Loui odito Eeyanto Isa poudaa mola limongoli, wau timongoli



olo podaa li Isa sababu opopiohe hilaa lo Allahu Taaalanto wau Eeya Isa Almasi.

**2:1** Tomimbihu podudungga mai lo Eeyanto Isa Almasi, wau tomimbihu olanto maambuolio u motibiluloa wo-Lio, uti-utieelo upohile laatia lou tiootutua olimongoli. **2** Diila maó polamemeto molingu meaalo balisa sababu woluolio habari deu malei dungga dulahio lo Eeya Isa muli meidungga mai. Tanu habari boito asaliilio mai monto tuwaulio lo nubuwati, meaalo monto tuwaulio lo pongaajali, meaalo mowaliilio woluo tamoloiya deu amiaatia mapeenta lolulade u odito todelomo tala tuwau lotulade lamiaatia. **3** Penu boli woloolo mola olo, diila maó polulia tau mohimbulo olimongoli. Sababu tou diipo meidungga mai Dulahe boito, mamusi motoduwopo mai suali botie: Dadaata taa mamolapi iimanilio, momaahu li Almasi; wau Manusia Moleeto tamaa leimulo tilantu mai lo Eeya u tumuwoto ode nalaka, mamopo bilohei lobatanga. **4** Loui sombongi tio mamoluwali wau mopolaió lobatanga toitaato ngoamila u hetuboo lomanusia, meaalo ngoamila balaahala u heanggapuo lomanusia Allahu Taaala. Tumbaó tio mamó tihuloaa todelomo Bele lo Allahu Taaala wau mopo malalumu deu tio yito Allahu Taaala. **5** Eelai maó deu watia mapeenta lopoótaa mai ngoamilalo boito tou watia donggo pee-peeenta woli mongoli. **6** Wau otaawa limongoli wolo u masaatia botie donggo hemo ngabuto ngoamilalo boito motoduo mai. De towakutu u matilantu mai lo Allahu Taaala, Manusia Moleeta boito mamó tibilohi. **7** Olootolo u mokalaja maó ololeeto boito malo lumula lokalaja wolo depu-depuhu, bo donggo heoto-otongalio. De wonu tahemo ngotonga olio boito mailinggi, **8** deuito oontonga Manusia Moleeto boito. Yi wonu Eeya Isa meidungga mai Tio mamomate mateelo maó Manusia Moleeto boito wolo napasi monto ngango-Lio wau mopobinasa olio wolo opolutuo owoluwoa-Lio. **9** Manusia Moleeto boito mamoti bilohei wolo kawasa tuwau uleidaa monto Ibilisi. Tio mamopo woluo mai totoonulalo moolinggolabe u hidala-dalaala wau susuu-aliyaalo polu-polutuo u polupolu loimbulo. **10** Tio mamomake tilolahepalo yimbulo u moleeto u mopo lapalo tau-tauwalo tamaa binasa. Timongolio mabinasa sababu diila mololimo wau diila motohilaa habari u

otutu monto Allahu Taáala umowali mopoáahu olimongolio. **11** Uitulo sababuulio Allahu Taáala mopodungga mai olimongolio kawasa tuwau umoó lapalo, tilinggula timongolio palacaya tou wolo udiila otutu. **12** Akibatilio, ngoáamila tau u motohilaa lodusa wau diila palacaya tou otutu boito, mahukuumanio-Lio. **13** Mongo wutato tapilonu lo Eeya! Amiaatia laito musi molapali mola oduólo ode Allahu Taáala tomimbihu olimongoli, sababu tou bohuliolo mai Allahu Taáala malo lulaota olimongoli u piloáahu. Suáli boito lotoduo mai tou wolo u kilalaja lo Rohullah olimongoli u lopowali olimongoli umati lo Allahu Taáala tamantali wau masababu timongoli palacaya tohabari u otutu lonto Allahu Taáala. **14** Woleeto boitolo Allahu Taáala lotianga olimongoli lotimbulude to Habari Mopiohe u pilohabari mai lamiaatia olimongoli. Allahu Taáala lotianga olimongoli, sababu otohilaa-Lio alihu timongoli moduduá moólaasa maó odudaá lo Eeyanto Isa Almasi. **15** Masababu uito, Mongo wutato, tihuloolo motoheeto wau potidihulo tulusi to popoo-ngajaliyalo u mailohi mai lamiaatia olimongoli, mopio wolo imala meaalo wolo leituladu. **16** Pohileaala duá Eeyanto Isa Almasi lohihilao, wau Allahu Taáala ti Paapanto moliyango wau mopoo lotolo hilaa limongoli, alihu timongoli mowali mokalaja wau mopohabari wolo u mopiohe. Sababu Allahu Taáala momonu olanto, wau sababu opopiohu hilaa-Lio Tio mohutu mai olanto tatapu wau molotolo hilao, wau mohalapu u mopiohe.

**3:1** Pulitio maó, Mongo wutato, poduáalo mola ode lamiaatia. Poduáalo mola alihu habari monto Eeya mowali mololadu tulusi wolo molamemeta wau tolimoolio lou mopiohe, tutuuwauwa debo odelo u mailowali olimongoli omoómolulio mai. **2** Poduáalo mola olo alihu Allahu Taáala mopoáahu olamiaatia monto tau-tauwalo tahiruusawa wau moleeto. Sababu diila ngoáamila taa palacaya tohabari monto Eeya boito. **3** Bo Eeya tatapu wau molotolo hilao, Tio mamó poolotolai olimongoli wau moduóla olimongoli monto Ibilisi. **4** Wau amiaatia palacaya tióotutua ode Eeya tomimbihu olimongoli, deú timongoli donggo hemohutu wau matulusi mopohutu maó wolo u ilahulai lamiaatia olimongoli. **5** Pohileaala duá Eeya modelo olimongoli u lebe mongalati maó deú Allahu Taáala

momonu olimongoli wau deü ti Almasi mopoó lotolai olimongoli. **6** Mongo wutato, tokawasa lo Eeya Isa Almasi, poáhu mai lamiaatia alihu timongoli motiwalahe monto ngoáamila wutato, tahitumula hemo tila-tilantingo, wau tadiila moduduá totoonulalo pongaajali uilohi mai lamiaatia olimongolio. **7** Otaawa limongoli lohihilao deü timongoli musi moóbaaya olamiaatia. Amiaatia diila helo tila-tilantingo tou amiaatia woluo tohuungi mongoli. **8** Amiaatia diila helo lamelo uáalo lotau lou diila lomayali maó. Boliio maó hui dulahu amiaatia helo kalaja tiopatea alihu amiaatia diila mopoósuusa penu boli tatoonu towolota limongoli. **9** Amiaatia lohutu maó uito diila sababu amiaatia diila ohaku mohile wolo moóohuu alihu timongoli motulungi mai olamiaatia, bo sababu amiaatia ohilaa mowali obaayawa limongoli. **10** Tou amiaatia donggo woluo tohuungi mongoli, amiaatia longohi mai wuudu botie, "Taa u diila mohuto mokalaja, diila mowali molamelo." **11** Amiaatia molojiya mai utie sababu ilodungohe lamiaatia deü woluo tau-tauwala towolota limongoli tahitumula hemo tila-tilantingo. Timongolio diila helohutu penu boli u hitua-tuawua, ngopohia bo motolo pusingi moulambohe to ulusani lotaa wewo. **12** Tokawasa lo Eeya Isa Almasi poáhu mai lamiaatia tau-tauwala boito wau mopoéelaó, alihu timongolio mokalaja wolo aamani wau mopeeahu lijiki limongolio lohihilao. **13** Bo timongoli diila maó potolu mohutu u mopiohe. **14** Tanu de woluo taa diila mohuto moduduá wolo uiloiya lamiaatia todelomo tulade botie. Poódahai maó totaa debo odelo uito, wau diila maó poáawota wolio alihu tio moolito. **15** Bo diila pohutua tio debo odelo muusu; bo naseehatia maó tio odelo ngotaalio lowutato. **16** Eeya yito pobutua mai lou osalaamati olanto. Pohileaala duá Eeya laito mongohi mai salaamati olimongoli todelomo toonulalo suáli. Pohileaala duá Eeya peé-peéenta wolo Wutato ngoáamilalo. **17** Salamu lonto olaatia, Paulus. Watia lohihilao talo luladei bagiyangi botie. Uti-utieelo tuotio u watia mopodutu maó pali lo uluu tou ngoáamila tuladu lowatia. **18** Pohileaala duá Eeyanto Isa Almasi mobalakati mai Wutato ngoáamilalo. Hulumati lamiaatia, Paulus 1ti>

**1:1** Timotius, walauuu utuutu todelomo Eeya! Tulade botie lonto olai,

Paulus, rasulu li Isa Almasi topoáhu lo Allahu Taáala, Tamoo-poáahua olanto wau topoáhu li Isa Almasi, halapaninto. Pohileaala duá Allahu Taáala ti Paapanto wau ti Isa Almasi Eeyanto mongohi mai balakati, odehu hilao wau salamati olemu. **3** Otohilaau alihu yio debo motibiluloá to Epesus debo odelo u mailoiyau mai olemu tou wau lonaó ode Makedonia. Sababu, to Epesus woluo dengolo lota tahi pololade pongaajali udiila otutu, wau yio musi mopo huheli maó olimongolio. **4** Polelea maó olimongolio alihu timongolio diilalo mopoó tuoto tou totoo-mbiluwalo wau wuwuu-ngguliyalo asalilio mai udiila obunto-buntolio. Ngoáamilalo boito bo mopotoodei polohaamawa wambaio, wau diila mopolaiá lanjana lo Allahu Taáala u bo otaawa motimbulude palacaya to o-Lio. **5** Patuju lo naseehatiu boito yito alihu tau mowali motolo miliki hilaa ubelesi wau hilaa u maloótapu tenelo Eeya u mantali, wau tióotutua palacaya to Eeya, wau lou odito timongolio mowali motolianga timongotalio. **6** Woluo ngotayadu tau madiilalo hitumula debo odelo uito, wau yilapalo todelomo polo hahaamawa hamawa udiila ohunalio. **7** Timongolio motohilaa mowali guguu-ruwaalo lo agama, lebe-lebe pomaó timongolio lohihilao diila paahamu tataa-heyaaalo u hepilomake limongolio meaalo susuu-alियाalo u tilooowoli limongolio lou odito yakini. **8** Otaawanto deu butoo lo agama yito mopiohe, wonu pohunaalo tou patutilio. **9** Tantulo maó musi eelaalo deu butoo boito pilohutu diila ode taa mopiohe, bo ode tahipo lambangawa butoo, tahileeta, taa loluusa, ode taa odusa, taa diila o agama, taa osiipati dunia, ode taa momate tiilo wau tiyamolio mate-mateelo maó, tabiasaalio tahi pomatea mate-mateelo maó, **10** ode tau-tauwalo tahi hulotowa, homoseki, tamootaowa, tamoo himbulowa, mongo sakusi yimbulo, wau boli tatoonu wambaio tahipo hutua susuu-alियाalo u bubuu-lemenga wolo pongaajali u otutu. **11** Pongaajali boito woluo todelomo Habari Mopiohe upolo loladio pilo malacayalio olaatia, deuito-yito Habari Mopiohe monto Allahu Taáala taúdaá wau paatuti pujiolo. **12** Watia molapali mola oduolo odeli Isa Almasi Eeyanto. Tio malongohi mai lotolo olaatia u lomaya o-Lio, wau Tio longanggapu olaatia lotuuude ode tuugasi boito, **13** eleponu omoómolu watia helo pitana wau longalinaya wau lohina o-Lio. Bo Allahu Taáala lomonu mai olaatia, sababu tou boito watia

diipo palacaya, oditolio diila otaawa laatia wolo umusi pohutuo laatia. **14** Wau tumbaó watia hiluntua daá odehu hilaa lo Eeyanto. Tio longohi mai owalia laatia u palacaya o-Lio wau motoliángo ngota timongota. Owalia boito yilohi-Lio olanto ngoáamila tamalo tituwau woli Isa Almasi. **15** Otutu banari loiya botie -- sababu uito paatuti tolimoolo wau palacayalo tióotutua --: "Ti Isa Almasi leitungga mai ode dunia botie u lopoáahu taa odusa." Wau watiaalo taa odusa wau tamoleeta daá. **16** Bo tumbaó masababu uitolo Allahu Taáala lomonu mai olaatia, alihu ti Isa Almasi mowali mopo bilohei ngoáamila osabali-Lio olaatia, taa odusa daá botie. Wau utie mowali tuwaulio obaaya ode ngoáamila tau u demaa palacaya to o-Lio wau moótapu tutumulo tutu wau ohiheo-hiheolo maó. **17** Allahu Taáala, Olongia lo totoonulalo jamani, paatuti hurumatiolo wau pujiolo laito, sababu Tiolo taó hiheo-hiheolo maó, tadiila oontonga wau tatuwa-tuwaulo! Amin. **18** Timotius, waláuuu! Tuugasi botie pomalacayáú mai olemu, u moéela mola tahuli lo Allahu Taáala upilo tunggulai lomongo nabi todelomo jamaá tomimbihu batangamu. Mamusi tahuli boito mowali tomeu olemu todelomo polo hipate u mopiohe. **19** Pohipatelo lou motidihu to opopalacaya u otutu wau wolo hilaa u maloótapu tinelo Eeya umantali. Woluo tau-tauwalo tadiila hipo mandungia suala lohilaa u maloótapu tinelo Eeya olio, tunggula loáantulu lomaó opopalacaya limongolio. **20** To wolotalio yito tei Himeneus wolei Aleksander. Taduulota boito mahi lukuumaniú lou lohudu olio ode Ibilisi, alihu timongolio mobalajali maó u mohuheli momuayo Allahu Taáala.

**2:1** Bohu-bohulio, pohile lowatia wolo tióotutua alihu polohone, tabia, wau duá sapaáti wau lapali oduólo potunggulolo ode Allahu Taáala duólo ngoáamila tau; **2** ode mongo olongia wau ode ngoáamila taa u hidihima kawasa. Pohilelo mola alihu ito mowali tumumula duóduóoto wau aamani ode Allahu Taáala wolo piili upaatuti. **3** Ui-uitolo umopiohe wau moósanangi hilaa lo Allahu Taáala, Tamoo-poáahua olanto. **4** Otohilaa lo Eeya alihu ngoáamila tau poáahuwolo wau motota u otutu. **5** Sababu, bo woluo tuwau Allahu Taáala, wau bo woluo ngota tamoo-wolotawa towolota Allahu Taáala wolo manusia, deúito-yito ti Isa Almasi. **6** Tio

ngotaalio lomanusia tamalohudu batanga-Lio u lolopato ngoáamila tau lonto duduu-sawaalo limongolio. Woleeto Allahu Taáala lopobilohu towakutu u tiluhata, deu Tio ohilaa alihu ngoáamila tau poáahuwolo. **7** Wau uitolo sababuulio watia ilahula lonaó ode tau-tauwalo tadiila Yahudi u lolopoladu olimongolio habari pasali lo opopalacaya u otutu. U tiloówoli mai laatia botie yito otutu, watia diila mohimbulo. **8** Otohilaa lowatia alihu penu boli toutoonu kaumu mongo lolai modua mola wolo hilaa u mantali, diaaluo oyiyingo meaalo polo buutola. **9** Mamusi kaumu mongobua modadai batangalio wolo motuuúde wau momake boó oáadabu. Diila maó pomake putu lohuwoó umowali potuuwota lotau meaalo papaa-keyaalo hulawa meaalo mutiaala, meaalo boó u himahalea. **10** Boliio maó, mamusi taabua modadai batangalio wolo totoonulalo huhutu u mopiohe odelo woloolo mola upaatuti ode taabua u motabia ode Allahu Taáala. **11** Taabua musu mobalajali lou motipoóyo batanga wau modungohu. **12** Watia diila mopoótutu taabua mongaajali meaalo momalenta mongo lolai; timongolio musu motipoóyo. **13** Sababu tabohu-bohulo pilowali mai yito tei Adamu wau lapatio maó bolo ti Hawa. **14** Wau diila tei Adamu, bo taabuwalo wambaó tailo yimbuloa, tilinggula lolambanga palenta lo Allahu Taáala. **15** Eleponu odito, taabua mamoáahu lou mopotutu mai walaó, asali tio wolo moti dupapa lohilao debo palacaya li Almasi wau debo motoliango taa wewo wau tumumulo tolomodu ode Allahu Taáala.

**3:1** Otutu banari loiya botie, "Taa mohuto mowali tamoo-ngimatoa jamaá, ilohilaa tuwaulio lokalaja ulaba-labaalo ohalaga." **2** Ngotaalio tamoo-ngimatoa jamaá mamusi taa diila oáaibu, bo ngota dilelio bua, motota mongotongo batanga, molinepo, wau taratibu; tio ohilaa mololimo tau to belelio, wau mowali mongaajali tau; **3** diila tahe huwoáalo, meaalo tamohuto moloohulua. Boliio maó, tio musu molumboyoto hilao wau mohuto lou dame. Tio diila mowali bo momilohe doi. **4** Tio musu motota mongatulu dileaalio lou mopiohe, wau mongaajali mongo walaio u modunghe wau mohulumati olio. **5** Sababu wonu taa diila motota mongatulu dileaalio lohihilao, woloolo mola tio mowali mongatulu jamaá lo Allahu Taáala? **6** Ngotaalio tamoo-ngimatoa jamaá diila mowali taa u



boheli lowali Nasara, sababu de tio mowali sombongi lapatao odungga lolaaanati debo odelo Ibilisi muloololio mai. **7** Tio mamusi taa otilanggula mopiohe todelomo ulipu; sababu wonu diila odito, yi tio mahinaa lotau, tilinggula modehu to uluu lo Ibilisi. **8** Tamoo mantua jamaa mamusi olo taa u mopiohe wau tuulusi; diila bo momilohe doi wau diila mohuto mongilu angguru laba-labaalo daata. **9** Timongolio musi motidihu motoheeto wolo hilaa u malootapu tinelo Eeya belesi to pongaajali opopalacaya lo Nasara u mapilo ilaalo mai lo Allahu Taala. **10** Patutilio timongolio tesiyopo meemulo wau wonu loilaalo timongolio diila oaaibu, deuto timongolio mowali momantu todelomo jamaa. **11** Dile limongolio taabua olo mamusi taa mopiohu, diila taa motohilaa mopo loladu loiya udiila ohunalio. Musi otaawa maoo limongolio mongotongo batanga wau juujulu todelomo ngoaamila suali. **12** Tamoo mantua jamaa musi bo odile taabua ngota. Musi otaawalio mongatulu mongo walαιο wau dileaalio loo mopiohu. **13** Tau-tauwalo tahi pomantua loo mopiohu todelomo jamaa, mahulumatiolo wau mowali helebe buheli mobisala tomimbihu opopalacaya limongolio toli Almasi. **14** Wau mohalapu diilalo mohiheo wau mamobiilohe wolemu. Eleponu odito, wau moluladei olo tulade botie olemu, **15** alihu wonu wau langgali mai, mailo taawamu woloolo mola ito musi tumumulo, odelo ngaalaa lo Allahu Taala, deuto-yito jamaa lo Allahu Taala tatumu-tumulo. Jamaa botieelo tadebo odelo wolihi potihulo wau pobowo pongaajali u otutu monto Allahu Taala. **16** Diaaluo penu boli ngotaa maoo mowali momaahu, malo odito udaalio hitua-tuawua u milakusudu hetuoo lo agamaanto; Tio lopo bilohei batanga todelomo rupa lomanusia, wau piloilaalo otutu lo Rohullah, wau iloontonga lo maaa-laikatiyalo. Habarilio pilopo toliyongo towolota lo babaa-ngusawalo, wau Tio pilalacaya to ngoilanggubu dunia wau bilinta-lo mola ode sologa.

**4:1** Rohullah wolo pintalo lotahuda mai deu to maaa-sawaalo umamei dungga mai, ngotayadu tau mamolapi iimanilio, momaahe li Almasi. Timongolio mamoo dungohe to roroo-huwaalo umopo lapalo wau modudua popoo-ngajaliyalo lorohu u moleeto, **2** upilopo tunggulai lotimbulude totau-tauwalo munapiki tamoo-himbuloa. Hilaa u malootapu tinelo Eeya

lotau-tauwala boito malo diólomo. **3** Timongolio mongaajali tau u diila monika wau diila molamelo uáalo utantu-tantu. Lebe-lebe pomaó uáalo boito pilowali mai lo Allahu Taáala u mowali tameloolo wolo polo lapali oduólo o-Lio lotau-tauwalo tamalo malacaya li Almasi wau malotota pongaajali u otutu lonto Allahu Taáala. **4** Totoonulalo hitua-tuawua u pilowali mai lo Allahu Taáala boito mopiohe, wau diaaluo penu boli tuwau maó u musi anggapuolo halamu wonu matilolimo wolo lapali oduólo ode Allahu Taáala. **5** Sababu balakati monto Allahu Taáala wau duá mohutu uáalo boito mowali halale. **6** Wonu yió mopoáajali maó ngoáamilalo boito tomongo wutato ngoiimani, yió mamowali tamoomayawa li Isa Almasi tahemo kalaja wolo mopiohu. Wau yió malaito molaala hilaamu wolo tahuda lo Allahu Taáala u pilalacayanto, wau wolo totoonulalo pongaajali u otutu uma diluduámu ngotilonggadu botie. **7** Walahe maó sisii-litawalo tahayulu udiila ohuna. Mamusi latiyolo batangamu ode tutumulo u otabia. **8** Latihani lobatanga bo ngoidi hunalio, bo latihani lorohu ohuna todelomo totoonulalo suáli, sababu wanto-wantohe danti ode tutumulo tomaasa botie wau maasa u mamei dungga mai. **9** Suáli boito otutu wau paatuti tolimoolo wau palacayalo tióotutua. **10** Uitolo sababuulio ito mohipate wau mokalaja moóohui, sababu ito motiwunela lealeaatulo maó ode Allahu Taáala tatumu-tumulo; deuito-yito Tamoo-poáhua ngoáamila tau, laba-labaalo daá tau-tauwalo tapalacaya. **11** Pongaajalia maó ngoáamilalo boito wau ahulilo tau-tauwala moduduó. **12** Diila maó polulia penu boli ngota monganggapu olemu dupadupapa sababu yió donggo muda. Boliio maó, mamusi yió mowali obaayawa lotau-tauwalo palacaya todelomo loiyamu wau piilimu, todelomo dudelomu motolianga ngota timongota wau palacaya li Isa Almasi, wau wolo tutumulumu ubelesi. **13** Sambela uito, dilumutu wau de monaó mai, yió musi motiíotutua mopobaca maó Kitabi ode tau-tauwalo, wau mohuntulo boli mongaajali olimongolio. **14** Diila maó palongamu momake ponu monto Rohullah uilohi-Lio mai olemu toí mongo tauíwa lojamaá mopodutu lo uluí limongolio toitaato lunggongumu, wau mongo nabi mopo tunggulai tahuli lo Allahu Taáala tomimbihu batangamu. **15** Kalajai maó ngoáamilalo boito louí tióotutua alihu ololaiumu oontonga lotaa ngoáamila. **16** Imatowalo batangamu wau

imatowa maó olo pongajalimu. Mamusi yio tatapu wau molotolo hilaa mohutu ngoáamilalo boito, sababu lou odito yio mamó poáahu mopio batangamu lohihilao meaalo tau-tauwalo tamo dungohe olemu.

**5:1** Diila maó oingowamu lou palangi taa lebe mohuhula wolemu bo heinga maó tio modungohe totoonulalo loiyamu debo odelo tio tiyamamu. Pohutua maó tau-tauwalo tahi muudawa odelo wutato, **2** wau mongobua tamohuhula odelo tiilamu. Mongobua tahi-muudawa mamusi pohutuwoomu odelo tawali-yalimu, wolo hilaa ubelesi. **3** Hulumatia maó mongo janda taótu-otutuulo maó tumutumulo tutuwau. **4** Bo wonu ngotaalio lojanda omongo walaó meaalo mongo wombu, timongolio boitolo tamusi bohu-bohulio wohiyalo huhama deu timongolio wajibu mopoó tuotaó kaumu ngaalaá limongolio, wau momaalasi budi lomongo dulaá wau linene limongolio. Sababu suáli uitolo umoo sanangi hilaa lo Allahu Taála. **5** Janda taótu-otutuulo maó tutuwau, wau diaaluo maó penu boli tatoonu tamowali molaala olio, bo wambaó hemo tiwunela to Allahu Taála. Hui wau dulahu tio tulusi modua ode Allahu Taála umei tulungi o-Lio. **6** Bo janda taa ohilaa tumumulo motisana-sanangi, mailate penu boli tio donggo tumutumulo. **7** Potunggula maó totoonulalo potuhata botie olimongolio, alihu timongolio tumumulo diila oáaibu. **8** Bo wonu woluo taadiila molaala mongo ilatolio, lebe-lebe maó ngaalaalio lohihilao, tau boito momaahe opo-palacayalio; tio lebe moleetaó wolo taa diila palacaya. **9** Bo janda tamo poópolu dadaa-ntiyaalo u wumbutio mola botie tamowali potuwotolo ode delomo daputali lomongo janda; umululio musi diila ilangi lou wolomo pulu lotaunu, muloololio mai bo peénta lonika, **10** otaawa lo ulipu odelo taabua tahemohutu susuu-aliyaalo u mopiohe odelo humayaalio: malo poudaá mola mongo walaio lou mopiohe, sanangi mololimo tataa-muwaalo tamo hepito ode belelio, mohinta tau-tauwalo tapalacaya, tau-tauwalo momantu tahi susawa, wau mohutu lou otu-otutuulo maó totoonulalo kalaja mopiohe u hidala-dalaala. **11** Diila maó potuwota ode delomo daputali boito mongo janda tadonggo himuudawa. Sababu wonu timongolio molaasa obirahi yi timongolio mowali molotolai daá, wau timongolio ohilaa muli monika, wau mololaa

maó li Almasi. **12** Yi timongolio ototala sababu diila moéela danti uilohi olimongolio. **13** Donggo poli timongolio mopo loya-loyaali wakutu lou tumuwoto lumualo bele lotau. Wau ulebe mobulilo poli, deüito-yito deu timongolio mobalajali mopitana tanggulo taawewo moulambohe uluusani lotau wau mobisala susuu-aliyaalo udiila paatuti bisalaalo. **14** Uitolo sababuulio otohilaau alihu mongo janda himuudawa muli monika, umoo toduo mai walaó wau mongulusi dileaalio, alihu totoonulalo diila ohiyango u mopobuli-buliilo tanggulunto. **15** Saababu woluo mongo janda tamai lapalo loduduá Ibilisi. **16** Bo wonu ngotaalio taabua Nasara o pongawaa ngaalaa tamalowali janda, tio musu momantu janda boito; diila maó polulia jamaa tamomanta olimongolio. Lou odito jamaa mowali momantu maó mongo janda tasama-samaata diila omongo ilaato. **17** Tauwa lojamaa tamohutu tuugasilio lou mopiohe, paatuti halagaalo poooluo piuwa, lebe-lebe daa timongolio tamoolohu mohutuba wau mongaajali. **18** Sababu todelomo Kitabi tulatulade, "Sapi udonggo hemo lumbe-lumbetaa pale u mohinggi botu lopale monto panggeangio, diila maó tongguuma tunggilio", olo, "Tamokalaja ohaku mololimo wuupalio". **19** Diila maó tolimowa potuludu ode ngotaalio tauwa lojamaa, ngopohia wonu poo tohetola losakusi duulota meaalo lebe maó. **20** Taa u mohutu dusa, mamusi diniyolo totalu lo ngoaamila jamaa, alihu taa wewo mamoohe. **21** Totalu lo Allahu Taala, Isa Almasi, wau maaa-laikatiyalo tailo tulaota, pohileu tiotutua alihu yio moduduá totoonulalo potuhata botie lou diila olantobu penu boli olo tatoonu, lou diila motiwamba-wambaó. **22** Diila maó polamemeta daa mopodutu lo oluu ode tahingota-ngotaawa huna moposaaha pomuduálo olio odelo tamoomayawa to Eeya. Wonu taa wewo odusa, diila maó poduduá odedealio ode delomo dusa boito. Dahai maó batangamu alihu debo belesi. **23** Diilalo pongilu taluhu wambaio; pongilulo olo ngoidi angguru u momantu hihilinga lou aalo todelomo ombongumu, sababu yio tingga maito mongongoto. **24** Dusa ngobutaó lotau, tou diipo adiliyola, maa iloontonga lou mopatato. Bo dusa lotaa wewo bolo otaawa lapatio maó. **25** Odito olo totoonulalo huhutu u mopiohu huaa oontonga. Wau penu boli udiila gambangi oontonga, diila mowali tulusi meituuó.

**6:1** Tau-tauwalo Nasara tamowali wato, musu monganggapu deu tituani limongolio paatuti hulumatiolo, alihu tau diila mowali mopobulilo tanggulo Allahu Taála meaalo pongajalinto. **2** Mongo wato u tituanilio taulo Nasara, diila mowali mopoleme oli tuanilio sababu timongolio tinggai taulo Nasara. Tumbaó timongolio wajbulio momaya oli tuani limongolio boito wolo lebe mopioheó, sababu tituani tabilaya lou mopiohe boito yito peé-peenta taa palacaya tapilonua. Ngoáamilalo botie mamusi pongaajalimu wau ponasehatia maó. **3** Titaalo-tita mongaajali maó pongaajali uwewo woleeto wau diila akolo lou pongaajali u otutu monto Eeyanto Isa Almasi, wau wolo pongaajali lo agamaanto, **4** deúito-yito taa sombongi wau diila motota lolo-loolo! Ngongotio yito motohilaa mohaamawa wau motaameta tomimbihu totoonulalo istila tilinggula mopotoodei hilaa mohiihia, polo buálawa, pitana, molantobu u diila mopiohe, **5** wau polo hiihede huhama udiila opulitio. Dalalo pikiilangi lotau-tauwala boito malo puntuhu wau diilalo otutu. Timongolio molantobe mowali kaya monto agama. **6** Memangi agama mongohi paeeda u leidaá, wonu tau olulia lou wolo mililikiilio. **7** Sababu diaaluo penu boli hitua-tuawua u dilelonto mai ode delomo dunia botie, wau diaaluo olo penu boli hitua-tuawua umowali deloonto lumualo! **8** Oditolio, wonu woluo uáalo wau boó, uito malo tuheta. **9** Bo taa motohilaa mowali kaya, oheinga wau ohentobe lou hilaa u hidala-dalaala u mohulodu wau u moluusa. Tilolahepe otohilaa boito mohutu tau mowali moántulu wau topotala. **10** Sababu monto hilaa lodoi boitolo, tumoodei totoonulalo u moleeto. Woluo ngobutaó tau u bo mohilapita doi tilunggula madiilalo loduduá pongaajali lo Nasara, lapataó timongolio ilodungga lou polodutolo dadaata ulopo áantulu hilaa limongolio. **11** Bo yio yito miliki lo Allahu Taála, oditolio yio musu mopo halaheó ngoáamilalo boito. Potolo panilo mowali taa otutu tomato lo Allahu Taála, tamotiwato to Allahu Taála, palacaya li Almasi, motolianga timongotalio, sabali todelomo polodutolo, wau opiili molumboyoto. **12** Pohipatelo tióotutua u tumumulo odelo taulo Nasara alihu yio moówahu pahala lo tutumulo u tutuulio tutu wau ohiheo-hiheolo maó. Sababu woleeto boitolo Allahu Taála motianga olemu tou yio momasisi maó totalu lotaa dadaata deu yio palacaya li Almasi. **13** Wau

botia totalu lo Allahu Taála talongohi mai nyawa ode totoonulalo u hitua-tuawua, wau totalu li Isa Almasi talongohi sakusi u otutu tolei Pontius Pilatus, pohileú utie monto olemu: **14** Dungohe maó ngoáamila palenta boito wolo hilaa belesi wau diila oáaibu dilumutu todulahe muli podungga mai li Isa Almasi Eeyanto. **15** Podungгаа-Lio mai matantuwo lo Allahu Taála lohihilao towakutu u tuhata. Tiolo Takawasa tuwa-tuwaulo; Tio udaá, Olongia lo totoonulalo olongia, wau Eeya lo totoonulalo tuani. **16** Tiolo wambaó tadiila mowali kawasaalio lo opopate; Tio tumutumulo todelomo tinelo udiila mowali tahudelo boli lo tatoonu. Diaaluo penu boli ngotaa maó manusia tamaa peéenta loóonto o-Lio, meaalo mowali moóonto o-Lio. To o-Liolo hulumati wau kawasa u ohiheo-hiheolo maó! Amin. **17** To tau-tauwalo tahi kayawa todunia botie, mamusi pohilemu maó alihu timongolio diila maó sombongi wau diila maó poharapu tou babaa-langiyalo udiila tatapu -- debo odelo suáliilio wolo okokaya. Timongolio musi motiwunela to Allahu Taála talongohi mai totoonulalo u hitua-tuawua olanto lou labalabaalo daatalio alihu olaasanto maó. **18** Pohilea maó olimongolio u mopobilohu umopiohe, u mohutu dadaata susuu-aliyaalo umopiohu muura lohilao wau motohilaa mongohi. **19** Lou odito timongolio mohimoá halata umowali pohongi u mopiohe ode maasa u mamei dungga mai. Wau woleeto timongolio mamootapu tutumulo u ohiheo-hiheolo maó, deuuto-yito tutumulo u tutuulio tutu. **20** Wolo umapilo malacaya olemu, dahai maó uito tióotutua, Timotius! Walahe maó totoonulalo loiya udiila ohuna wau polo hahaamawa tomimbihu susuu-aliyaalo u wolo talatala tilanggula "Pongotota". **21** Sababu woluo tahi poloiyawa deu timongolio motolo miliki pongotota boito, tilinggula timongolio lopalinga lonto popoo-ngajaliyalo lo Nasara u pilalacaya limongolio muloololio mai. Pohileaala dua Eeya mobalakati mai to Mongo wutato. Hulumati lamiaatia, Paulus 2ti>

**1:1** Timotius, walauuu taa otoliango! Wai, Paulus, moluladei tulade botie olemu, wau motiwunela hinta Allahu Taála ti Paapa wau Eeyanto Isa Almasi mongohi mai balakati, odehu hilao wau salaamati olemu. To kahandaki lo Allahu Taála, wai piluduó lowali rasulu li Isa Almasi wau



yilao-Lio u mopohabari pasali lo tutumulo upilo danti mai lo Allahu Taáala. Tutumulo boito tolimonto sababu motituwau woli Isa Almasi. **3** Wau molapali mola sukuru ode Allahu Taáala tahe bayau wolo hilaa u maloótapu tinelo Eeya u belesi debo odelo upilohutu linenemoyaaú tou muloololio mai. Wau laito molapali oduólo ode Allahu Taáala motiidu wau moéela mola olemu todelomo dua, mopio dulahu meaalo hui. **4** Wau moéela mola osuukali lohilaamu. Uitolo sababuulio wau ohilaa daa modungaya wolemu alihu wau tióotutua mowali meengahu. **5** Iloéelau mola to opo-palacayamu u tióotutua toli Almasi, tutuuwauwa debo odelo opo-palacaya linenemu Loisa wau tiilamu Eunike. Wau wau yakini yio olo palacaya debo odelo uito. **6** Sababu uito wau mopoéelai olemu u mopotumulo ponu uilohi mai lo Allahu Taáala olemu tou wau lopodutu maó lo uluuuu toitaatumu. **7** Sababu Rohu uilohi mai lo Allahu Taáala olanto, diila Rohu u mopowali olanto mowali moohe. Boliio maó Rohullah boito mopowali olanto mowali molotolo, polupolu lo toliango wau mowali mongotongo batanga. **8** Sababu uito diila maó poolito mosakusi pasali lo Eeyanto, wau diila maó poolito olo pasaliu, tatilu tupaalio sababu Tio. Boliio maó, mamusi yio wolo olootolo monto Allahu Taáala, moduduá modutolo ode Habari Mopiohe boito. **9** Allahu Taáala lopoáahu olanto wau lomonu olanto alihu mowali umati-Lio lohihilao. Tio lohutu mai uito diila patopatoá tou wolo umaa kilalajanto, bo patopatoá to lanjana-Lio lohihilao wau odehu hilaa-Lio. Tio longohi mai odehu hilaa-Lio lotimbulude li Isa Almasi tou dunia botie diipo pilowali-Lio mai. **10** Wau masaatia, Allahu Taáala lopo bilohei odehu hilaa-Lio boito olanto wolo pilodungga mai li Olongia Tamoo-poáahua olanto ti Isa Almasi. Ti Isa lopo olaaheó kawasa lo opopate wau lodelo tutumulo ubakaa lotimbulude to Habari Mopiohe boito. **11** U mopohabari Habari Mopiohe boitolo Allahu Taáala lomuduá olaú lowali rasulu wau guru. **12** Uitolo sababuulio wau helo dutolo ngoáamilalo botie, bo wau debo yakini, sababu otaawaú tutu tatoonu taa pilalacayaú. Wau yakini deu wolo u mapilo malacaya-Lio mai olaú, Tio olo mambo modaha mai dilumutu to Dulahe Kiama. **13** Dudui maó lou tióotutua pongaajali u otutu u mailohiu mai olemu. Wau mamusi yio debo motidihu to iimani wau toliango u malowali

milikinto sababu lotituwau woli Isa Almasi. **14** Loui bilantua lo Rohullah tatumu-tumulo todelomo olanto, mamusi poódahamu maó tióotutua susuu-aliyaala ohalaga u mapilo malacaya mai olemu. **15** Otaawamu deui ngoámila taa tomadala lo Asia malo lolaa maó olai, leituwota olo tei Pigelus wau tei Hermogenes. **16** Bo ngaalaa lei Onesiporus mapoo-poóngolo loéengahe hilaaui. Pohileaala dua Eeya motuhatawa mopo bilohei odehu hilao ode limongolio. Eleponu wau todelomo tutupa, tei Onesiporus diila moolito to owowoluwoi boito. **17** Odito leitungga mola to Roma, tulusi tio helo tolopani malo lolohe olai tunggula tio lodunggaya wolai. **18** Wau otaawamu deui to Epesus tio poo-poódaata lotulungi olai. Pohileaala dua Eeya mopo bilohei odehu hilao olio todulahe Eeya momutoai ngoilanggubu umati lomanusia.

**2:1** Timotius, walaiuuu! Mamusi yio mowali molotolo wolo odehu hilao uilohi mai de olanto, sababu ito lotituwau woli Isa Almasi. **2** Pongajali u omoómolu mailo dungohemu lonto olai totalu lotaa dadaata, mamusi pomalacayamu maó ode tau-tauwala tamowali palacayalo wau tamotoloó mongajali taa wewo. **3** Yio musi moduduó modutolo odelo pajule li Isa Almasi taatatapu wau molotolo hilao. **4** Pajule ngota tadonggo otuugasi, diila tamotolo pusingi batangalio wolo uuu-luasanilio lohihilao, sababu tio ohilaa mopo sanangi hilaa li eeyanggulio. **5** Olaragawani ngota diila tamowali juala todelomo mobaalia, wonu tio diila modungohe wuwuu-uduwaalo. **6** Tamoomengia tamalo kalaja moóohui, tio-tiolo tabohu-bohulio ohaku moóotapu tilapula lou pilomulio. **7** Toloéelai mola wolo u tiloówoliu mai boito, sababu Eeya mamongohi mai olemu owalia u mongalati ngoáamilalo. **8** Poótoloma maó utie: Habari Mopiohe upilo habariu mai boito yito habari pasali li Isa Almasi, wali lei Dauda; Tiolo ti Almasi tamaaluli tilumumulai lonto opopate. **9** Sababu helo pohabari Habari Mopiohe boitolo, wau lodutolo; tumbaó dilumutu yilantealio debo odelo ngotaalio lo tamoleeto. Bo tahuda lo Allahu Taála diila mowali lantealo. **10** Uitolo sababuulio wau sabali helomanta ngoáamilalo boito duolo polohuna daa ode tau-tauwalo tamaa tilulaoto Allahu Taála, alihu timongolio olo moóoduo oáahu uilohi lotimbulude li Isa Almasi, wau u

tilunuhe lo odudaá ubakaa. **11** Otutu banari loiya botie, "Wonu ito mailate peé-peéenta wo-Lio, ito matumumula olo peé-peéenta wo-Lio. **12** Wonu ito debo sabali, ito mamomaalenta olo peé-peéenta wo-Lio. Wonu ito momaaha o-Lio, Tio olo mamomaaha olanto. **13** Wonu ito diila tatapu wau molotolo hilao, Tio debo tatapu wau molotolo hilao, sababu diila mowali Tio mobulemenga wolo batanga-Lio lohihilao." **14** Mamusi yio mopoéelaó tau-tauwala tomimbihu ngoáamilalo botie. To talu lo Allahu Taáala, naseehatia maó timongolio alihu diila mohaamawa tomimbihu totoonulalo istila. Uito diila ohunalio, tumbaó bomoó tolonggalo totau-tauwalo tamodungoheó. **15** Yio mamusi motolopani tióotutua alihu toloákuwo lo Allahu Taáala odelo taa patuti mokalaja duólo Allahu Taáala. Potolo panilo alihu yio diila moolito tomimbihu kalajamu, bo mongaajali maó lou tuhata totoonulalo pongaajali u otutu monto Allahu Taáala. **16** Walahe maó bibii-salawaalo udiila ohunalio wau u mohina Allahu Taáala. Bibii-salawaalo debo odelo uito bo mohutu totau helebe moleetaó. **17** Pongaajali lotau-tauwala boito moloópo debo odelo ngongoto kankeri utilahuó. Towolota limongolio leiwaito tei Himeneus wolei Piletus. **18** Timongolio malo palingo lonto pongaajali u otutu, wau lopo ambulati opopalacaya lotaa ngobutaó. Timongolio hipo loiyawa deu obobongu monto opopate malo todoo. **19** Bo daasali motoheeto u pilohutu mai lo Allahu Taáala diila mowali etuwolo. Toitaatio tulatulade utie, "Eeya moóonuhu tau-tauwalo miliki-Lio", wau "Taa u molojiya deu tio miliki lo Eeya, tau boito musi mohuheli mohutu huhutu utalatala". **20** Todelomo bele uleidaá woluo pakaakasi u hidala-dalaala. Woluo upilohutu monto talaá meaalo hulawa, bo woluo olo u monto ayu meaalo huta. Woluo upomake to opopalalu upolu-polutuó, wau woluo olo upomake to opopalalu biasa. **21** Taa umopo belesi maó batangalio monto ngoáamila u moleeto, tau boito mapomake to opopalalu upolu-polutuó. Tio mowali miliki u tolomodu wau ohuna odeli tuanilio. Tio pilodapato u pomake totimiidu kalaja umopiohe. **22** Walahe maó totoonulalo osanangi lotaa himuudawa. Potolo-panilo mola u tumumulo moduduá u otohila lo Allahu Taáala, tatapu wau molotolo hilao to pongaajali-Lio wau motoliángo timongotalio, wau ohilao tantalamu. Poti tumulolo odito peé-peéenta woli mongolio tahi pongibode

mei tulungi to Eeya wolo hilaa ubelesi. **23** Diila maó poduduá todelomo polo haamawa lotaa hihuulode tadiila motota lolo-loolo. Otaawamu deu ngoáamila boito bomoo toodei polo taameta. **24** Tamo kalaja ode Eeya diila paatuti motaameta; tio musi aaluti ode taa ngoáamila wau mowali mongaajali tau lou mopio wau sabali. **25** Tio musi wolo molumboyoto mongaajali tau-tauwalo taóhilaa moluwali; pohileaala duá Allahu Taáala mongohi hiyango ode tau-tauwala boito u molilihu to duduu-sawaalo limongolio wau motota lo pongaajali u otutu. **26** Lou odito timongolio mowali muli mongalati batangalio wau molopato monto hentobu lo Ibilisi umalo tawalo olimongolio wau lomakusa olimongolio loduduá otohilaalio.

**3:1** Poótolama maó utie: To duduu-laheyaalo pulitio mamotoduo mai dadaata u moósuusa. **2** Manusia mamo polohuna daá batangalio lohihilao, opiili mato lodoi, sombongi wau yinao molatabu. Timongolio ohilaa mohina tau, mopalakala wolo mongo dulaá, diila motota mosukuru, wau molonuó susuu-aliyaalo u rohu. **3** Timongolio diila motolianga ngota timongotalio, diila motohilaa mongohi ambungu, timongolio motohilaa mopoó-poóleeto tanggulo taa wewo, motohilaa momakusa, timongolio palangiyolo, wau diila motohilaa u mopiohe. **4** Timongolio motohilaa mohiyanati, sombongi wau diila opikiilangi hayahaya. Timongolio lebe motohilaa to osanangi lodunia lou moduduá to Allahu Taáala. **5** Eleponu dudelo lahiri, timongolio moduduá moponaó uwajibu to agama, bo diila mololimo tuwango monto agama boito lohihilao. Walahe maó tau-tauwalo debo odelo uito. **6** Woluo towolota limongolio tamaa tilumuwoto ode bebee-leyaalo, lapataó helo heinga mongobua molulupuhu taódusa dadaata daá wau kiluwaasa lo ilohilaa hidala-dalaala. **7** Mongobua boito mololaalaita mei aajali, bo diila peéenta maó motota lo pongaajali u otutu monto Allahu Taáala. **8** Odelo woloololio mola tei Yanes wolei Yambres loluwali olei Musa tou muloololio mai, odito olo tau-tauwala boito moluwali pongaajali lo Allahu Taáala. Pikiilangi limongolio maloluusa, wau iimani limongolio malo ahumo. **9** Bo timongolio diila tamoó aata wolo-wolo, sababu ohulodi mongolio maótaawa lotaa ngoáamila, debo odelo u ilolaasawa lei Yanes wolei Yambres olo. **10** Bo yio malo dudua

popoo-ngaajaliu, watadeu, wau patuju lo tutumuluu. Yio lohihilao maloonto woloolo mola wau tiootutua palacaya li Isa Almasi wau motolianga timongota lomanusia. Otaawamu olo osaabali wau otaabau. **11** Yio maloonto olau ilalinayalio wau wau lodutolo. Otaawamu ngoamila u lotoduo mai olau to Antiokhia, to Ikonium, wau to Listra; wau otaawamu ngoamila u dilutolau! Bo Eeya lopoahu mai olau lonto ngoamilalo boito. **12** Memangi ngoamila taohilaa tumumulo motabia wau motituwau woli Isa Almasi maa alinayaalio, **13** Hiambola tau-tauwalo tahileeta wau tau-tauwalo tahipo himbuloa malebe moleetao. Timongolio mohimbulo totaa wewo lebe-lebe pomao penu boli timongolio lohihilao ilowimbuloa olo. **14** Bo tomimbihu olemu, Timotius, mamusi yio debo motidihu tou popoo-ngajaliyalo u otutu umaa pilongajali mai olemu wau u pilalacayamu otu-otutuulo maó; sababu otaawamu tatoonu guguurumu. **15** Musi eelamu mola deu tumulalo mai yio donggo kikiai malotota lo Kitabi. Kitabi boito mowali mongohi olemu pongotota umoó toduo oahu motimbulude to iimani odeli Isa Almasi. **16** Ngoamila u tulatulade todelomo Kitabi ililhami mai lo Allahu Taála wau ohuna u mongaajali u otutu, u modini wau mopoopiohe utilala, wau u mongaajali maó manusia alihu tumumulo moduduá u otohilaa lo Allahu Taála. **17** Wolo Kitabi boito taa u momaya to Allahu Taála mowali poimumutolo wolo ngoamilalo wimu-wimumuto ode tilolahepe kalaja u mopiohe.

**4:1** Ti Isa Almasi mamuli meidungga mai ode dunia botie u momutoó tau-tauwalo tahitumula wau tamailate; wau Tio mamei dungga u momalenta odelo Olongia. Masababu uito pohileu lou tiootutua olemu totalu lo Allahu Taála wau li Isa Almasi: **2** Mamusi yio mopohabari habari monto Allahu Taála boito, wau tulusi mohuntulo alihu tau modungoheo, wolo timongolio mohuto meaalo diila. Mamusi yio mopoyakini tau, mopoelaó totala, wau mohuntula olimongolio. Aajalia maó tau lou sabali daá. **3** Sababu mamei dungga wakutuulio tau diilalo mohuto mololimo pongaajali u otutu. Boliio maó, timongolio mamu duduá u otohilaa limongolio lohihilao, wau mohimoá dadaata guru huna aajaliolo maó susuu-aliyaalo umopiohe dungohe lobulonga limongolio. **4**

Timongolio mamolaube bulonga tou otutu, bo mamopotala bulongalio ode totoonulalo tombilu. **5** Eleponu odito, yio musi mongaawasa batangamu todelomo owowoluwoa penu boli woloolo mola olo. Posabalilo todelomo polodutolo, pohutua maot kalajamu odelo tamo pohabaria Habari Mopiohe boito wau ponaowalo lou mopio-piohulo maot uwajibu olemu odelo tamoomayawa Allahu Taala. **6** Tomimbihu batangau, malei dungga wakutuulio wau maamate odelo bake ode Allahu Taala. Bolo ngopee mola wau mamololaa maot dunia botie. **7** Wau malodudu lobalia lou lopio-piohulo maot wau malooma pilito pulitio. Wau debo molotolo hilao toli Almasi demola pulitio. **8** Wau masaatia wuupa lo ohohaama hemohima olai. To Dulahe Kiama, Eeya, Hakimu taadili boito mamohudu mai wuupa boito olai, sababu wau tumutumula lopiiohe wolo Allahu Taala. Wau diila bo wau wambaot tamaa mololimo wuupa boito, bo olo ngoamila tahi wimawa podudungga mai lo Eeya wolo hiwoloola daa. **9** Potolo panilo u molinggahei daa ode olai, **10** sababu tei Demas malo lolaa maot olai sababu motoliango dunia botie. Tio malonaot ode Tesalonika. Tei Kreskes malonaot ode Galatia, wau tei Titus ode Dalmatia. **11** Bo tei Lukasi talo titolaa maot wolai. Yimailo maot tei Markusi wau delowa mai tio wolemu, sababu tio mowali momantu kalajau. **12** Wau malo poahu olei Tikhikus lonaot ode Epesus. **13** Wonu yio monaot mai, delowa mai jaketi u tilolai maot to Troas tobele lei Karpus. Delowa mai olo bukuu, lebe-lebe maot bubuu-kuwaalo u pilohutu monto alipo kalatasi. **14** Tei Alexander, tamoodupawa tombaha boito malohutu susuu-aliyaalo u moleeto daa to olai. Eeya mamopotala mai olio modudu huhutuulio. **15** Yio lohihilao musi mopoodaha-dahaalo maot to olio, sababu tio motehengi daa habari monto olanto. **16** Tou wau bohulio daa loowoli poduulua lo batangau, diaaluo penu boli ngota tawolai; ngoamilalo lololaa maot olai. Pohileaala dua Allahu Taala diila mopotala olimongolio todelomo suali botie! **17** Bo Eeya wolai. Tio longohi mai lotolo tilinggula wau mambo helo pohabari ngoamilalo Habari Mopiohe boito, alihu odungohe lotaa ngoamila tadiila Yahudi. Wau wau lolopato lonto opopate. **18** Memangi Eeya mamopotato olai monto motiidu tolopani u moleeto ode olai. Tio mamodelo olai wolo moahu ode



delomo yilaidia-Lio tosologa. Mamusi Tio poudaáalo ohiheo-hiheolo maó! Amin. **19** Salamuú odelei Priskila wau Akwila wau ode ngaalaa lei Onesiporus. **20** Tei Erastus bilubiluloá to Korintus, wau tei Tropimusi matilolaau maó todelomo maanea to Miletus. **21** Potolo panilo tióotutua u monaó mai tou diipo sembo lohuhulo. Tei Ebulus, tei Pudes, tei Linus, wau ti Klaudia lolao salamu limongolio to olemu; odito olo ngoáamila wutato ngoiimani wewolio. **22** Pohileaala dua Eeya wolemu. Pohileaala dua Eeya mobalakati mai mongo wutato! Hulumati lamiaatia, Paulus

**1:1** Walauuu Titusi! Wau, Paulus, moluladei tulade botie odelo wato lo Allahu Taáala wau rasulu li Isa Almasi. Wau tilulaoto wau yilao-Lio u motulungi totau-tauwalo tatilulaoto Allahu Taáala alihu mowali molotolo todelomo iimani limongolio. Wau olo musi modelo olimongolio alihu motota lo pongaajali u otutu u pilo ngaajali lo agamanto. **2** Pongaajali boito patopatoá to halapani deu ito mamololimo tutumulo u tutuulio tutu wau ohiheo-hiheolo maó. Allahu Taáala malo danti mai tutumulo boito tou diipo bohulo jamani -- wau Allahu Taáala diila pongalo aakali mohimbulo. **3** Towakutu u tiluhata Allahu Taáala lopoilaalo mai danti-Lio boito todelomo tahulii-Lio. Tahuli boito mapilo malacaya-Lio mai olaui, wau wau lopohabari uito topalenta lo Allahu Taáala Tamoo-poáhua olanto. **4** Titusi, yio yito otu-otutuulo maó walauuu, sababu yio wau wau peé-peéenta malo malacaya li Almasi. Wau motiwunela bolo potala Allahu Taáala ti Paapa wau Isa Almasi Olongia Tamoo-poáhua olanto, mongohi mai balakati wau salaamati olemu. **5** Wau mololaa maó olemu to Kreta alihu yio mowali mongulusi susu-aliyaalo udonggo palalu atuluwolo. Olo, alihu yio momuduáao mongo tauwa lojamaa to motiidu kota. Wau poótoloma maó popoo-tuhatai botie: **6** Tauwa ngota lojamaa mamusi ngotaalio tadiila oaaibu; Tio musi bo odile taabua ngota; mongo walaio patutilio malo malacaya li Almasi wau diila otaawa lotau laputalo wau tadiila mowali atuluwolo. **7** Tamoo-ngimatoa jamaa yito taa u mongulusi kalaja lo Allahu Taáala, tio diila mowali oaaibu. Tio diila mowali sombongi meaalo moingowa, meaalo hehuwoáalo meaalo yinao moloohulua, meaalo bo momilohe doi. **8** Tio musi sanangi mololimo tau

tobelelio, motohilaa lou susuu-aliyaalo u mopiohe, mowali mongotonga batanga, juujulu, mantali wau talatibu. **9** Tio musu motidihu daa to pongaajali u mowali palacayalo, debo odelo umaa pilongajali maó olio. Lou odito tio mambo monaseehati tau patopatoa to pongaajali u otutu, wau mopoéela maó totala lotau-tauwalo tamo tehengi olio. **10** Sababu dadaata tau taohilaa momalakala, laba-labaalo mopiohe tau-tauwalo taa engontielio o agama Yahudi; timongolio hemo himbulo taawewo wolo latabu limongolio. **11** Tau-tauwalo tadebo odelo uito musu pambolalo tunggilio, sababu timongolio mopo tolonggalo dadaata ngaalaa wolo popoo-ngajaliyalo diila pongalo aakali. Timongolio mohutu uito bo sababu motohilaa mololohe paéeda udiila paatuti! **12** Peéenta ngotaalio lonabi limongolio lohihilao, taaasalilio mai lonto Kreta olo, loloiya, "Tau-tauwalo Kreta laito hemo himbulo, wau debo odelo binatangi mongantau u motula wau lantingalo." **13** Wolo uiloiya lonabi boito memangi otutu. Uito sababuulio yio musu modini olimongolio lou moóohuu; alihu timongolio debo motidihu to pongaajali u otutu, **14** wau diilalo motidihu to tilolahepe tombilu lo Yahudi meaalo tilolahepe wuudu u pilohutu lotau-tauwalo tadiila mololimo pongaajali u otutu boito. **15** Totoonulalo u hitua-tuawua yito mantali ode tau-tauwalo tamantali. Bo ode tau-tauwalo tahi opikilangia kootolo wau diila o iimani diaaluo penu boli tuwau maó umantali, sababu pikiilangi wau hilaa u maloótapu tinelo Eeya limongolio malo kootolo! **16** Timongolio hipo loiyawa deu timongolio motota lo Allahu Taála lebe-lebe pomaó huhutu limongolio momaahu o-Lio. Timongolio moólonuo, wau timongolio diila mohuto modungohu; timongolio yito tau-tauwalo tadiila himamboha mohutu u hitua-tuawua umopiohe.

**2:1** Bo yio, Titusi, mamusi yio mopoajali maó pongaajali u motuhatawa. **2** Naseehatia maó mongo lolai tahi huulanga, alihu timongolio mongotongo batanga, molinepo wau tumumulo odelo taa upaatuti hulumatiolo. Timongolio olo musu motidihu to pongaajali u otutu monto Allahu Taála, motoliango wolo wimu-wimumuto ngoáamilalo wau modutolo wolo sabali. **3** Odito olo yio mamusi monaseehati maó mongobua tahi huulanga

alihu piili limongolio motuuide lou wolo upaatuti duolo taa u hitumula tolomodu ode Allahu Taála. Timongolio diila mowali mopitana taa wewo, wau diila mowali otolonga lo minumani umoo huwo. Timongolio musi mopoajali maó susuu-aliyaalo u mopiohe, **4** alihu woleeto timongolio mowali mopoopiohe mongobua tahi muudawa u motolianga dile wau taukekeei, **5** mowali molinepo, tumutumulo mantali mowali tiilo to dileya umopiohu wau taaluku todilelio. Lou odito diaaluo taa mowali mohentea habari monto Allahu Taála. **6** Odito olo, nasehatia maó tahi muudawa alihu timongolio mowali molinepo. **7** Todelomo totoonulalo suali, mamusi yio mowali obaayawa topiili u mopiohe. Wonu yio mongaajali, yio musi juujulu wau otu-otutuulo maó. **8** Pomakea maó tataa-heyalo u molinepo, udiila mowali henteo lotau, alihu lawanimu mowali moolito sababu diaaluo susuu-aliyaalo mobulilo u mowali loiya limongolio pasalinto. **9** Mongo wato musi taaluku toli tuanilio, wau mopo sanangi hilaalio todelomo totoonulalo suali. Timongolio diila mowali mobuutola, **10** meaalo motao. Mamusi timongolio mopo biloheo deu timongolio laito opiili mopiohe wau tatapu molotolo hilao; alihu wolo piili limongolio boito tau momuji pongajali pasali lo Allahu Taála, Tamoo-poahua olanto. **11** Sababu Allahu Taála malo pobilohei odehu hilaa-Lio huna mopoahu ngoilanggubu umati lomanusia. **12** Odehu hilaa lo Allahu Taála boito mongaajali olanto alihu diilalo tumumulo bubuu-lemenga wolo kahandaki lo Allahu Taála wau diila modudua otohilaa siipati lodunia. Ito ilajari-Lio mai u tumumulo todelomo dunia botie lou motota mongotongo batanga, tuulusi wau tatapu molotolo hilao to Allahu Taála. **13** Botia ito donggo hemohima Dulahe u hehalaa-puwonto boito; to Dulahe boito dunia mamooonto odudaa li Isa Almasi, deuito-yito Allahu Taála Taa Laba-labaalo udaa, wau Olongia Tamoo-poahua olanto. **14** Tio malo pobake batanga-Lio olanto u lolopato olanto lonto totoonulalo u hileeta, wau lopowali olanto umati tuwau talo lopato lonto dusa wau talowali miliki-Lio wambaó, wau tamoolohu mohutu u mopiohe. **15** Pongaajalia maó ngoamilalo boito, wau nasehatia boli dinia maó tau-tauwalo tahi podungohe olemu wolo lealeatu tilihula. Diila maó polulia penu boli ngotaalio momilohe olemu dupadupapa.

**3:1** Poéela maó pongawaá lo jajaa-maáamu alihu timongolio taaluku tomongo tauwa wau tamotolo kawasa lipu, wau modungohe boli motidapato mohutu motiidu suáli u mopiohe. **2** Polelea maó olimongolio alihu diila mopitana meaalo motaameta penu boli wolita, bo tumbaó odudelo aaluti. Mamusi timongolio laito odudelo molumboyoto ode taa ngoáamila. **3** Sababu muloololio mai ito lohihilao olo mohulodu, yilapalo wau diila modungohu. Ito pilowato lonapusu hidala-dalaala wau u otohila; ito hitumula wolo tilolahepe ninii-yaitaalo u moleeto wau mohiihia, wau tinggai mololoonuá. **4** Bo Allahu Taáala, Tamoo-poáahua olanto lopo bilohei ponu wau opopiohe hilaa-Lio olanto. **5** Tio lopoáahu mai olanto, diila sababu ito malohutu hitua-tuawua umopiohe, bo sababu Tio lohihilao momonu olanto. Tio lopoáahu mai olaanto lotimbulude to Rohullah, talongohi mai olanto pilotutu bohu wau tutumulo bohu wolo dalala lopobelesi olanto. **6** Allahu Taáala loluwatai Rohu-Lio to olanto lou lotimbulude li Isa Almasi Olongia Tamoo-poáahua olanto, **7** alihu wolo odehu hilaa li Isa, ito muli mopiohe wolo Allahu Taáala wau ito moótodo mai tutumulo u tutuulio tutu wau ohiheo-hiheolo maó u hehala-halapuwo. **8** Loiya botie otutu banari. Otohilaá yio mopo piduduto susuu-aliyaalo botie, alihu tau-tauwalo tapalacaya to Allahu Taáala tióotutua motolopani u mohutu totoonulalo kalaja u mopiohe wau ohuna ode taa ngoáamila. **9** Walahe maó totoonulalo polo buutola udiila ohuna, totoonulalo silita asali uusulu, polo hamawa wau polohuulua tomimbihu butoo lo agama. Ngoáamilalo boito diaaluo hunalio wau diaaluo paéedatio. **10** Taa umoó sababu polobuáya todelomo jamaá, mamusi diniyomu maó peénta poóoluo; lapataó uito didu maó poáawota wolio. **11** Otaawamu deu taa debo odelo uito taloluusa wau duduu-saatio mopo-bukuti deu tio ototala. **12** Molamemeto lapatio maó wau molao mai olei Artemas meaalo olei Tikhikus ode olemu, huáa potolo panilo u monao mai de olau to Nikopolis, sababu wau oniyati motibiluloá mola teto ngotilongadu sembo lo huhulo. **13** Potolo panilo tióotutua u momantu olei Jenas ahali lobutoó boito, wau tei Apolos, alihu timongolio mowali momonggato wau diila okulangia lolo-loolo. **14** Tau-taunto musi mopoóolato mohutu susuu-aliyaalo u mopiohe alihu mowali mopoópolu

totoonulalo koporluani ulaba-labaalo palaluwolo; diila bolo timongolio tumumulo diila ohuna. **15** Ngoáamila wutato tawoluo peé-peéenta wolau, lolao salamu olemu. Potunggula maó salamu lami tomongo waitunto tango iimani. Pohileaala duá Eeya mobalakati mai Mongo wutato ngoáamila Hulumati lamiaatia, Paulus

**1:1** Wutato Pilemon, tamani wau waito lami! Wau, Paulus, ngotaalio lotutupa sababu ti Isa Almasi, peé-peéenta wolo wutatonto Timotius; loluladei tulade botie olemu **2** wau ode jamaá tahiámbua tobelemu; olo to wutatonto, ti Appia wau tamani tangopo hipate, tei Arkhipusi. **3** Ami motiwunela pohileaala duá Allahu Taáala ti Paapanto wau Eeya Isa Almasi mongohi mai balakati wau salaamati olemu. **4** Timiidu watia moduá, watia hemo langgulaó tanggulo Wutato wau molapali mola oduólo ode Allahu Taáala. **5** Sababu watia lodungohe deü Wutato tiótotutua palacaya to Eeya Isa wau motoliánga ngoáamila umati lo Allahu Taáala. **6** Watia moduá mola pohileaala duá potolo wutatonto odelo tau-tauwalo palacaya mamooó toduo mai huhaama ulebe udaá maó to ngoáamilalo balakati u mililikinto sababu lotituwau woli Almasi. **7** Wutato Pilemon, toliángumu ode ngoáamila umati lo Allahu Taáala, loéengahe olaatia wau lohuntulo olaatia! Ngoáamila umati lo Allahu Taáala malowali leengahu sababu Wutato. **8** Masababu uito, odelo ngotaalio lowutato tango iimani, watia mowali wambaio momalentai to Wutato u mohutu maó wolo u musi pohutuo lo Wutato. **9** Bo sababu watia motoliánga to Wutato, watia bo mohile wambaó. Watia botie taa panggola ngota wau botia donggo tataahangi todelomo tutupa sababu ti Isa Almasi. **10** Watia Paulus, moóowoli mai lo hihile tuwau olemu tomimbihu olei Onesimus, walaó watia todelomo li Almasi. Sababu todelomo tutupa botie watia malowali tiyamo lo rohulio. **11** Omoóomolu tio diila ohuna olemu, bo botia tio ohuna olemu, diila bo olemu wambaó bo tolaatia olo. **12** Botia taa u otoliángo lowatia boito muli laolo mai lowatia olemu. **13** Otutuulio maó watia ohilaa molahangi olio peé-peéenta wolaatia debo odelo pobulotalo wolemu, alihu tio mowali momantu olaatia, ngotilonggadu watia tataahangi todelomo tutupa botie sababu helo pohabari Habari Mopiohe

lonto Allahu Taaala. **14** Bo watia diila mohuto motohilaa wolo-wolo wonu Wutato diipo akolo. Watia lebe motohilaa Wutato mohutu uito wolo iloheela lohilao lohihilao; watia diila motohilaa momakusa olemu. **15** Tanu tei Onesimus mobuá monto Wutato u ngopeé mola alihu Wutato mowali muli moótapu olio u ohiheo-hiheolo maó. **16** Masaatia tio diila bo ngotaalio lowato duólo Wutato; tio lebe maó leeto. Tio yito timongota taulo Nasara tailo toliango. Tio ohuna daá olaatia, tidiyolo maó olemu! Tantu tio ohuna daá mopio odelo wato meaalo odelo wutata ngota todelomo Eeya! **17** Masababu uito, sababu Wutato monganggapu olaatia tamani timongota lo Nasara, muli tolimowa maó tei Onesimus tutuuwauwa debo odelo Wutato malo lolimo olaatia. **18** Wonu tio ototala meaalo obiloli olemu, huliilo maó de watia tamaa momanta ngoáamilalo boito. **19** Naa, mopiohulo watia moluladeó lohihilao tewe: Watia, Paulus, mamomayali maó ngoáamilalo. (Tantu diila palalu watia mopoéelai deú Wutato lohihilao obiloli olaatia, deúito-yito tutumulumu u bohu odelo taulo Nasara.) **20** Sababu uito, domi Eeya ntali tulungia mai watia, powengahe mai hilaa lowatia odelo wutato todelomo li Almasi. **21** Watia loluladei tulade botie sababu yakini deú Wutato mamohutu wolo u pohile lowatia. Tumbaó otaawa lowatia Wutato mamohutu lebe maó leeto. **22** Sambela uito, tulungia maó mopodapato huwali olaatia tobelemu, sababu watia motiwunela to Allahu Taaala modungohe duá lo Mongo wutato ngoáaamilalo wau modelo olaatia muli mohualingai ode limongoli. **23** Tei Epapras, tawoluo peé-peéenta wolaatia todelomo tutupa sababu ti Isa Almasi, lolao salamulio olemu. **24** Tolimowa maó olo salamu lomongo tamani lowatia; Markusi, Aristarkus, Demas wolei Lukasi. **25** Pohileaala duá Eeya Isa Almasi mobalakati mai olimongoli. Hulumati lamiaatia, Paulus

**1:1** Tojamani muloololio mai poó-poódaata Allahu Taaala helo tahuda mai odeli nene mayanto lotimbulude tomongo nabi wolo lomake dudelo u hidala-dalaala. **2** Bo tojamani pulitio botie Tio lotahuda mai olanto wolo lotimbulude to Wala-Io. Lotimbulude to Wala-Io botieelo Allahu Taaala lopowali mai ngoilanggubu aalamu. Wau Allahu Taaala malolantu maó deú



Wala-Io botieelo olo taohaku motolo miliki totoonulalo u hitua-tuawua. **3** Tiolo tamopo tinelai odudaá lo Allahu Taáala ulaba-labaalo mobaango; Tiolo gambali u moilaalo monto batanga lo Allahu Taáala lohihilao. Tiolo olo tamolaalai otuwau lo ngoilanggubu aalamu botie wolo kawasa lotahuda-Lio ulaba-labaalo okawasa. Lapataó Tio mopoluasi manusia taa u lopatolo monto duduu-sawaalo limongolio, Tio mamó tihuloá tobele biluloá lo pamalenta to sologa peé-peéenta wolo Allahu Taáala, Tamongawasa ulaba-labaalo malaió. **4** Walaó boito loótapu huhuloá ulebe lolaiá daá wolo malaikati, wau tanggulo uilohi lo Allahu Taáala o-Lio olo lebe hulu-hulumati daá wolo tanggulo uilohi ode malaikati. **5** Diila peéenta maó Allahu Taáala helo tahuda odie penu boli ode ngotaalio lo malaikati, "Yiíolo Wala-U; todulahe botie Wau mowali ti Paapamu." Diila peéenta maó Allahu Taáala helo tahuda odie penu boli tomimbihu malaikati toonu olo, "Wau mamowali ti Paapa-Lio, wau Tio mamowali Wala-U." **6** Bo tosaaáti Allahu Taáala lolao mai Wala-Io tamohuhula daá ode dunia botie, Allahu Taáala lotahuda odie, "Ngoáamila malaikati wajibu molubo Walaó boito." **7** Tomimbihu maaaa-laikatiyalo, Allahu Taáala lotahuda odie, "Allahu Taáala mohutu maaaa-laikati-Lio mowali dupoto, wau tahi pomayawa o-Lio mowali leito tulu." **8** Bo to Walaó boito, Allahu Taáala lotahuda maó, "Bele biluloáa-Mu, oo Allahu Taáala, mabakaa ohiheo-hiheolo maó! Pamalenta-Mu yito pamalenta u aadili. **9** Yió mamotohilaa u aadili, wau mamolonuó udiila juujulu; uitolo sababuulio Allahu Taáala, Allahu Taáala-Mu, molulaota ole-Mu wau mongohi ole-Mu ohulumati u moótodo weengahe, mongilabota lomongo sahabati-Mu." **10** Allahu Taáala lotahuda olo, "Yií, Eeya, tou bohulio lopowali mai dunia, wau Yií lohihilao talo powali hulungo. **11** Ngoáamilalo boito mamooli, wau mowali panggola debo odelo boó; bo Yií diila tamobolió. **12** Ngoilanggubu aalamu botie mapiúwo-Mu debo odelo boó, wau matuloá-Mu wolo uwewo. Bo Yií diila peéenta maó tamobolió, wau tutumulu-Mu diila taópulitio." **13** Allahu Taáala diila peéenta maó lotahuda odie penu boli ode ngotaalio lo malaikati, "Huloóolo towimbihu olowala-U, dilumutu mumusu-Mu potaalukuwo-Mu de ole-Mu." **14** Wonu odito, otutuulio maó maaaa-laikatiyalo boito tatoonu? Timongolio

yito roroo-huwaalo tahi pomayawa to Allahu Taáala, wau tailahula lo Allahu Taáala u momantu tau-tauwalo tamaa mololimo oáahu.

**2:1** Uitolo sababuulio ito musi lebe tióotutua motidihu to popoo-ngajaliyalo umailo dungohento, alihu ito diila maó mololaa iimaninto. **2** Tataa-huliyalo upilo tunggulai lo mamaa-laikatiyalo toli nenemoyanto malo ilaalo otutu, wau taa u diila moduduó meaaló modungoheó mololimo hukuumani u motuúde. **3** Tidiyolo maó wolo oáahu ulebe polu-polutuó monto tataa-huliyalo boito! Wonu ito diila mopoótuota to oáahu boito, ito tantu diila tamolopato monto hukuumani. Sababu Eeya lohihilaalo tabohu-bohulio lopo malalumu oáahu boito, wau tau-tauwalo tamulomulo lodungoheó malo pobukuti u otutuulio to olanto. **4** Ngopohia maó leeto, Allahu Taáala loduduá lopoó toheeto osakusi lotau-tauwala boito lou lopowoluo totoonulalo u moólinggolabe wau susuu-aliyaalo upolu-polutuó wau lolaya-layadeó totoonulalo wowohi lonto Rohullah loduduá otohila-Lio lohihilao. **5** Mamaa-laikatiyalo diila loótapu kawasa lonto Allah Taáala u momalenta dunia bohu umamei dungga mai, deúito-yito dunia udonggo hebisalanto botie. **6** Boliio maó to bagiyangi tuwau todelomo Kitabi tulatulade odie mola, "Manusia boito wolo, oo Allahu Taáala, tilinggula Allahu Taáala ohilaa moéela mai olio? Manusia bo manusia wambaio, bo Eeya hemo poóuotai olio! **7** Bo wolo ngointa lomato Eeya lopowali mai olio lebe dupadupapa ngopeeé wolo malaikati. Eeya longohi mai olio huhuloá u lailaió wau hulu-hulumati, **8** wau lopowali olio takawa-kawasa tou totoonulalo u hitua-tuawua." Naa, wonu loiyalo deú Allahu Taáala mopowali mai manusia "takawa-kawasa tou totoonulalo u hitua-tuawua", uito boliilio diaaluo penu boli tuwau maó udiila to walungo kawasa lomanusia. Eleponu odito, ito diila moóonto botia manusia okawasa tou totoonulalo u hitua-tuawua. **9** Bo ito maloóonto li Isa okawasa! Tio pilo powali lebe dupadupapa ngopeeé wolo malaikati todelomo waktu u ngointa lomato, alihu to opopiohu hilaa lo Allahu Taáala Tio mowali mate duólo ngoáamila umati lomanusia. Ito moóonto o-Lio botia yilohia huhuloá u molamahu wau hulu-hulumati sababu Tio malo dutolo tunggula yilate. **10** Memangi mapatutilio Allahu

Taaala -- talo powali mai totoonulalo u hitua-tuawua ode makusudu-Lio lohihilao -- lohutu li Isa Tamoo-poahua u wimu-wimumuto tutu lotimbulude topolo dutolo. Woleeto Allahu Taaala mowali moheinga taa dadaata u moduduá poudaaalo peé-peéenta woli Isa. Sababu Tiolo pomuó dalalo olimongolio u mowali poahuwolo. **11** Ti Isa lopo belesi manusia lonto duduu-sawaalo limongolio; wau Tio talo pobelesi, wau timongolio tapilo belesi boito peé-peéenta o Allahu Taaala tuwa-tuwaulo. Uitolo sababuulio ti Isa diila loolito longaku olimongolio boito odelo mongo wuta-Tio. **12** Ti Isa loloiya ode Allahu Taaala, "Wau mamó pohabari tomongo wutatu-U pasali lo Allahu Taaala. Wau mamomuji mola Allahu Taaala todelomo dudungaya limongolio." **13** Ti Isa loloiya olo, "Wau mamopo wunela halapani-U ode Allahu Taaala." Wau Tio loloiya olo, "Uti-utieelo Wau peé-peéenta wolo mongo walaó tamailudu mai lo Allahu Taaala de Olau." **14** Masababu tau-tauwalo walaá boito, deúito-yito mahaluku lomanusia tamowali mate, yi ti Isa lohihilao lowali tutuuwauwa woli mongolio wau tumutumulo todelomo owowoluwoa lomanusia. Tio lohutu odito, alihu wolo opopate-Lio Tio mowali mopoántulu Ibilisi u motolo kawasa to opopate. **15** Wolo pohuli boito Tio lopo lopato tau-tauwalo tangotupa lo tutumulo pilohutulio wato sababu moohe to opopate. **16** Malo ilaalo deú diila malaikati tatilulungia-Lio, bo wali lei Abraham. **17** Uti boliilio deú Tio musi mowali motutu wau wolo mongo wuta-Tio todelomo totoonulalo suáli. Wau woleeto boito Tio mowali Iimamu Daá taatapu wau molotolo hilao wau odehu hilao. Wolo bubayaa-Lio boito dusa lomanusia lowali ilambungu. **18** Wau sababu Tio lohihilao mapeéenta lodutolo wau yilimontala, Tio loó tulungi tau-tauwalo tahe ilotuhata loimontala, sababu Tio lohihilao mapeéenta yilimontala wau lodutolo.

**3:1** Mongo wutato timongota lo Nasara tamaa tiliango olo lo Allahu Taaala! Nte pikiilangia mola tióotutua tomimbihu li Isa botie! Allahu Taaala lolao mai o-Lio tolo modu u mowali Iimamu Daá todelomo agama u heduduánto. **2** Tio tatapu wau molotolo hilao to Allahu Taaala tamalo lulaoto o-Lio duólo kalaja boito, debo odelo tei Musa olo omoómolu

tatapu wau molotolo hilao moponao lo tuugasilio tobele lo Allahu Taála.

**3** Boti Isa paatuti mootapu hulumati ulebe udaa maó wolei Musa. Sababu tamomongu bele musi mootapu hulumati lebe udaa maó wolo bele boito wambaó.

**4** Memangi timiidu bele woluo tamomongu maó, bo tamomongu totoonulalo u hitua-tuawua yito Allahu Taála lohihilao.

**5** Tei Musa tatapu wau molotolo hilao odelo tamoomayawa todelomo bele lo Allahu Taála wau mo po tunggulo susu-aliyaalo u mapootaa lo Allahu Taála todulahe u mamei dungga mai.

**6** Boti Isa Almasi tatapu wau molotolo hilao odelo Walaó tatihi-tihula duólo Bele lo Allahu Taála. Wau ito botieelo Bele lo Allahu Taála, wonu ito debo osumangati wau debo yakini u mootapu mai wolo u hehalaa-puwonto.

**7** Sababu uito, debo odelo tahuda lo Rohullah, "Wonu todulahe botie timongoli modungohe suala lo Allahu Taála,

**8** timongoli diila maó potibaangi, debo odelo loluhurumu, tou timongolio lomalakala to Allahu Taála wau lotesi Allahu Taála tohuta hungayo u luasi daa.

**9** 'Mola teto loluhurumu lohimontala Ola--U wau lotesi Ola-U,' tahuda lo Allahu Taála, 'lebe-lebe pomaó timongolio maloóonto huhutuu-U wopato pulu lotaunu mola hiheolio.'

**10** Uitolo sababuulio Wau lomuluka olimongolio wau Wau lotahuda, 'Timongolio laito diila tatapu wau molotolo hilao, wau mopanggu modungohe totoonulalo palentaa-U?'

**11** Wau lomuluka wau lotadia, 'Timongolio diila tatumuwoto odelipu boito u moó huheli peé-peénta wola-U.' "

**12** Mongo wutato, poódaha-dahaalo maó diila bolo woluo to wolotamu ngotaalio tahilaalio odito leetio wau diila o iimani, tilinggula tio mobale wau mohalaha monto Allahu Taála tatumu-tumulo!

**13** Oditolio, alihu diaaluo penu boli ngotaa maó to wolotamu u oimbulowa lodusa, tilinggula motehengi to Allahu Taála, mamusi timongoli monanaa-sehatia timiidu dulahu ngotilonggadu ito donggo tumutumulo todelomo jamani u ilunte "Dulahe Botie" todelomo Kitabi.

**14** Ito ngoáamila yito tamani ngopo hipate woli Isa Almasi, asali ito demola pulitio modihu tióotutua oyoyakini u mililikinto tou bohulio mai.

**15** Uti-utieelo u tulatulade todelomo Kitabi, "Wonu todulahe botie timongoli modungohe suala lo Allahu Taála, timongoli diila maó potibaangi, debo odelo loluhurumu, tou timongolio lomalakala to Allahu Taála."

**16** Naa, tatoonu tau-tauwalo tahe lodungohe suala lo Allahu

Taaala lapatao lomalakala to o-Lio? Ui-uitolo ngoamila tau tadilelo lei Musa yilumualai lonto Masiri, diila odito? **17** Wau to olita Allahu Taaala helo muluka wopato pulu lotaunu mola hiheolio? Ode limongolio taodusa, tailate to huta datahu luasi daa u delita, diila odito? **18** Tou Allahu Taaala lotadia odie, "Timongolio diila tatumuwoto odelipu boito umoo huheli pee-peenta wola-U" tingga malo tita poli tapilatuju lo Allahu Taaala? Tapilatuju yito tau-tauwalo tahe momalakala to Allahu Taaala, diila odito? **19** Botia ito mongalati deu timongolio diila moo tuwoto, sababu timongolio diila palacaya to Allahu Taaala.

**4:1** Naa, danti lo Allahu Taaala donggo pohan-pohutu, wau ito mawohia-Lio pohuhelia upilo danti-Lio mai. Oditolio, mamusi ito modaha alihu diila bolo woluo penu boli ngota maoo towolota limongoli u meinaasao diila moorasa huheli upilo danti-Lio mai boito. **2** Sababu Habari Mopiohe boito mapilo habari mai olanto tutuwauwa debo odelo tolimongolio. Bo toli mongolio, habari boito diila ohunelio. Sababu tou timongolio lodungoheo, timongolio diila palacaya. **3** Bo ito tapalacaya malo lolimo pohuhelia upilo danti mai lo Allahu Taaala boito. Uito lotuude lou wolo upilo tahuda mai lo Allahu Taaala, odie, "Wau muluka wau motadia, 'Timongolio diila tatumuwoto umoo huheli pee-peenta wola-U.' " Allahu Taaala lotahuda odito eleponu kalajaa-Lio mailapato tumulalo mai Tio lopowali dunia botie. **4** Sababu pasali lodulahe opitulio, woluo tulatulade todelomo Kitabi odie. "Todulahe opitulio Allahu Taaala lohuheli lonto ngoamila kalajaa-Lio." **5** Tomimbihu suali boito tiluladio poli odie, "Timongoli diila tatumuwoto odelipu boito u mohuheli pee-peenta wola-U." **6** Oditolio timongolio tabohu-bohulio lodungohe habari pasali lo Habari Mopiohe boito, diila mololimo pohuhelia boito, sababu timongolio diila palacaya. Wonu odito malo patato deu woluo tau-tauwalo wewo tamohulodu mololimo pohuhelia boito. **7** Sababu matilantu mai lo Allahu Taaala tou dulahe tuwau uwewo poli, u ilunte "Dulahe Botie". Ota-otaunuwalio mola lapatio maoo Allahu Taaala lotahuda mai tomimbihu suali boito lotimbulude tolei Dauda, todelomo ayati u hilmalio engonti, "Wonu todulahe botie timongoli modungohe suala lo Allahu Taaala,

timongoli diila maó potibaangi." **8** Wonu humayaalio tei Yosua malongohi ode tau-tauwala boito pohuhelia upilo danti mai lo Allahu Taáala, yi Allahu Taáala madiilalo motahuda pasali lou tuwaulio lodulahe uwewo. **9** Oditolio, duólo umati lo Allahu Taáala donggo woluo danti u mohuheli debo odelo Allahu Taáala lohuheli todulahe opitulio boito. **10** Sababu taa u mololimo pohuhelia upilo danti mai lo Allahu Taáala to olio boito, mamohuheli olo monto ngoáamila kalajaalio, tutuuwauwa debo odelo Allahu Taáala. **11** Sababu uito, duloolo ito motolopani tióotutua u mololimo pohuhelia upilo danti mai lo Allahu Taáala boito. Diila bolo penu boli ngotaa maó monto olanto diila otilapulo debo odelo timongolio omoóomolu, sababu diila palacaya to Allahu Taáala. **12** Tahuda lo Allahu Taáala yito tahuda utumu-tumulo wau molotolo; lebe molalito wolo wamilo u omato duluo. Tahuda boito mometuó demola eenggade towolota lonyawa wau rohu; demola eenggade towolota lo leleetua wau tulalo yilonta, tilinggula motota lou modelo-delomolo maó pikiilangi wau niyati hilaa lomanusia. **13** Diaaluo maó penu boli mahaluku tuwau utuutuó monto bibilohu Allahu Taáala. Totoonulalo u hitua-tuawua hilaalawa wau hibuáde totalu-Lio. Wau ito musi mongohi titihulanto to o-Lio. **14** Uitolo sababuulio ito musi mopoó toheeto modihu tou pilongakua opopalaa-cayanto. Sababu ito o Iimamu Daá uleidaá, tamaa tilumuwoto demola ode talu lo Allahu Taáala -- Tiolo ti Isa Walaó Allahu Taáala. **15** Ti Iimamu Daáanto boito diila iimamu tadiila moó duduá molaasa maó totoonulalo oluluu-puhunto. Boliio maó, Tio maili montala todelomo totoonulalo suáli, tutuuwauwa debo odelo ito lohihilao; bo Tio diila helohutu dusa! **16** Sababu uito, duloolo ito wolo lealeaatu obobuheli modudulaó ode Allahu Taáala tahe momalenta wolo hilaa mopiohe. Allahu Taáala mamomonu mai olanto wau mobalakati olanto alihu ito moótapu tulungi tuhata to wakutuulio.

**5:1** Timiidu iimamu daá tilulaoto towolota lo umati, wau piluduó u momaya Allahu Taáala odelo wakili limongolio. Tuugasilio yito mopodewo ode Allahu Taáala wowoo-hiyaalo wau babaa-keyaalo u pongambunguwalo dusa. **2** Ti Iimamu daá boito lohihilao molulupuhu



todelomo dadaata suáli, wau sababu uito tio mowali motihutu molumboyoto lohilao totau-tauwalo tadiila hitootawa lolo-loolo wau tailapalo dalalio. **3** Wau sababu tio lohihilao molulupuhu, yi tio musi mopodewo bake, diila bo sababu duduu-sawaalo lo umati, bo olo sababu duduu-saalio lohihilao. **4** Diaaluo penu boli ngotaa maó tamomuduá batangalio lohihilao mowali iimamu daá. Taa mowali iimamu daá, wonu Allahu Taáala motianga olio woleeto boito -- tutuuwauwa debo odelo tei Haruuna. **5** Odito olo ti Almasi. Tio diila lomuduá batanga-Lio lohihilao lowali Iimamu Daá. Allahu Taáala lohihilaolo talo muduá o-Lio. Allahu Taáala lotahuda maó o-Lio, "Yiöolo Wala-U; todulahe botie Wau mowali ti Paapa-Mu." **6** Totambati uwewo Allahu Taáala lotahuda olo, "Yiö yito Iimamu ohiheo-hiheolo maó, debo odelo ti Iimamu Melkisedek." **7** Tomaasa li Isa tumutumulo todunia botie, Tio heloduá wau lomolohone wolo watiwaatió wau hiyongo ode Allahu Taáala, tamambo lopoáahu o-Lio lonto opopate. Wau sababu Tio taaluku to Allahu Taáala wolo hulumati u lealeaatulo maó; yi Tio dilungohe-Lio. **8** Ti Isa yito Walaó Allahu Taáala, bo eleponu odito Tio helo balajali lowali lodungohe lotimbulude to dudutoo-Lio. **9** Yi lapatio maó Tio pilopowali tamoo-poáahua tawimu-wimumuto tutu, Tio lowali pilobutua mai lo oáahu u hiheo-hiheolo maó ode ngoáamila tau tamo dungohe o-Lio, **10** wau Allahu Taáala olo lopoilaalo o-Lio odelo Iimamu Daá, debo odelo ti Iimamu Melkisedek! **11** Tomimbihu huhuloá li Isa odelo Iimamu Daá, maito dadaata upalalu poótaa mai lamiaatia olimongoli, bo mototolo u motombangai sababu timongoli moboyu daá mongalati. **12** Otutuulio maó mawakutuulio timongoli mowali guru, bo malo ilaalo timongoli debo donggo palalu mobalajali monto taa wewo pasali dadaa-saliyalo bohulo pongaajali lo Allahu Taáala. Timongoli diipo mowali mololimo uáalo u motoheeto; timongoli donggo musi mongilu susu wambaó. **13** Taa udonggo hipongiluma susu, boliilio tio donggo unge; tio diipo loólaasa pasali wolo u otutu wau wolo u talatala. **14** Uáalo u motoheeto yito ode taa leidaá u sababu pongalamani, maloó pohihiideó toonu u mopiohe wau toonu u moleeto.

**6:1** Sababu uito, duloolo ito molaiá ode totoonulalo pongaajali u wumbutio mola leeto pasali omoontapo tutumulo lo Nasara, wau diila bo wambaó mopoótuoto dadaa-saliyalo bohulo pongaajali lo agamanto. Diilalo maó wuliyonto dasali lo pongaajali deú tau musi mohuheli mohutu susuu-aliyaalo udiila ohuna wau musi palacaya to Allahu Taáala, **2** meaalo dasali lo pongaajali tomimbihu polihu meaalo mopodutu lo uluú toitaato lotau, meaalo tomimbihu muli tumumulai tou mailate maó meaalo huumani u ohiheo-hiheolo maó. **3** Duloolo ito, wonu luasialo Allahu Taáala, molaiá ode totoonulalo pongaajali u wumbutio mola! **4** Sababu, tau-tauwalo tamaa lomahe iimani, diila pongalo aakali muli deloolo. Timongolio omoóomolu mailoluo todelomo tilango lo Allahu Taáala, wau mailo laasawa limongolio wowohi-Lio. Timongolio olo malodudua kiluwasa lo Rohullah. **5** Otaawa limongolio lonto pongalamani limongolio deú tahuda lo Allahu Taáala boito mopiohe, wau timongolio maloólaasa popoo-nuwaalo upolupolu kawasa lonto jamani umamei dungga mai. **6** Lapataó uito timongolio momaahe iimani! Diila pongalo aakali muli modelo olimongolio umuli molilihu monto duduu-sawaalo limongolio. Sababu timongolio donggo hipo salipua poli Walaó Allahu Taáala wau helohutu o-Lio hilinaa totalu lotaa dadaata. **7** Huta u mongintopa taluhu didi u tingga maito molahe mola toitaatio, lapataó mongohi tilapulo totoonulalo pilomulo u ohuna ode tamo kelakela maó, huta boito balakatia lo Allahu Taáala. **8** Bo wonu huta boito mongohi tilapulo papaa-dengowalo wau pilomulo oduhi, yi huta boito diila ohunatio wau demaa laanatia lo Allahu Taáala wau pulitio maó maahu tumbilalo. **9** Bo Mongo wutato taa otoliango, eleponu amiaatia molojiya mai odito, bo amiaatia yakini tomimbihu olimongoli. Amiaatia yakini deú timongoli malo lolimo susuu-aliyaalo ulebe mopiohe, deúito-yito babaa-lakatiyalo udebo odelo bagiyangi lo oáahu limongoli. **10** Allahu Taáala diila bo Allahu Taáala tadiila aadili. Tio diila molipato wolo u kilalaja limongoli de o-Lio, wau toliango upilo biloheó limongoli o-Lio tou lotulungi mongo wutato ngoiimani, omoóomolu wau botia. **11** Amiaatia motohilaa daá alihu timongoli ngota-ngota osumangati tulusi demola pulitio tilinggula timongoli mololimo wolo u hehala-halapuo limongoli boito. **12** Amiaatia

diila mohuto timongoli mowali lantingalo. Bo otohila lamiaatia alihu timongoli tumumulo debo odelo tau-tauwalo tahi pololimoa wolo upilo danti mai lo Allahu Taáala, sababu palacaya o-Lio wau sababu hipo himawa lou sabali. **13** Tou Allahu Taáala lodanti odelei Abraham, Tio lotadia deu Tio mamohutu mai wolo u mapilo danti-Lio. Wau sababu diaaluo talebe molaiá wolo Allahu Taáala, yi Tio malo tadia totangu-Lio lohihilao. **14** Tio lotahuda, "Wau modanti mamohutu balakati olemu wau mohutu walimu mola mowali dadaata." **15** Tei Abraham helohima wolo sabali, yi tio lololimo wolo upilo danti lo Allahu Taáala olio. **16** Wonu tau motadia, tio motadia totanguulo taa wewo talebe molaiá wolio, yi tadia boito mopoó pulitaó totoonulalo batata. **17** Allahu Taáala ohilaa mopo pintalai ode tau-tauwalo tahi pololimoa danti-Lio, deu Tio diila tamo lomelo lanjana-Lio. Uitolo sababuulio Tio loduhengaó tadia todanti-Lio boito. **18** Dulo suáli boito diila mowali mobolió: Allahu Taáala diila pongalo aakali mohimbulo tomimbihu danti wau tadia-Lio. Sababu uito, ito tamaa lotiduóla to Allahu Taáala, yiluntula-Lio daá u motidihu tióotutua to halapani ubuá-buáadu to talunto. **19** Harapaninto boito debo odelo jangga ulei pantongo demola delomio daá wau debo odelo didihu u motoheeto wau aamani duólo tutumulonto. Halapani boito lolaapata to lalante lo Huwali Leidaa Laba-labaalo mantali to Bele lo Eeya tosologa. **20** Ti Isa malomuó dalalo ode tambati boito olanto, wau maa tilumuwota mola odito lowali Iimamu Daá olanto u ohiheo-hiheolo maó, debo odelo ti Iimamu Melkisedek.

**7:1** Tei Melkisedek botie yito onlongia lonto Salem wau iimamu lo Allahu Taáala Taa Laba-labaalo molaiá. Tou tei Abraham lohualingai lonto popaatea lopo olaaheó mongo onlongia, tei Melkisedek mai lolutulo olio wau lobalakati maó olio. **2** Yi tei Abraham longohi maó olei Melkisedek ngotayade mopulu lou totoonulalo wolo uilambatio mai. (Tanggulei Melkisedek boliilio maó, bohu-bohulio, "Olongia Uáadili"; wau sababu tio onlongia lonto Salem yi tanggulio boliilio maó olo "Olongia Salaamati.") **3** Tomimbihu olei Melkisedek botie diaaluo maó tombango penu boli toutoonuu deu tio otiyamo meaalo otiilo meaalo onene moya; diaaluo olo

tombango pasali pilotutua olio, meaalo opopatelio. Tio tutuuwauwa debo odelo Walaó Allahu Taaála; tio yito iimamu tabakaa. **4** Oditolio, oontonganto tewe deú odito udaáalio tei Melkisedek botie; tio odito udaá tilinggula tei Abraham, ti Paapa loluhuru lo bangusanto, longohi maó olio ngotayade mopulu lonto totoonulalo hitua-tuawua u lotapulio mai lonto popaatea boito. **5** Todelomo butoó lo agama Yahudi matilantu deú mongo iimamu wali lei Lewi musi momulutaó ngotayade mopulu monto tilapulo umati lo Isirailu, deúito-yito mongo wutati mongolio lohihilao, eleponu timongolio tutuuwauwa wali mai lei Abaraham. **6** Tei Melkisedek diila wali mai lei Lewi, penu odito tio lololimo olo ngotayade mopulu lonto totoonulalo u ilohama mai lei Abraham, wau lobalakati maó olo olei Abraham u tumbaó malo lolimo dadaa-ntiyaalo lonto Allahu Taaála. **7** Memangi diila mowali pobutolalo deú taa bilalakatia yito lebe dupadupapa wolo taa lobalakati olio. **8** Mongo iimamu tamololimo ngotayade mopulu boito yito taa u mowali mate. Bo moduduá to Kitabi, tei Melkisedek talo lolimo wowohi ngotayade mopulu boito yito taa u debo tumutumulo. **9** Mowali loiyaalo, deú tei Lewi -- tawaliilio mai hipo mulutawa ngotayade mopulu monto umati lo Isirailu -- lomayali olo tayade boito loli olei Abraham, tou tei Abraham lomayali maó odelei Melkisedek. **10** Eleponu tei Lewi diipo pilotutulio mai, bo mowali loiyaalo tio mailoluo todelomo batanga lei Abraham tinenemoyalio, tou tei Melkisedek lodunggaya wolei Abraham. **11** To walungo tauwa lomongo iimamu Lewi, butoó agama lo Yahudi yilohilio mai ode umati lo Isirailu. Sababu mongo iimamu Lewi omoóomolu boito diila mowali mohutu lou wimu-wimumuto tutu wolo u musi kalajaalio, yi musi woluo iimamu wewo, deúito-yito tadebo odelo ti Iimamu Melkisedek, wau diilalo monto kaumu li iimamu Haruuna! **12** Naa, wonu huhuloáa lomongo iimamu mobolió, butoó agama lo Yahudi olo musi mobolió olo. **13** U pilatuju tewe yito Eeyanto; Tio lonto suku wewo, wau diipo peéenta penu boli ngotaa maó lonto suku-Lio otuugasi odelo iimamu. **14** Ngoáamila tau motota deú Eeyanto asalii-Lio mai lonto suku lo Yahuda; wau tei Musa diila peéenta maó lolanggula suku boito tou tio lobisala pasali lomongo iimamu. **15** Suáli u bilisala botie lowali lebe lopatato poli, tou piloluneta mai ngotaalio li iimamu wewo tadebo odelo

tei Melkisedek. **16** Tio piluduio lowali iimamu, diila patopatoá to wuwuu-  
uduwaalo manusia, bo patopatoá to tutumu-Lio u okawasa wau udiila  
opulitio. **17** Sababu todelomo Kitabi loiloiya, "Yió yito iimamu ohiheo-  
hiheolo maó, debo odelo ti Iimamu Melkisedek." **18** Oditolio, botia  
wuúdu u deedelo mailinggi, sababu diila motoheeto wau diila ohuna. **19**  
Butoó agama lo Yahudi diila mowali mohutu penu boli hitua-tuawua  
mowali wimu-wimumuto tutu. Uito sababuulio ito botia yilohia halapani  
tuwau ulebe mopioheó; woleeto ito mowali mohimbide Allahu Taáala. **20**  
Donggo poli, ngoáamilalo boito tilunuhe wolo tadia lonto Allahu Taáala.  
Diaaluo tadia debo odelo uito tou mongo iimamu wewo boito piluduó. **21**  
Boti Isa piludu-fo lowali iimamu lomake tadia, tou Allahu Taáala lotahuda  
maó o-Lio, "Eeya malotadia, wau Tio diila tamo lomelo tilihula-Lio, 'Yió  
yito iimamu ohiheo-hiheolo maó.' " **22** Woleea botie olo ti Isa mowali  
pongaku ode daantia tuwau ulebe mopioheó. **23** Woluo olo suáli tuwau:  
mongo iimamu wewo boito dadaata, sababu ngota-ngota timongolio yilate,  
tilinggula diila mowali mopo tolonga mola huhuloálio. **24** Boti Isa  
tumutumulo ohiheo-hiheolo maó, oditolio huhuloá-Lio odelo iimamu diila  
lolimbata ode taawewo. **25** Masababu uito u ohiheo-hiheolo maó ti Isa  
mowali mopoáahu tahi ponaówa mai ode Allahu Taáala motimbulude to  
o-Lio, sababu Tio tumutumulo ohiheo-hiheolo maó u moóowoli mola  
polohone ode Allahu Taáala duólo tau-tauwala boito. **26** Oditolio, ti Isa  
boitolo ti Iimamu Daá tapalaa-luwonto. Tio mantali, to o-Lio diila odungga  
totala meaalo penu boli dusa wolo. Tio pilohalahu lonto tahi oduusawa,  
wau pilobotulo demola tambati ulebe molanggato wolo ngoáamilalo  
hulungo. **27** Tio diila debo odelo mongo iimamu daá uwewo, u timiidu  
dulahu musi mopodewo bake sababu duduu-saalio lohihilao omoóomolu,  
bolo kalana duduu-sawaalo umati. Ti Isa mopodewo bake bo wambaó  
peéenta u ohiheo-hiheolo maó, tou Tio lopodewo batanga-Lio lohihilao  
odelo bake. **28** Butoó agama lo Yahudi momuduó tau udiila  
wimu-wimumuto tutu daá iimamu molamahu. Bo lapatio maó lobutoó  
boito, Allahu Taáala lohutu mai danti wolo tadia deu Tio momuduó odelo  
Iimamu Daá, Walaó tamaa pilowali Tamoo-poáahua tawimu-wimumuto  
tutu u ohiheo-hiheolo maó.

**8:1** Bungo lou ngoaamilalo bisalanto botie yito: Ito o Iimamu Daá tadebo odelo uito, tahulo-huloá hemomalanta peé-peéenta wolo Allahu Taáala Laba-labaalo udaá tosologa. **2** Tio helo kalaja maó tuugasi odelo Iimamu Daá to Huwali Leidaá Laba-labaalo mantali, deúito-yito todelomo kema lo Allahu Taáala u tutuulio tutu, upilo tihulo Eeya, diila lo manusia. **3** Timiidu iimamu daá piluduó u mopodewo bake meaalo dewo ode Allahu Taáala. Odito olo li Imamunto Daá; Tio musi o hitua-tuawua u podewolo. **4** Humayalio Tio woluo todunia botie, Tio diila tamowali iimamu, sababu mailoluo iimamu talo podewo bake u pilohile wolo moóhuu todelomo butoó agama lo Yahudi. **5** Kalaja u pilohutu limongolio odelo iimamu boito otutuulio maó bo tala tuwaulio lobayahu wau wolilu lou wolo uwoluo tosologa. Uito mapiloótaa lo Allahu Taáala odelei Musa omoóomolu, tou tei Musa ohilaa mopotihulo Kema lo Eeya. Allahu Taáala lotahuda odie odelei Musa. "Poótoloma maó! Ngoaamilalo boito mamusi pohutuwoomu moduduá gambali upilo bilohei olemu toitaato huidu." **6** Bo botia ti Isa loótapu tuugasi iimamu ulebe molaio daá lou hekilalaja lomongo iimamu boito. Sababu daantia upilo woluo-Lio mai towolota lo Allahu Taáala wau manusia, deúito-yito dantia ulebe mopiohu sababu patopatoá todanti ode susuu-aliyaalo ulebe mopiohe. **7** Humayaalio diaaluo ililangi to daantia ubohulio, yi diila palalu powoluwolo daantia u oluolio. **8** Bo Allahu Taáala maloó dungga totala to umati-Lio, tilinggula Allahu Taáala lotahuda, "Eelai maó, mamei dungga wakutuulio, Wau mamu powoluo mai daantia ubohu wolo bangusa lo Isirailu, wau wolo bangusa lo Yehuda. **9** Diila debo odelo daantia u pilohutu-U wolo loluhuru limongolio tou lodelo olimongolio yilumualo lonto lipu lo Masiri. Timongolio diila tatapu wau molotolo hilao to daantia u pilohutu-U woli mongolio; uitolo sababuulio Wau diila momandungi olimongolio. **10** Bo botia utieelo daantia u mapo hutuwo-U wolo umati lo Isirailu. to duduu-laheyaalo u mamei dungga mai, tahuda lo Eeya: Wau mamu podutu butoó-U todelomo pikiilangi limongolio, wau moluladeó todelomo hilaa limongolio. Wau mamowali Allahu Taáala limongolio, wau timongolio mamowali umati-U. **11** Timongolio diilalo palalu mongaajali tinggai waitio, meaalo mopooá to wutatio, 'Oonuhelo maó Eeya.' Sababu



timongolio ngoáamila, kikiio wau leidaá mamooónuhe ola-U. **12** Wau mamoo ngambungu totoonulalo totala limongolio, wau diilalo moéela totoonulalo dusa limongolio." **13** Wolo loóowoli mai tuwaulio daantia u bohu, Allahu Taáala lohutu daantia ubohulio boito lowali deedelo wau loodulo; wau wolo u madeedelo, mahuáa mooli olo.

**9:1** Daantia ubohulio o wuwuu-uduwaalo potabiaalo, wau olo o tambati potabiaalo huhutu lomanusia. **2** Kema tuwau bilongu u ambahu talulio ilunte Huwali Leidaá Mantali. Teto woluo pakaakasi polumude tohe, wau woluo olo meja wolo roti upodewo ode Allahu Taáala. **3** To ambahu delomio, deúito-yito to dibalaka lolalante u oluolio, woluo huwali leidaá u ilunte Huwali Leidaá Laba-labaalo mantali. **4** Todelomo huwali leidaá boito woluo mesba upilohutu lonto hulawa u pomobuwalo dupa, wau woluo olo Bulua Daantia u ngoáamilalo woluwolude wolo hulawa. Todelomo Bulua boito woluo ulongo hulawa tuatuaanga roti maana, tunggudu lei Haruna umaa ilotumbingo, wau dulo pita botulei uitaatio tulatulade mopulo palenta monto Allahu Taáala. **5** Toitaato Bulua boito woluo dulo malaikati opolipio, deúito-yito mahaluku opolipio u mopobayahe owoluo lo Allahu Taáala. Polipio lou dulo mahaluku boito oa-oáabu toitaato taubu Bulua, deúito-yito tambati ponga-mbunguwalo dusa. Bo ngoáamilalo boito diila mowali tombangalo botia lou motoyunuto. **6** Odieelo mola ngoáamilalo ilatululio. Timiidu dulahu mongo iimamu tumuwoto ode delomio to ambahu talu lokema boito u moponao tuugasi limongolio. **7** U tumuwotaó ode ambahu delomio daá lokema boito boti iimamu molamahu wambaó. Tio mohutu uito bo peéenta ngotaunu. Uito pohutuolio lou modelo duhu u podewolo ode Allahu Taáala sababu batangalio lohihilao wau sababu duduu-sawaalo u pilohutu lou diila mongalati lo umati-Lio. **8** Wolo wuúdu boito, Rohullah mopo bilohei wolo mopatato dei, ngotilonggadu kema to ambahu talu boito donggo tihutihulo, dalalo tumuwoto ode delomo Huwali Leidaá Laba-labaalo mantali boito diipo mohuo. **9** Utie mopobayahei jamani botia; boliilio maó dei dedee-wowaalo wau babaa-keyaalo bake lo binatangi u podewolo ode Allahu Taáala, diila mowali mopo wimumuto

tutu hilaa u maloótapu tinely Eeya lotaa u hemodelo dewo. **10** Sababu uuupa-calawaalo boito bo motuhatawa lou aalo, minumani wau upacala hidala-dalaala u pomantaliyalo. Ngoáamilalo bo wuwuu-uduwaalo lahiri u pohu-pohutu dilumutu saátilio pobohua mai lo Allahu Taáala. **11** Boti Almasi malei dungga mai odelo Iimamu Daá lonto susuu-aliyaalo u mopiohe u mawoluo. Kema lo Eeya toutoonuu Tio loponao lotuugasi-Lio odelo Iimamu Daá yito kema ulebe udaá wau lebe wimu-wimumuto tutu. Uito diila pilohutu lomanusia; bolilio maó asaliilio mai diila lonto dunia u pilopowali botie. **12** Ti Almasi tilimuwoto ode Huwali Leidaá Laba-labaalo mantali ode delomo kema boito bo wambaó peénta ohiheo-hiheolo maó. Tou boito Tio diila lodelo duhu lobatade ulai meaalo duhu lowalaó sapi u pilodewo; Tio lodelo duhu-Lio lohihilao, wau woleeto Tio lopo lopato mai olanto u ohiheo-hiheolo maó. **13** Duhu monto batade wau sapi ulai wau peahuó bake lowalaó sapi, pomake u pomutata totaa hinajisia moduduá wuúdu lo agama alihu timongolio mowali belesi. **14** Naa, wonu duhu wau peahuó boito moó pobelesi onajisi lo tau-tauwalo boito, tidiyolo maó duhu li Almasi! Lotimbulude to Rohu ubakaa ti Almasi lopodewo batanga-Lio lohihilao ode Allahu Taáala odelo bake wimu-wimumuto tutu. Duhu-Lio lopobelesi hilaa u maloótapu tinely Eeya de olanto lonto upacala lo agama udiila ohuna, alihu ito mowali momaya Allahu Taáala tatumu-tumulo. **15** Uitolo sababuulio ti Almasi lowali Pilo timbulude ode tuwaulio lodaantia u bohu, alihu taa umaa tiliyango Allahu Taáala moó tolimo babaa-lakatiyalo ubakaa umaa pilodanti mai lo Allahu Taáala. Ngoáamilalo boito mowali motoduo sababu mailoluo tailate, deuító-yito ti Almasi; wau opopate-Lio boito helo polopato tau lonto totoonulalo totala u pilohutu limongolio tou dantia ubohulio donggo pohupohutu. **16** Wonu woluo tuladu warisi, musi olo woluo bukutiilio deu taa u lohutu tulade boito mailate. **17** Sababu tuladu Warisi diila ohuna ngotilonggadu taa u lohutu maó donggo tumu-tumulo. Tulade boito pohu-pohutu bo wonu tau boito mailate. **18** Sababu uito daantia ubohulio olo musi saahaalo wolo duhu. **19** Bohu-bohulio tei Musa lopo tunggulai ngoáamila palenta lobutoó Allahu Taáala tobangusa lo Isirailu. Lapataó uito tei Musa lohama maó duhu lowalaó sapi wau walaó batade ulai, tulusi

ilulaulio wolo taluhu, lapatao pilomutatio maó to Kitabi lo Bubuu-toowaalo lonto Allahu Taála wau to ngoilanggubu bangusa lo Isirailu wolo lomake huoyoto u hidala-dalala lohisopi wau lambuto himba lakulio meela molonihe. **20** Sambela hemohutu uito tei Musa loloiya, "Uti-utieelo duhu u moposaaha daantia lo Allahu Taála umusi dungohe limongoli." **21** Lapatao wolo dudelo u tutuuwauwa, tei Musa lopomutato duhu boito olo ode Kema lo Eeya wau to ngoamila pakaakasi u potabiaalo. **22** Memangi moduduá butoo agama lo Yahudi, ngopee ngoamilalo u hitua-tuawua pomantaliyolo wolo duhu; wau dusa bo mowali ambunguolo wonu woluo duhu pohuwatolo. **23** Wolo dudelo debo odelo uitolo babaa-langiyalo umopo bayahei susuu-aliyaalo u tosologa, palalu pomantaliyolo. Bo duolo susuu-aliyaalo u tosologa boito lohihilao palaluwolo bake ulebe mopiohe daa. **24** Sababu ti Almasi diila tilumuwoto ode Huwali Leidaa Mantali huhutu lomanusia, u bo mopo bayahei Mantali u otutuulio maó. Ti Almasi tilumuwota mola ode sologa tutuwau; mola teto Tio masaatia lotahudeo ode Allahu Taála ode polohuna daa olanto. **25** Ti iimamu daa lo Yahudi timiidu taunu tumuwoto ode Huwali Leidaa Laba-labaalo mantali todelomo Bele lo Eeya wolo modelo duhu lo binatang tuwau. Boti Almasi diila tilumuwoto u lopodewo batanga-Lio wuwuulia. **26** Sababu wonu odito, uito boliilio maó Tio malo wuwuulia lodutolo tumulalo mai dunia botie pilowali. Bo ilaalolio maó, masaatia tojamani pulitio botie, Tio dungga-dungga mai bo peenta wambaio mai moluluta dusa wolo mopobake batanga-Lio lohihilao. **27** Allahu Taála malo potatapu mai deu manusia mate bo peenta wambaio wau lapatao uito aadilio lo Allahu Taála. **28** Odito olo ti Almasi bo peenta wamabao pilodewo odelo bake u moluluta dusa lotaa dadaata. Tio mamuli meidungga mai tou oluolio, diila mai mopoó lapato pasali lodusa, bo mai mopoahu totau-tauwalo tahi pohimawa podungga-Lio mai.

**10:1** Butoo agama lo Yahudi bo mopo bayahei udiila mopatato pasali lo susuu-aliyaalo umopiohe u mamei dungga mai, wau diila bayahu u otutuulio maó lo susuu-aliyaalo boito. Diila pongalo aakali butoo boito mowali mopo wimumuto tutu taa u monao mai molubo Allahu Taála lou

modelo podewo, eleponu timiidu taunu tulusi hepilodewo babaa-keyaalo u tutuuwauwa. **2** Humayaalio tau-tauwalo tahi polubowa Allahu Taáala boito tiótotua mapiloó belesi lonto dusa, yi timongolio diilalo opongolaasa odusa, wau bake diilalo podewolo olo. **3** Bo ilaalolio babaa-keyaalo u pilodewo timiidu taunu boito tumbaó mopoéela tau to duduu-sawaalo limongolio. **4** Sababu memangi duhu losapi wau duhu lobatade ulai diila mowali moluluta dusa. **5** Uitolo sababuulio tou ti Almasi tilumuwotai ode delomo dunia, Tio lobisala ode Allahu Taáala, "Eeya diila mokahandaki bake wau dewo; boliio maó Eeya malo podapato batanga de ola-U. **6** Allahu Taáala diila motuhatawa wolo bake yilalango meaalo bake u pongambungualo dusa. **7** Lapataó Watia loloiya, 'Boti-botieelo Watia, oo Allahu Taáala! Watia monaó mai mohutu kahandaki lo Allahu Taáala, debo odelo u leitulade pasali batanga Laatia todelomo Kitabi.' " **8** Bohu-bohulio ti Almasi loloiya, "Allahu Taáala diila mokahandaki bake wau dewo; Allahu Taáala diila motuhatawa wolo bake lo binatangi upilobu odelo dewo wau to bake u pongambungualo dusa." Ti Almasi loloiya odito, eleponu babaa-keyaalo boito pilodewo loduduá butoó agama lo Yahudi. **9** Lapataó uito ti Almasi loloiya. "Boti-botieelo Watia, oo Allahu Taáala! Watia monaó mai u mohutu kahandaki lo Allahu Taáala." Oditolio Allahu Taáala lolulutaó babaa-keyaalo udeedelo boito, wau lopotuloó maó wolo bake li Almasi. **10** Ti Isa Almasi malohutu wolo u kilahandaki lo Allahu Taáala wau lopodewo batanga-Lio odelo bake. Wolo dewo boito, u pilohutu-Lio bo peéenta wamabaio u ohiheo-hiheolo maó, ito ngoáamila pilobelesi lonto dusa. **11** Timiidu iimamu lo Yahudi moponaó tuugasilio odelo iimamu timiidu dulahu, wau wuwuulia tio hemo podewo babaa-keyaalo u tutuuwauwa. Bo babaa-keyaalo boito sama-samaata diila mowali moluluta dusa. **12** Boliio maó, ti Almasi lopodewo bo tuwau bake u pongambungualo dusa, wau bake boito pohupohutu u ohiheo-hiheolo maó. Lapataó lopodewo bake boito, ti Almasi lotihuloá to ambahu olowala lo Allahu Taáala wau momalenta peé-peéenta wo-Lio. **13** Wau masaatia ti Almasi hemohima dilumutu Allahu Taáala mohutu mumuusu-Lio taaluku to o-Lio. **14** Oditolio wolo bake tuwau, ti Almasi lopoó wimumuto tutu tau-tauwalo tamaa pilobelesi lonto dusa. **15**

Tomimbihu suáli boito Rohullah longohi olo osakusii-Lio to olanto. Rohullah lotahuda, **16** " 'Utieelo daantia umaa pohutuwo-U woli mongolio to duduu-laheyaalo u mamei dungga,' tahuda lo Eeya, 'Wau mamu podutu bubuu-toóo-U todelomo hilaa limongolio, wau moluladeó todelomo pikiilangi limongolio.' " **17** Allahu Taáala olo lotahuda, "Wau mamu malongaó duduu-sawaalo wau totoonulalo ololeeti mongolio." **18** Oditolio, duduu-sawaalo wau totoonulalo ololeeto boito maa ilambungu, yi diilalo palalu mopodewo bake u pongambungualo dusa. **19** Naa, Mongo wutato, wolo opopate li Isa boito ito botia buheli tumuwoto ode Huwali Leidaá Laba-labaalo mantali. **20** Ti Isa malomuó dalalo tuwau u bohu de olanto, deúito-yito dalalo u mongohi tutumulo. Dalalo boito moli lalante, deúito-yito batanga li Isa lohihilao. **21** Wau ito masaatia o ngotaalio iimamu taúdaá, tatihu-tihula duólo Bele lo Allahu Taáala. **22** Sababu uito, duloolo ito mohimbide Allahu Taáala wolo hilaa motulidu wau iimani motoheeto; wolo hilaa umaa pilomantali monto pongolaaasa utilala, wau wolo batanga u mapiloó belesi wolo taluhe u mantali. **23** Mamusi ito motidihu tióotutua to halapani upilo ngakuwanto, sababu Allahu Taáala mowali palacayalo wau Tio mamoeélai danti-Lio. **24** Wau mamusi ito mopoó tutuuwoto, alihu ito mowali mohuhuuntula u motoliángo ngota timongota wau mohutu susuu-aliyaalo u mopiohe. **25** Mamusi ito debo moámbua peé-peéenta, wau diila maó pomalongo debo odelo taawewo. Ito tumbaó musi lebe tatapu wau molotolo hilao wau mopoó lolootolo, sababu otaawanto deú diilalo mohiheo Eeya mamei dungga mai. **26** Sababu wonu habari u otutu monto Allahu Taáala mapilo tunggulio mai olanto, bo ito debo hemohutu dusa wambaio wolo makusudu, yi diduí bake u moluluta dusaanto. **27** Tuwa-tuwaulo uwoluo to olanto yito motaalua wolo bubutoó Allahu Taáala wau tulu omulukaa-Lio umaa momobu tunggula maahu totau-tauwalo tahi polowalia o-Lio! **28** Taa diila modungohe butoó uilohi mai lei Musa, hukuu-maniyolo mate lou diila o ambungulio, wonu to osakusi lo taduulota meaalo toulota, tio ilobukuti ototala. **29** Malo lebe mobuuhetaó hukuumani u musi podehuwolo totaa u hemo dutadutaá Walaó Allahu Taáala. Tau boito hemo nganggapu hina duhu daantia lo Allahu Taáala, deúito-yito opopate li Almasi tamo

poobelesi monto dusa. Tio mohina Rohu tamoongohia odehu hilaó. **30** Otaawanto tatoonu Tio talo tahuda, "Wau mamó lontuli! Wau mamó hukuumani!" wau talo tahuda, "Eeya mamó mutoái umati-Lio." **31** Malo moóti hela hapato wonu modehu to uluú lo Allahu Taaála Taa Tumutumulo! **32** Eelai maó woloolo mola owowoluwoa lo Mongo wutato tou yilalu maó. Tou boito, lapataó tinelo Allahu Taaála lolinelai olimongoli, timongoli helo dutolo dadaata; bo penu odito timongoli debo lohipate tióotutua. **33** Tingga maito timongoli hilinalio wau hepilo hutulio lou diila mopiohe totalu lotaa dadaata. Tingga maito olo timongoli loduduá lodutolo woli mongolio tahe pilohutulio odito, **34** wau timongoli loduduá loólaasa osuukali hilao lotaa tilutupalio. Wau tou ngoáamila u mililiki limongoli yilambatio, timongoli lololimo uito wolo hilaa sanangi sababu otaawa limongoli deu donggo wولو hitua-tuawua ulebe mopiohe, umoo tahangi ohiheo-hiheolo maó. **35** Masababu uito, diila maó potombolu, sababu wonu timongoli debo palacaya, yi wولو wuupa udaá woleeto! **36** Timongoli palalu mosabali, alihu timongoli mowali mohutu kahandaki lo Allahu Taaála wau lou odito mololimo wolo upilo dantia-Lio mai. **37** Sababu todelomo Kitabi tulatulade, "Bo ngopee mola poli wambaio, yi Tio tamaa meidungga boito, mahuáa meidungga; Tio diila tamo polohu-lohudu podungga-Lio mai. **38** Wau umati-U taótutu mapalacaya wau tumumulo; bo wonu wولو towolota limongolio tatumouli, yi Wau diila tasanangi olio" **39** Ito botie diila umati tatoutouli wau yilapalo. Boliio maó, ito yito umati tapalacaya to Allahu Taaála wau tapilo aahu.

**11:1** O iimani boliilio maó yakini tióotutua to susuu-aliyaalo uhe halapuwolo, boliilio o tantuulio to susuu-aliyaalo udiila oontonga. **2** Sababu o iimani, yi tau-tauwalo tojamani yilalu maó aahudu lo Allahu Taaála. **3** Sababu o iimani, yi ito mongalati deu aalamu botie pilowali wolo tahuda Allahu Taaála; oditolio, wolo u mowali oontonga, yilowali mai monto wolo udiila mowali oontonga. **4** Sababu o iimani, yi tei Habel lopodewo ode Allahu Taaála bake ulebe mopioheó wolo bake lei Kain. Sababu iimanilio boito, tei Habel tilolimo lo Allahu Taaála odelo taa u mopiohe, sababu malo ilaalo deu Allahu Taaála lololimo pilodewolio. Tei



Habel mailate, bo sababu iimanilio boito, yi tio donggo bisabisala dilumutu botia. **5** Sababu o iimani, yi tei Heno diila yilate, bo tumbaó bilintaá mola wau dilelo ode Allahu Taáala. Diaaluo penu boli ngotaa maó taloo dungga olio, sababu tio mabilintaá mola ode Allahu Taáala. Todelomo Kitabi tulatulade deu tou tei Heno bilintaá mola, tio lopo sanangi hilaa lo Allahu Taáala. **6** Diila o iimani, diaaluo penu boli ngotaa maó tamowali mopo sanangi hilaa lo Allahu Taáala. Sababu tamonaó mai ode Allahu Taáala musi palacaya deu Allahu Taáala woluo, wau deu Allahu Taáala momalasi mai totaa u hemololohe o-Lio. **7** Sababu o iimani, yi tei Noho piloótaa lo Allahu Taáala pasali lo susuu-aliyalo u mamotoduo mai lapatio maó, udiila mowali oontongalio. Tei Noho lodungohe to Allahu Taáala tilinggula tio lohutu kapali tuwau u lapatio maó loilaalo lopoáahu batangalio wolo ngaalaálio. Lou odito dunia hilukuumani, hiambola tei Noho lohihilao sababu iimanilio piloilaalo lo Allahu Taáala odelo taa mopiohe. **8** Sababu o iimani, yi tei Abraham lodungohe Allahu Taáala tou Allahu Taáala lotianga olio wau lopoáahu olio lonaó ode lipu upilo danti lo Allahu Taáala olio. Lapataó tei Abraham lomonggato wolo diila otaawa maóde utoonu ponaówalio. **9** Lou o iimani, tei Abraham lotibiluloá odelo tau deli tolipu upilo danti lo Allahu Taáala olio boito. Tei Abraham lotibiluloá mota teto todelomo kema. Odito olo tei Isihaka wolei Yako, talo lolimo danti u tutuuwauwa lonto Allahu Taáala. **10** Sababu tei Abraham donggo hemohima kota uilanjana wau bongulo lo Allahu Taáala wolo wapidio motoheeto. **11** Sababu o iimani, yi tei Abraham loótoduo wali lonto oli Sara, eleponu tei Abraham mapanggola daá, wau ti Sara lohihilao hunusa. Tei Abraham yakini deu Allahu Taáala mamó poópolu mai danti-Lio. **12** Eleponu tei Abraham tou boito debo odelo taa mailate batangalio, bo tio debo loótoduo mai wali dadaata, udaata diilalo oleekenia -- debo odelo daatalio lopoliamá wau hungayo tobiihu pentadu. **13** Ngoáamila tau boito debo o iimani tunggula yilate. Timongolio diila lololimo susuu-aliyaalo upilo danti lo Allahu Taáala, bo helo milohe wau lohima lonto u molamingo. Wau woleeto timongolio mopo biloheó deu timongolio bo tau deli wambaio wau taa u hipo peehuma tutumulo todunia botie. **14** Taa u molojiya odito mopoilaalo lou mopatato deu timongolio donggo hemo

lolohe lipu u mamowali huta limongolio. **15** Diila lipu u matilolaa maó limongolio boito uhe pikiilangio limongolio. Sababu wonu odito, yi maa ilohiango dadaata toli mongolio umuli mohualinga odelipu boito. **16** Bo malo ilaalo, timongolio mooloolo lipu tuwau ulebe mopioheó, deúito-yito lipu u tosologa. Uitolo sababuulio Allahu Taáala diila moolito wonu timongolio mongunte o-Lio Allahu Taáala limongolio, sababu Allahu Taáala malo podapato kota tuwau olimongolio. **17** Sababu o iimani olo, yi tei Abraham lopodewo olei Isihaka odelo bake tou tio tilesi lo Allahu Taáala. To olei Abrahamulo Allahu Taáala longohi danti-Lio, penu odito tei Abraham iloheela lohilao lohudu walaio tatuwa-tuwaulo boito. **18** Allahu Taáala malo tahuda odelei Abraham, "Motimbulude tolei Isihaka botieelo yio mamootapu mai wali upilo danti-U mai olemu." **19** Tei Abraham yakini deu Allahu Taáala mambo muli mopo tumulai olei Isihaka monto opopate -- oditolio, mowali loiyaalo, tei Abraham maluli lololimo olei Isihaka lonto opopate. **20** Sababu o iimani, yi tou tei Isihaka lodanti maó babaa-lakatiyalo odelei Yako wolei Esau duolo dulahe momooli. **21** Sababu o iimani, yi tou tei Yako diipo yilate, tio longohi balakatilio ode mongo walaée Yusu -- wolo lotidenela to lunggongo lo tunggudio wau lolubo Allahu Taáala. **22** Sababu o iimani, yi tei Yusu -- tou wimbideo mate -- lobisala pasali umati lo Isirailu yilumualai lonto Masiri, wau lololaa maó tahuli pasali wolo u musi pohutuwo to milatelio. **23** Sababu o iimani, yi mongo dulaá lei Musa loluua olio tolohula mola hiheolio lapatao pilotutulio mai. Iloontonga maó limongolio deu tio walaó ngota tamopio, wau timongolio diila yiloohe loluwali palenta li onlongia. **24** Sababu o iimani, yi tei Musa yinta-yinta maleidaa mola diila lohuto unteelo walaó lipuusili onlongia lo Masiri. **25** Tio lebe motohilaa modutolo pee-peeenta wolo umati lo Allahu Taáala lou u ngopee mola moolaasa osanangi lo tutumulo u odusa. **26** Tei Musa molaasa deu lebe ohalaga daa u mootapu polohina domi ti Olongia Tamoo-poahua upilo danti mai lo Allahu Taáala boito wolo mootapu ngoamila halata lipu lo Masiri, sababu tei Musa hemo halapu wuupa todulahe momooli. **27** Sababu o iimani, yi tei Musa lololaa maó Masiri lou diila lolaasa yiloohe to oyiyingo li onlongia. Tei Musa lomaju lotidulunga ode patujulio debo odelo tio maloonto Allahu

Taaala tadiila oontonga boito. **28** Sababu o iimani, yi tei Musa lohutu Paska wau lomalantaó alihu mopo mutataó loduhu totimiidu huhebu taulo Isirailu alihu Malaikati lomautu diila momate-mateelo maó tau kekeei mohuhula daá limongolio. **29** Sababu o iimani, yi tau-tauwalo Isirailu lowali lobalango to Auhu Meela, debo odelo timongolio lononaó toitaato huta u mohengu, hiambola tau-tauwalo Masiri loáhumo tiloloolo lo auhe boito, tou timongolio lohimontala lobalanga olo. **30** Sababu o iimani, tau-tauwalo Isirailu helohutu didii-ningowalo meeseli lo Yerikho loloohubu lapataó hilelili limongolio ngotilonggadu pitu hui mola hiheolio. **31** Sababu o iimani olo, yi ti Rahabi, taabua suuntali boito, diila loduduá ilopatea yila-yilateelo maó peé-peéenta wolo tau-tauwalo tahi poluwalia Allahu Taaala; sababu tio malo lolimo wolo hilaa mopiohe tahi pohehulawa lonto Isirailu. **32** Naa, watia mowali wambaio mobisala mai mololaalaita, bo wakutu lowatia diila moótuheo. Sababu watia diipo poli longunte olei Gideon, Barak, Simson, Yepta, Dauda, Semuel, wau mongo nabi. **33** Sababu o iimani, yi timongolio malo poólaaheó totoonulalo bele biluloá saaha li olongia. Timongolio lohutu wolo u otutu, tilinggula lololimo wolo upilo danti mai lo Allahu Taaala. Timongolio loheúto tutung-gilowalo singa, **34** lomate tulu upolu-polutuó, ileleehia lonto bituó lowamilo. Timongolio molulupuhu, bo malowali lolotolo; timongolio molotolo boli buheli daá todelomo popatea tilinggula loólaaheó suludadu lobangusa hideelia. **35** Sababu o iimani, yi mongobua luli loótapu maó tau-taulio tamailate. Woluo olo ta iloheela lohilao silikisaa tunggula yilate, wau diila mololimo u lopatolo, sababu ohilaa muli potumulolo duólo tutumulo tuwau ulebe mopioheó. **36** Woluo tahe hila-hilantiálio, biluboálio, ilawadu wolo lante wau pilopo tuotio ode delomo tutupa. **37** Timongolio pilailio lobotu tunggula yilate, woluo olo tailoyodu wolo halahadi, wau tapilate yila-yilateelo maó wolo wamilo. Timongolio helonaó ode utoonulalo maó wolo boó lonto walito himba meaalo walito batade; timongolio mosikini, ilalinayalio wau silikisaalio. **38** Dunia botie diila tambati u tuúdio ode limongolio. Timongolio helonaó ode utoonulalo maó tohuta datahu wau luasi udelita wau to huhuu luduwaalo, wau helo tibiluloá todelomo gogoowaalo wau todelomo huhuu-wangowalo huta. **39**

Donggo boli udaálio paéeda uilotapu lotaa ngoáamila boito sababu iimani limongolio! Bo penu odito timongolio diila lololimo wolo upilo danti lo Allahu Taáala, **40** sababu Allahu Taáala o lanjana ulebe mopioheó to olanto. Lanjana-Lio yito deú bo peé-peéenta wolanto, timongolio mamowali wimu-wimumuto tutu.

**12:1** Naa, tomimbihu olanto lohihilao, to palitunto woluo dadaata daá sakusi! Sababu uito, duloolo ito molapi ngoáamila umoó buheeto olanto wau dusa utulusi dembi-dembinga to olanto. Wau duloolo ito wolo moólohu maju moluhu polo taadenga u woluo totalunto. **2** Mamusi bibilohunto duludulunga odeli Isa, sababu Tiolo talo pobongu mai iimaninto wau lolaalaó tou bohuliolo mai dilumutu pulitio. Ti Isa tatapu owowoluwoalio lodutolo to ayu salipu! Tio diila paduli deú mate to ayu salipu boito yito tala tuwau suáli umoóolito. Tio bo hemoéela mola oweengahe umaa olasaa-Lio lapatio maó. Masaatia Tio hulohuloá to ambahu olowala totambati huhuloálo Allahu Taáala wau hemo malenta peé-peéenta wo-Lio. **3** Nte pikiilangia maó woloolo mola sikisaa-Lio li Isa lotaalua wolo tau-tauwalo tahi oduusawa tahe loluwali o-Lio lou polu-polutuó! Sababu uito diila maó pokikió hilao wau motombolu. **4** Sababu todelomo poti pateyamu moluwali dusa, diipo peéenta maó timongoli lohipeate dilumutu musi mopotolohe duhu. **5** Wau diila maó lipata naseehati lo Allahu Taáala botie, uilohi-Lio mai olemu odelo mongo wala-Io: "Walaú-U, poótuota maó tióotutua pongaajali lo Eeya, wau diila pokikiíó hilao wonu Tio momuluka mai olemu. **6** Sababu Eeya momate timiidu taa upilonu-Lio, wau Tio momuboá timiidu taa u ilaku-Lio odelo wala-Io." **7** Mamusi timongoli mololimo buboá monto Allahu Taáala odelo tuwaulio lo pongaajali monto oliyamo ngota. Sababu tingga woluo walaó ngota diila hukuumanio liyamolio wonu tio ototala? **8** Wonu timongoli diila moduduó hukuu-maniyolo debo odelo ngoáamila walaio uwewo botie, boliilio maó timongoli diila walaó saaha, bo walaó udiila saaha. **9** Ito otiyamo todunia. Tio mongaajali olanto, wau ito mohulumati olio. Naa, tidiyolo maó toli Paapa lo rohunto tatosologa, tantu ito musi lebe maó poli taaluku to o-Lio alihu ito tumumulo. **10** Mongo dulaaáanto u todunia

mongaajali olanto bo todelomo waktu u eéenggade, moduduá wolo ulaasaa limongolio mopiohu. Bo Allahu Taaála mongaajali olanto duólo opopiohunto lohihilao, alihu ito mowali mantali peé-peéenta wo-Lio. **11** Memangi tou ito ilajari-Lio, hukuumaní boito diila moósanangi hilaanto bo tumbaó moósuukali wambaio. Bo lapatio maó woleeto, to olanto tamaa ilajari-Lio, hukuumaní boito moósababu tutumulonto moduduá u otohílaa lo Allahu Taaála, wau moótoduo mai pongolaasa salaamati to olanto. **12** Sababu uito, poólotola mola uluúmu u molulupuhu wau huúmu u hulu-huluhelio boito! **13** Ponaóolo laito todalalo upaya-payadu, alihu oáatumu u penggo boito diila moheede, bo tumbaó mowali moluli. **14** Potolo panilo u tumumulo lou mopiohe wau dame wolo taa ngoáamila. Potolo panilo olo u tumumulo mantali, tolomodu ode Eeya. Sababu diaaluo penu boli ngotaa maó mowali moóonto Eeya wonu tio diila tumumulo debo odelo uito. **15** Poódahai diila bolo woluo penu boli ngotaa maó talumualo monto opopiohu hílaa lo Allahu Taaála, alihu diaaluo tamowali debo odelo pilomulo u opedi tohuungi mongoli tilinggula mopotoodei usuukali wau mopoluusa taa dadaata wolo pedilio. **16** Poódahai maó alihu diila bolo woluo tatumumulo huloto meaalo diila motolongaku susuu-alíyaalo urohu, debo odelo u pilohutu lei Esau. Tio lopotali hakuulio odelo walaó tamohuhula daá, bo duólo uáalo ngomanggo. **17** Otaawa limongoli deú lapatio maó tei Esau ohílaa moótapu balakati boito monto oliyamolio, bo tio diila tilolimolio. Sababu eleponu wolo hiyongo tio mololohe dalalo u mopoópiohe totalalio, bo hiyango woleeto madiduí. **18** Mongo wutato diila mai motaalua lou hitua-tuawua debo odelo utilalua lobangusa Isirailu omoóomolu. Timongolio lotaalua wolo hitua-tuawua u mowali tontalolo, deúito-yito Huide Sinai wolo tululio uhinta-híntalabu; timongolio lotaalua wolo modiólomo, diila boti motilango wau dutalo; **19** timongolio lotaalua wolo tingohu torompeti, wau tingohu suala ulaba-labaalo. Tou tau-tauwalo Isirailu loódungohe suala boito, timongolio lohíle lou tíootutua alihu suala boito díilalo mobisala mai ode limongolio. **20** Sababu timongolio diila moótahangi modungohe palenta upilo tunggulai losuala boito. Sababu suala boito lotahuda, "Ngoáamila tamo dedeta huide botie, diila paduli wolo uito

binatangi meaalo penu boli tatoonu olo, musi paiyola lobotu tunggula mate." **21** Wolo u iloontonga lotau-tauwalo Isirailu boito odito polu-polutuó dilumutu tei Musa loloiya, "Watia moohe wau hulu-huluhelio!" **22** Boliio maó, timongoli malonaó mai ode Huide Sion wau kota lo Allahu Taáala u tumutumulo, deuito-yito Yerusalemu u tosologa wolo hilihu-lihua malaikati-Lio. **23** Timongoli moduduá tuwaulio lo dudunggayu ulame daá -- dudunggayu lomongo walaó Allahu Taáala tamohuhula daá, u tataa-nggulio leidupatali todelomo sologa. Timongoli monaó mai motaalua lo Allahu Taáala, Hakimu lo ngoilanggubu umati lomanusia. Timongoli motaalua wolo roroo-huwaalo lotau-tauwalo tamopiohu, tamaa pilowali wimu-wimumuto tutu. **24** Timongoli monaó mai motaalua li Isa, Potimbuludelo ode daantia u bohu boito; timongoli motaalua lo putato duhu u pongaku to susu-aliyaalo ulebe mopiohe daá lou pilongakua loduhu lei Habel. **25** Sababu uito, poódaha-dahaalo maó diila bolo timongoli diila mohuto modungohe o-Lio tahe lotahuda mai boito. Timongolio tadiila mohuto modungohe o-Lio tamei dungga mai ode dunia wau mopo tunggulo habari monto Allahu Taáala, diila mowali mopolahi lobatanga. Tidiyolo maó ito botie tamo dungohe o-Lio u motahuda mai monto sologa! Wonu ito diila mohuto modungohe o-Lio, diila pongalo akali ito mowali moáahu! **26** Tou boito sualaa-Lio mopo geegeli dunia. Bo botia Tio lodanti mai. "Peéentapo Wau mamopo geegeli diila bo wambaó dunia bo hulungo olo." **27** Tahuda "peéentapo" mopoilaalo mai deu ngoilanggubu dunia uma pilowali mapolo taúlolo wau yinggilolo, alihu u meitolaa bo udiila mowali molotaúlo. **28** Sababu uito, mamusi ito molapali mola oduólo ode Allahu Taáala, sababu ito mololimo monto o-Lio tuwaulio lo bele biluloá saaha li olongia udiila mowali molotaúlo. Mamusi ito molapali mola oduólo wau motabia to Allahu Taáala wolo hulumati wau moohe, moduduá pohuli u otohila-Lio lohihilao. **29** Sababu Allahu Taáalanto debo odelo tulu umoópobu.

**13:1** Mamusi timongoli debo motolianga ngota timongota odelo tau-tauwalo Nasara tamohutato. **2** Diila maó popangu mololimo tau tobelemu tau-tauwalo tadiipo otaawa limongoli. Sababu wolo mohutu u



odito, peéenta woluo tau, lou diila ilolaa-sawalio, malo lolimo malaikati tobelelio. **3** Poótoloma maó tau-tauwala u todelomo tutupa, debo odelo timongoli olo woluo todelomo tutupa peé-peéenta woli mongolio. Wau tau-tauwalo tahe pilohutu totoonulalo otohilaa lohilao, mamusi timongoli moéela olimongolio debo odelo timongoli olo hepilo hutulio odito. **4** Ngoáamila tau musu mopo biloheó sikapu hulumati topolo nikawa, uito sababuulio mamusi tamo tolodile tatapu wau molotolo hilao ngota timongota. Taa u huloto wau taa u mojina maa aadilio lo Allahu Taáala. **5** Diila maó tutumulumu okawasa lou motoliango todoi, bo mamusi timongoli olulia lohilao lou wolo uwoluo toli mongoli. Sababu Allahu Taáala malo tahuda, "Wau diila tamo poluli meaalo mamololaa maó olemu." **6** Sababu uito ito buheli molojiya, "Eeya yito Tamoo-tulungia olau, wau diila moohe. Wolo u mowali pohutuo lomanusia olau?" **7** Diila maó lipata tomongo tauwamu talopo tunggulai tahuli lo Allahu Taáala olemu. Poótuota maó woloolo mola timongolio tumutumulo wau woloolo mola timongolio yilate, wau dudui maó iimani limongolio. **8** Ti Isa Almasi debo tutuuwauwa, mopio muloolo, masaatia, wau tunggula ohiheo-hiheolo maó. **9** Diila maó polulia totoonulalo pongaajali u hidelia wau mopolapalo olimongoli. Hilaanto musu poólotolola lo opopiohu hilaa lo Allahu Taáala, uitolo u mopiohe; diila maó bo sababu wuwuu-uduwaalo lo uáalo. Tau-tauwala tamuloololio mai helo dungohe wuwuu-uduwaalo boito diila loótapu hunalio. **10** Ito o mesba tuwau upodewowalo bake ode Allahu Taáala. Wau mongo iimamu tahe mohinta todelomo Kema lo Eeya, diila ohaku molamelo bake uwoluo toitaato mesba boito. **11** Duhu lo binatanggi u podewolo odelo bake u pongambungualo dusa, dilelo li iimamu daá ode Huwali Leidaá Laba-labaalo mantali, bo pate lo binatanggi boito lohihilao tilumbilalio to bulemengo kema. **12** Uitolo sababuulio ti Isa olo yilate to bulemengo huhebu lo kota u lopoó belesi umati-Lio lonto dusa wolo duhu-Lio lohihilao. **13** Sababu uito, duloolo ito monaó ode o-Lio to bulemengo kema wau peé-peéenta hinaalio wo-Lio. **14** Sababu todunia botie diaaluo tambati poti biluloáalo u ohiheo-hiheolo maó olanto; ito mololohe tambati poti biluloáalo u mamei dungga mai. **15** Sababu uito, lou motimbulude li Isa, mamusi ito laito momuji boli puji to Allahu Taáala;

uito debo odelo bake lo sukurunto to o-Lio, u podewonto moli lapali biihunto u mopolaió tanggu-Lio. **16** Diila maó lipata mohutu u mopiohe wau motutuu-lungia sababu uti-utieelo babaa-keyaalo umooó sanangi hilaa lo Allahu Taáala. **17** Dudui maó palenta lomongo tauwamu, wau potaálukulo toli mongolio. Sababu timongolio laito hemo poótuoto nyawamu, wau timongolio musi tihutihula duólo Allahu Taáala. Wonu timongoli modungohe olimongolio, timongolio moó kalaja wolo hilaa sanangi; wonu diila, yi timongolio mamo kalaja wolo hilaa suukali, wau uito diila moó paéeda olimongoli. **18** Poduaálo mola tulusi ode lamiaatia. Amiaatia yakini hilaa u maloótapu tinelo Eeya lamiaatia belesi, sababu todelomo totoonulalo suáli amiaatia laito ohilaa mohutu wolo u otutu. **19** Tolomodulio watia momolohone louí tióotutua, alihu timongoli modua mola olaatia alihu Allahu Taáala huáa modelo olaatia muli mohualingai ode limongoli. **20** Allahu Taáala malo potumulai li Isa Eeyanto lonto opopate. Sababu opopate-Lio boito Tio masaatia lowali Diti Daá de olanto, deúito-yito hihii-mbaa-Lio. Opopate-Lio boito olo loposaaha mai daantia ohiheo-hiheolo maó u pilohutu lo Allahu Taáala wolanto. **21** Pohileaala dua Allahu Taáala pobutua mai salaamati boito mopo wimumutai olimongoli wolo totoonulalo umopiohe upalaluo limongoli u mohutu kahandaki-Lio. Pohileaala dua motimbulude li Isa Almasi, Allahu Taáala mokalaja todelomo olanto, wolo u otohilaa-Lio. Mamusi ti Almasi pujiolo ohiheo-hiheolo maó! Amin. **22** Watia mohalapu alihu timongoli mopoó tuotaó nanaa-sehatiyalo laatia botie louí sabali, sababu tuladu lowatia botie diila boti hayahayaó. **23** Mamusi otaawa maó limongoli deu wutatonto tei Timotius mailopatio lonto tutupa. Wonu tio malonaó mai odia ode tambati lowatia botie, madeloo mola lowatia tio touí watia de mobiilohe woli mongoli. **24** Potunggula maó salamu lamiaatia ode ngoáamila tauwa limongoli wau ode ngoáamila umati lo Allahu Taáala. Tolimowalo olo salamu monto mongo wutato to Italia. **25** Pohileaala dua Eeya mobalakati mai mongo wutato ngoáamilalo.

**1:1** Mongo wutato umati lo Allahu Taáala ngoáamilalo taloo-loóopo to ngoilanggubu dunia! Salamu lonto olaatia, Yakobus, wato lo Allahu Taáala

wau wato lo Eeya Isa Almasi. **2** Mongo wutato! Wonu timongoli moótoduo yimontala u hidala-dalaala, mamusi timongoli molaasa opaéeda. **3** Sababu otaawa limongoli, deu wonu timongoli debo palacaya to Eeya tou moótoduo yimontala, akibatilio yito: timongoli mowali taaba. **4** Poódahai maó alihu otaaba lohilaamu boito tulusi molaió dilumutu timongoli tióotutua mowali wimu-wimumuto tutu wau diila okulangia penu boli todelomo suáli loolo. **5** Wonu woluo ngotaalio to wolotamu diila botie molinepo, mamusi tio mohile monto Allahu Taáala, yi Allahu Taáala mamongohi mai tinepo olio; sababu ode timiidu tau, Allahu Taáala mongohi mai wolo muula lohilao wau wolo pongolaasa hilaa hilao. **6** Bo taa umohile musi palacaya; tio diila mowali molawalo. Sababu tamolawalo yito debo odelo buóolo todeheto u hiliipa lodupoto odito mota odia mai. **7** Taa udebo odelo uito diila moduóto pikiilangilio; tio diila mowali mohama putuusani wolo-wolo todelomo totoonulalo u hitua-tuawua u pohutuwolio. Sababu uito, tio diila maó olo pahalapu u moótapu mai wolo-wolo monto Eeya. **9** Taulo Nasara tamosikini mamusi molaasa meengahe wonu Allahu Taáala mopolaiá olio. **10** Wau taulo Nasara takaya mamusi molaasa meengahe olo, wonu Allahu Taáala mopo dupapa olio. Sababu taa kaya mamooli debo odelo bunga lohuóyoto. **11** Tou mato lodulahu mobutu mai wolo patulio u mailaba, yi huóyoto boito mamowali mololante tilinggula moduduulahu mola bungalio wau moolilo mola ogagaalio. Odito olo wolo taa kaya; tio mamóantulu tou tio donggo hemoponaó lokela-kelaalio. **12** Potisanangilo tutu taa sabali tou tio odungga loimontala. Sababu lapataó tio moó tahangi toimontala boito, tio mamolimo wuupalio, deuító-yito tutumulo u mapilo danti mai lo Allahu Taáala totau-tauwalo tamo toliango Allahu Taáala. **13** Wonu tahingota-ngotawa oheinga mohutu dusa wolo ijimontala loimontala udebo odelo uito, diila maó poloiya tio, "Yimontala botie dudunggalio mai monto Allahu Taáala," sababu Allahu Taáala diila mowali oheinga mohutu dusa wolo u moleeto, wau diila olo moheingo mohutu dusa penu boli ngotaalio. **14** Bo tau oheingalio mohutu dusa wonu tio bantanga wau opiyowa lou otohilaalio lohihilao. **15** Lapataó, wonu hilaa u moleeto boito duduáalo, yi mamotoduo mai dusa; wau wonu dusa maloontapo, yi akibatilio yito opopate. **16** Diila bolo owimbulowa

timongoli, Mongo wutatuu taa otoliango! **17** Timiidu wowohi u mopiohe wau wuupa u wimu-wimumuto tutu dudunggalio mai monto sologa, tiluhutai lo Allahu Taála, Talopowali totoonulalo u mobaango tohulungo. Tiolo Allahu Taála tadiila mobolió, wau diila olo moósababu penu boli odiólomo wolo. **18** Tou hilaa-Lio lohihilao Tio lopowali mai olanto mongo wala-Io lotimbulude to tahudaa-Lio u otutu. Tio lohutu mai uito alihu ito moótapu tambati ulaba-labaalo mopiohu towolota lo ngoáamila mahaluku u pilowali-Lio. **19** Poótuota maó utie lou tióotutua, Mongo wutato taa otoliango! Timiidu tau musi molinggahu u modungohu, bo moboyu u mobisala wau moboyu u moingo. **20** Taa u moingo diila mowali mohutu umopiohe, umopo sanangi hilaa lo Allahu Taála. **21** Sababu uito, tapilalo timiidu aadati u moleeto wau kootolo. Tolimowalo wolo dupa-dupapa lohilao tahuda uilodungo lo Allahu Taála todelomo hilaamu, sababu tahuda boito o olootolo u mopoáahu olimongoli. **22** Mamusi timongoli mohutu maó wolo upilo tahuda mai lo Allahu Taála, diila bo modungohe wambaio, tilinggula lou odito timongoli mohimbulo batanga lohihilao. **23** Taa u modungohe tahuda lo Allahu Taála, bo diila mopohutu uito debo odelo taa donggo hemomilohe bayalio u otutuulio maó totalu loinggilua. **24** Lapataó piloó tuotio tióotutua, tio olo malonaó wau lato lolipataó woloolo mola laku lobayalio boito. **25** Butoó lo Allahu Taála wimu-wimumuto tutu wau o olootolo u mopo lopato manusia. Wau taa u motulete wau mopoó tuoto tióotutua wau moponaó bubuu-toówaalo boito, wau diila bo modungohe wambaó lapataó momalongo, yi tau boito mabalakatia lo Allahu Taála to timiidu suáli upilo hutulio. **26** Wonu woluo tahingota-ngotawa u molaasa batangalio taungota ohilaa moduduó palenta lo agama, bo tio diila modaha dilalio, yi tio mongaakali batangalio lohihilao; tabiaalio diila ohunalio. **27** Ododungohu to agama ubelesi wau u tutuuliotutu moduduá bibilohu lo Allahu Taála ti Paapa yito; motulungi taukekeei tadidu otiilo otiyamo wau mongo janda tahi dutola, wau modaha batanga lohihilao alihu diila maó antuluo lodunia botie.

**2:1** Mongo wutatuu! Odelo taa u palacaya to Eeya Isa Almasi, Eeya Taa Laba-labaalo molamahu, diila maó popo hihihede limongoli tau bo

patopatoá to susuu-aliyaalo ulahiri. **2** Sababu wonu woluo taa kaya ngota tamomake huálimo hulawa wau boó mopiohe monaó mai ode dudunggayamu, lapataó monaó mai olo tamosikini ngota tapake-pake boó u hiánta-antanga, **3** yi timongoli lebe mohulumati totaa pakepake boó u mopiohe boito. Timongoli mamoloiya olio, "Toduwolo Tuani motihuloá tokadela ugaaga daá botie." Bo totaa u mosikini timongoli moloiya maó, "Tihuloolo teto mola," meaalo "Huloóolo to wumbato teea." **4** Lou mohutu u odito, timongoli mopo hiihede towolota timongotamu wau motiliki tau bo patopatoá to pikiilangi u moleeto. **5** Poótoloma maó! Mongo wutato taa otoliángo! Taa mosikini todunia botie, tilulaoto Allahu Taáala u mowali taa kaya todelomo iimani. Tau-tauwala boito mamowali ngaalaa umati lo Allahu Taáala debo odelo u pilodanti mai lo Allahu Taáala totaa motoliánga o-Lio. **6** Bo timongoli tumbaó hemohina taa mosikini, lebe-lebe pomaó tau-tauwalo tahi kayawa tahelo deehe olimongoli wau lodedeá olimongoli ode bubutoó! **7** Timongoliolo tahelo hina tanggulo u hulu-hulumati utilolimo limongoli lonto Allahu Taáala! **8** Timongoli mohutu u otutu, wonu timongoli moponaó butoó lo yilaidia uwoluo todelomo ayati lo Kitabi botie, "Toliánga maó timongotamu debo odelo timongoli motoliángo batangamu lohihilao." **9** Bo wonu timongoli mopo hiihede tau patopatoá to susuu-aliyaalo ulahiri, timongoli lohutu dusa, wau butoó lo Allahu Taáala mopoilaalo mai deu timongoli yito tamoo-lambangawa butoó. **10** Taa u molambanga tala tuwau bubuu-toówaalo Allahu Taáala, boliilio maó malo lambanga ngoáamilalo. **11** Sababu tamoloiya, "Diila maó pojina," tiolo olo talo loiya, "diila maó pomate-mateelo maó." Oditolio, wonu timongoli diila lojina, bo lomate-mateelo maó, yi timongoli yito tamoo-lambangawa butoó olo. **12** Pobisalalo wau pohutuwalo odelo taa uma aadiliyo-Lio moduduá butoó Allahu Taáala umopo lopato manusia. **13** Sababu Allahu Taáala diila tamopo bilohei odehu hilao ode taa udiila motota modehu hilao. Bo modehu hilao lebe molotolo wolo hukuumani. **14** Mongo wutato! Wolo hunalio tau moloiya, "Watia taa u palacaya", wonu tio diila mopo biloheó wolo huhutuulio? Tingga mowali iimani debo odelo uito mopoáahu olio? **15** Humayaalio ngotaalio lowutato meaalo wutati momalalu boó wau diila

o uáalo tutuuheta ungohui-ngohui, **16** wolo hunalio timongoli molojiya maó olio, "Salaamati momake boó u mopatu wau salaamati molameló!" -- wonu timongoli diila mongohi maó olio wolo u palaluwolio ode tutumulo? **17** Oditolo olo wolo iimani, wonu diila poilaalolo wolo huhutu, yi iimani boito diila ohunalio. **18** Tanu woluo tamolojiya, "Woluo taa u motiwunela to iimanilio wau woluo olo taa u motiwunela to huhutuulio." Watia mamó lametaó, "Pobilohé mai olaatia woloolo mola tau mowali o iimani lou diila ohuhutu wau watia mamopo bilohéó wolo huhutu deú watia o iimani." **19** Timongoli palacaya deú Allahu Taáala bo tuwau, diila odito? Naa, roroo-huwaalo u moleeto olo palacaya wau timongolio hulu-huluhelio lou moohe! **20** Timongoli mohulode daá! Wolo palalu pobukutiyolo olemu deú diila ohunalio o iimani lou diila wolo huhutu? **21** Bilohilo maó tei Abraham tinenemoyanto. Tio tilolimo-Lio lou mopiohe lo Allahu Taáala sababu huhutuulio, deúito-yito tou tio lopodewo olei Isihaka, walaio, ode Allahu Taáala toitaato mesba. **22** Lopatatolo maó tewe deú iimani musi pobilohulo wolo huhutu alihu mowali wimu-wimumuto tutu. **23** Uito lotuuide wolo ayati lo Kitabi botie, "Tei Abraham palacaya to Allahu Taáala, wau sababu iimanilio boito Allahu Taáala lololimo olio odelo taa lohutu kahandaki lo Allahu Taáala." Uito sababuulio tei Abraham ilunte, "Sahabati lo Allahu Taáala." **24** Malo patate botia, deú tau tolimoo-Lio lou mopiohe lo Allahu Taáala kalana wolo u pilohutu lotau boito, wau diila bo sababu iimanilio wambaó. **25** Bilohi maó olo ti Rahab, taabua suuntali boito. Tio tilolimo lou mopiohe lo Allahu Taáala sababu huhutuulio, deúito-yito tou tio lololimo todelomo belelio ngoolo lota tamoo-hehulawa bangusa lo Isirailu wau lotulungi olimongolio lei teteó loli dalalo wewo. **26** Naa, debo odelo batanga diila o rohu yito batanga uilate, odito olo iimani diila ohuhutu yito iimani uilate.

**3:1** Mongo wutato! Diila maó podaatawa to wolotamu tamohuto mowali guru. Otaawa limongoli deú ito tamowali guru mabutoólio lebe moóohui wolo taa wewo. **2** Ito ngoáamila laito hemohutu totala. Bo taa diila peéenta maó helohutu totala wolo loloo-iyaaio, tio taa u wimu-wimumuto tutu, tamoo kawasa ngoilanggubu batangalio. **3** Wonu ito mopohuli lo



tongguimo to tunggilo wadala alihu wadala boito moduduá u otohilaanto, yi ito mowali mongatulu ngoámila wawaó wadala boito. **4** Hamaawa maó olo kaapali odelo obaaya. Eleponu kaapali yito tuwaulio u odito udaá wau dilelo lodupoto moóhuiu, bo kaapali boito podulungo lokamudi ukikiio daá, moduduá u otohila lo julumudi. **5** Odito olo wolo dilanto; eleponu dilanto boito kikiió, bo dila boito mowali mopo sombongi batanga pasali lo susuu-aliyaalo u duduulaa. Nte pikiilangia mola malo odito udaálio oáyua u mowali tumbila lotulu ukikiiá daá! **6** Dila tutuuwauwa wolo tulu. To batanganto, dila debo odelo bungo lou moleeto u mopoloopo u moleeto ode ngoilanggubu lo batanganto. Wolo tulu u asaliilio mai monto nalaka, tio moópobu ngoilanggubu tutumulonto. **7** Totoonulalo binatanggi mongantau u hidala-dalaala, bulungi, binatanggi hialapa wau tola mowali poluwamolo, wau olo mapilo luwamo lomanusia. **8** Bo dila lomanusia diila mowali poluwamolo penu boli lo tatoonu. Dila boito moleeto wau diila mowali kawasaalo; polupolu lopeedi umoópate. **9** Ito mopohuna maó dila u molapali oduólo ode Eeya wau ti Paapanto, bo olo u molaánati ngota timongotanto tamaa pilowali-Lio mai loduduá gambali lo Allahu Taáala. **10** Monto tunggilo u tutuuwauwa lumualai tataa-heyaalo oduólo wau olo tataa-heyaalo laánati. Patutilio diila odito! **11** Tingga woluo butu lotaluhu umopo pentelai taluhe udiila olamita wau taluhe u mopaáato monto ali u tutuuwauwa? **12** Bungo lo ara, Mongo wutatuu, diila mowali momungo mai hungo lojaituni, wau bungo lo angguru diila mowali momungo mai hungo lo ara. Butu lotaluhe u mopanggelo diila mowali olo mopolualai taluhe diila olamita. **13** Wonu to wolotamu woluo taa molinepo wau obudi, mamusi tio mopo biloheó wolo tutumulo mopiohe wau lou mohutu susuu-aliyaalo umopiohe, wau tunutunuhu lohilao dupadupapa wau tinepo. **14** Bo wonu timongoli mohiihia, mopalato hilao, wau mopolohuna daá batanga lohihilao, diila maó pomanggawa tinepo boito, sababu woleeto timongoli mopo boboolio habari u otutu monto Allahu Taáala. **15** Tinepo debo odelo uito asaliilio mai diila lonto sologa. Bo asaliilio mai lonto dunia, lonto napusu lomanusia, wau lonto lati! **16** Toutoonu ohilao mohiihia wau piili mopolohuna daá batanga lohihilao, teto olo woluo tolonggalo wau totoonulalo huhutu u moleeto. **17** Bo taa o tinepo u asalilio

mai monto yitaato, tio tabohu-bohulio daá belesi, lapataó ohilaa modaamea, mopiohe hale, wau tamoo-dungohea. Odehu hilaalio lealeaatu wau mongohi tilapulo tou totoonulalo huhutu u mopiohe. Tio diila motiwambaó wau diila munapiki. **18** Memangi opopiohe yito hungo lou dame upilo muáyadu lotaa ohilaa dame!

**4:1** Monto utoonu asaliilio mai lou totoonulalo umoó loohulua wau moó buutola to wolotamu? Diila maa uito u asaliilio mai lou totoonulalo otohilaamu u wambaó tulusi hemopaatea todelomo batangamu u moótapu osanangi todunia! **2** Timongoli mohuto, bo diila moótapu, yi timongoli ohilaa momate-mateelo maó! Timongoli osumangati, bo diila moótoduo wolo u helolohu limongoli, yi timongoli mobuutola wau moloohulua. Timongoli diila moótapu wolo-wolo, sababu timongoli diila mohile ode Allahu Taáala. **3** Wau wonu boli timongoli malohile maó, timongoli debo diila moótapu mai, sababu patuju lo hihilemu tilala; wolo upohile limongoli yito duólo osanangi batanga lohihilao! **4** Timongoli yito taa u diila tatapu wau molotolo hilao! Wolo otaawa limongoli deu wonu timongoli mowaita wolo dunia, yi timongoli mowali musu lo Allahu Taáala? Oditolio titaalo tita motohilaa mowali sahabati lodunia botie, tio mowali musu lo Allahu Taáala. **5** Diila maó polantobu deu Kitabi lou diila o alaasani molojiya, "To delomo batangaanto Allahu Taáala lopo tambati mai rohu umoóhuhu otohilaalio." **6** Eleponu odito, odehu hilaa lo Allahu Taáala uilohi-Lio mai olanto lebe molotolo lou ilohilaa lo rohunto boito. Uitolo sababuulio todelomo Kitabi tulatulade olo, "Allahu Taáala motehengi taa sombongi, bo boliio maó Tio momonu taa udupa-dupapa lohilao." **7** Sababu uito, potaálukulo to Allahu Taáala wau tuwalia maó Ibilisi, yi Ibilisi mamolahi monto olimongoli. **8** Tahudeelo Allahu Taáala, wau Allahu Taáala olo mamó tahudei olimongoli. Pobelesia maó uluúmu, timongoli taa odusa! Powolanga mola hilaamu, timongoli u tango-tango lohilao. **9** Mamusi timongoli tióotutua moleée wau humoyongo boli mohilimuta; mamusi iimu mowali hiyongo wau owengahumu mowali osuukali! **10** Mamusi timongoli mopodupapa batanga totalu lo Eeya, yi Eeya mamó polaiá olimongoli. **11** Mongo wutato, diila maó poheheenteá

meaalo tinggai mopotala. Tamohenteá wau mopotala wutatio timongota Nasara, tio mohenteá wau mopotala butoo Allahu Taaala. Wau wonu timongoli mopotala butoo Allahu Taaala, uito boliilio maó diila moduduá bubuu-toowaalo boito, bo mowali hakimulio. **12** Lebe-lebe pomaó bo ngota taohaku mongohi mai butoo tomanusia wau momutoo manusia. Uitolo Allahu Taaala taokawasa mopoáahu wau mopobinasa. Oditolio, tatoonu timongoli, tilinggula timongoli mohuto mopotala timongota lomanusia? **13** Mongo wutato tahi poloiyawa, "Dulahe botie meaalo loombu amiaatia momonggato ode kota anu wau motibiluloá mola teto ngotaunu mola hiheolio u modahangi wau mopeehu doi," -- dungohi maó naseehati lowatia botie. **14** Wolo u mamotoduo mai wolo tutumuli mongoli loombu, penu boli timongoli lohihilao olo diila motota! Timongoli bo debo odelo poloó u bo ngopeé mola oontonga, lapataó mooli. **15** Patutilio timongoli molojiya odie, "Wonu Eeya potala motuhatawa, amiaatia matumumulo wau mohutu utie meaalo uito." **16** Bo botia timongoli sombongi wau molatabu. Ngoáamila latabu debo odelo uito tilala. **17** Sababu uito, taa u motota wolo umopiohe umusi pohutuolio bo diila pilohutulio, yi tau boito odusa.

**5:1** Mongo wutato, tau-tauwalo tahi kayawa! Dungohi maó naseehati lowatia. Mamusi timongoli humoyongo wau mohilimuta sababu timongoli mamodutolo sikisa. **2** Okokayamu malo hutodu. Pakeyangimu mailiila lowale. **3** Hulawa wau talaamu matilaube lotaato; taatio mamowali sakusi moluwali olimongoli wau maa aoolio mopulito batangamu debo odelo tulu. Timongoli malomuntu halata tojamani mapulitio. **4** Timongoli diila hemo mayali wuupa lotau-tauwalo tahemo kalaja to halabolumu. Botia dungohilo poloilaalo suusa limongolio! Tau-tauwalo tahipo himoa tilapula lo halabolumu hiwatiá mei tulungi wau wuwaatii mongolio mailo dungohe lo Allahu Taaala, Eeya Taa Laba-labaalo kawasa. **5** Timongoli matilumumulo lebe lou wولو wau maloólaasa osanangi todunia botie. Timongoli debo odelo donggo hemo poolingohu batanga duolo dulahe pongolotalo. **6** Timongoli hemo hukuumani wau momate-mateelo maó tau-tauawalo tadiila ototala, wau timongolio diila moluwali olimongoli. **7**

Sababu uito, posabalilo mola Mongo wutatuú, dilumutu Eeya meidungga mai. Bilohilo woloolo mola sabaliilio tamoomengia ngota mohima dilumutu hutalio mongohi tilapulo u ohalaga olio. Wolo sabali tio mohima didi losembo polodehua wau didi sembo lobunga. **8** Mamusi timongoli olo mosabali wau ohilaa daá, sababu dulahe podudungga mai lo Eeya malembidu. **9** Diila maó potihungoto wau tinggai mopotala, alihu timongoli diila hukumanio lo Allahu Taáala. Eelai maó! Hakimu malembidu, dapadapato u meidungga mai. **10** Mongo wutato, eelai mola mongo nabi tahelo bisala totanggulo Eeya. Timongolio sabali wau taaba helo dutolo. Oditolio, hamaalo maó timongolio odelo obaaya. **11** Timongolio ilunte sanangi tutu sababu timongolio taaba. Timongoli maloó dungohe pasali osabali lei Ayuba, wau otaawa limongoli woloolo mola Eeya tou pulitio lobalakati olio. Sababu lodehu daá hilaa lo Eeya wau mopiohe hale. **12** Ulebe polohuna daá, deuuto-yito: Diila maó potadia, mopio domi hulungo, meaalo domi dunia, meaalo penu boli domi wolo wambaio. Loiyaalo maó "Joo" wonu patujumu joo, wau "Diila" wonu patujumu diila; alihu timongoli diila maó podehuwalo hukumani lo Allahu Taáala. **13** Wonu to wolotamu woluo tadonggo suusa, mamusi tio moduá. Wonu woluo tameengahe, mamusi tio mopolahu mola momuji Allahu Taáala. **14** Wonu woluo tamo ngongoto, mamusi tio motianga mongo tauwa lojamaá. Wau mamusi mongo tauwa boito moduá mola totaa mongongoto boito wau moleaapu wolo winulo to tanggulo Eeya. **15** Wonu duá limongolio potunggulo wolo yakini, Eeya mamo pooluli mai tamo ngongoto boito, wau mongambungu duduu-sawaalo u mapilo hutulio. **16** Sababu uito, mamusi timongoli mongaa-ngaakua totala wau moduu-duuáwa mola, alihu timongoli pooluli-Lio mai. Duá lotaa umoduduá u otohilaa lo Allahu Taáala okawasa daá. **17** Tei Elia tutuuwauwa wolo manusia debo odelo ito. Tio heloduá lou tióotutua alihu didi diila modehu mai, yi didi olo diila lodehu ngotilonggadu tolo taunu wau ngoputu hiheolio. **18** Lapataó tio luli loduá mola, tulusi hulungo lopo tuhutai didi tilinggula huta lopowoluo mai tilapulio olo. **19** Mongo wutatuú! Wonu to wolotamu woluo tahingo-ngotaawa tadiilalo moduduá pongaajali monto Allahu Taáala tulusi ngotaalio wewo mohutu maó tau boito muli

mohualinga ode Allahu Taáala, **20** eelai maó ayati botie: Taa u mohutu maó taa odusa muli mohualingai monto dalalio u talatala, tau boito mopoáahu jiwa lotaa odusa boito monto opopate wau moósababu daata lodusa ambunguolo. Hulumati lamiaatia, Yakobus 1pe>

**1:1** Mongo wutato umati tatilulaoto Allahu Taáala taloo-loóopo tolipu wewo tambati popeehumolo tutumulo tomadala lo Pontus, Galatia, Kapadokia, Asia, wau Bitinia! Watia, Petrus, rasulu li Isa Almasi, motiwunela pohileaala duá Allahu Taáala mongohi mai balakati wau salaamati olimongoli lou daata-daatalo maó. Timongoli tilulaoto lowali umati lo Allahu Taáala lotuúde wolo lanjana lo Allahu Taáala ti Paapa. Wau Rohullah malo powali olimongoli umati tamantali, tolomodu duólo Allahu Taáala, alihu timongoli modungohe li Isa Almasi wau pomantaliyo wolo duhu-Lio. **3** Duloolo ito mosukuru mola ode Allahu Taáala, ti Paapa Eeyanto Isa Almasi! Malo odito ponu-Lio olanto, uito sababuulio Tio longohi mai olanto tutumulo bohu, lou luli lopotumulai li Isa Almasi lonto opopate. Utie mongohi mai olanto halapani u motoheeto. **4** Ito motiwunelo u motolo miliki babaa-lakatiyalo upilo dapato lo Allahu Taáala ode umati-Lio, deuito-yito balakati utilahu-Lio tosologa, tilinggula diila mowali moluusa, meaalo mowali mohutodu meaalo moluluto. **5** Ngoáamilalo boito yito ode limongoli sababu timongoli palacaya to Allahu Taáala. Yi timongoli dilaha-Lio wolo kawasa lo Allahu Taáala alihu timongoli mololimo oáahu udapa-dapato poilaaloolo de topulito lojamani. **6** Sababu uito mamusi timongoli motiwengahe lohilao, eleponu botia u bo wakutu ngopeé mola timongoli musi mowali suukali sababu timongoli moótodo yimontala u hidala-dalaala. **7** Patujulio yito u mopo bukuti maó wolo timongoli tióotutua palacaya to Eeya meaalo diila. Hulawa u mowali moluusa olo, tesiyola wolo tulu. Naa, iimani limongoli yito lebe maó ohalaga wolo hulawa, oditolio musi tesiyola olo alihu mowali motoheeto. Wau lou odito timongoli mapujio wau hulumatiolo boli polaióolo todulahe podudungga mai li Isa Almasi. **8** Timongoli motolianga o-Lio, eleponu muloololio mai timongoli diila loóonto o-Lio. Wau timongoli palacaya to o-Lio eleponu botia timongoli diila moóonto olio. Uito sababuulio

timongoli motiwengahe, wau molaasa hilaa meengahe u udaá wau diilalo mowali loiyaalo. **9** Sababu dulungo lo iimani limongoli iloáata, deúito-yito oáahu lojiwa limongoli. **10** Oáahu botieelo u tilulete wau ilimatoa lomongo nabi, wau timongolio helo laamali pasali lo balakati uilohi mai lo Allahu Taáala ode limongoli. **11** Timongolio helo ngimato woloolo mola wau omolua suáli boito mamotoduo, u milakusudu lo Rohu li Almasi uwoluo todelomo batanga limongolio. Tou boito Rohu-Lio lonubuwati mai ode limongolio pasali totoonulalo polodutolo umusi olaasawa li Almasi wau pasali lo odudaáa-Lio umamo hunuheí lapataó uito. **12** Tomongo nabi boito Allahu Taáala lopooótaa deú wolo u pilohutu limongolio diila bo upolohuna daá olimongolio, bo ode olemu; deúito-yito susuu-aliyaalo u masaatia botie u ilodungohe limongoli wolo mopatato monto tamoo-delowa Habari Mopiohe pasali li Isa Almasi. Timongolio lopo tunggulai susuu-aliyaalo boito olemu wolo kawasa lo Rohullah uilohi-Lio mai lonto sologa. Tumbaó penu boli mamaa-laikatiyalo ohilaa olo motota habari u pilohabari limongolio boito. **13** Sababu uito, mamusi timongoli dapadapato. Poódahai maó wau poti wunelolo lealeaatulo maó to balakati u mawohi-Lio mai olemu tou ti Isa Almasi de meidungga mai. **14** Podungohulo to Allahu Taáala wau diila maó potitumulo moduduá hilaamu u omoóomolu, tou timongoli diipo motota lo Allahu Taáala. **15** Boliio maó, mamusi timongoli mantali todelomo totoonulalo hitua-tuawua u pohutuo limongoli, tutuuwauwa debo odelo Allahu Taáala tamalo tianga olimongoli boito mantali. **16** Todelomo Kitabi tulatulade, "Mamusi timongoli mantali, sababu Wau mantali." **17** Timongoli mongunte Allahu Taáala boito ti Paapa towakutu timongoli moduá mola to o-Lio. Naa, Allahu Taáala boitolo tamomutoó manusia motuuúide wolo huhutu longota-ngota lou diila momilohe baya. Sababu uito tou timongoli donggo woluo todunia botie, mamusi timongoli mopouádaá mola Allahu Taáala todelomo tutumulumu. **18** Otaawa limongoli wolo umapilo mayali u lopo lopato olimongoli lonto tutumulo udiila ohuna upilo walisi mai linene moyamu. Bayaliilio diila hitua-tuwaua umowali moluusa debo odelo talaá meaalo hulawa, **19** bo hitua-tuwaua u ohalaga daá; deúito-yito batanga li Almasi lohihilao, ulowali odelo himba u pilobake ode Allahu Taáala lou



diila o aibu wau henteo. **20** Ti Almasi tilulaoto Allahu Taála tou dunia botie diipo pilowali mai. Wau to duduu-laheyaalo meidungga mai pulito lojamani botie, Tio meidungga mai ode dunia alihu timongoli poáahuwolo. **21** Motimbulude o-Liolo timongoli palacaya to Allahu Taála tamaaluli lopotumulai o-Lio lonto opopate wau lopoudaa o-Lio. Oditolio, Allahu Taálaalo tailaku maó limongoli wau to Allahu Taálaalo olo timongoli mopowunelo halapani. **22** Sababu timongoli lodungohe to pongaajali lo Allahu Taála, yi timongoli lopo belesi batanga wau timongoli lotolianga tau-tauwalo tango iimani lou ihilasi. Sababu uito, mamusi timongoli motolianga ngota timongota wolo lealeaatu lohilao. **23** Sababu motimbulude totahuda lo Allahu Taála tatumu-tumulo wau ubakaa boito, timongoli mapilowali manusia bohu u diila pilotutu mai lomanusia, bo li Paapa tabakaa. **24** Todelomo Kitabi tulatulade odie mola, "Ngoáamila umati lomanusia debo odelo huóyoto, wau ngoáamila odudaálio debo odelo bunga lohuóyoto. Huóyoto mololante, bungalio olo modulahu; **25** bo tahuda lo Eeya debo u ohiheo-hiheolo maó." Tahuda boito Habari Mopiohe umapilo habarilio mai olemu.

**2:1** Sababu uito, yinggilalo monto batangamu totoonulalo u moleeto; diilalo pohimbulo, wau diila maó poti munapiki. Diila maó pohiihia, wau diila maó pohina taa wewo. **2** Mamusi timongoli mowali debo odelo taunge u boheli pilotutu mai, laito mototoango losusu lorohu u puluwa. Lou odito timongoli matumumulo wau poáahuwolo. **3** Todelomo Kitabi tulatulade odie, "Timongoli maloólaasa lohihilao malo odito piohio lo Eeya." **4** Sababu uito, ponaóolo mai ode Eeya. Tio debo odelo botu utumu-tumulo, botu utilapi lomanusia sababu he anggapuwolo diila ohuna; bo tumbaó tilulaoto Allahu Taála odelo botu u ohalaga. **5** Timongoli debo odelo boboo-tuwaalo utumu-tumulo. Sababu uito mamusi timongoli mohuto pomakelio u momongu bele lo Allahu Taála u rohu. Lou odito timongoli mowali mongo iimamu tatumu-tumulo tolomodu ode Allahu Taála, wau u motimbulude li Isa Almasi mopodewo ode Allahu Taála, bake lorohu u motuhatawa tohilaa lo Allahu Taála. **6** Sababu todelomo Kitabi tulatulade odie, "Wau malo lulaota botu tuwau u ohalaga, upilopo

tambati-U to Sion odelo botu laba-labaalo mopiohu; wau taa palacaya o-Lio diila taókikiio lohilao." **7** Botu boito ohalaga daá ode limongoli tapalacaya. Bo ode tau-tauwalo tadiila palacaya, pohu-pohutulo áá-yatiyaalo Kitabi odie mola, "Botu udiila ilopomakea lo papaa-niyaalo hudungu boito malo ilaalo lowali botu u ulaba-labaalo mopiohu." **8** wau "Uitolo botu umoó teduó totau, botu u moóodehu olimongolio."

Timongolio meiteduó sababu timongolio diila palacaya totahuda lo Allahu Taáala. Odieelo mola matilantu mai lo Allahu Taáala tomimbihu olimongolio. **9** Bo timongoli yito bangusa tatilulaoto, mongo iimamu tamomaya li olongia, bangusa tamantali, tolomodu duólo Allahu Taáala, umati lo Allahu Taáala lohihilao. Allahu Taáala lolulaota olimongoli wau lotianga olimongoli yilumuwalo lonto u modiolomo u tumuwoto ode delomo baa-Ngio ulaba-labaalo mobaango, wolo makusudu alihu timongoli mopololadu habari pasali lo totoonulalo huhutuu-Lio upolupolutuó. **10** Omoóomolu timongoli diila umati lo Allahu Taáala, bo botia timongoli yito umati lo Allahu Taáala. Omoóomolu timongoli diila pilonu lo Allahu Taáala bo botia timongoli mololimo odehu hilaa-Lio. **11** Mongo wutato taa taótoliango! Timongoli yito tau deli wau tamoo-leleyangia todunia botie. Sababu uito watia mohile lou tióotutua alihu timongoli diila maó moduduá napusu lomanusia ulaito mopaatea moluwali jiwa. **12** Piili limongoli towolota lotaa udiila motota lo Allahu Taáala mamusi mopiohe daá, tilinggula wonubolo timongolio mopitana olimongoli odelo taa moleeto, timongolio debo musi motolo akuwo huhutumu u mopiohe, tilinggula timongolio mamomuji Allahu Taáala todulahe podungga-Lio mai. **13** Domi Eeya, mamusi timongoli taaluku ode timiidu tamoo-kawasawa manusia: mopio toli Kaisari tamoo-kawasawa ulaba-labaalo mopiohe, **14** meaalo toli Gubolonulu tatilunu maó li Kaisari u mohukuumani tahi pohutua moleeto wau u mohulumati maó taa u hipohutua mopiohe. **15** Sababu Allahu Taáala motohilaa alihu wolo totoonulalo huhutuumu u mopiohe timongoli mongunti tunggilo lotaa u mohulodu mobisala. **16** Mamusi timongoli tumumulo odelo taa bebasi, bo diila maó pomakea obebasimu boito u modepuhe ololeeto, bo tumbaó potitumulolo odelo wato lo Allahu Taáala. **17** Halagai maó ngoáamila tau,

tolianga maó mongo wutatumu timongota Nasara. Poohelo mola to Allahu Taáala wau hulumatia maó ti Kaisari. **18** Mongo wutato tamowali wato, potaálukulo toli tuanimu wolo ohulu-hulumatilo maó; diila bo toli mongolio tamopiohu hale wau moáaluti, bo olo toli mongolio tadiila omanusia. **19** Allahu Taáala mamo balakati mai olimongoli, wonu timongoli sababu mongalati tou otohilaa lo Allahu Taáala, sabali modutolo topolo huhutu udiila aadili. **20** Sababu wolo polutuio wonu timongoli sabali modutolo hukuumanu u patutilio bantawa limongoli sababu ototala? Bo wonu timongoli wolo sabali momanta polodutolo u motoduo mai olimongoli sababu mohutu u otutu, yi Allahu Taáala mamo balakati mai olimongoli. **21** Maa uitolo Allahu Taáala lotianga olimongoli. Sababu ti Almasi lohihilao malo dutolo ode limongoli, wau woleeto Tio longohi olimongoli tuwaulio obaaya, alihu timongoli moduduá baáa-Tio. **22** Tio diila peéenta maó helohutu dusa, wau diila peéenta maó olo penu boli ngotaa loódungohe o-Lio helo himbulo. **23** Tou Tio hepilu-piluwayolio, Tio diila lomalasi wolo puwayo. Tou Tio dutodutolo, Tio diila helo nganjamu; Tio bo lohudu mola palakala-Lio ode Allahu Taáala, Hakimu taaadili boito. **24** Ti Almasi lohihilao talomanta totoonulalo dusaanto tobatanga-Lio toitaato ayu salipu, alihu ito molopato monto okokawasa lodusa, wau tumumulo moduduá u otohilaa lo Allahu Taáala. Papaa-liyaalo li Almasi boitolo u lopoóluli olimongoli. **25** Omoóomolu timongoli debo odelo himba uilapalo, bo botia timongoli maluli dilelo-Lio u loduduá Diti wau Tamoo-laalawa nyawa limongoli.

**3:1** Odito olo timongoli, mongo dile taabua, musi taaluku todile talolai alihu wonu towolota limongolio woluo tadiila palacaya tohabari monto Allahu Taáala, piilimu moóhutu olimongolio mowali palacaya. Wau diila palalu timongoli molojiya wolo-wolo olimongolio, **2** sababu timongolio moóonto piilimu ubelesi wau saale. **3** Ogaagamu boito diila bo ogaaga to bulemengio, debo odelo humayaalio modadai huwoó meaalo momake polomu, meaalo momake boó u himahalea. **4** Boliio maó, mamusi ogaagamu tumoodei monto delomo hilao, piili u molumboyoto wau moduóoto; uitolo ogaaga ubakaa u ohalaga daá moduduá to bibilohu

Allahu Taáala. **5** Wolo dudelo utieelo tojamani muloololio mai mongobua o agama tahemo halapu to Allahu Taáala helo poógaaga batangalio lou taaluku todile limongolio. **6** Ti Sara odito olo, tio lodungohu tolei Abraham wau longunte olio tituanilio. Wutato botia yito mongo walai Sara, wonu timongoli mohutu susuu-aliyaalo u mopiohe wau diila moohe tou wolo wambaio. **7** Wau timongoli olo, mongo dile talolai, mamusi tumumulo wolo lealeaatu lo huhama todilemu, wau wolo motota lobatanga hihilao deu timongolio yito kaumu tamo lulupuhu. Pohutua maó timongolio wolo hulumati, sababu timongolio pee-peenta woli mongoli, mamololimo ponu lo tutumulo ututuulio tutu monto Allahu Taáala. Pohutua maó utie, alihu diaaluo tamo ngabuto duamu. **8** Limbuio maó yito: mamusi Mongo wutato ngopikii-langi wau ngopongolaasa. Mamusi timongoli mototoo-lianga debo odelo tau-tauwalo tamohutato. Wau mamusi timongoli tinggai modehu hilao wau opopoli dupadupapa lohilao. **9** Diila maó pomalasi u moleeto wolo u moleeto, meaalo puwayo wolo puwayo; boliio maó balasia maó wolo momolohone mola balakati monto Allahu Taáala. Sababu Allahu Taáala motianga olimongoli tumbaó alihu timongoli mololimo balakati monto o-Lio. **10** Todelomo Kitabi tulatulade odie, "Taa u ohilaa molaasa maó tutumulo wau ohilaa moótoduo mai duduu-laheyaalo u mopiohu, musi modaha tunggilio alihu diila mobisala susuu-aliyaalo u moleeto wau diila molapali susuu-aliyaalo uimbulo. **11** Tio musi mopo walaheó u moleeto wau mohutu u mopiohu; mamusi tio mohipate tióotutua umoó toduo mai polodame. **12** Sababu Eeya laito mopoótuoto tau-tauwalo tamoduduá otohilaa-Lio, wau Eeya laito modungohe duduu-awaalo limongolio; bo Eeya moluwali tau-tauwalo tahi pohutua u moleeto." **13** Tatoonu tamo tohilaa mohutu u moleeto olimongoli, wonu timongoli sanangi mohutu u mopiohu? **14** Bo eleponu timongoli musi modutolo sababu hemohutu susuu-aliyaalo u mopiohe, timongoli o paéeda! Diila maó oohe penu boli olo tatoonu, wau diila maó polawalo. **15** Bo todelomo hilaamu, mamusi timongoli mongohi li Almasi polo hulumati u tolomodu umotuúde wolo huhuloá-Lio odelo Eeya. Wau mamusi timongoli laito dapadapato mongohi tameto to timiidu taa mohintu tomimbihu halapani u mililiki limongoli. **16** Bo pohutua maó uito wolo

molumboyoto wau hulumati. Wau musi hilaamu u maloótapu tenelo Eeya beresi, alihu wonu timongoli pitanaalio sababu timongoli tumutumulo lou mopiohe odelo muri li Almasi, yi taa u mopitana boito mamowali moolito lohihilao. **17** Lebe mopioheó modutolo sababu hemohutu u mopiohu -- wonu uito yito otohilaa lo Allahu Taáala -- lou modutolo sababu hemohutu u moleeto. **18** Sababu ti Almasi lohihilao yilate bo peéenta wambaó, u ohiheo-hiheolo maó sababu dusa lomanusia -- ngotaalio tadiila ototala, yilate ode taa ototala. Ti Almasi lohutu uito alihu Tio mowali modelo olimongoli ode Allahu Taáala. Tio pilatelio yila-yilateelo maó delo pohuli lobatanga, bo luli pilotumulai delo pohuli lo rohu. **19** Todelomo owowoluwoa lo rohu Tio lonaó helo pohabari habari lonto Allahu Taáala to roroo-huwaalo tatilu tupaalio: **20** deúito-yito rohu lotau-tauwalo tadiila helo dungohe to Allahu Taáala tojamani lei Noho. Tou boito Allahu Taáala lohima lou sabali tou tei Noho ngotilonggadu hemohutu kapalilio. Bo tau-tauwalo tawoluo tokapali wambaó -- ngoáamilalo walu lota -- tapiloáahu loli taluhe daá boito. **21** Naa, ilowali boito debo odelo pohumaya lo popolihi u masaatia botie mopoáahu olimongoli. Popolihi botie diila tala tuwau lo upacala mopoó belesi wawaó monto ngoáamila u hikootoloa, bo debo odelo dantimu to Allahu Taáala monto hilaa u maloótapu tinelo Eeya u mopiohu. Popolihi boito mopoáahu olimongoli sababu ti Isa Almasi maluli tilumumulai lonto opopate, **22** wau malo botula mola ode sologa. Masaatia Tio okawasa peé-peéenta wolo Allahu Taáala wau hemo malenta ngoáamila malaikati, ngoáamila taókawasa wau ngoáamila olootolo.

**4:1** Sababu ti Almasi malo dutolo delo pohuli lobatanga, timongoli olo musi mopolotolo batanga wolo tilihula udebo odelo uito. Sababu taa u modutolo delo pohuli lobatanga diilalo mohutu dusa. **2** Sababu uito, mamusi timongoli tumumulo wumbutio mola todunia botie moduduá otohilaa lo Allahu Taáala wau diila moduduá otohilaa lomanusia. **3** Tou yilalu mola, timongoli malotuúde hiheolio helohutu wolo u otohilaa pohutuo lotau-lotauwalo tadiila hitootawa to Eeya. Timongoli tumutumulo diila mopiohe. Timongoli helo dudua napusu limongoli; hemo tihuwo-

huwoó, hemo poti-potihungu, hemo ngilu-ngilu wau hemolubo balaahala u bo moólonuó tutu. **4** Botia taa u diila motota lo Eeya, hilinggolabe deu timongoli diila loduduá tutumulo debo odelo timongolio, heloólaasa dusa lou diila o eenggadelio. Uitulo sababuulio timongolio helohina olimongoli. **5** Bo timongolio de musu mongohi maó titihula to Allahu Taaála tamalo tidapato u momutoó taa u tumutumulo wau tamalate. **6** Uitulo sababuulio Habari Mopiohe mapilo habarilio olo ode tau-tauwalo tahelo punungo. Makusudulio alihu timongolio, tamaa bilutoó todelomo owowoluwoa lobatanga -- debo odelo suáliilio lotaa ngoáamila uma butoólo -- mowali tumumulo delo pohuli lorohu, moduduá kahandaki lo Allahu Taaála. **7** Totoonulalo u hitua-tuawua malembidei opopulitio, sababu uito mamusi timongoli motolo kawasa maó batanga wau mopoódaha, alihu timongoli moóduá. **8** Lebe maó lou totoonulalo u hitua-tuawua, mamusi timongoli tióotutua motoliánga ngota timongota, sababu wolo mototoo liánga boito timongoli mamoti dapato olo u mongangaa-mbungua. **9** Mamusi timongoli mololimo ngota-timongota tobele longota-ngota, lou diila mopoilaalo suusa. **10** Ngota-ngota Timongoli malo lolimo wowoo-hiyaalo u hihe-hiheedeá lonto Allahu Taaála. Sababu uito odelo tamoóolawa tamopiohe monto wowoo-hiyaalo lo Allahu Taaála, mamusi pohuna maó limongoli omaambo boito duólo polohuna daá peé-peéenta. **11** Taa umopo tunggulo habari, mamusi mopo tunggulaó habari monto Allahu Taaála; taa umomaya taa wewo, mamusi momaya wolo olootolo u monto Allahu Taaála, alihu todelomo totoonulalo suáli, Allahu Taaála mowali poudaáalo motimbulude li Isa Almasi. Tiolo taókawasa wau paatuti poudaáalo u ohiheo-hiheolo maó. Amin. **12** Mongo wutato taa otoliángo! Timongoli masaatia modutolo daá sababu donggo hetesiyolo. Bo diila maó polinggolabu, debo odelo wولو hitua-tuawua upolu-polutuó lotoduo mai olimongoli. **13** Tumbaó, timongoli mamusi molaasa sanangi sababu moduduá modutolo peé-peéenta woli Almasi. Yi de wonu odudaá li Almasi poilaalolo, timongoli mamu tiwengahu. **14** Timongoli opaéeda wonu timongoli hinaalio sababu timongoli muri li Almasi. Uito boliilio maó Rohu u molamahu, deuító-yító Rohullah, wولو toli mongoli. **15** Diila maó penu boli ngotaalio monto wolota limongoli modutolo sababu tio



tamoomatea mate-mateelo maó, meaalo motaówa, meaalo tamoleeto, meaalo sababu tio moulambohe to ulusani lotaa wewo. **16** Bo wonu timongoli modutolo sababu timongoli taulo Nasara, diila maó poolito sababu suáli boito. Posukurulo mola ode Allahu Taáala, deü timongoli lodelo tangguli Almasi. **17** Malei dungga wakutuulio Allahu Taáala momutoái dunia. Wau umati lo Allahu Taáala lohihilaolo tamaa butoóolo meimulo. Naa, wonu Allahu Taáala mamolumula wolanto, de woloolo mola waliilio wolo tau-tauwalo tadiila palacaya to Habari Mopiohe monto Allahu Taáala boito? **18** Todelomo Kitabi tulatulade odie, "Wonu tau-tauwalo tamopiohe olo malo odito totolo u poáhulo, tidiyolo maó u mamotoduo mai wolo tau-tauwalo tahi odusawa tadiila motota lo Eeya!" **19** Sababu uito, wonu woluo tau-tauwalo tamo dutolo sababu Allahu Taáala mokahandaki odito, mamusi tau-tauwala boito tumumulo lou otutu wau mopo palacaya lobatanga to Talo powali mai olimongolio. Tio malaito moéelai danti-Lio.

**5:1** Pohile laatia tomongo tauíwa lojamaá limongoli mopoó tuotaó. Watia loluladei tulade botie odelo tamani sama-sama tauíwa wau odelo taa umalo sakusi lohihilao polodutolo lo Almasi, wau tamamo dudua olo poudaáalo, wonu bolo odudaá Almasi pobilohulo ode manusia. Pohile laatia lou tióotutua **2** alihu timongoli mohimbala himbala lohimba uiludu mai lo Allahu Taáala olimongoli. Himbalai maó timongolio wolo sanangi lohilao odelo woloolo mola u otohila lo Allahu Taáala, wau diila maó wolo buheeto hilao. Diila maó pohutua olo kalajamu bo huna moótapu paéeda, bo sababu timongoli tióotutua ohilaa momaya. **3** Diila maó pohutu odelo tamotolo kawasa olimongolio tapilo malacaya de olemu, bo powaliilo obaaya ode limongolio. **4** Wau tou Diti Daá boito de meidungga mai, timongoli mamó lolimo makuta ulaba-labaalo mobaango, udiila tamoule obaangio laba-labaalo. **5** Odito olo Wutato, tau-tauwalo tahumula. Potaálukulo totau-tauwalo tahi hulanga. Mongo wutato ngoáamilalo musi motidupapa lobatanga wau momaa-maayawa wolo dupadupapa lohilao. Sababu todelomo Kitabi tulatulade odie mola, "Allahu Taáala motehengi taa sombongi, bo momonu tadupa-dupapa lohilao." **6** Sababu uito, podu

papaawa mola batangamu to walungo uluú lo Allahu Taáala u molotolo, alihu Tio mopolaiá olimongoli wonu mawakutuulio. **7** Wuduwalo mola totoonulalo ololawalumu ode Allahu Taáala sababu Tio momandungi mai olemu. **8** Mamusi timongoli mopoódaha wau motidapato! Sababu Ibilisi yito balimu. Tio debo odelo singa naó mota naó mai sambela hemo heuwaango mololohe mangusaalio. **9** Tuwalia maó tio wolo iimani motoheeto, sababu otaawa limongoli deú mongo wutato timongota lo Nasara wewolio to ngoilanggubu dunia olo modutolo debo odelo timongoli. **10** Bo lapatio maó timongoli modutolo ngopee mola, Allahu Taáala lohihilao mamohutu mai olimongoli mowali wimu-wimumuto tutu. Tio mamopo tihula wau mopoó lotolo olimongoli wau mopotoheto olimongoli. Sababu Tio yito Allahu Taáala tamopiohe daá hilaa-Lio, tamalo tianga olemu u loduduá helolaasa odudaáa-Lio ubakaa lotimbulude toli Almasi. **11** Tiolo taókawasa tunggula ohiheo-hiheolo maó! Amin. **12** Tuladu laatia ulimbu-limbuá botie tiluladei laatia olimongoli lou bilantua lei Silas, taa ilanggapu laatia ngotaalio lowutato Nasara taatatapu wau molotolo hilao. Watia ohilaa mohuntulai olimongoli wau mopoyakini olimongoli deú wolo u tiluladei laatia botie habari u otutu tomimbihu ponu lo Allahu Taáala. Mamusi timongoli motidihu tióotutua to ponu boito. **13** Mongo tamani ngojamaá to Babiloni, taólo tilulaoto Allahu Taáala, lolao salamu olemu; odito olo walauúu tei Markusi taa taótoliángo. **14** Posasaa-lamuwalo ngota timongota wolo toliángo u lealeaatulo maó odelo Wutato Nasara. Pohileaalo duá Eeya mongohi mai salaamati to Wutato ngoáamilalo tamowali miliki li Almasi. Hulumati lamiaatia, Petrus 2pe>

**1:1** Mongo wutato taótu-otutuulo maó palacaya debo odelo amiaatia! Ti Isa Almasi, deúito-yito Allahu Taáala wau Olongia Tamopo-poáahua olanto, lopoluasi mai olanto palacaya to o-Lio, sababu Tio helohutu u otutu. Tulade botie lonto olei Simon Petrus, ngotaalio lowato wau rasulu li Isa Almasi. **2** Pohileaala duá Allahu Taáala mongohi mai balakati wau salaamati olimongoli wolo daata-daatalo maó, sababu timongoli motota lo Allahu Taáala wau li Isa, Eeyanto. **3** Allahu Taáala malomake kawasa ilahi-Lio u longohi mai to olanto totoonulalo hitua-tuawua u palaluwolo

ode tutumulo potabiaalo. Tio lohutu mai utie loli wolo u otaawanto pasali li Isa Almasi, tamalo tianga olanto u molaasa maó odudaá wau opopio-Hio. **4** Wolo dudelo boitolo Allahu Taáala longohi mai olanto babaa-lakatiyalo upolu-polutuó daá wau ohalaga umapilo danti-Lio mai. Wolo babaa-lakatiyalo boito timongoli mowali molopato monto totoonulalo ilohilaa moleeto moporuusa todunia botie, wau timongoli mololimo piili u ilahi. **5** Masababu uito, potolo panilo tióotutua alihu timongoli debo palacaya li Almasi wau palacayamu boito tilumudu lo tutumulo umopiohe. Ngopohia lo tutumulo umopiohe, timongoli palalu olo mowali taa opongotota, **6** wau ngopohia lo pongotota, timongoli olo musi mowali mongawasa batanga, wau ngopohia mowali mongawasa batanga mamusi timongoli olo mopolingohu batanga u taaba motaalua lo totoonulalo u hitua-tuawua. Ngopohia sabali motaalua lo totoonulalo u hitua-tuawua, timongoli olo musi tumumulo moduduá u otohilaa lo Allahu Taáala. **7** Wau tumumulo moduduá u otohilaa lo Allahu Taáala musi olo poimumutolo wolo modehu hilao tomongo wutato ngoiimani. Wumbutio mola mamusi toliángumu tomongo wutato ngoiimani duhengalo wolo toliángo ode taa ngoáamila. **8** Ngoáamilalo boito yito pipii-iliyaalo upalaluo limongoli. Wonu pipii-iliyaalo boito woluo to olemu wolo daata-daatalo maó, timongoli mamowali moólohu wau otilapulo, wau motota li Isa Almasi Eeyanto lou lebe mopioheó poli. **9** Bo taa udiila o pipii-iliyaalo boito, bibilohio meepito; tio diila mowali moóonto wau tio molipato deu duduú-saalio uilalu maó mapilo belesi. **10** Sababu uito, Mongo wutato, potolo panilo tióotutua alihu titiango Allahu Taáala wau tulao-Tio to batangamu boito mowali helebe motoheetaó. Wonu timongoli mohutu maó uito, timongoli diila tamomaaha iimani. **11** Lou odito timongoli mawohia-Lio haku polupolu u tumuwoto ode bele biluloá saaha li olongia u ohiheo-hiheolo maó monto Eeya wau Olongia Tamopo-poáhua olanto Isa Almasi. **12** Sababu uito, watia laito hemo poéelai olimongoli pasali losuáli boito, eleponu timongoli malotota maó wau palacaya daá to pongaajali lonto Allahu Taáala umaa tilolimo limongoli boito. **13** Ngotilongadu watia tumutumulo, watia molaasa wajibu mopoéelai olimongoli to susuú-aliyaalo boito. **14** Sababu otaawa lowatia deu diilalo

mohiheo watia mamololaa maó dunia botie, sababu Eeyanto Isa Almasi malo poótaa mai lou lopatato olaatia. **15** Yi watia mamó tolopani alihu lapataó watia mate maó, timongoli laita muli moéela mola susuu-aliyaalo botie. **16** Tou amiaatia lopoótaa mai olimongoli malo odito udaáalio podudungga mai lo Eeyanto Isa Almasi, amiaatia diila lotiwunela tou totoonulalo tombilu lomanusia u bo latabu. Odudaá li Almasi boito maa iloontonga lamiaatia wolo mato lunggongo lohihilao. **17** Amiaatia woluo teto mola tou Tio hilulumati wau pilopo udaá lo Allahu Taáala ti Paapa. Tou boito dungo-dungohei suala lonto Taa Laba-labaalo molamahu, u lotahuda ode o-Lio, "Botieelo Wala-U tapilonu-U. Tio mopo sanangi hilaa-U!" **18** Amiaatia lohihilao loódungohe suala boito dungga-dungga mai lonto sologa tou amiaatia woluo peé-peéenta wo-Lio toitaato huide u mantali boito. **19** Uito sababuulio amiaatia lebe yakini poli to tahuli lo Allahu Taáala u pilohabari lomongo nabi. Opiohelio timongoli mopoo tuoto tahuli boito, sababu tahuli boito debo odelo tohe u tinetinela totambati modiólomo tunggula dulahe mamobutu mai, wau tinely poliyama tiimuru tinetinela todelomo hilaamu. **20** Laba-labaalo mopiohe daá mamusi eela mola limongoli utie: Tahuli lo Allahu Taáala upilo tunggulai lomongo nabi diila mowali tombangalo moduduá huhama lohihilao. **21** Sababu diila peéenta maó tahuli monto Allahu Taáala pilopo habari bo moduduá otohilaa lomanusia. Bo Rohullah motolo kawasa totaa umopo tunggulo tahuli monto Allahu Taáala lohihilao.

**2:1** Tou yilalu maó towolota umati lo Allahu Taáala mailumeneto mongo nabi paluti. Odito olo to wolotamu malumenetai guguu-ruwaalo paluti. Timongolio mamopo tuwotai totoonulalo pongajali udiila otutu, umoo binasa tau. Wau timongolio mamomaahu taókawasa tamalo pobevasi olimongolio. Lou odito timongolio mopodungga mai obobinasa tobatanga lohihilao, u mamodeehe olimongolio lou molamemeto. **2** Eleponu odito, dadaata tau mamoduduá dudelo lo tutumulo guguu-ruwaalo paluti boito uhe kiluwasa lonapusu limongolio. Wau huhutu lo guguu-ruwaalo boito mamohutu dadaata tau mohina Dalaalo Banari udulu-dulunga ode Allahu Taáala. **3** Sababu timongolio manjanunu, yi guguu-ruwaalo paluti boito

mamosilita maó totoonulalo silita olemu u kilalangilio lohihilao u moótapu untungi monto olimongoli. Bo bubutoó u mopodehu lohukumani to limongolio malohiheo pilopo dapato, wau obobinasa u matilantu-Lio mai olimongolio donggo hemohima olimongolio. **4** Mamaa-laikatiyalo taódusa olo diila poluli lo Allahu Taáala molopato monto hukumani, bo debo pomahu-Lio ode delomo naraka. Timongolio potuwoto-Lio ode delomo pangato u modiólomo u tahangia-Lio mola teto dilumutu Dulahe Pomutoálo. **5** Odito olo wolo dunia tojamani muloololio mai. Allahu Taáala diila lopoluli maó lolopata lonto hukumani. Allahu Taáala lalao mai taluhe daá ode dunia totau-tauwalo tahileeta tou boito. Bo tei Noho peé-peéenta wolo tapitu lota wewolio wambaó tapiloáahu-Lio, sababu tei Noho helopo lolade habari tomimbihu tutumulo u lotuhatawa to hilaa lo Allahu Taáala. **6** Tutuuwauwa olo suálilio wolo kota Sodom wau Gomora: Allahu Taáala lopo binasa kokootawalo boito wolo tulu alihu mowali obaaya pasali loui wolo u mamotoduo mai wolo tau-tauwalo tahileeta. **7** Bo tei Loti tapiloáahu, sababu tio loduduá u otohilaa lo Allahu Taáala; tio lodutolo laba-labaalo sababu piili udiila lotuúde wolo tau-tauwalo tahi ruusawa. **8** Tohungo lotau-tauwala debo odelo uito tei Loti tamopiohe boito tumutumulo wolo hilaa sikisikisa, sababu motiidu dulahu tio hemoóonto wau hemoó dungohe totoonulalo huhutu limongolio u moleeto. **9** Oditolio otaawa lo Eeya woloolo mola mopoáahu tau-tauwalo tahipo duduáawa u otohilaa-Lio wonu timongolio motaalua wolo totoonulalo nahati. Wau otaawa lo Eeya woloolo mola molahu tau-tauwalo tahileeta u sikisaalo to Dulahe Pomutoálo, **10** tolomodulio tau-tauwalo tahipo duduáawa u otohilaa lonapusu limongolio ukootoro wau tamohina okokawasa lo Allahu Taáala. Odito buheli wau sombongilio guguu-ruwaalo paluti boito tilinggula penu boli totoonulalo mahaluku umolamahu tosologa timongolio diila mopo panggu-panggu mohina! **11** Hiambola mamaa-laikatiyalo talebe molotolo daá wau okawasa wolo guguu-ruwaalo paluti boito, diila helo potuludu totoonulalo mahuluku umolamahu boito wolo tataa-heyalo umohina totalu lo Eeya. **12** Bo guguu-ruwaalo boito, mailaba! Timongolio debo odelo binatangi upilotutu mai u waúpolo wau pateelo mate-mateelo maó wambaio. Timongolio diila hemo mikilangi bo

wambaó mohutu moduduá naluri, tilinggula timongolio heloluhu susuu-aliyalo udiila o pahamualio wolo tataa-heyalo umohina. Sababu uito ode huhuu-hutuwaalo limongolio lohihilao, timongolio mabinasa debo odelo totoonulalo binatangi mongantau. **13** Odelo wuupa to polodutolo umaa ilosababua limongolio, timongolio mamodutolo sikisa. Ode limongolio, suáli umoó sanangi hilao yito mohutu maó penu boli wolo wambaio tou dulahu huna mopoóluli hilao to ilohilaa lobatanga limongolio. Wonu timongolio hulohuloáa peé-peéenta woli mongoli todelomo potihunggu lo totamelo, piili limongolio moólonuó sababu timongolio hehuwoáalo wolo wuntulo hilao u moóohuú. **14** Timongolio diila mopotolu-tolu mohutu dusa wau u otohilaa limongolio yito molontonga taabua huloto. Wau taa u boheli palacaya maó wau donggo diipo boti yakini, heáanga limongolio. Hilaa limongolio malali biliyasa wolo ototamaá. Timongolio yito tau-tauwalo tahi laánatia! **15** Sababu timongolio diila mohuto moduduá dalalo motulidu, yi timongolio mailapalo. Timongolio lohama dalalo u diluduá lei Bileam walaée Beor omoóomolu. Tei Bileam botie ohilaa daá moótapu doi monto huhutuulio u moleeto. **16** Bo tio pilopo eelalio tióotutua to ololeetio boito, tou kolodailio helo bisala wolo suala lomanusia. Yi nabi boito pilakusario u lopohuheli maó huhutuulio u biyongo boito. **17** Guguu-ruwaalo paluti boito yito debo odelo butu lotaluhu u mohengu, wau debo odelo wambulo u hiliipa lodupoto huloyongo. Allahu Taáala malo podapato olimongolio tambati tuwau u modióloma tutu. **18** Timongolio helohutu poopolo-ilaalowalo u hilangga-langgata wau toongi; napusu u huloto pilomake limongolio huna mopo topotala totau-tauwalo taboheli wambaó lolopato lonto awoota lotaa hitumula yilapalo. **19** Guguu-ruwaalo paluti boito lodanti polobebasi totau-tauwala boito, hiambola timongolio lohihilao hepilowato lo totoonulalo uúdu u moporuusa manusia. Sababu wonu tau olaahelio lou hitua-tuawua, yi tio wato lotamo olaaheó olio boito. **20** Taa u motota lo Eeya wau Tamoo-poáahua olanto Isa Almasi malo lopato lonto totoonulalo kawasa lodunia ulopo kootolo manusia. Bo wonu lapatio maó tio muli owantobe tilinggula olaahe lo totoonulalo kawasa boito, yi owowoluwoa lotau boito tou pulitio maó lebe moleeta lou owowoluwoa dipolulio mai. **21** Lebe



mopiohe tau-tauwalo debo odelo uito diila peéenta maó motota dalalo u otutu monto Allahu Taáala, lou timongolio motota maó, bo lapataó diila mohuto moduduá papaa-lentawalo uilohi mai lo Allahu Taáala to limongolio. **22** Wolo u pilohutu limongolio mopobukuti obobanali lo pohumaya botie, "Apula mamuli monga umaa pilotuólio," wau "Boi umaa yilihualio, mamuli molilii-liide todelomo lataó."

**3:1** Mongo wutatuu taótoliángo! Utieelo tuladu laatia u oluolio ode limongoli. Todelomo oluo lotulade botie, watia motolopani momongu totoonulalo pikiilangi ubelesi tolimongoli. **2** Watia mopoáhu mai alihu timongoli mamoeéla mola loloo-iyaalo u muloololio mai yiloiya lomongo nabi lo Allahu Taáala, wau palenta lo Eeya, Olongia Tamoo-poáhua, upilo tunggulio olimongoli lotimbulude tomongo rasulu. **3** Bohu-bohulio, musi otaawa maó limongoli deú to duduu-laheyaalo pulitio malumenetai tau-tauwalo tatutumulio he kiluwasá lonapusu limongolio lohihilao. Timongolio mamososero olimongoli **4** lou molojiya odie, "Ualio Eeya lodanti mamei dungga mai! Botia toonu Tio? Mongo tiyamo loluhurunto mailate, bo totoonulalo u hitua-tuawua donggo tutuuwauwa wambaó debo odelo anggadu ilowalia mai lo aalamu!" **5** Timongolio sangaja diila mohuto momasisi deú muloololio mai daá Allahu Taáala lopowali mai hulungo wau dunia lo pilimani-Lio. Dunia pilowali-Lio mai monto taluhu, wau wolo taluhu; **6** wau wolo taluhu olo -- deúito-yito taluhu monto taluhu daá tutu -- dunia muloololio mai daá boito pilobinasa. **7** Bo hulungo wau dunia uwoluo masaatia botie, tilaala lo pilimani Allahu Taáala boito olo u de mopobinasa wolo tulu. Botia hulungo wau dunia donggo taataalo dilumutu todulahe tau-tauwalo tahileeta hukumanio wau pobinasaalo. **8** Bo mongo wutatuu, suáli tuwau botie diila maó lipata limongoli; deú todelomo bibilohu Eeya, ngohui diila ohihedio wolo ngolihi lotaunu -- duduuluwolo tutuuwauwa wambaó o-Lio. **9** Eeya diila moboyu mongohi mai wolo u madilanti-Lio eleponu woluo tahemo lantobe odito. Boliio maó, Tio sabali to olemu, sababu Tio diila mohuto penu boli ngotaa maó binasa. Tio motohilaa alihu ngoáamila tau molilihi monto totoonulalo dusalio. **10** Bo Dulahe podudungga mai lo Eeya mamei dungga debo

odelo tamootaówa. To Dulahe boito, hulungo mamooli wolo tingohu bulonggodu, wau uu-pangowalo tohulungo mamaahu mopobu, wau dunia wolo totoonulalo uwoluo todelomio mamooli. **11** Sababu ngoáamilalo boito maa antuluo-Lio wolo dudelo u odito. Tingga woloolo mola wajibulio timongoli tumumulo? Timongoli musi tumumulo mantali wau tolomodu duólo Allahu Taáala, **12** ngotilonggadu timongoli mohima wau moololo dudunggalio mai Dulahu Allahu Taáala. To dulahe boito hulungo mamaahu mopobu, wau sababu patulio, yi uu-pangowalo to hulungo mamowali taluhu. **13** Bo ito mohima wolo umapilo danti mai lo Allahu Taáala, deuito-yito hulungo u bohu wau dunia u bohu, toutoonu woluo u aadili. **14** Sababu uito, Mongo wutato taótoliángo, tou timongoli donggo hemohima Dulahe boito, potolo panilo tióotutua u tumumulo mantali wau diila oáaibu totalu lo Allahu Taáala. Wau taalai maó wumbuta u mopiohe wolo Allahu Taáala. **15** Anggapuwalo osaabali lo Eeyanto odelo hiyango uilohi-Lio mai olimongoli alihu mowali moáahu. Tei Paulus, wutatonto taótoliángo, maloludei odito olo olimongoli. Tio loluladei uito wolo tinepo uilohi lo Allahu Taáala olio. **16** Todelomo ngoáamila tuladio, tei Paulus laito hemoluladu pasali losuáli boito. Memangi woluo dengolo suáli u mototolo todelomo totoonulalo tuladio boito. Wau to bagiyangi boito pilopo boboolió lotau-tauwalo tadiila hitootawa lolo-loolo wau diila motoheeto iimanilio. Suáli boito diila moólinggolabe, sababu bagiyangi wewo lo Kitabi pilohutu limongolio odito olo. Wolo u pilohutu limongolio boito bo moó sababu obobinasa olimongolio lohihilao. **17** Bo timongoli, Mongo wutato taótoliángo, malotota pasali losuáli boito. Sababu uito, poódahailo maó, diila bolo timongoli odelowa ode dalalo umoo lapalo lotau-tauwalo tahi luusawa piililio tilinggula timongoli modehu monto tambati potidutaá limongoli u motoheeto. **18** Mamusi timongoli helebe moólaasa ponu li Isa Almasi, Eeya wau Olongia Tamoo-poáahua olanto, wau mamusi timongoli olo helebe motota o-Lio. Ilopujiaalo mola Tio, botia wau dilumutu ohiheo-hiheolo maó! Amin. Hulumati lamiaatia, Petrus ljo>

**1:1** Tuango tulade botie tomimbihu tahuda u mongohi tutumulo,

deũito-yito tahuda u mawoluo anggadu bohulio mai daá. Amiaatia maloó dungoheó, wau maloóonto maó uito wolo mato lamiaatia lohihilao. Amiaatia malo miloheó wau malodihu maó wolo uluu lamiaatia. **2** Tou tutumulo boito piloilaalo mai, amiaatia loóonto maó. Uitolo sababuulio amiaatia mongohi mai ososakusi tomimbihu olio. Amiaatia mopohabari mai olimongoli pasali lo tutumulo u tutuulio tutu wau ohiheo-hiheolo maó, uwoluo peé-peéenta wolo Allahu Taáala, wau u mapilo ilaalo mai olamiaatia. **3** Wolo umaa iloontonga wau ilodungohe lamiaatia, uitolo olo u pohabario mai lamiaatia olimongoli, alihu timongoli peé-peéenta wolamiaatia moduduá molaasa hitua-tuawua todelomo hilao to tutumulo motituwau woli Paapa wau wolo Wala-Io Isa Almasi. **4** Amiaatia loluladei utie alihu hilaanto tióotutua meengahe. **5** Uti-utieelo habari umaa ilodungohe lamiaatia lonto Wala-Io wau u potunggulo mai lamiaatia olimongoli: Allahu Taáala boito mobaango, wau to Allahu Taáala diaaluo u modiólomo sama-samaata. **6** Wonu ito molojiya deũ ito tumutumulo motituwau wo-Lio, lebe-lebe pomaó ito tumutumulo todelomo u modiólomo, yi ito mohimbulo mopio wolo loiya meaalo wolo huhutu. **7** Bo wonu ito tumutumulo todelomo mobaango odelo woloolo mola Allahu Taáala woluo todelomo mobaango, yi ito tumutumulo moáaita tutu, mopiohe wau dame ngota timongota, wau duhu li Isa, Wala-Io, mopobelesi olanto monto ngoáamila dusa. **8** Wonu ito molojiya deũ ito diila odusa ito mohimbulo batanganto lohihilao; wau Allahu Taáala diaaluo todelomo hilaanto. **9** Bo wonu ito motolo akuo duduu-saanto to Allahu Taáala, Tio mamoeélai danti-Lio wau mohutu wolo u aadili. Tio mamongo ngambungu duduu-saanto wau mopobelesi olanto monto totoonulalo huhutuunto utilala. **10** Bo wonu ito molojiya deũ ito diila odusa, ito o anggapu tutuwauwa tutu suáliilio wolo Allahu Taáala tamoo-himbuloa wau ito diila molahu tahuda lo Allahu Taáala todelomo hilaanto.

**2:1** Mongo walau! Watia moluladei utie ode limongoli alihu timongoli diila maó mohutu dusa. Bo wonu woluo tamohutu dusa, yi ito o ngotaalio tamo poduulua, deũito-yito ti Isa Almasi taadili boito; Tio mamongo molohone mola olanto totalu lo Allahu Taáala. **2** Loui motimbulude li Isa

Almasi boitolo duduu-saanto ilambungu-Lio. Wau diila bo duduu-saanto wambaó, tumbaó dusa ngoilanggubu umati lomanusia olo. **3** Wonu ito modungohe papaa-lentawalo Allahu Taáala, uito tuotio deú ito motota lo Allahu Taáala. **4** Taa umoloiya deú, "Watia motota lo Allahu Taáala," bo diila modungohe to papaa-lentaa-Lio, tau boito mohimbuloa, wau Allahu Taáala diaaluo todelomo hilaalio. **5** Bo taa u modungohe tahuda lo Allahu Taáala, tau boito motoliángo Allahu Taáala louí wimu-wimumuto tutu. Uitolo tuotio deú ito tumutumulo motituwau wolo Allahu Taáala. **6** Titaalo tita moloiya deú tio tumutumulo motituwau wolo Allahu Taáala, tio musi tumumulo moduduá liyodu li Almasi. **7** Mongo wutato taótoliángo! U tiluladei laatia botie diila odelo palenta u bohu. Utie palenta deedelo umapilo tunggulai olimongoli anggadu timongoli tumulalo mai palacaya li Almasi; uitolo habari monto Allahu Taáala uma ilodungohe limongoli touí dipolulio mai. **8** Eleponu odito, palenta u tiluladei laatia botie bohu olo; sababu obanaliilio mowali oontonga tobatanga li Almasi wau tobatanga limongoli. Sababu u modiólomo helebe mooli wau tinelo u otutu malo tinelai. **9** Taa umoloiya deú tio woluo todelomo mobaango bo tau boito donggo molonuó wutatio, tau boito donggo woluo todelomo u modiólomo dilumutu botia. **10** Taa u motoliángo wutatio, tumutumulo todelomo mobaango tilinggula diaaluo penu boli hitua-tuawua to olio u mamooó sababu taawewo modehu ode delomo dusa. **11** Bo taa u molonuó wutatio, woluo todelomo modiólomo. Tio monaó todelomo modiólomo, wau diila otaawalio ode utoonu ponaówalio, sababu modiólomo boito mohutu olio diila mowali moóonto. **12** Watia loluladei olimongoli, Mongo walaó, sababu dusa limongoli maa ilambungu sababu ti Almasi. **13** Watia loluladei olimongoli, Mongo dulaá, sababu timongoli mototaa-Lio tamawoluo tumulalo mai bohulio daá. Watia loluladei olimongoli Taa himuudawa, sababu timongoli malo poolaaheó Taa Moleeto. **14** Watia loluladei olimongoli Mongo walaó, sababu timongoli motota lo Allahu Taáala ti Paapa. Watia loluladei olimongoli, Mongo dulaá, sababu timongoli motota lo Tahuda umawoluo tumulalo mai bohulio daá. Watia loluladei olimongoli, taa himuudawa, sababu timongoli molotolo. Tahuda lo Allahu Taáala woluo todelomo hilaa limongoli, wau maa ilolaatheó limongoli Taa

Moleeto. **15** Diila maó potoliángo dunia botie, meaalo penu boli wolo uwoluo todelomo dunia botie. Wonu timongoli motoliángo dunia, timongoli diila motoliángo Allahu Taáala. **16** Totoonulalo hitua-tuawua uwoluo todelomo dunia botie -- u otohilaa piili lomanusia u odusa, u oontonga tulusi otohilao wau uhepo mangga-mangga -- ngoáamilalo boito asalilio mai diila lonto Allahu Taáala, bo lonto dunia. **17** Dunia wau totoonulalo hitua-tuawua todelomio u otohilaa lomanusia, mamooli. Bo tamoduduá u otohilaa lo Allahu Taáala, debo tumutumulo dilumutu ohiheo-hiheolo maó. **18** Mongo waláú, pulito lojamani malembidei! Mapiloótaa olimongoli tou dipolulio mai deú Musu li Almasi mamei dungga mai; wau botia mailumeneto dadaata tau tahelo musu li Almasi. Uito tuotio deú pulito lojamani malembidei. **19** Mumuu-suwaalo li Almasi boito yito tau-tauwalo tamaa lololaa maó olanto, sababu timongolio otutuulio maó memangi diila taunto. Wonu timongolio taunto, tantu timongolio debo peé-peéenta wolanto. Bo timongolio lololaa maó olanto, alihu mopatatolo mai deú diaaluo penu boli ngotaa maó limongolio tatióotutua meituwoto to kaumunto. **20** Bo timongoli malo lolimo Rohullah u tiluwatai dadaata daá li Isa Almasi wau uito sababuulio timongoli ngoáamilalo motota lo pongaajali u otutu. **21** Oditolio watia loluladei utie olimongoli diila kalana timongoli diila motota lo pongaajali u otutu; bo tumbaó sababu timongoli malotota maó, wau otaawa limongoli olo deú diaaluo yimbulo todelomo pongaajali u otutu boito. **22** Tamohimbulo yito taa u molojiya deú ti Isa diila Olongia Tamoo-poáahua tapilo danti mai lo Allahu Taáala. Tau boito musu li Almasi; tio diila motolo akuo li Paapa meaalo to Walaó. **23** Taa diila motolo akuo to Walaó, boliilio maó diila mololimo li Paapa olo. Wau taa motolo akuo to Walaó boliilio maó mololimo li Paapa olo. **24** Sababu uito, habari umaa ilodungohe limongoli anggadu timongoli bohu-bohulio mai palacaya mamusi dahai limongoli tióotutua todelomo hilao. Wonu habari boito poótuoto limongoli tióotutua, timongoli malaito tumumulo motituwau wolo Walaó wau woli Paapa. **25** Wau utieelo upilo danti mai li Almasi lohihilao to olanto; tutumulo u tutuulio tutu wau ohiheo-hiheolo maó. **26** Tiluladei laatia utie olimongoli tomimbihu tau-tauwalo tadonggo hipo

tolopania mohimbulo olimongoli. **27** Bo tomimbihu olimongoli lohihilao, ti Almasi malo luwatai dadaata daa Rohu-Lio olimongoli. Wau ngotilongadu Rohu-Lio woluo toli mongoli, diila palalu woluo taawewo mongaajali olimongoli. Sababu Rohu-Lio mongaajali olimongoli pasali lo totoonulalo u hitua-tuawua; wau wolo u pilo ngaajali-Lio boito otutu, diila bo yimbulo. Sababu uito, mamusi timongoli modungohe tou wolo u pilo ngaajali mai lo Rohu boito, wau mamusi timongoli debo tumutumulo motituwau woli Almasi. **28** Oditolio, mongo walau, poti tatapulo tumumulo motituwau woli Almasi, alihu de tou Tio meidungga mai, ito motaalua wo-Lio wolo obobuheli u lealeaatu, wau diila motituuó sababu moolito. **29** Mailotaawa limongoli deu ti Almasi tilumumulo loduduá u otohila lo Allahu Taála. Sababu uito musi otaawa maó limongoli olo deu timiidu tatumumulo moduduó otohila lo Allahu Taála yito walaó Allahu Taála.

**3:1** Bilohi maó malo odito ponu lo Allahu Taála olanto, tilinggula ito ilaku-Lio odelo mongo wala-lo. Wau memangi ito yito mongo walaó Allahu Taála. Uitolo sababuulio dunia u moleeto botie diila motota olanto, sababu dunia diila motota lo Allahu Taála. **2** Mongo wutato taótoliango! Ito botia yito mongo walaó Allahu Taála, bo owowoluwonto de diipo mopatato. Bo otaawanto deu wonu ti Almasi meidungga mai, ito mamowali debo odelo Tio, sababu mamooonto o-Lio todelomo owowoluwoa-Lio u otutuulio maó. **3** Ngoáamila tau u ohalapani utie toli Almasi, modaha batangalio alihu otu-otutuulo maó mantali, belesi monto dusa odelo woloolo mola ti Almasi mantali olo. **4** Taa u mohutu dusa, molambanga butoo Allahu Taála; sababu dusa yito totala tobutoo Allahu Taála. **5** Otaawa limongoli deu ti Almasi meidungga mai moluluta dusa lomanusia, wau deu diaaluo dusa todelomo batanga-Lio. **6** Ngoáamila tau tatumu-tumulo motituwau woli Almasi, diila mololaalaita mohutu dusa. Taa u mohutu dusa mololaalaita, diila peenta maó moonto li Almasi meaalo mototaa-Lio. **7** Mongo walau, diila maó polulia penu boli tatoonu tamopo lapalo olimongoli. Taa u mohutu kahandaki lo Allahu Taála yito walaó Allahu Taála debo odelo ti Almasi yito Walaó Allahu Taála. **8** Bo



taa u mohutu dusa mololaalaita yito walaó Ibilisi, sababu Ibilisi odusa tumulalo mai bohulio. Masababu uitolo Walaó Allahu Taáala meidungga, deuito-yito mai mongantulu kalaja lo Ibilisi. **9** Taa u malowali Walaó Allahu Taáala, diila mololaalaita mohutu dusa, sababu piili lo Allahu Taáala lohihilao woluo to olio. Wau sababu Allahu Taáala boito ti Paapalio, yi tio diila mowali mololaalaita mohutu dusa. **10** Utieelo hiheedio towolota lomongo walaó Allahu Taáala wolo mongo walaó Ibilisi; titaalo tita diila mohutu kahandaki lo Allahu Taáala, meaalo diila motoliángo wutatio, yi tio diila walaó Allahu Taáala. **11** Tumulalo mai bohulio mapilo tunggulio mai habari botie olimongoli; Ito musu motoliánga ngota timongota. **12** Diila maó potihutu ito debo odelo tei Kain, tamalowali walaó Ibilisi wau lomate wutatio lohihilao yila-yilateelo maó. Wolo sababuulio tei Kain lomate wutatio yila-yilateelo maó? Sababu susuu-aliyaalo u pilohutulio yito tilala, bo susuu-aliyaalo u pilohutu lowutatio boito otutu. **13** Sababu uito, mongo wutatuu, diila maó polinggolabu wonu taulo dunia botie molonuó olimongoli. **14** Otaawanto deu ito mailumualo lonto opopate, wau lolimbata ode tutumulo. Otaawanto uito, sababu ito motoliángo timongota lo wutatonto. Taa u diila motoliángo, boliilio maó donggo ilokawasa lo opopate. **15** Taa u molonuó wutatio yito tamoomatea mate-mateelo maó, wau otaawa limongoli deu ngotaalio lo tamoomatea mate-mateelo maó diila otutumulo u otutuulio tutu wau ohiheo-hiheolo maó. **16** Wolo dalalo botieelo otaawanto dudelo lou motoliángo ngota timongota: Ti Almasi malohudu mai tutumu-Lio olanto. Sababu uito, ito olo musu mohudu tutumulonto ode mongo wutatonto! **17** Wonu ngotaalio talebe-lebe moóonto wutatio u ilodiaaa, bo diila mohuto motulungi wutatio boito, woloolo mola tau boito mowali molojiya deu tio motoliángo Allahu Taáala? **18** Mongo walau! Ito diila maó potoliángo bo totunggilo meaalo bo toloiya wambaó. Mamusi ito motoliángo wolo toliángo u tutuulio tutu, u pobukutiolo wolo huhutuunto. **19** Odieelo mola dudelolio ito motota deu ito tuwo-tuwoto mongo walaó Allahu Taáala taótutu, wau hilaanto mowali moduóoto totalu lo Allahu Taáala. **20** Otaawanto, deu wonu ito potaala lo hilaanto, pongotota lo Allahu Taáala lebe udaá wolo pongotota lo hilaanto, wau deu otaawa-Lio

totoonulalo u hitua-tuawua. **21** Oditolio, mongo wutatui, taotoliango, wonu hilaanto diila mopotala olanto, ito mowali motaalua lo Allahu Taáala wolo obobuheli. **22** Wau wolo u pohilento monto o-Lio, mamó tapunto, sababu ito modungohe papaa-lentaa-Lio wau mohutu wolo umoo sanangi hilaa-Lio. **23** U pilomalanta-Lio mai to olanto yito: Ito musí palacaya to Wala-Io, deüito-yito ti Isa Almasi, wau ito musí mototoo-lianga, debo odelo umaa pilomalentai li Almasi to olanto. **24** Ngoáamila taa u modungohe totoonulalo palenta lo Allahu Taáala, tumumulo motituwau wolo Allahu Taáala, wau Allahu Taáala motituwau woli mongolio. Wau otaawanto deü Allahu Taáala tumutumulo lotituwau wolanto, sababu Tio malongohi mai Rohu-Lio to olanto.

**4:1** Mongo wutato taotoliango! Diila maó palacayai to ngoáamila tau tahi pongakua o Rohullah, bo tesiyopo timongolio u motota maó wolo Rohu uwoluo toli mongolio boito asaliilio mai lonto Allahu Taáala meaalo diila. Sababu dadaata nabi paluti mabolo to utoonulalo. **2** Odieelo mola pohuliilio timongoli motota maó wolo uito Rohullah meaalo diila: Taa umotolo akuo deü ti Isa Almasi dungga-dungga mai ode dunia odelo manusia, tau boito o Rohu udungga-dungga mai monto Allahu Taáala. **3** Bo taa diila motolo akuo suáli botie tomimbihu li Isa, diila o Rohullah. Tau boito o rohu monto Musu li Almasi. Wutato malo dungohu deü rohu boito mamei dungga mai, wau botia tio mawoluo todelomo dunia botie. **4** Bo Mongo walau, timongoli haku lo Allahu Taáala. Timongoli malo olaaheó tomongo nabi paluti; sababu Rohu uwoluo toli mongoli lebe okawasa wolo rohu uwoluo totau-tauwalo miliki lodunia botie. **5** Mongo nabi paluti boito helo bisala pasali susuu-aliyaalo lodunia, wau dunia lodungohe loiya limongolio, sababu timongolio miliki lodunia. **6** Bo ito yito mongo walaó Allahu Taáala; wau taa u motota lo Allahu Taáala, modungohe loiyanto. Taa u diila miliki lo Allahu Taáala, diila modungohe loiyanto. Odieelo mola dudelolio ito motota maó hiheedio towolota lo Rohu u mongohi pongaajali u otutu, wau rohu umopo lapalo. **7** Mongo wutato taotoliango! Duloolo ito motolianga ngota timongota, sababu toliango asaliilio mai monto Allahu Taáala. Taa u motoliango, deüito-yito walaó Allahu Taáala

wau tio motota Allahu Taáala. **8** Taa u diila motoliángo, diila motota lo Allahu Taáala; sababu Allahu Taáala yito ponu. **9** Allahu Taáala malo pobilohei deü Tio lomonu olanto wolo lolao mai Wala-Io tatuwa-tuwaulo ode delomo dunia alihu ito moótodoo tutumulo motimbulude to Wala-Io boito. **10** Utieelo toliángo: Diila ito tamalo toliángo Allahu Taáala, bo Allahu Taáala talomonu mai olanto wau lolao Wala-Io alihu motimbulude to o-Lio ito moótapu ambungu monto duduu-saanto. **11** Mongo wutato taótooliángo, wonu Allahu Taáala momonu daá olanto ito olo musi motoliánga ngotaa timongota. **12** Diaaluo penu boli ngota maó tapeéenta loóonto Allahu Taáala, bo wonu ito mototoo-liánga, Allahu Taáala motituwau wolanto wau ponu-Lio mowali wimu-wimumuto tutu todelomo batanganto. **13** Masababu Allahu Taáala malongohi mai olanto Rohu-Lio, yi otaawanto deü ito maa tilumumulo lotituwau wolo Allahu Taáala, wau Allahu Taáala tilumumulo lotituwau wolanto. **14** Amiaatia lohihilao maloóonto Walaó Allahu Taáala, wau amiaatia helo pohabari deü Tio yilao mai lo Allahu Taáala u lowali Olongia Tamoo-poáahua dunia botie. **15** Titaalo tita tamotolo akuwo deü ti Isa boito Walaó Allahu Taáala, Allahu Taáala tumumulo motituwau wolo tau boito, wau tau boito olo tumumulo motituwau wolo Allahu Taáala. **16** Ito lohihilao motota wau palacaya toponu lo Allahu Taáala ode olanto. Allahu Taáala boito ponu. Taa u tutumulio kiluwasa lo toliángo, tau boito lotituwau wolo Allahu Taáala wau Allahu Taáala lotituwau wolio. **17** Ponu pilowali-Lio mai wimu-wimumuto tutu todelomo batanganto, alihu woluo buhelinto to Dulahe Pomutoáalo. Woluo buhelinto, sababu tutumulonto todunia botie tutuwauwa debo odelo tutumuli Almasi. **18** Taa u moólaasa ponu lo Allahu Taáala, diila motota loui moohe; sababu ponu u wimu-wimumuto tutu mopo hinggi totoonulalo pongolaasa u moohe. Oditolio malo ilaalo deü taa diipo loólaasa maó ponu lo Allahu Taáala wolo wimu-wimumuto tutu wonu tau boito moohe motaalua wolo Dulahe Pomutoáalo. **19** Ito motoliángo, sababu Allahu Taáala maleimulo lomonu mai olanto. **20** Wonu ngotaalio molojiya, "Watia motoliángo Allahu Taáala," bo tio diila motoliángo wutatio, tau boito mohimbuloa. Sababu taa udiila motoliángo wutatio tailoo-ntongalio, diila pongalo aakali mowali motoliángo Allahu

Taaala tadiila iloontongalio. **21** Sababu uito, utieelo palenta uilohi mai li Almasi to olanto: Titaalo tita tamo toliango Allahu Taaala musu olo motoliango wutatio.

**5:1** Taa u palacaya deu ti Isa yito Olongia Tamoo-poahua tapilo dantia mai lo Allahu Taaala, tau boito walaó Allahu Taaala. Taa u motoliango ngotaalio lotiyamo, motoliango walaio olo. **2** Wolo dalalo botieelo otawaanto maó deu ito motoliango mongo walaó Allahu Taaala: Ito motoliango to Allahu Taaala wau modungohe totoonulalo palenta-Lio. **3** Sababu, motoliango to Allahu Taaala boliilio maó modungohe totoonulalo palentaa-Lio. Wau totoonulalo palenta-Lio diila mobuheeto olanto. **4** Sababu timiidu walaó Allahu Taaala mambo mopoólaahe dunia u moleeta botie. Wau ito mopoólaahe dunia wolo iimaninto. **5** Tatoonu tamowali mopoólaahe dunia? Bo taa palacaya deu ti Isa yito Walaó Allahu Taaala. **6** Ti Isa Almasilo tamei dungga mai ode dunia wolo taluhu popolihu-Lio wau wolo duhu lo opopate-Lio. Tio meidungga mai diila bo wolo taluhu wambaó, bo wolo taluhu wau duhu. Wau Rohullah lohihilao tamongohi sakusi deu uito otutu, sababu Rohu diila peenta maó mohimbulo. **7** Mohelu totolu sakusi: Rohullah, taluhu wau duhu -- toto-totooolulo boito mongohi sakusi u tutuuwauwa. **9** Ito palacaya to ososakusi lomanusia, bo ososakusi lo Allahu Taaala lebe motoheeto. Wau uitolo ososakusi u mailohi mai lo Allahu Taaala pasali lo Wala-Io. **10** Sababu uito, taa palacaya to Walaó Allahu Taaala, malo lolimo ososakusi boito todelomo hilaalio; bo taa diila momalacaya to Allahu Taaala, malo nganggapu tutuuwauwa tutu suáliilio wolo Allahu Taaala tamoo-himbuloa, sababu tio diila palacaya tou wolo upilo tahuda mai lo Allahu Taaala pasali lo Wala-Io. **11** Uti-utieelo ososakusi boito: Allahu Taaala malongohi mai olanto tutumulo u tutuulio tutu wau ohiheo-hiheolo maó, wau Wala-Io yito pilobutua mai lo tutumulo boito. **12** Taa o Walaó Allahu Taaala, o tutumulo boito; wau taa diila o Walaó Allahu Taaala, diila o tutumulo boito. **13** Watia loluladei olimongoli tapalacaya to Walaó Allahu Taaala, alihu otaawa limongoli deu timongoli mailo tutumulo u tutuulio tutu wau ohiheo-hiheolo maó. **14** Wau ito buheli motaalua wolo Allahu Taaala

sababu ito yakini Tio modungohe duáanto, wonu ito mohile penu boli wolo u motuuúde wolo kahandaki-Lio. **15** Sababu otaawanto deú Tio modungohe olanto wonu ito momolohone o-Lio, yi otaawanto olo deú Tio mongohi mai olanto wolo u polohonento mola o-Lio. **16** Wonu oontonga maó limongoli tala ngota lo timongota Nasara mohutu dusa udiila moósababu tau boito oolia lo tutumulo u tutuulio tutu wau ohiheo-hiheolo maó, mamusi timongoli moduá mola ode Allahu Taáala; wau Allahu Taáala mamongohi mai tutumulo boito olio. Utie motuhatawa woli mongolio u dusalio diila moósababu olimongolio oolia lo tutumulo boito. Bo woluo dusa umoó sababu tau oolia lo tutumulo boito. Pasali losuáli boito watia diila molojiya mai deú timongoli musu moduá mola ode Allahu Taáala. **17** Ngoáamila huhutu u talatala yito dusa, bo woluo dusa udiila moósababu tau oolia lo tutumulo u tutuulio tutu wau ohiheo-hiheolo maó boito. **18** Otaawanto deú ngoáamila tau tamalowali mongo walaó Allahu Taáala, diila molo-laalaita hipohutua dusa, sababu Walaó Allahu Taáala moduólai olio, wau Taa Moleeto diila mowali mohutu wolo-wolo to olio. **19** Otaawanto deú ito haku lo Allahu Taáala, eleponu ngoilanggubu dunia botie to walungo kawasa lo Taa Moleeto. **20** Otaawanto deú Walaó Allahu Taáala malei dungga mai wau malongohi pongotota to olanto, alihu ito motota lo Allahu Taáala taótutu. Ito tumutumulo motituwau wolo Allahu Taáala taótutu, wau tumutumulo motituwau wolo Wala-lo Isa Almasi. Utieelo Allahu Taáala taótutu, wau utieelo tutumulo u tutuulio tutu wau ohiheo-hiheolo maó. **21** Mongo walau, powalahe maó batanga limongoli monto totoonulalo balaahala! 2jo>

**1:1** Odeli Ibu tatilulaoto Allahu Taáala, wau ode mongo walai Ibu. Tulade botie lonto olaatia, tauwa lojamaá tatióotutua motoliángo olimongoli. Diila bo watia wambaó, bo ngoáamila taa u motota lo Allahu Taáala taótutu, motoliángo olimongoli olo. **2** Sababu Allahu Taáala bilubiluloá todelomo hilaanto, wau malaito woluo wolanto ohiheo-hiheolo maó. **3** Pohileaala duá ito wohia-Lio mai balakati, odehu hilaó wau salaamati lo Allahu Taáala ti Paapanto, wau li Isa Almasi Walai Paapa boito. Pohileaala duá ngoáamilalo boito milikiyonto wolo hilaa tióotutua wau belesi wau wolo

toliángo. **4** Watia leengahe daá lotota deú woluo mongo walai Ibu tahitumula lodudua pongaajali lo Allahu Taáala, debo odelo umapilo malentai lo Allahu Taáala to olanto. **5** Sababu uito, Ibu, pohile lowatia lou tióotutua alihu ito ngoáamila mototoo-liánga. U tiloóowoli mai lowatia botie diila tuwaulio lopalenta u bohu; palenta botie mailohi mai olanto tumulalo bohulio ito palacaya. **6** Motoliángo boliilio maó tumumulo modudua totoonulalo palenta lo Allahu Taáala. Wau palenta umaa ilodungohe limongoli tumulalo mai bohulio yito deú timongoli musi tumumulo lou motoliánga ngota timongota. **7** Dadaata tamoo-himbuloa malo loóopo ode ngoilanggubu dunia. Timongolio yito tau-tauwalo tadiila motolo akuo deú ti Isa Almasi meidungga mai ode dunia odelo ngotaalio lomanusia. Taa udebo odelo uito yito tamoo-himbuloa, wau Musu li Almasi. **8** Sababu uito, poódahailo diila bolo timongoli oolia lou wolo umaa tilolopani mai lamiaatia olimongoli. Potolo panilo alihu timongoli mololimo monto Allahu Taáala wuupamu ngoáamilalo. **9** Taa u diila motidihu to pongaajali li Almasi, bo tumbaó molambanga tou wolo u pilo ngaajali li Almasi, tau boito diila o Allahu Taáala. Taa u debo todelomo pongaajali li Almasi, bolilio maó motolo miliki mopio Allahu Taáala ti Paapa bolito Walaó. **10** Sababu uito wonu woluo tamonaó mai wau mopohabari olimongoli pongaajali udiila pilo ngaajali li Almasi, diila maó tolimoa tau boito todelomo belemu meaalo mongohi salamu olio. **11** Sababu tamongohi salamu totaa debo odelo uito modudua olo peé-peéenta wolo tau boito todelomo mohutu huhutu u moleeto. **12** Dadaata daá upalalu poótaa mai lowatia olimongoli, bo lasaalio lebe mopiohu diila maó moli tuladu. Watia mohalapu moó biilohe wau mobisala lohihilao woli mongoli, alihu hilaa limongoli tióotutua meengahe. **13** Mongo walaó monto wutato taabua li Ibu tatilulaoto olo lo Allahu Taáala, lolao salamu odeli Ibu. 3jo>

**1:1** Wutato Gayus taótolíángo! Watia, tauwa lojamaá, tatióotutua motoliángumu, **2** modua mola pohileaala dua Wutato seseehati, wau ngoáamilalo hipiohe wolemu, tutuuwauwa debo odelo nyawamu piopiohe wambaio. **3** Watia sanangi daá tou dengolo lota wutato Nasara leidungga



mai wau helo poótaa olaatia malo odito tatapu wau molotolo hilao lo Wutato to Allahu Taáala taótutu, sababu memangi Wutato laito tumutumulo moduduá pongaajali lo Allahu Taáala. **4** Diaaluo ulebe moéengahe olaatia, lou loódungohe deú mongo walaó lowatia hitumula loduduá pongaajali lo Allahu Taáala. **5** Wutatuú! Wutato odito tatapu wau molotolo hilao todelomo kalaja u pilohutu lo Wutato ode mongo sahabati timongota lo Nasara; tumbaó taulo Nasara tadiipo otaawa lo Wutato olo, hebilaya lowutato. **6** Timongolio malo poótaa tojamaá totambati lamiaatia tomimbihu toliángumu. Tulungia maó timongolio alihu mowali mopo tolonga mola lononaó limongolio wau lou odito moó sanangi hilaa lo Allahu Taáala, **7** sababu todelomo nonaó limongolio u momaya li Almasi, timongolio diila mololimo bubantu penu boli wolo monto tau-tauwalo tadiila motota lo Allahu Taáala. **8** Sababu uito, ito tau-tauwalo Nasara musi motulungi maó mongo sahabati timongota lo Nasara tadebo odelo uito, alihu ito mowali moduduá todelomo tolopani limongolio umopo loladu pongaajali u otutu monto Allahu Taáala. **9** Watia malo luladeó tulade ulimbu-limbu ode jamaá, bo tei Diotrepes taóhilaa mowali tauwa todelomo jamaá, diila mohuto moduduá olaatia. **10** De wonu watia monaó mai, watia mamó monggali totoonulalo hitua-tuawaua uma pilohutulio, deúito-yito pasali lo susuu-aliyaalo u moleeto wau yimbulo u yiloiyalio pasali olamiaatia! Bo ngoáamilalo boito diipo motuuúde to olio. Touí mongo sahabati timongota lo Nasara boito lonaó mai, tio diila lohuto lololimo olimongolio. Tumbaó tio helodini tahi huutowa mololimo mongo wutato boito, wau tio helo poáhu tau-tauwala boito yilumualo lonto jamaá! **11** Wutato taótoliángo, diila maó dudui wolo u moleeto. Dudui maó wolo u mopiohe. Taa hipohutua umopiohe yito miliki lo Allahu Taáala. Wau taa hipohutua u moleeto diipo motota lo Allahu Taáala. **12** Ngoáamila tau hipomujia olei Demetrius. Tumbaó Allahu Taáala olo helomuji olio. Amiaatia olo lomuji olio, wau otaawa lo Wutato deú wolo upilo tunggulai lamiaatia mowali palacayalo. **13** Dadaata daá upalalu loiya mai laatia olemu, bo laasa lowatia lebe mopiohu diila moli tuladu. **14** Watia mohalapu diilalo mohiheo poli mamó dunggaya wolemu, wau ito maalato mobiisalawa. **15** Pohileaala duá Eeya mobalakati mai to Wutato. Mongo

sahabatimu totambati lowatia botie lolao salamu olemu. Potunggula maó salamu laatia ode ngoáamila sahabatinto ngota-ngota.

**1:1** Mongo wutato tamaa tiliango wau tapilonua daá lo Allahu Taáala ti Paapa, wau dilaaha duóli Isa Almasi. Odelo wato li Isa Almasi watia -- Yudas -- wutatee Yakobus, **2** mohalapu; Pohileaala duá Allahu Taáala mongohi mai balakati, odehu hilao wau salaamati olimongoli lou laba-labaalo daatalio. **3** Mongo wutato taótoliango! Watia tióotutua omakusudu moluladei tulade ode limongoli tomimbihu oáahu upeé-peéenta mailo laasanto. Bo botia watia molaasa ilowuntula u monaseehati mai olimongoli wolo tulade botie alihu timongoli tulusi mohipate duólo iimani u mapeéenta yilohi mai lo Allahu Taáala u ohiheo-hiheolo maó ode umati-Lio. **4** Sababu lou diila otaawanto, woluo tau-tauwalo omakusudu utantu-tantu u tumuwotai ode huunginto. Timongolio yito tahi luusawa u hemo poboboolió habari pasali odehu hilao lo Allahu Taáalanto, u moótapu hiyango mopomukaó wuntulo hilao u moóohui limongolio. Wau timongolio diila mololimo li Isa Almasi, tuwa-tuwaulo taókawasa wau Eeyaanto. Anggadu muloololio mai hukuumani ode limongolio maa nilubuwati lo Kitabi. **5** Ngoáamilalo boito mailotaawa limongoli. Bo watia ohilaa mopoéelai olimongoli tomimbihu woloolo mola Eeya lopoáahu umati lo Isirailu lonto lipu lo Masiri, bo lapatio maó helo pobinasa tau-tauwalo tadiila palacaya towolota limongolio. **6** Eelai mola olo mamaa-laikatiyalo tailimbata eenggade lo okokawasa limongolio, tilinggula lonaó lololaa maó tambati pilo tibiluloá limongolio. Allahu Taáala lomungu mamaa-laikatiyalo boito wolo lante ubakaa, todelomo tambati u modiólomo to walungo huta. Mola teto timongolio tataahangi tulusi dilumutu hukuumani podehuwolo odeitaati mongolio de to Dulahe upolu-polutuó boito. **7** Eelai mola olo kota lo Sodom wau Gomora wau kokoo-tawaalo topalitia, u tuangio helohutu susuu-aliyaalo debo odelo u pilohutu lo mamaa-laikatiyalo boito. Timongolio helohutu susuu-aliyaalo u huloto wau moleeto, tilinggula timongolio silikisaa wolo hukuumani lotulu u ohiheo-hiheolo maó, u powaliyolo odelo poéela duólo taa ngoáamila. **8** Odito olo tau-tauwala boito hipo aaangania tilinggula timongolio helohutu

dusa tobatanga limongolio lohihilao. Timongolio momilohe dupadupapa okokawasa lo Allahu Taála wau hemohina to motiidu mahaluku u molamahu tosologa. **9** Tei Mikhael lohihilao, taataú-tauwa to maaa-laikatiyalo, diipo peénta maó helohutu debo odelo uito. Tou tio lotataameta wolo Ibilisi todelomo polo hiihede pasali lo tatoonu tamaa moótapu maó milate lei Musa, tei Mikhael diila buheli momutoó Ibilisi wolo loiya u mohina. Tei Mikhael bo loloiya maó, "Eeya mamó ngantingai olemu!" **10** Bo wolo popoolo-hinawalo, tau-tauwala boito heloluhu totoonulalo hitua-tuawua udiila opahamua limongolio. Timongolio tutuuwauwa debo odelo bibii-natangiyalo udiila o aakali, u motota susuu-aliyaalo wolo wuntulo hilaalio. Bo tumbaó susuu-aliyaalo boitolo uloo aantulu olimongolio. **11** Tilopotala timongolio! Timongolio malo dudua dalaalio lei Kain. Alihu moótapu doi, timongolio helopo topotala batanga ode lumbaya umoó lapalo, tutuuwauwa debo odelo tei Bileam. Wau timongolio olo ilaantululio sababu helo malakalo debo odelo tei Korah. **12** Tou timongoli mohutu potihunggu lo totamelo, piili lotau-tauwala boito moólonuó to wolotamu. Sababu timongolio helo lamela wolo motula lou diila wolitaó-wolitaó, wau bo mopolohuna daá batanga lohihilao. Timongolio debo odelo heengo u hiliipa lodupoto, bo diila mopo tuhutai didi. Timongolio olo debo odelo bungo lo ayu udiila momungo eleponu sembo lou momungo; bubuu-ngowaalo ayu umaa bilunggato waátio wau mailate sama-samaata. **13** Tutuuwauwa debo odelo buóolo moóhuu daá todeheto mopotoodei putiio, odito olo timongolio mopoó putiio totoonulalo huhutu u moóolito. Timongolio yito debo odelo bibii-natangiyalo u helonaó ode utoonulalo maó udiila otatapua poti biluloáalo umaa pilopo dapato tambatilio lo Allahu Taála todelomo diólomo ulaba-labaalo moótihela hapato u ohiheo-hiheolo maó. **14** Tei Henokh, wali opitulio lei Adamu, tou muloololio mai mapeénta lonubuwati mai pasali lotau-tauwala boito. Tei Henokh loloiya, "Bilohi, Eeya mamei dungga mai wolo hilihu-lihua malaikati-Lio tamantali, **15** mai momutoó ngoáamila tau. Eeya mamó hukuumani tau-tauwala moleeto sababu totoonulalo huhutu limongolio u hiluusawa. Wau Tio mamó hukuumani taódusa wau tajuluhaka sababu ngoáamila loiya u mohina uiloiya limongolio." **16** Tau-tauwala boito laito

wambaó hihungota wau hemo potala taa wewo. Timongolio tumutumulo hipo duduáawa totoonulalo otohilaa limongolio u odusa. Timongolio hipo latabua tomimbihu batanga lohihilao, wau hipohamawa hilaa lotau alihu moótapu paéeda. **17** Bo mongo wutatuu taótolíango, eelai mola mawolo u muloololio mai uiloíya lomongo rasulu lo Eeyaanto Isa Almasi. **18** Timongolio lopoótaa mai leimulo olemu deú topulito jamani malumenetai tau-tauwalo tamaa mohenteá olimongoli, deúito-yito tahitumula loduduá totoonulalo otohilaa limongolio u odusa. **19** Timongolio botieelo tau-tauwalo tahemo potoodei polobuálawa. Timongolio diila kiluwasa lo Rohullah, bo lou totoonulalo otohilaa lowatedo tomimbihu dunia. **20** Bo timongoli, Mongo wutatuu, taala maó tulusi tutumulumu patopatoáa to palacayamu li Isa Almasi. Iimanimu boito mantali daá. Sambela uito poduáalo mola wolo kawasa lo Rohullah, **21** wau poti tumulolo laito todelomo ponu lo Allahu Taáala ngotilonggadu timongoli hemohima odehu hilao li Isa Almasi Eeyaanto, tamaa mongohi mai olimongoli tutumulo u tutuulio tutu wau ohiheo-hiheolo maó. **22** Ode tau-tauwalo tahilingua hilaalio, mamusi timongoli mopo biloheó odehu hilao. **23** Dedeáalo tau lumuwalo monto delomo tulu u mopoáahu olimongolio. Ode tau-tauwalo wewolio mamusi timongoli mopo biloheó odehu hilao tunuhela lou laasa moohe, bo lonui maó tumbaó boó limongolio olo umaa kilotolo limongolio wolo ilotohilaa limongolio u odusa. **24** Allahu Taáala, tamambo modaha mai alihu timongoli diila modehu, wau tamambo modelo olimongoli ode talu-Lio u molamahu wolo weengahe wau lou diila oáaibu. **25** Tiolo Allahu Taáala tuwa-tuwaulo, Tamoo-poáhua olanto motimbulude li Isa Almasi Eeyaanto. Tiolo Allahu Taáala tamolamahu, udaá, okawasa wau otilihula anggadu muloololio mai daá dilumutu botia wau u ohiheo-hiheolo maó! Amin.

**1:1** Tuango buku botie tomimbihu wolo u piloílaalo li Isa Almasi pasali popoo-louítyalo u mamotoduo mai. Allahu Taáala lopoótaa li Almasi alihu Tio mopo biloheó tomongo wato lo Allahu Taáala wolo umusi huáa motoduo mai. Ti Isa Almasi malolao malaikati-Lio odelei Yahya, wato-Lio mola lopoótaa popoo-louítyalo boito olio. **2** Yi tei Yahya olo helo hungguli

mai ngoáamila u iloontongalio boito; wau utieelo dudulohuhio tomimbihu tahuli lo Allahu Taáala upiloó toheeto li Isa Almasi lotimbulude to ososakusi-Lio. **3** Potisanangilo tutu taa u mopobaca wau taa u modungohe habari nubuwati lobuku botie wau taaáti tou wolo u tulatuladu todelomio. Sababu diilalo mohiheo ngoáamilalo boito mamotoduo mai. **4** Mongo wutato tawoluo to opitu jamaá tomadala lo Asia! Watia, Yahya, mohalapu olimongoli ponuwa mai lo balakati wau moáahu monto Allahu Taáala -- deúito-yito Tio tawoluo, tamawoluo, wau tawoluo mololaalaita, -- wau olo monto opitu rohu uwoluo totalu lotambati huhuloá li olongia lo Allahu Taáala, **5** wau monto li Isa Almasi sakusi taa tatapu wau molotolo hilao. Tiolo tabohu-bohulio muli pilotumulai monto opopate wau Tio olo taókawasa tomongo olongia lodunia. Ti Isa momonu olanto, wau wolo opopate-Lio Tio lopo lopato olanto lonto duduusaanto, **6** wau lopowali olanto tala tuwau bangusa tolomodu lowali mongo iimamu, tamomaya Allahu Taáala, ti Paapa-Lio. Ti Isa Almasi boitolo taúdaá wau okawasa u ohiheo-hiheolo maó. Amin! **7** Bilohi, Tio dunga-dungga mai yilanggube loheengo! Ngoáamila tau mamooónto o-Lio, leituwoto olo timongolio tamalo mituáa o-Lio. Totoonulalo bangusa todunia mamoo hilimuto sababu Tio. Yaa, tantu! Amin! **8** "Wau lo tabohulio wau tapulitio," tahuda lo Allahu Taáala tawoluo, tamawoluo, wau tawoluo mololaalaita, Taa Laba-labaalo kawasa. **9** Watia, Yahya, wutatumu tango paladu woli mongoli todelomo polodutolo u ilolaasawa lotimiidu tahiduduá li Almasi. Ito taaba modutolo odelo umati miliki-Lio. Watia pilomailio ode pulo Patmos sababu watia helo pololadu tahuli lonto Allahu Taáala, upiloó toheto li Isa lotimbulude to ososakusi-Lio. **10** To dulahu Eeya, watia kiluwaasa lo Rohullah tulusi watia loódungohe suala daá -- debo odelo tingohu torompeti -- hemo tahuda mai towulea lowatia. **11** Suala boito lotahuda mai, "Tulade maó wolo u iloontongamu, wau lawola mola buku boito ode pitu jamaá deúito-yito: ode Epesus, Smirna, Pergamus, Tiatira, Sardis, Piladelpia, wau Laodikia." **12** Watia loili maó ode wulea u momilohe tatoonu uito tahemo bisala mai olaatia. Lapataó watia loónto pitu oáato tohe u pilohutu lonto hulawa. **13** Tohuungo oáato totoo-heyaalo boito tihutihulo ngotaalio taóontonga debo odelo manusia. Tio pakepake

jumba u hayaio demola oáato. Toduhe-Lio Tio pakepake taübu duhelo hulawa. **14** Huwo-Io moputió debo odelo lambuto himba, debo odelo putiό pini. Mato-Lio leileita debo odelo tulu; **15** oáa-Tio moputiό leileita debo odelo tombaha u tilumbila. Sualaa-Lio debo odelo bulontungo taluhu podehu uleidaá. **16** Uluü-Lio olowala dihudihu pitu poliyama, wau monto ngangō-Lio yilumualai wamilo tuwau molalito u omato duluo. Baya-Lio motinelo debo odelo mato lodulahu tou mohulonu tutu. **17** Tou watia loóonto maó o-Lio, watia leidambaó totalu-Lio debo odelo tailate. Bo Tio lopodutu mai uluü-Lio olowala olaatia tulusi lotahuda, "Diila maó oohe! Wau lo tabohulio wau tapulitio. **18** Wau lo Tio tatumu-tumulo! Wau mailate, bo bilohilo, Wau tumutumulo u ohiheo-hiheolo maó. Wau okawasa to opopate, wau todunia lotaamate. **19** Sababu uito, tulade maó susuu-aliyaalo u iloontongamu, deüito-yito susuu-aliyaalo uwoluo masaatia botie, wau susuu-aliyaalo u de mamotoduo mai. **20** Utieelo hitua-hituawua u milakudu hetuuólo lou pitu poliyama u iloontongamu to uluü olowala-U, wau monto opitu oáato tohe hulawa boito: Pitu poliyama boito yito maaaa-laikatiyalo opitu jamaá, wau pitu oáato tohe boito yito opitu jamaá boito."

**2:1** "To malaikati lojamaá to Epesus, tulade mola odie: Utieelo tahuli monto o-Lio tadihu-dihu opitu poliyama to uluü olowala-Lio, wau lonaó towolota lo opitu oáato tohe hulawa boito. **2** Otaawa-U wolo u hepohutuo limongoli: Timongoli hipo kalajawa tióotutua wau timongoli sabali daá. Otaawa-U deü timongoli diila mongohi hilao totaa moleeto. Wau tau-tauwalo tahi pongakua batangalio rasulu lebe-lebe pomaó diila, matilesi limongoli, wau lotapu limongoli deü timongolio mohimbuloa. **3** Timongoli sabali wau timongoli helo dutolo sababu Wau, wau timongoli diila lopulito halapani. **4** Bo utie kabalatani-U to olemu; Timongoli diilalo motolianga ola-U debo odelo u bohulio mai. **5** Sababu uito, poótoloma maó malo odito lamingio odudehu limongoli! Polilihulo monto duduusaamu, wau pohutuwalu wolo u hepilohutu limongoli tou bohulio mai. Wonu diila, yi Wau mamonaó mai ode olemu wau momahuto oáato tohemu boito monto tambatilio. **6** Bo woluo hitua-tuawua u mopiohe



olimongoli, deũto-yito: timongoli molonuó huhutu lo tahiduduá olei Nikolaus, tailonuu-U olo. **7** Titaalo tita tamoó dungohu, mamusi mopoótuoto wolo u tilahuda mai lo Rohullah ode jajaa-maáalo! Timongolio tamoóhaama, mapoluasiyo-U molamela hungo monto bungo lo ayu tutumulo to ilengi lo bubuu-ngawaalo Allahu Taáala." **8** "To malaikati lojamaá to Smirna, tulade mola odie: Utieelo tahuli monto o-Lio tabohulio wau tapulitio -- tamailate wau luli tilumumulai. **9** Otaawa-U totoonulalo polodutolo limongoli; otaawa-U timongoli mosikini -- bo otutuulio maó timongoli kaya! Otaawa-U pipii-tanawalo u pilomukaio olimongoli lotau-tauwalo tahi pongakua batangalio Yahudi, lebe-lebe pomaó diila; timongolio yito umati lo Ibilisi! **10** Diila maó oohe to dudutolo udiilalo mohiheo musi olaasawa limongoli. Eelai maó, Ibilisi mamopo tuwoto ngotayadi mongoli ode delomo tutupa u mohimontala olimongoli. Timongoli mamodutolo mopulu hui mola hiheolio. Mamusi timongoli tatapu wau molotolo hilao to ola-U tunggula mate, yi Wau mamongohi mai olemu tutumulo u tutuulio tutu wau ohiheo-hiheolo maó odelo palaseni lo ohohaama. **11** Titaalo tita tamoó dungohe, mamusi mopoó tuoto wolo u tilahuda mai lo Rohullah to jajaa-maáalo! Timongolio tamoóhaama, sama-samaata diila tamo dutola wolo-wolo to opopate u oluolio." **12** "To malaikati lojamaá to Pergamus, tulade mola odie: Utieelo tahuli monto o-Lio tadihu-dihu wamilo molalito omato duluo. **13** Otaawa-U toutoonu pilo tibiluloá limongoli, deũto-yito totambati huhuloá lo Ibilisi. Timongoli tatapu wau molotolo hilao to ola-U. Tumbaó toui tei Antipas, sakusii-U taatapu wau molotolo hilao boito, pilatelio yila-yilateelo maó totalumu tomalakasi lo Ibilisi, timongoli diila lomahe deũ timongoli palacaya to ola-U. **14** Bo boli odito woluo dengolo suáli udiila moósanangi ola-U monto olimongoli: woluo ngotayadu tau towolota limongoli tamalo dudua wolo u pilo ngaajali lei Bileam. Tei Bileam helo ngaajali olei Balak woloolo mola mopodehu umati lo Isirailu ode delomo dusa; wolo lomiyo olimongolio lolamela uáalo u mapilo dewolio ode balaahala wau lohutu susuu-aliyaalo u huloto. **15** Odito olo woluo towolota limongoli tahe lotidihu to pongaajali lo tahiduduá olei Nikolaus. **16** Sababu uito, polilihulo monto duduu-sawaalo limongoli! Wonu diila,

bolo ngopeé mola Wau mamei dungga mai ode limongoli wau mai moluhu tau-tauwala boito wolo wamilo uwoluo to tunggilu-U. **17** Titaalo tita tamoó dungohu, mamusi mopoó tuoto wolo u tilahuda mai lo Rohullah to jajaa-maáalo! Timongolio tamoóhaama, mapoluasiyo-U molamela manna u tutuuó, wau ngota-ngota mamololimo monto ola-U botu moputió tuwau. To botu boito tulatulade tanggulo tuwau u bohu, udiila otaawa penu boli lotatoonu, ngopohia lotaa mololimo maó." **18** "To malaikati lojamaá to Tiatira, tulade mola odie: Utieelo tahuli monto Walaó Allahu Taáala, taamato-Lio leileita debo odelo tulu, wau oáa-Tio moputió leileita debo odelo tombaha tilumbila. **19** Otaawa-U ngoáamila u pilohutu limongoli -- Otaawa-U timongoli motoliángo timongotamu, timongoli tatapu wau molotolo hilao, timongoli hemo kalaja, wau timongoli sabali modutolo. Otaawa-U timongoli botia lebe dadaata maó helo kalaja lou muloololio mai. **20** Bo utie kabalaatani-U olimongoli: Timongoli helongohi hilao toli Ijebel, talongaku taabua tailahula mai lo Allahu Taáala boito. Madilaata mongo wato-U tailaa-kaliilio wau ilajaliilio u helohutu huloto wau lolamelo uáalo umaa pilodewo ode balaahala. **21** Mailohi-U mai olio wakutu u molilihu monto duduu-saalio, bo tio diila lohuto lohuheli helohutu susuu-aliyaalo u huloto boito. **22** Poótoloma maó! Wau mamopo banti olio tunggula mongongoto totambati potuluhelo. Teto tio wau tau-tauwalo tahi pojinawa wolio mamó dutolo daá. Ngoáamilalo boito mapo hutuwo-U mai botia -- ngopohia wonu timongolio mohuheli mohutu susuu-aliyaalo u moleeto peé-peéenta wolio. **23** Tahiduduá olio mapate-U olo mate-mateelo maó alihu ngoáamila jamaá mongalati deú Wau lo Tio moloneá pikiilangi wau hilaa lomanusia. Timongoli mabalasiya-U moduduá huhutu limongoli ngota-ngota. **24** Bo timongoli tawewo-wewolio to Tiatira diila helo dudua pongaajali u moleeta boito, wau diila helo balajali totoonulalo ilimi lo Ibilisi. Wau motahuda mai deú Wau diila tamo duhengai olemu banta umopoó buheeto olemu. **25** Bo tunggula de toú Wau meidungga mai, mamusi timongoli debo moduduá wolo umaa mililiki limongoli. **26** Timongolio tamoóhaama, wau u demola pulitio debo hemohutu wolo u kilahandaki-U, mawohiya-U mai kawasa u tutuuwauwa debo odelo u tilolimo-U mai lonto li Paapa-U. Timongolio mamó lolimo

kawasa monto ola-U u momalenta babaa-ngusawalo wolo tunggudu wate, wau u mopo aantulu babaa-ngusawalo boito debo odelo ulongo huta. **28** Timongolio mamó lolimo poliyama tiimuru monto ola-U. **29** Titaalo tita tamoo dungohu, mamusi mopoo tuoto wolo u tilahuda mai lo Rohullah to jajaa-maalo!"

**3:1** "To malaikati lojamaa to Sardis, tulade mola odie: Utieelo tahuli monto o-Lio taa ohuuwo lo opitu rohu monto Allahu Taaala wau opitu poliyama boito. Otaawa-U wolo upilohutu limongoli. Ualio maó timongoli tumutumulo, lebe-lebe pomaó timongoli yilate! **2** Sababu uito, pobongulo, wau pootoheeta maó wolo udonggo woluo toli mongoli tou uito diipo yilate sama-samaata. Sababu malotapu-U deu wolo u pilohutu limongoli, dipoolu penu boli tuwau maó u wimu-wimumuto tutu totalu lo Allahu Taaala. **3** Oditolio, muli pootoloma maó wolo u mapilo ngaajali olimongoli muloololio mai wau wolo uma ilodungohe limongoli. Ponaowa maó uito wau polilihulo monto duduusaamu. Wonu timongoli diila mobongu, Wau mamei dungga mai debo odelo tamootaowa; wau diila taotaawa limongoli omolua wakutuulio Wau meidungga mai. **4** Bo tohuungi mongoli to Sardis donggo woluo tau tahidahawa alihu boolio debo belesi. Timongolio boito mamonaó pee-peenta wola-U wolo mohiboó lou moputio, sababu timongolio motuuude woleeto. **5** Toli mongolio tamoohaama mapakealio jumba moputio. Bo timongolio diila taluluto-U monto Buku lo Taa Tumutumulo. Wau totalu li Paapa-U, wau maaa-laikati-Lio Wau mamotolo akuo deu timongolio yito miliki-U. **6** Titaalo tita tamoo dungohu, mamusi mopoo tuoto wolo u tilahuda mai lo Rohullah to jajaa-maalo!" **7** "To malaikati lojamaa to Piladelpia, tulade mola odie: Utieelo tahuli monto o-Lio tamantali wau u tutu. Tiolo tadihudihu uunti u mililiki lei Dauda; wonu Tio momuo diaaluo penu boli ngotaa maó tamoo heito, wau wonu heita-Lio diaaluo penu boli ngotaa maó tamowali momuo. **8** Otaawa-U wolo u pilohutu limongoli. Otaawa-U deu diila ngoolo maó lotoli mongoli; timongoli malo dudua pongaajali-U wau tatapu wau molotolo hilao to ola-U. Toli mongoli mahiluo-U huhebu tuwau, wau penu boli tatoonu diila mowali moheutaó. **9** Pootoloma maó utie: Tau-tauwalo

talowali umati lo Ibilisi boito, mohimbuloa, tahi pongakua batangalio Yahudi lebe-lebe pomaó diila, mapo hutuwo-U tilinggula timongolio mai mosujudu totalumu. Wau maótaawa maó limongolio deu Wau momonu olemu. **10** Masababu timongoli malo duduá palenta-U alihu moóolohu, Wau olo mamoduólai olemu monto maasa lou mototolo u mamolemba ngoilanggubu dunia. Suáli boito mamotoduo mai u mohimontala ngoáamila tau todunia. **11** Wau huáa meidungga mai! Poódahai tióotutua wolo u mililiki limongoli, alihu diaaluo penu boli ngotaa maó tamohehu palaseni u ilohaamamu. **12** Taa u moóhaama, mapo waliyo-U odelo wolihi todelomo Bele Mantali lo Allahu Taáala-U, wau tio mamoti biluloá teto ohiheo-hiheolo maó. Tanggulo Allahu Taáala-U, wau tanggulo kota lo Allahu Taáala-U -- deúito-yito Yerusalemu bohu umamo tuhutai monto sologa, monto Allahu Taáala-U -- matuladu-U maó tobatanga lotau boito. Tanggulu-U u bohu olo matuladu-U maó to batangalio. **13** Titaalo tita tamoó dungohu, mamusi mopoó tuoto wolo u tilahuda mai lo Rohullah to jajaa-maáalo!" **14** "To malaikati lojamaá to Laodikia, tulade mola odie: Utieelo tahuli monto Sangi Amin, Sakusi taatatapu wau molotolo hilao wau otutu, pilobutua mai lo totoonulalo hitua-tuawua u pilowali mai lo Allahu Taáala. **15** Otaawa-U wolo u pilohutu limongoli: Otaawa-U timongoli diila mohuhulo wau diila olo mopatu. Patutilio timongoli tala tuwaulio! **16** Bo timongoli mohihilonu; diila mopatu, mohuhulo olo diila. Uitolo sababuulio timongoli mapotuóo-U ode bulemengio monto delomo ngango-U. **17** Timongoli hipoloiyawa, 'Amiaatia kaya wau matuuheta ngoáamilalo; amiaatia diila ilodiaá lolo-loolo.' Bo diila otaawa limongoli malo odia sikisaalio wau malo odia suukalilio owowoluwomu! Timongoli mosikini, hilaalawa, wau hipiitoá. **18** Sababu uito Wau monasehati mai olimongoli alihu motali maó monto ola-U hulawa, deúito-yito hulawa tutu, alihu timongoli mowali kaya. Potalilo olo boó moputió monto ola-U alihu timongoli oboó molanggu owowoluwoa limongoli ulaalala wau moóolito. Wau potalilo olo wunemo u pomadeta tomatomu alihu timongoli mowali moóonto. **19** Tau-tauwalo tapilonu-U mai, timongoliolo tadiniyo-U wau tabuboáa-U. Sababu uito mamusi timongoli osumangati, wau polilihulo monto duduusaamu. **20** Bilohi! Wau tihutihula totalu lohuhebu wau

hemongokoó. Wonu woluo taa u modungohe sualaa-U, wau momuo maó huhebu, Wau matumuwoto modungaya wolio; Wau mamó lamela peé-peéenta wolio wau tio molamela peé-peéenta wola-U. **21** Timongolio taloóhaama, mapo luasiyo-U motihuloáa totambati lo huhuloáa-U peé-peéenta wola-U, tutuuwauwa debo odelo Wau lohihilao olo maloóhaama wau masaatia hulohuloáa peé-peéenta woli Paapa-U totambati lo huhuloáa-Lio. **22** Titaalo tita tamoó dungohu, mamusi mopooó tuoto wolo u tilahuda mai lo Rohullah to jajaa-maáalo!"

**4:1** Lapataó uito watia luli loótoduo mai bibilohe. Iloontonga mola lowatia huhebu tuwau yilohuó tosologa, lapataó luli dungo-dungohei suala u tou bohulio malo tahuda mai olaatia debo odelo tingohu torompeti. Suala boito lotahuda, "Dulo pobotulai odia. Wau mamopo bilohei olemu wolo u de mamotoduo mai." **2** Lolametolo mola watia kiluwaasa mai lo Rohullah. Tulusi watia loóonto mola tosologa woluo tambati tuwau huhuloá li onlongia, wau woluo tahingota-ngotaawa hulohuloá totambati lo huhuloá li onlongia boito. **3** Baya lotau boito motinelo debo odelo botu poliyoto lakulio baiduri ponda wau botu poliyoto meela. Tuwaulio duhi lobutu debo odelo botu poliyoto lakulio moidu ohalaga daá totambati lo huhuloá li onlongia boito. **4** Todelomo moodeli linggari topalito tambati huhuloá li onlongia boito woluo dulo pulaa pato tambati huhuloá li onlongia uwewo. Teto hulohuloáa dulo pulaa pato tauwa tahapakea moputió, wau makuta hulawa. **5** Monto tambati huhuloá li onlongia boito pukapukaái tinelo ilato wau yilumualai tingohu bulonggodu u hula-hulabio. Wau totalu lotambati huhuloá li onlongia boito woluo pitu morongo u hilaita; ui-uitolo opitu Rohullah. **6** Woluo olo totalu lotambati huhuloá li onlongia boito hitua-tuawua u oontonga debo odelo auhu lo winggililua, moolango debo odelo kristali. Topalito tambati huhuloá li onlongia, totimiidu biihio, woluo wopato mahaluku, u towimbihu talu wau towimbihu wulealio polupolu wolo mato. **7** Mahaluku u bohulio oontonga debo odelo singa. U oluolio, debo odelo sapi ulai. U otolulio, oontonga obaya debo odelo baya lomanusia. U opatio, oontonga debo odelo bulungi rajawali udonggo tombo-tomboto. **8** Opato mahaluku boito, tinggai opolipió wolomo, wau

topalitia wau to ambahu delomio polupolu wolo mato. Hui wau dulahu mamaaha-lukuwaalo boito diila mopo huhe-huheli hemo polahu mola, "Mantali, mantali, mantalilo Eeya, Allahu Taaala Laba-labaalo kawasa; tawoluo, tamawoluo, wau tawoluo malolaalaita." **9** Opato mahaluku boito hemo polahu lalaa-huwaalo poloilaalo momuji, hulumati wau sukuru to o-Lio tahulo-huloaa totambati huhuloa li olongia boito, deuito-yito Tio tatumu-tumulo u ohiheo-hiheolo maó. Wau tou mamaa-halukuwalo boito hipolahua mola, **10** odulo pulaa pato tauwa boito leidambaolo mola totalu lotaa hihuloaa totambati huhuloa li olongia boito, tulusi lolubo maó o-Lio tatumu-tumulo u ohiheo-hiheolo maó. Lapatao timongolio lopo mahulo mamaa-kutawaalo limongolio ode talu lotambati huhuloa li olongia boito wau loloiya, **11** "Oo Eeya, oo Allahu Taaala lomongo watotia! Eeyaalo wambaó tapaatuti mololimo poloilaalo momuji, hulumati wau kawasa. Sababu Eeyaalo talo powali mai totoonulalo u hitua-tuawua, wau to kahandaki lo Eeya olo totoonulalo u hitua-tuawua boito malotoduo mai wau tumutumulo."

**5:1** Lapatao watia loonto mola lilibu buku tuwau to uluu-Lio lo tahulo-huloaa totambati huhuloa li olongia boito. Buku boito polupolu lotulade tomohu-mohuwaliao wau mete-metelai wolo pitu seeheli. **2** Lapatao watia loonto mola ngotaalio lo malaikati tamolotolo boli buheli daa hemo ngibo-ngiibode wolo suala udaa, "Tatoonu tapaatuti momoo maó seseeheliyaalo botie wau momuo buku botie?" **3** Bo mopio tosologa, meaalo todunia, meaalo towalungo dunia penu boli ngotaa maó diila ilodungga taamambo momuo buku boito wau momilohe ode delomio. **4** Yi watia mahilu moyongo lou mopo tidetideo sababu diaaluo penu boli ngotaa maó tapaatuti momuo buku boito, wau momilohe ode delomio. **5** Lapatao tala ngota towolota lomongo tauwa boito malo loiya mai olaatia, "Diila hiyongo! Bilohi! Singa lonto suku bangusa lo Yahudi, wali mai lei Dauda taudaá, maloohaama. Tio mambo momoo pitu seeheli wau momuo buku boito." **6** Lapatao watia loonto mola Walaó Himba tuwau tihutihula tohungo tambati huhuloa li olongia boito, pilalito lo opato mahaluku wau ngoamila tauwa boito. Walaó Himba boito oontonga debo odelo



mailoloto. Tio o tunge pitu wau pitu mato: deũito-yito pitu rohu lonto Allahu Taáala u mailawo ode ngoilanggubu dunia. **7** Lapataó Walaó Himba boito lomaju wau lohama lilibu buku boito lonto uluú olowala lotaa hulohuloó toitaato tambati huhuloá li olongia. **8** Tou Walaó Himba boito donggo hemohutu odito, malei dambaólo mola opato mahaluku wau odulo pulaa pato tauwa boito totalulio. Timongolio ngota-ngota hidihuma kocapi wau manggo hulawa u tuatunga alama, deũito-yito duduuáwaalo umati lo Allahu Taáala. **9** Timongolio hemo polahu mola lahu tuwau u bohu: "Yio paatuti mohama maó buku boito wau momoó sesee-heliilio. Sababu Yio mapilatelio yila-yilateelo maó, wau wolo opopate-Mu, manusia monto totoonulalo suku, bahasa, lipu wau bangusa matilali-Mu ode Allahu Taáala. **10** Yio malo powali olimongolio bangusa tuwau tolomodu lowali mongo iimamu, alihu timongolio momaya Allahu Taáalanto, wau momalenta toitaato dunia!" **11** Lapataó watia luli loóonto mola. Watia loódungohe suala lo malaikati hilihu-lihua wau hejuta-jutawa daatalio. Timongolio tihutihula hipalita totambati huhuloá li olongia wau opato mahaluku wolo mongo tauwa boito. **12** Wau timongolio hipolahua wolo suala moóohuí, "Walaó Himba uma iloloto boito, patuti u mololimo kawasa, okokaya, tinepo wau olootolo; Tio paatuti hulumatiolo, poudaaalo wau pujiolo boli puji!" **13** Lapataó watia loódungohe totoonulalo mahaluku tohulungo, todunia, to walungo dunia wau todelomo deheto -- limbuio maó totoonulalo mahaluku to ngoilanggubu aalamu botie -- hipolahua, "Tio tahulo-huloó toitaato tambati huhuloá li olongia, wau Sangi Walaó Himba boito, deũito-yito ilopujia, wau hulu-hulumati boli udaá wau okawasa u ohiheo-hiheolo maó!" **14** Yi opaato mahaluku boito lolametai, "Amin!" Wau mongo tauwa boito olo leidambaólo mola wau lolubo.

**6:1** Lapataó uito watia loóonto mola Walaó Himba boito lomoó seeheli bohulio towolota opitu seeheli boito. Tulusi watia loódungohe tuwau towolota lo opaato mahaluku boito loloiya mai, "Dulo!" Tingohu sualaalio boito debo odelo tingohu bulonggodu. **2** Yi watia lomilohe, tulusi nilaasa mai wadala tuwau moputió. Jokilio boito dihudihu buutió tuwau, wau to

olio yilohialio makuta tuwau. Tio lomaju odelo ngotaalio taloohaama u lonaó lohehu ohohaama. **3** Lapataó Walaó Himba boito lomoó seeheli u oluolio. Wau watia loódungohe mahaluku u oluolio loloiya mai, "Dulo!" **4** Lapataó wadala tuwau uwewo yilumualai poli. Wadala boito mela lakulio. Jokilio boito yilohialio kawasa mopodiaá owowoluwoa louí dame monto dunia, alihu manusia mopapaatea mate-mateelo maó. Yi tio yilohialio maó wamilo tuwau uleidaá. **5** Lapataó Walaó Himba boito lomoó seeheli u otolulio. Wau watia loódungohe mahaluku u otolulio loloiya, "Dulo!" Watia lomiloheó, yi nilaasa mai wadala tuwau moitomo. Jokilio boito dihudihu titimenga ngopanggalo to uluulio. **6** Wau watia loódungohe hituatuawua u odungohe debo odelo suala hemo ngiibodu tohuungo opaato mahaluku boito. Suala boito loloiya mai "Pale ngoliteri u mopiohe ngohalaga lowuupa ngohui, wau tolo literi pale ngohilaide wewo ngohalaga lowuupa ngohui olo. Bo diila maó poluusawa bubuu-ngowaalo jaitun wau ilengi lo angguru!" **7** Lapataó Walaó Himba boito lomoó seeheli u opaatio. Wau watia loódungohu mahaluku u opaatio loloiya mai, "Dulo!" **8** Watia lomiloheó yi nilaasa mai wadala tuwau u motambutió. Jokilio ilunte Mautu. Monto wulea, weweembide tio tilunuhe Aalamu Mautu. Okokawasa to ngotayade wopato lodunia botie yiludu ode limongolio, alihu timongolio mowali momate mate-mateelo maó moli popaatea, moli sembo lo polobiti, moli wembelo longongoto wau moli bibii-natangiyalo u mongantau. **9** Lapataó uito Walaó Himba boito lomoó seeheli u olimolio. Yi watia loóonto to walungo mesba woluo hihii-muúduwalo lotau-tauwalo tailate ilopatea yila-yilateelo maó, sababu timongolio helo pootoheeto tahuli lo Allahu Taaala loli ososakusi limongolio. **10** Timongolio hiwaatiá wolo suala moóohui, "Oo Eeya Taa Laba-labaalo kawasa, tamantali wau otutu! Ngoolo maó poli hiheolio bolo Eeya momutoái tuanga dunia wau mohukuumani olimongolio sababu malomate yila-yilateelo maó tomongo watotia?" **11** Timongolio ngota-ngota yilohialio jumba ngopata u moputió. Lapataó timongolio pilei huhelialio ngopeé mola poli, dilumutu malei wimumuto jumulaa lomongo tamani ngopo hipate wau mongo wutati mongolio tamaa pateelio mate-mateelo maó debo odelo timongolio. **12** Tulusi watia loóonto mola

Walaó Himba boito lomoó seeheli u olomio. Yi lotoduwolo mola liluhe udaá tutu. Mato lodulahu lowali loitomo debo odelo kaingi moitomo u bangganga, wau hulalo lowali yileela debo odelo duhu. **13** Popoo-liyamalo helo duduulahei lonto hulungo ode yitaato dunia debo odelo hungo lo ara udiipo moloheto hipo duduulahua lonto bungolio tou hileulo daá lodupoto moóohuí. **14** Hulungo yilooli debo odelo kalatasi yililibio, wau ngoáamila huidee wau pulo hileilio lonto tambatilio. **15** Lapataó mongo olongia todunia, taduduulaa lolipu, mongo eyaanggu, tahi okawasawa, tahi kayawa, wau tau-tauwalo wewolio, mopio wato meaalo talo lopato, ngoáamilalo lotituuó todelomo gogoowaalo wau tohiyango botu lohuidu. **16** To huhuu-ideyaalo wau boboo-tuwaalo boito, timongolio hiwaatiá, "Temaalo mai amiaatia! Popotuuálo mai amiaatia tobibilo-Hio lo tahulo-huloó toitaato tambati huhuloá li olongia, wau monto omuluka lo Walaó Himba boito! **17** Dulahee u moótihela hapato malei dungga mai, botia timongolio hemo pomukaó yiyingo limongolio, wau diaaluo penu boli ngotaa maó mambo moó taahangi totalu limongolio!"

**7:1** Lapataó uito, watia loóonto mola wopatota malaikati hitihula to opaato dulungo dunia. Timongolio helo ngotongo opaato mato lodupoto todunia alihu diaaluo dupoto u mohiipa totudulio meaalo todeheto, meaalo to bubuu-ngowaalo ayu. **2** Lapataó watia loóonto mola malaikati ngota uwewolio yilumenetai lonto tiimuru. Tio delodelo seeheli lonto Allahu Taáala tatumu-tumulo. Wolo suala daá malaikati boito lotianga opaato malaikati tamaa loótapu kawasa lonto Allahu Taáala u mopoluusa deheto wau tudulio. **3** Malaikati boito loloiya mai "Diipo maó poluusawa tudulio meaalo deheto, meaalo bubuu-ngowaalo ayu wonu ami diipo longohi tuoto seeheli tobaya lomongo wato Allahu Taáala." **4** Lapataó piloótaalio mai olaatia deü woluo ngojumula ngohetuto wopato pulaa pato lihulota tailohialio tuoto seeheli lo Allahu Taáala tobaya limongolio. Tau-tauwala boito hilama-Lio lonto tamopulaa dulo suku bangusa lo Isirailu; **5** lonto timiidu suku mopulaa dulo lihu lota. Deüito-yito lonto suku Yehuda, Ruben, Gad, **6** Asyer, Naputali, Manasye, **7** Simeon, Lewi, Isakhar, **8** Jebulon, Yusu, wau Benyamin. **9** Lapataó uito watia luli lomilohe, tulusi

nilaasa mai auhu lo manusia ulaba-labaalo daatalio -- diaalu penu boli ngotaa maó tamoó yiaapo jumulaalio. Timongolio yito tau-tauwalo monto timiidu bangusa, suku, lipu wau bahasa. Wolo hipakea jumba u hipuutiá wau hidihuma walaó tataa-ngowaalo bungo lo ayu paalemu to uluu, tau-tauwalo dadaata boito hitihula talutalu ode tambati huhuloá li olongia wau talutalu ode Walaó Himba boito. **10** Lapataó wolo suala daá timongolio helo ngiibodu, "Oáahunto dudunggaalio mai lonto Allahu Taáala, tahulo-huloá toitaato tambati huhuloá li olongia, wau lonto Walaó Himba boito!" **11** Ngoáamila malaikati hitihula lomalito tambati huhuloá li olongia wolo mongo tauwa wau opaato mahaluku boito. Mamaa-laikatiyalo boito leidambaólo mola totalu tambati huhuloá li olongia tulusi lolubo Allahu Taáala. **12** Timongolio helo ngiibode, "Amin! Ilopujialo mola Allahu Taáalanto taúdaá wau molinepo. Tio paatuti wohiyalo daata-daatalo maó lapali sukuru wau polo hulumati. Tio okawasa wau molotolo u ohiheo-hiheolo maó! Amin." **13** Tala ngota lomongo tauwa boito lohintu mai olaatia "Tau-tauwalo tahi jumbawa lou moputiá botie, tatoonu timongolio wau lonto utoonu mai timongolio?" **14** "Diila otaawa lowatia, Tuani. Ti Tuani lohihilao tamotota," tametaó lowatia. Yi ualio mai olaatia, "Utieelo tau-tauwalo tamaa loáahu loli maasa lo alinaaya ulaba-labaalo tutu. Timongolio malo moboaá jumba limongolio wau lohutu maó lowali loputió wolo duhu lo Walaó Himba boito. **15** Uitolo sababuulio timongolio tilimihulaó totalu tambati huhuloá lo Allahu Taáala, wau helo tabia to o-Lio hui dulahu todelomo Bele lo Allahu Taáala. Wau Tio tahulo-huloá toitaato tambati huhuloá li olongia boito mamei woluo woli mongolio u moduóla olimongolio. **16** Timongolio diilalo moólaasa polangolo meaalo mototoángo; mato lodulahu meaalo patulio uhinta-hintalabu diilalo moópobu olimongolio, **17** sababu Walaó Himba tahulo-huloá tohuungo tambati huhuloá li olongia boito mamowali diti limongolio. Tio mamodelo olimongolio ode butu lotaluhu u mongohi tutumulo. Wau Allahu Taáala mamomaide ngoáamila ponu monto mato limongolio."

**8:1** Tou Walaó Himba boito lomoó seeheli u opitulio, sologa lowali loliilo hiheolio otanu ngoputu lojamu. **2** Lapataó watia loóonto mola pitu lota

malaikati hitihula totalu lo Allahu Taaala, wau timongolio yilohia pitu torompeti. **3** Ngotaalio lo malaikati wewo, tadelodelo podupawa hulawa tuwau, lonaó mai wau tilimihula totalu lomesba. To olio yilohia dadaata daá alama u pomuyuhuto to duduu-aawaalo lo ngoáamila umati lo Allahu Taaala wau u podewolo tomesba hulawa uwoluo totalu tambati huhuloá li olongia. **4** Peé-peéenta wolo duduu-aawaalo uu-matiyaalo umati lo Allahu Taaala, poloó lodupa udonggo leileita boito lohubulo lobotula mola lonto uluu lo malaikati tatihu-tihula totalu lo Allahu Taaala. **5** Lapataó malaikati boito lohama podupawa boito, wau loluango wolo tulu lonto mesba, tulusi lopo mahula odeitaato dunia. Yi bulonggodu olo hula-hulaubio wau ilato malo lawode-molawode mai wau lotoduwolo mola liluhu. **6** Lapataó uito, pitu lota malaikati tadihu-dihu pitu torompeti boito dapa-dapato u mohiipaó. **7** Malaikati bohulio lohiipo torompetilio, yi didi lo esi wau tulu ula-ulau loduhu lodehu wolo polodu ode dunia. Ngotayade totolu lodunia yilaahu lotulu, odito olo ngotayade totolu bubuu-ngowaalo ayu wau timiidu huóyoto umoidu. **8** Lapataó malaikati oluolio lohiipo torompetilio, yi hitua-tuawua uleidaá tutu u oontonga debo odelo huide ulei-leita pilomahulio mola ode delomo deheto. Ngotayade totolu lodeheto loboliólo mola lowali duhu, **9** wau lopoowatelo mola ngotayade totolu totoonulalo mahaluku todeheto; odito olo bilinasaalo mola ngotayade totolu kakaa-paliyaalo. **10** Lapataó malaikati otolulio lohiipo torompetilio, yi poliyama tuwau uleidaá, ulei-leita debo odelo morongo, lodehu mai lonto hulungo, tulusi lolemba ngotayade totolu lo duduu-tulawaalo wau butu lotaluhu. **11** (Tanggulo poliyama boito "Mopaáto".) Yi ngotayade totolu lotaluhu lowali lapaáto, wau yilateelo mola taa dadaata sababu helongilu taluhu u malowali lopaáto boito. **12** Lapataó malaikati opatio lohiipo torompetilio. Yi ilotambalia ngotayade totolu mato lodulahu, ngotayade totolu hulalo, wau ngotayade totolu popoo-liyamaalo tilinggula yiloolilo mola ngotayade totolu lonto lotolo tineli mongolio. Wau olo ngotayade totolu dulahu diila lotilangai wau odito olo ngotayade totolu lou hui. **13** Lapataó watia lomilohe mola, yi watia loódungohe bulungi rajawali tuwau udonggo tombo-tomboto molanggato todulente longiibodu, "Topotala! Topotala! Tilopo-talaalo ngoáamila taa todunia wonu bolo

modungohe otolu malaikati wewolio de mohiipaó torompetilio!"

**9:1** Lapataó malaikati olimolio lohiipo torompetilio, wau watia loóonto mola poliyama tuwau lodehu mai lonto hulungo ode dunia. Poliyama boito yilohia uuunti pangato lomautu. **2** Yi poliyama boito malomuó pangato lomautu boito, tulusi poloó yilumualai lonto delomio debo odelo poloó lonto tihengo uleidaá. Mato lodulahu wau baangio daá lowali lodiólomo lopoloó lonto pangato boito. **3** Lapataó lonto delomo poloó boito yilumualai bubuu-litaalo u lolaathe mola ode dunia. Bubuu-litaalo boito yilohia kawasa u tutuuwauwa debo odelo uilohi ode bambau. **4** Timongolio dilini mopoluusa huóyoto, meaalo totoonulalo bungo lo ayu meaalo totoonulalo pilomulo wewolio. Timongolio bo mowali moluhu tau-tauwalo u tobayalio diila o tuoto seeheli monto Allahu Taáala. **5** Bubuu-litaalo boito diila yiluwasia momate tau-tauwala boito mate-mateelo maó, bo mopo sikisaa wambaó olimongolio ngotilonggadu limo lohula mola. Lilintolo uloo sababu sikisaa upilo akibati lo bubuu-litaalo boito tutuuwauwa debo odelo lilintolo u ilakibati pantongio lobambau. **6** Tou limo lohula mola boito tau-tauwala boito motolopani alihu mate, bo timongolio diila mowali mate; timongolio ohilaa mate bo mautu molaminga monto olimongolio. **7** Laku lobulita boito debo odelo wadala udapa-dapato mopaatea. To lunggongo bubuu-litaalo boito woluo hitua-tuawua u oontonga debo odelo makuta hulawa. Baya lo bubuu-litaalo boito debo odelo baya lomanusia. **8** Huwoó lo bubuu-litaalo boito debo odelo huwoó taabua, wau dungitio debo odelo dungito singa. **9** Duhelo bubuu-litaalo boito taútaubu lou hitua-tuawua udebo odelo boó wate. Suala polipió lo bubuu-litaalo boito debo odelo suala lo ngojumula daá kakaa-letawaalo wadala u hemoluhu todelomo popaatea. **10** Bubuu-litaalo boito o patahu wau opantongio debo odelo bambau. Wau topatahu lo bubuu-litaalo boitolo woluo lotolio u mopo sikisaa manusia ngotilonggadu limo lohula mola hiheolio. **11** Bubuu-litaalo boito o olongia u hemo malenta olimongolio, wau olongia boito yito malaikati tamoo-ngimatoa pangato lomautu. Tanggulio todelomo bahasa lo Ibrani yito Abadon; wau todelomo bahasa lo Yunani Apolion (uboliilio maó "Tamoo-



poluusawa"). **12** Baala ubohulio malo paluto. Lapatao uito donggo woluo poli dulo baala umusi meidungga. **13** Lapatao malaikati taolomio lohiipo torompetilio. Yi watia loodungohe suala lonto opato tutulo mesba hulawa u totalu lo Allahu Taaala. **14** Suala boito loloiya maó to malaikati olomio boito, "Hulia maó opaato malaikati tapungu-pungu to Dutulaa lo Eperat boito!" **15** Opaato malaikati boito olo hilulialio. Timongolio mapilo dapatio tolomodu ode jamu, dulahu, hulalo wau taunu boito u momate mateelo maó ngotayade totolu ngoilanggubu umati lomanusia. **16** Pilootaalio mai olaatia deu jumulaa lo papaa-sukaniyalo owadala daatalio dulo hetuto juta. **17** Wau todelomo bibilohu, watia loonto mola wawaa-dalawaalo boito wau jojookilio. Jojookilio boito hipakea boó wate u lakulio meela hileita, debo odelo iintani lakulio moidu debo odelo botu lonilamu, wau molalahu walirangi. Lunggongo wawaa-dalawaalo boito debo odelo lunggongo singa, wau lonto tunggilio yilumualai tulu, poloó, wau walirangi. **18** Ngotayade totolu lonto umati lomanusia ilopatea yila-yilateelo maó lootolo baala boito; deüito-yito tulu, poloó, wau walirangi uilumualai monto tunggilo wawaa-dalawaalo boito. **19** Olootolo wawaa-dalawaalo boito woluo to tunggilio wau olo topatahio. Papaatahio debo odelo tulidu olunggongo. Wolo patahio boito, wawaa-dalawaalo boito helo posikisaa manusia. **20** Bo labito umati lomanusia tadiila ilopatea yila-yilateelo maó lo babaa-lawaaalo boito olo, diila olo lololaa maó huhuu-hutuwaalo uluu limongolio lohihilao. Timongolio debo diila lohuheli hemolubo roroo-huwaalo u moleeto wau totoonulalo balaahala hulawa, talaá, tombaha, botu wau ayu udiila mowali moonto mealo modungohe, mealo monao. **21** Timongolio diila olo lololaa maó huhuu-hutuwaalo limongolio u moleeto, deüito-yito moomatea mate-mateelo maó, ilimi mongisimu, huloto wau mootaowa.

**10:1** Lapatao watia loonto mola malaikati ngota tamolotolo boli buheli daa uwewo u lotuhutai lonto sologa. Tio yilanggube loheengo, wau duhi lobutu tuwau libu-libude to lunggongio. Bayalio tine-tinelo debo odelo mato lodulahu, wau oatio wolihitulu. **2** To uluulio woluo ngopolilibu buku kikiiá ubua-buaade. Oatio olowala dutadutaá todeheto wau oatio

oloihi dutadutaá totudulio. **3** Lapataó tio longiibode wolo suala daá debo odelo wuongo lo sisii-ngawaalo. Lapatio maó malaikati boito longiibode, opitu bulonggodu lolametaó wolo suala hula-hulaubio. **4** Odito opitu bulonggodu boito lotuwahu, watia ohilaa moluladeó, bo watia loódungohei suala lonto sologa lotahuda, "Tuua maó wolo uiloiya mai lo opitu bulonggodu boito; diila maó tulade!" **5** Lapataó malaikati u iloontonga lowatia lotidutaá todeheto wau totudulio boito wau lomintaa mola uluulio olowala ode hulungo. **6** Tio lotadia domi tanggulo Allahu Taáala tatumu-tumulo ohiheo-hiheolo maó, talo powali mai hulungo, dunia wau deheto wau totoonulalo hitua-tuawua uwoluo todelomio. Malaikati boito lolojiya, "Wakutuulio diilalo lohuduwolo. **7** Bo wonu bolo malaikati opitulio mohiipaó torompetilio, Allahu Taáala mamoponaó lanjana-Lio u tutuuó debo odelo u mapiloótaa-Lio mai tomongo wato-Lio, deúito-yito mongo nabi." **8** Lapataó suala uma ilodungohe lowatia lonto sologa boito luli lotahuda mai olaatia. Tio lotahuda, "Ponaólo mota hamaawa mai lilibu buku u huáhuáato to uluu lo malaikati taduta-dutaá todeheta wau totudulio boito." **9** Yi watia olo malonaó mota ode malaikati boito wau lohile alihu tio mongohi mai lilibu kikiió boito to olaatia. Tio lolojiya, "Hamaalo wau tamelalo utie. To delomo ombongumu tio mamowali mopaáto, bo todelomo ngangomu tio moolingo debo odelo hula lotiiá." **10** Watia malohama lilibu kikiió boito lonto uluulio tulusi tilamela lowatia. To ngango lamitio debo odelo hula lotiiá, bo tou matiloolo lowatia, todelomo ombongo laatia lilibu kikiió boito tio lowali lopaáto. **11** Lapataó watia pilalentalio, "Peéentapo pololadelo habari lo Allahu Taáala pasali lo babaa-ngusawalo, lilii-puwaalo, babaa-hasawalo, wau mongo olongia."

**11:1** Lapataó uito watia yilohialio mai ayu ngoputu u hamahama odelo tunggudu ngoputu poluúdu, tulusi pilalentalio mai, "Ponaólo moluúde Bele lo Allahu Taáala wau mesba. Yiaapa maó ngoolo lota daatalio tahipo ibadatia todelomio. **2** Bo diila maó tuúde paangio u toámabahu bulemengo Bele lo Allahu Taáala, sababu tayade boito mailudu ode tau-tauwalo tadiila hitootawa to Eeya. Timongolio mamoduta-dutaáa kota u mantali boito ngotilonggadu wopato pulaa dulo hula mola. **3** Wau mamolao mai

duulota sakusii-U tapakepake boó limilimi, wau timongolio mamopo malalumu habari lo Allahu Taáala ngotilonggadu ngolihi dulo hetuto wolomo pulu hui mola." **4** Sakusi duulota boito yito dulo batango ayu lojaitun wau dulo oáato tohe uwoluo totalu lo Eeya ngoilanggubu aalamu. **5** Wonu tau mohimontala mohutu hitua-tuawua udiila mopiohe ode limongolio, yi monto ngango limongolio lumualai tulu umopo binasa mumuu-suulio. Wolo dudelo odito, ngoáamila taa u ohilaa mopo ngongoto olimongolio maópatea mate-mateelo maó. **6** Timongolio okawasa u moheuta hulungo alihu diila modehu didi ngotilonggadu timongolio donggo hemo pomalalumu habari lo Allahu Taáala. Timongolio olo okawasa to ngoáamila butu lotaluhu, u momolió taluhu mowali duhu. Wau timongolio okawasa olo u molotaáa dunia wolo totoonulalo baala u hidala-dalaala, omolua wambaio otohilaa pohutuo maó limongolio. **7** Lapataó timongolio lapato mopohabari maó habari limongolio, binatanggi u lumualai monto pangato lomautu mamó luwali olimongolio. Tio mamó poólaaheó wau momate-mateelo maó olimongolio. **8** Wau milate limongolio mabolo hibala-balatalo maó todalala daá tokota daá, toutoonu Eeya silalipu limongolio. Tanggulo pohumaya lokota boito yito Sodom meaaló Masiri. **9** Tau-tauwala monto ngoáamila lipu, suku, bahasa, wau bangusa mamóóonto milate limongolio ngotilonggadu otolu wau ngoputu lodulahu, wau diila mopoluasi maó mimii-lateyaalo boito lobungolo. **10** Tuango dunia mamoti wengahe to opopate losakusi duulota boito. Timongolio mamopolame wau molalaawola palaseni, sababu nabi duulota boito malo podungga mai dadaata sikisaa ode ngoáamila taa todunia. **11** Lapataó otolu lodulahu wau ngoputu, medunggalo mai napasi lo tutumulo monto Allahu Taáala wau muli tumuwoto ode delomo nabi duulota boito. Timongolio olo mamobongu wau timihulo, tilinggula ngoáamila tamóóonto olimongolio mowali moóhe daá. **12** Lapataó nabi duulota boito loódungohe mola suala daá tahemo tianga olimongolio lonto sologa, "Dulo botulai odia mai!" Lapataó totalu lo mumuu-suuwaalo limongolio, timongolio lobotulaa mola ode sologa, yilanggube loheengo. **13** Yi tou boito motoduwolo mola liluhu udaá tutu. Ngotayade mopulu lokota boito moáantulu, wau pitu lolihu lota mate sababu liluhu boito. Tau-tauwalo

wewolio mowali moohe daá, tulusi timongolio momuji mola odudaá lo Allahu Taáala tosologa. **14** Baala u oluolio malo paluto. Bo bilohilo maó! Baala u otolulio bolo ngopeé mola mamuli mohunuhei. **15** Lapataó malaikati opitulio lohiipo torompetilio, yi tosologa dungo-dungohei susuu-walaalo moóohuú daá u loloiya, "Okokawasa u momalenta dunia botia woluo todelomo uluú lo Eeyaanto wau Olongia Tamoo-poáahua upilo danti-Lio mai. Tio mamó malenta u ohiheo-hiheolo maó!" **16** Yi odulo pulaapato lota tauíwa tahihuloáa totambati huhuloá li olongia limongolio totalu lo Allahu Taáala leidambaólo mola wau lolubo Allahu Taáala. **17** Timongolio loloiya, "Eeya, Allahu Taáala Laba-labaalo kawasa, tawoluo, wau tamailoluo! Mongo watotia mosukuru mola ode Eeya sababu Eeya malomake kawasa lo Eeya u udaá, wau malo lumula lomalenta!" **18** Tau-tauwalo tadiila hitootawa lo Eeya, heloluhu wolo majanunu sababu mawakutuulio Eeya mobanggu-watai muluka lo Eeya, wau masaaátílio olo Eeya momutoó taheilate. Uti-utieelo wakutuulio u mongohi wuupa tomongo wato lo Eeya, mongo nabi, wau to ngoáamila umati lo Eeya, deúito-yito ngoáamilalo taa u moibaadati to Eeya, taudaá mealo taúkikiíó. Uti-utieelo wakutuulio u mongantulu tau-tauwalo tahipo ngantulua dunia!" **19** Yi lohuóolo mola Bele lo Allahu Taáala tosologa, wau iloontongalo mola Bulua Daantia todelomio. Tulusi lotoduwolo mai ilato lawode-molawode wau suala lo bulonggodu u hula-hulaubio wau bulo-bulonggalio, boli liluhu wau didi esi upolodu.

**12:1** Lapataó iloontonga mola tohulungo hitua-tuawua u moólinggolabe wau polu-polutuó. Taabua ngota tapake-pake mato lodulahu odelo boólio, donggo tihu-tihula toitaato hulalo. Toitaato lunggongio woluo makuta tuwau utili tangowalio lou mopulaa duluo poliyama. **2** Taabua boito donggo ombodaá, wau sababu mawakutuulio u mopotutu mai, yi tio longuwatió lou mongongoto. **3** Lapataó oóonto mola poli tohulungo hitua-tuawua u moólinggolabe. Woluo naha meela tuwau uleidaá tutu u olunggongo pitu wau tungelio mopulu. Timiidu lunggongio hipakea makuta tuwau. **4** Wolo patahio tio lodedeá ngotayade totolu popooliyamaalo tohulungo wau pilomahulio ode dunia. Naha boito tilimihulo

totalu lotaabua taohilaa mopotutu mai boito wolo makusudu mololoolao walaio, odito potutulio mai. **5** Tulusi taabua boito lopotutu mai walaio talolai ngota tamamo malenta ngoamila bangusa wolo tunggudu wate. Bo walaio boito yilahulio lonto taabua boito, tulusi dilelolio ode Allahu Taaala wau ode talu lotambati huhuloa li olongia-Lio. **6** Yi taabua boito tilumetea ode huta datahu u luasi daa wau delita, ode tambati u mapilo dapato Allahu Taaala olio. Totambati boito tio mataalaalo hiheolio ngolihi dulo hetuto wolomo pulu hui mola. **7** Lapatao tosologa lotoduo popaatea. Tei Mikhael pee-peeenta wolo maaa-laikatilio lotuuhua loluwali naha boito. Wau naha boito olo, u bilantua lo maaa-laikatilio, loluwali olei Mikhael. **8** Bo naha boito ilolaahelio. Tio wau maaa-laikatilio diilalo yiluasialotibiluloa tosologa. **9** Naha uleidaa boito tilapi ode bulemengio! Tiolo tulide panggola boito u ilunte Ibilisi meealo Rohu Moleeto, u lohimbulo ngoilanggubu dunia. Tio tilapi ode dunia wolo ngoamilalo malaikatilio. **10** Lapatao watia loodungohe mola suala u loohuu tosologa loloiya mai, "Botiaalo wakutuulio lo Allahu Taaala mopoahu mai umati-Lio. Botia Allahu Taaala mopo bilohei kawasaa-Lio odelo Olongia! Botia Olongia Tamoo-poahua tadilanti boito olo mopo bilohei okokawasaa-Lio! Sababu tamo potuludu tomongo wutatonto totalu lo Allahu Taaala hui wau dulahu, maa yiluwalaio lonto sologa. **11** Mongo wutatonto malo laaheo olio wolo duhu lo Walaio Himba boito, wau wolo habari u otutu lonto Allahu Taaala u pilohabari limongolio. Timongolio iloheela lohilao mopobake nyawa limongolio tunggula mate. **12** Sababu uito, mamusi sologa wau ngoamila tahi biluloawa todelomio, motiwengahe! Bo topotala dunia wau deheto, sababu Ibilisi malolaahi ode olemu wolo muluka daa, sababu otaawalio deu wakutuulio bolo ngopee mola." **13** Tou naha boito longalati maio deu tio matilapi ode dunia, tio lohilapita taabua tamalo potutu mai walaio talolai boito. **14** Bo taabua boito yilohialio dulo polipio bulungi rajawali uleidaa, alihu tio tumombota mola ode tambatilio tohuta datahu u luasi daa wau delita, toutoonu tio mataaalio tolo taunu wau ngoputu hiheolio, molopato monto luhu lonaha. **15** Yi naha boito lopohua maio lonto ngangolio taluhu dadaata daa ode taabua boito, u mopo hilihe olio. **16** Bo dunia lomantu taabua boito; dunia lomu ngangolio wau lololoolao taluhu

u yimualai lonto ngango lonaha boito. **17** Naha boito maloingo daá totaabua boito, tilinggula tio mota loluhu wali uwewo lotaabua boito, deuuto-yito ngoáamila talo dungohe totoonulalo palenta lo Allahu Taáala, wau talongohi sakusi pasali li Isa wau kawasaa-Lio. **18** Lapataó naha boito tilimihulaó topentadu.

**13:1** Lapataó watia loóonto binatangi tuwau yilumenetai lonto delomo deheto. Binatangi boito otunge mopulu wau olunggongo pitu. Totimiidu tungelio omakuta tuwau, wau totimiidu lunggongio tulatulade tanggulo tuwau lohina Allahu Taáala. **2** Binatangi u iloontonga lowatia boito lakulio debo odelo harimau lambutio hibonto-bontoá moitomo, wau oáatio debo odelo oáato boruwangi, wau tunggilio debo odelo tunggilo singa. Lapataó binatangi boito yilohia lonaha boito olootolio lohihilao, wau tambati huhuloáalio, wau okokawasaalio uleidaá. **3** Tuwau towolota opitu lunggongo lo binatangi boito oontonga debo odelo pali u tiluhua daá, bo pali boito maloluli. Ngoilanggubu dunia loduduá binatangi boito wolo pongolaasa linggolabe. **4** Wau timongolio helolubo naha boito sababu tio malongohi okokawasaalio to binatangi boito. Wau timongolio helolubo olo binatangi boito. Timongolio loloiya, "Diaaluo tatutuu-wauwa wolo binatangi botie! Diaaluo tamowali mopaatea moluwali olio!" **5** Binatangi boito yiluasiasia molojiya susuu-aliyaalo u batingga daá wau mohina Allahu Taáala. Tio yiluasiasia momalenta wopato pulaa dulo hula mola hiheolio. **6** Lapataó tio lolumula lohina Allahu Taáala, wau tanggulo Allahu Taáala. Odito olo tambati biluloá lo Allahu Taáala wau ngoáamila tahi biluloáwa tosologa olo hilinaalio. **7** Tio yiluasiasia olo moluwali umati lo Allahu Taáala wau mopo olaaheó olimongolio. Wau okokawasa to ngoáamila suku, lipu, bahasa, wau bangusa yilohilio olio. **8** Binatangi boito matuboo lo ngoáamila taa utumu-tumulo toitaato dunia, ngopohia tau-tauwalo u tanggulio malei daputali tou dunia diipo pilowali mai, todelomo buku taa tumu-tumulo miliki lo Walaó Himba umaa iloloto. **9** Sababu uito, wonu timongoli mambo modungohe, dungohi maó habari botie: **10** "Taa u musi tawalolo, tantu matawalolo. Wau taa u musi pateelo mate-matelo maó wolo wamilo, tantu mapateelo mate-matelo maó wolo wamilo. Uitolo



sababuulio umati lo Allahu Taaala musu taaba wau tatapu molotolo hilao."

**11** Tulusi watia looonto mola binatang tuwau uwewo yilumenetai lonto delomo dunia. Binatang boito otunge duluo debo odelo tunge lowalaó himba. Sualaalio debo odelo suala lonaha. **12** Totalu lo binatang u bohulio boito tio lomake okokawasa uleidaá u lotapulio lonto binatang boito olo. Ngoilanggubu dunia wau ngoáamila tahi biluloáwa toitaatio, hepila-kusaalio lolubo binatang u bohulio boito, u paliilio tiluhua mailoluli. **13** Binatang u oluolio boito lopowoluo mai totoonulalo moólinggolabe uleidaá. Totalu lo ngoáamila tau tio lohutu tulu lotuhutai lonto hulungo ode dunia. **14** Wau ngoáamila tau tahi tumula todunia ilaakaliilio wolo momoóo-linggolabeyalo ulowali pilohutulio totalu lo binatang u bohulio boito. Wau timongolio ngoáamilalo ilahulalio lopo tihulaó bui tuwau lonto binatang umaa pilaliilio lowamilo, bo debo tumutumulo. **15** Binatang u oluolio boito yiluasiasa mongohi nyawa tobui boito, tilinggula bui boito mowali mobisala wau momate mateelo maó ngoáamila taa diila mohuto molubo olio. **16** Ngoáamila tau, udaá wau kikiió, kaya wau mosikini, wato wau taa beebasi, hepilakusa lo binatang boito u mololimo tuoto to ului limongolio olowala meaalo tobaya limongolio. **17** Diaaluo penu boli ngotaa maó mowali motali meaalo mopotali maó u hitua-tuawua, wonu tio diila otuoto boito, deúito-yito tanggulo binatang boito lohihilao, meaalo nomoro u mopoilaalo maó tanggula boito. **18** Tewe palalu ohikimati. Taa u molinepo moó yiaapo boli lonomoro binatang boito, sababu nomolo boito yito tanggulo manusia ngota. Nomorolio yito **666**.

**14:1** Lapataó watia lomilohe mola, tulusi iloontonga mai Walaó Himba boito tihutihula toitaato Huludu lo Sion. Peé-peéenta wo-Lio woluo ngohetuto lihu wopato hetuto wopato pulaa patolota tabayalio ngota-ngota hitulade tanggu-Lio wau tangguli Paapa-Lio. **2** Tulusi watia loódungohe suala lonto hulungo bulo-bulontungio debo odelo tingohu taluhu podehu uleidaá wau debo odelo hulaubu bulonggodu ulaba-labaalo. Suala boito odungohe debo odelo suala lomuusiki lonto tahi poitohe kocapi tadonggo hemo poitohe kocapilio. **3** Totalu tambati huhuloá li olongia wau opato mahaluku wau mongo tauwa topalito lotambati huhuloá li olongia boito,

ngohetuto lihu wopato hetuto wopato pulaa patolota boito hipolahua mola lahu tuwau ubohu. Lahu boito penu boli tatoonu diila mowali mopoólaatao ngopohia lo ngohetuto lihu wopato hetuto wopato pulaa patolota boito tamaa yilopato lonto dunia. **4** Timongolio boito tau-tauwalo tadebo hiberesia debo odelo tadiipo motota lo mongobua sababu diila loáawota wolo mongobua. Timongolio loduduá Walaó Himba boito ode utoonulalo maó ponaówalio. Towolota lo ngoilanggubu umati lomanusia, timongoliolo tamaa yilopato odelo dewo u bohulio ode Allahu Taáala wau ode Walaó Himba. **5** Diila peénta maó timongolio lohimbulo; wau diaaluo aibu penu boli ngoidi maó toli mongolio. **6** Lapatao watia loóonto mola ngotaalio lo malaikati wewo tatombo-tomboto molanggato tohulungo. Malaikati boito lodelo habari pasali lo Habari Mopiohe ubakaa pilo tunggulo ode manusia todunia deúito-yito ode ngoáamila bangusa, suku, bahasa wau lipu. **7** Malaikati boito helo ngiibode wolo suala daá, "Poohelo to Allahu Taáala, wau pujiaalo odudaáa-Lio! Sababu mawakutuulio Allahu Taáala momutoái manusia. Tubowaalo Tio talopowali hulungo, dunia, deheto wau ngoáamila butu lotaluhu!" **8** Malaikati oluolio lohunuhe malaikati tabohulio sambela hemo ngiibode, "Malodehu! Kota Babel uleidaá malodehu! Tio malohutu totoonulalo bangusa lowali hiluwoáa wolo angguru -- deúito-yito angguru lonapusu hulotolio!" **9** Ngotaalio lo malaikati otolulio lohunuhe to malaikati duulota boito, wau helo ngiibode wolo suala daá, "Taa u molubo binatang boito wolo builio, wau o tuoto binatang boito tobaya meaalo to uluúlio, **10** tau boito mamongilu angguru lo Allahu Taáala, deúito-yito angguru lomulukaa-Lio u matilua-Ngio ode delomo tapahula-Lio, lou diila ililangia penu boli ngoidi maó! Ngoáamila tau boito masikisaa-Lio todelomo tulu wau walirangi totalu lo mamaa-laikatiyalo mantali wau totalu lo Walaó Himba boito. **11** Poloó monto tulu umopo sikisaa totau-tauwala boito mamohubulo mololaalaaíta. Hui dulahu diila ohuhe-huheliilio timongolio sikisikisa, deúito-yito timongolio tahe lolubo binatang boito wau builio, ngoáamila taa otuoto tanggulo binatang boito." **12** Todelomo suáli botie umati lo Allahu Taáala tamo dungohe papaa-lentawalo Allahu Taáala wau tatapu molotolo hilao toli Isa palalu mowali sabali. **13** Lapatao watia loódungohe suala lonto sologa lotahuda mai,

"Tulade maó utie: tumulalo mai botia, potisanangilo tutu tau-tauwalo taamate tou donggo hemomaya to Eeya!" "Otutu!" tahuda lo Rohullah. "Timongolio mamohuheli mokalaja tióopatea, sababu tilapula lobubaya limongolio laito mawoli mongolio." **14** Lapataó watia loóonto mola, yi loilaalo mai heengo tuwau u moputió. Toitaato heengo boito hulo-huloáa ngotaalio u oontonga debo odelo manusia. Tolunggo-Ngio o makuta hulawa tuwau, wau to uluu-Lio osabi tuwau u molalito. **15** Lapataó ngotaalio lo malaikati wewo yilumualai lonto Bele lo Allahu Taáala. Wolo suala daá, tio longibode to o-Lio tahulo-huloáa toitaato heengo boito, "Popoáyowa mola sabi-Mu boito wau otoolalo botia, sababu maa wakutuulio u mohimoá tilapulo; dunia maloontapo u otoololo!" **16** Tulusi Tio tahulo-huloáa toitaato heengo boito lopoáyo sabi-Lio ode dunia, yi dunia olo ilotoolo. **17** Lapataó watia loóonto mola ngotaalio lo malaikati wewo poli yilumualai lonto Bele lo Allahu Taáala tosologa. Tio olo dihudihu sabi tuwau u molalito. **18** Lapataó uito, ngotaalio lo malaikati wewo, taókawasa totulu, lonaó mai lonto mesba. Wolo suala daá tio longiibodu to malaikati tadihudihu sabi u molalita boito, "Popoáyowa mola sabimu boito wau oyodelo huhuu-ngowaalo angguru todunia, sababu huhuu-ngowaalo boito malo loheto!" **19** Yi malaikati boito malopoáyo sabilio ode dunia wau helosabi huhuu-ngowaalo angguru lonto batangio, tulusi lopo mahula ode delomo pakaakasi hepo mitodelo angguru muluka lo Allahu Taáala uwali-walihuhu. **20** Huhuu-ngowaalo angguru boito pilitodio to bulemengo kota, wau lonto pakaakasi pomitodelo angguru boito matilu molohei duhu debo odelo dutula, ngoilamingo tolo hetuto kilo, wau delomio ngopee dulo meeteri.

**15:1** Lapataó watia loóonto mola tohulungo hitua-tuawua u moólinggolabe wau laba-labaalo polutuio. Woluo pitu lota malaikati wolo pitu baala upulitio. Uti-utieelo pulitio lo Allahu Taáala lopo bangguwatai mulukaa-Lio. **2** Lapataó uito watia loóonto mola hitua-tuawua u oontonga maó debo odelo auhu winggilua ula-ulambohe tulu. Watia loóonto olo tau-tauwalo tamaa loóhaama to binatanggi wau builio, wau loóhaama totaa utanggulio tiluoto wolo nomoró. Tau-tauwalo taloóhaama boito tihutihula

tobiihu auhu winggilua. Wau dihudihu kocapi uilohi lo Allahu Taáala olimongolio. **3** Wau timongolio hipolahua lahu lei Musa, wato lo Allahu Taáala wau lahu lo Walaó Himba. Odie mola tingohio, "Eeya, Allahu Taáala Laba-labaalo kawasa, donggo boli udaá wau linggolabio huhuu-hutuwaalo Eeya! Olongia lo totoonulalo bangusa, donggo boli aadili wau otutu huhuu-hutuwaalo Eeya! **4** Tatoonu tadiila moohe to Eeya, yaa Eeya? Tatoonu tadiila mohuto mopo habari odudaá Eeya? Eeyaalo wambaio tamantali. Tootoonulalo bangusa mamonaó mai molubo Eeya, sababu totoonulalo huhutu lo Eeya u aadili maa iloontonga lotaa ngoámila." **5** Lapataó uito watia loóonto mola Bele lo Eeya tosologa lohuó, wau Kema lo Eeya woluo todelomio. **6** Tulusi opitu malaikati wolo opitu baala boito yilumualai lonto Bele lo Allahu Taáala. Pakeyangi limongolio lonto kaingi lenani ubelesi wau heinta-intaawa. Wau timongolio lomake heito duhelo u pilohutu lonto hulawa. **7** Lapataó tala tuwau lo wopato mahaluku boito longohi ode opitu malaikati boito pitu tapahula hulawa upolu-polu wolo muluka lo Allahu Taáala, -- Allahu Taáala tatumu-tumulo ohiheo-hiheolo maó. **8** Yi Bele lo Allahu Taáala boito lopolu wolo poloó lonto odudaá wau kawasa lo Allahu Taáala. Wau ngotilongadu opitu baala udilelo lo opitu malaikati boito diipo lopulito, yi diaaluo penu boli ngotaa maó tamoo tuwoto ode delomo Bele lo Allahu Taáala.

**16:1** Lapataó watia loódungohe suala daá lonto delomo Bele lo Allahu Taáala lotahuda ode opitu malaikati boito, "Ponaólo wau tuwatalo mola tuango lo opitu tapahula muluka lo Allahu Taáala boito ode yitaato dunia!" **2** Malaikati bohulio malonaó wau loluwato mola tuango tapahulalio ode dunia. Yi malo butulo mola boboo-heyaalo u polu-polutuó wau malo moótihela hapato to ngoámila taa o tuoto binatangi boito, wau totau-tauwalo tahi poluboa builio. **3** Lapataó uito malaikati oluolio loluwato mola tuango tapahulalio ode deheto. Yi taluhu deheto olo lowali debo odelo duhu lotailate, wau mailateelo mola totoonulalo mahaluku todelomo deheto. **4** Lapataó uito malaikati otolulio loluwato mola tuango tapahulalio ode duduu-tulaalo wau ode bubuu-tuwaala lotaluhu, yi ngoámila taluhio lowali duhu. **5** Watia loódungohe malaikati taókawasa totudu lotaluhu

lolojiya, "Hukuumani umaa pilodehu mai lo Eeya yito aadili, ooó Laba-labaalo mantali, Allahu Taáala tawoluo, wau tamawoluo! **6** Timongolio malo potuwato duhu umati lo Allahu Taáala wau duhu lomongo nabi; botia Eeya mohutu olimongolio mongilu duhu. Memangi mapatutilio uito ode limongolio!" **7** Lapataó watia loódungohe suala lonto mesba loloiya mai, "Eeya, Allahu Taáala Laba-labaalo kawasa, otutu wau aadiliilo mola totoonulalo hukuumani u pilodehu mai lo Eeya!" **8** Lapataó uito malaikati opatio loluwato mola tuango tapahulalio ode mato lodulahu, yi mato lodulahu olo yiluasilio lomobu manusia wolo patulio upolu-polutuó boito. **9** Manusia pilobu lopatulio ulaba-labaalo, wau timongolio helo laáanati tanggulo Allahu Taáala, taókawasa to babaa-lawaaló boito. Eleponu odito, timongolio diila lohuto lolilihu lonto duduu-sawaalo limongolio wau diila lohuto lomuji odudaá lo Allahu Taáala. **10** Lapataó malaikati olimolio loluwato mola tuango tapahulalio ode tambati huhuloá lo binatangi boito. Yi ngoilanggubu tambati huhuloá lo binatangi boito lowali lodiólomo, wau manusia lodengeta dila sababu longongoto. **11** Lapataó timongolio helo laáanati Allahu Taáala tosologa sababu timongolio longongoto wau sababu boboo-heyaalo limongolio. Bo timongolio diila olo lolilihu lonto totoonulalo huhutu limongolio u hileeta. **12** Lapataó uito malaikati olomio loluwato mola tuango tapahulalio ode Dutula Eperat uleidaá boito. Yi dutula boito mailooti tilinggula mongo olongia lonto tiimuru lowali lolibaya maó. **13** Lapataó watia loóonto totolu rohu hileeta ulakulio debo odelo tumbihe. Motiidu tumbehe boito yilumualai lonto ngango lonaha, lonto ngango lo binatangi, wau lonto ngango lonabi paluti. **14** Timongolio yito roroo-huwaalo hileeto tahe lohutu moólinggolabe. Otolu rohu boito lonaó ode ngoáamila olongia ngoilanggubu dunia wau longambu olimongolio u mopaatea to Dulahu u udaá, deúito-yito Dulahu lo Allahu Taáala Laba-labaalo kawasa. **15** "Dungohilo! Wau dungga-dungga mai debo odelo tamootaówa! Potisanangilo tutu taa u debo dapadapato wau modaha boólio, tilinggula tio diila monaó lou laalaala wau mowali moolito totalu lotaa dadaata!" **16** Lapataó roroo-huwaalo boito longambu mongo olongia boito totambati u tobahasa lo Ibrani ilunte Harmagedon. **17** Lapataó uito malaikati opitulio

loluwato mola tuango tapahulalio ode dulente. Yi mailo dungohe suala daa lonto tambati huhuloa li olongia to Bele lo Allahu Taala, u lotahuda, "Mailapato!" **18** Lapatao malo toduwolo mola ilato lawode-molawode wau suala bulonggodu hula-hulabio wau bulo-bulonggalio, wau liluhu upolu-polutu. Diila peenta maohelo toduo mai liluhu debo odelo uito anggadu manusia pilowali-Lio. Utie-utieelo liluhu umalo laba-labaalo. **19** Kota uleidaa boito lopo lowali tolo tayadu, wau loantulu lomola olo kokoo-tawaalo lo ngoamila lipu todunia. Lapatao iloeela mola lo Allahu Taala Babel uleidaa boito. Yi Allahu Taala lohutu olio ohilaa mongilu angguru monto tapahula lo angguru Allahu Taala -- deuto-yito angguru lomulukaa-Lio uwali-walihuhu. **20** Ngoamila pulo yilooli lomola, wau ngoamila huidee olo yilooli. **21** Didi daa lo esi, u tinggai ngobuheeto limo lopuulo kilo garamu, lodehu mai lonto hulungo lolemba totau-tauwalo. Yi timongolio helo laanati Allahu Taala sababu baala lodidi esi ulaba-labaalo daa boito.

**17:1** Lapatao uito ngotaalio lo opitu malaikati tadihu-dihu pitu tapahula boito lonaohelo mai ode laatia wau loloiya, "Dulo, wau mamopo bilohei olemu woloolo mola tasuuntali daa boito mahukuu-maniyolo, deuto-yito kota leidaa boito u bilongulio totili lo duduu-tulaalo. **2** Mongo olongia lodunia helohutu huloto wolio, wau tuango dunia lowali hiluwoaa sababu longilu angguru polo hulotolio." **3** Lapatao Rohullah longawasa mai olaatia, wau malaikati boito lodelo olaatia ode huta datahu u luasi daa wau delita. Mola teto watia loonto taabua ngota hulohuloaa toitaato binatang tuwau u lakulio meela mohulango, wau upolu-polu leituladu wolo tataa-nggulaalo mohina to Allahu Taala. Binatangi boito olunggongo pitu wau otunge mopulu. **4** Taabua boito pakepake boohelo lakulio lailoumu wau meela mohulango, wau diladailio wolo papaa-keyaalo hulawa, popoo-liyotowalo wau mutiala. To uluulio tio dihudihu manggo hulawa tuwau upolupolu wolo susuu-aliyaalo uhina wau kootolo, hungo loohelo polo hulotolio. **5** Tobayalio tulatulade tanggulo tuwau u oboliilio hitua-tuawua u milakusudu hetuuloo. Tanggulo boito yito "Babel U Leidaa, tiilo lotoonula tasuuntali wau taa loruusa todunia." **6** Lapatao watia loonto deu taabua boito



hiluwoaá wolo duhu umati lo Allahu Taáala wau duhu lotau-tauwalo tapilate yila-yilateelo maó sababu tatapu wau molotolo hilao toli li Isa. Tou watia loóonto taabua boito, watia lolinggolabu daá. **7** Tulusi malaikati boito loloiya mai olaatia, "Wolo sababuulio yio lolinggolabu daá? Opiohelio wau mopooáa mai olemu hitua-tuawua milakusudu hetuoó lotaabua boito wau rahasia lo binatangi umaa tilaéyalo, deúito-yito binatangi u olunggongo pitu wau otunge mopulu. **8** Binatangi boito muloololio mai tilumumulai, bo botia diilalo tilumumulo. Tio ngopeéepo mola malumualo monto pangato lomautu wau mamonaó moti dulungo ode obobinasa. Tau-tauwalo tahitumula todunia, u tanggulio diila leidaputali todelomo Buku Taa Tumutumulo tou dunia botie diipo pilowali mai mamó linggolabu wonu moóonto binatangi boito. Sababu binatangi boito muloololio mai mapeéenta tilumumulo. Botia tio diilalo tilumumulo, bo tio mamuli lumenetai. **9** To delomo suáli botie palalu o hikimati wau huhaama. Pitu lunggongo boito yito pitu huludu, deúito-yito huhuu-luduwaalo tambati pilo tihuloáa lotaabua boito. Wau pitu lunggongo boito olo yito pitu onlongia: **10** Limo lonto olimongolio malodehu, tuwau donggo hemo malenta wau tuwau poli diipo leidungga mai. Wonu tio demei dungga, tio musi momalenta bo ngopeé mola. **11** Wau binatangi u muloololio mai mapeéenta tilumumulo, bo botia diilalo tilumumulo, deúito-yito onlongia u owalulio. Tio yito tala tuwau lo opitu onlongia boito olo, u botia donggo dulu-dulunga ode obobinasa. **12** Tunge mopulu u iloontongamu boito yito mopulu onlongia udiipo lolumulo lomalenta. Bo timongolio mawohialio kawasa u momalenta odelo onlongia peé-peéenta wolo binatangi boito ngojamu mola hiheolio. **13** Opolu onlongia botie ngoáamilalo opatuju u tutuuwauwa; timongolio ngoáamilalo mohudu maó olootolo wau okokawasa limongolio to binatangi boito. **14** Timongolio mamopaatea moluwali Walaó Himba boito. Bo Walaó Himba boito wolo tahiduduá o-Lio utatapu wau molotolo hilao tamaa tiliya-Ngio wau tilulao-Tio boito mamó poólaaheó mongo onlongia boito, sababu Tiolo Eeya louí totoonulalo tuani, wau Olongia louí totoonulalo onlongia." **15** Malaikati boito loloiya olo, "Taluho u iloontongamu boito, tambati pilo tihuloáa lo tasuuntali boito, deúito-yito babaa-ngusawalo, raraa-aayatiyalo,

lilii-puwaalo, babaa-hasawaalo. **16** Tunge mopulu u iloontongamu wau binatang boito mamolono tasuuntali boito. Timongolio mamolambata totoonulalo hitua-tuawua u mililikiilio, wau mopolaala olio. Timongolio mamonga tapulio wau mopobinasa olio wolo tulu. **17** Sababu Allahu Taála malo pooliyooó hilaa limongolio u moponaoó lanjana lo Allahu Taála. Allahu Taála lohutu olimongolio ngopikiilangi u mohudu okokawasa limongolio to binatang boito, alihu binatang boito momalenta tunggula motoduo wolo upilo tahuda lo Allahu Taála. **18** Taabua taa iloontongamu boito yito kota leidaá, u momalenta mongo olongia todunia."

**18:1** Lapataoó uito watia looonto mola malaikati ngota wewolio lolaabei lonto sologa. Tio okawasa uleidaá, wau baangio lohutu ngoilanggubu dunia lowali lotilango. **2** Wolo suala daá tio longiibodu, "Malodehu! Babel leidaá malodehu! Botia tio lowali tambati lo lalaa-tiyaalo wau roroo-huwaalo u hileeta. To delomio hitumula totoonulalo bulungi hidala-dalaala unajiisi wau uilonuoó tau. **3** Sababu totoonulalo bangusa malongilu angguru lonapusu polo hulotolio. Mongo olongia lodunia helohutu huloto wolio, wau tahipo dahangia todunia lowali kaya lo napusuulio udiilalo iloótonga boito." **4** Lapataoó watia loódungohe mola suala wewo lonto sologa lotahuda mai, "Luwaloolo, umati-U! Luwaloolo monto delomio! Timongoli diila maó poduduaá duduu-saallo, wau moduduaá momanta hukuu-manilio! **5** Sababu dusalio wonto-wontolo demola hulungo, wau Allahu Taála mamoeéla ololeetio. **6** Pohutua maó tio debo odelo tio malo pohutu mai olimongoli; balasiyalo tio poooluo piúwa duólo ngoáamila umaa pilohutulio. Tuangilo manggolio wolo minumani u poooluo lebe motoheetaoó wolo minumani upilo dapatio maó olimongoli. **7** Wohiyalo olio polodutolo wau osuusa lohilao u tutuuwauwa daatalio wolo odudaá wau ododaata ngoáamilalo u yilohilio ode batangalio lohihilao. Sababu tio wambaó laito hemoloiya to batangalio, 'Wau botie olongia taabua tahemo malenta! Wau diila janda; wau diila tamoó toduo mai osuusa!' **8** Sababu suáli boitolo, yi todelomo dulahio tuwau wambaio tio maódungga mai lobaala -- ngongoto, osuusa, wau polobiti. Wau tio mapobuwolio wolo tulu, sababu okawasaalo Eeya Allahu Taála tamo mutoó olio boito." **9**

Mongo olongia lodunia tamoduduá todelomo huhuu-tuwaalo hulotolio wau napusu lotaabua boito mahumoyongo wau mohilimutaó kota boito wonu bolo timongolio moóonto poloó mohubulo mola monto tulu u momobu olio. **10** Timongolio matimihula monto molamingo sababu timongolio moohe otuhata lopolo dutololio. Timongolio mamoloiya, "Aduu, malo odie topotalalio kota umasa-masahulu botie -- kota Babel u molotolo! To delomo ngojamu wambaó hukuumanimu mapilonao!" **11** Mongo daahangi todunia olo humoyongo wau motilimi sababu taabua boito, sababu diaaluo penu boli ngotaa maó poli tamotali babaa-langiyalo hepo daahangi limongolio. **12** Diaaluo tamotali hulawa, talaá, poliyoto wau mutiara limongolio; wau olo kaingi lenani, kaingi lailoumu, sutera, kaaini meela mohulango: totoonulalo ayu hidala-dalaala udiila laito odungga, babaa-langiyalo monto tuálanga wau monto ayu u himahalea monto tombaha, wate, wau puaalamu; **13** alipo ayu moolingo, rambaramba, alama u boboolo moonu, damahu u moonu boolio, wau alama; angguru wau yinulo, labu wau pale, sapi wau himba, wadala wau kaleta, mongo wato, tumbaó nyawa lomanusia olo. **14** Mongo dahangi loloiya maó ode taabua boito, "Ngoáamila u otohilaa milikiyomu madiduluo maó, wau totoonulalo ododaata ngoáamilalo uwolemu wau totoonulalo u mopiohu olemu mailooli. Diilalo odunggamu!" **15** Mongo daahangi tamalowali kaya sababu helo daahangi tokota boito matimihulo monto molamingo, sababu timongolio moohe otuhata lo polo dutololio. Timongolio mahumoyongo wau motilimi, **16** lapataó molojiya, "Aduu, malo odie topotalalio kota umasa-masahulu botie! Biasaalio tio kakaingi lolenani, kaingi lailoumu wau kaingi meela mohulango; biasaalio tio polupolu wolo pake hulawa, poliyoto wau mutiara. **17** Bo todelomo ngojamu wambaó, tio mailoolia lo totoonulalo okokayalio boito!" Ngoáamila nakoda, panumba, wau tauilo kaapali, wau ngoáamila taa u popehulio todeheto, tilimihula lonto molamingo. **18** Wau hiwatiá tou timongolio loóonto mota poloó lohubulai lonto tulu ulomobu kota boito. Timongolio longiibodu, "Diila peéenta maó woluo kota wewo debo odelo kota leidaá botie!" **19** Yi timongolio lomuyuhude peahuó to lunggongi mongolio odelo tuoto lotilimi, tulusi hilumoyongo wau wuwa-wuwaatió,

"Aduu, malo odie topotalalio kota leidaa botie! Okokayalio malohutu ngoaamila taa o kakaa-paliyaalo todeheto lowali kaya! Bo todelomo ngojamu wambaó, tio mailoolia lou totoonulalo maó!" **20** Wuu sologa, poti wengahulo mola to oáantulu lokota boito! Wuu umati lo Allahu Taáala, mongo rasulu, mongo nabi, poti wengahulo mola! Sababu Allahu Taáala malo hukuumani mai olio odelo toli tou wolo uma pilohutulio limongoli! **21** Lapatao uito, malaikati ngota tamolotolo boli buheli daa lomintaá botu tuwau -- debo odelo udaa lobotu hihilinga uleidaa -- tulusi pilomahulio mola ode delomo deheto wau loloiya, "Odieelo mola pohuliilio kota lo Babel umasa-masahulu boito mapo mahulolio lou moóohuu tilinggula diilalo odungga. **22** Tingohu muusiki monto tamooitohe kocapi, monto bibii-duwaniyalo, monto tamoo-hiipawa tulali monto tamoo-hiipawa torompeti, diilalo odungohe monto olemu! Diilalo odungga olo penu boli ngotaa maó taáhali mokalaja teto, wau tingohu botu pohilinga olo diilalo odungohe. **23** Tau diilalo moóonto olo tilango tohe monto olemu; wau diilalo odungohe olo olaame potihunggu lonika teto. Mongo daahangimu yito tau-tauwalo talaba-labaalo tahimulowa lo ulipu todunia, wau wolo iii-limiyalo sihirimu yio helo himbulo ngoaamilalo bangusa todunia!" **24** Babel hilukuumani-Lio sababu todelomo kota boito mailo dungga duhu lomongo nabi, duhu umati lo Allahu Taáala -- limbuio maó duhu lo ngoaamila taa u mapilatelio yila-yilateelo maó totudu lodunia.

**19:1** Lapatao uito watia loódungohe hitua-tuawua debo odelo suala bubuu-lontunga lotaa dadaata lonto sologa tahemo ngibo-ngiibodu, "Pujiaalo Allahu Taáala! Allahu Taaalanto yito Allahu Taáala tamo poáahu; Tio Allahu Taáala taúdaa wau okawasa! **2** Pomuto-Io aadili wau molinepo! Tio malo podehu mai hukuumani to tasuuntali daa, tamoruusa dunia wolo polo hulotolio. Allahu Taáala malo hukuumani mai tasuuntali boito, sababu tio lomate yila-yilateelo maó mongo wato lo Allahu Taáala." **3** Lapatao suala lotaa dadaata boito luli longiibode, "Pujiaalo Allahu Taáala! Poloó lotulu u momobu kota leidaa boito mamó hubulo diila ohuhe-huheliilio!" **4** Yi odulo pulaa pato tauwa boito wau opaato mahaluku u hipalita totambati huhuloa li olongia boito leidambaólo mola

wau lolubo Allahu Taáala tahulo-huloáa toitaato tambati huhuloá li olongia. Timongolio loloiya, "Amin! Pujiaalo Allahu Taáala!" **5** Lapatao dungo-dungohei lonto tambati huhuloá li olongia boito suala u loloiya, "Pujiaalo Allahu Taáala, wuu ngoáamila wato lo Allahu Taáala, wau ngoáamila tau -- udaá wau kikiio -- tamolubo Allahu Taáala!" **6** Lapatao uito watia loódungohe hitua-tuawua debo odelo suala ngopoambua lotaa dadaata daá; tingohio debo odelo buolo u hulo-hulopaio wau debo odelo bulonggodu u bubuu-lontunga. Watia loódungohe olimongolio loloiya, "Pujiaalo Allahu Taáala! Sababu Eeya, Allahu Taáalanto Taa Laba-labaalo kawasa boito masaatia hemo malenta!" **7** Duloolo ito motisangi wau motiwengahu; duloolo ito momuji odudaá-Lio! Sababu malei dungga dulahu ponikaalo umodihu garai Walaó Himba boito, wau bulentiti-Lio malo tidapato tonika-Lio. **8** Pakeyangi lenani u heinta-intaawa mailohi olio u pomake." (Pakeyangi lenani boito yito totoonulalo huhutu mopiohe u pilohutu umati lo Allahu Taáala.) **9** Lapatao malaikati boito loloiya mai olaatia, "Tulade maó utie: 'Potisanangilo tutu taa tiloduo ode potihunggu lonika Walaó Himba boito.'" Lapatao malaikati boito luli loduhengai, "Uti-utieelo habari u otutu lonto Allahu Taáala." **10** Watia leidambaolo mola totalu lo malaikati boito wau ohilaa molubo olio, bo tio loloiya mai olaatia, "Diila! Diila polubo olau, tubowalo Allahu Taáala sababu wau olo wato tutuuwauwa debo odelo yio wau debo odelo ngoáamila wutatumu tadihu-dihu tiootutua to ososakusi li Isa!" Sababu ososakusi li Isa boitolo u loilihami mai totau-tauwalo tahipo nubuwatia. **11** Lapatao watia loóonto mola sologa lohuo, tulusi oóonto mai wadala hula tuwau. Joki-Lio tailunte Sangi Tatapu wau Molotolo Hilao wau Sangi Otutu. Tio aadili todelomo mopodehu hukuumanu wau todelomo popaatea u pilohutu-Lio. **12** Mato-Lio debo odelo leito tulu wau tolunggo-Ngio Tio pakepake makuta dadaata. To batanga-Lio tulatulade tanggulo tuwau; wau bo Tio lohihilao tamotota tanggulo boito. **13** Jumba u pilomake-Lio mailomu todelomo duhu. Wau Tio ilunte "Tahuda lo Allahu Taáala". **14** Suludadu popaatea losologa hiduduá o-Lio wolo hitaeya towadala hula, wau hipakea lenani, u moputio belesi. **15** Lonto ngango-Lio yilumualai wamilo tuwau u molalito wau wolo wamilo boito Tio mamoo olaaheo babaa-ngusawalo, wau Tio

mamo malenta olimongolio wolo tunggudu wate. Tio mamo mitode angguru to pakaakasi hepo mitodelo angguru muluka lo Allahu Taála Taa Laba-labaalo kawasa. **16** Tojumba-Lio wau to bungolopa-Lio tulatulade tanggulo utie, "Olongia totoonulalo onlongia, wau Eeya totoonulalo tuani." **17** Lapatao watia loonto mola malaikati ngota tihutihulo toitaato mato lodulahu. Wolo suala daa tio longiibodu ode ngoamila bulungi u hitombota todulente. "Duloolo motiambu u modumango ode potihunggu daa u pilopo lamahu lo Allahu Taála! **18** Duloolo molamela tapu lomongo onlongia, tapu lomongo eyaanggu, wau tapu lo paapahaa-lawaniyalo; duloolo ito molamelo mongo joki lowadala wolo wawaa-dalaalio wau tapu ngoilanggubu umati lomanusia, udaa wau kikiió, wato boli tau lolopato!" **19** Lapatao watia loonto binatang boito, wau mongo onlongia lodunia wolo diti lo popaatea limongolio, lotiambu u mopaatea moluwali o-Lio u taetae towadala hula boito wau diti lo popaatea-Lio. **20** Yi binatang boito ilowaupa pee-peenta wolo nabi paluti tamalohutu momoo-linggolabeyalo totalu lo binatang boito. (Wolo momoo-linggolabeyalo boitolo binatang boito helo himbulo totau-tauwalo taotuoto binatang boito, wau tahi polubowa bui lo binatang boito.) Tulusi binatang boito wau nabi paluti boito pilomahulo hitumula ode delomo auhu tulu ulei-leita wolo walirangi. **21** Wau diti lopopaatea limongolio hepilate yila-yilateelo maó wolo wamilo u yilumualai lonto ngango joki lowadala hula boito. Yi bubuu-lungiyala olo matilu mombotai yilonga wolo mangowalio tapu limongolio tahe pilate yila-yilateelo maó boito.

**20:1** Lapatao uito watia loonto mola malaikati ngota lolaahi lonto sologa. To uluulio tio dihudihu uunti pangato lomautu wau pomungu tuwau uleidaa. **2** Tulusi tio loheupa naha boito, tulidee panggola, -- deuito-yito Ibilisi meaalo Rohu Moleeta boito -- wau lomungu maó ngolihi lotaunu mola hiheolio. **3** Lapatao malaikati boito lopomahula mola naha boito ode delomo pangato lomautu, tulusi longunti pangato boito wau silehelilio, alihu naha boito diilalo mowali mohimbulo to babaa-ngusawalo tou diipo maasa ngolihi lotaunu mola boito mopulito. Lapatao uito tio musi hulialo towakutu ungopee mola. **4** Lapatao watia loonto mola



totoonulalo tambati huhuloá li olongia, wau tau-tauwalo tahihuloáa totambati huhuloá li olongia boito yilohia kawasa u mopodehu hukuumani. Watia loóonto mola olo jiwa lotau-tauwalo tamaa hetimade lunggongio sababu timongolio helongohi sakusi pasali li Isa, wau helo pololadu tahuli lonto Allahu Taáala. Tau-tauwala boito diila hipolubowa binatangi meaalo builio. Timongolio olo diila peéenta maó lololimo tuoto lo binatangi boito tobaya meaalo to uluú limongolio. Yi timongolio muli tumumulai wau momalenta odelo olongia peé-peéenta woli Isa ngotilonggadu ngolihi lotaunu mola hiheolio. **5** Uti-utieelo bohulo tahapu tau-tauwalo mate muli bongulo-Lio mai. (Bo tau-tauwalo mopoowate wewolio diilalo potumulo-Lio mai ngotilonggadu wakutu ngolihi lotaunu mola boito.) **6** Potisanangilo tutu tau-tauwalo tamoduduá muli bongulo-Lio mai tobohulo tahapu boito. Timongolio paatuti mowali miliki lo Allahu Taáala. Opopate u oluolio diila okawasa toli mongolio. Timongolio mamowali mongo iimamu lo Allahu Taáala mongo iimamu li Almasi; wau timongolio mamomalenta peé-peéenta wo-Lio ngolihi lotaunu mola hiheolio. **7** Lapataó mopulito ngolihi lotaunu mola boito, Ibilisi malopato-Lio monto tutupalio, **8** wau tio mamonaó mongaakali babaa-ngusawalo taloó-loópo to ngoilanggubu dunia, deúito-yito Gog wau Magog. Ibilisi mongambu olimongolio u mopaatea, tuwaulio lojumulaa udadaata tutu, debo odelo daata lohungayo todeheto. **9** Yi timongolio olo moti pulepelo mola ode ngoilanggubu dunia, tulusi momala pilo tikemawa umati lo Allahu Taáala wau kota upilonu lo Allahu Taáala. Bo tulu motuhutai monto hulungo wau mopobinasa olimongolio. **10** Lapataó Ibilisi u mohimbulo olimongolio boito, pomahulo-Lio ode delomo auhu tulu wau walirangi. Teteetolo tambatilio lo binatangi wau nabi paluti boito pomahulolo meimulo. Timongolio masakisaa-Lio hui wau dulahu u ohiheo-hiheolo maó. **11** Lapataó uito watia loóonto mola tambati huhuloá li olongia moputió tuwau uleidaá wau Tio tahulo-huloáa toitaatio. Hulungo wau dunia yilooli lonto talu-Lio, tilinggula diilalo iloontonga. **12** Wau watia loóonto tau-tauwalo yilate, kikiió, udaá, hitihula totalu lotambati huhuloá li olongia boito. Yi bubuu-kuwaalo olo hiluólio. Tulusi buku tuwau u wewo hiluólio mola, deúito-yito Buku lo Taa Tumutumulo. Lapataó hukuumani

pilopodehu-Lio totaa yilate, lobaalia wolo huhutu limongolio loduduá u tulatulade todelomo bubuu-kuwaalo boito. **13** Lapataó deheto lohudu maó tau-tauwalo tailate tawoluo to delomio. Mautu wau Aalamu lomautu olo lohudu maó tau-tauwalo tailate tawoluo to olio. Wau tau-tauwalo tailate boito ngoáamilalo dilehua hukuumaní lobaalia wolo huhutu limongolio. **14** Lapataó Mautu wau Aalamu lo Mautu pilomahulo ode delomo auhu lotulu. (Auhu lotulu botie yito opopate tahapu oluolio). **15** Tau-tauwalo tadiila hitulade tanggulio todelomo Buku lo Taa Tumutumulo, pilomahulo ode delomo auhu lotulu.

**21:1** Lapataó watia loóonto mola hulungo u bohu wau dunia u bohu. Hulungo bohulio wau dunia bohulio olo yilooli, wau deheto olo yilooli. **2** Yi watia loóonto mola kota mantali boito, deúito-yito Yerusalemu u bohu, lolaabei lonto sologa lonto Allahu Taáala. Kota boito mapilo dapato debo odelo ngotaalio li bulentiti taabua diladai u modunggaya wolo bulentiti talolai. **3** Lapataó watia loódungohe suala lonto tambati huhuloá li olongia boito longiibode wolo loóohuí, "Botia tambati biluloá lo Allahu Taáala yito peé-peéenta wolo manusia! Tio matumumulo woli mongolio wau timongolio mamowali umati-Lio. Allahu Taáala lohihilao mawoluo mai woli mongolio wau mowali Allahu Taáala limongolio. **4** Tio mamomaide ngoáamilalo ponu monto mato limongolio. Opopate madiduí; osuukali, hiyongo, meaalo penu boli moólaasa ngongoto olo madiduí. Susuu-aliyaalo udeedelo mailooli." **5** Lapataó Tio tahulo-huloáa toitaato tambati huhuloá li olongia boito lotahuda, "Botia Wau mamohutu ngoáamilalo bohu!" Tio lotahuda olo olaatia, "Tuladelo utie, sababu tataa-heyaaalo botie otutu wau mowali palacayalo." **6** Lapataó Tio lotahuda mai, "Mailapato! Wau lo tabohulio wau tapulitio; Wau lo Eeya monto Bohulio demola Pulitio. Timiidu taa u mototoángo, mapelumo-U wolo beebasi monto butu lotaluhu u mongohi tutumulo. **7** Tau-tauwalo taloóhaama mamololimo susuu-aliyaalo boito monto ola-U. Wau mamowali Allahu Taáalaalio, wau tio mowali walauu-U. **8** Bo taa mooheya, tamoo-hiyanatia, taa moruusa, tamoomatea mate-mateelo maó, taa huloto, taa u momeke iii-limiyalo gaibu tamoo-lubowa balaahala, wau ngoáamila tamoo-himbuloa,

mapomahulo ode delomo auhu lotulu wau walirangi uhinta-hintalabu, deũito-yito opopate tahapu oluolio." **9** Ngota towolota opitu lo malaikati boito tamaa lodihu motiidu tataa-pahulaalo u polupolu wolo opitu baala pulitio boito lonaó mai ode laatia wau loloiya, "Dulo! Wau mamopo bilohei olemu Bulentiti, deũito-yito dile taabua lo Walaó Himba." **10** Yi Rohullah longawasa mai olaatia wau malaikati boito lodelo mola olaatia ode balitutuó huidu u molanggato daá. Tio lopobilohe olaatia Yerusalemu, kota mantali boito, kota boito lotuhutai lonto sologa, lonto Allahu Taáala, **11** wolo tinelo wau odudaá lo Allahu Taáala. Kota boito molilingga debo odelo botu poliyoto, debo odelo botu baiduri ponda u moolango debo odelo kristali. **12** Dingingo meeseli topalitio molanggato wau udaá, wolo mopulaa duluo huhebu hulubangilio, wau dilaaha lo malaikati mopulaa duluo. To motiidu hulubangi boito hitulade tanggulo loui mopulaa duluo suku bangusa lo Isirailu. **13** Mohelu totolu huhebu hulubangi u talutalu ode timiidu mantahu: totolu to ambahu tiimuru, totolu to ambahu hulialio, totolu to ambahu tilayo, wau totolu to ambahu otolopa. **14** Dingingo meseli lokota boito bilongulio toitaato mopulaa duluo lobotu pundasi. To boboo-tuwaalo pundasi boito hitulade tanggulo lo opulaa duluo rasulu lo Walaó Himba boito. **15** Malaikati talo bisala wolaatia boito o tunggudu poluudu lonto hulawa, u moloudu kota boito, motiidu huhebu lo hulubangilio, wau dingingo meeseliilio. **16** Kota boito modeliilio otutulio wopato -- hayaio tutuuwauwa wolo tanggalio. Yi malaikati boito loluudeó kota boito wolo tunggudu poluudio; lopatataó hayaio dulo lihu wopato hetuto kilo; tanggalo wau langgatio tutuuwauwa wolo hayaio. **17** Tou malaikati boito loluudeó dingingo meeseliilio lopatataó langgato dingingo meeseli boito wolomo pulu lomeeteri. Tuuudu u pilomake lo malaikati boito yito tuuudu uhepomake lomanusia. **18** Dingingo meeseli lokota boito pilohutulio lonto botu baiduri ponda, hiambola kotalio lohihilao lonto hulawa tutu, moolango debo odelo winggilua. **19** Boboo-tuwaalo pundasi lokota boito diladai wolo totoonulalo botu poliyoto hidala-dalaala. Botu lopundasi u bohulio pilohutu lonto botu baiduri ponda, u oluolio lonto botu poliyoto hamahama moidu, otolulio lonto botu poliyoto lakulio moidu, opatio lonto botu poliyoto moidu ohalaga daá, **20** olimolio lonto botu

baiduri sepa, olomio lonto botu poliyoto meela, opitulio lonto botu poliyoto molalahu hulawa, owalulio lonto botu poliyoto moidu monto wahuéntea, otiolio lonto botu poliyoto molalahu u ohalaga daá, opululio lonto botu poliyoto krisopras, opulaa tuwaulio botu poliyoto lajuard, wau opulaa duloolio lonto botu poliyoto lailowumu. **21** Opulaa dulo lohuhebu hulubangilio tilitangoa lou mopulaa dulo mutiara, timiidu huhebu pilohutu lonto mutiara ngobotu. Dalalo tokota boito pilohutu lonto hulawa tutu, moolango debo odelo winggilua u molilingga. **22** Watia diila loóonto Bele lo Allahu Taáala todelomo kota boito, sababu Bele lo Allahu Taáalaalio yito Eeya lohihilao, Allahu Taáala Taa Laba-labaalo kawasa, wau Walaó Himba boito. **23** Kota boito diila palalu otinela mato lodulahu meaalo hulalo, sababu odudaá lo Allahu Taáala molinela olio, wau Walaó Himba boito yito tohelio. **24** Babaa-ngusawalo todunia mamonaó todelomo tinelio, wau mongo olongia olo mamodelo okokaya limongolio ode delomo kota boito. **25** Huhuu-hebuwaalo lokota boito mamohuoó ngotupa lodulahu; diila taheeütalio sababu diaaluo hui teto. **26** Odudaá wau okokaya lo babaa-ngusawalo madeloolio ode delomo kota boito. **27** Bo taa umohutu susuu-aliyaalo umoó lonuoó, meaalo taa u mohimbulo -- limbuio maó penu boli wolo unajisi wambaio, sama-samaata diila tatumuwota ode delomio. Tamaa tumuwotaó bo taa u tanggulio tulatulade todelomo Buku Taa Tumutumulo, buku lo Walaó Himba boito.

**22:1** Malaikati boito olo lopo bilohei olaatia dutula u taluhio mongohi tutumulo. Dutula boito heinta-intaawa debo odelo Kristali, wau tolo-tolohei lonto tambati huhuloá lo Allahu Taáala wau Walaó Himba boito, **2** tohuungo dalalo tokota boito. Tobiihu dutula boito, tomohu-mohualialio woluo bungo lo ayu pobutua lo tutumulo, u hemomungo poóopulaa dulo ngotaunu, deüito-yito peéenta ngohula. Duungio hepomake u mopoóluli babaa-ngusawalo. **3** Todelomo kota boito diaaluo penu boli tuwau maó u ilotuhata laánati lo Allahu Taáala. Tambati huhuloá lo Allahu Taáala wau Walaó Himba boito maa odungga todelomo kota boito. Mongo wato-Lio mataaaluku wau mohulumati to o-Lio, **4** wau moóonto baya-Lio. Tanggu-Lio matuladulo tobaya limongolio. **5**

Timongolio diila tamomalalu tohe meaalo tinelo dulahu, sababu hui madiduu, wau Eeya Allahu Taála lohihilao mamolinela olimongolio. Yi timongolio mamomalo odelo olongia u ohiheo-hiheolo maó. **6** Lapataó malaikati boito loloiya mai olaatia, "Loiya botie otutu wau mowali palacayalo. Eeya Allahu Taála talongohi mai Rohu-Lio tomongo nabi, malo ngutolia malaikati-Lio u mopo biloheó tomongo wato-Lio wolo umusi huáa motoduo mai." **7** "Poótuota maó utie!" tahuda li Isa, "Wau mahuáa meidungga mai. Potisanangilo tutu tamodungohe loloo-iyaalo lo nubuwati todelomo buku botie!" **8** Watia, Yahya, maloó dungohe wau loóonto ngoáamilalo botie. Lapataó watia yilapato lodungohe wau loóonto olio watia leidambaólo mola totalu lo malaikati tamalo pobilohei olaatia ngoáamilalo boito, wau watia ohilaa molubo olio, **9** bo tio loloiya mai olaatia, "Diila! Diila polubo olaatia. Tubowalo Allahu Taála! Sababu watia olo wato debo odelo yio, wau debo odelo mongo wutatumu mongo nabi wau ngoáamila taa u modungohe tataa-huliyaalo todelomo buku botie!" **10** Lapataó tio luli loloiya, "Diila maó depuhe loloo-iyaalo lo nubuwati todelomo buku botie, sababu malembidei wakutuulio, ngoáamilalo botie mamotoduo. **11** Taa u moleeto, hulialo maó tulusi hemohutu u moleeto; taa u najisi, hulialo maó moponajisi batangalio; taa u moduduá otohilaa lo Allahu Taála hulialo maó moduduá tulusi otohilaa lo Allahu Taála, wau taa utumu-tumulo tolomodu duólo Allahu Taála, hulialo maó tulusi tumutumulo tolomodu duólo Allahu Taála" **12** "Poótuota maó utie!" tahuda li Isa, "Diilalo mohiheo Wau mamei dungga lou modelo wuupa u motuli motiidu taa moduduá wolo umaa pilohutulio. **13** Waulo tabohulio wau tapulitio; Waulo Eeya monto Bohulio demola Pulitio." **14** Potisanangilo tutu taa u momoboá jumbalio tunggula belesi alihu timongolio ohaku molamelo hungo lo ayu potumulo wau tumuwoto ode delomo kota boito moli huhebu hulubangilio. **15** Bo tau-tauwalo tahi pohutua susuu-aliyaalo u hina, tahi pomakea iii-limiyaalo gaibu, wau tau-tauwalo tahi pohutua huhuu-hutuwaalo u huloto, tamoomatea mate-mateelo maó, tahi polubowa balaahala, wau tau-tauwalo tahi pohimbuloa, mopio wolo loiya meaalo wolo huhutu, ngoáamila tau boito tambatilio to bulemengo kota boito. **16** "Wau, Isa, malo ngutolia

malaikati-U ode limongoli alihu tio mopoótaa susuu-aliyaalo botie u polohuna daá ode jajaa-maáalo. Wau botie wali mai lei Dauda; Waulo poliyama tiimuru u mobaango boito." **17** Rohullah wau Bulentiti Taabua lotahuda mai, "Duloolo!" Timiidu taa u modungohe utie musu olo molojiya, "Duloolo!" Tatoonu tamo totoángo, mamusi tio monaó mai! Wau tatoonu tailo hilao, mamusi mohama taluhu u mongohi tutumulo boito wolo beebasi. **18** Ode timiidu taa u modungoheó loloo-iyaaala lo nubuwati todelomo buku botie, watia, Yahya u mopoéelai utie: wonu tau moduhengaó hitua-tuawua to loloo-iyaaala lo nubuwati botie, yi Allahu Taáala mamu duhengai hukuumani ode tau boito wolo babaa-lawaaalo upilo bayahei todelomo buku botie. **19** Wau wonu taa mopo kulangi maó hitua-tuawua monto loloo-iyaaala lo nubuwati botie, yi Allahu Taáala olo mamopo kulangi tayadio upilo bayahei todelomo buku botie -- deúito-yito tayade monto bungo lo ayu tutumulo wau monto kota mantali boito. **20** Tio talopo tunggulo ngoáamila habari botie lotahuda mai, "Otutu, Wau mahuáa meidungga mai!" Amin! Podunggalo mai, oo Eeya Isa! **21** Pohileaala duá Eeya Isa mongohi balakati-Lio ode ngoáamila umati lo Allahu Taáala!